


# Dios Parlapawanchej



New Testament in Quechua, South Bolivian (BL:quh:Quechua,  
South Bolivian)

## Dios Parlapawanchej

### New Testament in Quechua, South Bolivian (BL:quh:Quechua, South Bolivian)

copyright © 2011 Wycliffe Bible Translators, Inc.

Language: Quechua, South Bolivian

Translation by: Wycliffe Bible Translators, Inc.

Quechua, South Bolivian [quh], Bolivia

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Quechua, South Bolivian

### © 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

4e9265a7-b8e5-55cd-988f-a62efd77e779

## Contents

SAN MATEO . . . . .	1
SAN MARCOS . . . . .	68
SAN LUCAS . . . . .	110
SAN JUAN . . . . .	179
HECHOS . . . . .	230
ROMANOS . . . . .	295
1 CORINTIOS . . . . .	321
2 CORINTIOS . . . . .	346
GÁLATAS . . . . .	363
EFESIOS . . . . .	373
FILIPENSES . . . . .	382
COLOSENSESES . . . . .	389
1 TESALONICENSESES . . . . .	395
2 TESALONICENSESES . . . . .	401
1 TIMOTEO . . . . .	404
2 TIMOTEO . . . . .	412
TITO . . . . .	417
FILEMÓN . . . . .	420
HEBREOS . . . . .	422
SANTIAGO . . . . .	444
1 PEDRO . . . . .	452
2 PEDRO . . . . .	460
1 JUAN . . . . .	465
2 JUAN . . . . .	472
3 JUAN . . . . .	473
JUDAS . . . . .	474
APOCALIPSIS . . . . .	477

## EL SANTO EVANGELIO SEGUN SAN MATEO

*Jesucristoj ñaupaj tatasnin*

<sup>1</sup> Cay kelkaskaka Jesucristoj ñaupaj tatasnинmantamin. Jesuska Abrahammanta jamun Davidmantawan.

<sup>2</sup> Abrahamka Isaacpa tatan carka. Isaactaj Jacobpa tatan carka. Jacobtaj Judajpata waukesninpatawan tatancu carka. <sup>3</sup> Judataj Farespa tatan carka, Zarajtawan. Paycunaj mamancuri Tamar carka. Farestaj Esrompa tatan carka. Esromtaj Arampa tatan carka. <sup>4</sup> Aramtaj Aminadabpa tatan carka. Aminadabtaj Naasonpa tatan carka. Naasontaj Salmonpa tatan carka. <sup>5</sup> Salmontaj Boozpa tatan carka. Boozpa manri Rahab carka. Booztaj Rutwan Obedpa tatasnинcarkancu. Obedtaj Isaipa tatan carka. <sup>6</sup> Isaitaj camachej Davidpa tatan carka. Davidtaj Salomonpa tatan carka. Salomonpa maman ñaupajta Uriaspa warmin carka.

<sup>7</sup> Salomontaj Roboampa tatan carka. Roboamtaj Abiaspa tatan carka. Abiastaj Asaj tatan carka. <sup>8</sup> Asataj Josafatpa tatan carka. Josafattaj Jorampa tatan carka. Joramtaj Uziaspa tatan carka. <sup>9</sup> Uziastaj Jotampa tatan carka. Jotamtaj Acazpa tatan carka. Acaztaj Ezequiaspa tatan carka. <sup>10</sup> Ezequiestaj Manasespa tatan carka. Manasestaj Amonpa tatan carka. Amontaj Josiaspa tatan carka. <sup>11</sup> Josiastaj Jeconiaspata waukesninpatawan tatancu carka. Chaypacha Diospa unay runasnin Babiloniaman apaskas carkancu.

<sup>12</sup> Babiloniaman apaskas carkancu chay khepatataj Jeconiaska Salatielpa tatan carka. Salatieltaj Zorobabelpa tatan carka. <sup>13</sup> Zorobabeltaj Abiudpa tatan carka. Abiudtaj Eliaquimpa tatan carka. Eliaquimtaj Azorpa tatan carka. <sup>14</sup> Azortaj Sadocpa tatan carka. Sadoctaj Aquimpa tatan carka. Aquimtaj Eliudpa tatan carka. <sup>15</sup> Eliudtaj Eleazarpa tatan carka. Eleazartaj Matanpa tatan carka. Matantaj Jacobpa tatan carka. <sup>16</sup> Jacobtaj, María kosanpa José tatan carka. Chay Mariamanta Jesuska nacecorka. Payka Diospa ajllaskan Cristo sutichaska carka.

<sup>17</sup> Ajinapi tucuy miraycunaka Abrahammanta Davidcama chunca tawayoj yupacuncu. Davidmanta Babiloniaman Diospa runasnin apachiskas carkancu chaypachacamataj chunca tawayoj miraycuna carkancu. Babiloniaman apaskas carkancu chaymantapacha Cristo jnacecuynincamatataj chunca tawayoj miraycuna carkancu.

*Jesucristo nacecun*

<sup>18</sup> Cayjinapimin Jesucristoka nacecorka. María, Jesuspa mamanka, mañaskaña carka Josewan casaracunapaj. Manaraj tanta cashajtinctaj Mariaka wijsalliska riqhurerka Santo Espiritunejta.

<sup>19</sup> Parlaskan Josetaj chekanta ruwaj runa carka. Mana munaspa Mariati p'enkayman riqhurichiya yuyarka pacayllamanta sakepuyla.

<sup>20</sup> Chay imasmanta mayta yuyashjtintaj, khaway, Señor Dios uj angelta cachamorka. Moskoyninpi Joseman riqhurispas nerka:

—José, camachej Davidpa ayllunmanta canqui. Amaña manchachicuychu parlapayaskayqui Mariata jap'icapuya. Cay

wijsallicuskanka Santo Espiritumantamin cashan. <sup>21</sup> Mariaka uj khari wawata onkoconka. Paytajmin wiñaspa paypa cajcunanta juchamanta cacharichenka. Chayraycu Jesusta sutichanqui.

<sup>22</sup> Tucuy cayka ruwacorka Señor Diosspa niskan junt'acunanpaj. Chaytaka unay willajninnejta nerka:

<sup>23</sup> ¡Khaway! Uj sipas, mana khari rejsej, wijsalliconka. Uj khari wawata onkoconka. Payka Emanuel sutichaska canka.

Emanuel niyta munan: Dios nokanchejwan cashan yanapanawanchej-paj.

<sup>24</sup> Joseka puñuskanmanta rijch'arispa, Señor Diosmanta cachamuska, chay angelpa camachiskanmanjina ruwarka. Ajinapi payka Mariata wasinman pusacaporka runas yachanancupaj warmin caskanta.

<sup>25</sup> Joserí payta mana llanqharkachu curaj wawanta onkocunancama. Wawa nacecojtintaj Jesusta suticharka.

## 2

*Yachaysapacuna Jesusta taripaspayupaychancu*

<sup>1</sup> Jesuska Judea jallp'a Belén llajtapi nacecorka, Herodes camachishajtin, chay p'unchaycunapi. Chaypacha yachaysapacuna inti llojsimuy caru llajtamanta jamuspa Jerusalén llajtaman chayamorkancu. <sup>2</sup> Tapucorkancutaj:

—¿Maypitaj cashan israel runasta camachinanpaj nacecoj Wawarí? Ch'ascanta inti llojsimuy ladopi ricuycu. Chayta khatispataj payta yu-paychanaycupaj jamuycu, —nispa.

<sup>3</sup> Chayta uyariytawantaj camachej Herodeska mancharicorka. Jerusalén llajtapi caj tucuy runaspis paywan mancharicullarkancutaj.

<sup>4</sup> Chaymantataj Herodes tantachimorka yupaychana-wasimanta curajcunata, israel yachachejcunatawan. Paycunata taporka:

—¿Maypitaj Diosspa ajllaskan Cristo nacecunan tiyan?

<sup>5</sup> Paycunataj cuticherka:

—Judea jallp'a Belén llajtapi naceconka. Ajinata Dios unay willajninta kelkacherka:

<sup>6</sup> Kancuna, Judá jallp'a Belén llajtapi tiyacojcunata niyquichej: Judá jallp'api caj curajcunamanta aswan jatunpaj khawaskas can-quichej.

Kancunamanta uj curaj camachej naceconka.

Paytaj, ajllaska israelcunayta michenka.

<sup>7</sup> Chanta Herodes pacayllamanta yachaysapacunata wajyacherka. Ajinallatataj taporka yachananpaj mayc'ajchus chay ch'asca riqhurimuskanta. <sup>8</sup> Paycunataj Belén llajtaman cacharka nispa:

—Riychej. Allintataj yachamuychej chay wawitamanta. Payta tarispataj willawaj cutimuychej. Nokapis rispa payta yupaychamusaj, —nispa. [Chaytari mana cheka sonkowanchu nisharka.]\*

<sup>9</sup> Yachaysapacunaka camachejpa niskanmanjina riporkancu. Inti llojsimuy, chay ladopi ricuskancu ch'ascaka ñaupakencuta risharka. Jesús casharka, chaycama pusamuspa patannejpi sayacorka. <sup>10</sup> Yachaysapacunataj chay ch'ascata ricuspa maytapuni cusicorkancu. <sup>11</sup> Paycuna wasiman yaycuspataj Wawitata ricorkancu maman Mariatawan. Konkoricuspataj Jesusta yupaycharkancu.

\* 2:8 Ninayan.

Apaskancuta quicharispa khapaj capuynincuta payman korkancu. Korita, inciensota, k'apayniyoj mirra jampitawan payta yupaychaspas jaywarkancu.<sup>12</sup> Chaymantataj moskoynincupi Dios paycunata willarka Herodespaman ama cutinancuta. Chayraycu paycunaka jallp'ancuman waj ñanta cutiporkancu.

### *Egiptoman aykecuncu*

<sup>13</sup> Yachaysapa runas ripuskancuwantaj Dios uj willaj angelta cachamorka. Joseman moskoyninpi riqhurimuspataj nerka:

—Jataricuy. Wawitata, Wawaj mamantawan pusaricupsa Egipto jallp'aman aykecuy. Jakaypi tiyacamuy noka willasunaycama. Herodeska masc'aj rishan Wawitata wañuchinanpaj, —nispa.

<sup>14</sup> Chay quiquinpachataj José tutapi rijch'arispa jatarerka. Wawitata mamantawan pusariycucuspa Egipto jallp'aman riporka.<sup>15</sup> Jakaypitaj Herodes wañunancama tiyacamorkancu. Tucuy cayka ruwacorka Diospa niskan junt'acunanpaj. Chaytaka unay willajninnejta nerka: “Egitomanta llojsimpunanta Wawayta wajyarkani”.

### *Herodes wawasta wañuchin*

<sup>16</sup> Herodeska chay yachaysapacuna anchata asipayaycuskancuta reparaspa mayta phiñacorka. Runasnintataj camacherka tucuy khari wawasta isgay watayojcama wañuchimunancuta. Paycunataj wawacunata wañucherkerka Belén llajtapi tucuy chaynejipis. Jesuspa ch'ascan riqhurimuskan p'unchaycunata yachaysapacunamanta yachaspa chayta ruwarka.<sup>17</sup> Ajinapi Diospa niskan junt'aska carka. Pay unay willajnin Jeremiasnejta nerka:

<sup>18</sup> Phutiy wakay uyaricun Ramá llajtapi.

Raquel wawasnimanta khasparispa wakashan jatun llaquiywan “ay, ay” nispa.

Manaña sonkochacunmanñachu wawasnin wañuskas caskancuraycu.

<sup>19</sup> Herodes wañupojtínri Dios uj willaj angelta cachamorka. Joseman moskoyninpi riqhurispas Egipto jallp'api<sup>20</sup> nerkataj:

—Jataricuy. Wawitata mamantawan pusaricupsa ripuy Israel jallp'aman. Wawitata wañuchiyya munajcunaka ñapis wañupuncuña, —nispa.

<sup>21</sup> Chay quiquinpacha José jataricupsa Wawitata mamantawan pusaricorka Israel jallp'aman.<sup>22</sup> Arquelao tatan Herodespa cuentanpi Judea jallp'ata camachisharka. Chayta uyarispas Joseka manchachicorka chayman tiyacoj riyta. Moskoyninpi Dios payman willaskanraycutaj Galilea jallp'aman riporka.<sup>23</sup> Nazaret llajtamán chayaspa chaypi tiyacorka. Ajina ruwacorka Diospa niskan junt'acunanpaj. Unay willajcunanejta nerka Jesús Nazaret llajtayoj sutichaska cananta.

## 3

### *Juan willaran*

<sup>1</sup> Chaypacha bautizaj Juanka riqhurerka willaraspa Judea jallp'a ch'innejpi.<sup>2</sup> Nerkataj:

—Diospa ajllaskan camachinanpaj chayamunña. Chayraycu juchas-niyyuichejta sakespa payman cutiriychej, —nispa.

<sup>3</sup> Cay Juanmanta Diospa unay willajnin Isaías parlarka: Ch'innejpi uj runa khaparishan:

“Runas uj jatun camachej jamunanpaj ñanta waquichipunancu tiyan. Ajinallatataj sonkosniyquichejta waquichiychej tucuy atiyniyoj Señor jamunanpaj”.

<sup>4</sup> Willaraj Juanka llamajina camello millmamanta p'achawan p'achallicorka. Kara chumpiwantaj chumpiska carka. Langostastataj miqhoj lachiwana misq'itawan. <sup>5</sup> Ashqha runas payta uyarej llojsimoj cancu. Jerusalén llajtamantapis tucuy Judea jallp'amantawan Jordán mayu tucuy chaynejmantawan jamoj cancu. <sup>6</sup> Paycuna juchasnincuta willashajtincu Juan Jordán mayupi paycunata bautizasharka. [Ajinapi runas ricucherkanca Diosman cutiriskancuta.]\*

<sup>7</sup> Juanka ashqha fariseo partecunata saduceo partecunatawan bautizacoj jamushaskancuta ricorka. Paycunatataj nerka:

—Kancuna runa wañuchi catarisjina canquichej. Diospa c'ajaj phiñacuyninmanta aykecunayquichejpaj ɻpitaj willasorkachejrí? —nispa. <sup>8</sup> Diospa phiñacuyninmanta aykecuya munanquichej chayka, juchasniyquichejta sakeychej. Chaywanpis c'acha ruwaskasniyquichejwan Diosman cutiriskayquichejta ricuchiychej. <sup>9</sup> Kancunaka Abraham unay tatanchej caskanta nishanquichej. Diospa cheka wawasnin caskayquichejta yuyaspa pantanquichej. Amaña sonkoyquichejpi ajinata jatunchacuychejchu. Imaraycuchus niyquichej Dioska atiyniyojmin cay rumismantapis Abrahampaj cheka wawasninta ruwananpaj. <sup>10</sup> Hachaka waquichiskaña cashan sach'a saphinmanta c'utunanpaj. Sapa sach'a mana allin pokojtaka runas c'utuspa ninaman wijch'uncu. <sup>11</sup> Chekatapuni noka yacupi bautizayquichej Diosman cutiriskayquichejta ricuchinapaj. Khepaytarí Diospa ajllaskan Cristo jamonka. Payka aswan curaj atiyniyoj nokamanta niskaka. Mana paypajka [camachinpajjinallapischu cani runalla caskayraycu].<sup>†</sup> Paymin kancunata bautizaspa Santo Espirituta sonkoyquichejman cachamusonkachej Diosllapaj causanayquichejpaj. Ninawantaj bautizasonkachej. <sup>12</sup> Trigo erata wayrachejka jorc'ata maquinpiña jap'ishan. Erata sumajta pichanka trigota ch'uyachananpaj. Trigota pirwanman jallch'anka. Pajatarí ni jayc'aj wañoj ninaman ruphachenka, —nispa willararka Juan.

### *Jesusta bautizarka*

<sup>13</sup> Chanta Jesuska Galilea jallp'amanta Jordán mayuman jamorka. Chaypitaj Juanwan bautizachicuya munarka. <sup>14</sup> Juanrí mana munarkachu bautizayta. Jesusmantaj nerka:

—Nokata astawanpis kanka bautizanawayqui tiyan. Chanta ɻimaraycutaj nokaman jamuwanqui? —nispa.

<sup>15</sup> Jesusrí payman cuticherka:

—Cunan bautizanawayqueka allilan. Yachanchej Diospa tucuy munayninta ruwananchejpuni caskanta, —nispa.

Chanta Juanka Jesuspa mañaskanta ruwarka. <sup>16</sup> Jesuska bautizachicuytawan yacumanta llojsiporka. Janaj pachari paypaj quichariska carka. Ricorkataj Diosmanta cachamuska Santo Espirituta palomatajina uraycamoja payman tiyaycucojtapis. <sup>17</sup> Ajinapitaj Dios janaj pachamanta nimorka:

—Paymin c'ata munaska Wawayka. Paypi mayta cusicuni, —nispa.

\* 3:6 Ninayan. † 3:11 Ninayan.

**4**

*Supay munarka Jesusta juchallichiyta*

<sup>1</sup> Chanta Santo Espiritoka ch'in lomaman Jesusta pusarka. Chaypitaj supay Satanás imaymanamanta juchallichiyta munarka.

<sup>2</sup> Jesuska tawa chunca p'unchayta tawa chunca tutatawan mana miqhorkachu Diosta yupaychananpaj. Chaymantataj payka yarkhachicorka. <sup>3</sup> Chay pantachej supayri Jesusman kayllaycuspá nerka:

—Sichus Diospa cheka Wawan canqui chayka, niy cay rumista t'antamañ cutinancuta.

<sup>4</sup> Jesusrí cutichispa nerka:

—Palabranpi Dios nin: “Mana miqhunallawanchu runaka causan. Manachayrí Diospa tucuy niskanta casuspa causan”, —nispa.

<sup>5</sup> Chanta supayka Diospa ajllaska llajtan Jerusalenman Jesusta pusarka. Chaypitaj yupaychana-wasi patapi sayaricherka.

<sup>6</sup> Jesusmantaj nerka:

—Diospa Wawan canqui chayka, cay patamanta pampaman phin-quiyuy. Imaraycuchus Diospa palabranpi nin:

Angelesninta camachenka kanta wakaychasunancupaj.

Maquisnincuwantaj kanta jap'isonkancu ama rumisman urmanayquipaj.

<sup>7</sup> Jesusrí payta c'amerka:

—Dios palabranpi nillantaj: “Ama Señor Diosniyquej atiyninta mana cajpaj mañacuychu”.

<sup>8</sup> Uj cutitawan supayka Jesusta pusallarkataj. Cunanpeka may jatun orko patamanña chayacherka. Jesusmantaj tucuy cay pachapi caj camachiska jallp'asta, khapaj capuynincutawan ricucherka.

<sup>9</sup> Chaymantataj supayka nerka:

—Tucuy cayta kopuskayqui sichus kan konkoricuspá yupaychawan-quiman chayka.

<sup>10</sup> Chanta Jesuska payman cuticherka.

—Ripuy nokamanta, supay Satanás. Imaraycuchus Dios palabranpi nin: “Señor Diosnillayquita yupaychay. Pay sapallamantaj konkoricuspá casuy”, —nispa.

<sup>11</sup> Chaymantataj supayka Jesusta sakeporka. Yanapaj angelestaj jamuspa Jesusman pisichicuskanta jaywarkancu.

*Jesús Galileapi ruwanasninta kallarin*

<sup>12</sup> Jesustaj Juan wisk'aska caskanta uyarispa Galilea jallp'aman rerka.

<sup>13</sup> Nazaret llajtamanta llojsispa payka Capernaum llajtaman tiyacoj rerka. Chay llajtaka Galilea kocha cantopi carka. Zabulonwan Neftaliwan jallp'as chaynejpi carkancu. <sup>14</sup> Chaypi Jesús tiyacorka Diospa unay willajnin Isaías niskanmanjina:

<sup>15</sup> Zabulón jallp'api Neftalí jallp'apiwan tiyacojcuna, kancuna tiyacun-quichej kochaman rina ñan Jordán mayu chimpapi.

Galilea jallp'api tiyacuncu Diosmanta mana yachajcuna.

<sup>16</sup> Dioska willarajninta cachamorka wiñay causaymanta mana yachajcu-napaj.

Chay runaska wiñay wañuyman risharkancu.

Paycunataj juchancumanta cachariskas canancupaj sumaj willanasta uyarerkancu.

Chaytaj uj c'anchayjina carka tucuyapaj.

<sup>17</sup> Chaymantapachataj Jesús kallarerka willarayta:

—Diospa ajllaskan p'unchayka cunan chayamushanña. Cunan payka munacoj Camachejniyquichej canka. Chayraycu juchasniyquichejta sakespa payman cutiricuychej sumaj willanasintataj jap'icuychej.

### *Jesús tawa challwirista wajyan*

<sup>18</sup> Jesuska Galilea kocha cantonejta purishaspa ricorka iscay waukesta. Ujnín Simón, Pedro sutiyoj carka, ujnintaj Andrés. Paycuna challwiris caspa jatun ch'ipata kochaman chokaycusharkancu.  
<sup>19</sup> Paycunaman Jesús nerkataj:

—Jamuycnej nokawan yachacojcunay canayquichejpaj. Kancuna challwiris canquichej. Cunanmantapachataj Diospi jap'icunancupaj runasta nokaman pusamuwanquichej.

<sup>20</sup> Chay quiquinpacha ch'ipasnincuta sakerpayarkancu. Jesuswan rerkancutaj yachacojcunán canancupaj.

<sup>21</sup> Uj chhicatawan rispataj Jesuska waj iscay waukestawan ricullarkataj. Paycuna Jacobo Juanwan carkancu. Cusca tatancu Zebedeo wan barcopi ch'ipasnincuta t'irisharkancu. Jesús chay waukesta wajyarka yachacojcunán canancupaj. <sup>22</sup> Chay quiquinpachataj barcota tatancutawan sakerpayaspa kallarerkan cu Jesuswan puriyta yachacojcunán canancupaj.

### *Jesús ashqhasta yachachin*

<sup>23</sup> Jesús tucuy Galilea jallp'ata purispa tantacuna-wasisnincipi yachachisharka. Sumaj willanastataj willarasharka Diospa ajllaskan chaypiña caskanta camachinanpaj. Astawanpis runas uqhupi tucuy laya onkoycunata thañichisharka. <sup>24</sup> Tucuy caru Siria jallp'apijis Jesús atiyniyoj caskanta uyarerkancu. Jesusman apamorkancutaj tucuy laya onkoyniyojcunata: nanayniyojcunata, ñac'arejcunata, supayniyojcunata, t'ucu onkoyniyojcunata, suchustawan. Jesusri tucuynincuta thañicherka. <sup>25</sup> May ashqha runastaj Jesusta khaticorkancu. Galilea jallp'amanta, Decápolis jallp'amanta, Jerusalén llajtamanta, Judea jallp'amanta, Jordán mayu chimpamantawan paycuna jamorkancu.

## 5

### *Cusicuyniyojcuna*

<sup>1</sup> Jesustaj may ashqha runasta ricuspa orkoman wichererka. Chaypi tiyaycucojtintaj yachacojcunán payman kayllaycorkancu.

<sup>2</sup> Paycunatataj jatuchej yachachinasta yachachisharka:

<sup>3</sup> —May cusiskas cancu sonkoncupi Diosmanta pisiskas caskancuta khawacojcunaka. Imaraycuchus Dios paycunataka munacuywan camachin.

<sup>4</sup> May cusiskas cancu jucharaycu llaquicojcunaka. Diosmin paycunataka sonkoncupi callpachaspa yanapanka.

<sup>5</sup> May cusiskas cancu llamp'u sonkowan Diosta casojcuna. Paycunaka cay pachapi Diospa niskanmanjina jap'enkancu.

<sup>6</sup> May cusiskas cancu Diospaj cheka causayta munajcunaka. Imaynat-achus yarkhachicojcuna miqhunata munancu chayrí ch'aquichicojcuna yacuta munancu ajinata. Munaskancumanjina paycuna sajsaskas cancu.

<sup>7</sup> 'May cusiskas cancu Diosmanjina c'acha sonkowan qhuyacojcunaka. Paycunata Dioska qhuyallankataj.

<sup>8</sup> 'May cusiskas cancu llimphu sonkowan Diosllapaj causajcunaka. Paycunalla Dioswan cusca wiñaypaj causaonkancu.

<sup>9</sup> 'May cusiskas cancu runasta allinyachejcunaka. Paycunalla Diospa cheka wawasnin cankancu, paypa niskanmanjina.

<sup>10</sup> 'May cusiskas cancu Diospa ñaupakenpi chekanta causaskancuraycu muchojcunaka. Dios camachishajtin, paywan cusca cankancu.

<sup>11</sup> 'May cusiskas canquichej runas llullacuspa sajrata rimaso-  
jtiyquichej, muchuchisojtiyquichej khasimanta c'amisojtiyquichejpis,  
nokata casuwaskayquichejraycu. <sup>12</sup> Cusicuychej may jatun  
cusiywan. Imaraycuchus muchuskayquichejmanta Dios janaj pachapi  
khapajyachisonkachej sonkoyquichejpi.\* Ajinallatataj Diospa unay  
willajcunatapis runas mayta muchuchererkancu manaraj kancuna  
cashajtiyquichej.

### *Cusicuñiyoj runaspaj yachachinas*

<sup>13</sup> ['Runas aycha ama ismuyccunapaj cachita churancu.]† Ajinal-  
latataj kancunatapis Dios churasorkachej runas sajra causayman ama  
tucuchiskas canancupaj. Chay cachi lak'ayapunman chayka ¿imay-  
natataj sumaj cachiman cutirinman? Manaña servinchu, astawanpis  
wijch'unallapajña purejcuna sarunancupajpis cashan.

<sup>14</sup> 'Kancunamin Diosta mana rejsejcunapaj c'anchayjina canquichej.  
Orko patapi uj llajtaka manapuni pacaskachu. <sup>15</sup> Nillataj runas  
c'anchayta jap'ichispa wich'i uraman churancuchu. Manachayrí  
pataman churancu wasipi tucuy tiyacojcunata c'anchamunanpaj.  
<sup>16</sup> Kancunapis ajinallatataj c'anchayjina canquichej cay pacha runaspaj.  
Ñaupakencipi c'acha cajta ruwaspa causacuychej. Ajina cachun  
paycunaka janaj pachapi tiyacoj Tatayquichej Diosta jatunchanancupaj.

### *Jesús yachachin Diospa camachiskasnintama*

<sup>17</sup> 'Ama yuyaychejchu Moisespa camachiskasninta chayrí Diospa  
unay willajcunanza yachachiskasnincuta chincachinayta. Mana chay-  
cunata chincachinaypajchu jamuni manachayrí tucuya chaymanjina  
junt'anaypaj. <sup>18</sup> Niyquichej chekatapuni Diospa camachiskasnintama-  
taka ni uj juch'uy niskallanpis chincananta. Atiyniyojllapuni cashan  
tucuy caj junt'acunancama. Chaymantara janaj pacha cay pachapis  
atinman chincapuya. <sup>19</sup> Pichari Diospa camachiskasnintama ujnillan-  
tapis mana casunmanchu chayrí mana casuya yachachinman chayka,  
aswan pisipaj khawaska canka, Dios camachin, chaypi. Pichari Diospa  
camachiskasninta casunman, casuya yachachinmantaj chayka, Dios  
camachin, chaypi jatunpaj khawaska canka. <sup>20</sup> Niyquichej chekatapuni  
fariseo partemantawan israel yachachejcunamantawan yachachiskas  
caskancumanjina ruwaspa chekan cayta munaskancuta. Dios ca-  
machin, chaymanka mana yaycuya atenkancchu. Nitaj kancunapis  
paycunajina caspa yaycuya atinquichejchu. Manachayrí Diosta ca-  
suspa chekan causayniyoj caspalla Dios camachin, chaymanka yaycun-  
quichej.

### *Phiñacuymanta*

\* <sup>5:12</sup> Literal: premio. † <sup>5:13</sup> Ninayan.

<sup>21</sup> 'Uyarinquichej Moisés unay tatasnинchejta camachiskanta: "Runata ama wañuchiniquichu. Wañuchejka wañuchiskanmanta wañuchiskallataj canan tiyan", nispa. Chayta yachanquichej. <sup>22</sup> Nokarí niyquichej sapa uj runa-masinpaj phiñaska cajta curajcuna ñac'arichinancuta. Sapa uj runa phiñacuspa runa-masinta "wampu" nejtapis aswan curajcuna juchachankancu. Phiñacuspa runa-masinta "supay apachun" nejpis, uqhu pachaman rinanpajjina cashan.

<sup>23</sup> 'Chayraycu Diosta yupaychaj konata† jaywaspaka sumajta yu-yaricuy. Runa-masiyqui kanpj phiñaska cashaskanta yuyanqui chayka, <sup>24</sup> chaypi konayquita sakey. Riytaj ñaupajta runa-masiyquiwan allinya-camoj. Chaymanta cutimuspa konayquita Diosman jayway.

<sup>25</sup> Contrallisojnyi qui juchachaj curajman pusashasojenka ñanllataraj rishaspa uskhayta paywan allinyacuy. Allinyacuy amaña curajman jay-wasunapaj nitaj soldadoman jaywaspa carcelman wisk'achisunapaj. <sup>26</sup> Niyqui chekamanta mana allinyacuwaj chayka, carcelmanta mana-puni llojsimunquichu tucuy phatasta cutichipunayquicama.

### *Ama khenchachacuychu*

<sup>27</sup> 'Uyarinquichej Moisés unay tatasnинchejta camachiskanta: "Ama khenchachacuychu". <sup>28</sup> Nokarí niyquichej warmita munapayaspas khawaj, chay runaka ñapis sonkonpi paywan khenchachacuskantaña. <sup>29</sup> Chayraycu paña ñawiyqui ricuspa juchaman urmachisunquiman chayka, chayta orkhospa wijch'upuy. Aswan allin canman uj ñawillayqui chincaripunan amataj uqhu pacha ñac'ariyman wijch'uska canayqueka. <sup>30</sup> Paña maquiyqui juchaman urmachisunquiman chayka, chaytapis qhuchurpacuspa wijch'upuy. Aswan allin canman maquillayqui chin-capunan amataj uqhu pacha ñac'ariyman wijch'uska canayqueka.

### *T'akanacuymanta*

<sup>31</sup> 'Nillajtaj cancu: "Warmiman uj divorcio papel jaywaspa t'akanacuya aticullan". <sup>32</sup> Nokarí niyquichej pichari warmin-manta takanacun mana waj khariwan purejtenka, warminta khenchachachiskanta. Chayjina t'akanaska warmiwan casarajpis khenchachacullantaj.

### *Juramentosmanta*

<sup>33</sup> 'Uyarinquichej Moisés unay tatasnинchejta camachiskantapis: "Ama juraychu llullacuspaka. Manachayrí Diospa ñaupakenpi niskayquimanjina ruway". <sup>34-35</sup> Nokarí niyquichej: Ama ni imaraycu ni maypi Diospa sutinta okharispa juraychejchu. Imaraycuchus Dioska janaj pachapi cay pachapipis cashan. Nillataj Jerusalén llajtaj sutinta okharispa juraychejchu. Imaraycuchus paypa ajllaska llajtanmin cashan. <sup>36</sup> Amataj ni ima sutita okharispa juraychejchu. Causayniyquichejka Diospatamin. Imaraycuchus ni uj chujchatapis umayquipi atinquichu yanayachiyyta nitaj yurajyachiyatka. <sup>37</sup> Niskayquichejka junt'anayquichejpaj cachun. Chayman waj palabraswan yapawajchej chayka, supay Satanasmantamin.

### *Chejnicoj runasta munacuna*

<sup>38</sup> 'Chaywanpis uyarinquichej Moisés unay tatasnинchejta camachiskanta: "Ñawiyquita orkhosojmantaka ñawinta orkhollaytaj.

Quiruyquita orkhosojmanka quirunta orkhollaytaj".<sup>39</sup> Nokarí niyquichej: Ama cutichicuychejchu sajrata ruwasojniyquichej manka. Pillapis paña lado uyayquipi sajmasunquiman chayka, sakellay llok'e lado uyayquipiwan sajmasunanta.<sup>40</sup> Pillapis camisayquita khechusunapaj curajman pusasunquiman chayka, ponchoyquitawan payman kopuy.<sup>41</sup> Pillapis k'epinta cuscan leguatajina apanayquipaj camachisunquiman chayka, uj leguatajina apapuy.<sup>42</sup> Pillapis mañacusunquiman chayka, koriy payman. Manucusuya munajmanpis manurillay.

<sup>43</sup> 'Chaywanpis unayka nillajtaj cancu: "Runa-masiyquita munacuy. Chejnisoj runatataj chejniy".<sup>44</sup> Nokarí niyquichej munacunayquichej chejnisoj runasta. Sajrata kancunapaj parlajcunaman misq'i palabraswan parlapayariychej. Chejnisojcunaman allin cajta ruwapuychej. Misq'i parlaycunawan parlaychej sajra simiwan kancunapaj parla-sojcunaman. Khasillamanta kancunata ñac'arichisojcunapaj sajrata ruwasojcunapajpis Diosmanta mañapupchej.<sup>45</sup> Chayjinata ruwanayquichej janaj pacha Dios Tatayquichejjina canayquichejpaj. Payka intita c'anchachimun c'acha runaspaj sajra runaspajpis. Parachimuntaj chekan ruwajpaj sajrata ruwajpajpis.<sup>46</sup> Sichus munacusoj runasllata munacuwajchej chayka, Dios mana nisonkachejchu "walejta ruwanquichej". Juchasapaspis ruwashallanca ajinataka.<sup>47</sup> Israel llajtamasisnillayquichejta napaycuwajchej chayka, wajcunamanta niskaka ¿ima astawan allintataj ruwashanquichejrí? ¿manachu quiquillantataj ruwancu Diosta mana rejsejcunapis?<sup>48</sup> Imaynatachus janaj pacha Dios Tatayquichej munacuywan runaspa allinnincupaj ruwan, kancunapis ajinallatataj ruwaychej,—nerka Jesú.

## 6

### *Allin ruwanasmanta yachachinas*

<sup>1</sup> 'Khawaricuychej c'acha cajta ruwaskayquichejka ama runas jatunchasunallancupajka cachunchu.\* Manachayka janaj pacha Dios Tatayquichej uj sumaj konata mana kosonkachejchu.<sup>2</sup> Chayraycu pisichicojcunaman imallatapis kospaka ama runasman willaspalla koychej. Puraj uya runaspis ajinata ruwancu tantacuna-wasispi plazaspipis runas paycunata jatunchanancupaj. Niyquichej chekatapuni paycunaka ruwaskancumanta tucuya jap'iskancutaña.<sup>3</sup> Kanrí pisichicojman kospaka ama pipis koskayquitaka yachachunchu.<sup>4</sup> Ajinapi ruwaskayqui pacaska canka. Pacaypi ricoj Dios Tatayquitaj kanman ruwaskayquimanjina kosonka.

### *Diosmanta mañacuymanta yachachinas*

<sup>5</sup> 'Diosmanta mañacuspa ama puraj uyajina caychejchu. Paycunaka tantacuna-wasispi jatun plazaspipan sayaricuspa Diosmanta mañacuya munancu runas ricunallancupaj. Niyquichej chekatapuni paycunaka ruwaskancumanta tucuya jap'iskancutaña.<sup>6</sup> Kanrí wasiyquiman yaycuspa sapallayqui Diosmanta mañacuy. Puncuyquita wisk'aspataj pacaypi caj Dios Tatayquimanta mañacuy. Pacaypi ricoj Tatayquitaj ruwaskayquimanjina kosonka.

\* **6:1** Literal: premiota.

<sup>7</sup> 'Diosta mana rejsejcnaka ashqha cutista khasi palabrasllawan Diosmanta mañacuncu. Kancunari ama paycunajina mañacuychejchu. Paycuna ashqha parlaskancuwan uyarisca cayta yuyancu.<sup>8</sup> Chayraycu ama paycunajinaka caychejchu. Dios Tatayquichejka pisichicuskayquichejta yachanña manaraj paymanta mañacushajtiyquichej.<sup>9</sup> Chayraycu kancunaka cayjinallata mañacunayquichej tiyan:

Janaj pachapi caj Tataycu,

Tucuy runas sutiyquita yupaychachuncu cheka Dios caskayquiraycu.

<sup>10</sup> Mayta munaycu tucuya camachinayquita. Janaj pachapi munayniyqui ruwacushan, ajinallataj cay pachapipis ruwacuchun.

<sup>11</sup> Causanaycupaj miqhunaycuta kowaycu cunan p'unchay.

<sup>12</sup> Juchasniycuta khechuspa perdonawaycu.

Nokaycumanspis juchata ruwajcunata perdonaycu, ajinallatataj.

<sup>13</sup> Callpachawaycu jatun llaquycunapi ama juchallicunaycupaj.

Astawanpis wakaychawaycu juchallichiyta munajpa atiyninmanta.

Kanka wiñaypaj camachinqui.

Tucuy atiyniyoj, may curajpaj, jatunchaskapis canqui. Ajina cachun.

<sup>14</sup> Kancunaman juchata ruwasojcunata perdonaspa konkapuwajchej chayka, janaj pacha Dios Tatayquichejpis juchasniyquichejta perdonaspa khechusonkachej. <sup>15</sup> Kancunaman juchata ruwasuskancuta mana konkapuwajchejchu chayrí, Dios Tatayquichejpis nillataj juchasniyquichejta perdonaspa khechupusonkachejchu.

### *Ama puraj uyas caychejchu*

<sup>16</sup> 'Diosta yupaychanapaj mana miqhunqui chayka, ama puraj uyasjina phutiskaska churacuychejchu. Puraj uyaska uyasnincuta ujjinayachincu runas yachanancupaj mana miqhuskancuta. Noka niyquichej chekatapuni paycunaka jap'inancu carka, chayta jap'iskancutaña. <sup>17</sup> Kanrí mana miqhuspa Diosta yupaychanayquipaj umayquita ñajch'aycuy, uyayquita mayllacuy, cusiskataj cay. <sup>18</sup> Ajinapi runas mana miqhuskayquita mana reparankancuchu. Pacaypi caj Dios Tatayquirí yachan. Paytaj pacaypi ricuspa ruwaskayquimanjina kosonka.

### *Khapaj capuyka janaj pachapi*

<sup>19</sup> 'Cay pachapi khapaj capuycunata amaña chhicata kancunallapaj jallch'acuychejchu. Caypi chaytaka thutas thutancu, carcomi tucchin, suwaspis yaycuspa suwancu. <sup>20</sup> Manachayrí tucuya ruwaychej Diosllata cusichinayquichejpis. Ajinapi janaj pachapi wiñay khapaj cajta jallch'acunquichej. Jakaypi thutas mana thutancuchu, nitaj carcomi tucuchinchu. Nillataj suwas yaycuspa suwancuchu. <sup>21</sup> Imaraycuchus maypichá munaska khapajniyquichej cashan chayp- ipuni yuyayniyquichejpis<sup>†</sup> cashan.

### *C'anchay sonkosinchejpaj*

<sup>22</sup> 'Ñawiyqui c'anchayllawan ricun cuerpopaj. Ajinallatataj sonkoyquipis Diospa c'anchayninwan reparan. Sichus llimphu sonkoyoj canqui chayka, tucuy causayniyqui c'anchayniyojmin. <sup>23</sup> Sajra sonkoyoj<sup>‡</sup> canqui, chayrí tucuy causayniyqui lakhapachamin. Chayjina lakhamanta astawanka mana canchu.

† 6:21 Literal: sonkoyquichejpis. ‡ 6:23 Literal: ñawi.

*Ajllaychej Diosta chayrí kolketa*

<sup>24</sup> ‘Ni pi iscay camachejcunata casuya atinchu. Imaraycuchus ujllata munaconka wajtataj chejniconka. Ujman c'ascaconka wajtataj khesachanka. Cheka Diostawan khapaj capuytawan manapuni casuya atinquichu.

*Dios wawasninta wakaychan*

<sup>25</sup> ‘Chayraycu niyquichej amaña anchata llaquicuychejchu miqhunamanta nitaj uyanamanta causanayquichejpajka. Nitaj llaquicuychejchu cuerpoquichejmanta imawanchus p'achallicunayquichejtaka. Causayniyquichejka ¿manachu miqhunamantapis astawan sumajmin? Chayrí cuerponchejpis ¿manachu p'achamantapis astawan sumajmin? <sup>26</sup> Sumajta reparaychej phawai p'iskosmanta. Paycunaka mana tarpuncuchu nitaj ruthuncuchu. Nitaj pirwasniyojchu cancu miqhunancuta tantanancupaj. Janaj pacha Dios Tatayquichejmin paycunata miqhuchin. Kancunaka p'iskosmanta niskaka ¿manachu Diospajka astawan sumaj canquichej? <sup>27</sup> Astawan causayta munaspa, llaquicusapas ¿uj chhicatawan causayta atiwajchejchu?

<sup>28</sup> ¿Imaraycutaj p'achamantapis phuticunquichejrí? Sumajta reparaychej q'ita t'icasmanta, imaynatachus wiñancu. T'icasaka mana llanc'ancuchu nitaj phushcancupischu. <sup>29</sup> Nokarí niyquichej Salomonka may khapaj camachej caskanta. Chaywanpis payka ni cay chhica c'achitu t'icasjinallapis p'achallicorkachu. <sup>30</sup> Cunan p'unchay koraka pampapi khallallahsan. K'ayataj runas hornopi ruphachenkancu. Chaywanpis Dios churan chay korata. Payka kancunamanta may astawanraj yuyan. Chayraycu ¿manachu pay kosonkachej causanayquichejpaj? ¡Paypi jap'icusayquichejka ancha pisi! <sup>31</sup> Chayraycu llaquicuspa ama niychejchu: “¿Imatataj miqhusun? ¿Imatataj ujyasun? ¿Imawantaj p'achallicusun?” <sup>32</sup> Tucuy chaycunallata Diosta mana rejsejcunaka mayta munashancu. Janaj pacha Dios Tatayquichej yachanña tucuy cay imasmanta causanayquichejpaj pisichicusayquichejtaka. <sup>33</sup> Kancunari tucuy atiskayquichejwan llanc'aychej ñaupajta Dios tucuya camachinanpaj. Ajinallataj Diospa munayninmanjin chekanta causaychej. Chanta payka cay pachapi causanayquichejpaj tucuy imata yapasonkachej. <sup>34</sup> Chayraycu k'ayamanta yuyaspa ama llaquicuychejchu. K'aya phuticuycunaka k'ayallapaj cachun.

## 7

*Amajuchachaychejchu waj runasta*

<sup>1</sup> ‘Ama waj runata juchachaychejchu mana allinta yachaspaka. Aji-napi kancuna manallataj juchachaskaschu canquichej manacajmantaka. <sup>2</sup> ‘Imaynatachus runa-masisniyquichejta khawanquichej chayjinallatataj Dios kancunata khawasonkachej. Ima chhicantachus wa-jcunaman konquichej chay chhicamanjinallataj Dios kancunaman kosonkachej.

<sup>3</sup> ‘Uj jatun curcujina kanpa jatun pantaskayquita mana reparacuspaka ¿imaynatataj uj ichhu k'opajina hermanoyquej juch'uy pantaskanta khawaranquirí? <sup>4</sup> Quiquin ñawiyquipitaj jatun curcu cashajtin ¿imaynatataj hermanoyquita atinqui niytarí: “Hermanóy, sakellaway ichhu

k'opata ñawiyquimanta orkhosunayta?" nispa. <sup>5</sup> Puraj uya, chay curcumaraj ñawiyquimanta orkhonqui. Chanta aswan sut'ita ricunqui juch'uy k'opata hermanoyquejpa ñawinmanta orkhonayquipajka.

<sup>6</sup> 'Dios kosuskayquichejtaka ama koychejchu phiña sajra alkosjina runasmanka, janch'ojtincu kancunata ama qhanispa tucuchisunancupaj. Nitaj millay qhuchijina causaj runasmanka Dios kosuskayquichejtapis\* wijch'uychejchu ama saruycunancupaj mana cajtajina.

#### *Diosmanta mañacushaychejpuni*

<sup>7</sup> 'Diosmanta mañacullaychejpuni, payka kosonkachejtaj. Masc'aychejpuni, Dioska tarichisonkachejtaj. Wajyallaychejpuni† Diostaj puncuta kancunaman quicharisonkachej. <sup>8</sup> Chekamanta mana sakespa mañacojka jap'enkapuni masc'ajtaj tarenkapuni. Mana sakespa wajyajmanpis puncoka quichariconkapuni.

<sup>9</sup> 'Astawanpis, wawan t'antata mañacojtin ¿pitaj, kancuna tatasmanta, uj rumita jaywanman? <sup>10</sup> Chayrí wawan challwata mañacojtin ¿uj cataritachu jaywanman? <sup>11</sup> Kancuna juchasapa runaslla cashaspapis wawasniyyquichejmanka allin imastapuni koyta yachanquichej. May astawanraj janaj pacha Dios Tatayquichejka sumaj imasta konka paymanta mañacojmanka.

<sup>12</sup> 'Chayraycu imaynatachá munanquichej runas kancunaman ruwanancuta ajinallatataj kancunapis paycunaman ruwaychej. Palabranpi‡ Dioska chayta ruwananchejta camachin.

#### *Wiñay causayta ajllaychej*

<sup>13-14</sup> 'Wiñay causayman chayrí wiñay wañuyman kancuna yaycuya ajllanayquichej tiyan. Imaraycuchus wiñay wañuyman puncoka jatunmin, chayman chayaj ñanpis. Ashqastaj chaynejta yaycuncu. Wiñay causayman yaycuchej puncuri c'ullcumín, chayman chayanapaj ñanpis c'ullcallataj. Pisistaj Diospa munayninta ruwaspa wiñay causayman yaycuncu. Chayraycu c'ullcu puncunejta yaycuyej.

#### *Sach'aka pokoyninpi rejsicun*

<sup>15</sup> 'Khawacuychej llulla yachachejcunamanta. Chaycunaka pantachisunayquichejpaj jamuncu. Paycunaka ovejaman rijch'acojjinalla cancu, sonkosnincupirí yarkhaska atojcunajina cancu. <sup>16</sup> Sach'astaka pokoynincumanta rejsinquichej. Ajinallatataj paycunataka ruwaskancumanta atinquichej rejsiyta. Ni jayc'aj uvaska qhishcarara sach'itamanta pallacunchu. Nitaj higoska pallacunchu qhishca sach'asmantapis. <sup>17</sup> Ajinata tucuy allin sach'aka sumaj pokoya pokon. Uj mana allin sach'arí mana sumaj pokoyniyojllataj. <sup>18</sup> Allin sach'aka mana jayataka pokonchu. Nitaj mana allin sach'apis allin misq'itaka pokonchu. <sup>19</sup> Tucuy mana allinta pokoj sach'ataka runas c'utuncu ninamantaj wijch'uncu. <sup>20</sup> Chayraycu kancunapis runastaka ruwaskasnincumanta§ rejsinquichej.

#### *Mana tucuychu Diospa wawasnin*

<sup>21</sup> 'Simillancuwan "Ay, Señorní, Tatáy", nejcuna Dios camachin, chayman mana yayconkancuchu. Manachayka janaj pachapi tiyacoj Dios Tataypa munayninta ruwajcunalla paypaman yayconkancu.

\* **7:6** Literal: perlas. † **7:7** Literal: tocaychejpuni. ‡ **7:12** Literal: camachiskas unay willajcunapiwan. § **7:20** Literal: pokoyninmanta.

<sup>22</sup> Cutimojtiy, chay p'unchay ashqhas niwankancu: "Ay, Señorní, Tatáy ¿manachu willanasniyquita willararkaycu? ¿Manachu atiynyquiwan runasmanta supaycunata kharkorkaycu? ¿Manachu ashqha t'ucuna ruwanastapis atiynyquiwan ruwarkaycu?" nispa. <sup>23</sup> Chantarí nokataj tucupa ñaupakencipi paycunaman sut'inchasaj: "Kancunataka ni jayc'aj rejserkayquichejchu. Mana nokajpatachu canquichej. Kancuna, sajrata ruwajcuna ripuychej nokamanta", nispa.

*Yuyayniyojcunamanta mana yuyayniyojcunamantawan*

<sup>24</sup> Chayraycu cay niskasniyta uyarispa sumajta casojlla, nokapajka sumaj yuyayniyoj runajina cashan. Payka sinch'i rumi patapi wasichaj runajina cashan. <sup>25</sup> Paraka sinch'ita jich'acamorka. Mayustaj ashqha yacuwan chayamorkancu. Wayrapis jatun callpawan wayraspa chay wasiman komorka. Wasiri mana urmarkachu sinch'i rumipi wasichaska caskanraycu. <sup>26</sup> Cay niskasniyta uyarispa tucuy mana casojri nokapajka mana yuyayniyoj runajina cashan. T'iypu wasinta wasichaj runajina cashan. <sup>27</sup> Sinch'ita paraka jich'acamorka. Mayustaj ashqha yacuwan chayamorkancu. Wayrapis may callpawan chay wasiman komorka. Wasitaj manchayta urmarka.

<sup>28</sup> Jesús cay imasmanta parlayta tucorka. Ashqha runastaj paypa yachachiskanmanta mayta t'ucorkancu. <sup>29</sup> Imaraycuchus pay Diospa atiyninwan yachachisharka, manataj paycunaj yachachejnincujinal-lachu.

## 8

*Lepra onkoyniyoj runata Jesús thañichin*

<sup>1</sup> Jesús orkomanta uraycamushajtin ashqha runas paypa khepanta jamusharkancu. <sup>2</sup> Ajinapitaj uj manchay chimpa chimpa lepra onkoyniyoj runa Jesusman kayllaycorka. Konkoricuspataj payta yupaychananpaj, mañacorka:

—Tucuy atiynyijoj canqui, Señor. Munanqui chayka, llim-phuchawaspa atinqui thañichiwayta,—nispa.

<sup>3</sup> Jesustaj maquinwan payta llanqhaycuspa nerka:

—Munani. Thañiskaña canqui,—nispa.

Chay quiquinpachataj thañiska carka lepra onkoyninmanta. <sup>4</sup> Jesustaj payta camacherka:

—Uyariway. Ama pimanpis cay imasmanta willanquichu. Manachayrí chekanta riy khawachicamuytaj yupaychana-wasipi ruwanay-ojwan. Moisespa camachiskanmanjina konatataj jaywamuy. Chay jaywaskayquiwan runas yachankancu thañiska caskayquita.

*Jesús capitana wawanta thañichin*

<sup>5</sup> Jesús Capernaum llajtaman yaycushajtin uj camachej payman jamorka. Payka pachaj romano soldadosta camacherka. Chay camachej Jesusmanta tucuy sonkowan mañacuspa <sup>6</sup> nerkataj:

—Señor, uywaskay wasiyipi suchu onkoywan siriska cashan. Mayta ñac'arishan,—nispa.

<sup>7</sup> Jesustaj payman nerka:

—Wasiyquiman noka jampej jamusaj,—nispa.

<sup>8</sup> Cutichispa chay camachej nerka:

—Señor, arí, noka mana wasiyman yaycunayquipajjinachu cani. Astawanka cayllamanta niy, uywaskaytaj thañicaponka. <sup>9</sup> Nokajtapis cancu curaj camachiwajcuna. Chaywanpis nokajta callancutaj soldadosniy. Paycuna casuwancutaj camachiskayta. Ujta nini: “Riy”. Rintaj. Wajta nini: “Jamuy”. Jamuntaj. Uywaskayta nini: “Cayta ruway”. Ruwallantaj.

<sup>10</sup> Jesuska ajinata nejta uyarispa t'ucorka. Payta khatejcunata nerktaj:

—Chekatapuni Diospa runasnin uqhupipis nipuni chayjina niskasnitya jap'icoj runataka tarerkanichu. <sup>11</sup> Astawanpis niyquichej ashqha runas tucuy cay pachamanta jamunancuta. Paycunaka Dios camachin, chaypi cusiywan miqhonkancu cusca jatun tatasninchej — Abrahamwan, Isaacwan Jacobwanpis. <sup>12</sup> Waquincunarí pantaspa yuyancu Dios camachin, chayman yaycuya. Paycunaka chaymanta jawapi lakhaman wijch'uskas cankancu. Jakaypitaj khaparispa phutiywan wakankancu. Nanaywan quirusnincuta c'aruunkancu, —nispa.

<sup>13</sup> Chanta Jesús camachejman nerka:

—Ripullay wasiyquiman. Diospi jap'icuskayquimanjina ruwaska cachun.

Camachejpa runaj uywaskantaj chay niskantawanpacha thañicaporka.

### *Jesús Pedroj suegranta thañichin*

<sup>14</sup> Khepanta Jesús Pedroj wasinman rispa Pedroj warminpa mamanta ricorka. Pay sinch'i k'oñi onkoywan camapi sircusharka. <sup>15</sup> Jesustaj onkoskaj maquinta llanqharispa k'oñi onkoyninmanta thañicherka. Thañiska warmitaj jataricuspa miqhunata payman jaywarka.

### *Jesús ashqha onkoskasta thañichin*

<sup>16</sup> Ch'isiyacyutari ashqha supayniyojcunata Jesusman runas pusamorkancu. Paytaj ujta parlaskallanwan chay supaycunata kharkorka. Tucuy onkoskastataj thañicherka. <sup>17</sup> Ajinapi junt'acorka Diospa willajnin Isaiaspa niskan Jesusmanta: “Payka khechupuwarkanchej onkoyninchejcunata nanayninchejcunatapis”.

### *Jesusta khatejcuna*

<sup>18</sup> Jesustaj ashqha runasta muyuyninpi ricorka. Chayraycu camacherka yachacojcunanta kochachimpaman rinancuta. <sup>19</sup> Israel yachachejcunamantataj uj yachaysapa Jesusman kayllaycuspa nerka:

—Yachachiwajní, kanwan cusca risaj maymanchá rinqui, chayman.

<sup>20</sup> Jesusri payman cuticherka:

—Atojcuna justusniyoj cancu. Phawashaj p'iskospis thapasniyoj cancu. Noka, Diospa cachamuska Runanpajrí mana canchu umayta samarichinallaypajpis, —nispa.

<sup>21</sup> Yachachiskasnínmanta ujnín caj nillarkataj:

—Señorní, sakellawayraj tatayta p'ampamunayta, —nispa.

<sup>22</sup> Jesusrí cuticherka:

—Kanka nokallawanpuni puriy yachacojníy canayquipaj. Wañuskacuna wañuskasnincutaka p'ampamuchuncu.

### *Jesús ch'inyachin wayrata yacutapis*

<sup>23</sup> Chaymanta Jesuska barcoman yaycorka, kochachimpaman rinancupaj. Yachacojcunan paywan risharkancu. <sup>24</sup> Ujllata jatun kochapi

manchay sinch'i wayrawan yacoka mayta okharicorka. Yacoka callpawan khallacamuspa bartota chincaycuchinayasharkaña. Jesusrí puñucushallarkapuni.<sup>25</sup> Yachacojcunantaj payman kayllaycamuspa ri-jch'aricherkancu. Mancharicusputaj, nerkancu:

—¡Señorníy, yanapawayaycu! ¡Chincaycunayashanchejña! —nispa.

<sup>26</sup> Jesustaj paycunaman c'amerka:

—¿Imaraycutaj manchariskas chujchushanquichejri? ¡Ancha pisita Diospi jap'icunquichej! —nispa.

Chanta payka jataricuspa wayrata kochatawan c'amerka. Chay quiquinpacha wayrapis yacupis payta casuspa c'achata thañicaporkancu.<sup>27</sup> Paywan rejcunataj maytapuni t'ucuspa ninacusharkancu:

—¿Ima runataj payrí? ¡Wayrapis kochapis payta casuncu!

### *Gadara llajtamanta supayniyojcuna*

<sup>28</sup> Jesuska rispataj kocha chimpaman chayarka. Chayri Gadarenospa jallp'ancu carka. Ajinapitaj iscay supayniyoj runasaya p'ampanasmanta llojsimorkancu. Jesustataj taripaycorkancu. Paycunaka manchay phiñas caskancuraycu ni pipis chay ñannejta purejchu.<sup>29</sup> Chay supayniyoj runastaj khaparispa nerkancu:

—¡C'ata Diospa Wawan, Jesús, imaman chapucuwanqui! ¿Manaraj ñac'arinaycu cashajtinñachu ñac'arichej jamuwaycu?

<sup>30</sup> Paycunamanta carunejpitaj ashqha qhuchis miqhusharkancu.<sup>31</sup> Supaycunataj Jesusta mayta niricusharkancu:

—Cay runasmanta kharkowasajcu chayka, jakay qhuchisman cachawayaycu, —nispa.

<sup>32</sup> Jesustaj paycunata nerka:

—Riychej.

Chanta supaycunaka chay iscay runasmanta llojsispa qhuchisman yaycorkancu. Ajinamanta qhuchis tucuynincu kakamanta kochaman ch'ulticuspa yacupi wañorkancu.

<sup>33</sup> Qhuchi michejcunari aykecorkancu manchariskas. Llajtaman chayaspataj tucuy imata chay supayniyoj runasmantapis willamorkancu.<sup>34</sup> Llajtantinmantataj runas Jesuswan tincoj llojsimorkancu. Payta ricospataj mayta mañacorkancu jallp'ancumanta ripunanta.

## 9

### *Jesús uj mana cuyurej runata thañichin*

<sup>1</sup> Jesuska barcoman yaycuspa ujnin kocha chimpaman rerka. Chaymantataj llajtanman chayarka.<sup>2</sup> Ajinallaman uj mana cuyurej suchu runata siriskata callapunpi payman wantumusharkancu. Jesustaj reparaspa Diospi chekata jap'icuskancuta chay runata nerka:

—Wawáy, ama manchachicuychu. Juchasniyqui khechuskasña cancu, —nispa.

<sup>3</sup> Waquin yachaysapacuna sonkoncupi nisharkancu: “Cay runaka Dios caskanmanjina parlaspa payta phiñachishan”, nispa.<sup>4</sup> Jesustaj yuyaskancuta yachaspa nerka:

—¿Imaraycutaj chayjina sajrata sonkoyquichejpi yuyashanquichejri?

<sup>5</sup> Cay runaman nejtiy “juchasniyqui khechuskaña” nispaka, mana ricunquichejchu chekachus manachus caskantaka. Astawanrí cay mana

cuyurej runata jatarichiymán chayka, ricuwajchej. <sup>6</sup> Noka, Diospa cachaska Runan caspa, cay pachapi atiyniyoj cani juchasta khechunaypaj. Chayta yachanayquichejpaj cay mana cuyurej runata nini: Jataricuy. Callapuyquita okharicapupsa ripuy wasiyquiman.

<sup>7</sup> Runataj jataricuspa wasinman riporka. <sup>8</sup> Ashqha runasri chayta ricuspa manchachicorkancu. Diosta yupaycharkancutaj chayjina atiyta runasman koskanmanta.

### *Jesús Mateota wajyan*

<sup>9</sup> Jesuska chaymanta ripuspa Mateo sutiyoj runata ricorka. Mateori vendejcunamanta cobrana wasipi tiyacusharka. Jesustaj payta nerka:  
—Yachacojný cay,—nispa.

Jatarispataj Jesusta khaticorka.

<sup>10</sup> Ajinaka Jesús yachacojcunawan Mateoj wasinpi miqhusharka. Chay wasimantashqha impuesto jap'ejcuna, juchasapaspaj khawaska runaswan jamorkancu paycunawan miqhoj. <sup>11</sup> Chayta ricuspataj fariseo partemanta runas Jesuspa yachacojcunanta taporkancu:

—¿Imaraycutaj yachachisojniyquichejka impuesto jap'ejcunawan juchasapawan cusca miqhunri?

<sup>12</sup> Jesusrí chayta uyarispa nerka:

—Onkoska runaslla medicotaka munancu manataj sano runaska. <sup>13</sup> Kancunari sumajta yachamuychej Dios cayta niskanta: “Runas qhuyanacunancoka astawan cusichiwan uywa wañuska jaywanasmana niskaka”. Juchasapasta wajyaj jamorkani paycuna sajra ruwaskasnincuta sakespa Diosman cutirinancupaj. Manataj jamorkanichu chekan cajcunata wajyaj,—nispa.

### *Tapunas ayunomanta*

<sup>14</sup> Chanta Juanpa yachacojcunan Jesusman chimpaycorkancu. Taporkancutaj:

—Nokaycu, fariseocunawan ayunaycu ajllaska p'unchaycunapi yachacuskaycumanjina. Kanpa yachacojcunayquirí ¿imaraycutaj mana ayunancuchu paycunajinata?

<sup>15</sup> Jesusrí paycunaman cuticherka:

—¿Casamientoman wajyaskacunaka phutiska uyasllachu cancuman casaracoj runa paycunawan cashajtin? Waj p'unchaycuna jamojtincuri paycunamanta casaracoj runa khechuska canka. Chaypacha yachacojcunay phutiyywan mana miqhonkancuchu,—nispa.

<sup>16</sup> Cay quiquinchanawan mosoj yachachiyninmanta parlarka:

—Ni pipis uj mosoj remiendota uj mauc'a p'achaman siraycunmanchu. Chayta ruwanman chayka, mosoj p'achamanta remiendoka k'entispa aswan jatunta lliq'irparinman mauc'a p'achataka.

<sup>17</sup> Manallataj pipis mosoj pokoshaj vinota mauc'a karasman churanchu. Chayta ruwanman chayka, pokoshaj vinoka phatapparichinman mauc'a karastaka. Ajinapitaj karas lliq'iycucunman vinotaj jich'acuspa chincapunman. Chayraycu mosoj vinotaka mosoj karasman churana tiyan. Ajinamanta iscaynincu allin wakaychaskas cancu,—nispa yachacherka Jesús.

### *Jesús thañichin Jairoj wawanta*

<sup>18</sup> Jesús cay imasmanta parlashajtillanraj uj curaj runa payman kayl-laycorka. Jesusta yupaychaspataj nerka:

—Tatáy, warmi waway cunallan wañupun. Astawanpis payman maquiyquita churanayquipaj jamuy. Wawayka chaywan causarenka, —nispa.

<sup>19</sup> Ajinataj Jesuska rerka curaj runawan cusca. Yachacojcunampis Jesuswan rerkancu.

<sup>20</sup> Rishajtincutaj uj warmi Jesusman kayllaycorka. Payka chunca iscayniyoj watastaña yawar apay onkoywan carka. Khepanmanta jamuspataj Jesuspa ponchonpa t'icasninta jap'irerka. <sup>21</sup> Ajinata ruwarka sonkonpi niskanraycu: "P'achallantapis llanqharisaj chayka, thañicapusaj". <sup>22</sup> Jesusrí cutiricuspa warmita khawarerka. Nerkataj:

—Cusicuy, mamáy. Diospi jap'icuskayquiraycu thañiska canqui.

Warmeka chaypachita sumajta thañicaporka.

<sup>23</sup> Jesustaj curaj runaj wasinman chayamuspa p'ampanapaj tocajcunata ricorka. Ashqha ch'ajwashaj runastapis ricuspataj <sup>24</sup> nerka:

—Ithiricuychej. Imillitaka mana wañuporkachu. Manachayrí puñushallan,—nispa.

Runastaj Jesusta asipayarkancu. <sup>25</sup> Jesuska paycunata jawaman llojsichispa wasiman yaycorka. Imillitatataj maquinmanta jap'ispa causaricherka. <sup>26</sup> Chay ruwaskanmantari tucuynejpi runas yacharkancu.

### *Jesús thañichin iscay ciegosta*

<sup>27</sup> Jesús chaymanta ripushajtintaj iscay ciego runas paypa khepanta khaterkancu. Khaparispa nerkanca:

—Diospa ajllaskan Cristo,\* qhuyacuwaycu.

<sup>28</sup> Jesuska wasiman yaycorka. Chaymantataj ciego runaska payman kayllaycorkancu. Jesusri paycunata tapurerka:

—¿Tucuy sonkowanchu creenquichej kancunata thañichiyya atinaya?

Paycunataj cuticherkerka:

—Arí, tucuy atiyniyoj Señor,—nispa.

<sup>29</sup> Chanta Jesuska ñawisnincuta llanqhaycuspa nerka:

—Diospi jap'icuskayquichejmanjina ricuychej.

<sup>30</sup> Ciegostaj ricorkancu. Chaymanta Jesús sinch'ita paycunata nerka:

—Ama ni pimanpis willaychejchu,—nispa.

<sup>31</sup> Paycunarí Jesuspa niskanta mana casorkancuchu. Astawanpis tucuy chay jallp'anejpi Jesusmanta willarkancu.

### *Jesús thañichin uj upa runata*

<sup>32</sup> Paycuna llojsishajtincutaj runas Jesusman supayniyoj uj upa runata pusamorkancu. <sup>33</sup> Jesusri supayta kharkorka. Chay quiquinpachataj upaka parlarerka. Chaypi caj ashqha runastaj t'ucusharkancu:

—¡Ni jayc'ajpis cayjina imaska Israel jallp'api ricucorkachu! —nispa.

<sup>34</sup> T'akacoj fariseocunari nerkanca:

—Chay runaka supaycunaj curajnincoj atiyninwan supaycunata kharkon,—nispa.

### *Jesús munacuywan runasta qhuyan*

<sup>35</sup> Jesuska tucuy llajtasta ranchostawan purerka. Tantacuna-wasisnincipitaj yachachisharka. Willarasharka sumaj willanastapis Diospa ajllaskan cay pachapi caskanta camachinanpaj. Tucuy laya

\* <sup>9:27</sup> Literal: Davidpa Wawan.

onkoyniyojcunatapis nanayniyojcunatapis thañicherka. <sup>36</sup> Chanta ashqha runasta ricuspa paycunata may munacuywan qhuyacorka. Jesuspa sonkon nanarka paycunata llaquiywan sayc'uskasta llauchhuyaskastataj ricuspa. Imaraycuchus paycunaka mana michejniyoj ovejasjina carkancu. <sup>37</sup> Chantataj yachacojcunanman nerka:

—Cheka Diosmanta chincapushaj runaska uj jatun trigo chajrajina cancu. Ashqha trigo cashan ruthunapajjina pokoskaña. Ruthojcunari pisislla cancu. <sup>38</sup> Chayraycu tucuy atiyniyoj Diosmanta mañacuychej llanc'ajcunata uskhayta chajranman cachamunanta. Caytaka paymin camachin.

## 10

### *Jesús cachasninta ajllan*

<sup>1</sup> Jesustaj chunca iscayniyoj yachacojcunanta payman wajyarka. Chantataj paycunaman atiyya korka. Paycunaka chay atiyywan supaycunata kharkonancu carka. Tucuy laya onkoyniyojcunatataj tucuy mana allin caytawampis thañichinancu carka.

<sup>2</sup> Jesuspa chunca iscayniyoj cachasnincoka caycuna cancu: Ñaupaj cajka Simonmin, paytari Pedrota Jesús suticharka, wauken Andreswan, Jacobowan wauken Juanwan. Paycuna iscaynin Zebedeoj wawasnin cancu. <sup>3</sup> Felipe, Bartolomewan; Tomás, impuesto jap'ej Mateowan; Jacobo, Alfeoj wawan Tadeowan. Payka Lebeo niskapis. <sup>4</sup> Simón cananista partemanta, Judás Iscariotewan. Payka khepata Jesusta churanacojcunanman jaywaycorka.

### *Jesús ajllaskasninta willarajta cachen*

<sup>5</sup> Chay chunca iscayniyoj ajllaskasninta Jesús cacharka, cayjinata camachispas:

—Ama Samaria llajtasman yaycuychejchu nitaj waj runasmanpis riychejchu. <sup>6</sup> Manachayrí llajta-masisninchellaman riychej. Paycunaka Diospa ajllaskan israelcuna ayllumanta chincaska ovejasjina cancu.

<sup>7</sup> Rispataj willaraychej: Cunanka Dios caypiña cashan camachinan-paj. <sup>8</sup> Onkoskasta thañichiychej. Manchay lepra onkoyniyojcunata llimphuchaspa thañichimuychej. Wañuskacunata causarichimuychej. Runasmana supaycunata kharkoychej. Tucuy chayta ruwanayquichejpaj atiyya khasillamanta korkayquichej. Chayraycu kancunapis runaspaj chay atiyywan khasillamanta ruwamuychej.

<sup>9</sup> ‘Nanniyquichejpaj kolketa ama waquichicuychejchu. <sup>10</sup> Puriyniyquichejpaj ama k'epichacuychejchu imatapis. Nitaj iscay camisasta nitaj ojot'asta nillataj c'aspita purinayquichejpaj apaychejchu. Imaraycuchus llanc'ajcunaman causanancupajka konancupuni tiyan.

<sup>11</sup> 'Mayken llajtaman ranchomanpis yaycuspaka tapucuychej maykenchus chaypi c'acha runa caskanta. Ajinapi yachanquichej piwanchus samarinayquichejta. Paypa wasinpitaj caricuychej waj llajtaman rinayquichejcamá. <sup>12</sup> Wasinman yaycuspataj chaypi tiyacojcunata napaycuychej: "Dioswan allinyaska cacuychej", nispa. <sup>13</sup> Chaypi tiyacojcuna napaycuskayquichejta jap'icuncuman chayka, Dioswan allinyaskas cankancu. Mana jap'icuncumanchu chayrí, kancunaman cutimpusonkachej.

<sup>14</sup> Pillapis mana wajyarisunquichejmanchu nitaj niskasniyquichejta uyarinmanchu chayka, paycunata sakerparipuychej. Chaymanta llojsipuspa chaquisniyquichejmanta jallp'ancutapis thalarpariychej. Chaywan runas yachankancu Diosmanta willanasta khesachaskancuta. <sup>15</sup> Chekata niyquichej: Chay llajtapi tiyacojcunata Dioska astawan ñac'arichenka c'ajaj phiñacuyninwan. Sodoma llajtayojcuna Gomorra llajtayojcunatawanka pisitaraj ñac'arichenka paycunamanta niskaka.

### *Llaquichiyuncunamanta*

<sup>16</sup> Reparaychej noka cachashayquichej mana michejniyoj ovejastajina sajra atojcunaj chaupincuman. Chayraycu kancunaka sumaj yuyayniyoj llamp'u sonkoyojtaj canayquichej tiyan.

<sup>17</sup> Khawacuychejpuni sajra runasmanta. Imaraycuchus curajcunaman jaywaycusionkachej. Tantacuna-wasisnincipitaj c'aspiswan wajtasonkachej.

<sup>18</sup> Yachacojcunay caskayquichejraycu curajcunaman jatun camachejcunamanpis pusasonkachej. Ajinapi israelcunaman Diosta mana rejsejcunamanpis nokamanta willaranquichej.

<sup>19</sup> Curajcunaman jaywasojojtyquichejka imatachus chayrí imaynatachus ninayquichejmanta yuyaspa ama manchachicuychejchu. Dios chay quiquinpacha sonkoyquichejman churanka imatachus ninayquichejta.

<sup>20</sup> Imaraycuchus mana sapallayquichejchu parlanquichej. Manachayrí Santo Espíritu Tatayquichejmanta kancunanejta parlanka.

<sup>21</sup> Uj waukeka waukenta jaywayconka wañuchiska cananpaj. Uj tatapis wawanta wañuchiska cananpaj jaywayconka. Wawaspis tatasnincoj contrancupi jataricullankancutaj wañuchichinancupaj.

<sup>22</sup> Nokamanta willaraskayquichejraycu tucuy runas kancunata chejinicusonkachejpuni. Tucucunancama nokapi confiaspallapuni muchojri wiñay causayniyoj canka. <sup>23</sup> Uj llajtapi nac'arichisojtyquichejka waj llajtaman aykecuychej. Noka, Diospa cachaska Runan, niyquichej chekatapuni manaraj tucuy Israel llajtasta rishajtiyquichej cutimunayta.

<sup>24</sup> Yachacojka mana curajchu yachachejninandaka. Camachipis mana curajchu camachejmantaka. <sup>25</sup> Yachacojka yachachejnininallataj caytawan cusicunanka allinmin. Camachipis camachejnininallataj cananka allinmin. Noka wasiyojta sutichawarkancu "curaj supay", \* nispa chayka, kancuna wasiypi tiyacojcunallataka aswan sinch'itaraj ñac'arichisonkachej.

### *Runataka ama manchachicuychejchu*

<sup>26</sup> Runataka ama manchachicuychejchu. Arí, tucuy sumaj khataska cajpis k'ala khataraska canka. Tucuy pacaska cajpis sut'inchaska callankataj. <sup>27</sup> Lakhapi parlasuskayquichejtaka sut'ita tucupya ñaupakenpi willaychej. Ningrillayquichejpi willasuskayquichejtapis ashqha runasman khaparispa† willaraychej. <sup>28</sup> Cuerpollata wañuchecunataka ama manchachicuychejchu. Paycunaka wiñay causayta khechusuya mana atincuchu. Astawanrí Diosta manchachicuychej. Paylla causayta khechuspa uqhu pacha ninaman wijch'uycuchiya atin.

<sup>29</sup> ¿Manachu runas iscay phichitanca p'isketosta miqhunancupaj vendencu uj phatallapi? Chaywanpis ni ujllapis wañunchu Dios

\* **10:25** Literal: Beelzebú. † **10:27** Literal: wasi patamanta.

Tatayquichej mana munajtenka.<sup>30</sup> Umayquichejpi chujchaspis ujmanta uj yupaskas cancu.<sup>31</sup> Dios Tatayquichej khawashasuskayquichejraycu ama manchachicuychejchu. Kancuna ashqha phichitancasmanta niskapis astawan yuyanarajmin canquichej Diospajka.

*Jesús curaj camachej caskanta willajcuna*

<sup>32</sup> Pichari runaspa ñaupakencupi sut'ita willan noka paypa camachejin caskayta chayka, nokapis janaj pacha Dios Tatayman willallasajtaj payka nokaj camachiymin caskanta.<sup>33</sup> Pichari runasman nokamanta willanman mana camachejninchu caskayta chayka, paymanta nokapis janaj pacha Dios Tatayman willallasajtaj mana camachiychu caskanta.

*Runas t'akanacuncu Jesusraycu*

<sup>34</sup> 'Ama yuyaychejchu runas juchallapipuni<sup>‡</sup> allillanta causacunancupaj jamuskaytaka. Manachayrí juchaj contranpi jamuskayraycu runaska paycunapura sinch'ita t'akanaconkancu.<sup>35</sup> Nokata casuwaskancuraycu khari wawaka tatanwan t'akanacun. Warmi wawa mamanpa contranpi, khachunapis suegranwan t'akanacun.<sup>36</sup> Wasinpi tiyacojcunallataj paytaka nokaraycu sinch'ita chejniconkancu.

<sup>37</sup> 'Pillapis tatanta chayrí mamanta nokamanta astawan munacojka mana yachacojniy cananpajjinachu cashan. Runa nokata astawan munacunawan tiyan warmi wawanmanta chayrí khari wawanmanta niskaka. Manachayka mana yachacojniy cananpajjinachu cashan.<sup>38</sup> Runaka munayninta sakespa nokata casunawanpuni tiyan nokaraycu wañunancampis. Mana casuwanpuni chayrí mana yachacojniy cananpajjinachu cashan.<sup>39</sup> Causayninta payllapaj wakaychacuya munajka mana wiñay causayniyojchu canka. Nokata casuwaskanraycu causayninta chincananta sakejka wiñay causayniyoj canka.

*Jesuspa cachasninta allinta khawapuychej*

<sup>40</sup> 'Pillapis kancunata wajyacun yachacojcunay caskayquichejraycu, nokatapis wajyacuwan. Pillapis nokata wajyacuwan, camachiwajniy Dios Tataytapis wajyacullantaj.<sup>41</sup> Diospa willajninta c'achata wajyarejka willaj caskanraycu, willajpa jap'inantajinallataj Diosmanta jap'enka. Chekan ruwaj runata wajyarejka, chekan ruwaj caskanraycu chay ruwajpa jap'inantajinallataj Diosmanta jap'enka.<sup>42</sup> Yachacojcunay pisipaj khawaskaspuni cashancu. Pichari paycunamanta ujninman uj chhica yacullatapis jaywarinman yachacojniy caskanraycu, chekata-puni payka uj sumaj konata jap'enka Diosmanta, —nispa yachacherka Jesús.

## 11

*Bautizaj Juanpa cachasnin Jesusta tapuncu*

<sup>1</sup> Jesuska chunca iscayniyoj yachacojcunanta ruwanancuta yachacherka. Chayta tucuytawantaj llojserka chay kayllapi llajtasman yachachej willarajtaj.

<sup>2</sup> Juanrí wisk'aska cashaspa uyarerka Cristoj ruwaskasnimanta. Chayraycu yachacojcunanta Jesusman tapunancupaj cacharka. Ajinapi Jesusta taporkancu:

<sup>‡</sup> **10:34** Ninayan.

3 —¿Kanchu Diospa niskanmanjina jamoj, Cristoka canqui? chayrí ¿wajtachu suyallasajcupuni?

<sup>4</sup> Jesusri paycunaman cutichispa nerka:

—Cay uyarishaskayquichejta ricushaskayquichejtawan cutispa Juan-man willamuychej. <sup>5</sup> Ciegos ricushancuña. Suchuspis purishancuña. Lepra onkoyniyoj runaspis thañiskasña cashancu. Lojt'uspis uyarishancuña, wañuska runastaj causarichiskasña cashancu. Sumaj willanasta wajcha runaspis uyarishallancu. <sup>6</sup> ¡May cusiska mana p'enkacuspa nokapi jap'icojka!

<sup>7</sup> Juanpa cachamuska yachacojcunan ripushajtincu Jesuska ashqha runasman paymanta parlarka:

—Juan ch'innejpi willarashajtin ¿imatataj khawaj rerkanquichejrí? Ichhu wayrawan c'umuy cachachiska ¿chayjinata iscayrayaj runatachu khawamorkanquichej? <sup>8</sup> Mana ajina cajtinri ¿imata khawajtaj rerkanquichej? ¿Uj sumaj c'achitu p'achalliska runata khawaijchu rerkanquichej? Reparaychej, ajinata p'achallicojcunaka jatun camachejcunaj wasisnillancupi tiyacuncu. <sup>9</sup> Chantari ¿imata khawaijpunitaj rerkanquichej? ¿Diosmanta uj willajtachu? Arí, niyquichej payka Diospa unay willajcunanmanta aswan curajmin caskanta. <sup>10</sup> Dios palabranpi Juanmanta kelkacherka:

Willajniyta naupakeyquita cachamushani.

Payka runaspa sonkoncuta\* waquichipusonka paycunaman rinayquipaj.

<sup>11</sup> Nokataj chekatapuni niyquichej: Tucuynin runas uqhupi ni uj runa canchu aswan curaj bautizaj Juanmanta niskaka. Dios camachin, chaypirí aswan pisipaj khawaska cajka aswan curajpunimin Juanmanta niskaka.

<sup>12</sup> Bautizaj Juan willaraskan p'unchaymantapacha cunancama juchasapa runas Diospa camachisnin cayta mayta callpacushancu. Astawanrí Diospa churanacojninta atiywan atipaspalla paypa camachisnin cayta atincu. <sup>13</sup> Diospa tucuy unay willajcunanwan Moiseswanka sut'incharkancu Juan jamunancama. Paycunaka Dios tucuya wiñaypaj camachinanmanta parlarkancu. <sup>14</sup> Nerkancutaj Juanka willaj Eliasjina jamoj caskanta. Chay sut'inchaskancuta jap'itya munanquichej chayka, atinquichej. <sup>15</sup> Ningriyoj cajka, sumajta uyarichun.

<sup>16</sup> ¿Picunamantaj rijch'acuncu cunan p'unchay runas? Plazaspi tiyaska pujllacoj wawasman rijch'acuncu. Uj tantaska wawas waj tantska wawasta khaparincu: <sup>17</sup> "Kenata tocaporkaycu tusunayquichejpaj. Kancunari mana tusorkanquichejchu. Wakanapajjina taquiporkaycu kancunari mana wakarkanquichejchu", nispa. <sup>18</sup> Ajinata Juampis riqhurimuspa sumaj miqhunasta mana miqhojchu nitaj vinota ujyajchu chaywan Diosta casunanpaj. Runastaj nerkancu: "Supayniyoj chay runaka", nispa. <sup>19</sup> Chanta noka, Diospa cachaska Runan, jamorkani, runaswantaj miqhuni. Nokamantataj nincu: "¡Khawayche! Cay runaka miqhuysapa ujyaysapataj. Juchasapaswan impuesto jap'ejcunawan rejsinaycucun", nispa. Chaywanpis tucuy cheka yachayniyojka rejsin Diospa yachaynin cheka caskanta. Ruwaskasnинwantaj cheka caskanta ricuchin.

\* **11:10** Literal: ñanta.

*Diosta mana casojcuna*

<sup>20</sup> Waquin llajtaspi Jesuska astawan ashqha t'ucuna imasta atiyninwan ruwarka. Chaywanpis chaypi tiyacoj runaska juchasnincuta mana sakerkancuchu. Nitaj Diosman cutirerkancuchu. Chayraycu Jesuska chay llajtaspi tiyacojcunata c'amerka:

<sup>21</sup> —¡Ay, phutiy, ari, kancuna Corazín llajtapi tiyacojcunapajka! ¡Ay, phutiy, ari, kancuna Betsaida llajtapi tiyacojcunapajka! Dios atiyninwan jatun t'ucunasta kancuna uqhupi ruwarka. Tiro llajtayojcuna Sidón llajtayojcunapis ancha sajras carkancu. Chaywanpis paycuna uqhupi chay jatun t'ucunasta Dios ruwanman carka chayka, paycunaka payman unayña cutiricapuncuman carka. Ajinaka llamp'u sonkowan juchallicuskancumanta mayta llaquicuspa sajra ruwaskasnincuta sakepuncuman carka. Chayta ricuchinancupaj luto p'achasnincuta usphatawan umasnincuman jich'acuncuman carka.

<sup>22</sup> Chaywanpis niyquichej: Diospa c'ajaj phiñacuynin p'unchaypiri kancunata astawan ñac'arichisonkachej Tiropi Sidonpi tiyacojcunamanta niskaka.

<sup>23</sup> Capernaum llajtapi tiyacojcuna, kancuna mayta munasharkanquichej janaj pachaman okhariskas jatunpaj khawaskas canayquichejta. Astawanpis kancunaka uqhu pachapi tucuchiskas canquichej manacajpaj khawaskas canayquichejcama. Kancuna uqhupi ruwacuskan ajina ricuchinasllatajchus Sodoma llajtapi ruwacunman carka chayka, cunan p'unchaycama cacushanman carka.

<sup>24</sup> Chaywanpis niyquichej: Dios c'ajaj phiñacuy p'unchaypi kancunata astawan ñac'arichisonkachej Sodoma llajtamanta niskaka, —nerka Jesús.

*“Nokaman jamuychej samachiskayquichejtaj”*

<sup>25</sup> Chaypacha Jesuska Diosman nerka:

—Yupaychayqui Tatáy, kanka janaj pachata cay pachata camachej canqui. Imaraycuchus cay imasta yachaysapasmanta yuyaysapasmanta pacaycorkankanqui. Wawajina llamp'u sonkoyojcunamantaj cay imasta sut'incharkanqui. <sup>26</sup> Arí, Tatáy, ajina ruwaskayquimanta cusicunqui, —nispa.

<sup>27</sup> Runasman nillarkataj:

—Dios Tatay tucuy yachayta kowarka. Payllamin noka Wawataka rejsiwan. Noka Wawallanmin Dios Tataytaka rejsini. Pimanchus noka, Wawan, rejsichiyyta munani chay runallataj Dios Tataytaka rejsin. <sup>28</sup> Juchawan tucuy sayc'uchiska cajcuna tucuy llaquiska cajcunapis nokaman jampuwaychej. Nokataj samarichiskayquichej. <sup>29</sup> Wasas yugota apancu ajinata yachachinasniyta casuychej. Nokamantataj yachacuychej. Llamp'u sonkoyojmin caspa mana jatunchacunichu. Kancunataj nokaman jamuspa sonkoyquichejpi cheka samacuyta tar-inquichej. <sup>30</sup> Imaraycuchus nokata casuyka cusicuymen. Nokapaj llanc'aytaj mana llasachu, —nispa.

## 12

*Samacuna p'unchaymanta*

<sup>1</sup> Chay cuti Jesuska trigo chajra chaupinta risharka. Chayri samacuna p'unchay carka. Yachacojcunantaj yarkhachicuspa trigo umasta muruspa pallasharkancu miqhuya kallarerkerkancutaj. <sup>2</sup> Fariseo partemanta runasri chayta ricuspa Jesusman nerkancu:

—Khawaymá, yachacojcunayqui samacuna p'unchaypi cayjinata llanc'ancu camachiwaskanchejta mana casuspa,—nispa.

<sup>3</sup> Jesusri paycunaman cuticherka:

—¿Manachu leerkanquichej unay camachej Davidpa ruwaskanta? Paywan runasninpíwan yarkhachicorkancu. <sup>4</sup> Paytaj yupaychana-wasiman yaycorka. Diosman t'akaska t'antasta miqhorka. Camachiwaskanchejmanjinari chay t'antataka yupaychana-wasipi ruwanayojcunalla miqhunancu carka. Ni pay nitaj runasninpíris miqhunancuchu carka. <sup>5</sup> Kancuna Moisespa camachiskasninta leerkanquichejcharí. Chaypi Moisés camacherka samacuna p'unchaypi runas mana llanc'anancuta. Yupaychana-wasipi ruwanayojcunari ruwanallancupuni. Samacuna p'unchaypi ruwaskancumantataj mana juchallicorkancuchu Diosta yupaychanapaj ruwaskancuraycu. <sup>6</sup> Nokarí niyquichej caypi cashajka yupaychana-wasipi ruwanasmanta niskaka aswan curajmin caskanta. <sup>7</sup> Dios nin: “Runas qhuyanacunancoka astawan nokata cusichiwan uywa wañuchiska jaywanasmanta niskaka”. Chaytachus reparawajchej chayka, mana juchachawajchejchu allin ruwajcunataka. <sup>8</sup> Noka, Diospa cachaska Runan, atiyniyoj cani camachinaypaj imatachus ruwanata samacuna p'unchaypipis.

*Jesús thañichin wañuska maquiyoj runata*

<sup>9</sup> Chaymanta ripuspataj Jesuska tantacunawasincuman yaycorka.

<sup>10</sup> Chaypi carka uj wañuska maquiyoj runa. Runaska imaynallamantapis Jesusta juchachayta munasharkancu. Chayraycu taporkancu:

—Niwaycu, camachiwaskanchejmanjina ¿aticunchu runata thañichiy samacuna p'unchaypi?

<sup>11</sup> Jesusrí paycunaman cuticherka:

—Samacuna p'unchaypi uj ovejayquichej jatun t'okoman urmaycuman chayka ¿orkhocapuwajchejcharí? <sup>12</sup> Diospa ñaupakenpi runaka aswan yuyanamin ovejamanta niskaka. Chayraycu samacuna p'unchaypeka allin cajtapuni ruwana,—nispa nerka.

<sup>13</sup> Chanta wañuskajina maquiyoj runaman nerka:

—Aysariy maquiyquita.

Runataj maquinta aysarerka. Chay maquinri ujnin maquinjina thañiska carka. <sup>14</sup> Fariseo partecunarí llojsiytawan tantacamorkancu. Jesuspa contranpi parlanacorkancutaj imaynamantapis payta tucuchinancupaj.

*Jesusmanta Isaiaspa willaraskan*

<sup>15</sup> Jesusrí chay imasta yachaspa chaymanta llojsiporka. Ashqha runas paywan risharkancu. Tucuy paycunataj thañichisharka.

<sup>16</sup> Paycunataka allinta camacherka:

—Pitaj noka caskaytaka ama pimanpis willanquichejchu,—nispa.

<sup>17</sup> Ajinapi junt'acorka Diospa unay willajnin Isaiaspa niskan Jesuscristomanta.

Ajinaka Dios nin:

<sup>18</sup> Paymin ajllacuska camachi, sonkoya cusichin. Paytamin munacuni. Santo Espiritu cachasaj paypa sonkonpi tiyacunanjapaj.

Paytaj tucuy runasman cheka munayniyta willaranka.

<sup>19</sup> Llamp'u sonkowan parlanka. Manataj runaswan khawachicunananpajjinachu willaranka.

- <sup>20</sup> Mana p'aquenkachu saruska sokosojina runatapis. Nitaj ñac'ayta k'oшñej c'anchanajina runatapis wañuchenkachu.  
Ceka munayninta junt'anancama chaytaka pay ruwanka.
- <sup>21</sup> Tucuy runaska juchancumanta cachariskas canancupaj paypi suyankancu.

*Nincu Jesuspa atiynin supaymanta caskanta*

<sup>22</sup> Chaymantataj Jesusman uj ciegota pusamorkancu. Chay runari supayniyoj upataj carka. Jesustaj payta thañicherka. Ajinapi upa cajka parlaporka, ricorkataj.

<sup>23</sup> Tucuy chay ashqha runastaj t'ucuspa Jesusmanta nerkanca:

—¿Cay Diospa ajllaskan Cristochu\* canman?

<sup>24</sup> Fariseo partecunari cayta uyarispa nerkanca:

—Cay runaka curaj supaycunaj curajnincu, Beelzebú atiynillanwan supaycunata kharkon,—nispa.

<sup>25</sup> Jesusrí yuyashaskancuta yachaspa paycunaman nerka:

—Jatun llajtapi tiyacojcuna paycunapura makanaycucojtincoka tu-cuchiska canka chay llajtaka. Sapa llajta chayrí wasipis paycunapura llallataj makanacojtenka chincaponka. <sup>26</sup> Curaj supay Satanás supaycunallatataj kharkon chayka, payllataj t'akanacushan. Camachisnil-lantaj paywan makanacojtincoka tucuconkancu. <sup>27</sup> Supay Beelzebój atiyninwan supaycunata kharkoskayta ninquichej. Kancunamanta cajcunari ¿pejpa atiyninwantaj supaycunata kharkoncurí? Chayraycu paycuna pantaskaspuni caskayquichejta ricuchisonkachej. <sup>28</sup> Nokarí Santo Espíritoj atiyninwan supaycunata kharkoskayka niyta munan Dios kancuna uqhupiña caskanta camachinanpaj.

<sup>29</sup> Suwayta munajka callpasapaj wasinman yaycunapajka ñaupajta atipaspa watananraj tiyan. Chanta wasinman yaycuya atin capuyninta apacapunapaj. [Nokapis ajinallatataj curaj supayta atipaspa millay supaycunata kharkoni.]†

<sup>30</sup> 'Ajinata mana nokawan cusca Diosman sayacojka contraypi churanacun. Mana nokata yanapawajka ruwanasniyta jarc'awan.

<sup>31</sup> Chayraycu niyquichej Dios khechuya atiskanta runaspa tucuy juchancuta payta phiñachiskancutapis. Santo Espíritoj contranpi sajrata parlajtarí Dios mana perdonankachu. <sup>32</sup> Noka, Diospa cachaska Runanpa contranpi sajrata parlan chayka, parlaskamanta perdonaskaraj canka. Santo Espíritoj contranta sajrata parlajrí ni jayc'aj perdonaskachu canka, ni cunanpis nitaj khepatapis.

*Sach'aka pokoyinipi rejsicun*

<sup>33</sup> Yachanchej sach'a sumaj chayka, pokoyininpis sumajllataj. Sach'a mana allinchu chayrí pokoyininpis manallataj allinchu. Arí, sach'ataka pokoyinmantamin rejsinchej. Nokatapis ajinallatataj ruwaskasniy-manta atinquichej rejsiwayta. <sup>34</sup> ¡Kancuna runa wañuchi catarisjina canquichej! Sajra caspa ¿imaynatataj allin cajta parlayta atiwajchejrí? Runaka sonkonpi junt'a cajmanta parlan. <sup>35</sup> C'acha runaka c'acha imasta parlan sonkonpi c'acha cajta jallch'askanmanta. Sajra runarí sajra cajta parlan sonkonpi sajrata jallch'askanmanta. <sup>36</sup> Nokarí

\* 12:23 Literal: Davidpa Wawan. † 12:29 Ninayan.

niyquichej runaska tucuy manacaj niskanmantapis Diosman willacunan tiyan. Chaypi Dios nenka juchayojchus manachus caskan-cuta.<sup>37</sup> Niskasniyquimanjina Dios chekan ruwaj runapaj khawasonka. Chayrí sajra niskasniyquimanjina pay juchachasonka, —nispa.

*Mañancu uj t'ucuna ricuchinata ruwananta*

<sup>38</sup> Chanta waquin yachachejcuna fariseo partecunawan nerka: —Yachachej, Diosmanta cachamuska caskayquita yachanaycupaj uj jatun t'ucunata ruwaspa kanmanta ricuchiwaycu, —nispa.

<sup>39</sup> Jesusrí cutichispa paycunaman nerka:

—Sajra ruwajcunawan Diosta wasanchajcunawan uj t'ucunapaj ricuchinata mañashancu. Chayka mana ruwaskachu canka. Manachayrí Diospa unay willajnin Jonás ricucherka, chayllataj reparanancupaj cashan. <sup>40</sup> Jonaska quinsa p'unchay tutatawan jatun challwaj wijsan uqhupi carka. Ajinallataj noka, Diospa cachaska Runanpis, jallp'a uqhupi p'ampaska casaj quinsa p'unchayta quinsa tutatawan. <sup>41</sup> Diospa c'ajaj phiñacuynin p'unchaypi Nínive llajtapi tiyacojcuna cunan p'unchaycunaj contrancupi willankancu. Paycunatataj juchachankancu. Imaraycuchus Jonaspa willaraskantawan paycunaka juchasnincuta sakespa Diosman cutiricaporkancu. Reparaychejtaj cunan Jonasmanta aswan curaj caj caypi caskanta. <sup>42</sup> Chay p'unchaypitaj Sabá runasta camachej warmipis cunan p'unchay runaspa contrancupi willaspa paycunata juchachanka. Imaraycuchus payka may caru jallp'manta jamorka Salomonpa yachayninta uyarej. Reparaychejtaj cunanka Salomonmanta aswan curaj caj caypi caskanta.

*Runaman supay cutimun*

<sup>43</sup> Uj millay supay runamanta llojsispaka ch'aqui pampapi khasilla purin. Samaricuya masc'aspataj mana tarinchu. <sup>44</sup> Chanta yuyaspa nin: “Pimantachus llojsimorkani chay runallamantaj cutipusaj”, nispa. Cutimuspa supayka chay runata taripan pichaskata sumaj c'uchunchaskatataj ch'usaj wasitajina. <sup>45</sup> Chaymantaj supayka rispa paymanta aswan millay kanchis supaycunata pusamun. Chay runaman yaycuspataj paypi tiyacuncu. Ajinapitaj chay runaj khepa caynin aswan sajraman tucun ñaupaj caskanmantaka. Cay p'unchay sajra runaswanpis ajinallataj canka.

*Jesuspa maman waukesninwan*

<sup>46</sup> Jesús chay ashqha runasman parlashajtinraj, khaway, maman waukesninwan chayamorkancu. Cay jawapi casharkancu paywan parlayta munaspa. <sup>47</sup> Ajinallapi uj runaka Jesusman willarka:

—Khaway, mamayqui waukesniyquiwan jawapi cashancu. Munasha-suncutaj kanwan parlanacuyta, —nispa.

<sup>48</sup> Jesustaj cutichispa willajman nerka:

—¿Picunataj mamay waukesniy cancumánri? —nispa.

<sup>49</sup> Yachacojcunanta maquinwan ricuchispataj nerka:

—Paycuna mamay waukesniyjis cancu. <sup>50</sup> Janaj pacha Dios Tataypa munayninta ruwajmin waukey, panay, mamaypis, —nispa nerka Jesús.

<sup>1</sup> Chay p'unchay Jesuska wasimanta llojsispa kocha cantoman rerka. Chaypitaj yachachinanpaj tiyaycucorka. <sup>2</sup> May ashqha runastaj tanta-ycacamorkancu. Chayraycu payka barcoman yaycuspa chaypi tiyaycucorka. Tucuy chay ashqha runastaj kocha cantopi sayaycucorkancu. <sup>3</sup> Jesusri quiquinchanaswan ashqha imasmanta paycunaman willarka. Nerkataj:

—Uyariwaychej, uj runa mujuta t'acaj llojserka. <sup>4</sup> T'acashajtinri waquin mujoska ñan pataman urmarkancu. P'iskostaj jamuytawan pallacaporkancu. <sup>5</sup> Waquin mujusri pisi jallp'ayoj rumi pataman urmarkancu. Chay mujoska uskhayta p'uturamorkancu pisi jallp'a caskanraycu. <sup>6</sup> Mana sumaj saphijoj caskanraycutaj inti ruphamojtin ch'aquiporkancu. <sup>7</sup> Waquin mujustaj qhishca chaupiman urmarkancu. Qhishcawan cusca wiñaycuytawantaj trigota sip'icaporkancu. <sup>8</sup> Waquin mujusri sumaj jallp'aman urmarkancu. Chaypi waquenka uj mujullamanta pachajta pokorka. Waquintaj sojta chuncata, waquintaj quinsa chuncata pokorka. <sup>9</sup> Ningrisniyoj cajka sumajta uyarichun, —nispa nerka Jesuska.

### *Quiquinchanas ¿imapajtajrí?*

<sup>10</sup> Yachacojcunaka Jesusman kayllaycuspa tapurerkancu:

—¿Imaraycutaj runasman quiquinchanaspa parlanquirí?

<sup>11</sup> Paytaj paycunaman cutichispa nerka:

—Dios runasninta camachin, chaymanta yachachinaska wajcunapaj pacaska cancu. Cunanrí kancunallaman sut'i ricuchiskas cancu entiendenayquichejpaj. <sup>12</sup> Niskanta jap'icojmanka Dios astawanraj entiendeuya yanapanka. Ajinapi jap'icojka astawan astawanraj jap'iconka. Mana jap'icojmantarí pisi jap'iska yuyaskanpis khechuska canka. <sup>13</sup> Chayraycu paycunaman quiquinchanaswan parlani ricushaspapis mana entiendenancupaj uyarishaspapis mana chekata reparanancupajchu. <sup>14</sup> Ajinapi Isaiasca sut'inchaskan paycunamanta junt'acun. Dios palabranpi nin:

Uyarishaspa chay uyariskayquichejtaka mana entiendenquichejchu.

Khawashaspa chay khawashaskayquichejtapis mana reparanquichejchu.

<sup>15</sup> Sonkoncu rumiyaycapuskanraycu chay runas palabrayta mana entiendencuchu.

Ningrisnincoka manaña allintachu uyarin.

Ñawisnincutapis ch'illmiycopuncu ama ricunancupaj.

Ningrisnincuwanpis mana uyarincuchu mana munaspa entiendewayta.

Chaywanpis sonkoncupi mana reparayta munancuchu.

Chayraycu nokaman mana cutiricamuncuchu juchasnincuta khechuspa paycunata thanichinaypaj.

<sup>16</sup> Kancunará may cusiskas canquichej ñawisniyquichejwan chaycunata ricuskayquichejraycu ningrisniyquichejwantaj uyariskayquichejraycupis. <sup>17</sup> Niyquichej chekatapuni kancuna ricushanquichej chayta ashqha unay willajcunawan cheka ruwajcunawan ricuyta mayta munaskan-cutu. Manataj ricorkancuchu. Uyarishaskayquichejtapis uyariyta mayta munarkancu manataj aterkancuchu.

*Jesús tarpojmanta quiquinchanata sut'inchan*

<sup>18</sup> 'Tarpojwan quiquinchaskayta entiendenayquichejpaj uyariway-chej.

<sup>19</sup> Waquin runas Dios camachin, chaymanta willanasta uyarincu, manataj casuncuchu. Chaycunaka ñan purinaman urmaj mujusjinamin cancu. Supay Satanás jamuspa Diospa niskanta sonkoncumantaka siq'irpayan mana juchamanta cachariska canancupaj. Chay runaska ñanpi t'acaska mujujinamin. <sup>20</sup> Waquin runaska pisi jallp'ayoj rumi pataman urmaj mujusjina cancu. Diospa niskanta uyarispa cusiywan jap'icuncu. <sup>21</sup> Chay runaska pisi saphijoj mujusjinamin. Chayraycu pisi ratullapaj jap'incu. Paycunata llaquiycuna khatirishajtin chayrí Diospa niskanraycu muchojtincu paycunaka chaypacha urmacapuncu. <sup>22</sup> Waquin runas Diospa niskanta uyarispa cay pacha imasmanta anchata yuyancu. Chayjina runaka munashan ancha khapaj caytaraj. Tucuy chay imastaj payta pantachispa Diospa niskanta sonkonpi mana sakenchu wiñajta. Ajinapi mana pokoyniyoj caspa payka Diosta mana cusichinchu. Chayraycu qhisca chaupiman urmaj mujujina cashan. <sup>23</sup> Waquin runas Diospa niskanta tucuy sonkowan uyarispa casuncu. Chay runaka sumaj jallp'aman urmaj mujujina cashan. Diosta casuskancuraycutaj payta cusichincu. Ajinapi waquin runas ancha sumajta ruwaspa pachajman pokoj mujujina cancu. Waquinri sumajllata ruwaspa sojta chuncaman pokoj mujujina cancu. Waquintaj quinsa chuncaman pokoj mujujina callancutaj.

### *Cizañamanta trigomantawan uj quiquinchana*

<sup>24</sup> Waj quiquinchanatawan Jesuska yachachisharka. Nerka: —Dios camachishajtenka sumaj mujuta chajrani tarpoj runaman rijch'acun. <sup>25</sup> Tutapi tucuy runas puñushajtintaj uj chejnicojnín jamorka. Millay kora cizaña mujuta trigo tarpuskanman t'acaycarparerka. Chaymantataj riporka. <sup>26</sup> Trigotaj wiñaspá sunqachacorka. Chaypacha millay cizaña trigopis riqhurillarkataj. <sup>27</sup> Tarpojpa camachisninri payman jamuspa nerkanca: “Tatay, “¿manachu sumaj mujullata t'acarkanqui chajrayquipi? ¿Imaynamantataj riqhurin chay millay khorarí?” <sup>28</sup> Paytaj paycunaman nerka: “Chayka uj chejnicopja ruwaskan”, nispa. Chanta camachisnin payman nerkanca: “¿Munanquichu khorata siq'iramoj rinaycuta?” <sup>29</sup> Payri cuticherka: “Amaraj, trigotapis koratawan cusca siq'irashawajchejchá. <sup>30</sup> Sakellaychej iscaynincuta wiñajta ruthunacama. Ruthushajtincu trigo ruthojcunaman nisaj: Ñaupajta cizañata t'akarkoychej. K'apiy k'apiyllata churarparispa wataychej ruphachinayquichejpaj. Trigotari pirwayman wakaychaychej”, —nispa.

### *Mostaza mujumanta uj quiquinchana*

<sup>31</sup> Waj quiquinchanatawan Jesús paycunaman yachacherka: —Imaynatachus chajrapi tarpuska juch'uy muju\* wiñan, ajinallataj cashan Dios runasta camachishajtenka. <sup>32</sup> Chekatapuni chay mujoka tucuy juch'uy mujusmanta aswan juch'uysitumin. Wiñasparí tucuy koramanta aswan jatunta wiñan sach'itajinaman tucunancama. P'iskospis mallquisninpi thapachacuncu, —nispa.

### *T'anta pokochinamanta uj quiquinchana*

<sup>33</sup> Waj quiquinchanatawan paycunaman yachachispa nerka:

---

\* **13:31** Literal: Israel jallp'api mostaza mujitu.

—Dios camachishajtenka, t'anta pokochina levadurajina wiñan. Uj warmi chay pokochinata iscay arrobaejina trigo jac'uman churaycorka. Chanta tucuynin masa pokospa okharicamorka, —nispa.

*Quiquinchanas junt'acunananpaj cancu*

<sup>34</sup> Tucuy chay imasta Jesuska chay ashqha runasman quiquinchanasllawanpuni parlaj. Mana chaywanka mana yachachejchu. <sup>35</sup> Ajinapi Diospa willajninpa niskan junt'acorka. Dios palabranpi nin: Quiquinchaspa paycunaman parlasaj.

Cay pacha ruwacuskanmantapacha mana yachaska imasta paycunaman willasaj.

*Koramanta quiquinchanata Jesús sut'inchan*

<sup>36</sup> Chanta Jesuska runasta cacharpayasca wasiman jamporka. Yacha-cojcunantaj payman kayllaycuspa nerkanca:

—Chay chajrapi cizaña khorawan quiquinchanamanta sut'inchawaycu,

<sup>37</sup> Payri cuticherka:

—Noka, Diospa cachaska Runan, sumaj mujuta tarpoj cani. <sup>38</sup> Chajrataj tucuy runas cancu. Sumaj mujutaj Diospa cheka wawasnin cancu. Cizañataj Diosta mana casoj supay Satanaspera wawasnin cancu.

<sup>39</sup> Cizañata t'acaycojtaj chejnicoj supaymin. Cosechari nokaj cutimunay p'unchaymin. Ruthojcunataj Díosmanta cachaska angeles cancu.

<sup>40</sup> Chayraycu imaynatachus cizañata runas tantaycuspa ninaman ruphachincu. Ajinallataj canka cay pacha tucucojtenka. <sup>41</sup> Noka, Diospa cachaska Runan, angelesniyta cachamusaj. Maypicha camachini, chaymanta orkhonkancu tucuy pantachej, sajrata ruwaj runasta, Diosta mana casojcunatapis. <sup>42</sup> Paycunata laurashaj uqhu pachaman wijch'uyconkancu. Chaypitaj chay runaska jatun nanaywan manchayta wakankancu, phutiywan quirusnincutapis c'aruconkancu. <sup>43</sup> Chanta chekanta ruwajcunaka cusiywan riconkancu Diosta janaj pachapi. Chaypitaj Dios Tata atiyninwan tucuya camachenka. Ningrisniyoj cajka sumajta uyarichuncu.

*Uj quiquinchanap'ampaska khapaj capuymanta*

<sup>44</sup> 'Dios runasta camachishajtin uj chajrapi khapaj capuy p'ampaskaman rijch'acun. Chayta taricoj runaka pacaycun. Cusiywan rispataj tucuy capuyninta vendemun chay jallp'atataj ranticapun.

*Uj quiquinchanasumaj perlamanta*

<sup>45</sup> 'Dios runasta camachishajtin uj rantej runamanpis rijch'acullantaj. Payka may sumaj perlusta masc'an rantinanpaj. <sup>46</sup> Aswan sumaj caj perlayojwan tincucuspa: "Cayta ranticuskayqui", nerka. Chaymanta rerka tucuy capuyninta vendemoj sumaj perlata ranticapunapaj.

*Uj quiquinchanachallwajap'ina ch'ipamanta*

<sup>47</sup> 'Ajinallataj Dios runasta camachishajtin challwa jap'ina jatun ch'ipaman rijch'acun. Runas chay ch'ipata kochaman churancu. Chay ch'ipawan imaymana challwasta jap'incu. <sup>48</sup> Ch'ipa junt'aycojtintaj kocha cantoman aysancu. Chaypi tiyaycucuspa challwasta ajllancu. Sumajcunata canastasman tantancu. Mana allin cajcunatataj wi-jch'upuncu. <sup>49</sup> Ajina canka cutimunay p'unchaycunapeka. Janaj pachamanta angeles jamonkancu t'akanancupaj sajra runasta chekan

ruwaj runasmanta. <sup>50</sup> Chay sajra ruwaj runasta laurashaj uqhu pachaman wijch'uyconcancu. Jakaypiri manchayta wakankancu, phutiywantaj quirusnincuta c'aruconcancu,—nispa nerka Jesús.

*Mosoj khoyaswan unay khoyaswan*

<sup>51</sup> Jesús yachacojcunata taporka:

—¿Tucuy chayta entienderkanquichejchu? Paycunataj cuticherkanca:

—Arí, yachachiwajníy, entiendeycu,—nispa.

<sup>52</sup> Jesusri paycunaman nerka:

—Chayraycu Dios camachin, chaymanta sumaj yachachiska runa uj khapaj wasiyojman rijch'acun. Payka jallch'aska khapaj khoyasnima manta orkhomun mosoj khoyasta unay khoyastapis,—nispa.

*Jesús Nazaretpi*

<sup>53</sup> Chay quiquinchanaswan parlayta tucuytawan Jesuska chaynejmanta llajtanman riporka. <sup>54</sup> Chayaspa runasta tantacuna-wasincipi yachachisharka. Mayta t'ucuspa runas ninacorkancu:

—Cay runari ¿maypitaj cayjina yachayniyoj tucumorkarí? ¿Imaynapitaj cayjina t'ucuna ruwanasta ruwashanrí? <sup>55</sup> ¿Manachu cayka carpintero runaj wawan? ¿Manachu mamaarpa sutinpis María? ¿Manachu waukesninpis Jacobo, José, Simón, Judaswan cancu? <sup>56</sup> Panasninpis ¿manachu kayllanchejpi tiyacuncu? Chanta ¿imaynapitaj tucuy cay imasta yachamorkarí?

<sup>57</sup> Paycunataj phiñacuspa Jesusta mana jap'icorkancuchu. Jesusrí paycunaman nerka:

—Diosmanta uj willajka sumajpaj khawaskapuni cashan waj llajtaspeka. Llajtanpi, wasinpiwan cajcunalla paytaka manamin sumajpajchu khawancu,—nispa.

<sup>58</sup> Chaypitaj Jesuska pisi t'ucuna ruwanasllata ruwarka paypi mana jap'icuskancuraycu.

## 14

*Bautizaj Juan wañuchiska carka*

<sup>1</sup> Galilea jallp'api camachej Herodeska chay p'unchaycunapi Jesuspa ruwaskasninmanta uyarerka. <sup>2</sup> Camachisninmanta curajcunamantaj nerka:

—Cay runaka bautizaj Juan wañuyninmanta causarimpuskamin. Chayraycu Diospa atiyninwan t'ucuna ruwanasta ruwashan,—nispa.

<sup>3-4</sup> Ñaupajpi Herodeska jap'iycucherka Juanta. Wataycuchiytwantaj carcelman wisk'aycucherka, wauken Felipej warminraycu. Ñaupajpi Juanka payta c'amejpuni carka:

—Juchamin waukeyquej warmin Herodiasta warmillicunayqueka,—nispa.

<sup>5</sup> Chayraycu Herodiaska Juanta wañuchiyyta munarka. May ashqha runasmantataj manchachicorka. Paycunaka Diospa willajninpaj Juanta rejserkancu. <sup>6</sup> Astawanrí Herodespa diachacun chayamorka. Chaypitaj Herodiaspa ususenka wajyaskacunapaj tusorka. Herodesri chaywan mayta cusicorka. <sup>7</sup> Chayraycu Herodeska Diospa sutinta okharispa nerka warmimpa ususinman:

—Imatachá mañacuwaskayquita koskayqui,—nispa.

<sup>8</sup> Chay sipastaj maman yachaycuchiskanraycu nerka:

—Cunitanpacha chuwapi bautizaj Juanpa umanta koway,—nispa.

<sup>9</sup> Camachej Herodeska phuticorka. Diospa sutinta okhariskanray-curí paywan cusca tiyacojcunaraycutaj camacherka Juanpa umanta sipasman konancuta. <sup>10</sup> Chanta soldadosta carcelman cacharka Juanpa umanta khorumunancuta. <sup>11</sup> Chaymantataj Juanpa umanta uj chuwapi apamorkancu. Sipasmantaj jaywarkancu. Paytaj mamanman aparka.

<sup>12</sup> Chayta yachaska Juanpa yachacojcunan jamorkancu. Ayantataj apacaporkancu p'ampamunancupaj. Chay imasmantataj Jesusman willamoj rerkancu.

*Jesús phishka waranka runasta miqhuchin*

<sup>13</sup> Jesuska chayta uyariytawan yachacocunanwan barcopi riporka ch'innejman sapallancu canancupaj. Riskanta yachaspataj may ashqha runas llajtasmanta chaquillapi khepanta khaterkancu. <sup>14</sup> Barcomanta llojsispataj Jesuska may ashqha runasta ricorka. Paycunamantari sonkon nanarka. Qhuyacuspataj onkoskasta thañiracherka.

<sup>15</sup> Ch'isiyaycushajtinña yachacojcunanka Jesusman chimpay-corkancu. Nerkancutaj:

—Inti yacyushanña. Ch'in pacha caynejka. Chayraycu cay ashqha runasta cachapullayña. Ajinapi ranchosman rispa miqhunata rantica-monkancu,—nispa.

<sup>16</sup> Astawanri Jesuska paycunaman cuticherka:

—Mana paycunaka ripunancchu tiyan. Kancuna paycunaman miqhunata koychej,—nispa.

<sup>17</sup> Paycunari nerkancu:

—Caypeka phishka t'antaswan iscay challwitasllawan tiyapuwaycu. Chaylla,—nispa.

<sup>18</sup> Jesustaj nerka:

—Chay capususkayquichejta cayman apamuwaychej,—nispa.

<sup>19</sup> Chay ashqha runastataj camacherka pastopi tiyaricunancuta. Chanta chay phishka t'antasta iscay challwitastawan maquisninpí japejka. Janaj pachaman khawarispataj graciasta korka Diosman. T'antasta challwitastawan partispataj yachacojcunaman jaywarka. Paycunataj chay ashqha runasman jaywaramorkancu. <sup>20</sup> Tucuynincu miqhorkancu sajsacunancucama. Chay partiskasmanta puchojtaj chunca iscayniyoj canastas junt'araj carka. <sup>21</sup> Chay miqhojcunaka phishka warankajina kharis carkancu. Warmis wawitaswanpis miqhullarkancutaj.

*Jesús yacu patata purin*

<sup>22</sup> Chayta ruwaskantawancama Jesuska yachacojcunanta camacherka:

—Barcoman yaycuychej kocha chimpaman ñaupajta rishanayquichejpaj. Nokataj chaycama runasta cacharparipusaj,—nispa.

<sup>23</sup> Runasta cacharpariyawan Jesuska sapallan orkoman riporka Dios Tatanwan parlaj. Inti yaycuyañari sapallan payka orkopi cacusharka.

<sup>24</sup> Chaycamataj barcoka jallp'amanta carupi uqhu kochapiña carka. Yacutaj kholchokeyaspa barcotaka mayta apaycachasharka sinch'i wayra contrancipi wayramushaskanraycu. <sup>25</sup> Jesusrí sut'iyamuyañia yacu patata purispa paycunaman kayllaycusharka. <sup>26</sup> Yachacojcunanka yacu patanta purishajta ricuspa mayta mancharicorkancu “¡Alma!” nispa.

Manchaymantataj khaparerkancu. <sup>27</sup> Khapariskancutawantaj Jesuska paycunaman nerka:

—¡Callpachacuyche! ¡Noka cani! Amaña manchachicuychejchu, —nispa.

<sup>28</sup> Pedrotaj cutichispa nerka:

—Señorníy, kanchus canqui chayka, niway cay yacu patata kanman jamunayta, —nispa.

<sup>29</sup> Jesustaj nerka:

—Jamuy, —nispa.

Pedrori barcomanta uraycorka. Yacu patanta purispataj Jesusman risharka. <sup>30</sup> Wayra sinch'i caskanta ricuspa mancharicorka. Yacuman chincaycushaskanpitaj khaparicorka:

—Señorníy, jap'iriway, —nispa.

<sup>31</sup> Jesustaj maquinwan payta jap'icorka. Nerkataj:

—¡Ancha pisita nokapi jap'icunqui! ¿Imaraycutaj iscayrayarkanquirí?

<sup>32</sup> Paycuna barcoman yaycojtinctaj manaña wayrarkachu. <sup>33</sup> Barcopi cajcunari Jesusman kayllacuspa yupaycharkancu. Nerkancutaj:

—¡Chekamanta kanka Diospa c'ata Wawan canqui!

*Jesús thañichin onkoskasta Genesaret jallp'api*

<sup>34</sup> Kochata chimpaytawanka Genesaretman chayamorkancu.

<sup>35</sup> Chaypi tiyacoj runas Jesusta rejsiyorkancu. Chaymantataj runas paymanta willamorkancu. Tucuy onkoskacunatataj payman apamorkancu. <sup>36</sup> Paycunataj Jesusmanta mañacorkancu p'achanpa t'icasnillantapis llanqharinancuta. P'achanta tucuy llanqharejcnataj thañiskas carkancu.

## 15

*Ñaupa tatacunaj yachachiskancu*

<sup>1</sup> Chaymantaka waquin fariseo partecuna yachachejcunawan Jerusalén llajtamanta jamorkancu. Jesustataj taporkancu:

<sup>2</sup> —¿Imaraycutaj yachacojcunayqui unay curajnincheja yachachiska ruwanasnincuta p'aquincu? Yachacuskanchejmanjina yachacojcunayqueka maquisnincuta mana mayllacuncuchu miqhunancupajka. ¿Imaraycutaj ajinata ruwancurí?

<sup>3</sup> Jesustaj cutichispa nerka:

—Unay runasmanta yachacuskallayquicheja casushanquichej. Chanta ¿imaraycutaj kancunapis mana casunquichejchu Diospa camachiskanta? <sup>4</sup> Imaraycuchus Dioska nerka: “Tatayquita mamayquita jatunpaj khaway. Tatapaj chayrí mamanpaj sajrata parlajka wañuchiska canan tiyan”, nispa. <sup>5</sup> Kancunari yachachinquichej uj runa atillan niyta tataman chayrí mamaman: “Mana atinichu yanapasuyta. Kosunay carka chaytaka Diosmanña korkani”. Chay “korkani” nejka manaña jatunpaj tatanta mamantapis khawanchu. <sup>6</sup> Chaywanri Diospa camachiskanta p'aquinquichej yachacuskasniyquicheja ruwanayquichejpaj. <sup>7</sup> ¡Puraj uya runas! Allinta Diospa unay willajnin, Isaiaska, kancunamanta sut'incharka. Kelkaskanpi Dios nin:

<sup>8</sup> Cay runacunaka simisnillancuwan yupaychawancu. Sonkoncurí nokamanta carupi cashan.

<sup>9</sup> Paycunaka runaj yachachinasnillancuta yachachincu nokamantapis canmanjinata.

Ajinapeka yankhalla yupaychawancu.

*¿Imataj ch'ichichan runaj sonkontari?*

<sup>10</sup> Chanta chay ashqha runasta paynejman wajyasma nerka:

—Sumajta uyariwaychej niskasniya entiendenayquichejpaj.

<sup>11</sup> Siminnejta yaycoj miqhunaka runaj yuyayninman juchawan mana ch'ichichanchu. Manachayri runaj sonkonpi sajra yuyaskan siminnejta llojsimun. Chay parlaskanmin runataka ch'ichichaspa juchallichin, —nispa.

<sup>12</sup> Chanta Jesuspa yachacojcunanka payman kayllaycuspa nerkancu:

—¿Yachanquichu chay fariseo runas niskayquita uyarispa phiñacuywan khesachasuskancuta?

<sup>13</sup> Payri cuticherka:

—Tucuy yachachinas\* mana janaj pachapi tiyacoj Dios Tataymanta cajka k'ala tucuchiskas cankancu. <sup>14</sup> Sakeychej chaycunata munaynincumanjina ruwanancuta. Paycuna ciegosjina cancu Diospa yachachinasnimantaka. Chaywanpis waj ciegosta pusajcunajinataj cancu. Sichus uj ciego ciegollatataj pusanman chayka, iscaynincu cusca t'okoman urmayconkancu, —nispa.

<sup>15</sup> Pedrorri Jesusta nerka:

—Ch'ichichanamanta niskayquita sut'inchawaycu, —nispa.

<sup>16</sup> Paytaj cuticherka:

—Kancunapis ¿manallatajchus yuyayniyoj canquichej? <sup>17</sup> ¿Manachu entiendenquichej? runaj miqhuskanka wijsanman yayuskanta chaymantataj jawaman llojsipun. <sup>18</sup> Astawanpis runaj sonkon sajrata yuyaskanmanta llojsimoj parlaskanmin runataka juchallichin.

<sup>19</sup> Imaraycuchus runaj sonkonmanta sajra yuyaycuna llojsimun. Chaymanta runata wañuchin, khenchachacun, sajra puriyipi causan, suwacun, llullacuytawan willan runa-masimanta, Diospaj sajrata parlan. <sup>20</sup> Chaycunamin Diospa ñaupakenpeka jucha cancu. Runaj sonkontataj ch'ichichan. Maquista mana mayllacuspa miqhuyri manapuni runaj sonkontaka ch'ichichanchu, —nispa.

*Uj warmi Jesuspi jap'icun*

<sup>21</sup> Jesuska chaymanta llojsipuspa Tiro llajta Sidón llajta chaynejman riporka. <sup>22</sup> Chaypitaj tiyacoj Canamanta uj warmi. Paytaj Jesusman jamorka. Khaparispataj paymanta mayta mañacorka:

—Tucuy atiyniyoj Señor, Diospa ajllaskan Cristo† canqui. ¡Qhuyacuway nokamanta! Ususiyta supay mayta ñac'arichishan, —nispa.

<sup>23</sup> Jesusri warmiman ni uj palabratapis cuticherka. Chayraycu yachacojcunanka Jesusman kayllaycuspa mayta mañarkancu:

—Cachapuy chay warmita. Payka khepanchepta khaparispa ja-mushan, —nispa.

<sup>24</sup> Jesusri cuticherka:

—Dios Tatayka israel aylluymanta chincaska cajcunallaman cachamuwan. Paycunaka ovejasjina Diospa chekan ñanninmanta pantaporkancu, —nispa.

\* **15:13** Literal: planta. † **15:22** Literal: Davidpa Wawan.

<sup>25</sup> Chaywanpis chay warmeka kayllayucuspa Jesusman c'umuycorka yupaychananpaj. Nerkataj:

—¡Señor, yanapariway arí! —nispa.

<sup>26</sup> Jesusrí cuticherka:

—Wawaspa t'antancuta okharispa alketusman karaycoyka mana allinchu,—nispa.

<sup>27</sup> Warmiri nillarkataj:

—Arí, Señor, chaywanpis alketuspis miqhuncupuni dueñosnincos miqhuy t'unasniñ mesamanta t'acacojtenka,—nispa.

<sup>28</sup> Chanta Jesuska payman cutichispa nerka:

—Doña, may sumajta nokapi jap'icunqui. Munaskayquimanjina ruwaska cachun,—nispa.

Chay quiquinpacha ususenka thañicaporka.

### *Jesús ashqasta thañichin*

<sup>29</sup> Jesuska jakaymanta llojsispa Galilea kocha cantonejman rerka. Orkoman rispataj chaypi tiyaycucorka. <sup>30</sup> May ashqha runas payman kayllaycorkancu. Paycunataj apamorkancu wist'usta, ciegosta, mana rimarejcunata, ñuc'usta, ashqha waj onkoyniyojcunatawan. Jesuspa ñaupakenman chay onkoskasta churaycorkancu. Payri paycunata thañicherka. <sup>31</sup> Ajinaka chay ashqha runas mayta t'ucorkancu. Uyarerkancu mana rimarejcuna parlashajta. Ricorkancu ñuc'us thañicojta, suchus purishajta, ciegos ricushajta. Israel runaspa Diosnincutataj jatunchaspa yupaycharkancu.

### *Jesús tawa waranka runasta miqhuchin*

<sup>32</sup> Jesuska yachacojcunanta payman wajyaspa nerka:

—Sonkoy nanawan cay ashqha runasmanta. Quinsa p'unchaytaña nokawan cusca cashancu. Miqhunancupaj manaña ni imapis canchu. Mana miqhuskata cachapuytari mana munanichu, ñanta rishaspapis yarkhaywan llauchhuyapuncuman,—nispa.

<sup>33</sup> Chanta yachacojcunanta nerka:

—Cay ch'innejpi cashanchej ¿imaynapitaj ashqha miqhunata tarisuman cay chhica runasta miqhuchinanchejpajrí?

<sup>34</sup> Jesusri taporka:

—¿Mashqha t'antastaj capusunquichej?

Paycunataj cuticherkanca:

—Kanchis t'antaslla pisi challwitaspian,—nispa.

<sup>35</sup> Chanta Jesuska runasta camacherka pampaman tiyaycucunanca.

<sup>36</sup> Chay kanchis t'antasta maquisnippi jap'erká challwitastawan. Chaycunamantataj Diosman graciasta korka. Ajinaspa chay t'antasta challwitastawan partispa yachacojcunanman jaywallarkapuni. Paycunataj chay ashqha runasman jaywararkancu. <sup>37</sup> Tucuynincutaj miqhorkancu sajsacunancucama. Chaywanpis t'unasmana puchuska kanchis jatun canastas junt'araj carka. <sup>38</sup> Miqhojcunaka tawa warankajina kharis carkancu. Warmispis wawaspis miqhullarkancutaj. <sup>39</sup> Ajinata Jesús miqhuchiytawan runasta cacharpayarka. Chaymantataj barcoman yaycuspa Magdala jallp'aman riporka.

<sup>1</sup> Chanta fariseo partemanta saduceo partemantawan cajcuna Jesusman kayllaycamorkancu. Paycunaka imaynallamantapis Jesusta pantachiyta munasharkancu. Chayraycu paymanta mañarkancu uj jatun ruwanata Dios cachamuskanta yachanancupaj. <sup>2</sup> Jesús cuticherka:

—Kancunaka inti yaycupushajtin ninquichej: “K’ayaka sumaj p’unchay canka, phuyu puca pucata antawaramuskanraycu”.

<sup>3</sup> Tutamantataj ninquichej: “Cunan p’unchayka parankachá yanata phuyumushan”, nispa. Kancunaka phuyusta khawarispa yachanquichej imayna p’unchaychus cananta. Diospa ajllaska Runanmanta ricuchinastarí mana yachanquichejchu reparayta.

<sup>4</sup> Cay sajra ruwajcunawan Diosta wasanchajcunawanka t’ucunapaj uj ricuchinata mañashancu. Diospa willajnin Jonaspa ricuchinalla paycunapaj cashan manataj wajka, —nispa.

Paycunata sakespataj riporka.

*“Khawacuychej caycunaj t’anta pokochinancumanta”*

<sup>5</sup> Yachacojcunanka barcopi kochaj ujnin chimpaman chayarkancu. Chaypiña paycunaka t’antata mana apacuskancuta yuyaricorkancu.

<sup>6</sup> Jesusri paycunaman nerka:

—Reparacuychej, sumajtataj khawacuychej fariseocunaj saduceocunaj t’anta pokochinancumanta, —nispa.

<sup>7</sup> Yachacojcunataj paycuna uqhullapi tapunacusharkancu mana t’antata apacamuskancuraycu chayta parlaskanta.

<sup>8</sup> Jesusri yuyashaskancuta reparaspa paycunaman nerka:

—¿Imaraycutaj kancuna uqhullayquichejpi tapunacushanquichej t’antata mana apacamuskayquichejmanta? ¡Kancunaka ancha pisita Diospi jap’icunquichej! ¿Manarajchu reparanquichej? <sup>9</sup> ¿Nitajchu yuyarinquichej miqhuchiskayta phishka t’antasllamanta phishka waranka runasman? ¿Konkapunquichejchu mashqha canastasta chay puchojta junt’achiskayquichejta? <sup>10</sup> ¿Nitajchu yuyarinquichej kanchis t’antasmana tawa waranka runasman miqhuchiskaymanta? ¿Mayc’a jatuchej canastasta junt’ataj puchorkari? <sup>11</sup> Wakaychacuychej saduceowan fariseowan partecunaj t’anta pok’ochinancumanta nisuskayquichejta ¿imaraycutaj mana entienderkanquichejchu? Mana t’antamantachu parlarkayquichej, —nispa.

<sup>12</sup> Chantaraj yachacojcunanka entienderkancu Jesuska mana t’anta pokochina levaduramantachu parlaskanta. Manachayrí fariesocunaj saduceocunaj llulla yachachinasnincuwan ama pantachiskas canan-cutia paycunaman parlaskanta entienderkancu.

*Pedro Jesusmanta yuyaskanta willan*

<sup>13</sup> Jesuska Filipo jallp’api Cesarea llajta chaynejman chayarka. Chaymantataj yachacojcunanta taporka:

—Noka, Diospa cachaska Runanmanta parlaspa, runaska ¿pi caskyatataj nincuri?

<sup>14</sup> Paycunataj cuticherka:

—Waqin nincu bautizaj Juan causarimpuskanta. Waquintaj nincu Diospa unay willajnin Elías cutimuskanta. Waquinrí nincu Diospa unay willajnin Jeremías chayrí Diospa unay willajcunamanta uj caskayquita, —nispa.

<sup>15</sup> Paycunamantaj nerka:

—Kancunari ¿pi caskaytataj ninquichej? —nispa.

<sup>16</sup> Simón Pedrotaj nerka:

—Kanka wiñay causaj Diospa ajllaska Wawan, Cristo canqui.

<sup>17</sup> Jesustaj payman cuticherka:

—Kan, Jonaspa wawan Simón, may cusiska canqui. Chekatapuni niskayquitaka mana runallachu sut'inchasorka. Manachayrí janaj pacha Dios Tatay caytaka sut'inchasorka.<sup>18</sup> Noka nillayquitaj kanka Pedro caskayquita. Chaytaj niyta munan rumi. Ujchaska ajllacuskasniytaj sinch'i rumi patapi wasichaskajina cancu. Uqhu pacha supay Satanás\* chayta manapuni atipankachu.<sup>19</sup> Llavesta koskayqui Dios camachin, chayman runas yaycunancupaj. Cay pachapi imatapis runas ruwanancuta ninqui chayka, janaj pachapipis niskallataj canka. Cay pachapi imatapis runas ama ruwanancuta ninqui chayka, janaj pachapipis ajina niskallataj canka, —nispa.

<sup>20</sup> Chanta Jesuska yachacojcunanman camacherka amaraj pimanpis willanancuta pay Diospa ajllaskan Cristo caskantaka.

*Jesús wañuchiska cananmanta sut'inchan*

<sup>21</sup> Chaypachamantapacha Jesuska yachacojcunanman sut'ita willayta kallaerka:

—Jerusalén llajtaman rinaypuni tiyan. Chaypitaj israel curajcuna, yupaychana-wasimanta curajcunawan israel yachachejcunapiwan anchata ñac'arichiwankancu. Paycunaka wañuchiwankancupis. Quinsa p'unchaymantataj causarimpunay tiyan.

<sup>22</sup> Pedrotaj Jesusta wajnejman pusaspa payta c'amerka:

—Señorníy, amapuni ajina cananpaj, Dios kanta qhuyasuchun.

<sup>23</sup> Jesusrí Pedroman cutiricuspá nerka:

—Anchuriy nokamanta. ¿Supay Satanásjina juchaman urmachiway-tachu munanqui? Kanka mana Diospa yuyaskanmanjinachu yuyashanqui manachayrí runaj yuyayninmanjinalla, —nispa.

<sup>24</sup> Chanta Jesuska yachacojcunanman nerka:

—Pichari yachacojníy cayta munajka paypa tucuy munayninta sakepunan tiyan. Chaywanpis nokaraycu pay quiquin muchunan tiyan wañunancama. Nokatataj casunawanpuni tiyan.<sup>25</sup> Chekatapuni pichari causayninta payllapaj wakaychacuya munajka mana wiñay causayniyojchu canka. Pichari causayninta cay pachapi chincananta sakejka nokata casuskanraycu chayka, chekatapuni wiñay causayniyoj canka.<sup>26</sup> Reparaychej: Sichus uj runa tucuy cay pacha capuytapis jap'inman, wiñaypajtaj chincapunman chayka ¿ima allintaj paypaj canmanrí? Yachanchejjina runaka causayninta ranticuya mana atinchu tucuy cay pacha capuywanpis astawan valorniyoj caskanraycu.<sup>27</sup> Imaraycuchus noka, Diospa cachaska Runan, cutimusaj Dios Tataypa atiyninwan cachamuska angelesninwan cusca. Chaypachataj sapa ujman ruwaskanmanjina kopusaj.<sup>28</sup> Niyquichej chekamanta noka camachinaypaj jamusaj. Waquin caypi cashajcunamantari mana wañuspa nokata jamushajta ricuwankancu, —nispa nerka Jesús.

## 17

*Jesús wajjina rijch'acuyniyojman tucupun*

\* **16:18** Literal: uqhu pacha puncusnин.

<sup>1</sup> Sojta p'unchaymantataj Jesuska uj jatun orkoman llojserka. Chaymantaj payka pusaricorka Pedrota, Jacobota, wauken Juantawan paycunallata. <sup>2</sup> Jesuska paycuna ñaupakencupi wajjina rijch'acuyniyojman cutirparerka. Uyanka paycunaman intijina c'ancharerka. P'achanpis c'anchayjina yuraj yurajman cutirparerka. <sup>3</sup> Ujllata Moiseswan Eliaswan Jesusta parlanacushaj paycunaman riqhurimorkancu. <sup>4</sup> Ajinapi Pedro Jesusman nerka:

—Señorníy, caypi cacunanchejka sumajmin. Munawaj chayka, caypi quinsa ch'ujllasta ruwasajcu. Ujta kanpaj, ujta Moisespaj, ujtataj Elias-paj, —nispa.

<sup>5</sup> Pedro parlashajtillanraj mana yuyaskamanta uj lliphipej phuyu paycunaman uraycamorka. Chay phuyumantataj Dios Tata parlamushajta uyarkerku:

—Caymin c'ata munaska Wawayka. Paymanta mayta cusicuni. Payta uyariychej, —nispa.

<sup>6</sup> Yachacojcunanri chayta uyarispa pampacama c'umuycorkancu Je-susta yupaychanancupaj. Maytataj manchachicorkancu. <sup>7</sup> Chanta Jesús paycunaman kayllaycuspa allinnincupaj llanqharerka. Nerkataj:

—Sayaricuychej. Amaña manchachicuychejchu, —nispa.

<sup>8</sup> Paycunataj pataman khawarispa Jesuska sapallantaña ricorkancu.

<sup>9</sup> Orkomanta uraycamushajtincu Jesuska paycunata camacherka:

—Cay ricusquichejtaka ama willanquichejchu, noka, Diospa cachaska Runan, wañuymanta causarimunaycama.

<sup>10</sup> Chanta yachacojcunan payta watorkancu:

—Yachachejcunanchej nincu manaraj Cristo jamushajtin willaj Elias-raj ñaupajta jamunanta. ¿Imaraycutaj ajinata yachachincuri?

<sup>11</sup> Paycunaman cutichispa Jesuska nerka:

—Chekata yachachincu Elías ñaupajta jamunanta tucuy imata alliny-achinapaj. <sup>12</sup> Nokarí niyquichej Eliaska jamuskantaña. Runasri jamuskanta mana repararkancchu. Astawanpis payta munayn-incumanjina ñac'aricherkancu. Ajinallataj paycunaka noka, Diospa cachaska Runanta, munaynincumanjina ñac'arichiwankancu.

<sup>13</sup> Chaymantana yachacojcunaka entienderkancu bautizaj Juanmanta chayta parlaskanta.

*Jesús uj t'ucu onkoyniyojta thañichin*

<sup>14</sup> Khepanta ashqha runaswan tincorkancu. Uj runataj Jesusman chimpaycuspa konkoricorka. <sup>15</sup> Nerkataj:

—Señor, wawayta qhuyaripuway ari. Payka t'ucuwan onkoska, an-chatataj ñac'arishan. Ashqha cutista ninamanpis yacumanpis urmay-cun. <sup>16</sup> Yachacojcunayquiman payta pusamorkani. Paycunari mana thañichiyya aterkancchu.

<sup>17</sup> Jesús cuticherka:

—¡Ay, Diospi mana jap'icoj, nitaj payta casucoj runas! ¡Mayc'ajcamataj kancunawan casaj! ¡Mayc'ajcamataj kancunata muchuskayquichej! Wawata nokaman pusamuwaychej.

<sup>18</sup> Jesustaj chay uj supayta c'amispa wawamanta kharkorka. Wawataj chaymantapacha thañicaporka.

<sup>19</sup> Yachacojcunaka Jesús sapallan cashajtin payman kayllaycorkancu. Taporkancutaj:

—¿Imaraycutaj chay supayta mana kharkoyta aterkaycuchurí?

<sup>20</sup>Jesustaj paycunaman cuticherka:

—Kancunaka Diospi ancha pisillata jap'icusayquichejraycu kharkoyta mana aterkanquichejchu. Chekamanta niyquichej. Uj mostaza mujitujina pisillatapis Diospi jap'icuwajchej chayka, atiwarzchej camachiyta cay orkota wajnejman okharicunanta. Orkotaj okhariconka. Diospi chekata jap'icojtiyquichejka tucuy aticonka kancunapaj. <sup>21</sup>Mana miqhuspa Diosmanta tucuy sonko mañacuylawan chayjina supayka kharkocun.

*Jesús wañuchiska cananmanta ujtawan sut'inchan*

<sup>22</sup>Yachacojcunan cusca Galilea jallp'api cashajtincu Jesús paycuna man nerka:

—Noka, Diospa cachaska Runan, paypa munayninmanjina chejnicoj runasman jaywaycuska casaj. <sup>23</sup>Paycunari wañuchiwankancu. Quinsa caj p'unchaypitaj causarimusaj,—nispa.

Chayta uyarispa yachacojcunan mayta phuticorkancu.

<sup>24</sup>Jesús yachacojcunanwan Capernaum llajtaman chayarkancu. Yupaychana-wasipaj kolke jap'ejcuna kayllaycamorkancu Pedrota tapoj:

—¿Yachachisojniyquichejka yupaychana-wasipaj kolke konata koncharí?

<sup>25</sup>Cuticherkataj:

—Arí, kon,—nispa.

Chanta Pedro wasiman yaycushajtin Jesuska ñaupajta nerka:

—Simón, ¿imaynataj rijch'acusunqui? ¿Picunataj tasa kolketa chayrí impuestota cay pachapi camachejcunaman konancu canman? ¿Llajtan-cumanta cajcunachu? chayrí ¿waj llajtayojcunachu?

<sup>26</sup>Pedrori cuticherka:

—Waj llajtayojcuna,—nispa.

Jesustaj payman nerka:

—Ajinaka llajtayojcunaka mana konancuchu tiyan. <sup>27</sup>Astawanpis kolke jap'ejcunata ama phiñachinanchejpaj kolketa kosunchej. Kochaman challwata jap'ej riy. Anzuelota yacuman chokaycuy. Ñaupaj caj challwata jap'ispataj yacumanta orkhoy. Chay challwaj siminta quicharispa kolketa tarinqui. Chay kolketa apaspa nokamtawan kanmantawan kolke jap'ejcunaman komuy,—nispa nerka Jesús.

## 18

*¿Pitaj aswan jatunpaj khawaska canka?*

<sup>1</sup>Ajinata parlashajtillancu yachacojcunaka Jesusman kayllaycuspa taporkancu:

—¿Pitaj aswan curajpaj khawaska cashan Dios tucuya camachin, chaypi?

<sup>2</sup>Jesuska uj wawata wajyaspa chaupincipi sayaycucherka. <sup>3</sup>Nerkataj:

—Chekatapuni niyquichej. Diosman cutirinayquichej tiyan cay wawajinaman tucuspa. Manachayrí Dios camachin, chayman manapuni yaycuya atinquichejchu. <sup>4</sup>Chayraycu runaka cay wawajina llamp'u sonkoyojman tucunan tiyan. Ajina llamp'u sonkoyoj cajlata Dios astawan curajpaj khawan pay camachin, chaypi. <sup>5</sup>Nokapi jap'icuskanraycu cay wawajina llamp'u sonkoyojta “walejta jamunqui”, nejka nokatapis niwan.

*Juchaman urmachejcunamanta*

<sup>6</sup> 'Pichari nokapi jap'icojcunamanta pisipaj khawaska cajcunata juchaman urmachinman chayka jay phutiy, ari, chay runapajka! Payapa-jka aswan allin canman wañupunan uj jatun molino rumiwan cuncanpi warqhuycuska. Chaymantataj runas jatun kochapi may uqhuman chin-caycuchiska canan. <sup>7</sup> ¡Ay, phutiy ari, cay pacha runaspajka juchaman urmachej imas caskanraycu! Chayjina urmachej imaska cananpuni tiyan. Astawanpis jay, jatun phutiy ari, juchaman urmachej runapajka!

<sup>8</sup> 'Maquiyquichus chayrí chaquiyquichus juchaman urmachisun-quiman chayka, qhuchurpacuspa wijch'uy. Ñuc'upis chayrí ch'ulla chaquiyopjis wiñay causayniyoj canayqueka aswan allinpuni iscaynin maquisniyoj chayrí iscaynin chaquisiyoj uqhu pacha ninaman wiñaypaj wijch'uska canayquimantaka. <sup>9</sup> Ñawiyquitajchus juchaman urmachisunquiman chayka, orkhorpacuspa kanmanta wijch'uy. Ch'ulla ñawiyopjis wiñay causayniyoj canayqueka aswan allinpuni iscaynin ñawisniyoj uqhu pacha ninaman wijch'uska canayquimantaka.

*Chincaska ovejamanta uj quiquinchana*

<sup>10</sup> 'Khawacushaychejpuni wawajina llamp'u sonkoyojo Diospi jap'icojcunata ama pisipaj khawanayquichejta. Chekamanta janaj pachapi Dios Tatayka tucuy [paycunata wakaychashanpuni.]<sup>\*</sup> <sup>11</sup> Noka, Diospa cachaska Runanka, jamorkani Diosmanta chincaska runasta masc'aj juchasnincumanta cacharichinaypajtaj.

<sup>12</sup> '¿Imaynataj rijch'asunquichej? Uj runa pachaj ovejasniyoj carka. Ujnín ovejantataj chincachicunman chayka, ¿manachu isk'on chunca isk'onniyoja waj runawan orkopi miqhushajta sakerparinman? Chanta chay chincaska ovejanta masc'amoj rinman. <sup>13</sup> Chincaska ovejanta taricaponka chayka, chekatapuni niyquichej mayta cusiconanta. Chay uj taricapuskanwan may astawanraj cusiconka chay isk'on chunca isk'onniyoj mana chincaska ovejasninmantaka. <sup>14</sup> Ajinallataj janaj pacha Dios Tatayquichej pisipaj khawaskacunamanta mana munanchu ni ujllapis wiñaypaj chincapunanta.

*Hermanoyquita perdonay*

<sup>15</sup> 'Cristopi hermanoyqui juchallicuspa sonkoyquita nanachinman chayka, riy sapallanpi juchanmanta reparachimuy. Casusunquiman chayka, payta yanapanqui amaña Diosmanta chincapunanjap. <sup>16</sup> Mana casucojtinrí riyrat ujta chayri iscaytapis pusaricuspa. Ajinapi iscay chayrí quinsa willajtincu tucuy chay imaska sut'ita yachaonka. <sup>17</sup> Chay runastapis nillataj casojtinrí Cristopi tantacojcunaman willay. Paycunatapis nillataj casunman chayka, kan payta khaway Diosta mana rejsej uj juchasapapaj.<sup>†</sup>

<sup>18</sup> 'Chekamanta imatachá cay pachapi khawaskayquichejmanjina yuyawajchej juchachanapajjina caskanta chayka, janaj pachapipis juchachaskallataj canka. Imatachá cay pachapi khawaskayquichej-manjina yuyawajchej mana juchachanapajjina caskanta chayka, janaj pachapipis manallataj juchachaskachu canka.

<sup>19</sup> 'Chekamanta niyquichej cay pachapi iscay kancunamanta ima jawallapis uj sonkolla yuyawajchej chayka, ruwaska cananta. Chay

\* **18:10** Ninayan. † **18:17** Literal: impuestota jap'ej.

yuyaskayquichejtataj Diosmanta mañacuwajchej chayka, janaj pacha Dios Tatayka ruwapusonkachej.<sup>20</sup> Imaraycuchus maypichá iscay chayrí quinsa sutypi tantacuncu chayka, noka paycunawan cusca cashani,—nispa nerka Jesús.

<sup>21</sup> Chanta Pedroka Jesusman kayllaycuspa nerka:

—Señorníy, hermanoy contrapi juchallejenka ¿mayc'a cutitataj perdonasaj? ¿Kanchis cutitacamachu perdonasaj?

<sup>22</sup> Jesustaj cuticherka:

—Niyqui mana kanchis cuticamallachu perdonanayquita. Manachayrí ashqha cutista juchanta konkapuspa perdonanayquipuni tiyan.<sup>‡</sup>

*Mana perdonayta munaj camachimanta uj quiquinchana*

<sup>23</sup> 'Dios camachejtin, uj jatun camachejman rijch'acun. Chay camachejka camachisninman manuskan kolketa jap'icapuya munarka. <sup>24</sup> Ajinata payka jap'icapuya kallarisharka. Waranka warankas kolketa manu runatataj paypa ñiaupakenman pusamorkancu. <sup>25</sup> Chay camachirí mana capuskanraycu mana aterkachu kolkenta cutichipuya. Chayraycu chay jatun camachej camacherka: “Chay manu runa vendeska canan tiyan warminwan wawasniniwan tucuy capuskanwanpis. Chaywan manunmanta uj pisillatapis jap'isaj”, nispa. <sup>26</sup> Chanta chay manu camachecka jatun camachejman konkoricorka. Maytataj mañacorka: “Qhuyarillaway. Tucuy manuytaka cutichipullaskayqui”, nispa. <sup>27</sup> Jatun camachejka manu camachinta mayta qhuyaspa cacharpariporka. Manuntapis perdonaporka.

<sup>28</sup> Llojsiytawancamarí chay camachecka uj camachi-masinwan tincorka. Chay camachi-masenka pisitisulla payman manu carka. Paytataj cuncanmanta sinch'ita jap'ispa k'allpirpanayasharka: “Uskhaya cutichipuway manususkayta”, nispa. <sup>29</sup> Chanta chay camachi-masenka mayta c'umuycucorka. Nicorkataj: “Qhuyarillaway. Tucuy manuytaka cutichipullaskayqui”, nispa. <sup>30</sup> Payrí manapuni munarkachu qhuyayta. Manachayrí manunta pusaspa carcelman wisk'aycucherka kopunancama. <sup>31</sup> Ajinata ruwaskanta ricuspataj camachi-masisninpä sonkon mayta nanarka. Paycunataj tucuy chay ruwaskanta jatun camachejnincuman willamorkancu. <sup>32</sup> Chanta jatun camachejka wajyachimuspa nerka: “¡Kanka sajra camachi canqui! Mayta nicuwajtiyqui tucuy jakay konawayquita perdonarkayqui qhuyasuspa. <sup>33</sup> Kanrí camachi-masiyquita ¿manachu qhuyanayqui carka noka kanta qhuyarkayqui ajinata?” nispa nerka. <sup>34</sup> Jatun camachejka phiñacuspa chay sajra camachinta muchuchejcunaman jaywaycorka.

<sup>35</sup> 'Sapa ujniyquichej tucuy sonkowan hermanoyquicheja juchanta konkapuspa perdonanayquichej tiyan. Manachayrí janaj pacha Dios Tatayka chay sajra camachiwan imaynatachus camachejin ruwarka ajinallatatajmin kancunawan ruwanka,—nispa nerka Jesús.

## 19

### *Jesús yachachin divorciomanta*

<sup>‡</sup> **18:22** Literal: kanchis chunca kanchis cutita.

<sup>1</sup> Chay imasta parlayta tucuspa Jesús Galilea jallp'amanta riporka. Chaymantataj Judea jallp'aman jamorka Jordán mayu chimpan inti llojsimuynejman. <sup>2</sup> Paytari may ashqha runas khatimorkancu. Chaypitaj paycunata onkoynincumanta thañicherka.

<sup>3</sup> Chaypi cashajtin waquin fariseo partecuna Jesusman kayllay-corkancu pantachinancupaj. Nerkancutaj:

—Camachiwaskanchejmanjina ¿uj runa warminta uj imaraycullapis wijch'upuya atillanchu?

<sup>4</sup> Jesustaj paycunaman cutichispa nerka:

—Dioska cay pachata ruwaskanmantapacha kharita warmitawan ruwarka. Chayta Diospa palabranpi ¿manachu leerkanquichej? <sup>5</sup> Nerka: “Chayraycu khareka tatanta mamanta sakenan tiyan warminwan ujhaska cananpaj. Iscaynincutaj ujlla cancu”, nispa. <sup>6</sup> Ajinaka manaña iscaychu cancu manachayrí ujllamanña tucupuncu. Chayraycu Diospa ujhaskantaka runa ama t'akachunchu, —nispa.

<sup>7</sup> Fariseo partecunaka payta nincu:

—Moiseska camacherka pillapis warminwan t'akanacojka t'akanacuskancumanta uj divorcio papelta warminman konanta. ¿Imaraycutaj Moisés ajinata camacherkari?

<sup>8</sup> Jesustaj paycunaman cutichin:

—Moiseska warmiyquichejmanta t'akacunayquichejta sakellarka mana casuya munajcuna caskayquichejraycu. Astawanpis Dios runata ruwaskanmantapachaka mana ajinachu carka. <sup>9</sup> Nokarí niyquichej pillapis warmin mana khenchachacojtin waj warmiwan casaracunman chayka, khenchachacusanta. T'akaska warmiwan casaracopis khenchachacullantaj, —nispa.

<sup>10</sup> Yachacojcunantaj payman nincu:

—Khariwan warminwan ajinata causanan cajtenka mana casaracuylla allenka, —nispa.

<sup>11</sup> Jesusri nin:

—Mana tucuychu cay niskayta entiendeyta atincu. Manachayrí picchari Dios yanapan, paylla entiendeyta atin. <sup>12</sup> Waquin khareska nacecuncu mana wawayoj canancupaj. Waquintaj runas mana wawayoj canancupaj ajinaman tucuchincu. Waquinrí mana casaraska causayta ajllancu tucuy atiynincuwan Diosllapaj ruwanancuraycu. Ajinapi causaynincuta churancu Dios tucuya camachinanpaj. Cay niskayta entiendeyta atejka chaymanjina causachun, —nispa nerka Jesús.

### *Jesús wawaspaj mañapun Diosmanta*

<sup>13</sup> Chanta waquin runas wawitasta Jesusman pusamorkancu. Munarkancu pay maquisninta paycunaman churaspa Diosmanta mañaripunanta. Yachacojcunantaj pusamojcunata c'amerkancu.

<sup>14</sup> Jesusrí nerka:

—Sakeychej wawitasta nokaman jamunancuta. Amañataj paycunata jarc'aychejchu. Imaraycuchus Dios wawitajina cajcunata munacuywan camachin.

<sup>15</sup> Maquisninta wawitasman churaspataj Diosmanta mañaporka. Chanta chaymanta riporka.

### *Uj khapaj runa Jesusta tapun*

<sup>16</sup> Ajinamanta uj runa Jesusman kayllaycuspa tapurerka:

—C'acha Yachachiwajníy ¿ima allin cajtataj ruwanay tiyan wiñay causayniyoj canaypaj?

<sup>17</sup> Jesustaj payman cuticherka:

—¿Imaraycutaj allin cajmanta tapuwanquirí? Dios sapallan c'acha cajka. Wiñay causayniyoj cayta munanqui chayka, Diospa camachiskasninta casuy,—nispa nerka.

<sup>18</sup> Runataj tapun:

—¿Maykencunatajrí?

Jesusri cutichin:

—Runata ama wañuchiychu. Ama khenchachacuychu. Ama suwacuychu. Runamanta ama willaychu llullacuspa. <sup>19</sup> Mamayquita tatayquita casuy, jatunpaj khaway. Runa-masiyquitapis munacuy kan quiuiyquitajina,—nispa.

<sup>20</sup> Chay runaka payman cutichin:

—Tucuy chaycunataka junt'ani. ¿Imatawanrajtaj ruwanay tiyanrí?

<sup>21</sup> Jesustaj payman nin:

—Wiñay causayniyoj canapajjina cayta munanqui chayka, rispa tucuy capuyniyquita vendemuy. Chaymantataj chay kolketa wajcha runasman jaywaramuy. Chaymanta khepata janaj pachapi khapaj capuyniyoj canqui. Chantaka nokawan jamuspa yachacojníy cay,—nispa nerka Jesús.

<sup>22</sup> Chay runarí chay niskanta uyariytawan may phutiska riporka may khapaj caskanraycu iscayrayaspa.

<sup>23</sup> Jesusri yachacojcunanman nin:

—Chekamanta uj khapaj runaka ñac'aytapuni janaj pachaman<sup>\*</sup> yaycuya atin. <sup>24</sup> Chaywanpis niyquichej jatun camello uywaraj astawan atiskanta yaycuya agujaj ningrinmanka khapaj runa janaj pachaman<sup>†</sup> yaycunanmantaka,—nispa.

<sup>25</sup> Yachacojcunantaj chayta uyariytawan t'ucuspa ninacuncu:

—Chanta ¿pitaj wiñay causayniyoj cayta atinmanrí?

<sup>26</sup> Jesustaj paycunata khawaycuspa nin:

—Runacunapaj cayka mana aticojchu. Diospajrí tucuy aticun.

<sup>27</sup> Chaymanta Pedroka Jesusman cutichispa nin:

—¡Khaway! Nokaycoka tucuy imata sakespa kanta khatiycu yachacojcunayqui canaycupaj. Chayraycu ¿imatataj jap'isajcurí?

<sup>28</sup> Jesús paycunaman nin:

—Noka, Diospa cachaska Runan, chekatapuni parlashayquichej. Tucuy imata mosojyachisaj. Chay p'unchaycunapitaj tiyaycucusaj camachinaypaj tucuy attiyniywan. Sapa ujnyiuychejtaj uj camachina tiyanapi tiyacunquichej chunca israel ayllusta camachinapaj. <sup>29</sup> Pichari nokapi jap'icuskanraycu sakejka wasisninta, chayrí hermanosninta, chayrí hermanasninta, chayrí tatanta, chayrí mamanta, chayrí wawasninta, chayrí chajrasninta chayka, wiñay causayniyoj canka. Chaywanpis payka pachaj cutistawan nokaraycu sakeskanmanta jap'icaponka. <sup>30</sup> Astawanrí may ashqhas cunan jatunpaj khawaskas cajcuna khepata pisipaj khawaskas cankancu. Cunan pisipaj khawaskas cajcunataj khepata jatunpaj khawaskas cankancu.

\* <sup>19:23</sup> Literal: Diospa reinon. † <sup>19:24</sup> Literal: Diospa reinon.

## 20

### *Llanc'ajcunamanta uj quiquinchana*

<sup>1</sup> 'Dios tucuya camachejtenka uj sumaj patronjinamin canka. Chay patronka tutamanta llojserka llanc'ajcunata minc'acamoj. Chaymantataj uvas huertanpi llanc'anancupaj camacherka. <sup>2</sup> Llanc'ajcunawantaj sumajta parlarka uj p'unchay llanc'askancumanta kopunanta. Chaymantataj paycunata huertanpi llanc'ajta cacharka. <sup>3</sup> Chaipi pakarinjina llojsispa waj llanc'ajcunatawan ricorka. Chay llanc'ajcunaka llanc'ayta masc'ajcunaj tantacunancu chaypi sayacusharkancu. <sup>4</sup> Patronka paycunata nerktaj: "Kancunapis huertaypi llanc'aychej. Nokataj cajmanjina jornalta pagaskayquichej", nispa. Llanc'ajcunari rerkancu. <sup>5</sup> Watejmanta patronka llojsillarkataj chaipi p'unchaytajina. Quiquillantataj llanc'ajcunata pusamorka. Chaymantataj jatun tardetajina ajinata ruwarka. <sup>6</sup> Ujtawanpis masc'aj llojsillarkataj ch'isiyyataña. Llanc'ayta masc'ajcunaj tantacunancu, chaypi wajcunatawan tarillarkataj. Paycunatapis nillarkataj: "¿Imaraycutaj tucuy cay p'unchayninta mana llanc'aspa sayacushanquichejri?" <sup>7</sup> Paymantaj nerktancu: "Mana pipis minc'awaycuchu llanc'apunaycupaj", nispa. Payri paycunaman nerka: "Kancunapis huertaypi llanc'aychej", nispa. <sup>8</sup> Inti yaycuytataj patronka khawapoij runanman nerka: "Llanc'ajcunata wajyay kolketa paycunaman pagapunayquipaj. Khepa jamojcunaman ñaupajta koy. Chaymantataj ñaupaj jamojcunaman", nispa. <sup>9</sup> Ch'isiyyayllataña llanc'ajcuna tucuynin p'unchay llanc'askamantajina jap'erkancu. <sup>10</sup> Tucuy chay p'unchay llanc'ajcunari yuyarkancu aswan ashqhasta jap'inancauta. Astawanpis paycunaka ujcunajinallataj jap'erkancu. <sup>11</sup> Chanta chay tucuy p'unchaynintinta llanc'ajcunaka patronpa contranpi thutorkancu <sup>12</sup> nispa: "Chay ch'isiyyayllata jamojcunaka uj horallata llanc'arkancu. Nokaycumanri paycunamanjinalla pagapuwarkaycoka. Tucuynin p'unchayta manchay ruphaypi muchuspa llanc'arkaycoka", nispa. <sup>13</sup> Patrontaj ujnincuman cutichispa nerka: "Causaj-masiy, mana ch'auquiyashayquichu. ¿Manachu parlaskanchejmanjina pagapuyqui? <sup>14</sup> Pagota jap'iskayquiwan kanka ripuy. Noka munani cay khepa jamojcunaman kancunamanjinallataj koyta. <sup>15</sup> ¿Manachu atiyman capuuniywan munaskaymanjina ruwaytarí? Chayrí ¿c'acha runa caskaymantachu phiñaska khawashawanqui?" <sup>16</sup> Ajinatamin khepa cajcunaka ñaupaj cajpi cankancu. Ñaupajpi cajcunataj khepapi cajcuna cankancu. Chekamanta Dioska ashqhasta wajyan. Ajllaska cajcunarí pisislla cancu.

### *Jesús watejmanta sut'inchan wañuchiska cananmanta*

<sup>17</sup> Jesuska Jerusalén llajtaman llojsisharka yachacojcunawan. Chay chunca iscayniyojllata ñanmanta wajnejman pusaspa nerka:

<sup>18</sup> —Allinta reparaychej Jerusalén llajtaman rishaskanchejta. Chaypitaj noka, Diospa cachaska Runan, yupaychana-wasimanta curajcunaman yachachejcunamanwan jaywaycuska casaj. Paycunataj wañunaypaj juchachawankancu. <sup>19</sup> Waj llajtayoj runasman jaywaycullawankancutaj. Chanta chay runaska asipayawankancu jasut'iwankancu, chacataycuwankancupis. Nokataj quinsa caj p'unchaypi causarimpusaj.

*Uj warmi wawasnipaj Jesusmanta mañacun*

<sup>20</sup> Chanta Zebedeoj warmin wawasniwan Jesusman kayllaycorka. Konkoricuspataj nerka:

—Uj imata niricusquyqui, —nispa.

<sup>21</sup> Paytaj nerka:

—¿Imatataj munanquiri?

Paytaj cuticherka:

—Atiynyquian camachinayquipaj tiyaycuspua churapuway cayiscay wawasniya, ujin pañayquipi ujnintaj llok'eyquipi [sumajpaj khawaskas canancupaj.]\*

<sup>22</sup> Jesusrí cuticherka:

—Kancunaka mana yachanquichejchu imatachus mañaskayquichejta. Manchayta ñac'anay tiyan. Chayka uj jayawan junt'aska copajina. ¿Ñac'ariy wañunaycama nokajina muchuya atiwajchejchu?

Paycunataj nerkan:

—Arí, atiyu.

<sup>23</sup> Jesustaj paycunaman nerka:

—Arí junt'a copata ujyanquichej nokajina. Wañuyecama ñac'ariymantaj yaycunquichej nokajina. Nokawan cusca tiyaycucuspa camachinayquichejpajka ujta pañayman ujtataj llok'eyman churayka mana nokamantachu. Manachayrí picunapajchá waquicherka chaycunallata Dios tiyaycuchenka, —nispa.

<sup>24</sup> Tucuy chayta uyariytawan chunca yachacojcunaka phiñacorkancu chay iscay waukecunapaj. <sup>25</sup> Jesusrí paycunata wajyaspa nerka:

—Yachanquichejjina llajtasta camachejcunaka chaypi tiyacojcunata llaquichispa camachiskancuta. Llajtapi callpayojcunapis atiynincumanjina tucuy imapi casuchicuncu. <sup>26</sup> Kancunará amapuni ajinaka caychejchu. Manachayrí kancuna uqhumanta atiynyoy cayta munajka tucuy sonkowan yanapasojniyquichej canan tiyan. <sup>27</sup> Kancuna ughupi curajpaj khawaska cayta munajka casojniyquichej canan tiyan. <sup>28</sup> Noka, Diospa ajllaskanka, mana runas yanapanawancupajchu jamorkani. Manachayrí noka runasta yanapanaypaj jamorkani. Astawanpis paycunaj wañunancumanta noka wañusaj juchancumanta cacharichinapaj. Ajinallataj kancunapis canayquichej tiyan.

*Jesús khawarichin iscay ciegosta*

<sup>29</sup> Jesús yachacojcunanwan Jericó llajtamanta llojsishajtin ashqha runas payta khatisharkancu.

<sup>30</sup> Ñannejpi iscay ciego runas tiyacusharkancu. Jesús chaynejta puriskanta uyarispataj khaparererkancu:

—¡Diospa ajllaskan,† nokaycuta qhuyacuwaycu!

<sup>31</sup> Chay ashqha runastaj c'amerkancu:

—Ch'in caychej, —nispa.

Paycunará aswan sinch'iwan khaparispa nerkan:

—¡Diospa ajllaskan, nokaycuta qhuyacuwaycu! —nispa.

<sup>32</sup> Jesús sayaricuspa paycunata wajyarka. Nerkataj:

—¿Imatataj kancunapaj ruwapunayta munashanquichej?

<sup>33</sup> Paycuna cuticherkan:

—Señor, ricuya munaycu.

\* **20:21** Ninayan. † **20:30** Literal: Davidpa Wawan.

<sup>34</sup> Jesusri qhuyacuywan ñawisnincuta llanqharerka. Chay quiquin-pacha ricorkancu Jesusta khaterkancutaj.

## 21

*Jesús Jerusalén llajtaman yaycun*

<sup>1</sup> Jesús yachacojcunanwan Jerusalén llajtaman kayllaspa Betfagé ran-choman chayarkancu. Betfageka Olivos niska orko kayllapi carka. Chanta Jesuska iscay yachacojcunata cachaspa, <sup>2</sup> nerka:

—Riychej chimpa ranchoman. Chaypitaj uj china burrota malton burrowan wataskata taringquichej. Phascaraspataj cayman khatimuy-chej. <sup>3</sup> Mayken tapusunquichejman chayka, niychej: “Señorninchej cay burrosta munan”, nispa. Cunitan cutichisonka.

<sup>4</sup> Chayka ruwacorka Diospa niskan junt'acunapaj. Paypa unay willajnin palabranpi nerka:

<sup>5</sup> Cay pachapi Diospa llajtan Sionpi tiyacojcunata niychej:

“Khawaychej, Camachisojniyuquichej jamushan.

Payka llamp'u sonkoyoj, malton burropi llok'aska.

Chay malton burroka chajnana uywaj uñan”.

<sup>6</sup> Yachacojcunari rispa Jesuspa niskanmanjina ruwamorkancu.

<sup>7</sup> China burrota malton burrotawan Jesusman khatimorkancu.

Ponchosta caronaycorkancu. Jesustaj chay malton burroman llok'arka. <sup>8</sup> May ashqha runastaj paycunallamanta ponchosta Jesuspa ñanninpi mast'arkancu. Waquinri sach'a ramasta c'utumuspa ñanninpi mast'arkancu. <sup>9</sup> Chay ashqha runas waquenka Jesuspa ñaupakenta risharkancu, waquintaj khepanta. Khaparisharkancutaj:

—¡Jatunchaska cachun Diospa ajllaskan!\* ¡Yupaychaska cachun Diospa

cachamuska Runanka! ¡May jatunchaska cachun janaj pachapi caj

Dioska! —nispa.

<sup>10</sup> Jesús Jerusalén llajtaman yaycojin tucuy chay llajtapi tiyacoj runas mayta jataririspa mayta t'ucorkancu. Tapunacusharkancutaj:

—Cay runa ¿pitaj canman?

<sup>11</sup> Chay ashqha runasri cutichinacusharkancu:

—Diospa willajnin Jesusmin. Payka Galilea jallp'amanta Nazaret llajtayoj, —nispa.

*“Waseyka Diosmanta mañacuna wasimin”*

<sup>12</sup> Chanta Jesuska yupaychana-wasinpa pationman yaycorka. Chaypi tucuy vendejcunata rantejcunatawan jawaman kharkorka. Kolke tro-cajcuñaj mesasnincuta tejarararka. Jaywana paloma <sup>13</sup> vendejcunaj tiyanancutapis tejarallarkataj. Paycunamantaj nerka:

—Dios palabranpi nin: “Yupaychana-waseyka nokamanta mañacuna wasimin canan tiyan”. Kancunarí pacaymanta suwanayquichejpaj ruwaycacapunquichej, —nispa, Jesús nerka.

<sup>14</sup> Yupaychana-wasipitaj ciegos, wist'us Jesusman kayllaycorkancu. Jesustaj paycunata thañicherka. <sup>15</sup> Jesuska chay onkoskasta thañichispaka uj t'ucuna imata ruwarka. Yupaychana-wasipipis wawaska mayta kha-parisharkancu: “¡Diospa ajllaskan† jatunchaska cachun!” nispa. Chay imasta uyarispa yupaychana-wasimanta curajcunawan yachachejcunawanka mayta phiñacorkancu. <sup>16</sup> Jesusmantaj nerkanca:

\* **21:9** Literal: Hosanna Davidpa Wawanman. † **21:15** Literal: Davidpa Wawan.

—¿Uyarinquichu cay wawacunaj nishaskancuta?

Paytaj nerka:

—Arí, kancunari ¿manachu jayc'ajpis Diospa palabranpi cayta leerkanquichej? Nin:

Juch'uy wawitasta ñuñoj wawitastawan sumajta yupaychanancuta yuyaycharkanqui.

<sup>17</sup> Chanta Jesús runasta sakepuspa llajta jawa Betaniaman riporka. Betaniaka Jerusalén kayllapimin. Chaypitaj chay tuta khepacorka.

*Jesús ch'aquicchin uj higo sach'ata*

<sup>18</sup> Tutamanta llajtaman cutimushaspa Jesuska yarkhachicorka. <sup>19</sup> Ñan kayllapi uj higo sach'ata ricuspataj chimpaycorka. Manataj tarerkachu higostaka, manachayrí laphisllata. Paytaj nerka:

—Ni jayc'ajpis pokoyniyqui cachunchu.

Chaymanta higo sach'aka ch'aquerpariporka. <sup>20</sup> Yachacojcunanka chayta ricuspa t'ucorkancu. Tapucorkancutaj:

—¿Imaynapitaj chaypachita cay higo sach'aka ch'aquirpariporka?

<sup>21</sup> Jesuska cutichispa nerka:

—Noka niyquichej chekatapuni mana iscayrayaspa Diospi jap'icuwajchej chayka, higo sach'awan ruwarkani ajinata ruwaytapis atinayquichejta, chaymanta astawanpis. Sichus cay orkota niwajchej: “Caymanta okhariska cay, jatun kochamantaj wijch'uycuska cay” chayka, wijch'uycuska canka. <sup>22</sup> Imallatapis tucuy sonkowan Diospi jap'icuspapuni mañacuwajchej chayka, chayta pay kosonkachej.

“*¿Pejpa atiyninwantaj cayta ruwanqui?*”

<sup>23</sup> Yupaychana-wasi patioman yaycuspa Jesús yachachisharka. Ajinapitaj yupaychana-wasimanta curajcunawan israel curajcunapiwan Jesusman kayllaycorkancu. Taporkancutaj:

—¿Pejpa atiyninwantaj cay imasta ruwanqui? ¿Pitaj cay imasta ruwanayquipaj atiyta kosorka?

<sup>24</sup> Jesustaj paycunaman cuticherka:

—Kancuna uj tapuriyinillayman cutichiwaychej. Chanta nokapis cutichiskayquichej ima atiywanchus chay imasta ruwashaskayta. <sup>25</sup> ¿Pitaj Juanta cachamorka runasta bautizananpaj? ¿Dioschu chayrí runaschu?

Paycunapura unanchaspa ninacusharkancu:

—Dios payta cachamuskanta nisunchej chayka, payka tapuwasunchej: “¿Imaraycutaj payta mana creerkanquichejchu?” <sup>26</sup> Runaspa atiynincuwani nytarí, manchachicunchej llajtantin phiñacunanta. Imaraycuchus tucuy paycunaka Juanta sumajpaj khawaspa Diospa willajninpaj jap'icuncu, —nispa.

<sup>27</sup> Chaymantataj Jesusman cutichispa nerkanca:

—Mana yachaycuchu, —nispa.

Paytaj nerka:

—Ni nokapis willaskayquichejchu ima atiywanchus tucuy chayta ruwaskayta.

*Iscay wawasmanta uj quiquinchana*

<sup>28</sup> Jesús paycunaman parlashaspa nerka:

—¿Imaynataj rich'asunquichej? Új runa iscay wawasniyoj carka. Curaj cajman kayllaycuspataj nerka: “Wawáy, cunan p'unchay uva huertaypi llanc'amuy”, nispa. <sup>29</sup> Chay wawanrí cuticherka: “Mana munanichu”,

nispá. Khepamanta “mana” niskanmanta phuticorka. Chaymanta llanc’aj rerka.<sup>30</sup> Uj caj wawanaman tatan kayllaycuytawan quiqullantataj nerka. Chay wawantaj cuticherka: “Ya, tatáy, llanc’amusaj”, nispá. Payrí mana llanc’aj rerkachu.<sup>31</sup> Chay iscay wawasmanta ¿maykennincutaj tatancoj munayninta ruwarka? —taporka Jesúz.

Paycunari cuticherkan:

—Curaj caj wawan, —nispá.

Jesustaj paycunaman nerka:

—Chekamanta niyquichej manacajpjaj khawaska impuesto jap’ejcunarañ khencha warmiswan Diospi jap’icuypí atipasuskayquichejta, pay camachin, chayman yaycunancupaj.<sup>32</sup> Imaraycuchus bautizaj Juanka willasorkachej chekanta ruwaspa causanayquichejta. Kancunataj payta mana casorkanquichejchu. Impuesto jap’ejcunawan khencha warmiswanrí payta casorkancu. Astawanpis kancunaka Diosman cutiriskancuta ricuspapis Juanta mana uyarerkanquichejchu casunayquichejpaj.

### *Sajra llanc’ajcunaman uj quiquinchaná*

<sup>33</sup> ‘Cay waj quiquinchanaya uyariychej. Carka uj patron. Paytaj uvasta jallp’ani plantarka. Chaycunatataj perkawan muyucherka. Chaypi uj uva sarunata ch’irwanata ruwacherka uj alto wasitawan khawanapaj.

‘Chaymantataj chay jallp’anta pokoshajta jap’inancupaj llanc’ajcunaman sakeycorka. Payri caruman riporka.<sup>34</sup> Uva pallana tiempo kayllamushajtintaj camachisninta llanc’ajcunaman cacharka uvasta jap’inancupaj.<sup>35</sup> Llanc’ajcunari camachista jap’iyorkancu. Ajinapi ujninta sinch’ita makaycorkancu. Ujninta wañucherkancu. Ujnintataj rumiswan ch’ankaycorkancu.<sup>36</sup> Patronka ujtawan waj camachisninta cachallarkataj. Chay ñaupaj cachaskanmanta astawan ashqha camachista cacharkapis. Llanc’ajcunari quiquillantataj paycunata ruwaycorkancu.

<sup>37</sup> ‘Patronka sonkonpi nerka: “Wawaytaka jatunpaj khawankancupuni”, nispá. Chayraycu tucuy chay khepantaka wawanta llanc’ajcunaman cacharka.<sup>38</sup> Llanc’ajcunari wawanta ricuytawan paycuna uqhu ninacorkancu: “Cay wawan jallp’ataka tatanmanta jap’enka. Chayraycu chay jap’inan jallp’ata jaip’irparisun nokanchejpata cananpaj. Jamuychej payta wañuchinachej”, nispá.<sup>39</sup> Chaymantataj paycunaka wawanta jap’ispa jallp’ajawaman wijch’orkancu wañucherkancutaj.

<sup>40</sup> Ajinata niytawan Jesuska paycunata tapurerka:

—Uva jallp’ayoj Señor cutimuspa ¿jimanankataj chay llanc’ajcunatarí?

<sup>41</sup> Paycunataj cuticherkan:

—Chay sajra runastaka mana qhuyaspa wañurachenka. Jallp’antataj waj llanc’ajcunaman koponka. Uva pokojtincama jap’inanta tiempónipi llanc’ajcunaman chay jallp’anta konka, —nispá.

<sup>42</sup> Jesusri paycunaman nerka:

—¿Manachu jayc’ajpis Diospa palabrantia leerkanquichej? Nin: “Wasichajcuna uj rumita khawaspa wijch’orkancu. Wasita sinch’ita sayachinanpaj chay wijch’uska rumeka aswan sumaj cashan tucuy waj rumismanta niskaka. Chaytaka Señor Dios ruwan, nokanchejpajtaj uj t’ucuna”.

43 'Chayraycu niyquichej Dios camachin, chayman kancuna Israel llajtayojcuna, mana yaycuya atinayquichejta. Dios camachin, chayman paypa munayninta ruwajcunalla yayconkancu. Ajinapi waj llajta canka pay camachinanpaj. <sup>44</sup> Noka, Diospa cachaska Runan, wasi kallarina rumijinamin, cani. Ajinataj chay rumiman urmacoj runaka t'unaska canka. Pimanchari chay rumi urmanka payka ñut'uska canka.

45 Yupaychana-wasimanta curajcunawan fariseo partecunawan chay quiquinchanata uyarererkancu. Repararkancutaj paycunawan Jesús chay imasta rijch'anachiskanta. <sup>46</sup> Chayraycu imaynapipis payta jap'iycuchinancupaj mayta churacorkancu. Ashqha runastarí manchachicorkancu Jesusta Diospa willajninpaj khawaskancuraycu.

## 22

### *Uj quiquinchana casamiento manta*

<sup>1</sup> Jesuska watejmanta quiquinchanaswan paycunaman parlarka. Nerka:

<sup>2</sup> —Dios runasta munacuywan camachin, chayka uj jatun camachejman rijch'acun. Chay camachejka wawanpa casamiento ta waquicherka. <sup>3</sup> Chay casamiento fiestaman wajyaskacunata pusarimoj cachasninta cacharka. Chay wajyaskasrí mana jamuya munarkancuchu. <sup>4</sup> Ujtawanpis camachejka waj camachisninta cachallarkataj. Paycunata nerka: "Wajyaskacunaman nimuychej jamullachuncuña casamiento man. Wirayaska bueyesniy uywasniyipis ñac'askasña cancu. Miqhuna waquichiskaña cashan. Tucuy ima casamiento paj waquichiskaña", nispa. <sup>5</sup> Wajyaskacunari payta khawarkancu manacajpaj. Waquenka chajrapi llanc'aj riporkancu. Waquinri rantej vendej riporkancu. <sup>6</sup> Ujcunataj camachisninta jap'ispia sinch'ita ñac'aricherkancu wañucherkerkancutaj. <sup>7</sup> Chayta uyariytawan jatun camachejka phiñacorka. Soldadosnintataj cacharka chay runasta wañurachimunancupaj llajtancutapis ninawan ruphaycuchinancupaj. <sup>8</sup> Chanta jatun camachejka cachasninan man. nerka: "Casamiento fiestaka waquichiska cashan. Wajyaskacunari mana jamunancupajjinachu carkancu. <sup>9</sup> Chayraycu riychej llajta calles, ñancunamanpis. Tucuy tariskayquichej runasta casamiento wajyamuychej". <sup>10</sup> Ajinataj ñancunaman rispa tucuy tariskancuta tantamorkancu allin runasta mana allin runastawan. Casamiento wasiri wajyaskacunawan junt'a carka.

<sup>11</sup> ['Camachejtaj wajyaskacunaman sumaj p'achasta korka.]\* Chanta wajyaskacunata khawarimunanpaj casamiento wasiman yaycorka. Chaypitaj mana casamiento p'achayojta uj runata ricorka. <sup>12</sup> Chay runatataj nerka: "Amigo ¿imaynapitaj cayman mana casamiento p'achawan p'achalliska yaycumorkanquirí?" nispa. Chay runari ni imatapis cutichiyya aterkachu. <sup>13</sup> Chanta camachejka casamiento pi yanapajcunata nerka: "Chay runata chaquisninta maquisninta wataycuspa uqhu pacha lakhaman wijch'uychej. Chaypi phutiywan wakay, quiru c'arcucuypis muchunan canka". <sup>14</sup> Imaraycuchus ashqhas wajyaskas cancu. Ajllaska cajcunari pisis cancu, —nispa nerka Jesús.

### *Impuestosta konamanta*

\* 22:11 Ninayan.

<sup>15</sup> Chaymanta fariseo partecunaka ripuskancutawan tanta-camorkancu. Tantacuynincipitaj yuyarererkancu Jesusta parlaskanpi imaynapipis pantachiyyta juchachanancupaj. <sup>16</sup> Ajinataj fariseoska yachacojcunancutawan Herodesmanta cajcunatawan Jesusman cacharkancu. Cachaskastaj Jesusta nerkanca:

—Yachachej, yachaycu kanka cheka parlaj runa caskayquita. Yachay-cutaj yachachiskayquita cheka cajta, Dios munan runas ruwanancutapis. Runata mana rijch'acuynillanmantachu khawanqui manachayrí caskancumanjina. Chayraycu paycunata mana manchachicunquichu. <sup>17</sup> Cunanri niwaycu: ¿Imaynataj rijch'acusunqui? Nokanchej israelcuna ¿Romano gobiernoman impuesto kolketa konachu manachu?

<sup>18</sup> Jesusri sajra yuyaynincuta reparaspa paycunaman nerka:

—Kancunaka ancha puraj uyas canquichej. ¿Imaraycutaj nokata pantachiwayta munanquichejri? <sup>19</sup> Ricuchiwaychej impuesto kolketa, —nispa.

Paycunataj kolketa jaywarkancu. <sup>20</sup> Jesustaj paycunata tapurerka:

—Cay kolkepi ¿pejpa uyan pejpa sutintaj cashanrí?

<sup>21</sup> Paycunataj cutichererkancu:

—Romano curaj camachej Cesarpata, —nispa.

Chaymanta Jesús paycunaman nerka:

—Chayraycu Cesarpata cajtaka payman koychej. Diospata cajtataj Diosman koychej, —nispa.

<sup>22</sup> Chay tapojcunaka chayta uyarispa mayta t'ucorkancu. Jesusta sakepuspataj riporkancu.

#### *Tapuncu causarimpuymantá*

<sup>23</sup> Chay p'unchaypi saduceocuna Jesusman kayllaycorkancu. Paycunaka nej cancu wañuskacuna mana causarimunancuta. Jesustataj tapucunancupaj nerkanca:

<sup>24</sup> —Yachachej, Moiseska nerka uj casaraska runa warminwan mana wawayoj wañupunman chayka, chay wañuskaj waukenka viudawan casaranan tiyan wañuskaj sutinpi khari wawa cananpaj. <sup>25</sup> Cay llajtaycupi kanchis waukes carkancu. Curaj caj waukeri casarayucusorka. Chaymantataj mana wawayoj wañuporka. Ajinapi viudaka wañojpa waukenwan casaracaporka. <sup>26</sup> Chay iscay caj waukeka wañupullarkataj. Quinsa caj waukewanpis ajinallataj carka. Kanchis-nintin waukes casaracuspua wañuporkancu. <sup>27</sup> Khepanta chay viudapis wañupullarkataj. <sup>28</sup> Chanta wañuskacuna causarimojtincu chay kanchismanta ¿maykennincoj warmintaj cankarí? Tucuynin waukes chay warmiwanka casararkancu, —nispa.

<sup>29</sup> Jesusri paycunaman cuticherka:

—Kancunaka mana entiendenquichejchu Diospa palabranta nitaj rejsinquejchu atiynintapis. Chayraycu ancha pantaskas canquichej.

<sup>30</sup> Imaraycuchus causarimuskancu p'unchaypeka ni kharis nitaj warmis casaraconkancuchu. Manachayrí janaj pachapi angelesjina cancu.

<sup>31</sup> Wañuskacuna causarimunancumantari ¿manachu Diospa niskanta leerkanquichej? Dioska kancunaman nerka: <sup>32</sup> “Noka cani Abrahampa Diosnin, wawan Isaacpa Diosnin, allchhin Jacobpatapis Diosnintaj”, nispa.

Chayrunas unay wañupuskancu khepatañia Dios chayta nerka. Chayraycu Dioska mana wañuskacunaj Diosnincuchu. Manachayrí causashajcunaj Diosnincu, —nispa.

33 Ashqha runaska Jesuspa yachachiskanta uyarispa mayta t'ucorkancu.

*Curaj camachiskan*

34 Fariseo partecunaka yachaspa saduceo partecuna Jesusman manaña cutichiyyta atiskancuta, tantacorkancu. 35 Chanta paycunamanta uj yachachejtaj Jesusta parlaskanwan pantachinanpaj tapurerka:

36 —Yachachej, Diospa camachiskasninmanta ¿maykentaj aswan curajrí?

37 Jesusri cuticherka:

—Señor Diosniyquita munacunayqui tiyan tucuy sonkowan tucuy causayniyquian tucuy yuyayniyquianpis. 38 Chaymin Diospa camachiskasninmanta aswan curajtaj ñaupajtajka. 39 Iscaj caj camachiskanpis chay ñaupaj caj quiquillantaj: Runa-masiyquita munacuy kan quiuiyquitajina. 40 Chay iscaynin camachiskasta chekanta casuspaka Moisespa camachiskantapis unay willajcunaj kelkaskancutapis casunchej,—nispa.

*“¿Pitaj Cristorí?”*

41 Fariseo partecuna tantaska cashajtincuraj Jesucristo paycunata 42 tapurerka:

—Kancuna ¿ima ninquichejtaj noka, Diospa ajllaskanmanta? Unay jatun tatay ¿pi caskantataj ninquichejrí?

Paycunataj cuticherkan:

Camachej Davidmin unay jatun tatayqueka,—nispa.

43 Chanta Jesús paycunaman nerka:

—Camachej Davidka Santo Espirituwan sut'inchaspa ¿imaynapitaj payta Señor Diosníy nerkarí? Ajinata nerka:

44 Señorninchej Dios nerka Señorníy Cristoman:

“Nokawan cusca tiyaycucuy camachinanchejpaj churanacojcunayquita k'alata atipanaycama”.†

45 ‘Davidka Cristota Señorninta sutichan. Chayraycu ¿imaynatataj Cristoka Davidpa wawallan canmanrí?

46 Ni pi ni uj simita cutichiyyta aterkachu. Chay p'unchaymantapacha tucuy runas Jesusta uj imata tapuriyta manchachicorkancu.

## 23

*Jesús fariseosta yachachejcunatawan juchachan*

1 Chanta Jesuska ashqha runasman yachacojcunamanwan nerka:

2 —Israel yachachejcunawan fariseo partecunawanka Moisespa camachiskasninmanjina yachachishaskancuta yuyancu. 3 Chayraycu Moisespa camachiskasninmanta tucuy nisuskayquichejta casuspa ruwaychej. Paycunaka simillancuwan camachiskasninmanjina ruwasunchej nincu causaynincipitaj wajjinata ruwancu. Kancunari ama paycunajinaka caychejchu. 4 Paycunaka yachachinasnincuta llasa k'epistajina waj runaspaj waquichincu. Chaytataj camachincu runasta ruwanan-cutu k'epistajina k'epirichispa. Paycunari chay camachiskasnincuta ni casojllapis churacuncuchu. Nitaj runaspa k'episnincuta uj dedowan-jinallapis yanapaj churacuncuchu. 5 Paycuna tucuy imata ruwancu

† 22:44 Literal: chaquisniyqui urapi churanaycama.

runasman ricuchinallancupaj. Diosta yupaychashaskancuta yuyaspa kelkaska churanasta apaycachacoj cancu. Chaycunatapis jatunyachincu. P'achasnincoj t'icasnintapis jatunyachincu.<sup>6</sup> Jatun mighunaspi munancu aswan sumajpaj khawaskacunaj tiyanasnincipi tiyacuyta. Tantacuna-wasispipis curajcunaj tiyanasnincipi tiyacuyta mayta munancu.<sup>7</sup> Plazaspipis mayta munancu runaswan napaycuchicuyta. Runaswan jatunpaj khawaskas "yachachiwajníy", nichicuytapis mayta munancu.

<sup>8</sup> Kancunari ama jatunpaj khawaska "yachachiwajníy", nichicuychejchu. Imaraycuchus nokalla, Diospa ajllaskan, Yachachejniyquichejka cani. Tucuy kancunataj Diospajka uj rejlla\* canquichej.<sup>9</sup> Cay pachapi ni maykenmanpis niychejchu "Tatáy" payta yupaychanayquichejpajka. Imaraycuchus ujllamin kancunaj Tatayquichejka. Payri janaj pachapi tiyacoj Diosmin.<sup>10</sup> Runaswan amataj "Camachiwajníy" nichicuychejchu. Imaraycuchus nokallamin, Diospa ajllaskan, Camachejniyquichej cani.<sup>11</sup> Kancuna uqhupi curaj cajka yanapajniyquichej canan tiyan.<sup>12</sup> Payllamanta jatunchacojka juch'uyachiska canka. Llamp'u sonkoyoj cajrí jatunchaska canka.

<sup>13</sup> 'Uj phutiy, ari, kancuna yachachejcunamanta fariseo partecunamantawan! Puraj uyas canquichej. Kancunaka yachachiskasniyquichejwan jarc'ashanquichej runasta ama casunancupaj Diosta camachejnincujina. Imaraycuchus kancuna Diosta mana casunquichejchu. Nitaj casuyta munajcunata sakenquichejchu casunancuta munacoj camachejnincujinaka.

<sup>14</sup> 'Uj phutiy kancuna yachachejcunamanta fariseo partecunamantawan! Puraj uyas canquichej. Imaraycuchus kancunaka viuda warmicunamanta pisi capuynincuta suwaspajina khechushanquichej. Chayta pacanayquichejpaj Diosmanta anchata mañacunquichej. Chayraycu Dios kancunata astawan sinch'iwan juchachasonkachej.

<sup>15</sup> 'Uj phutiy kancuna yachachejcunamanta fariseo partecunamantawan! Kancunaka kochanejta jallp'anejtapis muyumushanquichej. Ajinapi uj runallatapis kancunajman tijrayta munanquichej. Tijraskayquichejwan chay runaka iscay cuti astawan juchachaskaraj canka kancunamanta niskaka. Chayraycu uqhu pachaman rinanpajjina chay runaka cashan.

<sup>16</sup> 'Uj phutiy kancunamanta! Kancunaka ciegos caspapis ujcunata pusaycachayta munanquichej. Diospa niskasninta mana reparaspa yachachishanquichej. Kancunaka ninquichej: "Pillapis yupaychana-wasej sutinta okharicuspa jurajka, niskanta mana junt'an, chaypis allilan. Yupaychana-wasipi korej sutinta okharicuspa jurajri, niskanta junt'an an tiyan", nispa.<sup>17</sup> ¡Kancuna mana yuyayniyojcuna ciegosjina canquichej! ¿Yupaychana-wasi cajtinchu koreka Diosman t'akaska? Chayrí ¿kori cajtinchu yupaychana-waseka Diosman t'akaska? ¿Maykentaj astawan cajrí?<sup>18</sup> Kancunaka nillanquichejtaj: "Jaywanata churana jutinta okharicuspa jurajka, niskanta mana junt'an, chaypis allilan. Chay jaywanaj sutinta okharicuspa jurajri niskanta junt'an an puni tiyan", nispa.<sup>19</sup> ¡Kancuna mana yuyayniyojcuna ciegosjina canquichej! ¿Jaywanata churana cajka jaywana cajtinchu Diosman t'akaska? Chayrí ¿jaywanaka jaywanata churana cajtinchu Diosman t'akaska? ¿Maykentaj

\* 23:8 Literal: hermanos.

astawan cajrí? <sup>20</sup> Reparaychej. Jaywanata churanaj sutinta okharicuspa jurajka tucuy chaypi cajcunaj sutinpiwan juran. Manataj jaywanata churanaj sutillanpichu juran. <sup>21</sup> Reparaychej yupaychana-wasej sutinta okharicuspa jurajka chaypi tiyacoj Diospa sutinpi juraskanta. Manataj yupaychana-wasej sutillanpichu juran. <sup>22</sup> Chaywanpis janaj pachaj sutinta okharicuspa jurajka Diospa tiyacunanca sutinpi juran. Mana chay tiyanaj sutillanpichu juran. Manachayrí Diospa sutinpi juran chaypi tiyacuskanraycu.

<sup>23</sup> ¡Uj phutiy, ari, kancuna yachachejcunapajka fariseo partecunapajwan! Puraj uyas canquichej. Kancunaka yerba buenamanta, anismanta, cominomantapis ujta sapa chuncamanta Diosman koshanquichej. Diospa curaj caj camachiskasnintataj sakeporkanquichej. Chay curaj caj camachiskaska chekan ruway, qhuyacuy, Diospi jap'icuywan cancu. Caycunatamin ruwanayquichej tiyan ama chay ujcunata sakespa. <sup>24</sup> ¡Kancunaka ciegos caspa ujcunata pusaycachaya munanquichej! Ch'uspita orkhoshanquichej jatun uywa camellotataj okoycunquichej, [yachachinasniyquichejta Diospa camachiskasninemanta aswan curajpaj khawaspa.]†

<sup>25</sup> ¡Uj phutiy, ari, kancuna yachachejcunamanta fariseo partecunamantawan! ¡Puraj uyas canquichej! Kancunaka vasota chuwatapis jawallanta mayllanquichej. Uqhuntarí sakenquichej mana llimphuchaspa. Ajinallataj chaycunaman rijch'acoilla canquichej. Sonkoyquichej suwaskayquichejwan khapaj cayta munapayaywan junt'a cashan. <sup>26</sup> ¡Ciegojina fariseo runa! Mana reparanquichu sonkoyqueka millay junt'a cashaskanta. Naupajta sonkoyquita llimphuchacuy. Ajinapi chekan ruwaj canqui.

<sup>27</sup> ¡Uj phutiy, ari, kancuna yachachejcunamanta fariseo partecunamantawan! Puraj uyas canquichej. Aya p'ampanasta runas yurajyachincu ama pipis mana yuyayllamanta chimpananpaj. Chay c'achitu yurajyachiska p'ampanasman rijch'acunquichej. Imayna aya p'ampanas uqhuntaj wañuska runaspa tullusninwan junt'a cancu ajinalla sonkoyquichejka tucuy laya millay cajwan junt'a cancu. <sup>28</sup> Kancuna runaspa ñaupakellancipi chekan ruwaj runasman tucushanquichej. Kancuna quiuiyquichejrí puraj uyas Diospa niskanta mana casojtaj cashanquichej.

<sup>29</sup> ¡Uj phutiy, ari, kancuna yachachejcunamanta fariseo partecunamantawan! Puraj uyas canquichej. Kancunaka unay wañuska willajcunata yuyarinapaj sepulturasta sayachishanquichej. Unay wañuska chekan ruwajcunapajpis sepulturasnincuta c'achachashanquichej. <sup>30</sup> Kancunaka nishanquichej ñaupaj tatasninchej willajcunata wañuchiskancuta. Jakay p'unchaycunapi causasunman carka chayka, nokanchej mana tatasninchejjinachu ruwasunman carka. <sup>31</sup> Chaywanka kancuna quiuiyquichej contrayquichejpi willacushanquichej willajcunata wañuchejcunaj wawasnin caskayquichejta. <sup>32</sup> ¡Tatasniyquichej ruwarka chaymanjina kancunapis tucunayquichejcama ruwanquichej!

<sup>33</sup> ¡Kancunaka runa wañuchi catarisjina canquichej! ¡Ancha pantachej, catarisjina sajras canquichej! ¡Uqhu pacha lauraypipuni ñac'arinayquichej tiyan! <sup>34</sup> Chayraycu nokamanta willajcunayta Diosmanta

† 23:24 Ninayan.

yachayniyojcunatawan yachachejcunatawan cachamuskayquichej. Kancunarií cachamususkayquichejmanta waquinta wañurachinquichej chacatanguichejtaj. Wajcunataj tantacuna-wasisniyquichejpi sek'onquichej. Chaywanpis paycunata ñac'arichinayquichejpaj llajtamanta llajta khatiycachanquichej. <sup>35</sup> Ajinapi juchachaskas canquichej tucuy mana juchancumanta wañuchiskas cajcunamanta Abelmanta Berequiaspa wawan Zacariascama. Payta kancunaj tatasniyquichej wañucherkanca yupaychana-wasipi jaywana churana<sup>‡</sup> kayllapi. <sup>36</sup> Niyquichej chekamanta tucuy chay wañuchiskacunamanta cunan p'unchay runas juchachaskas canancuta.

### *Jesús wakan Jerusalenmanta*

<sup>37</sup> ‘¡Mayta phuticuni kancuna Jerusalénpí tiyacojcunamanta! Unaymantapacha Diospa willajcunanta wañuchejcuna canquichej, cachasninta ch'ankajcunapis. Imaynatachus wallpaka chillwiseninta phurus-nin uraman tantan, ajinallatataj nokapis ashqha cutista kancunata nokaman tantamuya munarkayquichej. Kancunarií mana munarkan-quichejchu. <sup>38</sup> Chekatapuni Dios kancunaj yupaychana-wasiyquichejta sakerparipun. <sup>39</sup> Chayraycu niyquichej cunamantapacha manaña nokata ujtawan ricunayquichejta “Diosmanta cachaska jamojka jatunchaska cachun”, ninayquichejcama, —nispa nerka Jesús.

## 24

### *Yupaychana-wasi urmachiska canka*

<sup>1</sup> Jesuska yupaychana-wasimanta llojsiytawan ripusharka. Yachacojcunari payman kayllaycorkancu yupaychana-wasita ricuchispa. <sup>2</sup> Paytaj paycunaman cutichispa nerka:

—¿Tucuy cay sumachej rumismanta wasista ricushanquichejchu? Chekamanta caycunaka k'alata urmachiskas cankancu. Nitaj uj rumil-lapis waj rumiwan sayashaj sakeskachu canka.

### *Cay pacha manaraj tucucojtin cay ricuchinas cankancu*

<sup>3</sup> Chanta Jesús Olivos orko patapi tiyaricuskantawan yachacojcunaka sapallancu payman kayllaycorkancu. Taporkancutaj:

—Niwaycu ¿mayc'ajtaj tucuy chayka ruwaconkarí? ¿Ima ricuchinastaj canka cutimunayquimanta cay pachaj tucucunanmantawan?

<sup>4</sup> Jesustaj paycunaman cuticherka:

—Sumajta khawacuychej ama pantachiskas canayquichejpaj. <sup>5</sup> Arí, ashqhas llullacuspa sutiyipi jamonkancu. Nenkancutaj: “Noka Diospa ajllaskan cani”, nispa. Ashqhasta pantarachenkancu. <sup>6</sup> Reparaychej: Guerrasmanta waj guerra canayashallaskanmantataj uyarinquichej. Guerrasmanta parlajta uyarispapis ama manchachicuychejchu. Chay imaska canancupuni tiyan. Astawanpis manaraj tucucuyrajchu canka. <sup>7</sup> Imaraycuchus uj ayllu waj ayloj contranpi okhariconka. Uj llajtayoj runas waj llajtayoj runaspa contranpi makanacunapaj okhariconkancu. Yarkhaycuna onkoycunapis canka. Jallp'apis caynejpi jakaynejpi qharcatitenka. <sup>8</sup> Tucuy chay imasri onkocoj warmej nanaynin kallarinajina sinch'i canka. Ajinata runas mayta ñac'arenkancu.

<sup>9</sup> ‘Chaypachamin sinch'i llaquichiskas canayquichejpaj jaywaycusonkachej wañuchisonkachejtaj. Chaywanpis tucuy runas

<sup>‡</sup> 23:35 Literal: altar.

yachacojcunay caskayquichejraycu chejnicusonkachej. <sup>10</sup> Ajina cajtinmin ashqhas Diospa cheka fianninmanta urmaponkancu. Waquenka paycunapura ch'atanaconkancu. Waquintaj paycunapura chejninaconkancu. <sup>11</sup> Ashqha llulla willajcuna riqhurimonkancu. Ashqhastataj pantachenkancu paycunapi creenancupaj. <sup>12</sup> Sajra causay junt'aycuskanraycutaj runas mana tucuy sonkowan munanaconkancuñachu. <sup>13</sup> Tucuy chay tucucunacama nokapi sinch'ita jap'icorí juchamanta cachariska canka. <sup>14</sup> Dios caypi cashan camachinanpaj, cay sumaj willanasnenka tucuy cay pachapi willaraska canka tucuy runas yachanancupaj. Chanta tucucuya jamonka.

<sup>15</sup> 'Diospa unay willajnin Danielka nerka Dios millachicun, chay thuñispa tucuchej cananta. Chayta leerkanquichej chayka, sumajta reparaychej. Imaraycuchus chay tucuchejta Diosman t'akaska cajpi cashajta ricunquichej. <sup>16</sup> Chaypacha Judea jallp'api cashajcuna orkosman aykecuychej. <sup>17</sup> Wasi jawapi\* cashajpis ama imata orkhoricojl-lapis wasinman yaycuchunchu. <sup>18</sup> Chajrapi runaka wasiman p'achanta okharicoj ama cutichunchu. <sup>19</sup> ¡Phutiy ari, chay p'unchaycunapi wijsalliska warmispaj, ñuñushaj wawayojcunapajpis! <sup>20</sup> Kancunari Diosmanta mañacuychej ama para tiempopi aykecunayquichej cananpaj nitaj samacuna p'unchaypi. <sup>21</sup> Imaraycuchus chay p'unchaycunapi manchay ñac'ariy canka. Cay pachaj kallaricuyninmanta cunancama mana carkachu chayjina ñac'ariyka nitaj jayc'ajpis cankachu. <sup>22</sup> Chay ñac'ariy tiempota Dios mana pisiyachinman chayka, ni pi causanmanrajchu. Ajllaskasniraycurí Dioska chay ñac'ariy tiempota aswan pisiman pisiyachenka.

<sup>23</sup> 'Sitajchus nisunquichejman: ¡Khawaychej caypi Diospa ajllaskan Cristo cashan! chayrí ¡Khawaychej, jakaypi cashan! Chayta ama creeychejchu. <sup>24</sup> Imaraycuchus mana cheka caj cristo caspalla Cristojina riqhurimonkancu. Llulla willajcunapis riqhurimonkancu. Paycunaka sumachej ricuchinastawan sumachej t'ucunastawan ruwankancu. Aticunman chayka, chaywan Diospa quiquin ajllacuskasnintapis cheka cajmanta pantachinancupaj ruwankancu. <sup>25</sup> Manaraj chayta ruwacushajtin ñauptaña nerkyquichej. <sup>26</sup> Chayraycu nisunquichejman: "Khawaychej, jakay ch'innejpi Diospa ajllaskan cashan", nispa chayka, ama chayman riychejchu. Chayrí nisunquichejman: "Diospa ajllaskan cay uqhupi pacaska cashan", nispa chayka, chaytapis ama creeychejchu. <sup>27</sup> Allinta yachaychej: Lliujliojka inti llojsimuynejmanta inti yaycuyenjcama c'ancharajtin tucuy runas ricuncu. Ajinallatataj cutimojtiy tucuy runas ricuwankancu. <sup>28</sup> Maypichá aya cashan, chaymanmin alkarisika tantacuncu.

### Cristo cutimuynin

<sup>29</sup> 'Chay ñac'ariskanmanta khepanta inteka lakhayaycaponka. Quilalapis manaña c'ancharonkachu. Koyllurcunataj janaj pachamanta urmaramonkancu. Cielopi cajcunataj Dios cuyuchenka: purichej callpapis pisiyaycaponka. <sup>30</sup> Chanta noka, Diospa cachaska Runan, jatun ricuchinaya janaj pachapi ricuchisaj. Chaypachatajmin cay pacha tucuy ayllusmanta runaska pechoncuta tacacuspa wakankancu. Ñokataj atiywan may lliphipej c'ancharawantaj jamusaj. Runastaj ajinata janaj pachamanta phuyu patapi cutimushajta ricuwankancu. <sup>31</sup> Nokataj

\* **24:17** Literal: patapi.

may sinch'i wakaj pututusniyoj angelesniyta cachamusaj. Paycunataj ajllacuskasniyta tucuy cay pacha kayllamanta carumantapis tanta-yconkancu. <sup>32</sup> Cay higo sach'awan quiquinchanamanta yachacuy-chej. Higo sach'aj ramanka wawaramuspa laphisnin p'uturamun. Ajina cajtintaj yachanquichej k'oñi tiempoka chayamushaskantaña. <sup>33</sup> Ajinallataj kancunapis tucuy chay willarasuskayquichejta junt'askata ricuspaka yachaychej ñapis noka cutimushaskaytaña. <sup>34</sup> Niyquichej chekamanta tucuy chayka ruwacunanta manaraj cay p'unchay runas wañurapushajtincu. <sup>35</sup> Cielopis jallp'apis tucucaponkancu. Cay niskasniry mana tucucaponkachu.

<sup>36</sup> 'Ima p'unchaychus ima horachus cutimunayta, ni pi yachanchu. Manamin janaj pachamanta cachamuska angelespis yachancchu nitaj noka, Diospa Wawanpis yachanichu. Dios Tatalla yachan. <sup>37</sup> Astawanri imaynachus carka unay runa Noé causashajtin, ajinallataj canka noka, Diospa cachaska Runan, ujtawan riqhurimojtiy. <sup>38</sup> Unay sinch'i para p'unchaycuna manaraj chayamushajtincu runaska miqhunasta miqhusharkancu. Machasharkancu casaracusharkancutaj. Ajinata causasharkancu Noé jatun barcoman yaycunan p'unchaycama. <sup>39</sup> Chay runasri mana reparacorkancchu sinch'i para tucuy paycunata apac-punancama. Ajinallataj canka noka, Diospa cachaska Runan, cutimunaycama. <sup>40</sup> Chaypachaka iscay runas chajrapi cankancu. Ujnin caj nokaman pusaska canka ujiniri sakeska canka. <sup>41</sup> Iscay warmis cusca maranpi cutashankancu. Ujnin nokaman pusaska canka. Ujiniri sakeska canka.

<sup>42</sup> 'Kancunaka manamin yachanquichejchu ima p'unchaychus noka Señorniyquichej cutimunaytaka. Chayraycu waquichiskas caychej. <sup>43</sup> Sumajta reparaychej. Uj wasiyoj runa ima horatachus wasiman suwa jamunanta yachanman chayka, waquichicunman. Manataj sakenmanchu jusc'uspa wasiman yaycunantaka. <sup>44</sup> Ajinaka kancunapis waquichiskas caychej. Imaraycuchus ima horatachus mana suyanquichej cutimunayta, chay horata noka, Diospa cachaska Runan, cutimusaj.

### *Quiquinchana sumaj camachimanta sajramantawan*

<sup>45</sup> 'Parlani uj chekanta junt'aj sumaj yuyayniyoj camachimanta. Patronnenka payta churarka wasinpi camachisninman horasnipi miqhuchinanpaj. <sup>46</sup> May cusiska chay khawapoja patronnin cutimojtin payta taripan ruwananta ruwashajta. <sup>47</sup> Chekamanta patronnenka tucuy capuyninta khawapunanpaj chay camachita churanka. <sup>48</sup> Sajra camachirí sonkonpi ninman: "Patronniyka khepaconkaraj", nispa. <sup>49</sup> Kallarintaj camachi-masisninta makaspa apaycachayta. Machajcunawantaj miqhoj uyyaj churacun. <sup>50</sup> Mana suyaskan p'unchayta, mana yuyaskan horata patronnenka cutimonka. <sup>51</sup> Camachintataj puraj uy-acunawan cuscata sinch'ita nac'arichenka. Chaypitaj quiru c'arucuya wakanka,—nispa nerka Jesús.

## 25

### *Uj quiquinchana chunca sipascunamanta*

<sup>1</sup> Ajinaka Dios wiñaypaj camachin, chaypi llanc'ajcunaka rijch'acuncu chunca sipascunaman. Paycunaka c'anchanasnincuta apaspa casaracoj runata suyaj rerkancu. <sup>2</sup> Phishka sipascunari yuyayniyoj caspa

waquichicorkancu. Phishka sipascunataj mana yuyayniyoj carkancu.  
<sup>3</sup> Chay mana yuyayniyoj sipascunari c'anchasnincuta aparkancu, manataj kerosenta yapanancupaj aparkancuchu. <sup>4</sup> Yuyayniyoj sipascunari c'anchasnincuta aparkancu. Kerosentataj uj churanapi aparkancu yapanancupaj. <sup>5</sup> Casaracoj runa runasninwan unayta khepacojtin puñuywan tucuynincu c'aywisharkancu puñurparerkancutaj.  
<sup>6</sup> Chaui tutaña cashajtintaj uj sinch'i khapariy uyaricorka: “¡Casaracoj runa jamushanña! ¡Tari pamuychej payta!” <sup>7</sup> Chanta tucuynin chay sipascuna rijch'arispa jataricorkancu. Chaymantataj c'anchanasnincuta waquicherkancu. <sup>8</sup> Mana yuyayniyojcunari nerkancu yuyayniyoj sipascunata: “Kerosenniyquichejmanta koriwaycu. C'anchanasniyu wañupushancuña”, nispa. <sup>9</sup> Yuyayniyoj sipascunataj cuticherkancu: “Mana. Kosuyquichejman chayka, kancunapajpis nokaycupajpis pisinman. Astawanpis rijchej vendejcunajman rantinayquichejpaj”, nispa. <sup>10</sup> Paycuna rantej rinancucamatay casaracojka runasninwan jamorka. Waquichiska cajcunataj casaracoj runawan runasninwan ima casamiento wasiman yaycorkancu. Chaymantataj puncu wisk'acaporka. <sup>11</sup> Khepamanta chay waj sipascuna chayamorkancu. Nerkancutaj: “¡Señorní, Tatáy, puncta qhicharimuwaycu!” nispa. <sup>12</sup> Casaracoj runataj cuticherka: “Niyquichej chekamanta mana rejsiyquichejchu”.

<sup>13</sup> Jesuska runasman nerka:

—Chayraycu kancunapis rijch'ariskas suyaychej. Imaraycuchus mana yachanquichejchu noka, Diospa cachaska Runan, mayc'ajchus cutimunayta. Ima p'unchaychus ima horachus cutimunayta mana yachanquichejchu.

### *Uj quiquinchana patronpa jaywaskan kolkemanta*

<sup>14</sup> Chaywanpis nokaj camachinapaj cutimunayka rijch'acun uj caruman rej patronman. Chay patronka ripushaspa camachisninta wajyarka. Chaymantataj capuyninta paycunaman jaywaycorka. <sup>15</sup> Uj camachinman korka phishka warankajina kolketa. Ujmantaj korka iscay warankajina kolketa. Uj cajmantaj korka uj warankajina kolketa. Sapa ujman korka ruwayta atiskancumanjina. Chaymantataj caruman rerka. <sup>16</sup> Chanta chay phishka warankajina kolketa jap'ejka rerka. Ajinaspataj chay kolketa sumajta purichimorka. Uj phishkatawantaj mirachimorka. <sup>17</sup> Ajinallataj chay iscay warankatajina kolketa jap'ejpis uj iscaytawan mirachimorka. <sup>18</sup> Uj warankatajina kolketa jap'ejri rerka. Ajinaspataj patronninpaj kolketa jallp'aman p'ampaskata pacaycamorka.

<sup>19</sup> Chay camachicunaj patronnincoka ashqha watasmanta cutimorka. Chaymantataj patronka kolkemanta yachananpaj paycunawan parlarka. <sup>20</sup> Payman chay phishka warankajina kolketa jap'ejka jamorka. Payri uj phishka waranka kolketawan apamorka. Patronninpaj nerka: “Señor, phishka warankajina kolketa kowarkanqui. Khawaymá, uj phishkatawan mirachimuni”. <sup>21</sup> Patronnintaj payta nerka: “Walej-pacha, c'acha, junt'aj camachiy. Chay pisi kolkepi sumajta junt'arkanqui. Cunantaj ashqhamanwanraj ruwapunawayquipaj churaskayqui. Chaywanpis nokawan cusca cusicunayquipaj jampuway”, nispa. <sup>22</sup> Chanta chay iscay warankajina kolketa jap'ejpis kayllaycamuspa nillarkataj:

“Señor, iscay warankajina kolketa kowarkanqui. Khawaymá, uj iscay warankatawan mirachimorkani”. <sup>23</sup> Patronnintaj nerka: “Walejta ruwarkanqui, c'acha, junt'aj camachíy. Chay pisi kolkepi sumajta junt'arkanqui. Cunantaj ashqhamanwanraj ruwapunawayquipaj churaskayqui. Chaywanpis nokawan cusca cusicunayquipaj jam-puway”, nispa. <sup>24</sup> Uj warankajina kolketa jap'ejpis kayllaycamuspa nerka: “Patronníy, rejsiyqui kanka ancha rumi sonko runa caskayquita. Mana tarpuskayquimanta cosechanquipis. Mana kanpata cajtapis jap'inqui. <sup>25</sup> Chayraycu manchachicorkani. Kolkeyquitataj riytawan sumajta jallp'aman p'ampaskata wakaycharkani. Cayka kolkeyqueka. Jap'icapuy”. <sup>26</sup> Patronnintaj payman cuticherka: “Khella, sajra camachi. Yacharkanqui mana tarpuskaymanta cosechaj caskayta, mana nokajta cajtapis jap'ej caskayta. <sup>27</sup> Yachashaspa ɿimaraycutaj kolkeyta mirachejcunaman mana korkanquichu? Cutimuspa miraynintawan kolkeyta jap'icapuymana carka”, nispa. <sup>28</sup> Chayraycu chaypi cajcunaman nerka: “Cay runamanta kolketa khechuychej. Chay chunca warankajina kolkeyojman kopuychej”, nerka patron. <sup>29</sup> Imaraycuchus Diospa niskanta jap'icojmanka astawan koska canka. Manataj pisenkachu jayc'ajpis. Mana jap'icojmantarí pisi jap'icuskanpis khechuska canka. <sup>30</sup> Cay manacaj camachitari jawa lakhaman wijch'umuychej. Chaypi wakaytawan quiru c'arucuytawan ñac'arenka, —nispa nerka Jesús.

*Tucuy caj runaman Cristo konka ruwaskancumanjina*

<sup>31</sup> Nillarkataj:

—Noka, Diospa cachaska Runanka, atiynywan cutimusaj tucuy angeesta pusaspa. Chaypacha tiyacyusaj camachinaypaj tucuy atiynywan. <sup>32</sup> Tucuy llajtasmanta runastaj ñaupakeypi tantaskas cankancu. Uj michejka ovejasta cabrasmanta t'akan. Ajinallatataj nokapis chekanta ruwaj runasta sajrata ruwaj runasmanta t'akasaj. <sup>33</sup> Chekanta ruwajcunata pañayman churasaj. Sajrata ruwajcunata llok'eyman churasaj. <sup>34</sup> Chanta noka, Camachej, pañaypi cajcunata nisaj: “Jampuwaychej, Dios Tataypa sumajpaj khawaskasnin. Cay pacha ruwacuymantapacha nokawan cusca kancuna camachinayquichejpaj waquichiska carka. Chayraycu cunan nokawan cusca camachiychej. <sup>35</sup> Imaraycuchus yarkhachicojtiy miqhuchiwarkanquichej. Ch'aquichicushajtiy ujyanata kowarkanquichej. Forastero purishajtiypis wajyariwarkanquichej. <sup>36</sup> P'achamanta pisichicojtiy p'achata kowarkanquichej. Onkoska cashajtiy watucuwarkanquichej. Carcelpi wisk'aska cashajtiy watucoj jamuwarkanquichej”. <sup>37</sup> Chanta chekata ruwaj runaska cutichiwankancu: “Camachiwajníy, ɿmayc'ajtaj yarkhachicojta ricususpa miqhucheraycurí? Chayrí ch'aquichicushajtiyqui ɿmayc'ajtaj ujyacheraycurí? <sup>38</sup> Forastero purishajta ricususpa ɿmayc'ajtaj wajyareraycurí? Chayrí p'achamanta pisichicojta ricususpa ɿmayc'ajtaj p'achallicheraycurí? <sup>39</sup> Onkoskata ricucuspa chayrí carcelpi wisk'aska cashajtiyquipis ɿmayc'ajtaj watucoj jamorkaycurí?” nispa. <sup>40</sup> Noka, Camachejnincutaj, paycunaman cutichisaj: “Chekamanta cay uj pisipaj khawaska hermanoypaj imallatapis ruwaporkanquichej chayka, nokapaj ruwapuwickanquichej”.

41 'Noka, Camachejnincoka, chanta nillasajtaj llok'eypi cajcunata: "Kancuna juchachaska cajcuna riychej caymanta. Supay Satanaspaj cachasnipajwan uqhu pachapi wiñaypaj lauraj nina waquichiska cashan. Chayman kancunaka riychej. 42 Imaraycuchus yarkhachicojtiy miqhunata mana kowarkanquichejchu. Ch'aquiska cashajtiy yacuta mana jaywariwarkanquichejchu. 43 Forasterojina purishajtiy mana wajyariwarkanquichejchu. P'achamanta pisichicojta ricuwaspa mana p'achallichiwarkanquichejchu. Onkoska cashajtiy, carcelpi wisk'aska cashajtipis mana watucuwarkanquichejchu". 44 Chanta paycunaka cuticherkanca: "Camachiwajniy, ¿mayc'ajtaj yarkhachicojta ricususpa chayrí ch'aquiskata chayrí forastero purishajta, chayrí p'achamanta pisichicojta chayrí onkoskata chayrí carcelpi wisk'askata ricususpa pis mana yanaparerakycchu?" 45 Chanta noka, Camachejnincoka, paycunaman cutichisaj: "Pisipaj khawaska cajpaj imallatapis mana ruwaporkanquichejchu chayka, chekamanta nokapajpis mana ruwapuwardakanquichejchu". 46 Chayraycu kancunaka wiñay ñac'ariyman riychej. Chekanta ruwaj runasri wiñay causayniyoj nokawan cankancu.

## 26

*Yuyaychacorkancu Jesusta jap'iycuchiyyta wañuchinancupaj*

1 Jesuska tucuy chay parlayta tucuytawan yachacojcunanman nerka:

2 —Yachanquichejjina iscay p'unchaycunamantawanka pascua p'unchaycuna canka. Noka, Diospa cachaska Runantaj, chay p'unchaycunata chacataska canaypaj jaywaycuska casaj, —nispa.

3 Chaymantapachataj israel curajcuna\* tantacorkancu Caifás sutijoj curaj camachejpa pationpi. 4 Paycunataj yuyaychacorkancu llullacuspa Jesusta jap'iycuchiyyta, chanta payta wañuchichiyyta. 5 Paycunari ninacusharkancu:

—Ama jatun p'unchaycunapeka, runas ama ch'ajwanancupaj, —nispa.

*Uj warmi sumaj k'apajta Jesusman jich'aycun*

6 Jesuska lepra onkoynijoj niska Simonpa wasinpi casharka. Chay wasiri Betania llajtapi carka. 7 Uj warmitaj Jesusman kayllaycorka. Payka nardomanta may c'achitu k'apayniyoj aceitejinata uj c'achitu rumi† yuritupi junt'ata apamorka. Chay k'apajri ashqha kolkewan rantiska carka. Jesús mesapi tiyacushajtintaj chay warmeka chay c'achitu k'apajta umanman jich'aycuspaj jawiyorcorka. 8 Yachacojcunaka chayta ricuytawan mayta phiñacorkancu. Taporkancutaj:

—¿Imapajtaj cayjina usuchiska cashanri? 9 Cay c'achitu k'apajka ashqha kolkepj vendecunman carka. Chay kolketaj wajcha runasman koska canman carka, —nispa.

10 Jesuska sumajta reparaspa niskancumanta paycunata nerka:

—¿Imaraycutaj cay warmita llaquichishanquichej? Chayta ruwaspaka sumaj cajta nokapaj ruwapuwardakan. 11 Arí, wajcha runaska yanapanayquichejpaj cancupuni. Nokari mana unaytañachu kancunawan casaj. 12 Cay warmiri chay c'achitu k'apajwan cuerpoymen jich'aycuwaspaka khepata p'ampacuyniypaj ruwarka. 13 Niyquichej chekamanta cay sumaj willanaska nokamanta tucuynej cay pachantinpi

\* 26:3 Literal: yupaychana-wasimanta curajcuna israel curajcunawan. † 26:7 Literal: alabastro.

willarananta. Chay tucuynejpi cay warmej ruwaskanka willaska canka paymanta yuyaricunapaj, —nispa nerka Jesús.

*Judas Jesusta jaywaycun*

<sup>14</sup> Chanta chunca iscayniyoj yachacojcunamanta ujnin caj rerka yupaychana-wasipi curajcunaman. Payri Judas Iscariote niska carka.

<sup>15</sup> Paycunaman nerkataj:

—Noka Jesusta jaywaycuyquichejman chayka, ¿mashqha kolketataj kowanquichejman?

Paycuna nerkanca:

—Quinsa chunca kolkesta kosajcu, —nispa. Chaytataj payman korkancu. <sup>16</sup> Judaska chaypacha mantapacha masc'asharka imaynapichus aswan allin canman Jesusta jaywaycunanta.

*Pascua miqhuna*

<sup>17</sup> Israel runaska jatun p'unchaycunancupi t'antata mana pokochi-nayoja miqhoj cancu. [Ajinata yuyarej cancu imaynata Dios paycunata enemigosnincumanta cacharichiskanta.]‡ Ñaupaj caj p'unchaypitaj yachacojcunanka Jesusman kayllaycorkancu. Taporkancutaj:

—¿Maypitaj waquichipusajcu yuyarina miqhunata miqhunayquipaj?

<sup>18</sup> Jesustaj nerka:

—Llajtaman riychej. Chaypitaj uj runaman niychej: “Yachachiwa-jinchej nisunqui: Wañunay p'unchay kayllamushanña. Wasiyquipi yuyarina miqhunata yachacojcunaywan miqhuyta munani”.

<sup>19</sup> Yachacojcunantaj Jesuspa niskanmanjina ruwarkancu. Ajinataj yuyarina miqhunata miqhunancupaj waquicherkanca.

<sup>20</sup> Jesuska ch'isiyaycojtinña chunca iscayniyojcunawan miqhunancupaj tiyaycucorka. <sup>21</sup> Miqhushaspataj yachacojcunanta nerka:

—Niyquichej chekamanta ujniyquichej kancunamanta nokata chejni-waj runasman jaywaycuwananta, —nispa.

<sup>22</sup> Yachacojcunantaj ancha llaquiskas ujmanta uj payta taporkancu:

—Señorníy ¿nokachu cayman?

<sup>23</sup> Paytaj cutichispa nerka:

—Nokawan cusca t'antata chuwaman chhapun, chaymin nokata chejnicojcunaman jaywaycuwanka. <sup>24</sup> Noka, Diospa cachaska Runanka wañoj rishani paypa palabranpi nokamanta niskanmanjina. ¡May phuti, ari, nokata jaywaycojpajka! Aswan allin canman carka chay runapajka mana nacecunan.

<sup>25</sup> Jaywaycoj risharka chay Judaska cuticherka:

—Yachachiwajní, ¿nokachu cayman?

Jesustaj nerka:

—Arí, kan ninqui, ajinapuni, —nispa.

<sup>26</sup> Miqhushajtincu Jesuska t'antata maquisnинwan jap'erka. Chaymantataj Diosman graciasta korka. T'antata partispataj yachacojcunaman jaywarka. Nerkataj:

—Cayta jap'iychet miqhuychejtaj. Cayka cuerpo y ninacun, —nispa.

<sup>27</sup> Chanta copata jap'ispa Diosman graciasta korka. Ajinaspataj yachacojcunaman jaywaspa nerka:

‡ 26:17 Ninayan.

—Tucuuniyquichej cay copamanta ujyaychej. <sup>28</sup> Cay ujyanaka yawarniy ninacun. Jich'aska canka Diospa mosoj traton atiyniyoj cananpaj. Chayraycu causayniya churani ashqha runaspa juchasnincuta wiñaypaj khechunaypaj. <sup>29</sup> Chekamanta cay uvasmanta ruwaskata manaña ujyasajñachu kancunawan uj p'unchaycama. Chaypacha ujtawan mosoja ujyasaj kancunawan cusca Dios Tatay camachin, chaylapiña,—nispa.

*Jesús willan Pedro quinsa cutita negananta*

<sup>30</sup> Diosta yupaychanapaj taquiyawantaj Olivos orkoman riporkancu.

<sup>31</sup> Chanta Jesuska yachacojcunanta nerka:

—Cunan tuta tucuuniyquichej nokata sakerpayawanquichej. Imaray-cuchus Diospa palabranpi nin: “Michejta wañuchisaj. Ovejastaj tropamanta ch'erkeraskas cankancu”. <sup>32</sup> Wañuymanta causarimusparí Galileaman ñaupakeyquichejta risaj.

<sup>33</sup> Pedrotaj Jesusman cuticherka:

—Tucuynincu kanta sakerpayancuman chayka, nokaka manapuni jayc'ajpis sakerpayaskayquichu,—nispa.

<sup>34</sup> Jesuska payman nerka:

—Niyqui chekamanta cunan tutapacha manaraj gallo wakashajtin nokata mana rejsiwaskayquita quinsa cutita ninqui.

<sup>35</sup> Pedrotaj nerka:

—Kanwan cusca wañunay cajtinpis manapuni nisajchu kanta mana rejsisuskaytaka,—nispa.

Tucuynin yachacojcunapis quiquinta nerkan.

*Jesús Diosmanta mañacun Getsemanipi*

<sup>36</sup> Chaymanta Jesuska paycunawan Getsemani huertaman chayamorka. Yachacojcunamantaj nerka:

—Caypi tiyariyuychej noka jakaynejman rispa Diosmanta mañacunaycama,—nispa.

<sup>37</sup> Chaymanta Pedrotawan Jacobotawan Juantawanpis pusaricuspataj sinch'ita llaquicaporka maytataj phuticuya kallarerka. <sup>38</sup> Chanta paycunaman nerka:

—Manchay llaquiska cani, llaquiywantaj wañunayashaniña. Caypi suyaychej. Nokawan cusca rijch'ariskastaj wakaychacuychej.

<sup>39</sup> Uj tumpatawan ñaupaspa uyan pampacama c'umuycorka. Diosmanta mañacuspataj nerka:

—Munaska Tatáy, cay ñiac'ariypi wañunayka sichus aticun chayka, ama cachunchu. Astawanpis cayka mana nokaj munayniychu cachun. Manachayrí kanpa munayniyqui ruwaska cachun,—nispa.

<sup>40</sup> Quinsa yachacojcunan casharkancu, chayman cutimuspataj Jesuska paycunata puñushajta tariparka. Chaymanta Pedrota nerka:

—Ajinaka ñanachu uj ratullatapis nokawan cusca rijch'ariska wakaychacuya atinquichej? <sup>41</sup> Sumaj rijch'ariskas wakaychacuychej Diosmanta mañacuychejpuni ama juchaman urmachiskas canayquichejpaj. Chekamanta kancunaka allin cajta ruwayta munanquichej. Caypajrí mana callpayojochu canquichej,§ —nispa.

<sup>42</sup> Ujtawan rerka Diosmanta mañacuspataj nerka:

---

§ **26:41** Literal: Espirituyquichej munan; aychayquichejrí mana atinchu.

—Munaska Tatáy, cay sinch'i ñac'ariypi wañunaypuni cashan chayka, kanpa munayniyqui ruwaska cachun, —nispa.

<sup>43</sup> Ujtawan cutimuspa paycunata puñushajllatataj tariparka puñuywan atipaskas caskancuraycu. <sup>44</sup> Paycunata sakespa quinsa cutitaña watejmanta Diosmanta mañaricoj rerka. Chaypipis quiquin palabrasllawantaj ujtawan mañacorka. <sup>45</sup> Chantaña yachacojcunanman cutimuspa paycunata nerka:

—¿Puñushallanquichejpunichu? Puñucullaychej. Uyariwaychej, horaka chayamunña. Noka, Diospa cachaska Runan, juchasapspa maquisnincuman jaywaskaña cashani. <sup>46</sup> Jataricuychej. Jacu ripuna. Khawaychej jaywaycuwajniyka kayllamushanña, —nispa.

*Jesusta jap'ispapancu*

<sup>47-48</sup> Jesús parlashajtillanraj Judaska may ashqha runaswan kayllaycamorka. Payka chay chunca iscayniyoj Jesuspa yachacojcunanmanta carka. Chay ashqha runastaj jatuchej t'ujsina cuchilloswan,\* makana c'aspiswantaj jamorkancu cachamuska israel curajcunamanta yupaychana-wasimanta curajcunamantawan. Jaywaycojtaj chay ashqha runasta yachaycucherka:

—Pitachá noka napaycuspua much'aycusaj, chay runata jap'iycuychej, —nispa.

<sup>49</sup> Judaska Jesusman kayllaytawan payta nerka:

—Allin ch'isi cachun, Yachachiwajníy.

Chaymantataj Jesusta may munacuywanjina much'aycorka.

<sup>50</sup> Jesustaj nerka:

—Amigo, ¿imapajtaj jamunquirí?

Chanta Jesusman kayllaycamuspa payta jap'iycorkancu.

<sup>51</sup> Ajinapi Jesuswan cajcunamanta ujnin caj jatun cuchillonta† siq'iycorka. Yupaychana-wasimanta curajpa camachinta wajtaspa ningrinta c'uturparerka. <sup>52</sup> Chanta Jesuska chay wajtajta nerka:

—Cuchilloyquita wakaychananman churay. Yachanchej cuchillowan‡ makanacojcunaka cuchillollawantaj wañuchiskas caskancuta. <sup>53</sup> Noka atiyman Dios Tataymanta mañacuyta.

Paytaj chay ratu janaj pachamanta chunca iscayniyoj waranka warankas angelesta churapuwanman. ¿Cayta manachu reparanqui?

<sup>54</sup> Diospa palabran nin ajina junt'acunan tiyan. Manachayka ¿imaynataj junt'acunan? <sup>55</sup> Chaypacha Jesuska ashqha runasman nerka:

—¿Uj runa wañuchi suwatajinachu nokata jap'ej jamuwanquichej? ¿Chayraycchu jatun cuchilloswan§ makana c'aspiswan jamunquichej? Nokaka sapa p'unchay yupaychana-wasi patiopi yachacherkani. Kancunari mana jap'iycuwarkanquichejchu. <sup>56</sup> Tucuy cay ruwacushan Diospa palabranpi unay willajcunan niskancuta junt'acunanpaj, —nispa nerka Jesús.

Chanta tucuynin yachacojcunan payta sakerpayaspa aykecaporkancu.

*Jesús jatun tantacuypa ñaupakenpi*

<sup>57</sup> Jesusta jap'iycocunataj Caifaspaman pusariycorkancu. Chay Caifás yupaychana-wasimanta curaj runa carka. Paypa wasinpi tantaskas

\* **26:47-48** Literal: espadaswan. † **26:51** Literal: espada. ‡ **26:52** Literal: espada. § **26:55** Literal: espada.

casharkancu israel yachachejcunawan curajcunawanka. <sup>58</sup> Pedrorí carullamanta Jesusta khatisharka curajpa pationcama. Chay patiopitaj yanapajcunawan cusca tiyarinorka imaynapichus tucucunanta ricuya munaspa.

<sup>59</sup> Tucuy jatun tantacuycunataj Jesusta wañuchiyyta munasharkancu. Chayraycu Jesuspa contranpi llulla willajcunata masc'asharkancu. <sup>60</sup> Ashqha runas jamorkancu llullacuspa willanancupaj. Willaskan-curí manataj quiquinpunichu carka. Khepallantaña iscay willajcuna jamorkancu. <sup>61</sup> Nerkancutaj:

—Cay runa nerka: “Atiyniyoj cani yupaychana-wasita urmachinay-paj, quinsa p'unchaypitaj watejmanta wasichanaypaj”, —nispa.

<sup>62</sup> Yupaychana-wasimanta curaj runataj sayarimuspa Jesusta nerka:

—Cay runas nisuskancumanta ¿manachu cutichicunqui?

<sup>63</sup> Jesusri ch'inlla cacorka. Curajtaj payta nerka:

—Causaj Diospa sutinpi camachiyqui: “Sichus kanka Diospa ajllaska Wawan, Cristo, canqui chayka, willawaycu, ari, —nispa.

<sup>64</sup> Jesustaj payta nerka:

—Arí, niskayquimanjina, Diospa cachaska Runan cani. Cunanmantapachataj curaj atiyniyoj Dioswan cusca camachishajta ricuwanquichej, phuyus chaupipi atiyniywan janaj pachamanta jamushajtapis.

<sup>65</sup> Chanta curajka may phiñacuskanta ricuchinanpaj p'achasninta lliq'icorka. Nerkataj:

—Cay runaka Diosta cayjinata phiñachiskanta uyarerkanquichejña. Manaña waj willajcuna paymanta willanancuta munanchejchu.

<sup>66</sup> Curajcunataj tapurerka:

—Kancunaman ¿imaynataj rijch'asunquichej?

Paycunataj cutichispa nerka:

—Cay runaka wañuchiska cananpajjina cashan.

<sup>67</sup> Chanta Jesusta uyanpi thokaycorkancu. Tacaspataj payta apay-cachasharkancu. Waquinrí uyanpi sajmasharkancu. <sup>68</sup> Nisharkancutaj:

—Diospa ajllaskan Cristo canqui chayka, sut'inchaspa willawaycu ¿pitaj sajmasorka?

### *Pedro nin Jesusta mana rejiskskanta*

<sup>69</sup> Pedrorí chaycamaka jawa patiopi tiyacusharka. Ajinapitaj uj wasi camachi imilla payman kayllaycuspa nerka:

—Kanpis chay Galilea llajtayoj Jesuspa masin canqui.

<sup>70</sup> Pedrorí tucuy chay runaspa ñaupakencupi mananchacuspa nerka:

—Mana yachanichu imatachus parlashanqui, —nispa.

<sup>71</sup> Pedro puncunejman rishajtin waj camachi imilla payta ricorka. Chaymantataj chaypi caj runasman nerka:

—Cay runaka chay Nazaret llajtayoj Jesuswan purejmin, —nispa.

<sup>72</sup> Pedrorí watejmanta mananchacorka. Diospa sutinta okharicus-pataj:

—Mana rejsinichu chay runataka, —nerka.

<sup>73</sup> Uj chhicamantawan chaypi cajcuna Pedroman kayllaycorkancu. Nerkancutaj:

—Chekamanta kanka Jesuswan purejcunamanta canqui. Parlaynilayquipi sut'i cashanqui.

<sup>74</sup> Chanta Pedroka kallarerka niyta:

—¡Mana chekata parlani chayka, Dios wañuchiwachun! Chay runataka manapuni rejsinichu.

Chay quiquinpachataj gallo wakarka.<sup>75</sup> Chaymanta payka Jesuspa niskanta yuyaricorka: “Manaraj gallo wakashajtin quinsa cutita khesachawanqui nokata mana rejsiwaskayquita”. Ajinataj jawaman llosipa sonko nanajta wakaycorka.

## 27

### *Jesusta Pilatoman jaywaycuncu*

<sup>1</sup> P'unchayarpamojtinña yupaychana-wasimanta tucuy curajcunawan israel curajcunawan tantacorkancu. Chay tantacuyka uj yuyayllata Jesuspa contranpi ninacorkancu payta wañuchichinancuta.  
<sup>2</sup> Jesustataj wataskata pusaspa camachej Pilatoman jaywaycorkancu.

### *Judas wañupun*

<sup>3</sup> Jaywaycoj Judaska Jesusta juchachaska caskanta ricorka. Chayraycu payka sonkonpi mayta phuticorka. Chaymantataj chay jatun tantacuyman rispa quinsa chunca kolkesta cutiyuchiporka.<sup>4</sup> Payri nerka:

—Mana juchayoj runata wañunanpaj jaywaycuspa juchallicuni, —nispa.

Paycunataj nerkantru:

—¿Nokaycu ima ruwanaycu tiyanrí? Kanmantachá chayka.

<sup>5</sup> Judastaj yupaychana-wasiman kolketa wijch'uycaporka. Chaymantataj rispa sipirpayacamorka.

<sup>6</sup> Yupaychana-wasimanta curajcuna chay kolketa okharispa nerkantru:

—Camachiskanchejmanjina chay kolketa yupaychana-wasipaj mana churayta atinchejchu. Imaraycuchus uj runa wañunanpaj kolke carka, —nispa.

<sup>7</sup> Chanta parlanacuspa chay kolkewan yuyarkancu c'analleroj jallp'anta rantiyta. Chay jallp'a forasterocuna p'ampacunancupaj canan carka.<sup>8</sup> Chayraycu chay jallp'aka uj runaj wañuyninwan rantiska sutichaska carka. Cunan p'unchaycama ajina sutichaska cashan.<sup>9</sup> Ajinapi unay willaj Jeremiaspa niskanka junt'acorka. Payri Diospa palabranpi nerka: “Israelcuna quinsa chunca kolkesta jap'erkancu. Chay kolketa israelcuna uj yuyayman churacuspa korkancu Jesús jaywaska cananpaj.<sup>10</sup> Chay kolkewantaj uj c'analleroj jallp'anta ranterkancu. Chayka Diospa camachiwaskanmanjinamin”.

### *Pilato Jesusta tapun*

<sup>11</sup> Jesustari camachej Pilatoj ñaupakenman aparkancu. Paytaj Jesusta taporka:

—¿Kanchu israelcunaj camachejnincu canqui?

Jesusri nerka:

—Kan ninqui, ajinamin, —nispa.

<sup>12</sup> Jatun tantacuy runas mayta Jesuspa contranpi willasharkancu. Payri ni imata cutichicorkachu.<sup>13</sup> Chayraycu Pilatoka nerka:

—¿Imaymanata kanpa contrayquipi willacushancu? ¿Manachu uyarinqui?

<sup>14</sup> Jesusri ni uj simitapis payman cuticherkachu. Chayraycu Pilatoka mayta t'ucorka.

*Pilato juchachan Jesusta wañuchiska cananpaj*

<sup>15</sup> Sapa wata camachejka chay jatun p'unchaycunapi uj wisk'aska runata cacharejpuni caj. Chaymanjinataj mañaskancuta uj wisk'aska runata paycunapaj cacharipunan caj. <sup>16</sup> Chaypachataj uj mana allinpay rejsiska runa wisk'aska casharka. Barrabás sutiyoj. <sup>17</sup> Ashqha runas tantaska cashajtincu Pilatoka nerka:

—¿Maykentataj cacharipuskayquichej? ¿Barrabastachu chayrí Cristo niska Jesustachu?

<sup>18</sup> Imaraycuchus yacharka israelcuna evidiamanta Jesusta payman jaywaycuskancuta.

<sup>19</sup> Jesusmanta yuyashajtintaj Pilatoj warmin uj runata cachamorka ninanpaj: “Ama juchachaychu chay chekan runata. Khaway, cunan ch'isi moskoyniyipi Paynejta sinch'ita muchorkani”.

<sup>20</sup> Tantacuypu tucuy curajcuna chay runasta yachaycucherakancu. Nerkancutaj: “Barrabasta cacharipunanta mañaychej. Jesustataj wañuchiska cananta niychej”.

<sup>21</sup> Pilatotaj paycunata taporka:

—Cay iscay runasmanta ¿maykentataj cacharipuskayquichej?

Paycunataj cuticherakancu:

—Barrabasta cacharipuwaycu.

<sup>22</sup> Pilatori paycunaman nerka:

—Cristo niska, chay Jesusta ¿imanasajtajrí?

Tucuynincu cuticherakancu:

—¡Chacataska cachun payka!

<sup>23</sup> Pilatotaj nerka:

—¿Imaraycutaj? ¿Ima mana allintataj ruwarkari?

Paycunataj astawan sinch'iwan khaparerakancu:

—¡Chacataycuy paytaka!

<sup>24</sup> Pilatoka repararka chay runasta mana ch'in yachiyta atinanta. Astawan astawan ch'ajwa canayashaskanraycutaj yacuta apachimorka. Chaymantataj runaspa ñaupakencipi maquisninta mayllacorka. Nerkataj:

—Cay runaj wañuyninmanta mana juchayojochu cani. Kancuna imana-muychejis.

<sup>25</sup> Tucuynincu chay runaska cuticherakancu:

—¡Chay runaj wañuyninmanta nokaycu wawasniy cuwanpacha juchayojo casajcu!

<sup>26</sup> Chanta Pilatoka Barrabasta cachariporka paycunapaj. Jesustataj jasut'ichispa chay runasman jaywaycorka chacataska cananpaj.

<sup>27</sup> Chanta camachejpa soldadosnenka Jesusta apaycorkancu camachejpa tiyacuna-wasinman. Chaymantataj paycunaj masisnincu tantaycucorkancu Jesusta muyucuspa. <sup>28</sup> Ajinaspataj Jesuspa p'achasninta lluch'orkancu. Chanta camachejtajina puca p'achawan p'achalliycucherakancu. <sup>29</sup> Pilluta qhishcamanta simp'aspataj Jesuspa umanman churaycorkancu. Asicunancupajtaj paña maquinman camachejmanjina uj sokosta churarkancu. Paypa ñaupakenman konkoricuspa nerkanca:

—¡Viva israelcunaj camachejnincu!

<sup>30</sup> Payta thokaycorkancu. Paymanta sokosta jap'ispataj umanpi wajtasharkancu. <sup>31</sup> Payta asipayaytawanka chay puca p'achata

lluch'orkancu. Chaymantataj p'achasninta p'achalliyucupuspa pusarkancu paytaka chacatanapaj.

*Jesusta chacataycuncu*

<sup>32</sup> Soldados llajtamanta llojsishaspaka uj Cirene llajtayoj runawan tincorkancu. Paypa sutinri Simón carka. Paytataj camacherkancu Jesuspa cruzninta k'epinanta. <sup>33</sup> Ajinaspa t'oju caskan, chay Gólgota lugarmán chayarkancu. <sup>34</sup> Chaypitaj vinota jayak'ewan chajrucuspa payta korkancu ujyananpaj. Jesusri mallirispa mana ujyarkachu.

<sup>35</sup> Soldadostaj Jesusta chacatarkancu. Chanta suerteta chokarkancu yachanancupaj pipajchus Jesuspa p'achasnin cananta. Ajinapi unay willajpa niskanka Jesusmanta junt'acorka: "Suertesta chokaspa p'achasniya partinacorkancu". <sup>36</sup> Chaypi soldadoska tiyaycucuspa sumajta khawasharkancu. <sup>37</sup> Jesuspa umanpa patannejpitaj uj kelkaskata churarkancu imamantachus chacataska caskanta willanancupaj. Chaytaj nin: "Caymin Jesuska, israelcunaj camachejnín".

<sup>38</sup> Chaypitaj Jesuswan iscay runa wañuchi suwas chacataska casharkancu. Uj suwaka paypa pañannejpi, uj caj suwataj llok'ennejpi casharka. <sup>39</sup> Chayninta purejcunataj millayta c'amisharkancu payta. Umancuta qhiwirispa asipayanancupaj <sup>40</sup> nisharkancu:

—¡Kanka, yupaychana-wasita urmachej, chaymanta quinsa p'unchaypitaj watejmanta sayarkochej, quiquiriquita cacharichicuy! Diospa Wawan canqui chayka, chay cruzmanta uraycamuy, —nispa.

<sup>41</sup> Ajinallataj yupaychana-wasimanta curajcunawan, israel yachachejcunawan, waj curajcunawan asipayasharkancu Jesusta. Ninacusharkancutaj:

<sup>42</sup> —Cay runaka wajcunata cacharicherka. Pay quiquinrí nitaj atinchu cacharichicuya. Israelcunaj camachejnincu canman chayka, cruzmanta uraycamuchun cunitan. Chayta ricuspataj nokaycupis creesajcu pay Camachej caskanta. <sup>43</sup> Diospi payka atinicorka, "Diospa Wawan cani", nispa. Chayraycu cunitan payta cruzmanta cacharichichun, sichus chekamanta Dios payta munacun chayka, —nispa.

<sup>44</sup> Paywan cusca chacataska suwaspis quiquillantataj payta c'amisharkancu.

*Jesús tucucapun*

<sup>45</sup> Chaupi p'unchaymanta chaupi tardecama tucuy jallp'a lakhayay-corka. <sup>46</sup> Chaupi tardetajinataj Jesuska sinch'ita khaparicorka:

—¿Elí, Elí lama sabactani? Khapariskan niyta munan: Diosníy, Diosníy, ¿imaraycutaj sakerpariwanquirí?

<sup>47</sup> Waquin chaypi cajcunamanta chayta uyarispa nerkanca:

—Cayka unay willaj Eliasta wajyacushan, —nispa.

<sup>48</sup> Chay quiquinpacha ujnincu paycunamanta uskhayta rispa uj esponsata jap'erka. Chayta c'allcu ujyanaman chhaporka. Chaytataj uj sokosman churaspa Jesusman jaywarka ch'onkananpaj. <sup>49</sup> Waquinrí nisharkancu:

—Suyay. A ver, ricusunchej, Elías jamonkachus payta cruzmanta cacharichej.

<sup>50</sup> Jesús watejmanta sinch'ita khaparicorka. Causayninta tatanpa maquisninanman jaywaycuspataj tucucaporka. <sup>51</sup> Yupaychana-wasipi

warqhuska caj khatanaka patamanta uracama iscayman lliq'icorka. Jallp'ataj qharcatiterka. Rumispis quichacorkancu.<sup>52</sup> P'ampanas quicharicorkancu. Diospi jap'icuspa wañuska cajcunajta ashqhaspata ayasnincu causarichiskas carkancu.<sup>53</sup> Paycunaka p'ampanasmanta llojsiporkancu. Jesús causarimuskanmantataj Jerusalén llajtaman jamorkancu. Chaypitaj ashqha runasman riqhurerkancu.

<sup>54</sup> Romano camachej, soldadosninwan, Jesusta wakaychasharkancu. Paycunataj jallp'a qharcatishajta chay waj imas ruwacushajtawan ricorkancu. Chayraycu mayta manchachicuspa nisharkancu:

—Chekamanta cay runaka Diospa Wawan carka,—nispa.

<sup>55</sup> Chaypi casharkancu ashqha warmis caritullamanta khawacamusharkancu. Paycunari Jesusta Galilea jallp'amanta khatimoj carkancu payta yanapanancupaj.<sup>56</sup> Paycuna uqhu carkancu Magdala llajtayoj María, Jacoboja Josejtawan mamancu, waj Mariapiwan. Chaywanpis Zebedeoj wawasninpa mamancupis paycuna uqhupi carka.

### *Jesusta p'ampancu*

<sup>57</sup> Ch'isiyaycojinña uj khapaj runa, José sutiyoj, jamorka Arimatea ranchonmanta. Paypis Jesusta khaticojcunamanta carka.<sup>58</sup> Payka Jesuspa cuerpoints mañaj Pilatoman rerka. Chanta Pilatoka camacherka soldadosta Joseman jaywanancuta.<sup>59</sup> Josetaj cuerpoints apacapuspa okharerka. Linomanta uj llimphu awaskawan mayt'orka.<sup>60</sup> Paypata carka uj mosoj aya p'ampana. Chaytaka pay uj jatun kakapi unayña ruwachicorka. Chayman Jesuspa cuerpoints churaycorka. Chaymantataj chay puncuman uj jatun p'alta rumita muyuchispa wisk'aycorka. Ajinaspataj riporka.<sup>61</sup> Chaypitaj casharkancu María Magdalenawan chay uj caj Mariapiwan. Paycunaka chay p'ampanaj chimpannejpi tiyaycusharkancu.

### *Soldadosta churancu Jesúspa p'ampaskanta wakaychanancupaj*

<sup>62</sup> Israelcunaj samacuna p'unchaynincupaj waquichicunancu caj. Samacuna p'unchaypitaj yupaychana-wasimanta curajcunawan fariseo partepiwan tantaycucorkancu. Chaymantataj Pilatojman rispa<sup>63</sup> nerkan:

—Señor, chay pantachej runaka causashaspallaraj, “Wañuskaymanta quinsa p'unchaymanta causarimpusaj”, niskanta yuyaricuyu.<sup>64</sup> Chayraycu camachiy p'ampananta sumajta wakaychanancuta quinsa p'unchaycamallapis. Yachacojcunanspis cuerpoints suwaj jamushancumanchá. Paycunaka suwaytawan runasman nincuman: “Wañuskacunamanta causarimporka”, nispa. Cay pantachiyyka chay ñaupaj pantachiymanta aswan mana allinchu canman.

<sup>65</sup> Pilatoka paycunata nerka:

—Cay soldadosta pusacuychej. Riychej. Atiskayquichejta p'ampananta sumajta wakaychamuychej,—nispa.

<sup>66</sup> Ajina paycunaka rerkancu. P'ampana rumita sumajta wisk'arkancu ama ni pi t'ojojinanpaj. Soldadostataj wakaychanancupaj churarkancu.

<sup>1</sup> Samacuna p'unchay k'ayantin Domingo p'unchay sut'iymusharka. Ajinata Magdala llajtayoj Mariawan chay uj caj Mariapiwan sepulturaman khawaj jamorkancu. <sup>2</sup> Jallp'ataj mayta qharcatiterka. Chayka carka Señor Diosmanta cachamuska uj angel janaj pachamanta uraycamuskanraycu. P'ampanaman kayllaycuspas chay jatun rumita wajnejman muyurparicherka. Chay rumi patapitaj tiyaycucorka. <sup>3</sup> Rijch'acuynenka lliuj-lliujjina c'ancharisharka. P'achasnintaj rit'ijina yuraj carka. <sup>4</sup> P'ampanata wakaychajcunataj manchaymanta qharcatisharkancu wañuskajinataj tucorkancu. <sup>5</sup> Diosmanta angeltaj chay warmista nerka:

—Amaña manchachicuychejchu. Yachani kancunaka chacataska carka, chay Jesusta masc'ashaskayquichejta. <sup>6</sup> Payka manaña caypichu imaraycuchus niskanmanjina causarimporka. Jamuychej Jesuspa wañuska cuerpon churaska carka, chayta khawanayquichejpaj. <sup>7</sup> Yachacojcunanman uskhayta riychej. Willamuychej Jesuska wañuskanmanta causarimpuskantaña. Cunantaj kancunaj ñaupakeyquichejta Galilea jallp'aman rishanña. Jakaypitaj payta ricunquichej. Chayta kancunaman nerkyayquichej nimunayquichejpaj, —angel nerka.

<sup>8</sup> Warmistaj p'ampanamanta uskhay uskhayllata riporkancu. Paycunataj manchay manchaylla jatun cusiywantaj riporkancu. Correrkan-cutaj yachacojcunanman willaj. <sup>9</sup> Ajinallapi Jesuska paycunaman riqhurerka. Napaycorkataj:

—Buenos días, mamacuna, —nispa.

Paycunataj Jesusman kayllaycuspas chaquisninta mayta jap'iycorkancu. Ajinaspataj payta yupaycharkancu. <sup>10</sup> Chanta Jesuska paycunata nerka:

—Amaña manchachicuychejchu. Riychej hermanosniyman willam-puwaychej Galileaman rinancuta. Jakaypi tincuwankancu, —nispa.

### *Soldadospa willaskancu*

<sup>11</sup> Chay warmis rishajtinctaj waquin wakaychajcunaka llajtamán jamorkancu. Jamuspataj paycunaka tucuy ima ruwacuskanta yupaychana-wasimanta curajcunaman willarkancu. <sup>12</sup> Chaycunallataj curajcunapiwan tantaycucuspa wakaychajcunaman kolketa konancupaj yuyaychanacorkancu. Ajinataj ashqha kolketa orkhucuspa wakaychajcunaman lluq'iycorkancu. <sup>13</sup> Nerkancutaj:

—Niychej curajcunaman: Nokaycu puñuskas cashaskaycuycamaka Jesuspa yachacojcunan tuta jamuskancu. Cuerpontataj suwacupuskancu. <sup>14</sup> Jatun camachej cayta yachanman chayka, nokaycu paywan parlasajcu kancunapaj allin cananpaj. Kancunaka mana llaquicunayquichejchu canka, —nispa curajcuna nerkanca.

<sup>15</sup> Ajinataj wakaychajcuna kolketa jap'icorkancu. Yachaycuchiskancumanjinataj nerkanca. Chay parlayta israelcunaka cunancama parlancu.

### *Jesús camachin cachasninta yachachimunancupaj*

<sup>16</sup> Chunca ujniyoj yachacojcunanka Galilea jallp'aman rerkancu. Jesús rinancuta camacherka, chay orkoman rerkancu. <sup>17</sup> Jesusta ricuytawan yupaycharkancu. Waquinrí iscayrayasharkancu. <sup>18</sup> Jesustaj paycunaman kayllaycuspas nerka:

—Janaj pachapipis cay pachapipis camachinaypaj Dios Tatay tucuy atiyta kowan.<sup>19</sup> Chayraycu kancunaka riychej tucuy runasman. Paycunata yachachimuychej yachacojcunay canancupaj. Dioospata caskancuta ricuchispa bautizaychej Dios Tataj sutinpi, nokaj, Dios Wawaj sutiyipi, Santo Espíritoj sutinpiwan.<sup>20</sup> Jap'icojcunatataj sumajta yachachimuychej tucuy camachiskayta ruwanancuta. Reparaychej nokaka sapa p'unchay kancunawanpuni casaj cay pacha tucucuycama. Ajina cachun.

## EL SANTO EVANGELIO SEGUN SAN MARCOS

*Marcosmanjina Jesucristomanta sumaj willanas*

<sup>1</sup> Diospa Wawan Jesucristomanta sumaj willanaska cayjinata kallari-cun. <sup>2</sup> Dios unay willajnin Isaiaspa kelkaskanpi willarka Wawan Cristota cachamunanta. Wawan jamunanpajtaj willajninta cachamunanta nerka, runaspa sonkoncuta waquichinanpaj. Willajnintaj ñaupajta jamunan carka. <sup>3</sup> Paymantataj nin:

Ch'in pampapi uj runa khaparishan:

“Uj jatun camachej jamojtin runas ñanninta waquichincu, purinasnintapis chekanta ruwancu.

Ajinallatataj sonkoyquichejta Diospa Wawan jamunanpaj waquichicuy-chej”, nispa.

<sup>4</sup> Ajinataj bautizaj Juanka ch'in pampapi riqhurimorka. Runasmantaj willaspa nerka:

—Juchasniyquichejta k'alata sakespa bautizacuychej. Chaywan ricuchinquej Diosman cutiricus kayquichejta juchasniyquichejta pay khechunapaj, —nispa.

<sup>5</sup> Ashqha runas tucuy Judea jallp'amanta Jerusalén llajtamantapis payta uyarinancupaj chayamoj cancu. Juchasnincuta willacojtinctutaj Jordán mayoj yacusninpí Juanka paycunata bautizaj.

<sup>6</sup> Juantaj camello millmamanta p'achawan p'achallicoj. Kara chumpi-wantaj chumpicoj. Langostasta monte misq'itawan miqhoj. <sup>7</sup> Payka willaraj:

—Khepayta nokamanta uj aswan atiyniyoj jamushan. Nokaka mana paypa camachinpajjinallapischu cani, runalla caskayraycu. <sup>8</sup> Nokaka yacullawan bautizashayquichej. Payrí kancunata bautizaspa Santo Espirituta cachamusonkachej Diosllapaj causanayquichejpaj, —nispa.

### *Juan bautizan Jesusta*

<sup>9</sup> Chay p'unchaycunapi Jesuska Nazaret llajtamanta jamorka. Nazaretka Galilea jallp'api carka. Juantaj Jordán mayupi payta bautizarka. <sup>10</sup> Yacumanta llojsimushaspataj Jesuska ricorka janaj pachata quicharicushajta. Santo Espiritutapis paloma ríjch'aypi payman uraycamushajta ricorka. <sup>11</sup> Janaj pachamanta Diostaj nimorka:

—Kanmin munaska Wawayka canqui. Kanwanmin may cusiska cani, —nispa.

### *Jesús ch'in pampaman pusaska*

<sup>12</sup> Khepanpachataj Santo Espíritu sumaj callpanwan Jesusta ch'in pampaman pusarka. <sup>13</sup> Tawa chunca p'unchaycunata cacorka, q'ita animale-spis cancu, chaypi. Supay Satanasri tucuy imata ruwasharka Jesusta juchallichinanpaj. Manataj payta juchallichiyta aterkachu. Diospa angelesnintaj jamuspa Jesuspa pisichuskanta jaywarkancu.

### *Jesús willaran Galilea jallp'api*

<sup>14</sup> Bautizaj Juanta jap'iycuspa wisk'achiskancumantaña Jesuska Galilea jallp'aman rerka. Chaypi Diospa sumaj willanasninta willararka. <sup>15</sup> Nerkataj:

—Diospa ajllaskan p'unchayka cunan chayamushanña. Cunan payka munacoj Camachejniyquichej canka. Chayraycu juchasniyquichejta sakespa payman cutiricuychej sumaj willanasnintataj japi'cuychej, —nispa.

*Jesús wajyan ñaupaj caj yachacojcunanta*

<sup>16</sup> Jesuska Galilea kocha cantonnejta purishaspa ricorka Simonta wauken Andrestawan. Paycunaka challwasta japi'ncupaj ch'ipasta kochaman churasharkancu, challwiris caskancuraycu. <sup>17</sup> Jesusri paycunata nerka:

—Nokawan jamuychej. Kancuna challwa japejcuna cashanquichej. Cunanmantapachataj Diosman runasta pusamojcuna cayta yachachiskayquichej, —nispa.

<sup>18</sup> Chay quiquinpachataj ch'ipasnincuta sakerpayaspa Jesusta khaticorkancu yachacojcunana canancupaj.

<sup>19</sup> Tumpatawan riskanpitaj Jesús ricorka Zebedeoj wawasninta. Paycunaka Jacobo wauken Juanwan carkancu. Ch'ipasta t'irispataj barconcupi casharkancu. <sup>20</sup> Jesusri paycunatapis wajyarka yachacojcunana canancupaj. Ajinapi paycunaka Jesusta khaticorkancu tatancu Zebedeota sakespa. Llanc'ajcunapis Zebedeowan barcopi carkancu.

*Jesús supayniyoj runata thañichin*

<sup>21</sup> Jesús yachacojcunanan Capernaum llajtaman chayarkancu. Samacuna p'unchay cajtintaj Jesuska tantacuna-wasiman yaycuspa runasta yachachiyta kallarerka. <sup>22</sup> Paycunataj yachachiskanmanta t'ucorkancu niskasnin atiywan caskanraycu. Manataj israel yachachejcunajinallachu yachacherka. <sup>23</sup> Jesús yachachishajtintaj uj millay supayniyoj runa riqhurimuspa tantacuna-wasincipi khaparerka:

<sup>24</sup> —Jesús Nazaret llajtayoj ¿imamantaj chapucuwaycu? ¿Tucuchinawaycupajchu jamunqui? Sumajta yachani pichus caskayquita. Kan Diospa santo Cajninmin canqui, —nispa.

<sup>25</sup> Jesusrí sinch'iwan camacherka supayta:

—¡Ch'in cay! Llojsiy paymanta, —nispa.

<sup>26</sup> Chay millay supayri runata t'ucuta japi'cherka. Sinch'ita kha-parichispataj supayka paymanta llojserka. <sup>27</sup> Tucuy chaypi cajcunari mayta t'ucorkancu tapunacusharkancutaj:

—¿Imataj cayrí? ¡Cayka waj mosoj yachachiymin atiyniyojtaj! Chaywanpis supaycunatapis camachin, paytataj casuncu, —nispa.

<sup>28</sup> Jesusmantataj tucuynejpi runas uskhayta uyarerkanca, tucuy Galilea jallp'a muyuynintinpi.

*Jesús thañichin ashqha onkoska runasta*

<sup>29</sup> Chaymanta tantacuna-wasimanta Jesús llojserka Jacobowan Juanwan. Yaycorkancutaj Simonpa Andrespawan wasincuman. <sup>30</sup> Simonpa suegranka sinch'i k'oñi onkoywan siricusharka. Jesús yaycuskantawan-taj chaypi cajcuna payman onkoskamanta willarkancu. <sup>31</sup> Jesustaj payman kayllariytawan maquinmanta japi'ispa jataricherka. Chay quiquin-pachataj k'oñi onkoymanta thañichiska carka. Miqhunataj paycunaman jaywarka.

<sup>32</sup> Ch'isiyacuya inti yaycuskamantaña runaska tucuy onkoyniyo-jcunatawan supayniyojcunatawan Jesusman pusamorkancu. <sup>33</sup> Chay

llajta runastaj tucuynincu wasi puncuman tantacamorkancu.<sup>34</sup> Ashqha onkoska runasta tucuy laya ñac'arichiskasta Jesuska thañicherka. Ashqha runasmantataj supaycunata kharkorka. Supaycunari payta rejserkancu. Chayraycu Jesuska mana parlarejta sakerkachu.

*Jesús Galileapi willaraspa purin*

<sup>35</sup> Tutallataraj manaraj sut'iyamuya Jesús jatarispa llojserka. Ch'innejman rispataj jakaypi Dios Tatanwan parlasharka mañacuypi.

<sup>36</sup> Simonri chay waj yachacojcunawan Jesusta masc'amoj llojserkancu taripanancucama.

<sup>37</sup> Payta tarispataj nerkanca:

—Yachachejný, tucuy masc'ashasuncu, —nispa.

<sup>38</sup> Payri nerka:

—Jacu rina kayllapi caj llajtasman chaypi willaranaypaj. Chaypajmin cay pachaman jamorkani, —nispa.

<sup>39</sup> Ajinamanta tucuy Galilea llajtasman rispa tantacuna-wasisnincipi Jesús willaraj. Runasmanta supaycunatapis kharkoj.

*Jesús uj lepra onkoyniyoj runata thañichin*

<sup>40</sup> Uj cuti Jesusman jamorka uj manchay lepra onkoyniyoj runa. Konkoricuspa mayta mañacorka:

—Sichus munanqui chayka, thañichiway. Yachani atiyniyoj caskayquita, —nispa.

<sup>41</sup> Jesustaj may qhuyacuywan payta jap'irerka. Nerkataj:

—Munani. Thañiskaña canqui, —nispa.

<sup>42</sup> Onkoyniyoj runataj chay quiquinpacha thañiska carka.<sup>43</sup> Sinch'ita camachispas Jesús payta cachaporka. Nerkataj:

<sup>44</sup> —¡Uyariway! Ama ni pimanpis thañichisuskaymanta willaychu. Astawanrí chekanta riy Jerusalenman yupaychana-wasipi ruwanayojman. Kan quiquipuyqui sumajta khawachicamuy paywan. Chaymanta Moisespa camachiskanmanjina jaywanata komuy. Ajinapi thañicuskayquita yachaconka, —nerka Jesús.

<sup>45</sup> Payrí llojsipuspaka Jesusmanta anchata willarayta kallarerka. Thañicuskanmantapis tucuynepi parlasharka. Chayraycu Jesuska pacayllamantaña llajtasman yaycoj. Llajta jawa ch'innejcunapitaj cacoj. Chaywanpis tucuynemanta runas payman jamullarkancupuni.

## 2

*Jesús thañichin mana cuyurej runata*

<sup>1</sup> Khepata ujtawan Capernaum llajtaman Jesús cutiporka. Runastaj uyarerkanca wasipi cashaskanta. <sup>2</sup> Chayraycu ashqha runas payman tantaycacamorkancu. Ajinapitaj campoka manaña carkachu puncu jawapipis. Jesustaj paycunaman Diospa niskanta willasharka.

<sup>3</sup> Chaypachitataj tawa runas riqhurimorkancu uj mana cuyurej runata Jesusman wantumuspa. <sup>4</sup> Chay ashqha runas chaypi cashaskancuraycutaj Jesusman chimpaycuchiyya mana aterkancuchu. Chayraycu tejasta orkhorkancu wasi patapi uj jusc'uta ruwanancupaj Jesús casharka chay chekanpi. Chay jusc'uejtataj mana cuyurej runata callapunpi wantuspa Jesuspa ñaupakenman uraycucherkanca. <sup>5</sup> Jesuska cayta ricuspa repararka paycuna tucuy sonkowan creeskancuta onkoskata pay thañichinanta. Chayraycu runaman nerka:

—Wawáy, juchasniyqui kanmanta khechuskaña, —nispa.

<sup>6</sup>Waquin israel yachachejcunamanta chaypi tiyashajcuna sonkoncupi tanteyacusharkancu:

<sup>7</sup>—¿Imaraycutaj cay runaka ajinata parlashanrí? ¡Diosta phiñachishan! Dioslla juchasta khechuytaka atin, —nispa.

<sup>8</sup>Jesuska sonkonpi paycunaj tanteyacuskancuta yachaspa nerka:

—Amaña sonkoyquichejpi ajinata tanteyacuychejchu. <sup>9</sup>Cay runaman nejtiy “juchayqui khechuskaña” nispaka, mana ricunquichejchu chekachus manachus caskantaka. Astawanrí cay mana cuyurej runata jatarichiymán chayka, ricuwajchej. <sup>10</sup>Noka, Diospa cachaska Runan caspa, cay pachapi atiynyijoj cani juchasta khechunaypaj. Chayta yachanayquichejpaj, cay mana cuyurej runata nini: <sup>11</sup>Kanta niyqui: Jataricuy, callapuyquita okharispa ripuy wasiyquiman, —nispa.

<sup>12</sup>Chay quiquinpachataj tucupa ñaupakencupi mana cuyurejka jatarerka. Callapunta okharispataj llojsiporka. Ajinamanta tucuy runas mayta t'ucorkancu. Diosta yupaychaspataj nisharkancu:

—¡Manapuni ni jayc'ajpis cayjinataka ricorkanchejchu! —nispa.

### *Jesús wajyan Levita yachacojininpaj*

<sup>13</sup>Ujtawan Galilea kocha cantoman Jesús llojserka. Tucuy chay may ashqha runastaj payman jamorkancu, paycunatataj yachachisharka.

<sup>14</sup>Chaymanta Jesús purishaspa Alfeoј wawan Levita ricorka impuesto jap'inanpi tiyashajta. Payta nerktaj:

—Yachacojniy cay, —nispa.

Levitaj jatarispa Jesusta khaticorka.

<sup>15</sup>Wasinpitaj miqhunapaj Jesús tiyacusharka yachacojcunanwan. Paycunawan ashqha impuesto jap'ejcunapis juchasapaspaј khawaska runaspiwan tiyacusharkancu, ashqhas paycunamanta Jesusta khaticuskancuraycu. <sup>16</sup>Juchasapaswan, impuesto jap'ejcunawan miqhushajta ricuspataj, waquin israel yachachejcuna fariseo partemanta yachacojcunanta taporkancu:

—Yachachejniyquichej impuesto jap'ejcunawan, juchasapaswan cusca miqhun. ¿Imaynataj cayrí?

<sup>17</sup>Chayta uyarispa Jesús paycunaman nerka:

—Onkoska runaslla medicotaka munancu, manataj sano runaska. Mana jamorkanichu chekan cajcunata wajyaj. Manachayrí juchasapaswa wajyaj jamorkani, paycuna sajra ruwaskasnincuta sakespa Diosman cutircunancupaj, —nerka Jesús.

### *Jesuspa mosoj yachachinanmanta*

<sup>18</sup>Bautizaj Juanpa yachacojcunan fariseocunawan ñaupa yachachinanjiná ayunaj cancu. Runastaj Jesusman jamuspa payta taporkancu:

—Juanpa yachacojcunan fariseocunaj khatejcunancupis ajllaska p'unchaycunapi ayunancu. ¿Imaraycutaj kanpata mana ayunancuchu paycunajina?

<sup>19</sup>Jesustaj paycunaman cuticherka:

—Casamiento wajyaskacunaka casaracoj khari paycunawan cashanancama cusiywan miqhuncupuni. <sup>20</sup>Khepan p'unchaycunapi casaracoj khareka paycunamanta khechuska canka. Chaypacha yachacojcunayka phutiýwan mana miqhonkancuchu. —nerka Jesús.

### *Mosoj yachachiyinmanta quiquinchanas*

**21** Jesustaj nerka:

—Sichus pipis uj mauc'a p'achaman uj manaraj k'entiska remienda siranman chayka, mosoj remiendo mauc'a p'achata aysaspa astawan llip'inman. **22** Sitajchus pipis mosoj pokoshaj vinota mauc'a vino churana karasman churanman chayka, pokoshaj vinoka phatarparichinman mauc'a karastaka. Ajinamanta vinoka usunman vino churana karaspis usullanmantaj. Astawanpis mosoj vinotaka mosoj karasman churana tiyan. [Ajinallataj mosoj yachachiypipis mosoj ruwanas canan tiyan\* —nerka Jesús.

*Jesús parlan samacuna p'unchaymanta*

**23** Uj samacuna p'unchaypi Jesús trigo chajra chaupinta risharka. Purin purintaj yachacojcunara trigo umasta muruyta kallarererkancu.

**24** Fariseosrí Jesussta taporkancu:

—¡Uyari! ¿Imaraycutaj yachacojcunayqui samacuna p'unchaypi chay mana ruwana cajta ruwashancú?

**25** Jesusri cuticherka:

—¿Manachu leerkanquichej unay tatayquichej Davidpa ruwaskan-manta? Chay p'unchaycunapeka yupaychana-wasimanta Abiatar curajka casharka. Davidka runasnинwan ima pisichicuspa yarkhachicorka. **26** Chayraycutaj yupaychana-wasiman yaycorka. Abiatarka Diosman t'akaska t'antata Davidman korka. Camachiskapeka nin, chay t'antataka yupaychana-wasipi ruwanayojcunalla miqhunancuta. Davidrí chay t'antata miqhuycorka runasnинmanpis kollarkataj,—nispa.

**27** Fariseosmanri Jesuska nerka:

—Runaj allinninpajmin Dioska samacuna p'unchayta churarka. Manatay samacuna p'unchayta jatunchanallanpajchu runata ruwarka.

**28** Nokari, Diospa cachaska Runan, atiyniyoj cani camachinaypaj imat-achus ruwanata samacuna p'unchaypipis,—nispa.

### 3

*Jesús thañichin maquin wañuska runata*

**1** Jesuska ujtawan tantacuna-wasiman yaycorka. Chaypitaj uj maquin wañuska runa carka. **2** Chaypi cajcunamanta waquinri Jesussta sinch'ita khawasharkancu. Samacuna p'unchaypi runata thañichinmanchus manachus, chayta munasharkancu yachayta. Chayraycutaj watekasharkancu imallapipis payta juchachanancupaj.

**3** Jesusri maquin wañuska runata nerka:

—Sayaricuy runaspa ñaupakencupi,—nispa.

**4** Watekaj runasman nerkataj:

—Ujta tapuriyquichej. ¿Samacuna p'unchaypi imatataj runa ruwanan tiyan? ¿Allin cajtachu chayrí sajra cajtachu? ¿Runasta yanapanatachu chayrí paycunata wañuchinatachu?

Paycunataj ch'inlla carkancu.

**5** Jesuska phiñacuywan ujta ujta khawarka rumi sonkoyoj caskancuray-cutaj llaquicorka. Maquin wañuska runatataj nerka:

—Maquiyquita aysariy,—nispa.

Maquinta aysariskantawantaj thañicaporka. **6** Tantacuna-wasimanta fariseoska llojsiytawancamataj Herodesta khatejcunawan

\* 2:22 Ninayan.

tantacorkancu. Paycunaka Jesuspa contranpi parlanacorkancu imaynamantapis payta tucuchinancuta.

*Jesús ashqha runasta thañichin kocha cantopi*

<sup>7</sup> Ajinamanta Jesús yachacojcunanwan riporka Galilea kocha kayllanejman. May ashqha runastaj Galilea jallp'amanta payta khaterkancu. <sup>8</sup> Jamorkancutaj Judea jallp'amanta, Jerusalén llajtamanta, Idumea jallp'amantawan. Aswan carumantapis jamullarkancutaj, Jordán mayu chimpamanta, chaywanpis Tiro, Sidon llajtaspa muyuynincumantawan. Chay may ashqha runas jamorkancu Jesusman ruwaskasninemanta uyariskancuraycu. <sup>9</sup> Runas q'isquicamojtinctaj Jesús yachacojcunanman nerka:

—Barco waquichiska cashachun runas ama ñit'imunawancupaj, —nispa.

<sup>10</sup> Jesuska ashqhasta thañicherka. Chayraycu tucuy onkoywan ñac'arichiskaska q'isquinacamorkancu payta llanqharinancupaj. <sup>11</sup> Millay supaycunataj Jesusta ricuytawan chaquisninman konkoricorkancu khaparerkancutaj:

—Kan Diospa Wawan canqui, —nispa.

<sup>12</sup> Jesusri chay millay supaycunata sinch'ita camacherka pichus pay caskanta ama sut'inchanancuta.

*Jesús ajllan chunca iscayniyoja cachasnín canancupaj*

<sup>13</sup> Jesuska orkoman wichererka, chaymantaj khatejcunanmanta munayninmanjina ajllaskacunata wajyarka. Paycunataj payman kayllarkancu. <sup>14</sup> Chunca iscayniyotataj churarka cachasnín canancupaj. Paycunata munarka paywan cusca cacunancupaj. Yuyaskanmanjina sumaj willanasta willaraj cachananpaj ima munarka. <sup>15</sup> Atiyninwanpis millay supaycunata kharkonancupaj paycunata wajyarka. <sup>16</sup> Cay chunca iscayniyoja cachasnín canancupaj churarka: Simonta, paytari Pedrota, Jesús suticharka; <sup>17</sup> Zebedeoj wawasnin, Jacobota wauken Juantawan, paycunatari “Boanergesta”, Jesús suticharka, truenojina caskancuraycu; <sup>18</sup> Andresta, Felipeta, Bartolometa, Mateota, Tomasta; Alfeojo wawan Jacobota, Tadeota; zelote partemanta Simonta; <sup>19</sup> Judas Iscariotetawan. Payka khepata Jesusta jaywaycorka.

*Jesuspa atiyninmanta tapuncu*

Jesús wasiman riporka. <sup>20</sup> Ujtawantaj ashqha runas tantaycamorkancu. May ashqhapuni caskancuraycuri Jesuswan yachacojcunanwanka ni miqhuytapis aterkancuchu. <sup>21</sup> Ayllusnintaj chayta yachaspa jamorkancu Jesusta jap'inancupaj, locoyapuska, niskancuraycu.

<sup>22</sup> Chaywanpis israel yachachejcuna Jerusalenmanta chayamuspa Jesusmanta nisharkancu:

—Paypeka cashan supaycunaj curajnincu, Beelzebú sutiyoj. Paypa atiyninwan Jesuska supaycunata kharkoshan, —nispa.

<sup>23</sup> Jesusri paycunata wajyaspa quiquinchanaswan entiendechinanpaj nerka:

—¿Imaynatataj supay Satanás payllatataj kharkocunmanrí? <sup>24</sup> Uj llajtapi tiyacojcuna paycunapura makanacojtincoka llajtancu tucuconka.

<sup>25</sup> Ajinallataj uj wasipi tiyacojcuna paycunapura makanacojtincoka wasincu tucuconka. <sup>26</sup> Satanawanpis quiquillantaj cashan. Camachisninwan makanacojenka Satanaska manaña cankachu. Manachayrí tucuconka.

<sup>27</sup> Chaywanpis callpasapa runata mana wataycunmanchu chayka, ni pi wasinman capuyninta suwaj yaycuya atinchu. Callpasapa wataycuska cajtillan suwajka yaycuya atin. [Nokapis ajinallatataj Satanasta atipaspa millay supaycunata kharkoshani].\* <sup>28</sup> Chekata niyquichej: Dios khechonka runaspa tucuy juchasnincuta sajra parlaskancuman-tapis. <sup>29</sup> Astawanrí Santo Espíritoj contranpi sajrata parlaskanmantaka ni jay'aj juchanta khechonkachu. Chay juchamantaka wiñaypaj juchachaska canka, —nispa.

<sup>30</sup> Chayta Jesús nerka millay supayniyoj caskanta niskancuraycu.

### *Jesuspa ayllusnin*

<sup>31</sup> Jesuspa maman waukesninwan chayamorkancu. Jawallapi khepacuspa payta wajyacherkancu. <sup>32</sup> Chay ashqha runas paypa muyuyninpi cajcuna chayta yachaspa payman nerkanca:

—Yachachejný, mamayqui waukesniyquiwan jawamanta kanta wajymushasuncu, —nispa.

<sup>33</sup> Jesusri cuticherka:

—¿Pitaj mamaypis waukesniypis cancumanrí?

<sup>34</sup> Muyuyninpi tiyacushajcunata khawaspataj nerka:

—Caypi cajcuna mamayka, waukesniypis cancu. <sup>35</sup> Diospa munayninta ruwajmin waukey, panay, mamaypis, —nispa.

## 4

### *Tarpojmanta quiquinchana*

<sup>1</sup> Watejmanta Jesús Galilea kocha cantopi yachachiyta kallarerka. Chayman may ashqha runas tantacorkancu payta uyarinancupaj. Chayraycu Jesuska yacupi cashaj barcoman yaycuspa tiyaycucorka. Tucuy runastaj kocha canto jallp'api casharkancu uyarinancupaj. <sup>2</sup> Ashqha quiquinchanaswan paycunata yachachisharka. Nerkataj:

<sup>3</sup> —¡Uyariychej! Uj runa mujuta t'acaj llojserka. <sup>4</sup> T'acashajtinri waquin mujoka ñan pataman urmarka. P'iskostaj jamuspa pallacaporkancu.

<sup>5</sup> Waquin mujutaj pisi jallp'ayojoj rumi pataman urmarka. Chay mujoka uskhayta p'uturamorka pisi jallp'a caskanraycu. <sup>6</sup> Mana sumaj saphiyoj caskanraycutaj inti ruphamojtin ch'aquiporka. <sup>7</sup> Waquin mujutaj qhishcas chaupiman urmarka. Cusca wiñaycuytawantaj qhishcas trigota sipiy-caporka. Chay mujoka manataj pokorkachu. <sup>8</sup> Waquin mujurí sumaj jallp'aman urmarka. Chay mujoka wiñaspak pokorka. Pokoynintaj sumaj carka. Waquin muju quinsa chuncata pokorka. Waquin sojta chuncata, waquintaj pachajta pokorka, —nispa.

<sup>9</sup> Chaywanpis Jesús nillarkataj:

—¡Ningriyoj cajka sumajta uyarichun! —nispa.

<sup>10</sup> Chay ashqha runas ripojtincu Jesuspa waquin khatejcunan chay chunca iscayniyoj cachasninwan payta taporkancu quiquinchanas-manta. <sup>11</sup> Jesustaj paycunaman sut'incharka:

\* 3:27 Ninayan.

—Imaynatachus Dios runasta camachin, chay yachachinaska pacaska carka. Cunanrí kancunallaman Dios chay imasta sut'inchashasunquichej. Waj runasmantaj cay imaska quiquinchanasneja yachachiska cashan.<sup>12</sup> Chayraycu ricuncu manataj ricuskancuta entiendencuchu. Uyarincu manataj uyariskancuta reparancuchu. Ajinapi Diosman mana cutiriconkancuchu juchasnincupis khechuska cananpaj,—nispa.

*Jesús sut'inchan chay tarpojmanta quiquinchanata*

<sup>13</sup> Jesús paycunata nerka:

—Sichus cay quiquinchanata mana entiendenquichejchu chayka ñimaynatataj reparanquichej tucuy chay waj quiquinchanasneja yachachiskastarí?<sup>14</sup> Chay quiquinchanaka caymin cashan: Mujuta tarpojka Diospa niskanta willarajmin.<sup>15</sup> Waquin muju ñan pataman urmarka. Ajinallatataj runas Diospa niskanta uyarincu. Chay quiquinpachataj supay Satanás jamuspa Diospa niskanta sonkoncumanta orkhocapun.<sup>16</sup> Waquin mujutaj pisi jallp'ayoj rumi pataman urmarka. Ajinallatataj waquinpis Diospa niskanta uyarispa cusiywan jap'icuncu.<sup>17</sup> Sonkoncumanrí mana sumajta yaycunchu. Mana sumaj saphijoj mujujina cancu. Chayraycu pisi ratullapaj Diospa niskanta creencu. Astawanrí llaquiycuna khatirishajtin chayrí Diospa niskanraycu muchojtincu, chincacapuncu.<sup>18</sup> Waquin mujutaj qhishca chaupiman urmarka. Ajinallatataj waquinpis Diospa niskanta uyarincu.<sup>19</sup> Chay uyarejcunataj anchataraj yuyashancu cay pacha imasmanta. Munashancu ancha khapaj capuya pantachej cusiytawan. Cay pacha imasta munashancupuni. Tucuy chay imas sonkoncupi Diospa niskanta sipyicapun. Ajinamanta mana pokoyniyoj caspa causaynincipi Diosta mana cusichincuchu.<sup>20</sup> Waquin mujurí allin jallp'aman urmarka. Ajinallatataj waquin runaspis c'acha sonkowan sumajta Diospa niskanta uyarispa casuncu. Causaynincupitaj Diosta cusichincu. Paycunaka quinsa chuncata pokoj, sojta chuncata pokoj, pachajta pokoj mujusjina cancu,—nerka Jesús.

*C'anchamanta quiquinchana*

<sup>21</sup> Chaywanpis Jesuska nerka:

—Runas uj c'anchata jap'ichispaka mana wich'i uraman churancuchu nitaj tiyana uramanpis. Astawanpis patanejman churancu.<sup>22</sup> Ajinallataj Diospa niskanwanpis cashan. Waquin runaspajka pacaska cashan. Nokarij reparanancupaj yachachispa Diospa niskanta sut'inchashani.<sup>23</sup> ¡Ningriyoj cajka sumajta uyarichun! —nispa.

<sup>24</sup> Nerkataj:

—Sumajta khawacuychej imaynata uyariskayquichejta. Imaynatachus Diospa niskanta uyarispa casunquichej chaymanjinallataj niskanta kosonkachej. Astawanraj kosonkachejpis.<sup>25</sup> Diospa niskanta jap'icojmanka astawan koska canka. Mana jap'icojmantarí pisi jap'icuskanpis khechuska canka,—nerka Jesús.

*Wiñaj mujumanta quiquinchana*

<sup>26</sup> Nerkataj:

—Dios runaspa sonkoncupi camachejtin cayjinaman ríjch'acun: Uj runa trigo mujuta jallp'aman t'acan.<sup>27</sup> Runari tuta puñun, p'unchaytaj jataricun. Manataj yachanchu imaynatachus mujoka llojsimuskanta

wiñaskantapis. <sup>28</sup> Jallp'ari payllamanta ñaupajta yurata riqhurichin. Chaymanta llullumun; khepantataj pokoya tucuchan. <sup>29</sup> Trigo sumaj pokoskaña cajtintaj runaka ruthun, cosecha chayamuskanraycu, — nerka Jesús.

*Juch'uy mujitoj wiñayninmanta quiquinchana*

<sup>30</sup> Nillarkataj:

—Dios runaspa sonkoncupi camachejtin ¿imamantaj rijch'acunman? ¿Imawantaj sut'inchasunman? <sup>31</sup> Muju tarpuskawan quiquinchasun. Cay jallp'api caj aswan juch'uy mujitu\* <sup>32</sup> tarpucojtenka tucuy waj koras-manta aswan jatunta wiñan. Sumaj yurachacun. P'iskospis llanthunpi thapacharicuncu, —nispa.

<sup>33</sup> Ashqha cayjina quiquinchanaswan Diospa niskanta runasman Jesús parlasharka uyariyta atiskancumanjina. <sup>34</sup> Paycunamanka par-laj quiquinchanaswanpuni. Yachacojcunanmanrí paywan sapallancu cashajtinctaj tucuy imata sut'ita reparacherka.

*Jesús thañichin sinch'i wayrata kochapi*

<sup>35</sup> Chay p'unchay ch'isiyacojtinñataj yachacojcunanman Jesús nerka:  
—Jacu rinachej cay kocha chimpaman, —nispa.

<sup>36</sup> Chanta paycuna chay ashqha runasta cacharpayaspa Jesusta pusarkancu, casharka chay barcollapipuni. Wajcunapis barcosnincipi paycunawan cusca rillarkancutaj. <sup>37</sup> Rishaskancupi sinch'i wayra jatar-erka kochapi. Wayraskanpitaj yacuta callpawan khallachimuspa bar-coman junt'achisharkaña. <sup>38</sup> Jesusri puñucusharka barcoj khepannejpi saunananapi samaricuspa. Payta rijch'achispa nerkancu:

—¡Yachachejný! ¡Chincaycushanchejña! ¡Manachu imapis kocusunqui chincaycunanchejmanta!

<sup>39</sup> Paytaj rijch'arispa wayrata c'amerka kochatapis nerka:

—¡Ch'in cay! ¡Jarc'aska cay! —nispa.

Manañataj wayrarkachu. Kochapis ch'inyacaporka. <sup>40</sup> Nerkataj yacha-cojcunaman:

—¿Imaraycutaj mancharicunquichejrí? ¿Manarajchu Diospi jap'icunquichej?

<sup>41</sup> Paycunari mayta manchachicuspa t'ucorkancu. Ninacusharkantu-taj:

—¿Ima runataj payrí? Wayrapis kochapis payta casuncu, —nispa.

## 5

*Gadara jallp'api Jesús thañichin supayniyoj runata*

<sup>1</sup> Kocha ujnin chimpaman rerkancu Gadara runaspa jallp'ancuman.

<sup>2</sup> Jesús barcomanta jallp'aman llojsiskantawancamataj uj millay su-payniyoj runa paywan tincorka. Chay runaka panteonmanta llojsimorka, <sup>3</sup> chaypi tiyacuskanraycu. Manaña ni pi payta watayta aterkachu cadenaswanpis. <sup>4</sup> Ashqha cutitaña payta watarkancu fierro watanaswan fierro cadenaswanpis. Cadenastarí p'itiraj, watanastataj t'unaj. Ajinaka ni pi callpayojochu carka payta mansuyachinanpaj.

<sup>5</sup> Tuta p'unchay panteonpi orkospipis khaparispa purej, rumiswan chuchucuspa. <sup>6</sup> Carumanta Jesusta ricuspa supayniyoj runaka uskhayta

---

\* **4:31** Literal: Israel jallp'api laya mostaza mujitu.

jamorka, Jesuspa ñaupakenpitaj konkoricorka. <sup>7</sup> Jatunmanta khaparerka khaykeyaspa:

—¡C'ata Diospa Wawan Jesú, imaman chapucuwanqui! Diospa ñaupakenpi sumajta mañacuyqui ama ñac'arichinawayquita, —nispa.

<sup>8</sup> Ajinata chay runa nerka Jesú camachishaskanraycu:

—¡Millay supay, llojsiy cay runamanta! —nispa.

<sup>9</sup> Jesustaj payta taporka:

—¿Imataj sutiyqui?

Cuticherkataj:

—Sutiya Legión, sojta waranka, ashqhas caskaycuraycu, —nispa.

<sup>10</sup> Chay supaycunaka Jesusta mayta mañacusharkancu:

—Ama kharkowaycuchu cay jallp'amanta jawamanka, —nispa.

<sup>11</sup> Lomas kayllapiri ashqha qhuchis korata miqhusharkancu. <sup>12</sup> Millay supaycunataj Jesusta mañacorkancu:

—Qhuchisman cachawaycu chaycunaman yaycunaycupaj, —nispa.

<sup>13</sup> Jesú paycunata sakellarka. Runamanta llojsispataj millay supaycunaka qhuchisman yaycorkancu. Chanta chaypi caj iscay warankajina qhuchistaj, tucuynincu, lomamanta callpawan wijch'uycucuspa kakaneja kochaman ch'ulticorkancu. Jek'ekaspataj wañurarkancu.

<sup>14</sup> Chayta ricuspa qhuchi michejcunaka aykecorkancu. Paycuna llajta runasman ranchospí tiyacojcunamanpis chay imasmanta willamorkancu. Ajinamanta runas llojserkancu imachus carka, chayta ricunancupaj. <sup>15</sup> Jesusman chimpaspa chay ashqha supayniyoj carka, chay runata ricorkancu. Payka p'achalliska yuyaynini pi tiyacusharka. Chayta ricuspa runaska mayta manchachicorkancu. <sup>16</sup> Chay ruwaskasta ricojcunari willasharkancu imaynatachus chay runata supaycunamanta cavarachiskanta, imayna qhuchiswan caskantapis. <sup>17</sup> Ajinaka chayta uyarispa jamojcunaka mayta nisharkancu Jesusta jallp'ancumanta ripunanta, anchata manchachicuskancuraycu.

<sup>18</sup> Mañaskancumanjina Jesú ripunanpaj barcoman yacyushajtin, supaycunamanta cavarachiskanta runaka mayta nicusharka:

—Yachachejný, sakellaway kanwan rinayta, —nispa.

<sup>19</sup> Jesusrí payta mana sakerkachu paywan rinanta. Astawanpis nerka:

—Wasiyquiman cutipuy ayllusniyquejman. Paycunaman willamuy-puni Dios ruwapususanmanta pay qhuyasusanmantawan, —nispa.

<sup>20</sup> Ajinamanta payka Decápolis jallp'api Jesuspa ruwaskanmanta willarayta kallarerka. Tucuytaj t'ucorkancu.

### *Jairoj ususinmanta*

<sup>21</sup> Ujtawan Jesú barcopi kochata chimparka. Kocha cantopi cashajt-intaj payman ashqha runas tantacamorkancu. <sup>22</sup> Chanta uj runa riqhurimorka, Jairo sutiyoj. Payka tantacuna-wasipi curajcunamanta carka. Jesusta ricuspa paypa ñaupakenpi konkoricorka, <sup>23</sup> maytataj nericorka:

—Warmi wawitay wañupunayashan. Jamuspa maquisniyquita payman churaycuripuway thañicapunanpaj causananpajtaj, —nispa.

<sup>24</sup> Jesustaj paywan rerka. Rishajtintaj chay may ashqha runas khatisharkancu. Chaycunataj payman ñit'icamusharkancu.

### *Jesuspa p'achan cantota jap'irej warmimanta*

<sup>25</sup> Uj warmi carka chunca iscayniyoj watata yawar apaywan onkoska. <sup>26</sup> Ashqha medicoswan jampichicuspa anchata ñiac'ariska, tucuy capuynintapis tucuchiska. Chaywanpis mana allinyacorkachu. Manachayrí aswan onkoskallapuni casharka. <sup>27</sup> Chay warmeka Jesusmanta uyarispa chay ashqha runas chaupita jamorka. Jesuspa khepanman kayllacamuspataj p'achasninta jap'iricorka. <sup>28</sup> Chayta ruwarka ajinata sonkonpi yuyaskanraycu: "Sichus p'achallantapis llanqharisaj chayka, thañiska casaj". <sup>29</sup> Chay quiquinpacha yawar apaymanta thañicaporka. Payri onkoyninmanta thañichiskaña caskanta reparacorka. <sup>30</sup> Jesuska sonkonpi chay quiquinpacha repararka atiyninwan uj runata thañichiskanta. Chayraycu cutiricuspá chay ashqha runas chaupipi taporka:

—¿Pitaj p'achasniyta jap'iricorka?

<sup>31</sup> Yachacojcunani payta nerkanca:

—Ricunqui cay q'isqui runas kanta ñit'imushasuskancuta. ¿Tapushanquitaj pi jap'irisuskanta?

<sup>32</sup> Jesustaj muyuyninta khawarerka payta jap'irejta ricunanpaj.

<sup>33</sup> Warmíri imaynapichus thañiska caskanta yachaspa, manchachicuywan qharcatitiwantaj paypa ñaupakenpi konkoricorka. Jesusmantaj tucuy imata chekata willarka. <sup>34</sup> Chanta Jesús warmita nerka:

—Diospi jap'icusquayquiraycu thañiskaña canqui. Onkoyniyquimanta thañiska caspa cusiywan ripuy, —nispa.

### *Jesús Jairoj ususinta causarichin*

<sup>35</sup> Jesús parlashajtillanraj chay curaj runa Jairoj wasinmanta willaj jamorkancu:

—Ususiyqueka wañupunña. Amaña yachachejta molestaychu, —nispa.

<sup>36</sup> Jesusri chay niskancuta uyarispa Jairoman nerka:

—Amaña manchachicuychu. Jap'icushallaypuni Diospi, —nispa.

<sup>37</sup> Jesuska ni pita sakerkachu paywan rejta manachayka Pedrota, Jacobota, chay Jacoboj wauken Juantawan. <sup>38</sup> Curajpa wasinman chayamuspari ashqha wakashajcunata ricorka phutiywan khaparejcunata ima. <sup>39</sup> Yaycuspataj paycunaman nerka:

—¿Imaraycutaj cay ch'ajwari? Amaña wakaychejchu. Imillitaka mana wañuporkachu. Manachayrí puñushan, —nispa.

<sup>40</sup> Paycunataj Jesusta asipayarkancu. Payrí tucuyta jawaman kharkorka. Imillitaj tatanta mamanta quinsa yachacojcunantawan pusarcorka. Imillita casharka, chaymantaj yaycorka. <sup>41</sup> Chanta imillitata maquinmanta jap'ispa nerka parlaynincipi:

—Talita, cumi, —nispa. Cayka niyta munan: Imillita, kanta niyqui, jatarimuy.

<sup>42</sup> Chay quiquinpacha imillitaka jataricorka purerkataj. Chunca iscayniyoj watasniyojjina carka. Chaypi cajcunari manchayta t'ucorkancu. <sup>43</sup> Jesustaj paycunata sinch'ita camacherka, ama ni pi chay imasmanta yachananta. Nerkataj, imillitaman miqhunata konancuta.

<sup>1</sup> Jesustaj chaymanta llojsispa Nazaret llajtanman rerka. Yachacojcunapnis paywan rerkancu. <sup>2</sup> Samacuna p'unchay chayamojtintaj tantacuna-wasipi yachachiyta kallarerka. Ashqha runas chaypi cajcuna payta uyarispa mayta t'ucorkancu. Nisharkancutaj:

—Cay runaka ¿imaynapitaj cayjina yuyaywan yachachishanrí? ¿Maypitaj cayjina yuyayta jap'erkarí? ¿Imaynatataj cayjina atiynijoj t'ucuna ruwanasta ruwashanrí? <sup>3</sup> ¿Manachu payka Mariáj wawan chay carpintero? Waukesnin Jacobo, José, Judas, Simonwan cancu. Panasninpis caypi tiyacuncu, —nispa.

Phiñacuspataj payta mana jap'icorkancuchu. <sup>4</sup> Jesusrí paycunaman nisharka:

—Diosmanta willajka tucuynnejpi sumajpaj khawaskapuni. Astawanrí quiquin llajtallanpi, ayllusnin uqhupi, wasinpiwanka manamin, —nispa.

<sup>5</sup> Ajinapi Nazaretpeka ni ima t'ucuna ruwanatapis ruwayta aterkachu. Manachayka pisi runasllata onkoynincumanta thañicherka maquisninta churaspa. <sup>6</sup> Jesuska t'ucorka Diospi mana jap'icuskancumanta. Chay muyuynin llajtastataj yachachispa purerka.

### *Chunca iscayniyoj cachaska*

<sup>7</sup> Jesuska chay chunca iscayniyoj cachasninta wajyaspa iscay iscaymanta cachayta kallarerka. Millay supaycunata kharkonancupajtaj paycunaman atiyta korka. <sup>8</sup> Paycunatataj camacherka:

—Ñanniyquichejpaj ni imata apaychejchu manachayrí uj c'aspillata purinayquichejpaj. Ama apaychejchu kokawita ni wayakata nitaj kolketa cinturayquichejpi. <sup>9</sup> Ojot'asniyquichejta churacuychej, amataj iscay camisasta apaychejchu p'achallicunayquichejpaj, —nispa.

<sup>10</sup> Astawanpis paycunaman nerka:

—Mayken wasillamanpis wajyaricusunquichejman chayka, chaylapi cacuychej chay llajtamanta llojsipunayquichejcama. <sup>11</sup> Maypichá runas mana wajyasunquichejmanchu nitaj sumaj willanastapis uyarincumanchu chayka, llajtancumanta llojsipuychej. Chaquisniyquichejmantataj jallp'anta thalaycarpaychej chay runaspa contrancupi. Chaywan runas yachankancu Diospa willananta khesachaskancuta. Chekata niyquichej: Juicio p'unchaypeka chay llajtapi tiyacojcuna astawan ñac'arichiskas cankancu Sodoma, Gomorra llajtayojcunamanta niskaka, —nerka Jesús.

<sup>12</sup> Ajinamanta cachasnenka llojsispa runasman willaramorkancu:

—Juchasniyquichejta sakespa Diosman cutiricuychej, —nispa.

<sup>13</sup> Ashqha supaycunata kharkorkancu. Chaywanpis aceitewan jawispas Jesusupa atiyninwan ashqha onkoska runasta thañicherkancu.

### *Bautizaj Juanpa wañuyninmanta*

<sup>14</sup> Jesusupa sutin may allin rejsiska carka. Chayraycu camachej Herodeska paypa ruwaskasninmanta uyarerka. Runas nisharkancu:

—Chay Jesuska bautizaj Juanmin, wañuymanta causarimpun. Chayraycu chay t'ucuna ruwanaswan Diospa atiyninta ricuchishan, —nispa.

<sup>15</sup> Waquenka nisharkancu:

—Diospa unay willajnin Eliaschá, —nispa.

Waquintaj nisharkancu:

—Diospa unay willajcunanjina, uj willajchá, —nispa.

<sup>16</sup> Herodesrí paymanta uyarispa nerka:

—¡Khorucherkani, chay Juanmin cayka! Wañuymanta causarimun, —nispa.

<sup>17</sup> Ajinaka ñaupajpi quiquin Herodes Juanta jap'iycuchispa carcelman wataskata churacherka Herodiasraycu. Chay Herodiaska Herodespa wauken Felipej warmin carka. Waukenpa warmin cashajtinpis Herodeska paywan casaracorka. <sup>18</sup> Juanka Herodesman nej:

—Waukeyquej warminwan tiyacunayqueka juchamin, —nispa.

<sup>19</sup> Chayraycu Herodiaska mayta chejnispas Juanta wañuchiyya munasharka, manataj aterkachu Herodes jarc'acuskanraycu. <sup>20</sup> Herodesri yacharka Juanka uj chekan ruwaj runa Diosman t'akaska caskanta. Chayraycu payta manchachicuywan wakaycharka. Juanta uyariytataj munajpuni. Astawanrí uyarishaspapis iscayrayajpuni. Juchanta sakeytataj mana munajchu nitaj Diosman cutiricuytapis. <sup>21</sup> Herodeska diachacunpaj uj jatun miqhunata waquicherka. Chaypacha Herodiaspaj suyaskan horaka chayamorka. Herodeska paywan miqhunancupaj wajyarka camachejcunanta, capitancunata, Galilea jallp'amanta curaj cajcunatawan. <sup>22</sup> Herodiaspa ususintaj chay fiestaman yaycuspa paycunapaj tusorka. Tususkantaj mayta cusicherka Herodesta paywan cashajcunatapis. Chayraycu camachej Herodes sipasman nerka:

—Imatachá munanqui, chay mañacuwaskayquita koskayqui, —nispa.

<sup>23</sup> Cayta nerka juraspa:

—Jurani gobienoy capuwaskanmanta cuscanta mañacuwanquiman chaypis, chayta koskayqui, —nispa.

<sup>24</sup> Sipastaj llojsispas mamanta tapumorka:

—¿Imatataj mañacuyman?

Mamanri nerka:

—Bautizaj Juanpa umanta mañacuy, —nispa.

<sup>25</sup> Chaymantataj sipaska uskhayta cutirispa, Herodesmanta mañacorka:

—Munani cunanpacha bautizaj Juanpa umanta uj chuwapi konawayquita, —nispa.

<sup>26</sup> Camachej Herodestaj mayta phuticorka. Wajyaskan runaspa ñaupakencipi juraskanraycurí sipaspa mañacuskanta mana munarkachu “mana”, niya. <sup>27</sup> Chayraycu quiquinpacha uj soldadota cacharka carcelman Juanpa umanta apamunapaj. <sup>28</sup> Soldadotaj rispa Juanta khorumorka. Umanta chuwapi apamuspataj sipasman korka. Sipastaj Juanpa umanta mamanman komorka. <sup>29</sup> Chayta uyarispa Juanpa yachacoju-nan jamorkancu ayata apaspataj p'ampamorkancu.

*Jesús miqhuchin phishka waranka runasman*

<sup>30</sup> Jesuspa cachasnintaj payman cutimuspa willarkancu tucuy ruwamuskancuta yachachimuskancutapis. <sup>31</sup> Paycunaman Jesús nerka:

—Jacu rina sapallanchej ch'innejman tumpata samaricunayquichejpaj, —nispa.

Chayta nerka ashqha runasraycu. Chay ashqha runaska payman mana tucucuya jamusharkancutaj ripusharkancutaj. Chayraycu Jesus-pis yachacojcunapis ni miqhunallancupajpis tiempoyojchu carkancu.

<sup>32</sup> Ajinapi paycunalla ch'innejman barcopi kochanejta riporkancu.

<sup>33</sup> Ashqha runasri ripuskancuta ricuspa repararkancu maymanchus

rishaskancuta. Chayraycu tucuy llajtasmanta runas chaquipi chayman uskhayta rerkancu payta ñaupanancupaj.<sup>34</sup> Jesuska barcomanta llojsispa may ashqha runasta ricorka. Mana michejniyoj ovejasjina caskancuraycutaj paycunamanta sonkon nanarka. Ashqha imastataj yachachiya kallarerka.<sup>35</sup> Ch'isiyaynejtataj yachacojcunanka Jesusman kayllaycuspa nerkanca:

—Cayneka ch'innejpi cashanchej ch'isiyashanñataj.<sup>36</sup> Runasta cachapullayña muyuyninchejpi chajra wasisman ranchosmanpis miqhunata ranticamunancupaj,—nispa.

<sup>37</sup> Jesusrí cuticherka:

—Kancuna paycunata miqhuchiyye,<sup>38</sup> —nispa.

Paytataj nerkanca:

—Yachachejný ¿imaynata? Iscay pachaj p'unchay llanc'aymantajina kolkewan t'antata ranticamunancupaj chaypis, cay chhica runaman konapajka pisinmanraj,—nispa.

<sup>38</sup> Jesustaj taporka:

—¿Mashqha t'antataj capusunquichej? Khawarimuychejmá,—nispa.

Yachamuspataj willarkancu:

—Phishka t'antas iscay challwitaswan tiyan,—nispa.

<sup>39</sup> Chanta Jesús tucuy runata tiyaycucherka t'aka t'akallata k'omer pasto patapi.<sup>40</sup> Ajinamanta tiyaycorkancu, waquin t'akaspi pachajjina, waquin t'akaspitaj phishka chuncajina.<sup>41</sup> Jesustaj chay phishka t'antasta chay iscay challwitastawan maquisnippi jap'ispas, janaj pachaman khawarispataj chaycunamanta Diosman graciasta korka. T'antata partispa yachacojcunaman jaywasharka paycuna runasman konancupaj. Ajinallatataj challwitastapis partispa tucuynincupaj jaywachimorka.<sup>42</sup> Tucuynincu miqhorkancu sajsacorkancutaj.<sup>43</sup> Chay partiska t'antsmanta challwitasmantapis puchojtataj chunca iscayniyoj canastas junt'ata okharerkancu.<sup>44</sup> Miqhojcunaka kharislla yupaskas, carkancu phishka warankajina.

### *Jesús yacu patata purin*

<sup>45</sup> Chay quiquinpachataj Jesuska yachacojcunanta camacherka barcoman yaycunanca Betsaida llajtaman rinancupaj. Kocha chimpaman paymanta ñaupajta rinancuta munarka, chay ashqha runasta cacharpayashanancama.<sup>46</sup> Runasta cacharpayaspataj Jesuska orkomana riporka Dioswan parlaj.<sup>47</sup> Tutayaycojtintaj yachacojcunanka barcopi chaupi kochapiña casharkancu, paytaj sapallan jallp'api casharka.<sup>48</sup> Ricorkataj paycunata tucuy callpancuwanpis ñac'ayta barcota suchuchishajta. Ñaupakencumanta sinch'i wayra wayramuskanraycu sayc'usharkancu. Ajinamanta Jesuska manaraj sut'iyayta yacu patata purispa paycunaman jamorka. Paycunamanta ñauparejjina churacorka.<sup>49</sup> Payta yacu patata purishajta ricuspari alma caskanta yuyaspa khaparicorkancu.<sup>50</sup> Tucuynincu payta ricorkancu mayta mancharicorkancutaj. Jesusrí paycunata parlapayaspa nerka:

—¡Sonkochacuychej! Noka cani, amaña manchachicuychejchu,—nispa.

<sup>51</sup> Barcoman yaycorka paycunawan, wayrataj manaña wayrarkachu. Paycunataj mayta t'ucorkancu.<sup>52</sup> Chay ashqha runasta miqhuchiwickanta ricorkancu. Ni chaywanpis repararkancuchu Jesús Diospa atiyniyoj Wawan caskanta, rumiyaska sonkoyoj caskancuraycu.

*Jesús thañichin onkoskasta Genesaretpi*

<sup>53</sup> Kochata chimpamuspaña Jesuska yachacojcunanwan Genesaret jallp'aman chayamorkancu. Kocha cantopitaj barcota watarkancu.

<sup>54</sup> Jallp'aman llojsiskancutawantaj runaska Jesusta rejsiyorcankupacha. <sup>55</sup> Chayraycu uskhayllata tucuynejta rerkancu onkoska runasta payman pusanancupaj. Maypichus pay cashaskanta uyarererkancu, chayman onkoska runasta puñunasnincipi apamorkancu. <sup>56</sup> Mayllamanpis pay chayajtin, ranchosman chayrí llajtasman chayrí camposmanpis, onkoskasta apamuspa callesman churaj cancu. Jesusmantataj mañacoj cancu p'achanpa t'icasnillantapis llanqharinancuta. P'achanta tucuy llanqharejcunataj onkoynincumanta thañichiskas carkancu.

## 7

*Unay curajcunaj yachachiynincumanta*

<sup>1-4</sup> Fariseocunaka tucuy israelcunapis chay unay curajcunaj yachachiynincumanjina ruwaj cancu. Chayraycu chaymanjina maquisnincu mana mayllacuspaka mana miqhojchu cancu. Recobamanta wasiman cutimuspa manaraj miqhushaspa llimphuchacojpuni cancu costumbrencumanjina. Waj ashqha imaymana ruwanastawan wakaychanancu caj. Cayjina carka: Vasos mayllana, yuru mayllana, cobre manca mayllana, puñuna mayllanapis.

Uj cutitaj waquin fariseocuna israel yachachejcunawan Jerusalenmanta jamuspa tantacamorkancu. Paycunaka ricorkancu Jesuspa waquin yachacojcunanta miqhojta maquisnincuta mana costumbren-cumanjina mayllacuspa. <sup>5</sup> Chayraycu Jerusalenmanta chay jamojcunaka Jesusta nerkan:

—Yachacojcunayqui unay curajcunaj yachachiynincuta mana casuspa maquisnincuta mana llimphuchacuncuchu miqhunancupaj. ¿Imaraycutaj ajinata ruwancuri?

<sup>6</sup> Jesusrí paycunata nerka:

—Allinta kancuna puraj uyacunamanta Isaiaska sut'incharka. Kelkaspani Dios nin:

Cay runacunaka simillancuwan yupaychawancu.

Sonkoncupirí nokamanta carupi cashancu.

<sup>7</sup> Paycunaka yachachincu runacunaj yachachinasnillancuta nokamantapis canmanjinata.

Ajinapeka yankhalla yupaychawancu.

<sup>8</sup> Nillarkapuni:

—Kancunaka runaspa yachachiynincuta wakaychanayquichejpaj Diospa camachiskanta mana casunquichejchu,—nispa.

<sup>9</sup> Paycunaman nillarkataj:

—Diospa camachiskanta khesachanquichej curajcunaj yachachiynincuta sumajta wakaychanayquichejpaj. Chaywanka mana allintachu ruwashanchiquej. <sup>10</sup> Moiseska caytamin nerka: “Jatunpaj khawaspa casuy tatayquita mamayquita”, nispa. Nillarkataj: “Tatanta chayrí mamanta sajrata parlaj wañuchiska cachun”. <sup>11</sup> Kancunari ninquichej, uj runa khesachayta atiskanta tatanta chayrí mamanta “Corbán”, nispa. Corbán niyta munan, Diospaj t'akaska. Chayta nispa chay runaka tatanta chayrí mamanta pisichicojtincu nin: “Kanta yanapasunaypaj tucuy capuyniyyka Diospaj t'akaskaña”, nispa. <sup>12</sup> Kancunaka chay

niskayquichejwan yanapananta jarc'anquichej. Ajinapi runaka ni atinchu capuyninwan tatanta mamantapis yanapayta.<sup>13</sup> Ajinapitaj kancunaka yachachiynyquichejneja Diospa niskanta manacajman tu-cuchishanquichej. Chayjina ashqha waj imastapis ruwashanquichej. Kancunaka unay curajcunaj yachachiynillancutapuni yachachishan-quichej wawasniyquichejman cunan p'unchaycama,—nerka Jesús.

*Runaj sonkonmanta llojsimojmin ch'ichichan*

<sup>14</sup> Ujtawan chay ashqha runasta payman wajyaspa Jesuska nerka:

—Tucuy kancuna uyariwaychej entiendewaychejtaj.<sup>15</sup> Ni ima miqhuskanpis payman yaycuspa runataka ch'ichichanchu. Manachayrí runataka ch'ichichan paypa sonkonmanta llojsiskan.<sup>16</sup> ¡Ningriyoj cajka sumajta uyarichun! —nispa.

<sup>17</sup> Jesús chay ashqha runasta sakespa wasiman yaycorka. Chaymantataj yachacojcunanka payta chay quiquinchanamanta taporkancu.

<sup>18</sup> Paycunaman nerkataj:

—¿Kancunapis mana yuyayniyojllatajchu canquichej? ¿Manachu cayta entiendenquichej? Ima miqhuskanpis runaman yaycuspaka mana payta ch'ichichanchu.<sup>19</sup> Miqhuskanka mana sonkonmanchu yaycun. Manachayrí wijsanman yaycun, chaymantataj jawaman llojsipun, —nispa.

Chay niskanwan Jesús ricucherka tucuy laya miqhuna Diospa kowaskanchejka allin caskanta.

<sup>20</sup> Nerkataj:

—Astawanrí runaj sonkonmanta llojsimojmin runataka ch'ichichan.<sup>21</sup> Runacunaj sonkoncumantaka sajra yuyaynincumanta caycunamin llojsimun: Khenchachacuycunawan, suwacycunawan, runata wañuchiycunawan,<sup>22</sup> sajra puriyipi causacycunawan, munapayaycunawan, sajrata ruwacycunawan, pantachiywan, mana Diosmanjina causawayan, envidiacywan, sajra parlaywan, jatunchacuywan, mana yuyayniyoj caywan.<sup>23</sup> Tucuy chay sajra imastaj runaj sonkonmanta llojsimun. Paytataj ch'ichichan,—nerka Jesús.

*Waj llajtayoj warmi Jesuspi jap'icun*

<sup>24</sup> Chaymanta llojsispa Jesús rerka Tiro llajta Sidón llajtapis carkancu, chay ladoman. Chaypi uj wasipi caricusharka manataj munarkachu ni pi yachananta chaypi cashaskanta. Astawanrí paymantaka yachacorkapuni.<sup>25-26</sup> Chaynejjpitaj carka uj warmi, Sirofeniciapi naceska. Waj llajtayoj caspa payka mana Jesuspa llajtamasinchu carka. Paypa imillitan millay supayniyoj carka. Chay warmeka Jesusmanta uyarispa payman jamorka. Ñaupakenpi konkoricuspataj mayta nicusharka, wawanmanta supayta kharkonanta.<sup>27</sup> Jesusrí payman nerka:

—Ñaupajtaka quiquin llajta-masisniyya yanapanay tiyan. Imaynatachá uj familiapeka miqhuchincu wawitasta, manataj paycunaj miqhunancutaka alketuspaj wijch'uncuchu, ajinata, —nispa.

<sup>28</sup> Warmitaj cuticherka:

—Ajinapuni, Señor. Chaywanpis mesa uraman wawitas t'unitasta urmachejtincu alketuska miqhuncupuni, —nispa.

<sup>29</sup> Jesustaj nerka:

—Cayjina sumaj yuyaywan cutichiwaskayquiraycu ripullay. Wawaykimanta chay millay supayka llojsinña, —nispa.

<sup>30</sup> Paytaj wasinman cutipuspa wawanta tariparka camapi siriskata. Jesuspa niskanmanjinataj supayka wawamanta llojsipuskaña.

*Jesús thañichin uj jok'ara qhacu runata*

<sup>31</sup> Tiro jallp'amanta cutispa Jesuska Sidón llajtaninta rerka Galilea kochanejman. Chaymanka Decápolis jallp'anintataj rerka. <sup>32</sup> Ajinapi uj jok'ara qhacu runata payman pusamorkancu. Maytataj nicusharkancu Jesús maquisninta chay runaman churaspa payta thañichinanta. <sup>33</sup> Ajinapi Jesuska chaypi caj ashqha runasmanta wajnejman chay runata sapallanta pusarka. Chaypitaj Jesuska maqui dedosninta jok'araj ningrisniman sat'iycurerka. Runaj kallunmanpis Jesuska thokayninta churarka. <sup>34</sup> Payka janaj pachaman khawarispa Dios Tatanta yupaycharka. Runaman nerktaj:

—¡Efata! —nispa. Cayka niyta munan: ¡Ningrisniyqui quichacuchun!

<sup>35</sup> Chay quiquinpacha runaka uyarerka. Kalluntaj phascacorka. Sut'ita parlaytataj kallarerka. <sup>36</sup> Jesustaj ricojcunata camacherka chayta ama ni piman willanancuta. Pay ajinata astawan camachishajtinpis runaska astawanraj willarasharkancu. <sup>37</sup> Paycunari manchayta t'ucuspa nisharkancu:

—Jesuska tucuy imata may sumajta ruwan. Jok'arasta uyarichin, upastapis parlarichin, —nispa.

## 8

*Jesús miqhuchin tawa waranka runasman*

<sup>1</sup> Chay p'unchaycunapi watejmanta ashqha runa Jesús casharka, chaypi tantacullarkataj. Paycuna mana miqhunayoj cajtinctaj Jesús yachacojcunanta wajyaspa nerka:

<sup>2</sup> —Sonkoy nanawan cay ashqha runasmanta. Quinsa p'unchayña nokawan cusca cashancu. Miqhunancupaj manaña ni imapis canchu.

<sup>3</sup> Sichus mana miqhuskata wasisnincuman cachapuyman chayka, ñanpi llauchhuyapuncuman. Chaywanpis waquenka carusmanta jamorkancu, —nispa.

<sup>4</sup> Yachacojcunantaj Jesusta taporkancu:

—¿Imaynatataj pipis cay chhicaman miqhuchinman cay ch'innejpirí?

<sup>5</sup> Jesustaj paycunataj taporka:

—¿Mashqha t'antastaj capushasunquichejrí?

Paycunataj cuticherka:

—Kanchis t'antas capuwaycu, —nispa.

<sup>6</sup> Jesusri camacherka chay ashqha runasta pampapi tiyacunancuta. Chay kanchis t'antasta maquisnippi jap'ispataj Diosman graciasta korka. Chay t'antasta partispataj yachacojcunanman kosharka chay ashqha runasman jaywaramunancupaj. <sup>7</sup> Paycunajta capullarkataj pisi challwitaspawan. Ajinallatataj graciasta kospa challwitastapis jaywarachimorka. <sup>8</sup> Miqhorkancu sajsacorkancutaj. Chay partiska miqhunasmanta puchoj t'unastaj kanchis canasta junt'a carka. <sup>9</sup> Miqhojcunataj kharislla yupaska, carkancu tawa warankajina. Jesustaj paycunata cacharpayaporka. <sup>10</sup> Chay quiquinpachataj yachacojcunanwan barcoman yaycuspa rerkancu kochanejta Dalmanuta jallp'amana.

*Fariseos mañancu janaj pachamanta uj ricuchinata*

11 Chaypi Jesús cashajtintaj fariseoska jamorkancu churanacuya munaspa. Paymanta mañasharkancu janaj pachamanta uj jatun ricuchinata ruwananta Dios payta cachamuskanta ricuchinapaj. [Paycunaka yuyasharkancu Jesús mana atiyniyoj caskanta chay mañaskancuta ruwananpaj. Mana mañaskancuta ruwaspataj runaspa ñaupakencipi urmachiska canman. Ajinapi chay runas manaña paypi jap'icuncumanchu.]<sup>\*</sup> 12 Jesusrí sonkonpi phuticuspa jatunta samarimorka nerktaj:

—¡Ay, cayjina canancoka! ¿Imaraycutaj cay p'unchay runacunaka uj ricuchinata mañancuri? Chekata niyquichej: Cay runacunapajka ni ima ricuchina ruwaskachu canka, —nispa.

13 Paycunata sakerpayaspataj ujtawan barcoman yaycuspa yachacoj-cunawan kocha chimpaman riporka.

*Puraj uya fariseocunamanta khawacuychej*

14 Yachacojcunaka t'antata apayta konkapuskancu. Barcopiri uj t'antallancu caporka. 15 Chanta Jesús paycunata camacherka:

—Allinta khawacuychej fariseocunaj t'anta pokochina levadurancumanta Herodespa levaduranmantawan wakaychacunayquichejpaj, —nispa. [Chayta nispaka fariseospawan, Herodespawan puraj uya caynincumanta parlasharka.]<sup>†</sup>

16 Yachacojcunari yuyasharkancu t'antancu mana caskanraycu chayta niskanta. Chayraycu paycunapura tapunacusharkancu.

17 Jesustaj yuyaskancuta reparaspa paycunaman nerka:

—¿Imaraycutaj tapunacushanquichej t'antayquichej mana caskanmantarí? ¿Manarajchu cay imasmanta yuyanquichej? ¿Manachu reparanquichejpis? ¿Sonkojquichejka rumiyaskajinachu cashan? 18 ¿Ñawisniyoj cashaspapis manachu ricunquichej? ¿Ningrisniyoj cashaspapis manachu uyarinquichej? 19 ¿Manachu yuyaricunquichej imaynatachus miqhucherkaní chay phishka waranka runasman phishka t'antasmanta partispa? Chaymanta puchojta ¿mashqha canasta junt'atataj okharerkanquichej?

Paycunataj cuticherkan:

—Chunca iscayniyoj canastasta, —nispa.

20 Nillarkataj:

—Chay kanchis t'antamanta tawa warankaman miqhuchishajtiyri chay puchojta ¿mashqha canasta junt'atataj okharerkanquichej?

Cuticherkan cutaj:

—Kanchis canastasta, —nispa.

21 Jesuska paycunata taporkataj:

—¿Chay ricusquichejwanpis manarajchu reparanquichej? — nispa.

*Jesús uj ciego runata thañichin*

22 Jesuska yachacojcunawan Betsaida llajtaman chayarkancu. Chaypitaj uj ciego runa carka. Paytari Jesusman pusamorkancu maytataj nicusharkancu payta llanqharispa thañichinanta. 23 Jesuska maquinmanta jap'ispa chay ciego runata llajta jawaman pusarka. Chay runaj ñawisninman thokaycuspataj Jesuska maquisninta churarka. Taporkataj:

\* 8:11 Ninayan. † 8:15 Ninayan.

—¿Imallatapis ricunquichu?

<sup>24</sup> Runari ricuyta kallarispa nerka:

—Runasta ricuni sach'asman rиж'acojta. Astawanpis purishajta, —nispa.

<sup>25</sup> Chanta ujtawan Jesús maquisninta churarka ciegoj ñawisninman. Cay cutipitaj ciegoka sut'ita ricorka. Thañiskaña caspari carumantapacha tucuy imata ricorka. <sup>26</sup> Chaywanpis Jesús payta wasinman cachaporka nerkataj:

—Llajtamanka ama yaycullaypischu, —nispa.

*Pedro sut'inchan Jesús Cristo caskanta*

<sup>27</sup> Jesús yachacojcunawan Betsaidamanta llojsispa Cesarea Filipo llajtanejpi ranchosman rerkancu. Ñanta rishaspataj Jesuska yachacojcunanta taporka:

—Runas nokamanta parlaspa, noka ¿pi caskaytataj nincu?

<sup>28</sup> Payman cuticherkanca:

—Waqin nincu, bautizaj Juan. Waquin nincu, Diospa willajnin Elías. Waquinri Diospa unay willajcunanmanta ujinchá, nisuncu.

<sup>29</sup> Jesús paycunata taporkataj:

—Kancunarí noka ¿pi caskaytataj ninquichej?

Pedrotaj cuticherka:

—Diospa ajllaskan Cristomin kan canqui, —nispa.

<sup>30</sup> Jesustaj paycunata camacherka, ama ni piman chayta paymanta willanancuta.

*Jesús sut'inchan wañuyninmanta causarimuyinmantawan*

<sup>31</sup> Jesuska yachacojcunaman yachachiyta kallarerka ñac'ariyinmanta. Nerkataj:

—Noka, Diospa cachaska Runan, anchata ñac'arinay tiyan Diospa munayninmanjina. Israel curajcuna, yupaychana-wasimanta curajcuna, israel yachachejcunapiwan, tucuynincu nokata khesachawaspa wañuchiwankancu. Quinsa p'unchaymantataj causarimpunay tiyan, —nispa.

<sup>32</sup> Chay niskantaka sut'ita paycunaman willasharka. Pedrorí wajnejman pusaspa Jesusta c'amiyta kallarerka:

—Amaña ajinataka parlaychu, —nispa.

<sup>33</sup> Jesusrí cutircamuspa yachacojcunanta khawaspataj Pedrota nerka:

—¡Anchhuriy nokamanta! Satanasjina parlashanqui. Manataj Diospa yuyaskanmanjinachu yuyashanqui. Manachayrí runacunaj yuyaynincumanjinalla yuyanqui, —nispa.

<sup>34</sup> Chanta chay ashqha runastawan yachacojcunantawan wajyaspa nerka:

—Pichus munashan yachacojniy cayta nokawan riytapis chayka, sakenan tiyan quiquin munayninta. Chaywanpis nokaraycu pay quiquinpi muchunan tiyan wañunancama. Nokatataj casunawanpuni tiyan.

<sup>35</sup> Chekatapuni pillapis causayninta payllapaj wakaychacuya munajka mana wiñay causayniyojchu canka. Pillapis nokata casuwaskanraycu sumaj willanasraycupis causayninta cay pachapi chincananta sakejka wiñay causayniyoj canka. <sup>36</sup> Reparaychej: Sichus uj runa cay pachantintapis jap'inman pay quiquinri wiñaypaj chincapunmantaj chayka ¿ima allin paypajrí? <sup>37</sup> Yachanchejjina, runaka manamin atinchu causayninta

rantiyta tucuy cay pacha capuywanpis aswan valorniyojmin caskan-raycu. <sup>38</sup> Cay p'unchaycunapi caj khenchachacoj juchallicoj runacunaj ñaupakencupi ama nokamanta niskasniymantapis p'enkacuychejchu. Nokapis cutimuspa kancunamantaka mana p'enkacuskayquichejchu. Noka, Diospa cachaska Runan, Tataypa atiyninpi santo angelesninwanta taj cutimusaj,—nerka Jesús.

## 9

<sup>1</sup> Nillarkataj:

—Chekata niyquichej: Waquin cunan caypi cajcunamanta mana wañonkancuchu Dios atiyninwan camachinanpaj jamuskanta ricunancacama,—nispa.

*Jesús wajjina rijch'acuymán tucun*

<sup>2</sup> Sojta p'unchaymantataj Jesuska Pedrota, Jacobota, Juantawan sapal-lancuta pusarka uj alto orkoman. Paycunaj ñaupakencupitaj Jesuspa rijch'acuynenka wajjinaman tucorka. <sup>3</sup> P'achasninpis sumaj yuraj lliphipej rit'ijinaman tucorkancu. Chayjinata yurajyachiytaka cay pachapi ni pi t'aajsajpis atinmanchu. <sup>4</sup> Eliaswan Moiseswan riqhurimus-pataj Jesuswan parlanacusharkancu. <sup>5</sup> Pedrotaj payta nerka:

—Yachachejný, sumajta caypi cashanchej. Ruwaycuman quinsa ch'uillasta, ujta kanpaj, ujta Moisespaj, ujtataj Elias paj,—nispa.

<sup>6</sup> Pedroka chayta nerka mana yachaspa imatachus parlananta. Chay yachacojcunanka maytamin manchachicusharkancu.

<sup>7</sup> Chanta uj phuyu riqhurimuspa paycunaman uraycamorka. Phuyumantataj parlamushajta uyarerakancu:

—Caymin c'ata munaska Wawayka. Payta uyariychej,—nispa.

<sup>8</sup> Chay quiquinpacha muyuynincuta khawarispa manaña ni pita ricorkancuchu. Manachayrí Jesús sapallanña paycunawan casharka.

*Unay willaj Elias manta*

<sup>9</sup> Orkomanta uraycamushaskancupitaj Jesús yachacojcunanta camacherka:

—Chay ricuskayquichejta ama ni piman willaychejchu noka, Diospa cachaska Runan, wañuymanta causarimpunaycama,—nispa.

<sup>10</sup> Ajinaka ni piman chay imasmanta willarkancuchu. Paycunapurari tapunacusharkancu:

—“Wañuymanta causarimpunay” ¿imatataj niyta munan cay niskan-wanrí?

<sup>11</sup> Jesusta Elias manta tapuspa nerkanca:

—Yachachejcunanchejka nincu, Cristomanta ñaupajta Elías jamunanta. ¿Imaynataj chayrí?

<sup>12-13</sup> Jesusri nerka:

—Chaytaka allinta nincu Diospa palabranmanjina. Chekata Eliaska jamun tucuy imata allinyachinanpaj. Astawanrí niyquichej: Eliaska jamorkaña. Bautizaj Juan Eliasjina jamorka ñaupakeyta. Runastaj payman sajrata ruwarkancu imatachus munaskancuta. Chaywanpis Diospa palabranpi ajinallatataj nin, Diospa cachaska Runanka ashqha imasta ñac'arinanta, manacajpaj khawaska canantawan,—nerka Jesús.

*Jesús thañichin millay supayniyoj waynata*

<sup>14</sup> Jesuska paywan cajcunawan cutimuspa yachacojcunanta israel yachachejcunatawan tariparka. Paycunatataj ashqha runa chaupipi churanacushajta ricorka. <sup>15</sup> Chay ashqha runasri mana yuyaymanta Jesusta ricorkancu. Correspa payta napaycorkancu. <sup>16</sup> Jesustaj israel yachachejcunata taporka:

—¿Imamantataj churanacusharkanquichej paycunawanrí?

<sup>17</sup> Chay ashqha runasmantari uj runa payman cuticherka:

—Yachachejný, wawayta pusamorkayqui upayachej supayniyoj caskanraycu. <sup>18</sup> Maypichá payta jap'in chayka pampaman wijch'un. Phosokotajina llausata suruchin siminmanta, quirusninta c'aruchispa wañuskatajina ruwan. Ñapis yachacojcunayquita nicorkaniña wawaymanta supayta kharkonanca, manataj aterkancuchu, —nispa.

<sup>19</sup> Jesustaj nerka:

—¡Ay, Diospi mana jap'icoj runas! ¡Mayc'ajcamataj kancunawan casaj! ¡Mayc'ajcamataj kancunata muchuskayquichej! Cayman waynata pusamuwaychej, —nispa.

<sup>20</sup> Waynata payman pusamorkancutaj. Chay supayka Jesusta ricuspa waynata t'ucuwan jap'iycucherka. Waynataj pampaman urmarka. Chokaycachacuspataj siminmanta phosokota ajtorka. <sup>21</sup> Jesús waynaj tatanta taporka:

—¿Mayc'ajmantañataj cayjina cashanrí?

Tatantaj cuticherka:

—Wawitamantapacha. <sup>22</sup> Ashqha cutis payta ninaman yacumanpis chokaycun wañuchinanpaj. Kanrí, Señorný, sichus imata atinqui chayka, qhuyacuspa yanapariwaycu, —nispa.

<sup>23</sup> Jesusrí payta nerka:

—Kan ninqui: “Sichus atinqui”, nispa. Noka niyqui, Diospi jap'icojpajka tucuy ima aticun, —nispa.

<sup>24</sup> Niskantawancamataj waynaj tatanka khaparispa nerka:

—¡Diospi jap'icuni! ¡Yanapaway astawan jap'icunaypaj! —nispa.

<sup>25</sup> Astawan ashqha runa tantacamoja ricuspa Jesuska chay quiquin-pacha millay supayta camacherka:

—Noka camachiyyqui, upa jok'ara supay: ¡Llojsiy paymanta, amataj ni jayc'aj ujtawan payman yaycuychu! —nispa.

<sup>26</sup> Supayri waynata khaparichispa sinch'ita t'ucuchispataj paymanta llojserka. Waynataj wañuskajina carka. Chayraycu ashqhas nisharkancu, wañupuskanta. <sup>27</sup> Jesusrí maquinmanta jap'ispa jataricherka. Waynataj sayaricorka.

<sup>28</sup> Jesús wasiman yaycojin yachacojcunan sapallancupi taporkancu:

—¿Imaraycutaj nokaycu mana aterkaycuchu chay millay supayta kharkoytarí?

<sup>29</sup> Paycunaman cuticherka:

—Cay layata kharkoyka mana aticunchu manachayrítucuy sonkowan Diosmanta mañacuyllawan, —nispa.

*Jesús ujtawan sut'inchan wañuyninmanta causarimuyinmantawan*

<sup>30</sup> Chaynejmanta llojsispataj Galilea jallp'anejta rerkancu. Jesuska yachacojcunanta yachachishaskanraycu, riskanmanta ni pi yachananta munarkachu. <sup>31</sup> Paycunata nisharkataj:

—Noka, Diospa cachaska Runan, sajra runaspa maquisnincuman jaywaska casaj, wañuchiwankancutaj. Quinsa p'unchaymantari causarimpusaj, —nispa.

<sup>32</sup>Yachacojcunari mana yacharkancchu Jesuspa niskanka imatachus niyta munaskanta. Chaywanpis manchachicorkancu niskanmanta payta tapuya.

### *Maykenchus curaj canman*

<sup>33</sup>Capernaum llajtaman chayarkancu. Wasipi cashaspataj Jesuska yachacojcunanta taporka:

—¿Imamantataj tapunacusharkanquichej ñanta jamushasparí?

<sup>34</sup>Ch'inllataj carkancu. Ñanta jamushaspa paycunaka churana-corkancu maykennincuchus aswan curaj caskanmanta. Chayraycu tapojtenka ni imata nerkanccchu. <sup>35</sup>Chanta tiyaycuspa chay chunca iscayniyoja wajyaytawan paycunaman nerka:

—Pillapis curajpaj khawaska cayta munajka, tucuy runasmanta pisipaj churacunan tiyan. Tucuypa yanapajnincutaj canan tiyan, —nispa.

<sup>36</sup>Ajinapi uj wawata chaupincupi sayacherka. Mark'aricuspataj yachacojcunanta nerka:

<sup>37</sup>—Nokapi jap'icojka cayjina wawata, “Walejta jamunqui”, niyta atinman. Chaywanka noka quiuiyta nishawan. Sichus nokata, “Walejta jamunqui”, niwan chayka, mana nokallatachu nishawan. Manachayrí cachamuwjniytapis nishallantaj, —nerka Jesús.

### *Mana contranchejpi cajka nokanchejwanmin*

<sup>38</sup>Chanta Juan Jesusta nerka:

—Yachachejníy, uj runata ricorkaycu atiyniyoj sutiyquiwan supaycunata kharkoshajta. Mana kanta nokacyujina khatej caskanraycu payta jarc'ayta kallaererkaycu, —nispa.

<sup>39</sup>Jesús nerka:

—Ama payta jarc'aychejchu. Sutiypi uj jatun t'ucuna ruwanata ruwajka, manamin chay khepanpachallataj nokamanta sajrata parlanmanchu. <sup>40</sup>Mana contranchejpi cajka nokanchejpa allinninchejpashan. <sup>41</sup>Chekata niyquichej: Pillapis ujyanapaj yacuta kosunquichejman Cristo jachacojcunan caskayquichejraycu chayka, payman Dios cutichiponka, —nispa.

### *Urmachej imasmanta*

<sup>42</sup>Nillarkataj:

—Cay juch'uycitus nokapi jap'icojcunamanta ujninta, pillapis juchaman urmachinman chayka jay phutiy, ari, chay runapajka! Paypajka aswan allin canman wañupunan. Allin canman paypaj jatun molino rumita cuncanman warqhucuspa, runas jatun kochaman payta wijch'uycunancu. <sup>43</sup>Sichus maquiyqui juchaman urmachisunquiman chayka, qhuchurpacuy. Ch'ulla maquiyopjis wiñay causayman yaycuya atinqui. Chayka aswan allinpuni cashan iscaynin maquisniyoj uqhu pacha ninaman wijch'uycuska canayquimantaka. Chay ninaka ni jayc'aj wañunchu. <sup>44</sup>Chaypitaj wiñay wañuypi ñac'arenkancu. <sup>45</sup>Sichus chaquiyqui juchaman urmachisunquiman chayka, qhuchurpacuy. Ch'ulla chaquiyopjis wiñay causayman yaycuya atinqui. Chayka aswan allinpuni cashan iscaynin chaquisniyoj uqhu pacha ninaman wijch'uycuska canayquimantaka. <sup>46</sup>Chaypitaj wiñay wañuypi

ñac'arenkancu. <sup>47</sup> Sitajchus ñawiyqui juchaman urmachisunquiman chayka, siq'irpacuy. Ch'ulla ñawiyopis janaj pachaman\* yaycuya atinqui. Chayka aswan allinpuni cashan iscaymin ñawisniyoj uqhu pacha ninaman wijch'uycuska canayquimantaka. <sup>48</sup> Chaypitaj wiñay wañuypi nac'arenkancu.

<sup>49</sup> [Chayraycu sajra munayniyquichejta atipaychej. Llaquiyuncata muchuspa chay munayniyquichejta atipanquichej. Llaquiyka ninajinamin. Niskasniyta casuytaj cachijinamin. <sup>50</sup> Ajinata niskasniyta casuspa llaquiyuncata muchuwajchej chayka, wiñay cusikas canquichej. Mana urmachiskas canayquichejpaj niskasniyta casuychejpuni.]<sup>†</sup> Kancunapurapis allillanpi causacuychej,—nerka Jesús.

## 10

### *Jesús yachachin casaraskacunapaj*

<sup>1</sup> Galileamanta llojsispataj Jesús rerka Judea jallp'aman Jordán mayu chimpanej jallp'asmanpis. Jakaypi purishajtintaj watejmanta may ashqha runa payman tantacamoj. Watejmanta paycunata yachachisharka costumbrenmanjina. <sup>2</sup> Chanta fariseos Jesusman kayllamorkancu. Parlaskanpi pantachiyyta munaspataj taporkancu:

—¿Camachiwaskanchejmanjina uj khari warminta wijch'upuya atil-lanchu?

<sup>3</sup> Payrí paycunaman nerka:

—¿Imatataj Moisés camachisorkachej?

<sup>4</sup> Cuticherkancutaj:

—Moiseska kharita sakellarka warminta wijch'upuya divorcio pa-pelta jaywaspa,—nispa.

<sup>5</sup> Jesusrí paycunaman nerka:

—Moisés chayta camacherka kancuna Diospa quiquin camachiskanta mana casuya munaskayquichejraycu, rumi sonkoyoj runas caspa.

<sup>6</sup> Kallariypi Dios tucuy imata ruwarka. Chaymantapacha kharita warmitapis churarka. <sup>7</sup> Chayraycu khareka sakenan tiyan tatanta mamantapis warminwan ujchaska cananpaj. <sup>8</sup> Iscaynincutaj ujchaska cankancu. Ajinaka manaña iscaychu cancu, manachayrí ujllaña. <sup>9</sup> Chayraycu Diospa ujchaskanta runaka ama t'akachunchu,—nerka Jesús.

<sup>10</sup> Wasipiña cashaspa yachacojcunan ujtawan chay jawa Jesusta taporkancu. <sup>11</sup> Paycunaman nerktaj:

—Pillapis warminmanta t'akanacuspa waj warmiwantaj casaracun chayka, warminpa contrampi khenchachacun. <sup>12</sup> Sitajchus warmi kosanmanta t'akanacuspa waj khariwantaj casaracun chayka, khenchachacun,—nispa.

### *Jesús wawasta munacun*

<sup>13</sup> Uj cuti wawitasnincuta Jesusman pusamusharkancu maquisninta churaspa paycunapaj Diosmanta mañaripunanpaj. Yachacojcunataj pusamojcunata c'amerkancu. <sup>14</sup> Chayta ricuspa Jesús phiñacorka, yacha-cojcunanta nerktaj:

—Sakeychej wawitasta nokaman jamunancuta. Amañataj paycunata jarc'aychejchu. Dios paycunajinata munacuyninwan camachenka.

\* 9:47 Literal: Diospa reinon. † 9:50 Ninayan.

<sup>15</sup> Chekata niyquichej: Waquin runas wawitajina Diosta jap'incu Camachejnincupaj. Pillapis wawitajina mana jap'ejrí janaj pachaman<sup>\*</sup> yaycuya manapuni atinchu,—nerka Jesús.

<sup>16</sup> Paytaj wawitasta mark'aricuspa sapa ujman munacuywan maquis-ninta churarka, paycunapaj Diosmanta mañaripuspa.

*Uj khapaj runamanta*

<sup>17</sup> Jesús wasimanta llojsispa ñanpi cashajtinña uj runa correspa paypa ñaupakenpi konkoricorka. Taporkataj:

—Cacha. Yachachejný ¿imatataj ruwanay tiyan wiñay causay chayaketa jap'inaypaj?

<sup>18</sup> Jesustaj payman nerka:

—Dioslla c'achaka. Chanta kanka ¿imaynapitaj noka c'acha caskayta niwanquirí? <sup>19</sup> Yachanqui Diospa camachiskasninta: Ama khen-chachacuychu; ama runata wañuchiychu; ama suwaychu; ama llullacuspa runamanta willaychu; ama pacaymanta runamanta imantapis khechuychu; tatayquita mamayquitapis casuy,—nispa.

<sup>20</sup> Runarí nerka:

—Yachachejný, tucuy cay Diospa camachiskasninta wawamanta-pacha casorkani,—nispa.

<sup>21</sup> Jesustaj payta khawaycuspa munacorka. Paytataj nerka:

—Uj imallaña jarc'asunqui. Ripuy, tucuy capuuniyquita vendemuy, kolketataj wajcha runasman jaywaramuy. Ajinapi khapaj capuuniyqui janaj pachapi canka. Chanta nokawan jamuspa yachacojniy cay,—nerka Jesús.

<sup>22</sup> Chay niskanmantari runaj uyanka ujjinayarka. Mayta phuticus-pataj riporka, may khapaj caskanraycu.

<sup>23</sup> Muyuninta khawaspa Jesuska yachacojcunaman nerka:

—iKhapaj runaska janaj pachaman<sup>†</sup> wiñay causayniyoj canancupajka ñac'ayta yaycuya atenkancu! —nispa.

<sup>24</sup> Yachacojcunaka chay niskanmanta t'ucorkancu. Jesusrí ujtawan paycunata nerka:

—Wawsný, khapaj capuynincipi sonkoncuta churajcunaka ñac'ayta janaj pachaman<sup>‡</sup> yayconkancu. <sup>25</sup> Jatun camello uywaraj astawan atinman yaycuya agujaj ningrinman, khapaj runa janaj pachaman<sup>§</sup> yaycunanmantaka,—nispa.

<sup>26</sup> Mayta t'ucuspa yachacojcunapura tapunacusharkancu:

—Ajina cajtenka ¿pitaj janaj pachaman<sup>\*</sup> yaycuya atinmanrí?

<sup>27</sup> Jesusri paycunata allinta khawaycuspa nerka:

—Cayka runacunapaj mana aticunchu. Diospajrí aticun, Dioska tucuy atiyniyoj caskanraycu,—nispa.

<sup>28</sup> Chaymanta Pedro nerka:

—Khaway, nokaycu ari, tucuy imaycuta sakespa kanta khatishaycu,—nispa.

<sup>29</sup> Jesustaj cuticherka:

—Chekata niyquichej: Uj runa atinman sakeyta wasinta chayrí waukesninta chayrí panasninta chayrí mamanta chayrí tatanta chayrí wawasninta chayrí chajrasninta. Sichus cayta saken nokaraycu

\* **10:15** Literal: Diospa reinon. † **10:23** Literal: Diospa reinon. ‡ **10:24** Literal: Diospa reinon. § **10:25** Literal: Diospa reinon. \* **10:26** Literal: Diospa reinon.

sumaj willanasraycupis chayka,<sup>30</sup> cay p'unchaycunapi sakeskanmanta, pachaj cutis astawan cutichiska payman canka. Ajinaka wasisniyoj, waukesniyoj, panasniyoj, mamasniyoj, wawasniyoj, chajrasniyoj canka. Payri muchuchiskapis canka nokaraycu. Jakay jamoj p'unchaycunapirí wiñay causayniyojmin canka.<sup>31</sup> Ashqha runas cay pacha imasraycu sumajpaj khawaska cajcunaka jakay p'unchaypi pisipaj khawaskas cankancu. Ashqha runas cunan p'unchaycunapi pisipaj khawaska cajcunari, jatunpaj khawaskas cankancu,—nerka Jesús.

*Jesús sut'inchan wañuyninmanta causarimuyinmantawan quinsa cajtaña*

<sup>32</sup> Ashqha runas Jesuspis Jerusalenman ñanta risharkancu. Jesús ñaupajta rishajtin yachacojcunanka khepanta t'ucushaj khatisharkancu, ni imata paymanta yuyayta atispa. Wajcuna khaticushallarkan-cutaj, paycunapis manchachicuspa risharkancu. Ujtawantaj Jesús chunca iscayniyoj yachacojcunanta wajnejman pusarka. Chay jamoj p'unchaycunapi imachus paywan ruwacoj risharka, chayta paycuman willarka:

<sup>33</sup> —Khawaychej, Jerusalenman rishanchej. Chaypimin noka, Diospa cachaska Runan, yupaychana-wasimanta curajcunaman israel yachachejcunamanpis jaywaska canay tiyan. Nokata wañunaypaj juchachawankancu, waj llajtayoj runasmantaj jaywaycuwankancu.<sup>34</sup> Paycunaka nokata asipayawankancu. Nokaman thokaycuwankancu, jasut'iwankancu, wañuchiwankancutaj. Quinsa p'unchaynинmantataj causarimpusaj,—nerka Jesús.

*Jacobojtawan Juanpatawan mañacuskancu*

<sup>35</sup> Chanta Zebedeoj wawasnin Jacobowan Juanwan Jesusman kayllay-corkancu. Nerkancutaj:

—Yachachejný, munaycu ruwapunawaycuta imatachus mañacuskaycuta,—nispa.

<sup>36</sup> Jesustaj nerka:

—¿Imata ruwapusunayquichejtataj munanquichejrí?

<sup>37</sup> Paycunaka cuticherkanca:

—Atiynyquiwan camachinayquipaj tiyaycuspa, kanwan cusca tiyaycuchiwaycu, ujniycuta paña ladoyquiman ujniycutataj llok'e ladoyquiman,—nispa.

<sup>38</sup> Jesusrí cuticherka:

—Kancunaka mana yachanquichejchu imatachus mañacushaskayquichejta. Manchayta ñac'arinay tiyan. Chayka uj copapijina junt'aña. ¿Chayta ujyayta atiwajchejchu nokajina? ¿Atiwajchejchu ñac'ariyman yaycuya wañucama nokajina?

<sup>39</sup> Paycunaka nerkanca:

—Arí, atiycu,—nispa.

Jesustaj paycunata nerka:

—Junt'a copata ujyanquichej nokajina. Wañucama ñac'ariymantaj yaycunquichej nokajina.<sup>40</sup> Astawanrí camachinaypaj tiyaycuspa, paña ladoyman chayrí llok'e ladoyman tiyaycuchinayka, mana nokamantachu. Manachayrí picunapajchá waquiercha, chaycunataka Dioslla tiyaycuchenka,—nispa.

<sup>41</sup> Chayta uyarispera chay waj chunca yachacojcunanka Jacobopaj Juan-pajwan phiñacorkancu.<sup>42</sup> Jesusri paycunata wajyaspa nerka:

—Yachanquichejjina llajtasta camachejcunaka runasta llaquichispa camachiskancuta. Callpayojcunapis atiynincumanjina tucuy imapi runaswan casuchicuncu.<sup>43</sup> Kancuna uqhupeka mana ajinachu canka. Astawanrí kancunamanta pillapis atiynijoj cayta munajka tucuy sonkowan yanapasojniyquichej canan tiyan.<sup>44</sup> Kancunamanta pillapis curajpaj khawaska cayta munajka tucuya casoj canan tiyan.<sup>45</sup> Ajinallatataj noka, Diospa cachaska Runanpis, mana runas yanapanawancupajchu jamorkani. Manachayrí noka runasta yanapanaypaj jamorkani. Astawanpis paycuna wañunancumanta noka wañusaj juchancumanta cacharichinaypaj,—nerka Jesús.

*Jesús thañichin ciego Bartimeota*

<sup>46</sup> Jesús yachacojcunanwan Jericó llajtaman chayarkancu. Chaymanta ashqha runaswan llojsishajtinctaj, Timeoj wawan Bartimeo chay ñannejpi tiyacusharka. Payka ciego caskanraycu runasmanta mañacoj.<sup>47</sup> Nazaret llajtayoj Jesús chaynejta rishaskanta uyarispataj khapariyta kallarerka:

—¡Jesús, Davidpa miraynin,<sup>†</sup> qhuyacuway nokata! —nispa.

<sup>48</sup> Chay ashqha runastaj payta c'amisharkancu:

—¡Ch'in cay! —nispa.

Payri aswan sinch'ita khaparerka:

—¡Davidpa miraynin,<sup>‡</sup> qhuyacuway! —nispa.

<sup>49</sup> Jesusri chayta uyarispa sayarka, nerktaj:

—Payta wajyaychej, —nispa.

Chanta ciego runata wajyaspa nerktancu:

—¡Sonkochacuy, jataricuy! Kanta wajyashasunqui, —nispa.

<sup>50</sup> Payri ponchonta wijch'uricorka aswan uskhayta rinanpaj. Phinquirispataj Jesusman chimparka.<sup>51</sup> Jesustaj payta taporka:

—¿Imatataj ruwasunayta munashanqui?

Ciegotaj cuticherka:

—¡Señorní, ricuya munani! —nispa.

<sup>52</sup> Jesusri payta nerka:

—Ripullayña. Diospi jap'icusquiyaycu thañiskaña canqui, —nispa.

Chay quiquinpacha ciegoka ricuya aterka. Ñantataj Jesusta khaticorka.

## 11

*Jesús yaycun Jerusalenman*

<sup>1</sup> Jerusalenman kayllasharkancu. Betfagé, Betania ranchos chekanpi Olivos niska orkonejpi cashajtincuña Jesuska iscay yachacojcunanta cachaspa nerka:

<sup>2</sup> —Riychej chimpa ranchoman. Chayman yaycuspataj manaraj chajnana malton burrota wataskata tarinquichej. Chay burrota phascaraspataj cayman khatimuychej.<sup>3</sup> Sichus mayken tapusonkachej: “¿Imaraycutaj burrota phascarashanquichej?” chayka, payta niychej: “Señorninchej cayta munan. Chaywanpis cunanpacha cutichimpusonka”, —nispa.

<sup>†</sup> **10:47** Literal: Wawan. <sup>‡</sup> **10:48** Literal: Wawan.

<sup>4</sup> Chay iscay yachacojcunataj rispa burrota tariparkancu puncu jawapi ñan kayllapi wataskata. Paycuna burrota phascarasharkancu.

<sup>5</sup> Chaypi cajcunamanta waquintaj taporkancu:

—¿Imatataj ruwashanquichej?    ¿Imapajtaj burrota phascarashanquichej?

<sup>6</sup> Paycunari cuticherkanca Jesuspa quiquin niskanwan. Chaypi cajcunataj sakellarkancu. <sup>7</sup> Burrotataj khaterkancu Jesusman. Ponchosnincuta burroman caronaycorkancu. Jesustaj burroman llok'arka.

<sup>8</sup> Pay rishajtintaj ashqha runas ponchosnincuta ñanninman mast'arkancu chay patata rinanpaj. Waquinpis camposmanta sach'a k'omercunata c'utumuspa mast'ashallarkancutaj.

<sup>9</sup> Ñaupajta rejcunapis khepanta rejcunapis khaparisharkancu:

—¡Dios yupaychaska cachun!\* ¡May jatunchaska Israelman Diospa cachamuskanka! <sup>10</sup> ¡Unay tatanchej Davidpa jamoj llajtanka† jatunchaska cachun! ¡Camachejinchej cunan jamushan! ¡Janaj pachapi Dioska may yupaychaska cachun‡ —nispa.

<sup>11</sup> Jerusalenman chayaspa yupaychana-wasiman Jesús yaycorka. Chaypitaj tucuy imata sumajta khawarka. Chanta ch'isiyacuyña caskanraycutaj chunca iscayniyoj yachacojcunawan Betaniaman terka.

### *Mano pokonyioj higo sach'amanta*

<sup>12</sup> K'ayantintaj Betaniamanta llojsipa Jesús yarkhachicorka.

<sup>13</sup> Carumanta uj higo sach'ata laphisniyoja ricuspa chimpaycorka higos canmanchus manachus chayta masc'anapaj. Chimpasparí ni imata tarerkachu, manachayka laphissllata. Manaraj higospa tiempontchucarka. <sup>14</sup> Yachachinanpajtaj sach'ata nerka:

—¡Amaña ni jayc'aj wiñaypaj ni pi pokonyiquita miqhuchunchu! —nispa.

Yachacojcunantaj chay niskanta uyarerkanca.

### *Yupaychana-wasi Diosta yupaychaspa mañacuna wasi*

<sup>15</sup> Jesús yachacojcunawan Jerusalenman chayaspa yapaychana-wasiman yaycorka. Chanta payka yupaychana-wasej pationpi vendejcunata rantejcunatawan kharkoya kallarerka. Kolke cambiajcunaj mesasnincuta, jaywana paloma vendejcunaj tiyacunasnincutawan tirrararka. <sup>16</sup> Manataj ni pitapis sakerkachu ni imata chayninta apananta.

<sup>17</sup> Chaymantataj yachachisharka:

—Chekata Dios palabranpi nin: “Yupaychana-wasiyka nokamanta mañacuna wasimin canan tiyan tucuy llajtasmanta runacunapaj”. Kan-cunari pacaymanta suwanayquichejpaj ruwaycacapunquichej, —nispa.

<sup>18</sup> Yupaychana-wasimanta curajcuna israel yachachejcunapiwan chayta uyarispá imaynapi Jesusta wañuchiya masc'asharkancu. Paytarí manchachicorkancu tucuy chay ashqha runas paypa yachachiskanta sumajpaj khawaskancuraycu. <sup>19</sup> Ch'isiyatataj Jesús yachacojcunawan llajtamanta llojsiporkancu.

### *Ch'aquiska higo sach'amanta quiquinchana*

\* **11:9** Literal: Hosanna.    † **11:10** Literal: reinon.    ‡ **11:10** Literal: Hosanna.

<sup>20</sup> K'ayantin tutamanta llajtaman cutishaspa chay higo sach'ata ri-corkancu saphinmantapacha ch'aquiskata. <sup>21</sup> Chanta Pedroka Jesuspa niskanmanta yuyaricuspa payta nerka:

—¡Yachachejný, khaway! ¡Contranpi c'amerkanqui, chay higo sach'aka ch'aquipuska! ¿Imaynataj cayrí?

<sup>22</sup> Jesustaj cuticherka:

—Diospi jap'icuychej. <sup>23</sup> Chekata niyquichej: Pillapis cay orkota ninman: “Caymanta okhariska cay, jatun kochamantaj wijch'uykuska cay”, nispa chayka, paypaj ruwaconka. Astawanrí payka Dios chayta ruwananta tucuy sonkowan creeshananpuni tiyan mana iscayrayaspa.

<sup>24</sup> Chayraycu niyquichej: Imatachus Diosmanta mañacunquichej, paypi jap'icuspapuni tucuy sonkowan creeychej mañacuskayquichejta kosuskayquichejtaña, capusonkachejtaj. <sup>25</sup> Chaywanpis Diosmanta mañacushaspa runasta perdonaychej. Imamantapis pipaj phiñaska cawajchej, chayta konkapuychej. Ajinata runasta perdonaychej janaj pachapi caj Dios Tatayquichejpis pantaskasniyquichejmanta perdonasunayquichejpaj. <sup>26</sup> Sitajchus mana perdonanquichejchu chayka, janaj pachapi caj Dios Tatayquichej manallataj kancunatapis perdonasonkachejchu, —nerka Jesús.

### *Jesupsa atiyninmanta tapuncu*

<sup>27</sup> Jesús yachacojcunganwan ujtawan Jerusalenman chayarkancu. Yupaychana-wasi patiopi pay purishajtintaj israel curajcuna payman chimpamorkancu. <sup>28</sup> Nerkancutaj:

—Niwaycu ¿ima atiywantaj cay imasta ruwashanqui? Chayrí ¿pitaj cay atiyta kosorka cay imasta ruwanayquipaj?

<sup>29</sup> Jesusrí cuticherka:

—Nokapis ujta tapuskayquichej, kancunapis cutichiwaychej. Chanta willaskayquichej ima atiywanchus cay imasta ruwaskayta. <sup>30</sup> Niwaychej ¿pitaj cachamorka Juanta runasta bautizananpaj? ¿Dioschu chayrí runaschu? Cutichiwaychej, —nerka Jesús.

<sup>31</sup> Paycuna uqhutaj tanteyacuspa ninacusharkancu:

—Sichus nisunman: “Dios payta cachamorka”, nispa chayka, Jesús tapuwasun: “¿Imaraycutaj payta mana creerkanquichejchu?” <sup>32</sup> Nitaj atinchejchu niyta runas payta cachamuskancuta, —nispa.

Runaska tucuy sonkowan creerkancu Juan Diospa willajnin caskanta. Chayraycu paycunata manchachicuspa chay churanacojcunanka.

<sup>33</sup> Jesusman cuticherkanca:

—Mana yachaycuchu, —nispa.

Jesustaj paycunaman nerka:

—Ni nokapis willaskayquichejchu ima atiywanchus cay imasta ruwaskayta, —nispa.

## 12

### *Sajra llanc'ajcunamanta quiquinchaná*

<sup>1</sup> Jesuska quiquinchanaswan paycunaman parlayta kallarerka. Nerkataj:

—Uj runa jallp'anpi ashqha uva sach'itasta yuracharka, perkawan muyuyucucherka. Tokota allaspataj uva sarunata ch'irwanapaj, alto wasitataj khawanapaj ruwarka.

<sup>1</sup> Llanc'ajcunamantaj jallp'anta arrendaycorka. Chanta jallp'ayoj runaka caru llajtaman riporka. <sup>2</sup> Uva pallana tiempopitaj camachinta llanc'ajcunaman cacharka pokoynimanta payman konancupaj. <sup>3</sup> Llanc'ajcunari payta jap'ispa sinch'ita makarkancu mana imayojlatalataj cachaporkancu. <sup>4</sup> Ujtawan jallp'ayoj runaka waj camachinta cacharka. Paytari umanpi sinch'ita tacarkancu chaywanpis p'enkayta ruwarkancu. <sup>5</sup> Ujtawan cacharka wajta. Paytari wañucherkancu. Ashqha wajcunata cachallarkataj. Llanc'aj runasri chay cachasmanta waquinta sek'orkancu, waquintataj wañucherkancu.

<sup>6</sup> Jallp'ayoj runajtaka caporkaraj ujwan. Cayri carka may munaska wawan. Chay khepapitaj cay wawanta cacharka. Nisharkataj: "Wawaytaka jatunpaj khawankancupuni", nispa. <sup>7</sup> Chay llanc'aj runasri nina-cusharkancu: "Cay wawanka cay jallp'ata tatanmanta jap'enka. Jacu payta wañuchisun jallp'an nokanchejpata cananpaj", nispa. <sup>8</sup> Payta jap'ispa wañucherkancu, jallp'amantataj wijch'orkancu. <sup>9</sup> ¿Imanankataj uva jallp'ayoj señorka chay llanc'aj runastari? Cayta ruwanka: Jamuspa chay llanc'aj runasta wañurachenka. Waj llanc'ajcunamantaj jallp'anta arrendanka.

<sup>10</sup> Cayta Diospa palabranpi ¿manachu leerkanquichej? "Wasichajcuna rumita khawaspa khesacharkancu. Wasita sinch'ita sayachinanpajri chay khesachaska rumeka aswan sumaj carka". <sup>11</sup> Chaytaka Señor Dios ruwan. Nokanchejpajtaj uj t'ucuna cashan, —nerka Jesús.

<sup>12</sup> Tucuy chay israel curajcunaka reparacorkancu Jesús chay quiquinchanawan paycunamanta parlaskanta. Chayraycu payta jap'iycuchiyya churacorkancu. Astawanri chay ashqha runasta manchachicorkancu. Payta sakespataj riporkancu.

### *Jesusta tapuncu impuestomanta*

<sup>13</sup> Churanacojcunanka Jesusman waquincunata cacharkancu. Chay cachaskasri carkancu fariseocunamantawan Herodesta khatejcunamantawan. Paycunaka Jesusta parlaskanpi pantachispa jap'iycuya munasharkancu. <sup>14</sup> Jamuspataj nerkan:

—Yachachej, yachaycu parlaskayqueka cheka caskanta. Runastapis mana rijch'acuynillanmantachu khawanqui, manachayri caskancumanta. Chaywanpis cheka cajta yachachishanqui imatachus Dios munan runas ruwanancuta. Cunan kan niwaycu: ¿Nokanchej, israelcuna, Romano gobiernoman impuestota konachu? ¿Konanchejchu chayri manachu konanchej? —nerkan.

<sup>15</sup> Jesús allinta yacharka puraj uyawan tapuskancuta. Chayraycu paycunata nerka:

—¿Imaraycutaj pantachiwayta munanquichejrí? Uj kolketa apamuwaychej khawanaypaj, —nispa.

<sup>16</sup> Paymantaj apamorkancu. Chanta Jesús taporka:

—¿Pejpa uyantaj pejpa sutintaj cay kolkepi cashanri?

Cuticherkan:

—Romano curaj camachej Cesarpata, —nispa.

<sup>17</sup> Chayraycu Jesús paycunata nerka:

—Cesarpata cajtaka Cesarman koychej; Diospata cajtataj Diosman koychej, —nispa.

Paymantataj t'ucorkancu chay cutichiskanmanta.

### *Jesusta tapuncu causarimuymanta*

<sup>18</sup> Saduceos nej cancu wañuska runaska mana causarimunancuta. Paycunamanta waquin Jesusman jamuspa nerkan:

<sup>19</sup> —Yachachej, Moisés nokanchejpaj kelkarka: “Sichus uj casaraska runa mana wawayoj wañupunman chayka, paypa wauken casarachun wañojoja viudanwan. Chayta ruwachun wawa cananpaj curaj waukenpa sutin ama chincapunanpaj”. <sup>20</sup> Cunari, carkancu kanchis waukes. Curaj cajka casaracorka mana wawayojtaj wañuporka. <sup>21</sup> Chanta iscay caj khareka wañojo waukenpa viudanwan casaracorka. Paypis wañuporka mana ni uj wawata rejsispa. Quinsa cajwanpis quiquillantaj carka. <sup>22</sup> Ajinataj carka kanchis waukesnintinwanpis. Sapa uj curaj waukenpa viudanwan casaracorka. Sapa ujtaj mana ni uj wawata rejsispa wañuporka. Khepata chay warmipis wañupullarkataj. <sup>23</sup> Cunanka, wañuska runas causarimojtincu chay warmi kanchis runaswan casarcuskanmanta ¿maykennincoj warmintaj cankarí? —nispa.

<sup>24</sup> Jesustaj paycunaman cuticherka:

—Diospa palabranta mana entiendenquichejchu nitaj atiynintapis rejsinquichejchu. Chayraycu cay imaspi pantaskas canquichej.

<sup>25</sup> Imaynachus Diospa angelesnenka mana casaracuncuchu, ajinallataj causarimuskancumanta runas mana casaraconcancuchu.

<sup>26</sup> Chaywanpis wañuska causarimpunancumantari: Moisespa libronpi kelkaskataka ¿manachu leerkanquichej? Dios nina lauraj sach'itamanta nimorka: “Noka cani Abrahampa Diosnin, wawan Isaacpata Diosnin, allchhin Jacobpatapis Diosnintaj”, nispa. Chayta nerka chay runas unay wañupuskancu khepataña. <sup>27</sup> Diospajka wañuskaspis causashancu. Chayraycu pay mana wañuskacunaj Diosnincuchu, manachayrí causashajunaj Diosnincumin. Kancunaka ancha pantaskas canquichej, —nerka Jesús.

### *Munacuy camachiskamanta*

<sup>28</sup> Israel yachachejcunamanta ujri tapunacuskancuta uyarerka. Jesús sumajta cutichiskantapis ricorka. Chayraycu payman kayllamuspa taporka:

—Yachachejný, tucuy camachiskacunamanta ¿maykentaj aswan jatun caj camachiskarí?

<sup>29</sup> Jesustaj cuticherka:

—Aswan jatun caj camachiskaka caymin: “¡Israel runacuna uyariychej! Señor Diosnincheka sapan c'ata Señormin. <sup>30</sup> Munacuy Señor Diosniyquita tucuy sonkoyquiwan, tucuy causayniyquiwan, tucuy yuyayniyquiwan, tucuy callpayquiwanpis”. <sup>31</sup> Iscay cajtaj cay: “Runamasiyquita munacuy kan quiuiyquitajina”. Caycunamanta aswan jatun camachiskaka mana canchu, —nispa.

<sup>32</sup> Chanta chay yachachejka Jesusta nerka:

—Arí, Yachachejný, sumajta ninqui. Dioska sapan c'ata caskanta, paymanta wajka mana caskantapis. <sup>33</sup> Sichus uj runa Señor Diosninta munacun tucuy sonkonwan, tucuy yuyayniwan, tucuy causayniwan, tucuy callpanwanpis chayka, Diosta cusichin. Runa-masintapis munacunan tiyan pay quiuiyquitajina. Ajinata Diosta cusichiyka aswan curaj cashan tucuy jaywanasmanta niskaka. Cachun uywa ruphachiska jaywana chayrí waj jaywanapis, —nispa.

<sup>34</sup> Sumaj yuyaywan cutichiskanta ricuspataj Jesuska nerka:

—Kanka, Diospa camachiskanta casunayquipajjina cashanqui, —nispa.

Manaña ni pipis astawan Jesusta tapoj churacorkachu.

*Cristoka Davidpa miraynintaj Señornintaj*

<sup>35</sup> Yupaychana-wasi patiopi yachachishaspataj Jesús nerka:

—Israel yachachejcunaka nincu, Cristoka Davidpa miraynin\* caskanta. ¿Imaynapitaj ajinata nincurí? <sup>36</sup> Quiquin David Santo Espirituneja sut'inchaska caspa cayta nerka: Señorninchej Dios nerka Señorniy Cristoman:

“Tiyaycuy nokawan cusca camachinanchejpaj churanacojcunayquita k'alata atipanaycama”,<sup>†</sup> nispa.

<sup>37</sup> Ajinata David quiquinpis Cristota, “Señorniy”, nispa, suticharka. Chanta ¿imaynatataj Cristoka Davidpa miraynillan<sup>‡</sup> canman? —nerka Jesús.

Chay ashqha runastaj cusiywan payta uyarej cancu.

*Israel yachachejcunamanta*

<sup>38</sup> Yachachispataj Jesuska nisharka:

—Sumajta khawacuychej waquin israel yachachejcunamanta. Paycuna puriya munancu sumaj p'achalliskas. Munancutaj plazaspi paycunata sumajta napaycunata. <sup>39</sup> Tantacuna-wasipitaj curajcunaj tiyanasnincipi tiyacuya munancu. Jatun miqhunaspipis sumaj khawaskacunaj tiyanasnincipi tiyacuya munancu. <sup>40</sup> Chaywanpis viudaspa pisi capuynincuta suwaspajina khechuncu. Diosmanta anchata mañacushaskancuwan sajra munaynincuta pacayta munancu. Cay runasta Dioska aswan sinch'iwan juchachanka, —nerka Jesús.

*Wajcha viudaj koskan*

<sup>41</sup> Yupaychana-wasipitaj kolke churana kayllanejpi Jesuska tiyacusharka. Ajinapi ricorka imaynata chay ashqha runas Diosman konancupaj kolke churanaman kolketa churashaskancuta. Ashqha khpajcunaka ashqhata churasharkancu. <sup>42</sup> Uj wajcha viudapis jamuspa iscay kolkesitusninta churarka. <sup>43</sup> Jesustaj yachacojcunanta wajyaspa paycunata nerka:

—Chekata niyquichej: Kolke churanaman cay ancha wajcha viudaj churaskanta khawaychej. Tucuy waj runaspa churaskancumantaka aswan ashqha carka Diospa yuyayninpaka. <sup>44</sup> Tucuy chay waj runaska ashqha capuynincoj puchuskanmanta Diosman korkancu. Payrí wajcha cayninmanta tucuy kolkenta korka. Chayka causanapaj casharkapis, —nispa.

## 13

*Yupaychana-wasej urmananmanta*

<sup>1</sup> Yupaychana-wasimanta Jesús llojsishajtin, yachacojcunamanta ujnin caj yupaychana-wasita sumajta khawaspa nerka:

—¡Yachachejný, khaway, cay wasichaycunata! ¡May jatuchej rumis wasispis cancu! —nispa.

<sup>2</sup> Jesustaj payman nerka:

\* **12:35** Literal: Wawan.    † **12:36** Literal: chaquisniy uraman churanaycama.    ‡ **12:37** Literal: Wawan.

—Tucuy cay jatun rumi wasista ricushanquichej, chaycunaka urmachiskas cankancu. Ni uj rumillapis sayashaj sakeskachu canka, —nispa.

*Jesús sut'inchan ñac'ariy p'unchaycunamanta*

<sup>3</sup> Chanta yupaychana-wasej chimpan Olivos orkoman chayaspa Jesús tiyaycucorka. Chaypi sapallan tiyacushajtintaj Pedro, Jacobo, Juan, Andreswan payman jamuspa taporkancu:

<sup>4</sup> —Willawaycu ¿mayc'ajtaj ajina canka? ¿Imastaj ricuchiwasajcu tucuy cay imas tucucunayashaskantí? —nispa.

<sup>5</sup> Jesús paycunaman parlayta kallarerka:

—Sumajta khawacuychej ama pantachiskas canayquichejpaj.

<sup>6</sup> Sutiypi ashqha runas llullacuspa jamonkancu. Nenkancutaj: "Nokamin Cristoka cani", nispa. Ashqhastataj pantarachenkancu.

<sup>7</sup> 'Chaywanpis guerrasmanta uyarispa guerrasmanta parlajta uyarisppapis ama manchachicuychejchu. Cay imaska cananpuni tiyan. Astawanrí manaraj tucucuyrajchu canka. <sup>8</sup> Uj ayllu waj aylloj contranpi okhariconka. Uj llajtayoj runas waj llajtayoj runaspa contranpi okhariconkancu. May sinch'ita jallp'apis qharcatitenka caynejpi jakaynejpitaj. Manchay yarkhaycuna canka. Chay imasrí onkocoj warmej nanayninpa kallariyninjina cashan.

<sup>9</sup> 'Astawanka kancuna quiquipuichejta khawacuychej. Israel curajcunaj ñaupakencuman jaywaycusonkachej. Tantacuna-wasispitaj sek'osonkachej. Camachejcunaj ñaupakencuman curaj camachejcunaj ñaupakencumanspis pusasonkachej yachacojcunay caskayquichejraycu. Ajinapi kancuna paycunaman willaranquichej. <sup>10</sup> Manaraj tucucuytari sumaj willanaska willaraskaraj canan tiyan tucuy runasman. <sup>11</sup> Curajcunaman jaywaycoj pusasojtiyquichejka, ama ñaupajta sonkoyquichejpi manchachicuspa yuyaychejchu imatachus ninayquichejta. Astawanpis Santo Espíritoj chay ratupi sonkoyquichejman churaskanta, chayta niychej. Manamin kancunallachu parlajcunaka canquichej, manachayrí Santo Espíritu. <sup>12</sup> Uj waukeka waukenta jaywayconka wañuchiska cananpaj. Uj tatapis wawanta jaywayconka. Wawaspis tatasnincoraj contrancupi okharicullankancutaj wañuchichinancupaj. <sup>13</sup> Kancunatapis tucuy runas chejnisonkachej yachacojcunay caskayquichejraycu. Tucucuycama Diospi confiacuspa muchojrí wiñay causayniyoj canka.

*Jerusalenpa tucucuyninmanta*

<sup>14</sup> Leejka cayta sumajta reparachun: Dios millachicun, chay thuñispas tucuchejta, maypi mana cananchu ricunquichej. Chayta ricuspacka Judea jallp'api cashaj runas orkosman aykecuchuncu. <sup>15</sup> Pillapis wasimanta jawapi\* cashajka ama yaycuchunchu capuyninta okharicojka. <sup>16</sup> Pillapis chajrapi cashajka amallataj cutiyecuchunchu ponchonta okharejka. <sup>17</sup> ¡Ay phutiy, ari, chay p'unchaycunapi wijsayoj warmispaj ñuñushaj wawitasniyojcunapajpis! <sup>18</sup> Diosmanta mañacushaychej ama para tiempopit aykecunayquichej cananpaj. <sup>19</sup> Chay p'unchaycunapeka ñac'ariy canka. Chayjina ñac'ariyka mana carkachu cay pacha kallariypi Dios tucuy imata ruwaskanmantapacha cunancama. Nitaj jayc'ajpis ajinaka cankachu. <sup>20</sup> Sitajchus Señor Dios chay ñac'ariy tiempota mana

\* **13:15** Literal: patapi. † **13:18** Literal: inviernopi.

pisiyachinmanchu chayka, ni pi causanmanrajchu. Astawanrí paypa ajllacuskasniraycu chay tiempota pisiyachenka yuyaskanmanjina.

<sup>21</sup> Chay p'unchaycunapi sitajchus pipis nisunquichejman: "¡Khaway, caypi Cristo cashan!" chayrí "¡Jakaypi cashan!" chayka, ama payta creeychejchu. <sup>22</sup> Llulla cristocuna llulla willajcunapis riqhurimonkancu. Chaywanpis ricuchinasta t'ucuna ruwanastawan ruwankancu Diospa ajllacuskasnintapis pantachinancupaj, sichus aticunman chayka. <sup>23</sup> Kancunaka allinta khawacuychej. Tucuy imata manaraj ruwacushajtin ñaupajtaña nerkyayquichej.

### *Jesuspas cutimuyininmanta*

<sup>24</sup> 'Astawanrí chay p'unchaycunapi runas ñac'ariskancumanta khepanta inti lakhayaycaponka quillapis manaña c'anchamonkachu. <sup>25</sup> Patamanta koyllurcuna urmarankancu. Cielopi cajcunata Dios cuyuchenka. <sup>26</sup> Chaymantamin runas ricuwankancu jamushajta phuyus chaupita. Noka, Diospa cachaska Runanka, jatun atiyniywan lliphipej c'anchaywanpis jamusaj. <sup>27</sup> Chaypacha Dioska angelesninta cachaspa ajllacuskasninta tucuy cay pachamanta tantachimonka.

### *Higo sach'amanta quiquinchana*

<sup>28</sup> 'Cay quiquinchanata higo sach'amanta yachacuychej: May-pachachus ramasnin k'omeryamun laphisinin p'uturamushajtinñataj kancuna yachanquichej k'oni tiempo chayamushaskantaña. <sup>29</sup> Ajinallatataj chay manchay imasta ricuspaka yachanquichej cutimunay p'unchayka kayllallapiña caskanta. <sup>30</sup> Chekata niyquichej: Tucuy cay imaska canka manaraj cay p'unchay runas wañurapushajtincu. <sup>31</sup> Cielospis jallp'apis tucucaponkancu; nokaj niskasniyri wiñaypaj mana tucucaponkachu. <sup>32</sup> Chay p'unchaytarí ni pi yachanchu ima ratuchus cananta, Tatay Dioslla yachan. Ni janaj pachapi angeles nitaj noka, paypa Wawanpis, yachanichu.

### *¡Rijch'ariskas allinta wakaychacushaychej!*

<sup>33</sup> 'Rijch'ariskas sumajta khawacushaychej, Diosmanta mañacusapuni. Manamin yachanquichejchu ima ratutachus cutimunayta. <sup>34</sup> Uj wasijoj runaka caruman rinanpaj, wasinmanta manaraj llojsishaspa camachisninman atiyta kon ruwananmanjina sapa uj ruwashananpaj. Puncu khawajtapis camachin, pay cutimunanpaj rijch'ariska wakaychananta. <sup>35</sup> Ajinata kancunapis rijch'ariskas allinta wakaychacushaychej. Manamin yachanquichejchu ima ratutachus noka, Señorniyquichej, jamunayta, ch'isiyaycuytachus, chaupi tutatachus, gallo wakaytachus, chayrí sut'iyamuytachus. <sup>36</sup> Pajtataj, ujllata mana yuyaskayquichejta Señorniyquichej cutimunman puñushajtataj taripasunquichejman. <sup>37</sup> Kancunaman niskaytaka tucuyman nishani: ¡Rijch'ariskas allinta wakaychacushaychej! —nerka Jesús.

## 14

### *Jatun parlanacupi Jesusta wañuchinancupaj jap'iycuya yuyarincu*

<sup>1</sup> Isçay p'unchayllaña casharka israelcunaj pascuancuman, [Dios unay tatasnincuta cacharichiskanta yuyarichinapaj].<sup>1\*</sup> Chay p'unchaycunapi

\* 14:1 Ninayan.

mana pokochinayoq t'antata miqhunancu caj. Chay p'unchaycunapitaj yupaychana-wasimanta curajcunawan israel yachachejcunapiwan Jesusuta wañuchinancupaj, pacayllamanta jap'iycuchiyyta masc'asharkancu.

<sup>2</sup> Ninacusharkancutaj:

—Ama jatun p'unchaycunapeka jap'iycuchisunchu, ama manchay ch'ajwata runas okharinancupaj, —nispa.

*Jesus k'apayniyoj aceitejinawan jawiska*

<sup>3</sup> Betania llajtapi Jesús casharka, lepra onkoyniyoj niska Simonpa wasinpi. Chaypi miqhushajtintaj uj warmi yaycumorka, c'achitu rumi<sup>†</sup> yuritupis okhariska. Yuritoka nardo purumanta sumaj k'apayniyoj aceitejinawan junt'a carka. Chaytaj ashqha kolkewan rantiska carka. Warmitaj yurituta p'aquerkospa chay k'apayniyoj aceitejinata Jesuspa umanman jich'aycuspa jawiyorka. <sup>4</sup> Chaypi cajcunamantataj waquin phiñacuspa paycunapura ninacusharkancu:

—¿Imaraycutaj cay sumaj k'apayniyoj aceitejinata usuchishanrí? <sup>5</sup> Uj wata pagopajjina vendecunman carka. Chay kolktaj wajcha runasman koska canman carka, —nispa.

Mayta phiñacuspa warmitaka sinch'ita c'amerkancu.

<sup>6</sup> Jesusrí nerka:

—Sakeychej. ¿Imaraycutaj payta llaquichishanquichejrí? Chaywanka may sumaj cajta ruwapuwarka nokapaj. <sup>7</sup> Wajcha runaska kancunawanpuni cashancu. Mayc'ajpis paycunata yanapayta munanquichej chayka, atillanquichej. Nokarí mana unaytañachu kancunawan casaj. <sup>8</sup> Payka atiskanta ruwarka. Jawiwaspa p'ampacuyniypaj waquichiwarka ñaupajtaña manaraj wañushajtiy. <sup>9</sup> Chekata niyquichej: Tucuy cay pachapi sumaj willanasta mayllapipis willaraspaka, chaypi cay warmej ruwaskanmantapis parlankancu paymanta yuyaricuspa, —nerka Jesús.

*Judas Jesusta jaywaycunapaj parlamuskanmanta*

<sup>10</sup> Iscariote niska Judaska Jesuspa chunca iscayniyoj cachasninemanta ujnin carka. Payka yupaychana-wasimanta curajcunaman Jesusta jaywaycunapaj rerka. Nerkataj:

—Noka Jesusta jaywaycuskayquichej, —nispa.

<sup>11</sup> Chayta uyarispá paycunaka mayta cusicorkancu. Judastataj nerka:

—Payta jaywaycuwaskaycumanta kanman kolketa kosajcu, —nispa.

Ajinamanta Judaska unanchacuspa masc'aj churacorka mayc'ajchus aswan allin canman Jesusta jaywaycunapaj.

*Jesuspa yachacojcunan pascua miqhunata waquichincu*

<sup>12</sup> Mana pokochinayoq t'anta miqhuna p'unchaycuna chayamorka. Ñaupaj caj p'unchaypeka wañuchinancu carka pascua corderota. Chay p'unchaypi yachacojcunan Jesusta nerka:

—Pascua miqhunata miqhunayquipaj ¿maypitaj munanqui waquichimunaycuta?

<sup>13</sup> Ajinapi yachacojcunamanta iscayta cacharka. Paycunatataj nerka:

—Riychej llajtaman. Chaypitaj uj yacu p'uñuta apaj runawan tin-cunquichej. Payta khatiychej. <sup>14</sup> Yayucuskan wasipitaj wasiyoj runata

<sup>†</sup> 14:3 Literal: alabastro.

niychej: "Yachachejinchej nisunqui: 'Nokapaj sala ¿maypitaj cashan yachacojcunaywan pascua miqhunata miqhunaypaj?' nispa".

<sup>15</sup> Paytaj uj jatun salata altos wasipi ricuchisonkachej. Chay salataj allinchaska tucuy imayoñña cashan. Chaypi waquichimuychej nokanchejpaj, —nispa.

<sup>16</sup> Chaymanta llajtaman rispa chay iscay yachacojcunaka tarerkancu tucuy imasta Jesuspa niskanmanjina. Chanta pascua miqhunata waquicherkancu.

*Jesús sut'inchán jaywaycojnín manta*

<sup>17</sup> Ch'isiyaytataj Jesús chay chunca iscayniyojwan chayman chayarka.

<sup>18</sup> Tiyacuspa miqushajtinctaj Jesús nerka:

—Chekata niyquichej: Kancunamanta ujniyquichej nokawan miqho-jmin jaywaycuwanka, —nispa.

<sup>19</sup> Paycunari llaquicuya kallarerkancu, ujmanta ujtaj Jesusta nerkanca:

—¡Mana nokaka caymanchu! —nispa.

<sup>20</sup> Jesusri paycunata nerka:

—Kancuna chunca iscayniyoj yachacojcunaymanta uj cashan. Payka nokawan cusca t'antata chuwapi chhapushan. <sup>21</sup> Noka, Diospa cachaska Runanka, rishani, Diospa palabranpi nokamanta niskanmanjina. Astawanrí jay phutiy, ari, noka jaywaycojpajka! Allin canman carka chay runapajka mana nacecunan, —nerka Jesús.

*Diospa mosoj tratonmanta*

<sup>22</sup> Miqushajtinctaj Jesús t'antata maquisnинwan jap'ispa Diosman graciasta korka. Chanta t'antata partispa sapa ujman jaywaspataj nerka:

—Cayta miqhuychej. Cayka cuerpo ninacun, —nispa.

<sup>23</sup> Copatapis jap'ispa Diosman graciasta kospa paycunaman jaywarka. Tucuyninctaj ujyarkancu.

<sup>24</sup> Paycunaman Jesús nerktaj:

—Cay yawarniyka Diospa mosoj traton atiynyjoj cananpaj jich'askamin. Yawarniyka ashqha runacunapaj jich'aska canka paycuna ama wiñaypaj wañunancupaj. <sup>25</sup> Chekata niyquichej: Manaña ujyasajchu cay uvasmanta ruwaskata chay p'unchaycama. Chanta mosojta ujyasaj Tataywan kancunapiwan,<sup>‡</sup> —nerka Jesus.

<sup>26</sup> Chanta Diosta yupaychanancupaj taquiytawan chay salamanta llojsipa Olivos orkoman rerkancu.

*Jesús sut'inchán Pedroj urmaynin manta*

<sup>27</sup> Yachacojcunamantaj Jesús nerka:

—Cunan tuta tucuyniyquichej nokata sakerpayawanquichej. Cayka canka Diospa palabranpi niskanmanjina: "Michejta wañuchisaj, ovejastaj ch'ekeraskas cankancu". <sup>28</sup> Astawanrí wañuymanta causarimuspa Galileaman ñaupaskayquichej, —nerka Jesús.

<sup>29</sup> Pedrotaj Jesusman nerka:

—Tucuynincu sakerpayasuncuman chaypis, nokaka manapuni, —nispa.

<sup>30</sup> Jesustaj Pedrota nerka:

<sup>‡</sup> **14:25** Literal: Diospa reinonpi.

—Chekata niyqui: Cunan tutapacha, manaraj gallo iscay cutita wakashajtin, kanka quinsa cutitaña ninqui, nokata mana rejsiwaskayquita, —nispa.

<sup>31</sup> Pedroka atipacuspa sinch'iwan nerka:

—Sichus kanwan cusca wañunay canman chaypis, ni jayc'aj nisajchu, kanta mana rejsisuskaytaka, —nispa.

Ajinallatataj tucuynincu nerkanca.

*Jesús Getsemanípi*

<sup>32</sup> Jesuska Getsemaní niska huertaman chayaspa yachacojcunganman nerka:

—Caypi tiyaricushaychej noka Diosmanta mañacamunaycama, —nispa.

<sup>33</sup> Jesusri pusacorka Pedrota, Jacobota, Juantawan. Sonkonpitaj kallarerka may llaquiywan t'ucurayayta jatun phutiyninpi.

<sup>34</sup> Paycunatataj nerka:

—Manchay llaquiska cani, llaquiywantaj wañunayashaniña. Caypi suyaychej, wakaychacuychejtaj, —nispa.

<sup>35</sup> Ajinapi Jesuska tumpatawan ñauparispa uyan pampacama c'umuycorka. Diosmantataj mañacorka, sichus aticunman chayka, chay manchay ñac'ariyenka khechuska cananta.

<sup>36</sup> Mañacuspataj nerka:

—Munaska Tatáy, kanpajka tucuy ima aticun. Cay ñac'ariypi wañunayta nokamanta khechupuway. Astawanrí ama nokaj munayniyka ruwacuchunchu, manachayka kanpa munayniyqui ruwacuchun, —nispa.

<sup>37</sup> Chanta cutimuspa chay quinsantinta puñushajta taripaspa, Pedrota nerka:

—Simón ¿puñushanquichu? ¿Manachu uj ratullatapis rijch'ariska cayta aterkanqui? <sup>38</sup> Rijch'ariskas wakaychacuychej Diosmanta mañacuychejtaj juchaman ama urmachiskas canayquichejpaj. Allin cajta ruwayta munashanquichej, chaypajrí kancunaka mana callpayojochu canquichej, § —nerka Jesús.

<sup>39</sup> Chanta ujtawan rispa chay quiquillantataj Diosmanta mañacusharka.

<sup>40</sup> Ujtawan cutimuspapis paycunata puñushajllatataj tariparka, puñuywan atipaskas cashaskancuraycu. Chaymantataj ni imata aterkancuchu cutichiyta. <sup>41</sup> Quinsa caj cutipi cutimuspataj paycunata nerka:

—¿Puñushanquichejpunichu? ¡Puñucullayche! ¡Chayllataña! Chay hora chayamunña. Uyariychej: Noka, Diospa cachaska Runanka, juchasapaspa maquisnincuman jaywaycuskaña cashani. <sup>42</sup> ¡Jataricuychej, jacu ripuna! ¡Khaway, jaywaycuwajniyka kayllamushanña! —nerka Jesús.

*Jesús jap'ycunancupaj jaywaska*

<sup>43</sup> Jesús parlashajtillanraj Judaska riqhurimorka. Payka Jesuspa chunca iscayniyoj cachasninemanta ujníñ carka. Paywan cuscataj ashqha runas jamorkancu t'ujsina espadaswan makana c'aspiswan. Paycunaka israel curajcunaj cachamuskasnincu carkancu.

<sup>44</sup> Jaywaycoj Judaska pusamuskacunganman ñaupajtaña yachaycuchiska:

—Pitachari noka napaycuspa much'aycusaj, chaymin canka. Payta jap'ycuychej. Pusanquichej sumaj wakaychaskata, —nispa.

---

§ **14:38** Literal: Espirituyquichej munan; aychayquichejrí mana atinchu.

<sup>45</sup> Ajinaka chayamuytawancama, Jesusman kayllayucuspa, “¡Yachachejiní!” nispa, may munacuywanjina much'aycorka. <sup>46</sup> Chay runastaj Jesusta jap'iycorkancu.

<sup>47</sup> Chaypi cajcunamanta ujnintaj espadanta siq'icuspa uj runata, wajtaspataj, ningrinta c'uturparerka. Chay c'uturpariska runari yupaychana-wasimanta curajpa camachin carka.

<sup>48</sup> Churanacojcunanman Jesuska nerka:

—¿Runa wañuchi suwata jap'ejjinachu nokata jap'ej jamunquichej espadaswan c'aspiswan? <sup>49</sup> Sapa p'unchay yupaychana-wasi patiopi yachachispa nokaka kancunawan carkani, manataj jap'iycuwardakanquichejchu. Astawanrí ajina canan tiyan Diospa palabran junt'acunapaj, —nispa.

<sup>50</sup> Chaymantataj Jesusta sakerpayaspa, tucuynin yachacojcunan aykecorkancu.

<sup>51</sup> Uj waynari jatun llillanawan khataycucuska Jesusta khatispasharka. Paytataj jap'iycunayasharkancu. <sup>52</sup> Payrí llillananta sakerpayaspa k'alalla aykecorka.

*Curajcunaj tantacuynincoj ñaupakenman Jesusta pusancu*

<sup>53</sup> Ajinamanta yupaychana-wasimanta curajpa ñaupakenman Jesusta pusarkancu. Chaypitaj chay israel curajcuna tucuynincu tantacorkancu. <sup>54</sup> Pedrotaj Jesusta carullamanta khaticuspa yaycorka curajpa wasi pationcama. Payka chaypi caj yanapajcunawan cusca nina kayllapi k'oñicuspa tiyaricusharka.

<sup>55</sup> Jesus chay tantacuypi cashajtin curajcunaka contranpi willajcunata masc'asharkancu payta wañuchinancapaj. Chaypaj iscay quiquin willaskasta mana tarerkancuchu. <sup>56</sup> Ashqha llulla willajcuna Jesuspa contranpi willasharkancu. Willaskasnincuri mana quiquinchu carka.

<sup>57</sup> Waquin llulla willajcunaka curajcunaj ñaupakencupi nisharkancu:

<sup>58</sup> —Nokaycu Jesusta uyarerkyayu nishajta: “Noka cay maquiwan ruwaska yupaychana-wasita urmachisaj. Chanta quinsa p'unchaypi wajta wasichasaj mana maquiwan ruwaskata”, —nispa.

<sup>59</sup> Chaywanpis chay willaskasnincoka mana quiquinchu carka.

<sup>60</sup> Chanta yupaychana-wasimanta curajka paycunaj ñaupakencupi sayarispa Jesusta taporka:

—¿Manachu cutichicunqui?      ¿Imatataj chay runas contrayquipi willashancuri?

<sup>61</sup> Jesusrí ch'inlla carka nitaj ni imata cuticherkachu. Watejmanta curajka Jesusta tapullarkataj:

—¿Kanchu Cristo, yupaychaska Diospa Wawan canqui?

<sup>62</sup> Jesús cuticherka:

—Noka cani. Noka, Diospa cachaska Runanta, ricuwanquichejtaj curaj atiyniyoj Dioswan cusca camachishajta. Chaywanpis phuyus chaupita atiyniywan janaj pachamanta jamushajta ricuwanquichej, —nerka Jesús.

<sup>63</sup> Chay niskanta uyarispataj curajka p'achasninta lliq'icorka may phiñacuskanta ricuchinanpaj. Nerkataj:

—Manaña astawan willajcunata munanchejchu. <sup>64</sup> Kancuna uyarinquichejña cayjinata Diosta phiñachiskanta. ¿Kancunaman, imaynataj ríjch'asunquichejtaj? —nispa.

Tucuynincutaj Jesusta wañunapaj juchacharkancu.

65 Paycunamanta waquintaj kallarerkancu Jesusman thokaycuya. Uyanta khataycuspataj sajmashaspa nerkancu:

—Sut'inchay ¿pitaj sajmasunqui?

Yanapajcuna Jesusta pusashaspa sinch'ita makarkancu.

*Pedroj niskan, “Jesusta mana rejsinichu”*

66 Pedro chay wasi patiopi cashajtintaj chayman jamorka curajpa wasi camachisninnmanta uj imilla. 67 Payka Pedrota nina kayllapi k'oñicushajta ricorka. Payta khawaycuspataj nerka:

—Kanpis Nazaretmanta Jesuswanmin casharkanqui, —nispa.

68 Pedrotaj mananchacuspa nerka:

—Imatachus nishanqui mana yachanichu nitaj entiendenichu, —nispa.

Chayta nispa puncunejman rerka. Gallotaj wakarka. 69 Imillaka watejmanta Pedrota ricuytawan chaypi cajcunaman nerka:

—Cay runaka Jesuswan purejcunamantamin, —nispa.

70 Pedrori ujtawan mananchacorka. Uj chhicamantataj chaypi cajcu-naka Pedrota nisharkancu:

—Kanka paycunamantapuni canqui, Galileamanta caskayquiraycu. Parlaskallayquipi sut'i cashanqui, —nispa.

71 Chaymantataj Pedroka niyta kallarerka:

—¡Mana chekata parlani chayka, Dios wañuchiwichun! ¡Pimantachus parlashanquichej, chay runataka mana rejsinichu! —nispa.

72 Chay quiquinpachataj iscay caj cutita galloka wakarka. Pedrotaj chayta uyarispa Jesuspa cay niskanta yuyaricorka: “Manaraj gallo iscay cutita wakashajtin, kanka quinsa cutitaña ninqui, nokata mana rejsi-waskayquita”, nispa. Uyariskantawantaj sinch'ita wakarka.

## 15

*Jesuska camachej Pilatoj ñaupakenpi*

1 Sut'iyamuscantawancama israel curajcunaka, tucuynincu, uj yuyayllata Jesusmanta nerkancu. Yuyaskancumanjinataj Jesustaka wataskata apaspa camachej Pilatoman jaywaycamorkancu. 2 Pilatori Jesusta taporka:

—¿Kanchu israelcunaj camachejnин canqui?

Jesustaj payman cuticherka:

—Kan ninqui, ajinamin, —nispa.

3 Yupaychana-wasimanta curajcunataj ashqna imasta Jesuspa contrapi willasharkancu. 4 Pilatoka ujtawan tapullarkataj:

—¿Manachu imatapis cutichicunqui? ¡Uyariy, mashqha imastataj contrayquipi willashancu! —nispa.

5 Jesusrí manaña ni imata cuticherka. Chayraycutaj Pilatoka mayta t'ucorka.

6 Cunanka sapa pascuapi Pilatoka costumbremanjina cacharipunan caj wisk'achiska runasmanta maykentachus mañaskancuta.

7 Chaypachataj uj runa, Barrabás sutiyoj, carcelpi wisk'achiska casharka. Payka ch'ajwachej-masisninwan wisk'achiska casharka runata wañuchiskancuraycu. 8 Ashqha runas tantacamuspataj Pilatomanta mañayta kallarerkancu, wisk'achiskacunamanta ujta cacharichipunanta costumbremanjina. 9 Pilatotaj paycunata taporka:

—¿Israelcunaj camachejninta cacharimunaya munanquichejchu?

<sup>10</sup> Pilatoka yacharka israel curajcuna Jesusta envidiamanta payman jaywaycuskancuta. Chayraycu ajinata taporka.

<sup>11</sup> Yupaychana-wasimanta curajcunari runasman mayta yachaycuchisharkancu Pilatomanta astawanpis mañanancupaj Barrabasta cacharimunanta. <sup>12</sup> Pilatotaj ujtawan chay tantaska runasta taporka:

—¿Imanasajtaj chanta, israelcunaj camachejinin niskatarí?

<sup>13</sup> Runacunataj khaparispa cuticherkanca:

—¡Chacataska cachun! —nispa.

<sup>14</sup> Pilatorí tapullarkataj:

—¿Ima mana allintataj pay ruwarkari?

Paycunataj aswan sinch'ita khaparerkanca:

—¡Chacataska cachun! —nispa.

<sup>15</sup> Pilatotaj chay khaparejcunata cusichiyta munaspa, Barrabasta cachariporka. Jesustari jasut'iskanmantaña chacataska cananpaj soldadosman jaywaycorka.

### *Soldados Jesusta asipayancu*

<sup>16</sup> Soldadosri gobierno wasi patioman Jesusta pusaycorkancu. Chaypitaj tucuy soldadomasisnincuta wajyarkancu tantacunancupaj.

<sup>17</sup> Jesusta asipayanancupajtaj camachejtajina p'achallicherkanca cullipuca p'achawan. Qhishcamanta uj pilluta simp'aspataj umanman churarkancu. <sup>18</sup> Payta napaycuya kallarerkanca:

—¡Viva, israelcunaj camachejinin! —nispa.

<sup>19</sup> Sokoswantaj umanpi wajtasharkancu, thokaycusharkancu, yupaychanancupajjinataj ñaupakenpi konkoriycusharkancu. <sup>20</sup> Jesusta asipayayta tucuskancumanta khepatataj chay culli-puca p'achata orkhospa payta p'achasnirwan p'achallichiporkancu. Chanta payta jawaman pusarkancu chacatanancupaj.

### *Jesusta chacatancu*

<sup>21</sup> Jesusta ñanta pusashaspa soldadoska llajtaman uj yaycumushaj runata tariparkancu. Payka Cirene llajtayoj Simón carka, Alejandroja Rufojtarwan tatancu. Soldadostaj Simonta jap'ispa camacherkanca Jesusupa llasa chacatana cruzninta apananta.

<sup>22</sup> Llajta jawaman Jesusta pusarkancu Gólgota sutiyoj lugarman. Cay niyta munan T'oju Lugar. <sup>23</sup> Jesusmantaj mirra jampiwan chajruska vinota ujyachiyta munarkancu. Payrí chayta mana ujyarkachu.

<sup>24</sup> Jesusta chacatarkancu. Soldadosri paypa p'achasninta partinancupaj sorteyanacorkancu pipajchus sapa p'acha canman, chayta yachanancupaj.

<sup>25</sup> Chacataskancu horaka chaipi pakarinña carka. <sup>26</sup> Chacataska caskanmanta tucuy runas yachanancupaj kelkaska carka: "Israelcunaj camachejinin". <sup>27</sup> Chaypitaj Jesuswan iscay runa wañuchi suwastawan chacatarkancu, ujninta pañanman ujnintataj llok'enman. <sup>28</sup> Ajinapi junt'acorka cay kelkaskaka: "Payka juchasapawan yupaska carka".

<sup>29</sup> Chaynejeta purejcunapis umancuta qhiwirispa Jesuspa contranpi sajrata parlasharkancu:

—¡Kan yupaychana-wasita urmachej quinsa p'unchaypitaj watejmanta wasichajka! <sup>30</sup> Chacatanamanta uraycamuskayquiwan cacharichicuy, —nispa.

31 Quiquillantataj yupaychana-wasimanta curajcunawan israel yachachejcunawan Jesusta asipayaspa ninacusharkancu:

—Wajcunata cacharicherka, pay quiquinrí mana cacharichicuya atinchu. 32 Cristo israelcunaj camachejin sutichacun. Cunanpacha chacatanamanta uraycamuchun, nokaycu chayta ricuspa creenaycupaj, —nispa.

Paywan chacataska cajcunapis sajrata parlaspa c'amisharkancu.

*Jesuspa wañuynin*

33 Chaupi p'unchayña cashajtintaj tucuy jallp'api lakhayaycorka chaupi tardecama. 34 Chaupi tardetataj Jesuska sinch'ita khaparerka:

—Eloi, Eloi ¿lama sabactani? Cay niyta munan: Diosníy, Diosníy, ñimaraycutaj sakerpariwanquirí?

35 Waquin chaypi cajcunamanta payta uyarispa nerkanca:

—¡Uyariychej, Eliasta wajyashan! —nispa.

36 Ujnin runataj uskhayta rispa esponjata c'allcu ujyanaman chhaporka. Chay esponjata sokospi okhariçpataj Jesuspa siminman churarka ch'onkananpaj. Chayta ruwajri nerka:

—¡A ver Eliás jamonkachus chacatanamanta uraycuchej! —nispa.

37 Jesustaj jatunmanta khaparispa tucucaporka. 38 Yupaychana-wasipi warqhuska caj khatanataj iscayman lliq'icorka, patamanta uracama.

39 Jesuspa ñaupakenpi sayashaj romano capitanri Jesús imaynata wañupuskanta ricuspa, nerka:

—Chekapuni cay runaka Diospa Wawan carka, —nispa.

40 Waquin warmistaj caritullamanta khawamusharkancu. Paycuna uqhupi casharkancu Magdala llajtayoj Mariawan Salomewan waj Mariapiwan. Chay waj Mariaka sull'a caj Jacoboj Josejtawan mamancu carka. 41 Chay warmiska Jesús Galileallapiraj cashajtin khatejcunananapajcunansp carkancu. Waj ashqha warmispis cashallarkancutaj Jesuswan cusca Jerusalenman jamojcuna.

*Jesús p'ampaska*

42 Chay p'unchayka waquichicuna p'unchay carka k'ayantin samacuna p'unchay caskanraycu. Ch'isiyycojtinña 43 Arimatea llajtayoj José mana manchachicuspa camachej Pilatojman rerka. Chay Joseka curajcunaj tantacuynincumanta carka, c'achapaj khawaskataj. Paypis Dios tucuy runasta camachinanta mayta munaj. Payka camachej Pilatoj ñaupakenman Jesuspa cuerposta apacampunansp mañaj yaycorka. 44 Pilatoka Jesús wañuskaña caskanmanta t'ucorka. Chayraycu capitanta wajyaspa taporka chekachus wañuskaña caskanta. 45 Wañuskaña caskanta yachaspataj Joseman nerka:

—Atinqui apacapuyta, —nispa.

46 Josetaj linomanta awaskata rantimorka. Jesusta chacatanamanta uraycuchispataj chay awaskawan mayt'uycorka. Chanta orkopi uj rumi jusc'uman p'ampaska. Chay p'ampanka kakapi jusc'uska jatun carka. Jatun muyu p'alta rumitataj p'ampanka jusc'u puncuman muyuchispa churarka. 47 Magdala llajtayoj Mariataj José maman Mariapiwan ricorkancu maypichus Jesús churaska caskanta.

**16***Jesuspa causarimuyinin*

<sup>1</sup> Samacuna p'unchay tucucojtingama Magdala llajtayoj Mariawan Salomewan Jacoboj maman Mariapiwan sumaj k'apayniyoj jampita ranterkancu Jesusta jawimunancupaj. <sup>2</sup> Domingo p'unchaytaj allin tutamanta chay warmiska rerkancu Jesús p'ampaska carka, chayman. Chayanancupaj inteka llojsimorkaña. <sup>3</sup> Paycunataj tapunacusharkancu:

—¿Pitaj p'ampana puncumanta chay rumita muyurparichipuwasunrí?

<sup>4</sup> Khawarispataj chay rumita muyurparichiskataña ricorkancu. Chay rumeka may jatun carka. <sup>5</sup> P'ampanaman yaycuspataj uj wayna runata pañanejpi tiyacushajta ricorkancu. Chay runaka yuraj lliphipej khoysu p'achawan p'achalliska carka. Warmistaj chayta ricuspa mayta mancharicorkancu. <sup>6</sup> Payrí paycunaman nerka:

—Amaña manchachicuychejchu. Nazaret llajtayoj Jesusta masc'ashanquichej, chacataska carka, chayta. Payka causarimpunña, manañataj caypichu. ¡Khawaychej! Caypi payta churarkancu. <sup>7</sup> Astawanrí riychej Pedroman chay waj yachacojcunanmanwan willamuychej: Jesús kancunamanta Galileaman ñaupashanña. Chaypitaj payta ricunquichej, pay nisuskayquichejmanjina, —nispa.

<sup>8</sup> Warmisri p'ampanaman llojsispa aykecorkancu. Manchachicuywan qharcatitisharkancu. Ni piman ni imata nerkanachu manchachicuskancuraycu.

*Magdala llajtayoj Maria Jesusta ricun*

<sup>9</sup> Domingo p'unchayta causarimuspa tutamanta Jesuska ñaupajita Magdala llajtayoj Mariaman riqhurerka. Unayña Galileallapiraj cashaspa Jesuska paymanta kanchis supaycunata kharkorka. Chay carka, chay Mariaka. <sup>10</sup> Payka Jesuspa yachacojcunanman willamoj rispa paycunata llaquiskas wakashajta tariparka. <sup>11</sup> Jesusta causashajta ricuskanta willarka. Paycunari causashaskanta uyarishaspapis manapuni creerkancuchu.

*Yachacojcunana Jesusta ricuncu*

<sup>12</sup> Khepatataj paycunamanta iscayman Jesús riqhurerka wajjimanta ñianta campoman rishajtincu. <sup>13</sup> Chanta paycunaka Jerusalenman cutimuspa chay waj yachacojcunaman ricuskancuta willarkancu. Chay uyarejcunari nillataj creerkancuchu.

<sup>14</sup> Aswan khepatataj miqhunancupaj tiyacushajtincu quiquin chunca ujniyojnintinman Jesús riqhurerka. Paycunatari mana creeskancumanta rumi sonko caskancumantawan c'amerka, payta causarimuskata ricojcunata mana creeskanraycu.

*Sumaj willanasta tucuyman willaramuychej*

<sup>15</sup> Jesuska paycunaman nerka:

—Tucuy cay pachantinman riychej. Sumaj willanasta tucuy runasman willaramuychej. <sup>16</sup> Nokapi jap'icuspa bautizacojtaka Dios wiñaypaj cacharichenka. Nokapi mana jap'icojtarí wiñaypaj juchachanka. <sup>17</sup> Nokapi jap'icojcunaka cay ricuchinasta ruwankancu: Atiyniywan supaycunata kharkonkancu; waj runacuna jparlaynincuta mana yachaspapis parlankancu; <sup>18</sup> maquisnincuwan venenoyoj catarista okharenkancu; sichus wañuna jampita ujyancuman chaypis,

paycunata mana imanankachu; onkoska runastapis maquisnincuta churaspa thañichenkancu,—nerka Jesús.

*Jesús janaj pachaman okhariska*

<sup>19</sup> Ajinaka Señorninchej Jesús yachacojcunanman chay imasta nerka. Chaymantataj janaj pachaman okhariska carka Dioswan cusca camachinanpaj. <sup>20</sup> Yachacojcunanri Jerusalenmanta llojsispa tucuynejpi runasman willaramorkancu. Señorninchejtaj paycunata yanapasharka. Payka chay ricuchinasta ruwaspa paycunanejta ricuchisharka niskan atiyniyoj caskanta. Ajina cachun.

## EL SANTO EVANGELIO SEGUN SAN LUCAS

*Lucas Jesucristo sumaj willanasninta Teofiloman kelkarka*

<sup>1-3</sup> May c'acha Teofilóy: Cay sumaj willanaska nokanchej uqhupi Dios ruwaskanmantamin. Chay quiquin sumaj willanasta kallariymantapacha ricojcuna yachachejcunapiwan willawarkanchej. Chaymanjina ashqhasña kelkarkancu. Nokapis anchata munasharkani yachayta imaynachus tucuy cay caskantaka. Ajinapi sumajta masc'arkani kallariymantapacha yachanaypaj. Chayraycu ñaupajmanta cunancama ruwacuskasmanjina kelkarisuya yuyarkani. <sup>4</sup> Munashani tucuy cay imasmanta allinta yachanayquita yachacuskasniyquipis chekapuni caskanta. Chayraycu cay sumaj willanasta kelkamushayqui.

*Bautizaj Juanpa nacecunanmanta*

<sup>5</sup> Judea jallp'ata Herodes camachishajtin carka yupaychana-wasipi uj ruwanayo, Zacarías sutijo. Paypa llanc'ana tropan Abíaspa carka. Warmin Elisabetpis Aaronpa ayllunmanta carka. <sup>6</sup> Paycuna khari warmi Diosta cusichejpuni cancu. Diospa tucuy camachiskasninta sumajta casoj cancu mana faltaspa. <sup>7</sup> Elisabet mana wijsallicuyta atiskanraycu, mana wawayo carkancu. Chaypachataj iscaynincu ashqha watasniyojña carkancu.

<sup>8</sup> Zacariaspa tropan yupaychachinan p'unchaycuna chayamojtin pay llanc'asharka yupaychana-wasipi Diospa ñaupakenpi. <sup>9</sup> Ruwanayojcuna yachacuskancumanjina ruwarkancu sorteopi ujta ajllaspa inciensota k'oшñichinanpaj. Chaypaj Zacariasta ajllajtincoka yupaychana-wasi uqhuma yaycorka. <sup>10</sup> Inciensota k'oшñichishajtin tucuy tantaska runas yupaychana-wasi jawapi Diosmanta mañacusharkancu. <sup>11</sup> Chay quiquin-pacha Diosmanta uj willaj angel Zacariasman riqhurerka. Sayarkataj maypichus inciensota k'oшñichincu chay altarpa pañannejpi. <sup>12</sup> Zacarías angelta ricuspa mancharicuywan qharcatiterka. <sup>13</sup> Angeltaj payta nerka:

—Zacarías, amaña manchachicuychu, Dioska kanpa mañacuskayquita uyarinña. Elisabet, warmiyquitaj, uj khari wawata onkoconka. Paytaka Juanta sutichanqui. <sup>14</sup> Nacecuskanka anchata cusichisonka. Ashqha runaspis paypa nacekuskanmanta cusiconkancu, <sup>15</sup> payta Dios sumaj-paj khawaskanraycu. Mana ni jayc'aj ni vinota ni ima machanatapis ujyankachu. Nacekuskanmantapacha Santo Espirituwan junt'a canka. <sup>16</sup> Dios paywan cusca caskanraycu ashqha israel runasta Señor Diosnincuman cutirichenka. <sup>17</sup> Unay tiempopipis Diospa willajnin, Elías sutijo, atiywan Diospaj llanc'arka. Ajinallatataj cay wawaka runayaspa Diospaj llanc'anka. Tatasta wawasnincuwan allinyachenka. Payka Diosta mana casoj runasta chekanta yuyanancuta yachachenka casucoj wawasjina causanancupaj. Chayta ruwaspa Diospa runasninpá sonkosnincuta waquichenka pay jamunanpaj, —nerka angelka.

<sup>18</sup> Zacarías angelta nerka:

—¿Imaynapitaj caytaka yachasajrí? Nokaka machuña cani, warmiypis ashqha watasniyojña, —nispa.

<sup>19</sup> Angeltaj payman cuticherka:

—Noka angel Gabriel cani, Diospa ñaupakenpi sayaj. Paymin parlasoja cachamuwarka cay sumaj willanasta willasunaypaj. <sup>20</sup> Kanrí willasuskayta mana jap'icusayquiraycu upayanqui. Kan manaña atinquichu parlariyta willasuskay junt'acunancama. Willasuskayka junt'acunan p'unchaypi junt'aconka, —nispa.

*Zacarías upayapun*

<sup>21</sup> Zacarías yupaychana-wasi uqhupi cashanancama runas jawapi payta suyasharkancu. T'ucusharkancutaj uqhupi unayta khepacuskan-raycu. <sup>22</sup> Llojsispari paycunaman parlayta mana aterkachu. Chaymanta runas yacharkancu yupaychana-wasipi payman moskoypijina Diosmanta uj ima riqhiriskanta. Payrí upapacha maquisnillanwan paycunaman parlasharka.

<sup>23</sup> Yupaychana-wasipi ruwanasninta tucuspa wasinman cutiporka. <sup>24</sup> Chaymantapacha warmin Elisabet wijsallicorka. Phishka quillastataj payka pacacuspa wasillanpi cacorka. Nisharkataj: <sup>25</sup> “Ajinamanta Señor Diosniy qhuyawaspa khechupuwarka p'enkayniyta mana wawa wijsallicuya atiskaymanta. Cunanka manaña runas khesachawankancuchu”, nispa.

*Jesuspa nacecuyninmanta willan*

<sup>26</sup> Zacariasman riqhiriskanmanta sojta quillanman Dioska angel Gabrielta Galilea caj Nazaret llajtaman cachamullarkataj. <sup>27</sup> Chay angelta cachamorka María sutiyoj sipasman. Pay parlapayaskaña carka Josewan casaracunanjapaj. Josetaj camachej Davidpa ayllunmanta carka. <sup>28</sup> María casharka, chayman jamuspa angelka payta napaycorka:

—¡Dios allin p'unchayta kosunqui! Payka kanwan cashan. Kanmantapis mayta cusicun, —nispa.

<sup>29</sup> Mariaka cayta uyarispa manchariywan uqhunpi “¡ras!” nichicorka. Mayta t'ucuspataj yuyasharka sonkonpi: “Cayjina napaycuwaskanka ¿imatataj niyta munanrí?”

<sup>30</sup> Angel payta nerka:

—Amaña manchachicuychu, Dios kanta munacuywan ajllacususkan-raycu. <sup>31</sup> ¡Khaway! Wijsallicuspa uj khari Wawata onkocunqui. Paytataj Jesusta sutichanqui. <sup>32</sup> Payka sumaj c'acha, curaj runataj canka, c'ata Diospa Wawan caskanraycu. Tucuy atiyniyoj\* Dioska payta unay tatan Davidtajina camachinanpaj churanka. <sup>33</sup> Wiñaypajtaj Israel llajtata camachenka. Camachiynintaj ni jayc'ajpis tucuonkachu, —nerka angel.

<sup>34</sup> Mariataj angelta nerka:

—Maná kharitaka rejsinichu. Chayraycu ¿imaynataj cayka cankarí?

<sup>35</sup> Angeltaj payman cuticherka:

—Santo Espíritu kanman uraycamusonka. C'ata Diospa atiynintaj kanta c'anchaycamusonka. Chayraycu wawayqueka mana juchayoj, c'acha rejsiska canka, Diospa cheka Wawan. <sup>36</sup> ¡Khaway! Aylluyqui Elisabetpis uj khari wawata wijsallicorkaña ashqha watasniyojña cashaspapis. Cunantaj sojta quillaña wijsallicuskan cashan chay mana wawa rejsej niska warmeka. <sup>37</sup> Chekatapuni Diospa tucuy niskasnenka junt'aconka, —nispa.

<sup>38</sup> Chanta María nerka:

---

\* **1:32** Literal: Señor Dios.

—Diospa camachin cani. Nokaman niwaskayquimanjina ruwaska cachun, —nispa.

Angeltaj paymanta riporka.

*María watucamun Elisabetta*

<sup>39</sup> Ajinata María uskhayta waquichicuspa chekanta riporka orko orko Judea jallp'api uj llajtaman. <sup>40</sup> Chay llajtaman chayaspataj Zacariaspa wasinman yaycorka. Elisabettataj napaycorka. <sup>41</sup> Mariaj napaycuskanta Elisabet uyarejtin wijsanpi wawanka phinquirerka. Elisabetri Santo Espirituwan junt'aska carka. <sup>42</sup> Cusiywan khaparispataj Mariata nerka:

—Tucuy warmismanta kan astawan curajpaj khawaska canqui Dios kanta ajllacususkanraycu. Wawayquipis may curajpaj khawaska canka. <sup>43</sup> Maytapuni cusicuni Señornipyaman watucuwaskanmanta. Nokaka ni watucunawanpajjinapischu cani. <sup>44</sup> ¡Khaway! Napaycuwaskayquita uyarisojtiy wijsaypi wawa cusiymanta phinquirerka. <sup>45</sup> May cusiska kanka Señor Dios willasuskanta jap'icuskayquiraycu. Chekamanta nisuskanka junt'aconka, —nispa.

*María Diosta yupaychaspa taquin*

<sup>46</sup> Mariataj nerka:

—Mayta jatunchani Diosta tucuy sonkoywan.

<sup>47</sup> Mayta cusicushani juchamanta Cacharichiwajniy Diospi.

<sup>48</sup> Payka camachillan cashajtiypis wajcha caskayta qhuyacuyninwan khawawaspa, nokata ajllacuwarka.

Chekamanta cunanmantapacha tucuy runas may cusiska caskayta ni-wankancu.

<sup>49</sup> Tucuy atiynyoyj cheka Diosmin may jatun imasta nokapaj ruwarka.

Payka may c'acha, manapuni juchayojin.

<sup>50</sup> Unay tatasninchejmantapacha cunancama, Dioska wiñaypaj qhuya-cunpuni payta yupaychajcunataka.

<sup>51</sup> Dios atiyninwan jatuchej ruwanasta ruwarka.

Payka tucuy jatunchacojcunata atipaspay aykeracherka.

<sup>52</sup> Sajra camachejcunata sumaj tiyanasnincumanta uraycucherka, pisipaj khawaskacunatataj okharerka.

<sup>53</sup> Yarkhaska runasta allin imaswan sajsacherka.

Khapaj runastari mana imayoja ch'usajllata cachaporka.

<sup>54-55</sup> Dios ñaupa tatasninchejman nisksasninta junt'aspacamachin Israelta yanapaj jamunña.

Ajinamanta yuyaricorka qhuyacuyta Abrahamman tucuy paypa mirayninmanpis wiñaypaj, —nerka María.

<sup>56</sup> Payka quinsa quillata Elisabetwan cacuspa wasinman cutiporka.

*Bautizaj Juanpa nacecuynin*

<sup>57</sup> Elisabetpa onkocunan quilla junt'acorka. Khari wawatataj onko-corka. <sup>58</sup> Llajta-masisnin aylusninpwan uyarerkanco Dios payta cayjina-ta sumajta qhuyaskanta. Chayraycu paywan cusicorkancu. <sup>59</sup> Wawaj nacecuskanmanta pusaj p'unchayninpchi chay runas payta circuncidaj jamorkancu. [Chay señalta cuerponpi churarkancu runas yachanancupaj israelcuna Diospa runasnin caskancuta.]† Tatan Zacariaspa suti-nwantaj sutichayta munasharkancu. <sup>60</sup> Mamanrí nerka:

—Ama. Juanmin sutenka canan tiyan, —nispa.

† 1:59 Ninayan.

61 Paycunataj payman cutichererkancu:

—Ni pipis chay sutiyojka aylluquipeka canchu, —nispa.

62 Maquisnincuwantaj tatanta tapurerkancu: “¿Ima sutiwantaj sutichayta munanqui?”

63 Kelkanata mañacuspa Zacarías kelkarka: “Juanmin sutenka”. Tucuy paycunataj t'ucorkancu. 64 Chay quiquinpachataj Zacarías ujtawan parlarispas Diosta yupaycharka. 65 Tucuy llajta-masisnincutaj t'ucorkancu. Judea orkosnintinpi chay ruwacuskamanta tucuy runas parlancusharkancu. 66 Sonkoncupi yuyaspataj uyariskancumanta nina-cusharkancu:

—Cay wawaka ¿imayna runapunitaj wiñaspa cankarí? —nispa. Imaray-cuchus repararkancu Dios paywan cashaskanta yanapananpaj.

### *Zacarías sut'inchan*

67 Tatan Zacarías Santo Espirituwan junt'a carka. Sut'incharkataj Diospa munayninmanta ruwaskasnimantapis cayjinata:

68 —Yupaychaska cachun Israelpa Señor Diosnin. Imaraycuchus runasninta qhuyacuspa jamun juchasnincumanta cazarichinanpaj.

69 Atiyniyoj Cazarichiwajnincheta kowarkanchej camachin Davidpa ayllunmanta.

70 Caytaka ajinatapuni Dios unayña payman t'akaska willajcunaneja nerka:

71 “Enemigosniyquichejmanta cazarichiskayquichej tucuy chejnisoj-cunayquicheja”, nispa.

72 Ajinapi Dios unay tatasnincheta qhuyarka, paypa sumaj‡ tratonta paycunaman junt'arkataj.

73 Dios unay tatanchej Abrahamman juraspa chekatapuni nerka:

74 “Enemigosniyquichejmanta cazarichiskayquichej paycunata mana manchachicuspa nokata yupaychanawayquichejpaj.

75 Ajinata cusichiwaspa chekanta ruwanquichej ñaupakeypi tucuy causayniyquichejpi”, nispa.

76 Kanrí, wawáy, c'ata Diospa willajnin niska canqui.

Diospa ajllaskan§ jamunanpaj ñaupakenta rinqui runaspa sonkosnincuta waquichipuspa.

77 Diospa runasninta yachachinqui juchasnincuta khechuspa Dios paycunata cazarichinanta.

78 Diosninchej munacuynijoq qhuyacuynijojtaj.

Pay jamonka yanapanawanchejpaj.

Imaynata inti pakarimun, ajinallatataj Cazarichiwajnincheta janaj pachamanta jamonka juchamanta cazarichinawanchejpaj.

79 Janaj pachamanta lliphimonka lakhapi tiyacojcunaman wañunayashajcunamanpis. Nokanchejta Diosman allinyachispas puswasunchej allinta causacunanchejpaj, —nerka Zacarías.

80 Wawa Juantaj wiñasharka. Sumaj yuyawwantaj Diosta casunanpaj callpachacusharka. Payka ch'in lomaspi tiyacorkataj Dios israel runasman willaramoja cachanancama.

## 2

### *Jesucristo nacecuyin*

‡ 1:72 Literal: santo traton. § 1:76 Literal: Señor Dios.

<sup>1</sup> Jakay p'unchaycunapi uj curaj camachej Romano jallp'api carka, Augusto sutiyoj. Pay camacherka tucuy runas yupaska canancuta. <sup>2</sup> Cay ñaupaj yupayka carka camachej Cirenio Siria jallp'ata camachishajtin. <sup>3</sup> Tucuy runas sapa uj nacecuskan llajtaman yupachicoj rinancu carka. <sup>4</sup> Chayraycu Joseka Galilea jallp'a Nazaret llajtamanta llojserka. Judea jallp'a Belén llajtaman rerka Davidpa ayllunmanta caskanraycu. <sup>5</sup> Yupachicamunancupaj Mariata pusarka. Payka Josej warmin cananpaj mañaskaña carka. Manaraj cusca tiyacushajtinctaj wijsayojoña casharka. <sup>6</sup> Belenpi cashajtincu Maríaj onkocunan quilla junt'acorka. <sup>7</sup> Chaypitaj curaj khari wawanta onkocorka. Wawanta janantaswan mayt'orka. Uywa karanapi payta siriycucherka paycunapaj puñuna wasipi campo mana caskanraycu.

#### *Angeles michejcunaman riqhurimuncu*

<sup>8</sup> Chaypachallataj michejcuna Belén kaylla lomaspi casharkancu. Tutapi paycuna ovejasnincuta khawasharkancu. <sup>9</sup> Mana yuyaskamantataj Diosmanta uj angel paycunaman riqhurerka. Diosmanta c'anchaytaj michejcunaj muyuynintinpi llipherka. Michejcunataj mayta mancharicorkancu. <sup>10</sup> Angelrí michejcunaman nerka:

—Amaña manchachicuychejchu. ¡Khawaychej! Sumaj willanasta willayquichej tucuy runas cusicunancupaj. <sup>11</sup> Cunan Davidpa llajtan Belenpi juchamanta Cacharichej nacepusunquichej. Payka Diospa tucuy atiynyijoj ajllaskan\* Cristomin. <sup>12</sup> Wawata janantaswan mayt'uskata tarinquichej, uywa karanapi siriskata. Ajinamanta yachanquichej niskay cheka caskanta, —nispa.

<sup>13</sup> Ujllata chay angelwan ashqha angeles janaj pachamanta chay ujin-inwan riqhurimorkancu. Diostataj yupaycharkancu:

<sup>14</sup> —¡Janaj pachapi Dios yupaychaska cachun!

Cay pachapitaj Dios runasta payman allinyachicun.

Paycunamanta pay cusicun, —nispa.

<sup>15</sup> Angeles janaj pachaman cutirejtinctaj michejcuna ninacorkancu:

—Jacu ari, Belencama ricoj yachamojtaj Dios sut'inchawaskancheja, —nispa.

<sup>16</sup> Uskhayllata rispataj Mariata Josetawan khari Wawatawan uywa karanapi siriskata tarerkancu. <sup>17</sup> Michejcuna chayta ricuspa tatanman mamanmanpis willarkancu angel cay Wawamanta niskanta. <sup>18</sup> Tucuy uyarejcunataj michejcuna willaskancumanta t'ucorkancu. <sup>19</sup> Mariarí tucuy chay uj sumaj cajtajina sonkonpi wakaychacorka sumajtataj unanchacorka. <sup>20</sup> Michejcuna Diosta yupaychaspa jatunchaspataj lomasman cutiporkancu. Uyariskancumanta ricuskancumantapis Diosta jatuncharkancu. Tucuytaj carka angelpa willaskanmanjina.

#### *Jesusta sutichancu*

<sup>21</sup> Dios israelcunata camacherka khari wawata nacecuskanmanta pusaj p'unchayninpí circuncidanancuta señalta cuerponpi churaspa. Chay p'unchaypitaj Wawata suticharkancu Jesusta. Angel chay sutita willarkaña manaraj María wijsayoj cashajtin.

#### *Jesusta Diosman jaywancu*

<sup>22</sup> Moisespa camachiskanmanjina llimphuchacuna p'unchay junt'acorka. Chay p'unchay José Mariawan Wawata Jerusalén llajtaman

\* **2:11** Literal: Señor.

aparkancu, Diosman jaywanancupaj. <sup>23</sup> Ajinata payta aparkancu Diospa camachiskasninpi kelkaskamanjina: “Tucuy curaj khari wawata Diosman t'akaychej”. <sup>24</sup> Dios camachiskanmanjina warmi llimphuchacunapaj jaywajtaj rerkancu. Iscay jurc'utas chayrí iscay paloma irpas jaywana caj.

### *Simeón Jesusmanta sut'inchan*

<sup>25</sup> Chaypacha Jerusalenpi uj khari carka, Simeón sutiyoj. Pay chekan sonkoyoj runa carka Diosta yupaychajtaj. Cacharichej Cristota israel runasman jamunanta suyasharka. Santo Espíritu Simeonpa sonkonpi casharka. <sup>26</sup> Chay Santo Espíritu payman sut'incharkaña: “Señor Diospa ajllaskan Cristota ricunqui manaraj wañushaspa”, nispa. <sup>27</sup> Ajinamanta Santo Espíritu payta pusamorka yupaychana-wasiman. Quiquinpachataj Jesuspa tatasnin chayman Wawata apamullarkancutaj Moisespa camachiskanmanjina ruwanancupaj. <sup>28</sup> Simeontaj Wawata mark'aricorka Diostataj yupaycharka:

<sup>29</sup> —Señor Diosníy, cunanka camachiyquita pusacapuway niskayquimanjina.

Tucuy sonko cusiska wañupusaj.

<sup>30</sup> Kanpa ajllaskanta ricuniña.

<sup>31</sup> Payta waquierkeranqui tucuy runas ricunancupaj.

<sup>32</sup> Payta cachamorkanqui tucuy waj llajtayojcunaman munayniyquita ricuchinanpaj.

Cachamullarkanquitaj payta israel runasniyqui jatunchaska canancupaj kan paycunawan cashaskayquiraycu, —nispa.

<sup>33</sup> Jesusmanta ajinata niskanraycutaj tatan mamanwan t'ucorkancu.

<sup>34</sup> Simeontaj Diosmanta mañariporka paycunapaj. Chanta Jesuspa manan Mariaman nerka:

—Uyariway, Dios cay Wawata churarka. Ajinapi israelcunamanta ashqhas Diosmanta caruchaconcancu, ashqhastaj payman kayllay-conkancu. Jesús uj ricuchina canka. Ashqha runas cay ricuchinata khesachaspa churanaconcancu. <sup>35</sup> Ajinamanta sut'inchaconka sapa uj runa sonkonpi yuyaskanta. Kantapis, María, phutiy uj filoyoj jatun cuchillojina† quiquin sonkoyquita t'ujsenka, —nerka Simeón.

### *Diospa willajnin Ana*

<sup>36</sup> Chaypi uj warmi Diosmanta willaj cashallarkataj, Ana sutiyoj. Pay Fanuelpa ususin, Aserpa ayllunmanta carka, ashqha watayojoña. Sipas cashaspa casaracorka, kosanwantaj kanchis watañlata tiyacorka.

<sup>37</sup> Viudataj carka pusaj chunca tawayojo watataña. Yupaychana-wasita mana sakejchu. Astawanpis tuta p'unchay Diosta yupaychaj mana miqhuspa paymanta mañacoj caj. <sup>38</sup> Simeón parlashajtinraj Ana riqhurimorka. Paypis Diosmantaj graciasta korka. Israelcuna cachariskas canancuta tucuy suyacunaman Jesusmanta willasharka.

### *Nazaret llajtancuman cutipun*

<sup>39</sup> Jesuspa tatansnin Diospa camachiskasninmanjina ruwanancuta tucuya ruwarkancu. Galilea jallp'aman Nazaretman cutiporkancu.

<sup>40</sup> Jesuska wiñasharka callpachacusharkataj, Diosmanta yachaywan junt'ataj carka imaraycuchus Dios payta yanapasharkapuni.

---

† 2:35 Literal: espada.

*Jesús yupaychana-wasipi kheparicun*

<sup>41</sup> Sapa wata tatasnin rej cancu Jerusalenman pascua p'unchaycunapaj. <sup>42</sup> Ajinapi Jesús chunca iscayniyoj watayojoña cashajtin, tucuynincu pascua p'unchaycunapaj rerkancu. <sup>43</sup> Chay p'unchaycuna tucuojtintaj, Jesuspa tatasnin cutipusharkancu. Jesusrí Jerusalenpi kheparicaporka. Paycunataj chayta mana yacharkancuchu. <sup>44</sup> Astawanpis rejculawan cashaskanta yuyaspa uj p'unchay puriyta rerkancu. Ajinata ayllusnincu rejsiskasnincu chaupipi payta masc'asharkancu. <sup>45</sup> Mana tarispataj cutirerkancu Jerusalenman payta sinch'ita masc'aspas.

<sup>46</sup> Quinsa p'unchaymantaraj payta tarerkancu yupaychana-wasipi. Israel yachachejcunaj chaupincupi Jesús tiyacusharka. Jesús paycunata uyarisharka tapurisharkataj. <sup>47</sup> Jesusta tucuy uyarejcunari mayta t'ucorkancu yachayninmanta cutichiskasninnatapis. <sup>48</sup> Tatasnin Jesusta ricuspa mayta t'ucorkancu. Mamantaj Jesusta nerka:

—Wawáy ¿imaraycu cayta ruawaycu? Noka tatayquiwan ancha phutiywan kanta masc'ashaycu, —nispa.

<sup>49</sup> Jesustaj cutichispa nerka:

—Mamáy ¿imaraycutaj masc'ashawarkanquichej? Tatay Diospa wasinpeka canay tiyan ¿manachu chayta yachanquichej?

<sup>50</sup> Tatasnirí chay niskanta mana entienderkancuchu.

<sup>51</sup> Chanta Jesús paycunawan cutiporka Nazaretman paycunataj ca sojpuni. Mamantaj cay imasta sonkonpi uj may munaska imatajina wakaychacusharka. <sup>52</sup> Jesús wiñashallarkapuni yachayninpis yapacushal-larkapuni. Diospis runaspis paymanta cusicusharkancu.

**3***Bautizaj Juan willaran*

<sup>1-2</sup> Curaj camachej Tiberio chunca phishkayojoj watasña camachiskan-manta Dios churarka Juanta palabranta willarananpaj. Chaypachataj Poncio Pilato camachisharka Judea jallp'api tiyacojcunata. Herodestaj Galilea jallp'api tiyacojcunata camachisharka. Wauken Felipetaj Iturea jallp'api, Traconite jallp'api tiyacojcunatawan camachisharka. Lisanias sutiyoj camachishallarkataj Abilinia jallp'api tiyacojcunata. Chaypacha Anás Caifaspiwan yupaychana-wasimanta curajcuna casharkancu. Chaypachataj Juan, Zacariaspa wawanka, Diospa camachiskanta ch'in lomapi uyarerka. <sup>3</sup> Ajinamanta payka tucuy Jordán mayu kayllantinman rerka Diosmanta willaraspa. Nisharkataj runasta:

—Juchasniyquichejta sakespa Diosman cutiricuychej. Chaywanpis bautizacuychej, causayniyquichejta Diosman jaywaspa. Ajinapi Dios juchasniyquichejta khechupusonkachej, —nispa.

*Juan runaspa sonkosnincuta waquichin*

<sup>4</sup> Ajinata Diospa willajnin Isaías libronpi kelkarka:

Ch'in lomapi uj runa khaparishan:

“Uj jatun camachej jamojtin runas ñanninta waquichipuncu.

Purinasnintapis chekanta ruwancu.

<sup>5</sup> Tucuy t'okosta junt'achincu.

Tucuy orkosta mokostapis pampachancu.

Wist'u ñancunata chekanchancu.

T'oko puru ñancunatapis cuscachancu.

Ajinallatataj sonkoyquichejta waquichicuychej Diospa Wawan jamunapaj.

<sup>6</sup> Sapa uj runataj riconka Diospa cachamuskanta runasta juchancumanta cazarinapaj",

nispa.

<sup>7</sup> Ajinapi Juanka ashqha runas bautizacoj jamojcunaman nej:

—iKancuna runa wañuchi catarisjina canquichej! ¿Pitaj yuyaychaskachej Diospa jamoj c'ajaj phiñacuynimanta aykecunayquichejta? Sichus aykecuya munanquichej chayka, <sup>8</sup> juchasniyquichejta sakespa, Diosman cutiriskayquichejta allin ruwaskasniyquichejwan ricuchichej. Amataj kallariychejchu jatunchacuya sonkosniyquichejpi: "Abrahamka unay tatanchejmin. Chayraycu Dios qhuyashawaycu", \* nispa. Dioska atiyniyojmin ruwananpaj cay rumismantapis Abrahampa mirayninta. <sup>9</sup> Hachaka waquichiskaña cashan sach'a saphinmanta c'utunanpaj. Sapa sach'a mana allin pokojtaka runas c'utuspa ninaman wijch'uncu, —nerka Juan.

<sup>10</sup> Runas payta tapusharkancu:

—Niwaycu ¿imatataj ruwasajcu?

<sup>11</sup> Juanri paycunaman cutichisharka:

—Kancunamanta isgay p'achasniyoj cajka ujninta mana p'achayojman kochun. Ajinallatataj miqhunayoj cajpis mana miqhunayojman kochun, —nispa.

<sup>12</sup> Waquin impuesto jap'ejcunapis bautizacoj jamorkancu ricuchinancupaj juchasnincuta sakespa Diosman cutiriskancuta. Payta taporkancutaj:

—Yachachej ¿imatataj ruwasajcu?

<sup>13</sup> Juan paycunaman cuticherka:

—Runasmanta kolketa jap'inayquichej, chayllata jap'iychej amataj astawanka, —nispa.

<sup>14</sup> Soldados tapullarkancutaj:

—Nokaycupis ¿imatataj ruwasajcu?

Paycunata cuticherkataj:

—Ama makaspalla nitaj tumpaspallaka kolketa pimantapis khechuychejchu. Pagollayquichejwan cacuychej, —nispa.

<sup>15</sup> Israel runaska juchamanta Cacharichej Cristo jamunanta suyasharkancupuni. Sonkosnincipitaj Juanmanta tucuy tanteyacusharkancu: "¿Cay runaka Cacharichejchu canman?" <sup>16</sup> Juantaj tucuy runasman nerka:

—Chekatapuni nokaka yacupi bautizayquichej Diosman cutiriskayquichejta ricuchinapaj. Nokamanta uj aswan atiyniyoj jamushan. [Mana camachinpajjinapischu cani runalla caskayraycu.]<sup>†</sup> Payka Santo Espirituwan ninawantaj kancunata bautizaspa Espirituta sonkoyquichejman cachamusonkachej. <sup>17</sup> Paypa jorc'an maquinpi cashan wayrachinanpaj. Erantataj sumajta pichaspa trigonta pirwanman jallch'anka. Pajatarí ni jayc'aj wañoj ninawan ruphayuchenka.

\* 3:8 Ninayan. † 3:16 Ninayan.

<sup>18</sup> Chay niskaswan ashqha waj niskaspiwan Juan runasman yuyaychaspa willarasharka. <sup>19</sup> Chaywanpis Juanka camachej Herodesta waukenpa warmin Herodiaswan tiyacushaskanmanta c'amerka. Tucuy sajra ruwaskasninemantapis ricucherka. <sup>20</sup> Herodesrí payta mana casorkachu. Astawan sajrataraj ruwarka, Juanta carcelman wisk'aycuchispa.

### *Jesús bautizacun*

<sup>21</sup> Juan tucuy runasta bautizashajtin Jesuspis bautizacorka. Pay Diosmanta mañacushajtin, Dios janaj pachata quicharimorka. <sup>22</sup> Santo Espiritutaj paloma rijch'aypi ricucoj Jesusman uraycamorka. Janaj pachamanta Diostaj nimorka:

—Kanmin c'ata munaska Wawayka canqui. Kanwan may cusiska cani,—nispa.

### *Jesuspa ñaupa tatasnin*

<sup>23</sup> Jesuska quinsa chunca watasniyojjina cashaspa wasinmanta llosipa Diosllapaj ruwanasninta kallarerka. Runastaj yuyarkancu pay Joséj wawan caskanta. Josetaj Elíj wawan carka. <sup>24</sup> Paytaj Matatpa wawan carka. Paytaj Levíj wawan carka. Paytaj Melquij wawan carka. Paytaj Janaj wawan carka. Paytaj Joséj wawan carka. <sup>25</sup> Paytaj Matatiaspa wawan carka. Paytaj Amospa wawan carka. Paytaj Nahumpa wawan carka. Paytaj Eslij wawan carka. Paytaj Nagaipa wawan carka. <sup>26</sup> Paytaj Maatpa wawan carka. Paytaj Matatiaspa wawan carka. Paytaj Semeipa wawan carka. Paytaj Joséj wawan carka. Paytaj Judáj wawan carka. <sup>27</sup> Paytaj Joanaj wawan carka. Paytaj Resaj wawan carka. Paytaj Zorobabelpa wawan carka. Paytaj Salatielpa wawan carka. Paytaj Nerij wawan carka. <sup>28</sup> Paytaj Melquij wawan carka. Paytaj Adij wawan carka. Paytaj Cosampa wawan carka. Paytaj Elmodampa wawan carka. Paytaj Erpa wawan carka. <sup>29</sup> Paytaj Josuepa wawan carka. Paytaj Eliezerpa wawan carka. Paytaj Jorimpa wawan carka. Paytaj Matatpa wawan carka. <sup>30</sup> Paytaj Levíj wawan carka. Paytaj Simeonpa wawan carka. Paytaj Judáj wawan carka. Paytaj Joséj wawan carka. Paytaj Jonanpa wawan carka. Paytaj Eliaquimpa wawan carka. <sup>31</sup> Paytaj Meleaj wawan carka. Paytaj Mainanpa wawan carka. Paytaj Matataj wawan carka. Paytaj Natana pa wawan carka. <sup>32</sup> Paytaj Davidpa wawan carka. Paytaj Isaipa wawan carka. Paytaj Obedpa wawan carka. Paytaj Boozpa wawan carka. Paytaj Salmonpa wawan carka. Paytaj Naasonpa wawan carka. <sup>33</sup> Paytaj Aminadabpa wawan carka. Paytaj Arampa wawan carka. Paytaj Esrompa wawan carka. Paytaj Farespa wawan carka. Paytaj Judáj wawan carka. <sup>34</sup> Paytaj Jacobpa wawan carka. Paytaj Isaacpa wawan carka. Paytaj Abrahampa wawan carka. Paytaj Taréj wawan carka. Paytaj Nacorpa wawan carka. <sup>35</sup> Paytaj Serugpa wawan carka. Paytaj Ragaupa wawan carka. Paytaj Pelegpa wawan carka. Paytaj Heberpa wawan carka. Paytaj Salaj wawan carka. <sup>36</sup> Paytaj Cainanpa wawan carka. Paytaj Arfaxadpa wawan carka. Paytaj Sempa wawan carka. Paytaj Noéj wawan carka. Paytaj Lamecpa wawan carka. <sup>37</sup> Paytaj Matusalenpa wawan carka. Paytaj Enocpa wawan carka. Paytaj Jaredpa wawan carka. Paytaj Mahalaleelpa wawan carka. Paytaj Cainanpa wawan carka. <sup>38</sup> Paytaj Enospa wawan carka. Paytaj Setpa wawan carka. Paytaj Adanpa wawan carka. Paytaj Diosmanta carka.

**4***Jesús supayta atipan*

<sup>1</sup> Jesús Jordán mayumanta ripuspa Santo Espirituwan junt'a carka. Santo Espiritutaj ch'in pampapi pusaycachaspa paywan casharka. <sup>2</sup> Chaypachataj tawa chunca p'unchaycunantinpi supay Satanás Jesusta juchallichiyta munasharka. Jesustaj chay p'unchaycunapi mana ni imatapis miqhorkachu. Chay khepata pay yarkhachicorka. <sup>3</sup> Ajinata supay Satanás Jesusman nerka:

—Sichus Diospa Wawan canqui chayka, camachiy cay rumita t'antaman cutinanta, —nispa.

<sup>4</sup> Jesustaj payman cuticherka:

—Diospa palabranpi nin: “Runaka mana miqhunallawanchu causanan. Manachayrí Diospa tucuy palabranwan causanan”, —nispa.

<sup>5</sup> Chanta supay Satanás Jesusta pusarka orko pataman. Uj ratulapi cay pachapi caj tucuy camachiska llajtastataj payman ricucherka.

<sup>6</sup> Nerkataj:

—Kanman koskayqui atiyta camachinayquipaj tucuy cay llajtasta khapaj capuynincutawan. Nokaman jaywaska carka. Chayraycu jaywani pimanchus munani. <sup>7</sup> Sichus kan konkoricuspa yupaychawanquiman chayka, tucuy kanpata canka, —nispa.

<sup>8</sup> Jesustaj payman cuticherka:

—Dios palabranpi nin: “Señor Diosnillayquita yupaychanqui. Pay sapallanman konkoricuspa casunqui”, —nispa.

<sup>9</sup> Chanta supay Satanás Jesusta Jerusalenman pusarka. Yupaychana-wasej patanpi sayaricherka. Jesusta nerkataj:

—Sichus Diospa Wawan canqui chayka, cay patamanta chay uraman phinquiycuy pampaman. <sup>10</sup> Diospa palabranpi nin:

Dios camachenka angelesninta kanta wakaychasunancupaj.

<sup>11</sup> Nintaj:

Angelesninta camachenka kanta wakaychasunancupaj.

Maquisnincuwantaj kanta jap'isonkancu rumisman ama urmanayquipaj.

<sup>12</sup> Jesús payman cuticherka:

—Dioska nin: “Ama Señor Diosniyquej atiyninta manacajpaj mañacuychu”, —nispa.

<sup>13</sup> Supay Satanás tucuy imaymana pantachinaswan munasharka juchallichiyta Jesusta. Mana atispari payta sakerpaspa chincaporka uj p'unchaycama.

*Jesús kallarin llanc'ayninta Galilea jallp'api*

<sup>14</sup> Chanta Galilea jallp'aman Jesús cutipuspa Santo Espíritoj atiyninwan junt'a carka. Runastaj tucuy chay jallp'anejpi Jesusmanta uyarerkancu. <sup>15</sup> Tantacuna-wasisnincupi paycunata yachachisharka. Tucuy runastaj payta curajpaj khawarkancu.

*Jesús willaran Nazaretpi*

<sup>16</sup> Chanta Jesús Nazaret llajtaman rerka. Chaypi uywaska carka. Rejpuni payka, samacuna p'unchay tantacuna-wasiman yaycorka. Runaspa ñiaupakencupitaj leenanpaj sayaricorka. <sup>17</sup> Diospa unay willajnin Isaiaspa libron Jesusman jaywaska carka. Librota quicharispataj tariparka maypichus kelkaska cashan:

<sup>18</sup> Santo Espíritu nokawan cashan wajchacunaman sumaj willanasta apamunaypaj Dios ajllacuwaskanraycu.

Dios cachamuwarka juchapi wisk'aska runasman cuchariskas canancuta willaranaypaj.

Cachamuwarkataj cheka cajta mana ricojcunata cheka cajta ricuchinaypaj, phutiywan ñit'iskacunata cucharichinaypajpis.

<sup>19</sup> Cachamullawarkataj willaranaypaj cunanpacha Dios runasta payman chimpanancupaj wajyaskanta.

<sup>20-21</sup> Jesús librota wisk'aspataj libro wakaychajman jaywaporka. Tucuy tantacuna-wasipi cajcuna payta sumajta khawasharkancu. Jesustaj tiyaycucuspa kallarerka yachachiyyta. Nerkataj:

—Diospa palabramanta cay leeskayka cunan p'unchay junt'acushan nokata uyariwaskayquichejpi, —nispa.

<sup>22</sup> Tucuspataj tucuy runas nisharkancu:

—Chekatapuni paypa yachachiskasnin allin cashan, may c'acha, —nispa.

Tapunacusharkancutaj:

—¿Manachu pay José wawan?

*Nazaret llajtayoj runas Jesusta khesachancu*

<sup>23</sup> Jesustaj nerka:

—Chekatapuni khepapi nokata cay niyta niwanquichej: “Onkoskasta thañichej cashaspaka kan quiuiyquita thañichicuy. Capernaum llajtapi jatun ruwaskasniyquimanta uyarerkaycu. Cunan cay llajtayquipipis quiquinta ruway”, —nispa.

<sup>24</sup> ‘Nokarí niyquichej chekamanta: Willajnincuta quiquin llajta-masisnin mana nincchu: “Walejta jamunqui”, nispaka.

<sup>25-26</sup> Uyariwaychej: Sumajta yachashanquichej Diosmanta unay willaj Elías causashajtin jatun yarkhay caskanta. Chay yarkhay carka tucuy jallp'aspi, quinsa wata sojta quillayojta mana paraskanraycu. Chaypacha Israel jallp'api ashqha viudas carkancu. Eliasri ni maykennincumanpis cachaskachu carka. Manachayrí Sidón jallp'a Sarepta llajtayoj uj viudallaman cachaska carka. <sup>27</sup> Diosmanta unay willaj Eliseo causashajtinpis ashqha lepra onkoynijo runas Israel jallp'api callarkancutaj. Paycunamantari ni uj thañichiskachu carka. Manachayrí Siria jallp'amanta uj runalla, Naamán sutiyoj, thañichiska carka, —nispa.

<sup>28</sup> Chayta uyarispa tucuy runas tantacuna-wasipi mayta rabiacorkancu. <sup>29</sup> Jatarispataj llajta jawaman Jesusta kharkorkancu. Payta kharkospa llajta jatarichiskancu, chay orko pataman pusarkancu. Chay kakamanta paytaka chokacyuta munarkancu. <sup>30</sup> Payrí chay runaspa chaupincuta purispa riporka.

*Supayniyoj runa tantacuna-wasipi*

<sup>31</sup> Chanta Jesús Galilea jallp'a Capernaum llajtaman uraycorka. Samacuna p'unchaypitaj tantacuna-wasipi runasta yachachisharka.

<sup>32</sup> Paycunataj t'ucorkancu yachachiskanmanta imaraycuchus Diospa atiyninwan yachacherka.

<sup>33</sup> Tantacuna-wasipi millay supayniyoj runa carka. Sinch'ita kha-parerkataj:

34 —Nazaret llajtayoj Jesús ¿imaman chapucuwaycu? ¿Tucuchinawaycupajchu jamunqui? Sumajta yachani pichus caskayquita. Kan Diospa ajllaskan\* canqui, —nispa.

35 Jesusrí sinch'iwan camacherka supayta:

—Ch'in cay. Llojsiy paymanta, —nispa.

Runaspa chaupincupitaj supay chay runata pampaman chokaycuspa paymanta llojserka mana ni imanaspalla. <sup>36</sup> Tucuy runastaj mayta t'ucorkancu ninacusharkancutaj:

—¿Imayna yachachiyta cayr? Atiywan cay runaka sajra supaycunata camachin, paycunataj llojsillancu, —nispa.

37 Tucuy chay jallp'a muyuynintinpi tiyacojcunataj Jesusmanta uyarererkancu.

### *Ashqha runasta thañichin*

38 Tantacuna-wasimanta Jesús llojsispa Simonpa wasinman yaycorka. Simonpa warminpa maman sinch'i k'oñi onkoywan casharka. Jesustaj mañacorkancu:

—Señorní, yanaparipuwaycu payta, —nispa.

39 Onkoskaj kayllanpi sayaspataj, Jesús sinch'iwan camachispa k'oñi onkoyninta kharkorka. Onkoskataj thañicaporka. Chay quiquinpacha jatarispa thañiska warmeka miqhunata paycunaman jaywarka.

40 Inti chincaycushajtintaj tucuy runas onkoska llajta-masisnincuta Jesusman apamuya kallarererkancu. Tucuy laya onkoywan onkoska runasta apamushallarkancupuni. Jesustaj sapa ujman maquisninta churaspa paycunata thañicherka. <sup>41</sup> Chaywanpis ashqha runasmanta supaycunataj khaparisharkancu:

—Kan Diospa Wawan Cristo canqui, —nispa.

Jesusrí paycunata sinch'ita c'amispa mana sakerkachu parlanancuta chayta sumajta yachaskancurayu.

42 K'ayantin pakarin Jesús llajtamanta llojsispa uj ch'innejman riporka. Chay ashqha runasrí payta masc'asharkancu. Jesuswan tincuspataj payta jarc'ayta munasharkancu. Nerkancutaj:

—Ama sakerpariwaycuchu, —nispa.

43 Payrí cuticherka:

—Waj llajtasmanpis rinay tiyan sumaj willanasta willaranaypaj. Imaraycuchus Dios cachamuwarka willaranaypaj pay caypiña caskanta camachinanpaj, —nispa.

44 Jesustaj israelcunaj tantacuna-wasisnincipi willarashallarkapuni.

## 5

### *Jesús wajyan ñaupaj yachacojcunanta*

1 Ashqha runastaj Diospa niskasninta munasharkancu uyariyta. Chayraycu chimpaspa Jesusman payta ñit'ejpuni cancu. Ajinata uj p'unchay Jesús Galilea kocha cantopi paycunawan sayarisharka. <sup>2</sup> Isccay challwa jap'ina barcostataj\* cantopi ricorka. Challwiristaj chay barcosmanta ch'ipasnincuta t'ajsaj llojsiskancu. <sup>3</sup> Ajinata Jesús uj barcoman yaycorka. Chaytaj Simonpata carka. Jesús Simonman nerka:

—Suchucurichiy barcoyquita cantomanta as pisita yacuman, —nispa.

\* 4:34 Literal: santon. \* 5:2 Barcoka yacu patata purinapaj cashan.

Chaymanta barcopi tiyaycucuspa Jesús yachachisharka kocha cantopi chay ashqha cajcunaman. <sup>4</sup> Paycunaman parlayta tucuspa Simonta nerka:

—Kochaj uqhunnejman barcota apay. Yacumantaj ch'ipasniyquichejta churaycuychej challwasta jap'inayquichejpaj, —nispa.

<sup>5</sup> Simón cuticherka:

—Señorniy, tutantinta sinch'ita llanc'arkaycu nitaj uj challwatapis jap'erkaycuchu. Chaywanpis niwaskayquiraycu ch'ipasta yacuman churaycusaj, —nispa.

<sup>6</sup> Ajinata challwiris ch'ipasta yacuman churaycorkancu. May ashqha challwastataj jap'iskancumanta ch'ipasnincoka lliq'icusharkancu.

<sup>7</sup> Maquisnincuwantaj wajyarkancu challwiri-masisnincuta barconcuwan yanapaj jamunancuta. Jamojtinctaj iscaynin barcosman challwasta junt'acherkancu. Barcostaj chincaycunayasharkancu ancha junt'a caskancuraycu. <sup>8</sup> Simón Pedrotaj chayta ricuspa Jesuspa ñaupakenpi konkoricuspa nerka:

—Señorniy, ripullay nokamanta juchasapa runalla caskayraycu, —nispa.

<sup>9</sup> Simontaj tucuy paywan cajcunapis mayta t'ucorkancu ashqha challwasta jap'iskancumanta. <sup>10</sup> Ajinallatataj Zebedeoj wawasnin Jacobowan Juanwan mayta t'ucorkancu. Paycuna Simonpa challwiri-masisnin carkancu. Jesustaj Simonman nerka:

—Amaña manchachicuychu. Ñaupajta challwiri carkanqui. Cunamantapachataj Diospi jap'icunancupaj runasta nokaman pusamuwanqui, —nispa.

<sup>11</sup> Barcosnincutataj kocha cantoman aysamorkancu. Chaymantaka tucuy imasta sakerparispataj Jesusman c'ascaporkancu yachacojcunan canancupaj.

### *Jesús lepra onkoyniyoj runata thañichin*

<sup>12</sup> Uj cutí Jesús uj llajtapi cashajtin chaypi uj manchay lepra onkoyniyoj runa carka. Chay runataj Jesusta ricuspa pampacama c'umuycuspa mañacorka:

—Señorniy, sichus munanqui chayka, llimphuchawaspa thañichiwayta atinqui, —nispa.

<sup>13</sup> Jesús maquinwan payta llanqharispa nerka:

—Munani. Thañiskaña canqui, —nispa.

Onkoyniyoj runataj chay quiquinpacha thañiska carka. <sup>14</sup> Jesustaj payta camacherka:

—Ama pimanpis cay imasmanta willaychu. Manachayrí chekanta riyy Jerusalenman yupaychana-wasipi ruwanayojojman. Kan quiuiyqui khawachicamuy paywan. Chanta thañicuskayquimanta Moisespa camachiskanmanjina Diosman jayway. Ajinamanta tucuy yachankancu thañicuskayquita, —nispa.

<sup>15</sup> Chaywanpis tucuynejpi runas Jesusmanta uyarerkancu. Ashqha runastaj jamusharkancu uyarej, onkoynincumanta thañicojtaj. <sup>16</sup> Jesusrí sapallan ch'innejcunaman rej Diosmanta mañacunapanaj.

### *Jesús mana cuyurej runata thañichin*

<sup>17</sup> Uj p'unchay Jesús yachachishajtin ashqha fariseocuna israel yachachejcunapiwan tiyaskas uyarisharkancu. Paycunaka jamorkancu

tucuy Galilea llajtasmanta, Judea llajtasmanta, Jerusalén llajtamantapis. Jesustaj onkoska runasta thañichisharka atiyninwan. <sup>18</sup> Ajinapi runas uj mana cuyurej runata callapunpi wantuspa riqhurimorkancu. Sinch'itataj masc'asharkancu Jesuspa ñaupakenman imaynata wantuycuya. <sup>19</sup> Chay tucuywanpis Jesusman chimpaycuchiya manapuni aterkancuchu runas chaypi ancha q'isqui caskanraycu. Ajinamanta wasi pataman llojsipa tejasta orkospataj jusc'uta ruwarkancu. Chaynejtataj mana cuyurej runata wantuspa uraycucherkancu Jesuspa ñaupakenman runaspa chaupincupi. <sup>20</sup> Jesustaj paypi jap'icuskancuta repararka. Mana cuyurej runatataj nerka:

—Wawáy, juchasniyqui kanmanta khechuskaña cancu, —nispa.

<sup>21</sup> Chaymanta israel yachachejcuna fariseopiwan tanteyacuyta kallar-erkancu: “¿Pitaj cay runa ajinata parlaspa Diosta phiñachejrí? Dioslla juchasta khechuytaka atin”, nispa.

<sup>22</sup> Jesús sumajta yachaspa yuyashaskancuta paycunaman cuticherka:

—Amaña sonkosniyquichejpi ajinata tanteyacuychejchu. <sup>23</sup> Cay runaman nejtiy “juchayqui perdonaskaña”, nispaka mana ricunquichejchu chekachus manachus caskanta. Astawanrí cay mana cuyurej runata jatarichiymán chayka, ricuwajchej. <sup>24</sup> Noka, Diospa cachaska Runan caspa, cay pachapi atiyniyoj cani juchasta perdonanaypaj. Chay cheka caskanta yachanayquichejpaj, cay mana cuyurej runata nini: Kanta niyqui: Jataricuy, callapuyquita okharicuspa ripuy wasiyquiman, —nispa.

<sup>25</sup> Chay quiquinpachataj runaspa ñaupakencupi runa jatarerka. Callapunta okharicuspa Diosta yupaychaspataj wasinman riporka. <sup>26</sup> Tucuy runastaj mayta t'ucorkancu Diostataj yupaycharkancu. Mayta manchachicuspataj nerkanca:

—Cunan p'unchay may jatuchej t'ucunasta ricushanchej, —nispa.

### *Jesús wajyan Levita yachacojininpaj*

<sup>27</sup> Chaycuna khepata Jesús llajtamanta llojserka. Uj impuesto jap'ejta, Leví sutiyoja, ricorka impuesto jap'ina wasipi tiyacushajta. Payta khawarispataj nerka:

—Yachacojniy cay, —nispa.

<sup>28</sup> Levika tucuy imata sakerpaytawan jatarispataj Jesusta khaticorka.

<sup>29</sup> Wasinpi Leví uj jatun miq hunata waquicherka Jesuspaj. Ashqha impuesto jap'ejcunata waj runastawan wajyarka paycunawan miqhuncupaj. <sup>30</sup> Fariseos paycunaj yachachejcunancupiwan thutorkancu Jesuspa yachacojcunantataj taporkancu:

—¿Imaynatataj impuesto jap'ejcunawan juchasapasiwan cusca tiyaycucuspa miqhushanquichej?

<sup>31</sup> Jesús paycunaman cuticherka:

—Onkoska runaslla medicotaka munancu, manataj sano runaska.

<sup>32</sup> Juchasapasta wajyaj jamorkani paycuna sajra ruwaskasnincuta sakespa Diosman cutirinancupaj. Manataj jamorkanichu chekan cajcunata wajyaj, —nispa.

### *Jesuspa mosoj yachachiyninmanta tapunas*

<sup>33</sup> Chay runastaj Jesusta nerkanca:

—Juanpa yachacojcunán q'isquita ayunancu. Ajllaska horaspipuni Diosmantapis mañacuncu. Ajinallatataj fariseospa yachacojcunancupis ruwancu. ¿Imaraycutaj kanpata miqhushallancu ujyashallancuri?

[Cayta taporkancu Jesuspa mosoj yachachiyninta mana entiendeskancuraycu.]†<sup>34</sup> Jesustaj paycunaman cuticherka:

—Casamientoman wajyaskacunaka casaracoj khari paycunawan cashanancama cusiywan miqhuncupuni.<sup>35</sup> Khepa p'unchaycunapi casaracoj khareka paycunamanta khechuska canka. Chaypacha yachacojcunayka phutiywan mana miqhonkancuchu, —nerka Jesús.

<sup>36</sup>Chaywanpis mosoj yachachiyninmanta Jesús cay quiquinchanawan paycunaman willarka:

—Ni pipis uj mosoj p'achamanta uj remiendota orkhonmanchu uj mauc'a p'achaman siraycunanpajka. Sichus chayta ruwanman chayka, chay mosoj p'achaka lliq'erkoska canman. Chaywanpis mauc'a cajka mana quiquinchu canman mosojwanka.<sup>37</sup> Uj imatawan niskayquichej: Ni pipis mosoj pokoshaj vinota mauc'a vino churana karasmanka jich'anchu. Sichus chayta ruwanman chayka, mosoj vinoka karasta phatarparichinman. Vinoka jich'acunman, karasri lliq'iycucuncuman.<sup>38</sup> Mosoj vinotaka mosoj karasman churana tiyan.<sup>39</sup> Chaywanpis ni pipis ashqha watasniyoj vinota ujyashaspa mosoj vinota munanchu. Astawanpis nin: "Ashqha watasniyoj vinoka nokapaj cosamin", —nispa.

## 6

### *Samacuna p'unchaymanta tapuncu*

<sup>1</sup> Uj samacuna p'unchay Jesús yachacojcunawan trigo chajra chaupita risharkancu. Yachacojcunantaj trigo umasta muruspa pallasharkancu. Maquisnincuwan trigota kharkorkancu miqhunancupaj.<sup>2</sup> Waquin fariseosrí yachacojcunata taporkancu:

—¿Imaraycutaj samacuna p'unchaypi mana ruwana cajta ruwashan-quichej?

<sup>3</sup> Jesustaj paycunaman cuticherka:

—¿Manatajchu leerkanquichej unay tatayquichej Davidpa ruwaskan-manta? Payka runasnipiwan yarkhachicorkancu.<sup>4</sup> Chayraycu Diospa wasinman yaycorka. Diospaj t'akaska t'antataj payman koska carka. Camachiskanpi nin cay t'antaka Diospa wasinpi llanc'ajcunalla miqhunancupaj caskanta. Davidrí cay t'antata miqhuycorka runasninmanpis kollarkataj, —nispa.

<sup>5</sup> Astawanpis Jesús nerka:

—Noka, Diospa cachaska Runan, atiyniyoj cani camachinaypaj imat-achus ruwanata samacuna p'unchaypi, —nispa.

### *Maquin wañuska runamanta*

<sup>6</sup> Waj samacuna p'unchaypitaj Jesús rispa tantacuna-wasiman yaycorka. Yachachisharkataj runasta. Chaypi uj runa casharka paña maquin wañuska.<sup>7</sup> Israel yachachejcuna fariseospipan Jesusta sinch'ita khawasharkancu. Samacuna p'unchaypi thañichinmanchus manachus, chayta munasharkancu yachayta. Chayraycu watekasharkancu imallamantapis payta juchachanancupaj.<sup>8</sup> Jesusrí ajinata yuyaskancuta yacharka. Chanta wañuska maquiyoj runata nerka:

† 5:33 Ninayan.

—Sayaricuy ñaupakeycupi, —nispa.

Chay runataj jatarispa sayarerka. <sup>9</sup> Chanta Jesús israel yachachejcunaman fariseosmanwan nerka:

—Ujta tapuriskayquichej: ¿Samacuna p'unchaypi imatataj runa ruwanan tiyan? ¿Allin cajtachu ruwanata chayrí sajra cajtachu, camachiskaka nin? ¿Runata yanapanatachu chayrí payta wañuchinatachu?

<sup>10</sup> Ujta ujta khawarispataj chay wañuska maquiyoy runata nerka:

—Maquiyquita aysariy, —nispa.

Maquinta aysarerka. Ujinin maquinjinataj thañicaporka. <sup>11</sup> Israel yachachejcunawan fariseoswaní manchayta phiñacorkancu. Tapunacuytataj kallarererkancu: “¿Imanasunmantaj Jesusta?”

### *Jesús chunca iscayniyoj cachasninta ajllan*

<sup>12</sup> Chaypacha Jesús orkoman llojserka Dioswan parlaricoj. Chaypitaj tutantinta Dioswan parlaricusharka. <sup>13</sup> Tutamanta yachacojcunata payman wajyarka. Paycunamanta chunca iscayniyoj runasta ajllarka. Paycunatataj cachasninpaj churarka. <sup>14</sup> Sutisnincutaj caycuna cashan: Simón, payta Pedrota Jesús suticharka, Simonpa wauken Andrés, Jacobo, Juan, Felipe, Bartolomé, <sup>15</sup> Mateo, Tomás, Alfeo wawan Jacobo, zelote partemanta Simón, <sup>16</sup> Jacoboj wawan Judas, Judas Iscariotepiwan. Payka khepata Jesusta jaywaycorka.

### *Jesús ashqha runasta yachachin*

<sup>17</sup> Chanta paycunawan Jesús uraycuspa uj pampapi sayaricorka. Chaypi ashqha yachacojcunana ashqha runaspawan carkancu. Paycuna carkancu tucuy Judea jallp'amanta, Jerusalén llajtamanta, jatun kocha kayllanej Tiro llajtamanta Sidón llajtamantawan. Jesusta uyarej jamorkancu, onkoynincumanta thañichicojpis. <sup>18</sup> Supaycunawan muchuchiska runastapis Jesús thañichisharka. <sup>19</sup> Tucuy runastaj Jesusta llanqhariyta munasharkancu atiyninwan tucuya thañichiskanraycu.

### *Cusiska cajcunamanta phutiska cajcunamantawan*

<sup>20</sup> Jesús yachacojcunanta sumajta khawarispa nerka:

—Mayta cusicuychej, kancuna, wajcha runas. Imaraycuchus Dios kancunata munacuywan camachin.

<sup>21</sup> ‘Cusiskas canquichej, cunana yarkhachicojcuna. Khepata sajsachiskas canquichej.

‘Cusiskas canquichej, cunana phutiywan wakashajcuna. Khepata cusiywan asicunquichej.

<sup>22</sup> ‘Cusiskas canquichej runas kancunata chejnisojtiyquichej, jawanman kharkosojtiyquichej, llullacuspa sajrata kancunamanta rimasojtiyquichej. Cusiskas canquichej runas kancunata sajra runastajina khesachasojtiyquichej, nokata, Diospa cachaska Runanta, khatiwaskayquichejraycu. <sup>23</sup> Chay p'unchaypi cusicuychej. Cusiywantaj phinquiriychej. Janaj pachapimin kancunapaj uj jatun kona tiyan. Unay tatasnincupis chay quiquillantataj Diospa unay willajcunata muchucherkancu.

<sup>24</sup> ‘¡Phutiy, ari, kancuna khapajcunapajka! tucuy munaskayquichejwanña sonkochacuskayquichejraycu.

<sup>25</sup> ‘¡Phutiy, ari, kancuna ashqha miqhunawan sajsaskasña cajcunapajka! Khepata yarkhasonkachej.

‘¡Phutiy, ari, kancuna cunan asishajcunapajka! Khepata llaquicunquichej wakanquichejtaj.

<sup>26</sup> ‘¡Phutiy, ari kancunapajka tucuy runas allinta kancunamanta parlajtincu! Ajinallatatajmin llulla willajcunamanta unay tatasnincu parlajcancu.

### *Chejnisojcunata munacuychej*

<sup>27</sup> ‘Chay jawapis kancuna nokata uyariwajcunaman cayta sumajta nishayquichej. Munacuychej contrayquichejpi churacojcunata. Allin cajta ruwaychej kancunata chejnisojcunata. <sup>28</sup> Misq'i parlaywan cutichiychej sajrata parlasojcunaman. Diosmanta mañapuychej kancunaman tumpasojcunapaj. <sup>29</sup> Pillapis paña uyayquipi lak'asojtenka cutirichiyl llok'e lado uyayquitawan lak'anapaj. Pillapis ponchoyquita khechusojtenka sakellay apananta camisayquitawanpis. <sup>30</sup> Pillapis kancunanta uj imallatapis mañacusojmanka korillay. Pillapis kanpata cajta khechusojtenka ama mañacapuychu. <sup>31</sup> Imaynatachá runacuna kancunaman ruwanancuta munanquichej, ajinallatataj kancunapis paycunaman ruwaychej.

<sup>32</sup> ‘Sichus kancuna munacushanquichej munacusojcunallata chayka ñima sumajtataj ruwashanquichejrí? Juchasapaspis paycunata munacojcunallata munacuncu. <sup>33</sup> Sichus kancuna allin cajta ruwanquichej allin cajta ruwasojcunallaman chayka ñima sumajtataj ruwashanquichejrí? Juchasapaspis ruwancu chaytaka. <sup>34</sup> Sichus kolketapis mirayniyojpaj ayniwajchej chayka ñima sumajtaj ruwashanquichejrí? Juchasapaspis juchasapasman mirayniyojpaj aynincu mirayninta jap'icapunancupaj. <sup>35</sup> Kancunari enemigosniyquichejta munacuychej, allin cajtapuni ruwaychej. Ayniychejtaj runasman ni imata jap'itya suy spa. Cayta ruwajtiyquichej Dios ashqhata kopusan kachej. C'ata Diospa wawasnintaj canquichej. Payka c'acha qhuyacuyniyojmin cashan mana graciasta kojcunamanpis sajra runasmanpis. <sup>36</sup> Imaynatachus Dios Tatayquichej tucuy runasta qhuyacushan, ajinallatataj kancunapis qhuyacuychej.

### *Ama wajcunata khawaraychejchu*

<sup>37</sup> ‘Ama wajcunata khawaraychejchu. Diostaj mana khawarasonkachejchu. Ama wajcunataka juchachaychejchu. Diostaj mana juchachasonkachejchu. Runaspa juchasnincta perdonaychej. Diostaj perdonasonkachej. <sup>38</sup> Koychejpuni. Diostaj kancunaman kosonkachej. Wayakasniyquichejman Dios winapusan kachej sumaj medidawan tupuskata, ñit'iskata, sumaj wasarishajta. Kancuna ima medidawanchá wajcunaman tupunquichej, chayjinallawantaj Dios kancunaman tupusan kachej,—nispa.

<sup>39</sup> Cay quiquinchanata Jesús parlarka runasman:

—Uj ciego ciegollatatajka ni jayc'aj pusayta atinmanchu. Pusanchus chayka, iscaynincu cusca t'okoman urmayconkancu. <sup>40</sup> Yachacojka mana curajchu yachachejninnmantaka. Pay sumaj yachachiska caspaka yachachejninnjnapis canka.

<sup>41</sup> ‘Uj jatur curcujina kanpa jatun pantaskayquita mana reparacuspaka ñimaynatataj uj ichhu k'opajina hermanoyquej juch'uy pantaskanta khawaranquirí? <sup>42</sup> Quiquin ñawiyqupitaj jatun curcuta mana reparacunquichu. Chayraycu hermanoyquita amaña niychu: “Hermanóy,

sakellaway ichhu k'opata ñawiyquimanta orkhosunayta”, nispa. Puraj uya, chay curcurataraj ñawiyquimanta orkhonqui. Chanta aswan sut'ita ricunqui juch'uy k'opata hermanoyquejpa ñawinmanta orkhonayquipaj.

*Uj quiquinchana sach'aj pokoyninmanta*

<sup>43</sup> ‘Uj sumaj sach'aka nipuni mana allin pokoytaka pokonchu. Uj mana allin sach'apis nillataj sumaj pokoytaka pokonchu. <sup>44</sup> Sapa sach'a quiquin pokoyninmanta rejsicun. Ni pipis pallanchu higosta qhishca sach'amantaka. Nitaj uvasta pallanchu qhishcarara sach'itamantaka. <sup>45</sup> Ajinallataj uj c'acha runaka c'acha cajta ricuchin sonkonpi c'acha caj jallch'aska capuskanmanta. Uj sajra runaka sajra cajta ricuchin sonkonpi sajra caj jallch'aska caskanmanta. Runaka parlan sonkonpi junt'a caskanmanta.

*Uj quiquinchana iscay wasichaj runasmanta*

<sup>46</sup> ‘Imaraycutaj kancuna nokata, “Ay, Tatáy, Señorníy”, nispa nishawan-quichejpuni manataj niskaytaka casuwanquichejtajchu? <sup>47</sup> Nokaman jamuwajka niskasniyta uyarispa casushanpuni, <sup>48</sup> chay runaka uj sumaj wasichaj runaman rijch'acun. Chay wasichajka ñaupajta allin uqhuta allarka. Sinch'i rumi patapitaj wasita sayacherka. Mayuta yacu wasarispa callpawan chay wasiman chayarka. Wasita mana cuyurichiyya aterkachu rumi patapi sumaj sayachiska caskanraycu. <sup>49</sup> Nokata uyariwajka niskasniyta manataj casorkachu, chay runarí waj wasichaj runamantaj rijch'acun. Payka jallp'a patallapi wasita sayacherka manataj rumpichu. Mayuta yacu wasarispa callpawan chay wasiman chayarka. Chay quiquinpacha wasi tijracuspa manchayta urmarka,—nispa.

## 7

*Capitanpa camachinta thañichin*

<sup>1</sup> Chay yachachinasta runasman parlayta tucuspa Jesús Capernaum llajtaman yaycorka. <sup>2</sup> Chaypi carka pachaj romano soldadosta uj camachej. Paypa camachintaj sinch'i onkoywan wañunayasharkaña. Chay camachejka camachinta munacorka. <sup>3</sup> Runaspa niskasnincuta Jesusmanta uyarispa israel curajcunata wajyarka nerktaj:

—Riychej Jesusman wajyarimpuywaychej: “Jamuriy, camachiyyta thañichipuanqui”, —nispa.

<sup>4</sup> Israel curajcunataj Jesusman chayaspa mayta niriorkancu: —Cay mañasojpajka ruwapunayqui allinpuni canman c'acha runa caskanraycu. <sup>5</sup> Payka israelcunata munacun. Tantacuna-wasinchejtapis paypa kolkenwan ruwarkanchej, —nispa.

<sup>6</sup> Chanta Jesús paycunawan rerka. Wasi kayllaman chayashajtintaj chay camachej amigosninta cachamorka ninancupaj Jesusman:

—Señorníy, amaña molestacuychu. Juchasapa caskayraycu mana wasiyman yaycunayquipajjinachu cani. <sup>7</sup> Manallataj noka quiuiy whole kanman chimpaycusunaypajjinachu cani. Nillay, uywaskayka niskayquian thañicapontakataj. <sup>8</sup> Nokajtapis curaj camachiwajcuna cancu. Soldadosnypis callancutaj camachiskayta casuwancu. Ujta nini: Riy. Rintaj. Wajta nini: Jamuy. Jamuntaj. Camachiytapis nini: Cayta ruway. Chayta ruwallantaj, —nispa.

<sup>9</sup> Jesúz chayta camachejmanta uyarispa t'ucorka. Chanta ashqha khatejcunaman cutirispataj nerka:

—Niyquichej, Israel llajta-masisniy uqhupipis mana tariskaychu ni ujta cay runajinataka. Payka chekatapuni niskasniyta jap'icun,—nispa.

<sup>10</sup> Camachejpa cachamuskasnin wasiman cutispa onkoska camachintaka thañiskataña tariparkancu.

*Jesús causarichin Naín llajtayo viudaj wawanta*

<sup>11</sup> Chaymanta Jesúz Naín llajtaman risharka. Yachacojcunaman ashqha runaspiwan paywan risharkancu. <sup>12</sup> Jesúz llajta puncuman chaya-mushajtin, runas uj joven ayata llajta jawaman p'ampaj apasharkancu. Payka mamanpa sapan c'ata wawan carka. Mamantaj viuda carka. Ashqha runas viudawan risharkancu llajtamanta. <sup>13</sup> Señor payta ricuspa mayta phuticorka paymanta. Payta nerkataj:

—Amaña wakaychu,—nispa.

<sup>14</sup> Chimpaycuspa Jesúz wantunata llanqharerka. Apaj runastaj sayarkancu. Chanta Jesúz nerka:

—Joven, kanta niyqui: Jataricuy,—nispa.

<sup>15</sup> Wañojka tiyaycacamuspa parlayta kallarerka. Jesúz waynata causashajta mamaman cutichiporka. <sup>16</sup> Tucuynin runastaj mayta man-chachicuspa Diosta yupaycharkancu. Nisharkancutaj:

—Chaupinchejpi cashan Diosmanta uj sumaj willaj. Dios jamuspa runasninta yanapashan,—nispa.

<sup>17</sup> Runas willacusharkancu Jesusmanta tucuy Judea jallp'api tucuy chay muyuynintinpipis.

*Bautizaj Juanpa yachacojcunaman Jesusman jamuncu*

<sup>18</sup> Juanpa yachacojcunantaj payman tucuy chay imasmanta willarkancu. Juantaj paycunamanta iscayta wajyaspa <sup>19</sup> cacharka Señorman tapunancupaj: “¿Kanchu canqui Diospa niskanmanjina jamunan cajka, chayrí wajtachu suyallasajcupuni?” <sup>20</sup> Jesusman chayaspa chay cachaska runas nerkanca:

—Bautizaj Juan cachamuwarkaycu tapusunaycupaj: ¿Kanchu canqui Diospa niskanmanjina jamunan cajka, chayrí wajtachu suyalasajcupuni?

<sup>21</sup> Chay quiquinpachataj Jesúz ashqha runasta onkoynincumanta muchuynincumantapis thañicherka. Sajra supaycunatapis ashqha runasmana kharkorka. Ashqha ciegostapis khawaricherka. <sup>22</sup> Juanpa cachaska runasnimantaj Jesúz cutichispa nerka:

—Riychej, willamuychej Juanman ricuskayquichejta uyariskayquichejtawan. Ciegos ricushancuña, suchuspis purishancuña, lepra onkoynijoj runaspis thañiskaña cashancu. Loj'tospis uyarishancuña, wañuska runastaj causarichiskaña cashancu. Sumaj willanaspis wajcha runasman willaraska cashan. <sup>23</sup> Cusicuyniyojmin mana p'enkacuspa nokapi jap'icojka,—nispa.

*Jesús bautizaj Juanmanta willan*

<sup>24</sup> Juanpa cachasin ripuskancutawan Jesúz paymanta parlayta kallarerka runasman:

—Juan ch'in pampapi willarashajtin kancuna uyarej llojserkan-quichej. ¿Ima laya runata ricuytataj yuyasharkanquichejrí? Mana ichhujina wayrawan c'umuycachaska runatachu tarerkanquichej.

<sup>25</sup> Manataj sumaj camachejjina p'achaswan p'achalliska runatachu tarerkanquichej. Chayjina p'achalliska cusiywan causaj runaka camachejcunaj wasisnincipi tiyacun. <sup>26</sup> Kancunaka waj laya runata masc'asharkanquichej. Chayraycu Diosmanta uj willajta uyarej llojserkanquichej. Chekapuni payka Diospa unay willajcunanmanta aswan curajmin. <sup>27</sup> Cay willajmanta Dios palabranpi nerka:  
¡Khaway! Noka willajniya kanpa ñiaupakeyquita cachashani.  
Payka runaspa sonkoncuta\* waquichipusonka paycunaman rinayquipaj.

<sup>28</sup> Nokataj niyquichej tucuynin runas uqhupi ni uj runa caskanta aswan curaj Juanmanta niskaka. Dios camachin, chaypeka aswan pisipaj khawaska cajrí aswan curajpunimin Juanmanta niskaka. <sup>29</sup> Ashqha uyarej runas impuesto jap'ejcunapiwanpis Juan willarashajta uyarispa, bautizacorkancu. Bautizacuspataj ricucherkanca juchasnincuta sakeskancuta Dios chekan caskantataj. <sup>30</sup> Fariseosrí israel yachachejcunapiwan paycunapaj Diospa munayninta khesacharkancu. Mana munarkancuchu Juan paycunata bautizananta,—nerka Jesús.

<sup>31</sup> Nerkataj:

—¿Picunamantaj rijch'acuncu cunan p'unchay runas? <sup>32</sup> Rijch'acuncu plazapi tiyaska pujllacoj wawasman. Paycunapura khaparinacuncu: “Tusunayquichejpaj kenata tocaporkaycu. Kancunari mana tusorkanquichejchu. Llaquiy taquinasta taquiporkaycu. Kancunari mana wakarkanquichejchu”, nispa. <sup>33</sup> Ajinata bautizaj Juan jamuspa mana sumaj miqhunasta miqhorkachu nitaj vinota uyyarkachu. Paymantataj nerkanquichej: “Supayniyoj”, nispa. <sup>34</sup> Chanta noka, Diospa cachaska Runan, miqhuspa uyyaspa jamorkani. Nokamantataj nishanquichej: “¡Khawaychej! Cay runaka miqhuysapa uyyaysapataj. Impuesto jap'ejcunata juchasapasta munacun”, nispa. <sup>35</sup> Tucuy cheka yachayniyocjunka rejsincu Diospa yachaynin chekapuni caskanta,—nispa nerka Jesus.

### *Juchasninmanta cachariska warmi munacuyninta ricuchin*

<sup>36</sup> Fariseo partemanta ujin Jesusta wajyarka paywan miqhunapaj. Ajinamanta Jesús paypa wasinman rerka miqhoj. <sup>37</sup> Cay llajtapatitaj carka uj ancha juchasapaj rejsiska warmi. Pay uyererka Jesús fariseoj wasinpi miqhushaskanta. Chanta pay uj sumaj rumi† yuritupi c'acha k'apayniyoj aceitejina jawinata apamorka. <sup>38</sup> Jesús mesapi miqhushajtin chay warmi wakaspa sayarka Jesuspa chaquisnintay kaylapi. Chanta pay wakayninwan Jesuspa chaquisninta mayllaspa chujchanwan ch'aquierka. Chaquisnintataj much'asharka k'apayniyoj jawinata jich'aycuspa. <sup>39</sup> Miqhunancupaj Jesusta wajyarka, chay fariseo Simón, tucuy chayta ricorka. Yuyarkataj sonkonpi: “Sichus chekamanta cay runa Diospa willajnin canman chayka, sumajta yachanman pichus llanqhaskanta. Cay warmeka chhica juchasapa caskantapis yachanmanpuni carka”, nispa yuyarka. <sup>40</sup> Chanta Jesús payta nerka:

—Simón, uj ima cashan nisunapaj,—nispa.

Paytaj cuticherka:

—Yachachiwajní, nillaway,—nispa.

<sup>41</sup> Jesustaj nerka:

\* **7:27** Literal: ñanta. † **7:37** Literal: alabastro.

—Uj kolke manoj runa iscay manu runasniyoj carka. Ujnin manu runa kolketa cutichipunan carka phishka chunca p'unchay llanc'askamantajina. Ujnin manu runataj phishka p'unchay llanc'askamantajinalla kolketa cutichipunan carka. <sup>42</sup> Iscaynincu ni imayoj caskancuraycu, manoj runaka qhuyaspa mana paycunamanta cutipunancuta mañarkachu. ¿Chay iscay runasmanta maykentaj astawan chay manoja munaconkarí?

<sup>43</sup> Simón cuticherka:

—Yuyani chay aswan ashqha konan carka, chay runachá, —nispa.

Paytataj Jesús nerka:

—Arí, chekanta tanteyanqui, —nispa.

<sup>44</sup> Chanta warmiman cutirispá Jesús Simonta nerka:

—Ricushanqui cay warmita. Noka wajyaska jamorkani wasiyquiman.

Manataj chaquisniyta yacuwan mayllawarkanquichu. Cay warmirí wakayninwan chaquisniyta jok'ochaspa mayllawarka chujchanwanpis ch'aquichiwarka. <sup>45</sup> Kan napaycushawaspa mana much'aycuwarkanquichu. Payrí chaquisniyta much'ayta mana sakerkachu chayamus�aymantapacha. <sup>46</sup> Kan mana umayta jawiarkanquichu. Payrí k'apaj jawinata chaquisniyman jich'aycuwarka. <sup>47</sup> Kanta niyqui: Cay warmej may munacuynenka ricuchin ashqha juchasnín khechuska caskanta. Pichari pisi juchasnillanta khechuska cajka pisita munacun, —nispa.

<sup>48</sup> Chaymanta warmita nerka:

—Juchasniyqueka khechuskaña cancu, —nispa.

<sup>49</sup> Paywan wajyaskacunaka sonkoncupi kallarererkancu tanteyacuya:

—¿Imaynapunitaj cay runarí, pay juchastapis khechunanpaj?

<sup>50</sup> Warmitarí Jesús nerka:

—Diospi jap'icuskayquiraycu juchamanta cachariska canqui. Ripulay, allintataj causacuy, —nispa.

## 8

### *Warmis Jesusta yanapancu*

<sup>1</sup> Chanta Jesuska purej llajtamanta llajta, ranchomanta rancho. Pur-erka sumaj willanasta willaraspa: “Dios caypiña munacuywan camachin-napaj”, nispa. Chay chunca iscayniyoj cachasnintaj paywan pur-erkancu. <sup>2</sup> Waquin warmistaj paycunawan rerkancu yanapanancupaj. Cay warmista onkoynincumanta Jesús unayña thañicherka. Waquin-manta supaycunata kharkorka. Ujpis Magdala llajtayoj María carka. Paymanta Jesús kanchis sajra supaycunata kharkoska. <sup>3</sup> Ujtaj Juana carka, Chuza sutiojpa warmin. Chuzaka Herodespa uj khawapo-jníñ carka. Chay warmismanta ujnintaj Susana carka. Waj ashqha warmispiwan Jesusta yachacojcunantawan yanapaspa churaporkancu capuynincumanta.

### *Uj quiquinchana tarpojmanta*

<sup>4</sup> Runas ashqha llajtasmanta Jesusman jamorkancu. Ashqha runas tantacojtinctaj Jesús cayjinata quiquincharka:

<sup>5</sup> —Uj runa mujuta t'acaj llojserka. T'acashajtin waquin mujoka ñan pataman urmarka. Chay muju saruska carka. P'iskostaj pallaca-porkancu. <sup>6</sup> Waquin mujutaj pisi jallp'ayoj rumi pataman urmarka. Llojsispataj ch'aquicaporka mana jok'o caskanraycu. <sup>7</sup> Waquin mujoka

qhishcas chaupiman urmarka. Cusca llojsimuspa qhishcaska trigota sipiycaporka. <sup>8</sup> Waquin mujutaj sumaj jallp'aman urmarka. Chay mujuri wachaspa sapa ujmanta pachajman pokorka,—nispa.

Chayta niytawan Jesús sinch'ita nerka:

—¡Ningriyoj cajka sumajta uyarichun! —nispa.

*Yachacojcunan cay quiquinchanamanta tapuncu*

<sup>9</sup> Jesuspa yachacojcunan payta taporkancu:

—¿Ima ninayantaj cay quiquinchanari?

<sup>10</sup> Jesustaj nerka:

—Imaynatachus Dios runasta camachin, chay yachachinaska pacaska carka. Cunanrí kancunallaman Dios chay imasta sut'inchashasunquichej. Waj runasmantaj quiquinchanaswan yachachiska cashan. Chayraycu ricuncu manataj ricuskancuta entiendencuchu. Uyarincu manataj uyariskancuta reparancuchu.

*Jesús quiquinchanata sut'inchan*

<sup>11</sup> Chay quiquinchana cayta ninayan: Mujoka Diospa niskanmin.

<sup>12</sup> Waquin mujus ñan kayllaman urmarkancu. Ajinallatataj runas Diospa niskanta uyarincu. Chay quiquinpachataj supay Satanás jamuspa Diospa niskanta sonkoncumanta orkhopun. Manataj sakenchu runas Diospa niskanta jap'icunancuta cachařiskas canancupaj.

<sup>13</sup> Waquin mujustaj pisi jallp'ayojoj rumi pataman urmarkancu. Ajinallatataj waquinpis Diospa niskanta uyarispas cusiywan creellancu. Sonkoncumanrí mana sumajta yaycunchu. Pisi saphiyojjina cancu. Chayraycu pisi ratullapaj Diospa niskanta jap'icuncu. Llaquiyuna jamojtinrí chay runas sumaj ñanmanta pantapuncu. <sup>14</sup> Waquin mujustaj qhishca chaupiman urmarkancu. Ajinallatataj waquinpis Diospa niskanta uyarincu. Chay runasrí anchataraj yuyashancu cay pacha imasmanta. Munashancu ancha khapaj capuya causaynincipi yankha cusiytawan. Tucuy cay imas Diospa niskanta sipiycapuspa causaynincipi mana sakencuchu wiñananta. Nitaj pokoynenka canchu. <sup>15</sup> Waquin mujustaj allin jallp'aman urmarkancu. Ajinallatataj waquin runaspis c'acha sonkoncuwan Diospa niskanta sumajta casullancupuni. Paycunaka pokoyniyoj cancu Diosta cusichincutaj,—nispa.

*Uj quiquinchana c'ancharamanta*

<sup>16</sup> Jesús nerka:

—Runas uj c'ancharata jap'ichispa mana mancawan c'umpuyuncuncuchu. Nitaj tiyana uramanpis churancuchu. Astawanpis pataman churancu runas yaycuspa c'ancharata ricunancupaj. [Imaynatachá c'ancharaywan lakhapi cajcuna riqhurincu, ajinallataj mana yachaska cajpis uj p'unchay yachaonka. <sup>17</sup> Ajinallatataj Diospa niskanwan cashan. Waquin runaspajka pacaska cashan. Nokarí reparanancupaj yachachispas Diospa niskanta sut'inchashani.]\* <sup>18</sup> Chayraycu sumajta khawacunayquichej tiyan imaynata uyarishaskayquichejta. Diospa niskanta jap'icojmanka astawan koska canka. Mana jap'icojmantarií jap'iskanta yuyaskanpis khechuska canka,—nispa.

*Jesuspa maman waukesninpíwan*

\* **8:17** Ninayan.

<sup>19</sup> Jesuspa maman waukesnippiwan payta watoj jamorkancu. Payman mana chimpayta aterkancuchu q'isqui runas chaypi caskancuraycu. <sup>20</sup> Runas Jesusman cayjinata willarkancu:

—Mamayqui waukesniyquipiwan jawapi sayashancu tincusuya munaspa,—nispa.

<sup>21</sup> Jesustaj paycunaman nerka:

—Diospa niskasninta uyarincu casushancutaj, chaycunamin nokaj mamay waukesniy whole cancu,—nispa.

*Wayra yacupis Jesusta casun*

<sup>22</sup> Uj p'unchay Jesús uj barcoman yaycorka yachacojcunanwan. Paycunatataj nerka:

—Jacu rina kocha chimpaman,—nispa.

Ajinatataj rerkancu. <sup>23</sup> Rishajtinctaj Jesús puñucaporka. Uj sinch'i wayra lomasmanta uraycamuspa kochaman wayramorka. Ajinamanta barcoman yacu junt'aycuspachaycuchinayasharka. <sup>24</sup> Yachacojcunantaj Jesusman kayllaycuspa rijch'acherkancu:

—¡Yachachiwajný! ¡Yachachiwajný! Chincarishanchej,—nispa.

Paytaj rijch'arispa sinch'iwan camacherka sinch'i wayrata yacutapis okharicamojtapis. Chanta manaña wayrarkachu. Kochapis ch'inycaporka. <sup>25</sup> Jesustaj yachacojcunata nerka:

—¿Imaraycutaj Diospi mana jap'icushanquichejchu?

Paycunarí mayta manchachicuspataj t'ucorkancu. Ninacusharkancutaj:

—¿Imayna runapunitaj payrí? Camachin wayrata yacutapis. Payta casuncutaj,—nispa.

*Gadara jallp'amanta supayniyoj runata thañichin*

<sup>26</sup> Paycunataj rerkancu Gadara jallp'aman. Chay jallp'aka Galilea kochaj chimpanti cashan. <sup>27</sup> Jesús barcomanta jallp'aman llojsejtin paywan tincorka llajtamanta uj runa. Chay runaka supaycunayoj carka. Unayña payka mana p'achanta churacorkachu. Nitaj wasipipis tiyacojchu, astawanpis panteonpi. <sup>28</sup> Chay runataj Jesusta ricuspa khaparicorka. Jesuspa ñaupakenman konkoricuspa sinch'iwan nerka:

—Jesús, c'ata Diospa Wawan ¿imaman chapucuwanqui? Sumajta mañacuyqui ama ñac'arichinawayquita,—nispa.

<sup>29</sup> Chayta nerka Jesús sajra supayta runamanta llojsinanta camachishaskanraycu. Ashqha cutista supayka runata t'ucuta jap'ichej. Runas fierro cadenaswan watanaswanpis payta sumajta wataj cancu. Supayniyoj runarí watanasta p'iterkayaj. Supaytaj payta ch'in lugaresman apaj. <sup>30</sup> Jesustaj payta taporka:

—¿Imataj sutiyqui?

Cuticherkataj:

—Suteyka sojta waranka, Legión,—nispa. Ajina sutichaska carka payman ashqha supaycuna yaycuskancuraycu.

<sup>31</sup> Chay supaycuna Jesusta mañacusharkancu:

—Ama uqhu pachaman rinaycuta camachiwaycuchu,—nispa.

<sup>32</sup> Chaynejpi ashqha qhuchis orkopi korata miqhusharkancu. Supaycunaka Jesusta mañacorkancu:

—Sakellawaycu chay qhuchisman yaycunaycuta,—nispa.

Jesús paycunata sakellarka. <sup>33</sup> Runamanta llojsispa supaycuna qhuchisman yaycorkancu. Chanta qhuchiska cachaycucuspa kaka-manta kochaman ch'ulticorkancu, jek'ecaspataj wañurarkancu.

*Gadara jallp'amanta runas*

<sup>34</sup> Cayta ricuspa qhuchi michejcunaka aykecorkancu. Paycunataj llajtapi ranchospipis chay imasmanta willamorkancu. <sup>35</sup> Chanta runas chay imasta ricoj llojserkancu Jesusman chimpaspa. Supaycuna llojserka, chay runatapis ricorkancu. Payka p'achalliska yuyaynippi Jesuspa chaquisnippi tiyacusharka. Chayta ricuspa runaska manchachicorkancu. <sup>36</sup> Chay ruwaskasta ricojcunataj jamojcunaman willasharkancu imaynatachus chay runa supaycunamanta cazariska caskanta. <sup>37</sup> Tucuy Gadara jallp'amanta runas Jesusta ripunanta mañarkancu anchata manchachicuskancuraycu. Mañaskancumanjinataj Jesús barcoman yaycorka kocha chimpaman cutinanpaj. <sup>38</sup> Chay supaycunamanta cazariska runarí Jesusta nicusharka:

—Sakellaway kanwan rinayta, —nispa.

Jesusrí payta cachaporka:

<sup>39</sup> —Cutiriy tatasniyquiman. Willamuy Dios tucuy sumaj ruwapuskanmanta, —nispa.

Ajinamanta payka llajtantinman rispa willarasharka Jesús paypaj ruwapuskanta.

*Ashqha runas Jesusta suyancu*

<sup>40</sup> Kocha chimpapi ashqha runas Jesusta suyasharkancu. Chayraycu chayman cutejtin tucuynincu payta, "Walejta jamunqui", nerkancu.

<sup>41</sup> Chanta uj runa, Jairo sutioj, riqhurimorka. Pay uj curaj runa carka tantacuna-wasimanta. Jesuspa ñaupakenpi konkoricuspa mayta mañacorka Jesús wasinman rinanta, <sup>42</sup> ususin wañupunayashaskanraycu. Paypa sapa ususin carka, chunca iscayniyoj watayojjina. Jesustaj paywan rerka.

*Jesuspa ponchon cantota jap'irej warmi*

Jesús rishajtin ashqha runas q'isquicamuspa payta ñit'isharkancu.

<sup>43</sup> Paycuna uqhupitaj carka uj onkoska warmi. Payka muchorka chunca iscayniyoj watata yawar apaywan. Tucuy capuynintapis tucuy-corka medicoswan jampichicuspa. Nitaj ni mayken medicopis payta thañichiyya aterkachu. <sup>44</sup> Chay warmeka Jesuspa khepanman jamuspa ponchon t'icasninta jap'irerka. Chay quiquinpacha yawar apaynimanta thañichiska carka.

<sup>45</sup> Jesustaj nerka:

—¿Pitaj jap'iricuwarkarí?

Tucuy runas nerkancu:

—Ni pipis jap'iricusorkachu, —nispa.

Chanta Pedro nerka:

—Yachachejný, ashqha runas q'isquicamuspa kanta ñit'ishasuncu, —nispa.

<sup>46</sup> Jesusrí nerka:

—Ujmin jap'iricuwarka. Chekamanta noka reparani atiyniy uj runata thañichiskanta, —nispa.

<sup>47</sup> Chay warmeka ruwaskanmanta yachacuskanta repararka. Chayraycu qharcatitispas Jesusman jamorka, ñaupakenpitaj konkoricorka.

Tucuy runaspa ñaupakencupitaj imapajchus Jesusta jap'iricuskanta willacorka. Imaynatachus chay quiquinpacha thañicuskantawan willacorka.<sup>48</sup> Chanta Jesús payta nerka:

—Mamáy, Diospi jap'icuskayquiraycu thañiska canqui. Allillanta ripuy,—nispa.

*Jesús Jairoj wawanta causarichin*

<sup>49</sup> Jesús parlashajtillanraj curaj runaj wasinmanta uj runa jamorka willaj:

—Ususiyqueka wañupunña. Amaña yachachejta molestaychu, —nispa.

<sup>50</sup> Jesusrí chayta uyarispa Jairota nerka:

—Amaña manchachicuychu. Astawanpis Diosllapi jap'icuy. Ususiyqueka thañiska canka,—nispa.

<sup>51</sup> Chayaspa chay curajpa wasinman yaycorka. Sakellarkataj Pedrota, Juanta, Jacobotawan paywan yaycunancuta wawaj tatanta mamantawan <sup>52</sup> Tucuy runas wawamanta phutiywan manchayta wakasharkancu. Jesusrí nerka:

—Amaña wakaychejchu. Cay wawaka mana wañuporkachu. Manachayrí puñushan,—nispa.

<sup>53</sup> Paycunataj wawaka wañuska caskanta yachaspa, Jesusta asipa-yarkancu. <sup>54</sup> Jesusrí wawata maquinmanta jap'ispa wajyarka:

—Imillita, jatarimuy,—nispa.

<sup>55</sup> Imillitataj wañuymanta causarimporka. Chay quiquinpacha jatari-corka. Jesusri camacherka payman miqhunata konancuta. <sup>56</sup> Tatasnin mayta t'ucorkancu. Jesustaj paycunata camacherka ama ni pimanpis chayta willanancuta.

## 9

*Jesús cachasninta willarajta cachan*

<sup>1</sup> Jesús chunca iscayniyoj cachasninta tantaycorka. Paycunamantaj atiyta korka tucuy supaycunata kharkonancupaj tucuy onkoycunatapis thañichinancupaj. <sup>2</sup> Paycunata cacharka Dios camachin, chaymanta willaranancupaj, onkoska runasta thañichinancupajtaj. <sup>3</sup> Jesús paycunata nerka:

—Ñanniyquichepjaj ama ni imatapis apacuychejchu. Nitaj c'aspita purinayquichejpaj, nitaj wayakata nitaj t'antata nitaj kolketa nitaj iscay camisastapis apacuychejchu. <sup>4</sup> Mayken wasillamanpis wajyari-cusonkachej chayka, chaypi cacuychej llajtamanta llojsipunayquichej-cama. <sup>5</sup> Runas mana wajyasojtiyquichejka chay llajtamanta llojsipu-ychej. Chaquisniyquichejmantataj jallp'anta thalaycarpaychej chay runaspa contrancipi. Chaywan runas yachankancu Diospa willanas-ninta khesachaskancuta,—nispa.

<sup>6</sup> Chanta Jesuspa cachasninti llojsispa purerkancu ranchomanta rancho. Tucuynejpi sumaj willanasta willarasharkancu onkoska runastataj thañichisharkancu.

*Herodes Jesusmanta tapucun*

<sup>7</sup> Jesuspa tucuy ruwaskasrinmanta uyarispa camachej Herodes ni imata yuyayta atisharkachu. Waquinmin nisharkancu: “Juan causarim-pun wañuymanta”, nispa. <sup>8</sup> Waquintaj nisharkancu: “Elías ujtawan

riqhurimun”, nispa. Ujcuna nishallarkancutaj: “Unay willajcunamanta ujnínhá causarimpun”, nispa.

<sup>9</sup> Herodesrí nerka:

—Noka quiquiy Juanpa umanta khorucherkaní. Cunan ¿pitaj cay runa pimanta tucuy cayta uyarišanirí?

Herodeska Jesusta ricuya munasharkapuni.

*Jesús phishka warankaman miqhuchin*

<sup>10</sup> Jesuspa cachasnin cutimuspa tucuy ruwaskasnincumanta payman willarkancu. Payri paycunata nerka:

—Jacu rina nokanchejpuralla wajnejman, —nispa.

Betsaida llajtanejman rerkancu. <sup>11</sup> Chaynejman riskancuta yachaspa, ashqha runas Jesusta khaterkancu. Jesús paycunata ricuspa nerka:

—Cusicuni jamuskayquichejmanta, —nispa.

Paycunamantaj Dios munacuywan camachin, chaymanta parlasharka. Onkoska runastapis thañichisharka.

<sup>12</sup> Ch'isiyashajtintaj yachacojcunanka kayllaycuspa Jesusta nerkanca:

—Cachapullayña cay ashqha runasta. Richuncu kaylla ranchosman wasisman miqhunata puñunata masc'anancupaj ch'in pampapi caskanchejraycu, —nispa.

<sup>13</sup> Jesusrí paycunata nerka:

—Kancuna paycunata miqhuchiyyej, —nispa.

Paycunataj cuticherkanca:

—Phishka t'antaswan iscay challwitasllapiwan capuwaycu. Tucuy cay runaspaj miqhunata rantej rinaycutachu yuyawaj, nipunichá, —nispa.

<sup>14</sup> Chaypimin carkancu phishka warankajina, kharislla yupaska. Jesusrí yachacojcunaman nerka:

—Cay runasta tiyaycuchiyyej t'aka t'akallata phishka chuncamanta phishka chunca, —nispa.

<sup>15</sup> Ajinata ruwarkancu. Tucuytaj tiyacorkancu. <sup>16</sup> Chanta Jesuska chay phishka t'antasta iscay challwitastawan maquisnippi jap'erka. Janaj pachata khawarispataj Diosman graciasta korka t'antasmanta challwitsmantawan. Chaycunata partispataj yachacojcunaman jaywasharka paycuna runasman konancupaj. <sup>17</sup> Tucuy runastaj miqhuspa sajsacorkancu. Yachacojcunataj chay puchoj partiska miqhunasmanta chunca iscayniyoj canastas junt'ata okharerkancu.

*“Diospa ajllaskan Cristomin”*

<sup>18</sup> Uj cuti Jesús sapallan Dioswan parlacusharka. Kayllanpitaj yachacojcuna casharkancu. Paycunata Jesús taporka:

—Ashqha runas nokamanta parlaspa ¿pi caskaytataj nincu?

<sup>19</sup> Yachacojcunataj payman cuticherkanca:

—Waqin nincu, bautizaj Juan. Waquin nincu, Elías. Waquinri, ujin Diospa unay willajcunamanta, chaychá causarimpuskan, nisuncu.

<sup>20</sup> Jesús paycunata tapullarkataj:

—Kancunari, ¿pi caskaytataj ninquichej?

Pedrotaj cuticherka:

—Kan Diospa ajllaskan Cristomin canqui, —nispa.

<sup>21</sup> Chanta Jesús paycunata sinch'ita camacherka ama pimanpis chayta willanancuta.

*Jesús willan wañuyninmanta causarimpuyinmantawan*

<sup>22</sup> Paycunaman willarka:

—Noka, Diospa cachaska Runan, anchata ñiac'arinay tiyan Diospa munayninmanjina. Israel curajcunawan yupaychana-wasipi curajcunawan yachachejcunapiwanpis, tucuy paycuna chekatapuni nokata khesachawankancu wañuchiwankancutaj. Quinsa p'unchaymantari causarimpunay tiyan, —nispa.

<sup>23</sup> Tucuy runasta nisharkataj:

—Pichus munan yachacojniy cayta nokawan riytapis chayka, sake-nan tiyan quiquin munayninta. Chaywanpis sapa p'unchay nokaraycu pay quiquinpi muchunan tiyan. Nokatataj casunawanpuni tiyan wañuñancama. <sup>24</sup> Chekatapuni pillapis causayninta payllapaj wakay-chacuya munajka mana wiñay causayniyojchu canka. Pillapis causayn-inta cay pachapi chincananta sakejka nokata casuwaskanraycu chayka, chekatapuni payka wiñay causayniyoj canka. <sup>25</sup> Reparaychej: Sichus uj runa cay pachantintapis jap'inman pay quiquinri wiñaypaj chin-capunmantaj chayka ¿ima allin canman paypajrí? <sup>26</sup> Pillapis nokamanta niskasniymantapis p'enkacumman chayka, nokapis cutimuspa paymantaka p'enkacullasajtaj. Noka, Diospa cachaska Runanka, cutimusaj jatun atiyniyan, Tatay Diospa atiyninwan, angelesninpá atiyn-incuwanpis. <sup>27</sup> Chekatapuni willashayquichej: Cunan caypi cashajcuna-manta waquin mana wañonkancuchu Dios camachinanpaj jamuskanta ricunancucama, —nispa.

*Jesús lliphipej c'anchayninpí riqhurimun*

<sup>28</sup> Chayta niskantawan pusaj p'unchaymantajina Jesús orkoman rerka Dioswan parlaj. Pusarkataj Pedrota, Juanta, Jacobotawan.

<sup>29</sup> Jesúis Diosmanta mañacushajtin uyanpa rijch'aynin wajjinaman tucorka. P'achasninpis sumaj yuraj lliphipejjinaman tucorkancu.

<sup>30-31</sup> Khaway, iscay runas, Moisés Eliaspiwan, janaj pachamanta Diospa lliphipishaj atiyninwan riqhurimorkancu. Jesuspa wañuynimanta parlanacusharkancu, chayta Jerusalenpi junt'anantaña Diospa yuyaskanmanjina. <sup>32</sup> Pedrotawan paywan cajcunatawantaj puñuy atiparka. Puñushaskancumanta rijch'arispataj Jesuspa lliphipej c'anchayninta ricorkancu iscay runastawan paywan sayashajta. <sup>33</sup> Chay runas Jesusmanta ripunayashajtincu Pedro Jesusta nerka:

—Yachachejný, sumajta caypi cashanchej. Ruwaycuman quinsa ch'ujllasta, ujta kanpaj, ujta Moisespaj, ujtataj Eliaspej, —nispa.

Pedroka chayta nerka mana yachaspa imatachus parlananta.

<sup>34</sup> Parlashajtin uj phuyu riqhurimuspa paycunaman uraycamorka. Yachacojcuna phuyupi caspa manchachicorkancu. <sup>35</sup> Phuyumanta uj parlamushajta uyarerkancu:

—Caymin ajllaska Wawayka. Payta uyariychej, —nispa.

<sup>36</sup> Chay parlamojta uyarishaspataj Jesusta sapallanta ricorkancu. Ch'inlla cacorkancu manataj ni piman ricuskancuta willarkancuchu chay p'unchaycunapi.

*Jesús thañichin supayniyojoventa*

<sup>37</sup> K'ayantin orkomanta uraycamojtincuña ancha ashqha runas Jesuswan tincorkancu. <sup>38</sup> Chay q'isqui runasmanta ujníñ khaspererka:

—Yachachejný, mañacuyqui wawayta thañichinapaj khawaripun-awayquita pay sapan waway caskanraycu.<sup>39</sup> Supay payta jap'ishanpuni. Ujllata wawata khaykeyachin. Supaytaj payta t'ucuchin. Phosokojina llausa surun siminmanta. Supay payta chokaycachachishanpuni manataj payta munanchu sakeyta.<sup>40</sup> Ñapis yachacojcunayquita mañarkaniña supayta kharkonancuta. Paycunari mana aterkancuchu,—nispa.

<sup>41</sup> Jesustaj nerka:

—¡Ay, Diospi mana jap'icoj nitaj cheka yuyayniyoj runas! ¡Mayc'ajcamataj kancunawan casaj! ¡Mayc'ajcamataj kancunata muchuskayquichej!

Chaymanta jovenpa tatanman cuticherka:

—Cayman pusamuway wawayquita,—nispa.

<sup>42</sup> Joven kayllamojtintaj supay pampaman urmachispa t'ucuwan jap'iycucherka. Jesusri supayta sinch'iwan c'amerka, joventataj thañicherka. Chanta joventa tatanman koporka.<sup>43</sup> Tucuy runastaj manchaytapuni t'ucusharkancu Diospa may jatun atiyninmanta.

Tucuy runas Jesuspa ruwaskasninemanta t'ucushajtincutaj payka yachacojcunanta nerka:

<sup>44</sup> —Cay niskayta yuyayniyquichejpi sumajta jap'icuychej: Noka, Diospa cachaska Runanka, sajra runaspa maquisnincuman jaywaskaña caj rishani,—nispa.

<sup>45</sup> Yachacojcunari mana yacharkancuchu Jesuspa niskanka imatachus niyta munaskanta. Pacaska carka yuyaynincumanta, chayraycu mana repararkancuchu. Chaywanpis chay niskanmanta payta tapuya manchachicorkancu.

### *Maykenchus curaj canman*

<sup>46</sup> Chanta yachacojcunaka churanacuya kallarerkancu maykenchus paycunamanta aswan curaj cananmanta.<sup>47</sup> Jesusri yacharka sonkos-nincipi tanteyaskancuta. Chayraycu uj wawata jap'ispas ladonpi sayacherka.<sup>48</sup> Chantaka yachacojcunaman nerka:

—Nokapi jap'icojka cayjina wawata, “Walejta jamunwanqui”, nispaka noka quiqiyyta nishawan. Nokata, “Walejta jamuwanqui” niwajka, cachamuwjaniytapis nishallantaj. Tucuy kancunamanta aswan pisipaj khawacoj cajmin chekamanta curaj cajka cashan,—nispa.

### *Mana contranchejpi cajka nokanchejwanmin*

<sup>49</sup> Chanta Juan Jesusta nerka:

—Yachachejný, ricorkaycu uj runata atiyniyoj sutiyquiwan supaycunata kharkoshajta. Mana kanta nokaycujina khatej caskanraycu payta jarc'ayta kallarerkyaycu,—nispa.

<sup>50</sup> Jesús nerka:

—Amaña jarc'aychejchu payta. Mana contrayquichejpi cajka kancunaj allinniyquichejpaj cashan,—nispa.

### *Jesús Galileamanta llojsin*

<sup>51</sup> Dios janaj pachaman Jesusta ujtawan pusanen carka. Chay p'unchaycuna kayllamojtin Jesús ajinata tucuy sonkowan yuyacorka Jerusalenman rinanta.<sup>52</sup> Paypa ñiaupakentataj willajcunata cacharka. Rispataj yaycorkancu Samariapi ujin llajtamán Jesuspaj waquichipunancupaj.<sup>53</sup> Samaritanocunari Jesús chaypi

khepacunanta mana munarkancchu Jerusalenman rishaskanta sut'ita reparaskancuraycu. Jerusalenpi tiyacojcunawantaj chejniskas carkancu.<sup>54</sup> Iscay yachacojcunataj, Juan Jacobopiwán, chayta ricuspa Jesusta nerkanca:

—Señorníy ¿munawajchu janaj pachamanta ninata uraycuchimunancheja cay runasta ruphaycuchinapaj? Elías ruwarka, chayjinata,—nispa.

<sup>55</sup> Chanta Jesús paycunaman cutirispa c'amerka:

—Mana yachanquichejchu sonkoyquichejpi yuyaskayquichejka maymantachus caskanta.<sup>56</sup> Noka, Diospa cachaska Runanka, runaspa causaynincuta cacharinapaj jamorkani manataj paycunata tucuchinaypajchu,—nispa.

Chaymanta waj llajtaman riporkancu.

### *Jesusta khaticuya munajcuna*

<sup>57</sup> Rishajtinctaj, uj runa Jesusta ñanpi nerka:

—Kanwan cusca risaj maymanchá rejtiyquipis, chayman,—nispa.

<sup>58</sup> Jesustaj cuticherka:

—Atojcuna jusc'usniyoj, phawashaj p'iskospis thapasniyoj cancu. Noka, Diospa cachaska Runanrí, mana wasiyojchu cani,—nispa.

<sup>59</sup> Waj runata Jesús nerka:

—Jamuy, yachacojnyi cay,—nispa.

Payrí nerka:

—Señorníy, ñaupajta sakellawayraj tatayta p'ampamunayta,—nispa.

<sup>60</sup> Jesustaj cutichispa nerka:

—Wañuskacuna wañuskasnincuta p'ampamuchuncu. Kanrí, riy, Dios camachin, chaymanta willarallaypuni,—nispa.

<sup>61</sup> Ujnintaj Jesusta nerka:

—Señorníy, khatiskayqui yachacojnyi qui canaypaj. Ñaupajtaka sakellaway wasiypi cajcunamantaraj cacharpayacamunayta,—nispa.

<sup>62</sup> Jesusrí payta nerka:

—Waqin runas munashancu llanc'ayta Dios tucuya camachinanpaj, manataj quiquin munaynincuta sakencuchu. Waj ladoman khawaspá surc'aj runaka mana allintachu surc'an. Ajinallataj quiquin munaynilanta ruwajka mana allinchu llanc'an Dios tucuya camachinanpaj,—nispa.

## 10

### *Kanchis chunca runasta cachan*

<sup>1</sup> Chay khepata Señorka uj kanchis chunca runastawan churarka. Paycunatataj ñaupakenta cacharka iscay iscayta sapa llajtaman ranchoman rej risharka, chaycunaman.<sup>2</sup> Jesuska paycunata nisharka:

—Chekapuni runaska uj jatun pokoska trigo chajrajina cancu. Llanc'ajcunarí chayta ruthunancupajka ancha pisis cancu. Chayraycu mañacuychej Diosmanta llanc'ajcunata uskhayta chajranman cachamunanta. Tucuy caytaka paymin camachin.<sup>3</sup> Riychej, cayta reparaspa: Noka kancunata cachashayquichej oveja uñastajina atojcuna chaupita.<sup>4</sup> Amataj apaychejchu ni kolke churanata, ni wayakata nitaj ojot'asta. Puriyniyquichejpi napaycuspa ama khepacuychejchu.<sup>5</sup> Mayken wasillamanpis wajyaskas canquichej chayka, napaycuspa ñaupajtaka niychej: “Cay wasipi tiyacoj runaska

Diosman allinyaskas cachuncu", nispa. <sup>6</sup> Sichus chay wasipi tiyaco runa munan Diosman allinyacuya chayka, napaycuskayquichejka paywan caonka. Manachayrí napaycuskayquichejka kancunaman cutimpusonkachej. <sup>7</sup> Wajyaskas canquichej chay wasillapi cacuychej. Chaypi tiyaco runaspa capuskanmanta miqhuychej ujyaychejtaj. Llanc'askancumanta llanc'ajcunamanka miq'hunancupaj konancupuni tiyan. Uj wasillapi tiyacuychej, amataj wasimanta wasi purishaychejchu. <sup>8</sup> Uj llajtaman yaycojtiyquichej runas: "Walejta jamunquichej", nisojtiyquichejka, chaypi cacullaychej. Miqhuychej jaywasuskayquichejtaka. <sup>9</sup> Thañichiychej chaypi onkoska cajcunata. Niychejtaj runasman: "Cunan Dios caypiña cashan camichinanpaj", nispa. <sup>10</sup> May llajtaman yaycojtiyquichej runas mana: "Walejta jamunquichej", nisojtiyquichejka, llojsiychej. Jatun ñancunancuman rispa chay runasta nimuychej: <sup>11</sup> "Llajtayquichejpa jallp'anta chaquisniycumanta contrayquichejpi thalarparishaycu. Cayta ruwaycu reparanayquichejpaj cunan Dios camachinanpaj kayllayquichejpi caskanta khesachaskayquichejtataj", nispa. <sup>12</sup> Yachacojcunáy, niyquichej, Diospa c'ajaj phiñacuynin p'unchaypeka astawan ñiac'arichinanta chay llajtapi tiyacojcunata Sodoma llajtapi tiyacojcunamanta niskaka,—nispa.

### *Diospi mana jap'icoj llajtas*

<sup>13</sup> Chaywanpis Jesús nerka:

—¡Ay, phutiy, ari, kancuna Corazín llajtapi tiyacojcunapajka! ¡Ay, phutiy, ari, kancuna Betsaida llajtapi tiyacojcunapajpis! Dios jatun ruwanasta llajtasniyquichejpi ruwarka. Sichus Tiro llajtapi Sidón llajtapiwan chay quiquin ruwanasta ruwanman carka chayka, unayña paycunaka sajra ruwanasnincuta sakencuman carka. Yana p'achasnincuta churacuspa ushphata umasnincuman khallaycucuncuman carka. Ajinapi runasman ricuchincuman carka sajra ruwaskasnincumanta mayta phuticuskancuta. <sup>14</sup> Diospa c'ajaj phiñacuynin p'unchaypiri kancunata astawan ñiac'arichenka Tiro llajta Sidón llajtawan tiyacojcunamanta niskaka. <sup>15</sup> ¡Kancunapis Capernaum llajtayojcuna, yuyanquichejchu jakay p'unchaypi janaj pachacama okhariskas curajpaj khawaskas canayquichejta! Astawanka uqhu pachacama uraycuchiskas canquichej.

<sup>16</sup> Chaywanpis Jesús chay kanchis chunca runasta nerka:

—Kancunata uyarejka nokata uyariwan. Kancunata khesachajri nokata khesachawan. Nokata khesachawajrí cachamuwajniya khesachallantaj,—nispa.

### *Kanchis chunca runas cutimuncu*

<sup>17</sup> Chay kanchis chunca yachacojcunantaj cusiywan Jesusman cutimuspa nerkancu:

—Señorníy, supaycunapis casuwarkaycu paycunata sutiyquipi camachejtiycoka,—nispa.

<sup>18</sup> Jesustaj paycunaman cuticherka:

—Arí, khawarkani supay Satanasta janaj pachamanta urmayca-mushajta lliuj-lliujtajina.<sup>19</sup> Khawaychej supay Satanaspa tucuy atiyninta atipanayquichejpaj atiyta korkayquichej. Catarista chayrí atojo-atojcunatapis saruwajchej, ajinata sajra runasta atiyniywan atipan-quichej. Manataj ni imapis imanasonkachejchu.<sup>20</sup> Astawanpis ama cusicuychejchu supaycuna kancunata casususkayquichejmantaka. Astawanka cusicuychej sutisniyquichej janaj pachapi kelkaskasña caskanmanta,—nispa.

*Jesús cusicun Santo Espíritupi*

<sup>21</sup> Chay quiquinpacha Santo Espíritu Jesuspa sonkonman jatun cusiy-wan junt'acherka. Jesustaj nerka:

—Tucuy cay pachata janaj pachatawan Camachej Tatáy, agradece-cuspa yupaychayqui. Imaraycuchus yuyaskayquita pacarkanqui ancha yachayniyoj runasmanta. Chaytarí wawajina llamp'u sonkoyojcuman sut'incharkanqui. Arí, Tatáy, ajinata ruwaskayquipi cusicunqui,—nispa.

<sup>22</sup> Nerkataj:

—Tatay Dios nokaman tucuy yachayta kowarka. Paylla noka Wawan-taka rejsiwan. Tatayta noka Wawallan rejsini. Pimanchus noka Wawan munani Tatayta rejichiyya, chay runalla paytaka rejsin,—nerka Jesús.

<sup>23</sup> Yachacojcunanman cutirispataj paycunallata nerka:

—Ricushaskayquichejta ricuspa may cusiskas canquichej.

<sup>24</sup> Niyquichej, ashqha unay willajcuna camachejcunapiwan ricushaskayquichejta ricuya munaskancuta. Manataj ricorkancuchu. Uyarishaskayquichejta uyariyya munarkancu. Manataj uyarerkan-cuchu,—nispa.

*C'acha samaritano runamanta*

<sup>25</sup> Chaypitaj carka uj israel yachachej. Payka yachayta munasharka Je-suspa yachachiskasnin chekachus manachus caskanta. Jesusta taporka:

—Yachachej ¿ima allin cajta ruwanay tiyan wiñay causayniyoj canay-paj?

<sup>26</sup> Jesús cuticherka:

—Diospa camachiskasnini¿i imataj kelkaska cashan? Leejtiyqui ¿ima niytataj munan?

<sup>27</sup> Chay yachachejtaj cuticherka:

—Diospa camachiskasnini¿i nin: “Señor Diosniyquita munacunayqui tiyan tucuy sonkoyquiwan, tucuy causayniyquiwan, tucuy callpayqui-wan, tucuy yuyayniyquiwanpis. Runa-masiyquitapis munacuy kan quiuiyquita jina”,—nispa.

<sup>28</sup> Jesustaj payta nerka:

—Cutichiwaskayqueka chekamin. Chayta ruwashaypuni, wiñay causayniyotaj canqui,—nispa.

<sup>29</sup> Chay yachachejrí tapuskan chekan caskanta ricuchiyta munarka. Chayraycu Jesusta nerka:

—¿Pitaj runa-masiyri?

<sup>30</sup> Cutichispataj Jesús nerka:

—Uj israel runa Jerusalén llajtamanta Jericó llajtaman uraycusharka. Suwas paytaka muyuycarpaspa jap'iycorkancu. Paycuna p'achasninta

lluch'uspataj makaycorkancu. Ripuspataj runataka wañuskatajina sak-erkancu. <sup>31</sup> Ajinataj yupaychana-wasipi uj ruwanayojo chay ñanllatataj uraycusharka. Chay wijch'uska runata ricuspa carunejta muyurerka. <sup>32</sup> Ajinallatataj yupaychana-wasipi uj yanapajpis chayman chayarka. Wijch'uska runata ricuspataj carunejta muyurillarkataj. <sup>33</sup> Chanta chejniska samaritanocunamanta uj runarí rispa wijch'uska runa casharka, chayman chayarka. Paytaj ricuspaka mayta qhuyarka. <sup>34</sup> Payman kayllaspa jampiwan jampiyucuspataj nanaskasninta wataycorka. Quiquin uywanman payta llok'achispa pusarka puñuna wasiman. Chaypi payta sumajta khawarka. <sup>35</sup> Chay samaritano k'ayantin llojsipushaspa iscay p'unchay llanc'askanmantajina kolketa wasijoymán korka. Nerkataj: "Sumajta khawarijuway cay runata. Sichus astawan gastanqui chayka, cutimuspa noka kopuskayqui", nispa.

<sup>36</sup> Chanta Jesús chay yachachejta taporka:

—Chay quinsamanta suwawan jap'ichicojpa runa-masenka ¿mayken-nincu caskantataj yuyanqui?

<sup>37</sup> Yachachejtaj cuticherka:

—Wijch'uska runata qhuyarka, chay runa, —nispa.

Jesustaj payta nerka:

—Arí, paypuni carka. Kanpis quiquillantataj qhuyaspa ruwamuy, —nispa.

### *María Jesusta uyarín*

<sup>38</sup> Jesús yachacojcunanwan rishaspa uj llajtaman yaycorka. Chaypi uj warmi, Marta sutiyoj, Jesusta wasinman wajyarka. <sup>39</sup> Paypa ñañan Mari-ataj Jesusta chaquisnin kayllapi tiyacupsa willaskanta uyarisharka. <sup>40</sup> Martarí miqhunata waquichishaskanwan atipachicusharka. Chanta jamorkospa Jesusta nerka:

—Señorníy, reparay ñañay ruwanata sapallayman sakeshawaskanta. Nipuway, ari, ruwananpi yanapanawanta, —nispa.

<sup>41</sup> Señortaj payman cuticherka:

—Kan, Marta, ashqha ruwanaswan atipacuspa musphachiskataj tu-cuchishanqui. <sup>42</sup> Uj sapallanmin canan cashan. Mariaka allin cajta ajllarka. Cay ajllaskanka mana paymanta khechuskachu canka, —nispa.

## 11

### *Jesús yachachin Diosmanta mañacuya*

<sup>1</sup> Uj lugarpí Jesús Diosmanta mañacusharka. Tucushajtintaj yachacojcunanmanta ujnínerka:

—Señorníy, Diosmanta mañacuya yachachiwaycu. Juanpis yachacojcunanta Diosmanta mañacuya yachacherka, ajinata, —nispa.

<sup>2</sup> Chayraycu Jesús paycunata nerka:

—Diosmanta mañacushaspaka niychej:

Janaj pachapi caj Tataycu, tucuy runas sutiyquita yupaychachuncu. Mayta munaycu tucuyta camachinayquita.

Janaj pachapi munayniyqui ruwacushan, ajinallataj cay pachapipis ruwacuchun.

<sup>3</sup> Causanaycupaj miqhunaycuta kowaycupuni sapa p'unchay.

<sup>4</sup> Juchasniycuta khechuspa perdonawaycu; nokaycupis perdonaycu tucuy juchata nokaycuman ruwajcunata. Llaquiyuncunapi callpachawaycu ama juchallicunaycupaj, —nispa.

*Uj quiquinchana mayta mañacoj amigomanta*

<sup>5</sup> Chaywanpis paycunata nerka:

—Kancunamanta ujniyquichej chaupi tutata amigonpa wasinman rispa ninman: “Amigóy, quinsa t'antasta ayniriway.” <sup>6</sup> Uj amigoy ñan puriymanta cunallan chayamun wasiyman. Manataj ni imay canchu payman jaywarinapaj”, nispa. <sup>7</sup> Amigoyquitaj wasi uqhumanta cutichispas nimunman: “Amaña molestawaychu. Puncoka tutapaj sumaj wisk'askaña cashan. Wawasniytaj puñushancu nokawan. Mana atinichu jatarimuya kosunapaj”, nispa. <sup>8</sup> Chekatapuni chay runa manapis jatarinmanchu t'antata kosunapaj amigon caskayquiracyu. Mayta mañacusayquiracyuri jatariconka imatachus mañacusayquitataj kosonka. <sup>9</sup> Astawanpis niyquichej: Mañacullaychejpuni, Diosmin kosonkachej. Masc'allaychejpuni, Diosmin tarichisonkachej. Wajyallaychejpuni,\* Diostaj puncuta kancunaman quicharisonkachej. <sup>10</sup> Sapa uj mana sakespa mañacojka jap'inpuni; mana sakespa masc'ajtaj tarinpuni; mana sakespa wajyajmanpis puncoka quichariconkapuni, —nispa.

<sup>11</sup> Jesús nillarkataj:

—Wawayqui t'antata mañacusojtin ¿payman uj rumita kowajchu? Chayrí, chailwata mañacusojtin ¿paymanka uj catarita jaywawajchu?

<sup>12</sup> Chayrí, runtuta mañacusojtin ¿uj atoj-atojta jaywawajchu?

<sup>13</sup> Nipunichá. Kancuna tatas, pantaj runas cashaspapis, yachanquichej allin cajta koyta wawasniyquichejman. May astawanraj Dios Tatayquichejka janaj pachamanta Santo Espirituta konka paymanta mañacushajcunaman, —nispa.

*Jesús chayrí Beelzebú*

<sup>14</sup> Jesús supayta uj runamanta kharkosharka. Chay runaka supayniyoj caskanraycu upa carka. Paymanta supay llojsejtintaj upaka parlarka. Runastaj parlaskanmanta t'ucorkancu. <sup>15</sup> Waquincunarí nerkanca:

—Jesuska supaycunata kharkoshan curaj caj supay Beelzebúj atiyninwan, —nispa.

<sup>16</sup> Waquintaj mana creeskancuchu Dios payta cachamuskanta. Chayraycu Jesusmanta mañasharkancu chayta ricuchinanta, uj janaj pachamanta t'ucunata ruwaspa. <sup>17</sup> Jesusrí yuyaskasnincuta yachaspa paycunata nerka:

—Uj llajtapi tiyacojcuna paycunapura makanacojtincoka llajtancu chincapun; uj familiapis chhokonacuspá tucucun. <sup>18</sup> Ajinallataj Satanaswan cashan. Camachisnillantaj paywan makanacojtincoka atiynin tucuconka. Cayta niyquichej Beelzebúj atiyninwan supaycunata kharkoskayta niskayquichejraycu. <sup>19</sup> Ajinapis canman chayka, khatejcnayquichej ¿ima atiywantaj supaycunata kharkoncurí? Paycuna sut'itaka ricuchisonkachej. <sup>20</sup> Astawanrí noka Diospa atiyninnejta supaycunata kharkoskayka niyta munan Dios kancuna uqhupiña caskanta camachinanpaj, —nispa.

Nerkataj:

<sup>21</sup> —Uj callpayoj runa makanaswan sumaj waquichin wasinta. Ajinapi khawajtin capuynenka sumaj wakaychaska cashan. <sup>22</sup> Uj astawan callpayoj runachus payman jamuspa atiparpan chayka, atinicuska makanasninta khechun. Capuynintataj chay callpayojka amigosninwan

\* **11:9** Literal: tocay.

jaywanaycucun. [Nokapis ajinallatataj supay Satanasta atipaspa millay supaycunata kharkoshani.]†

<sup>23</sup> Mana nokaman sayacojka contraypi churacun. Mana nokata yanapawajtaj jarc'awan, —nispa.

### *Runaman cutimoj supaymanta*

<sup>24</sup> Jesús cay quiquinchanawan parlarka:

—Runamanta millay supaychus llojsin chayka, ch'aquinejpi khasillata purin samariyta masc'asp. Mana tarispataj nin: “Llojsimorkani, chay runaman cutiycapusaj”, nispa. <sup>25</sup> Supayka cutimuspa chay runata taripan uj pichaska sumaj allinchaska ch'usaj‡ wasitajina. <sup>26</sup> Chanta rispa paymanta aswan sajra kanchis supaycunata pusamun. Chaycuna yaycuspa runapi tiyacuncu. Ajinapi chay runaka khepata aswan millayman tucupun ñaupajmanta niskaka, —nispa.

### *Casucuymanta*

<sup>27</sup> Chay imasta Jesús parlashajtin uj warmi ashqha runaspa chaupincumanta khaparerka: —¡May cusicuynijoymín onkocusorka ñuñuchisorkataj, chay warmeka! —nispa.

<sup>28</sup> Jesusrí nerka:

—Cusicuynijoymillataj cancu Diospa niskanta uyarej casojcunaka, —nispa.

### *Jonás uj ricuchina*

<sup>29</sup> Ashqha runas payman yapacamushajtincu, Jesús kallarerka parlayta:

—Cunan p'unchay runaska sajracuna caspa uj ricuchinata mañashancu creenawancupaj. Diospa unay willajnin Jonaswan ruwacuskanjina chaylla cashan. <sup>30</sup> Jonaska uj ricuchina carka Nínive llajtapi tiyacoj runaspaj. Ajinallataj noka, Diospa cachaska Runanpis, uj ricuchina casaj cunan p'unchay runaspaj. <sup>31</sup> Sabá llajtata camachej warmeka ancha carumanta jamorka Salomonpa yachayninta uyarej. Reparaychej, kancunawan caypi cashani, Salomonmanta aswan curaj. Chayraycu Diospa c'ajaj phiñacuynin p'unchaypi chay camachej warmi cunan p'unchay runasta juchachanka. <sup>32</sup> Ninivepi tiyacojcuna Jonaspa willaraskanta uyarispa juchasnincuta sakerkancu Diosman cutirinancupaj. Reparaychej, caypi cashani Jonasmanta aswan curaj. Chayraycu Diospa c'ajaj phiñacuynin p'unchaypi Ninivepi tiyacojcuna cunan p'unchay runasta juchachankancu.

### *Uj quiquinchana c'anchaymanta*

<sup>33</sup> Ni pipis uj c'anchayta jap'ichispa pacaycunchu; nitaj wich'i uraman churanchu. Astawanpis pataman churan yaycojcuna c'anchayta ricunancupaj. <sup>34</sup> Ñawiyqui c'anchayllawan ricun cuerpopaj. [Ajinallataj sonkoyquipis Diospa c'anchayninwan reparan. Sichus llimphu sonkoyo] canqui chayka, tucuy causayniyqui c'anchayniyoymín. Sajra sonkoyo] canquirí tucuy causayniyqui lakhapachamin.]§ <sup>35</sup> Pajtataj Diospa cheka c'anchaynin causayniyquipi mana cashanmanchu. <sup>36</sup> Tucuy causayniyqui chay c'anchaywan junt'a cajtin, mana ni ima sajra yuyay

† **11:22** Ninayan. ‡ **11:25** Ajinata nin Mateo 12:44. § **11:34** Ninayan.

kanpi canchu. Uj lliphipej c'anchaypis c'anchashasunquimanjina, Diospa cheka yachachiynenka c'anchasunqui,—nerka Jesus.

*Jesús c'amin fariseosta*

<sup>37</sup> Jesús parlashajtin uj fariseo paywan miqhunanpaj wajyarka. Ajinamanta fariseoj wasinman yaycspa miqhoj tiyaycorka. <sup>38</sup> Israelcunaj mayllacunancu yachacuskancumanjina maquisninta mana mayllacuspa Jesús miqhusharka. Chayta ricuspa fariseoka t'ucorka. <sup>39</sup> Jesusrí payta nerka:

—Kancuna fariseoska vasota chuwata jawallanta mayllanquichej. Sonkoyquichejrí munapayaywan sajra yuyaywan junt'a cashan. <sup>40</sup> ¡Mana yuyayniyojcuna! Dios jawanta ruwarka uqhunta payllataj ruwarka. ¿Chayta manachu reparanquichej? <sup>41</sup> Wajcha runasman tucuy sonkowan qhuyaspa koychej. Ajinapitaj tucuy ima llimphu cashan kancunapaj.

<sup>42</sup> ¡Phutiy, ari, kancuna fariseospajka! Sapa chuncamanta ujta Diosman koshanquichej. Chayta koshanquichej yerbabuenamanta, rudamanta, chayjina juch'uy imasmantawanpis. Astawanpis runasman chekanta ruwayta Diosta munacuytawan konkapunquichej. Chaycunata ruwanayquichej carka, juch'uy imastapis ama konkaspalla.

<sup>43</sup> ¡Phutiy, ari, kancuna fariseospajka! Tantacuna-wasispi curajcunaj tiyanasnincipi tiyacuyta munanquichej. Plazaspi sumajta napaycuchicuyta munallanquichejtaj.

<sup>44</sup> ¡Phutiy, ari, kancuna fariseospajka! Pacaska aya p'ampanasjina canquichej. Runaska mana yachaspa chay ismu niyquichej patata purincu,—nispa.

*Jesús c'amin israel yachachejcunata*

<sup>45</sup> Chaymanta israel yachachejcunamanta uj cutichispa Jesusta nerka: —Yachachej, chayta nispaka nokaycutapis p'enkachillawaycutaj, —nispa.

<sup>46</sup> Jesusrí nerka:

—¡Phutiy, ari, kancuna israel yachachejcunapajka! Kancuna yachachinasniyquichej llasa k'epistajina waj runaspaj waquichinquichej. Chaytataj camachinquichej runasta ruwanancuta k'epistajina k'epirichispa. Kancunari chay camachiskasta ni casojllapis churacunquichejchu.

<sup>47</sup> ¡Phutiy, ari, kancunapajka! Diospa unay willajcunana p'ampanasnincuta c'achachashanquichej. Tatasniyquichejtaj chay willajcunata wañucherkancu. <sup>48</sup> Chay c'achachaskayquichejwanka ricuchishanquichej tatasniyquichejpa ruwaskancuwan ujlla caskayquichejta. Paycunaka Diospa willajcunanta wañucherkancu; kancunataj p'ampanasnincuta c'achachanquichej.

<sup>49</sup> Chayraycu Dioska yachayninpí nin: “Paycunaman cachasaj willajcunaytawan cachasniytawan. Paycunamanta waquinta wañuchenkancu, waquintataj ñac'arichenkancu”. <sup>50</sup> Cay pacha kallaricuymantapacha

Diospa unay willajcunamanta ashqhas wañuchiskas carkancu. Tucuy chay wañuchiskacunamanta cay p'unchay runas juchachaskas cankancu.

<sup>51</sup> Sumajta reparanayquichejpaj niyquichej: Abel sutiyojmanta Zacariascama cay p'unchay runas Diosman cuentata konancu tiyan. Zacariaska yupaychana-wasej ñaupakenpi\* wañuchiska carka.

\* **11:51** Literal: templo altar kayllapi.

52 ‘¡Phutiy, ari, kancuna israel yachachejcunapajka! Diosta rejsinancupaj yachachinasta runasmanta pacarkanquichej. Kancuna quiuiyquichejpis Diosta rejsej mana churacorkanquichejchu. Diosta rejsiyta munajcunatapis jarc'arkanquichej, —nerka Jesús.

53 Jesús wasimanta llojsiporka. Israel yachachejcuna fariseospiwanka mayta phiñacorkancu paymanta. Kallarerkerkancutaj tucuy laya tapunasta tapuya parlaskanpi pantachinancupaj. 54 Cazadorcuna jap'iycunancupaj watekancu, ajinata sumajta uyarisharkancu Jesusta parlaskanpi jap'iycunancupaj.

## 12

### *Puraj uya caymanta wakaychacuychej*

1 Chaycamataj waranka waranka runas Jesusman tantacorkancu sarunacunancucama. Ajinapi Jesuska yachacojcunanman ñaupajta parlayta kallarerka. Nerkataj:

—Wakaychacuychej fariseospa puraj uya caynincumanta. Chay puraj uyaka t'anta pokochina levadurajinamin. 2 Tucuy sumaj khataska cajpis k'ala khataraska canka. Pacaska cajtaj sut'inchaska canka. 3 Arí, lakhapi parlaskayquichejka c'anchaypi uyariska canka. Wasi c'uchupi runaj ningrillanman chhichiskayquichejpis ashqha runasman\* khapariska canka, —nispa.

### *Ama runastaka manchachicuychejchu*

4 Yachacojcunanta Jesús nerka:

—Munacuskasníy, niyquichej ama ni jayc'aj manchachicunayquichejta cuerpollata wañuchejcunataka. Wañuchiskancumanta astawanka mana ni imatapis ruwancuñachu. 5 Noka niskayquichej pita manchachicunayquichej caskanta. Diosta manchachicuychej. Payka causayta khechuspa wiñay ninaman wijch'unanpaj atiyniyojmin. Chayraycu niyquichej: Diosta manchachiycuychej.

6 Runas phishka phichitanca p'isketusta vendencu iscay phatisapi. Chaywanpis cay phichitanquitasmanta Dios mana konkapunchu. 7 Kancunará ashqha phichitanquitasmanta may astawan yuyanaramin canquichej. Umayquichejpi chujchaspis ujmanta uj yupaskas cancu. Amaña manchachicuychejchu.

### *Runaspa ñaupakencupi Señormanta willaymanta*

8 Chaywanpis kancunata niyquichej: Pillapis runaspa ñaupakencupi nokaj camachiy caskanta willacun chayka, nokapis paymanta willallasajtaj. Noka, Diospa cachaska Runan, paymanta angelesnimpá ñaupakencupi camachiy caskanta willasaj. 9 Runaspa ñaupakencupi mana camachiychu caskanta willajtaka nokapis paymanta willallasajtaj mana camachiychu caskanta Diospa angelesnimpá ñaupakencupi.

10 Pillapis noka, Diospa cachaska Runanpa contranpi sajrata parlan chayka, parlaskanmanta perdonaska canka. Santo Espíritoj contranpi sajrata parlají mana perdonaskachu canka.

\* 12:3 Literal: wasi patamanta.

<sup>11</sup> 'Tantacuna-wasiman, camachejcunaman, autoridadcunamanpis apasonkachej. Chaypacha ama chhicata manchachicuspa yuyachejchu imaynatachus cutichinayquichejmanta chayrí imatachus ninayquichejmanta. <sup>12</sup> Santo Espiritumin chay ratupi yachachisonkachej imatachus ninayquichej caskanta, —nerka Jesú.

*Uj quiquinchana khapaj wampu runamanta*

<sup>13</sup> Chay ashqha runasmanta ujnin Jesusta nerka:  
—Yachachejný, nipa way waukeyta chayakeyta t'akapunawanta, —nispa.

<sup>14</sup> Jesustaj nerka:

—Amigo ¿pitaj kancunapaj churawarka capuyniyquichejta t'akajta?

<sup>15</sup> Chanta nillarkataj:  
—Sumajta khawacuychej wakaychacuychejtaj tucuy munapayaymanta. Arí, runaka mana astawan causaytaka atinmanchu may chhica capuynijo cashaspapis, —nispa.

<sup>16</sup> Chaymantaka uj quiquinchanawan parlarka. Nerkataj:

—Carka uj khapaj runa. Paypa haciendantaj may ashqhata pokorka. <sup>17</sup> Chanta kallarerka tanteyacuya: Mana campoy canchu pokopuwaskanta jallch'anaypaj. ¿Imanasajtajrí? <sup>18</sup> Cayta ruwasaj. Pirwasniya urmachispa aswan jatuchejta sayachisaj. Chaycunapitaj tucuy pokopuwaskanta tucuy capuyniytawan wakaychasaj. <sup>19</sup> Sonkoya nisaj: May chhica capuyniy ashqha watapaj wakaychaska cashan. Cunanka samacapusaj, miqhucusaj, ujyacusaj, cusicusajtaj, nispa. <sup>20</sup> Diosrí payta nerka: “¡Mana yuyayniyo runa! Cunan ch'isipacha causayniyquita kopunayqui tiyan. Waquichiskasniyquita ¿pitaj jap'enkarí?” <sup>21</sup> Ajinamin cashan pay quiquinpaj khapaj capuya tantaj runawanka. Chay runaka Diospa khawaynini mana imayo, —nerka Jesú.

*Dios yachan imachus pisisuskayquichejta*

<sup>22</sup> Chaywanpis Jesú yachacojcunaman nillarkataj:  
—Chayraycu niyquichej amaña anchata llaquicuychejchu yuyaspa imatachus causanayquichejpaj miqhunayquichejta. Amañataj anchata yuyaychejchu cuerpoquichejmanta imawanchus p'achallicunayquichejtaka. <sup>23</sup> Causayniyquichejka miqhunamanta astawanrajmin. Cuerpoquichejis p'achamanta astawanrajmin. <sup>24</sup> Sumajta reparacuychej alkamarismanta. Paycunaka mana tarpuncuchu nitaj ruthuncuchu. Mana canchu jallch'anancu ni pirwancupis. Chaywanpis paycunataka Dios miqhuchin. Kancunari p'iskosmanta niskaka may astawanraj canquichej Diospajka. <sup>25</sup> Kancuna chay imasmanta anchata llaquicushajtiyquichejis ¿uj chhica p'unchaycunatawan causayta atiwajchejchu? <sup>26</sup> Ancha pisi cajllatapis mana atispaka ¿imaraycutaj chhicata yuyashanquichej chay waj imasmanta?

<sup>27</sup> Sumajta reparaychej loma t'icasmanta imaynata wiñancu. T'icaska mana llanc'ancuchu nitaj phushcancuchu. Chaywanpis niyquichej: Cay ujnin t'icajina c'achitutaka ni camachej Salomonpis, tucuy khapaj cayninwan, p'achallicorkachu. <sup>28</sup> Ajinata Dios p'achallichin khorata. Cunan p'unchay chajrapi cashancu. K'ayataj hornopi ruphachiska cankancu. ¿Manachu Dios astawanraj kancunataka p'achallichisonkachej? ¡May pisita Diospi jap'icunquichej! <sup>29</sup> Amataj

miqhunayquichejta uijyanayquichejtaka masc'aychejchu llaquicuspa.  
<sup>30</sup> Cay pacha runasmin Diosta mana rejsispa tucuy cay imasta  
 masc'aspas causancu. Dios Tatayquichejka yachanmin cay imaspi  
 pisichicuskayquichejtaka. <sup>31</sup> Astawanpis mayta munaychej tucuy imapi  
 Dios Camachejniyquichej cananta. Chaymanta miqhunata p'achata  
 ima yapasonkachej. <sup>32</sup> Dios Tatayquichejka yuyaskanmanjina munan  
 Camachejniyquichej cayta. Chayraycu ama manchachicuychejchu,  
 juch'uy tropa ovejasníy. <sup>33</sup> Capuuniyquichejta vendeychej.  
 Qhuyacuywantaj wajcha runasman koychej. Cayta ruwaspa janaj  
 pachapi khapaj cajta jallch'acushanquichej, manataj jayc'ajpis  
 cayka tucuconkachu. Jakayman mana yaycuya atinchu suwa,  
 nitaj thutapis thutaspa tucuchiyya atinchu. <sup>34</sup> Maypichá munaska  
 khapayniyquichejpis cashan chaypipuni yuyayniyquichejpis cashan.

*Uj quiquinchana waquichiska camachismanta*

<sup>35</sup> 'Waquiñiskaspuni caychej cutimunay p'unchaypaj.  
<sup>36</sup> Imaynatachus camachis camachejnincuta suyancu, ajinata  
 kancunapis suyawaychej. Chay camachicunaka camachejnincuta  
 casamientoanta cutimunanta suyancu. Ajinapi chayamojtincama  
 puncuta quicharipuncu. <sup>37</sup> Camachejka chayamuspa paycunata  
 ríjch'ashajta taripan. ¡May cusiskas chay camachicunaka! Chekamanta  
 niyquichej: Pay waquiñiconka paycunata tiyaycuchispataj miqhunata  
 jaywanka. <sup>38</sup> Chaipi tutatapis chayrí gallo wakaytapis chayamunman.  
 Sichus paycunata waquiñiskasta taripan chayka, may cusiskas cancu  
 chay camachicunaka. <sup>39</sup> Chay jawapis cayta yachaychej: Sichus uj  
 wasiyoj yachanman ima ratutachus wasinman suwa jamunanta  
 chayka, wakaychanman. Manataj sakenmanchu suwa jusc'uspa  
 wasinman yaycunanta. <sup>40</sup> Kancunapis waquiñiskas cashaychej.  
 Imaraycuchus mana suyanquichej cutimunayta, chay horatamin noka,  
 Diospa cachaska Runan, cutimusaj.

*Uj quiquinchana iscay laya camachismanta*

<sup>41</sup> Chanta Pedro taporka:  
 —Señorníy, ¿cay quiquinchanataka nokallaycupajchu parlashanqui  
 chayrí tucuy runaspajchu?

<sup>42</sup> Señortaj cuticherka:  
 —Parlashani junt'aj, sumaj yuyayniyoj khawapojojmanta. Payjinataj  
 caychej. Patronka payta churan camachisninta camachinanpaj, horas-  
 ninpi miqhuchinanpajpis. <sup>43</sup> May cusiska chay khawapojojka patronnin  
 cutimojtin payta taripan ruwananta ruwashajta. <sup>44</sup> Chekamanta pa-  
 tronnenka tucuy capuyninta khawapunanpaj payta churanka. <sup>45</sup> Chay  
 camachinrí sonkonpi ninman: "Patronniyka khepaconkaraj", nispa.  
 Chanta camachi kharista camachi warmistawan makarayta kallarin.  
 Kallarintaj miqhuyllata, ujyayllata machacapuytawan. <sup>46</sup> Paypa pa-  
 tronnenka cutimonka mana yuyaskan horata. Chayamuspataj paytaka  
 sinch'ita ñac'arichenka, tucuy mana casojcunawan cuscataj churanka.

<sup>47</sup> 'Uj camachirí patronninpa munayninta yachashaspa mana  
 waquiñicunmanchu nitaj munaynintapis ruwanmanchu. Chay  
 camacheka sinch'i ñac'arichiska canka. <sup>48</sup> Uj camachirí mana yachaspa  
 sajrata ruwanman. Chay camacheka pisi ñac'arichiskalla canka. Uj runa  
 ashqhata jap'ispaka ashqhallatataj cutichipunan tiyan. Uj khawapojojis

ashqha ruwanasta jap'ispaka astawan ashqha ruwanasllatataj junt'anana tiyan.

*Jesús parlan churanacuy jatarinanmanta*

<sup>49</sup> Astawanpis Jesús nerka:

—Cay pachapi ninata jap'ichej jamorkani. Mayta munayman jap'ichiskaña cashananta. <sup>50</sup> Astawanrí sinch'i ñiac'ariyman† yaycunay tiyan. Chaytataj muchunay tiyan junt'anaycama. <sup>51</sup> ¿Yuyanquichejchu runas uqhu allillanta causacunancupaj jamuskayta? Niyquichej, mana ajinachu. Astawanrí jamuskaywan runas t'akanaconkancu. <sup>52</sup> Chekamanta cunanmantapachaka uj wasipi phishka tiyacojcuna t'akanaconkancu. Quinsa iscaypa contranpi churanaconkancu, iscaytaj quinsaj contrancupi. <sup>53</sup> Tatan khari wawanpa contranpi churaconka, khari wawantaj tatanpa contranpi, maman warmi wawanpa contranpi, warmi wawantaj mamanpa contranpi, suegran khachunanza contranpi, khachunantaj suegranpa contranpi churaconka, —nispa.

<sup>54</sup> Chaywanpis Jesús ashqha runasman nerka:

—Cay Israel jallp'anchejpi, inti yaycuynejmanta phuyu llojsimoja ricuytawancama ninquichej: "Sumajta paramonka", nispa. Parantaj. <sup>55</sup> Uramanta wayramojtintaj ninquichej: "Sinch'i koñi canka", nispa. Ajinapunitaj tucun. <sup>56</sup> ¡Puraj uya runas! Cay pachata janaj pachatawan khawaspa imayna tiempochus cananta yachanquichej. Chanta ¿imaray-cutaj mana reparanquichejchu imatachus Dios niyta munan cunan p'unchay ruwaskasniywan?<sup>‡</sup> <sup>57</sup> ¿Imaraycutaj kancuna quiuiyquichejka mana reparanquichejchu chekan cajmantarí?

<sup>58</sup> 'Contrallicusoñiyqui curajpaman pusasojenka, ñanllataraj rishaspa uskhayta paywan allinyacuy. Allinyacuy amaña jatun curajman pusasun nanopj nitaj soldadoman jaywaspa carcelman wisk'achisun nanopj. <sup>59</sup> Chekatapuni mana allinyacuwaj chayka, carcelmanta mana llojsimunquichu tucuy phatasta cutichipunayquicama, —nerka Jesús.

## 13

*Diosman cutiriyychej mana tucuchiskas canayquichejpaj*

<sup>1</sup> Chaypachallataj camachej Pilato Galilea runasta wañuchiskanta ujcuna willaj jamorkancu Jesusman. Chay runaska uywasta wañuchishaskancu Diosman jaywanancupaj yachacuskancumanjina. Pilato paycunata wañuchichejtin runacunaj yawarnincu uywasnincoj yawarninwan chajrucuska. <sup>2</sup> Chayta willajtinctaj Jesús nerka:

—Ama yuyaychejchu chay runas tucuy Galilea llajtamasisnincumanta aswan juchayoj caskancuraycu ajinata wañuchiskancutaka. <sup>3</sup> Chekamanta niyquichej: Sajra ruwaskasniyquichejta sakespa Diosman cutirinayquichej tiyan. Chayta mana ruwawajchej chayka, Dios tucuy kancunatapis tucuchillasonkachejtaj.

<sup>4</sup> Yachanquichejjina Siloé torre urmaspa chunca pusajniyoj runasta ñit'erkta. Ama yuyaychejchu chay runas tucuy Jerusalenpi tiyacojcunamanta aswan juchayoj caskancutaka. <sup>5</sup> Chekamanta niyquichej: Juchasniyquichejta sakespa Diosman cutirinayquichej

† 12:50 Literal: bautismo. ‡ 12:56 Ninayan.

tiyan. Chayta mana ruwawajchej chayka, Dios tucuy kancunatapis tucuchillasonkachejtaj,—nispa.

*Uj quiquinchana mana pokoyniyoj sach'amanta*

<sup>6</sup> Cay quiquinchanata Jesús nerka:

—Uj runa higo sach'ata uva huertanpi plantarka. Chanta khepata higosta masc'aj jamuspa mana tarerkachu. <sup>7</sup> Mana tarispataj huerta khawajninta nerka: “Khaway, quinsa watastaña cay sach'aj pokoynta masc'aj jamuni, manataj tarinichu. Cayta c'utuspa orkhoy, khasi jallp'ata usuchishan”, nispa. <sup>8</sup> Huerta khawajrí nerka: “Patronníy, cay watatawan sakellay, allaspa wanuta churanaycama. <sup>9</sup> Chanta sichus pokoyninta konka chayka, allin canka. Sichus manapuni pokonkachu chayka, c'utuchipuy”, —nispa.

*Jesús samacuna p'unchaypi thañichin*

<sup>10</sup> Uj samacuna p'unchay tantacuna-wasipi Jesús yachachisharka. <sup>11</sup> Yachachishajtin uj onkoska warmi yaycorka. Paytaka supay onkocherka chunca pusajniyoj watasta. Manchay c'umupacha cárka manataj chekanyariyta atejchu. <sup>12</sup> Jesús payta ricuspa wajyarka. Nerkataj:

—Mamáy, onkoyniyquimanta cachariska canqui,—nispa.

<sup>13</sup> Jesús maquisninta paypa umanman churarka. Chay quiquin-pachataj chekanyaricapuspa chay warmeka Diosta yupaychayta kallarerka. <sup>14</sup> Samacuna p'unchaypi onkoska warmita thañichiskanraycu tantacuna-wasipi camachejka phiñacorka Jesuspaj. Chay ashqha runasmantaj nerka:

—Semanaka sojta p'unchaycunayojojin. Chay p'unchaycunapi runas llanc'anancu tiyan. Chayraycu chay p'unchaycunallapi jamuychej thañichiskas canayquichejpaj, amataj samacuna p'unchaypeka,—nispa.

<sup>15</sup> Chaymanta Señorka nerka:

—¡Puraj uyas! Samacuna p'unchaypi sapa ujniyquichej wacanta chayrí burrontapis cacharispa yacumanka khatinquni. <sup>16</sup> Cay warmeka Abrahampa ayllunmantamin. Paytaka supay Satanás chunca pusajniyoj watasta watarka. ¿Manachu samacuna p'unchaypi onkoyninmanta cachariska canan carka?

<sup>17</sup> Jesús cayta nejtintaj tucuy p'enkacusharkancu. Tucuy chay ashqha runastaj cusicusharkancu Jesús tucuy may sumaj imasta ruwashaskan-manta.

*Quiquinchana juch'uy mujumanta*

<sup>18</sup> Chaymanta Jesús nerka:

—Willaskayquichej imaynatachus Dios camachin, chayta. <sup>19</sup> Uj juch'uy mujuman\* rijch'acun. Cayta uj runa tarporka huertanpi. Mujoka llojsispa uj sach'itajina wiñarka. P'iskostaj chay sach'aj mallq'isninpí thapacharicorkancu. Ajinallataj Dios runasta camachin chayka, ashqhaman wiñan,—nispa.

<sup>20</sup> Ujtawan nillarkataj:

—Dios camachishajtenka ¿imamantaj rijch'acunman? <sup>21</sup> T'anta pokochina levaduraman rijch'acun. Uj warmi levadurata iscay arroba trigo jac'uman churaycorka. Ajinapi tucuy masa pokospa okharicamorka,—nispa.

\* **13:19** Literal: Israel jallp'api laya mostaza mujitu.

*C'ullcu puncumanta*

<sup>22</sup> Jesuska llajtasta ranchosta purispa yachachisharka, Jerusalenman rishaspa. <sup>23</sup> Uj runataj payta taporka:

—Señorniy ¿pisichu cancu juchamanta cacharichicuspa wiñaypaj causajcunaka?

Runasta yachachinanpaj Jesús cuticherka:

<sup>24</sup> —Tucuy atiskayquichejtapuni ruwaychej Dios camachin, chayman yaycunayquichejpajka c'ullcu puncuyoj caskanraycu. Chekamanta niyquichej ashqha runas munaskancuta yaycuya manataj atinancuta. <sup>25</sup> Jakay p'unchay chayamojtin wasiyoj jatarispa puncuta sumajta wisk'aconka. Chaypachataj jawapi sayaspa puncuta tocayta kallarinquichej. Wajyaspataj ninquichej: “Señor, puncuta quichariwaycu”, nispa. Paytaj cutichimusonkachej: “Mana kancunataka rejsiyquichejchu. Nitaj yachanichu maymantachus caskayquichejta”, nispa. <sup>26</sup> Chanta kallarinquichej nipta: “Cusca miqhorkanchej. Llajtaycupipis yachachiwarkaycu”, nispa. <sup>27</sup> Paytaj nimusonkachej: “Mana yachanichu maymantachus caskayquichejta. Ripuychej nokamanta tucuy kancuna sajra ruwajcunaka”, nispa. <sup>28</sup> Jakay p'unchaypi Abrahamta, Isaacta, Jacobta, tucuy unay willajcunatawan Dios camachin, chaypi cashajta ricunquichej. Kancunari jawaman wijch'uska caspa wakanquichej phutiywan quirusniyquichejtataj c'arucunquichej. <sup>29</sup> Inti llojsimuynejmanta, inti yaycuyenjmanta, tucuynejmantapis jakaypi cankancu runaska. Dios camachin, chaypi miqhunancupajtaj tiyayconkancu. <sup>30</sup> ¡Khawaychej! Dios camachin, chay puncu carunejpi cashajcunamanta waquin ñaupajta yayconkancu. Puncu kayllapi cashajcunamanta waquinri khepapi cankancu, —nerka Jesús.

*Atojjina pantachej Herodes*

<sup>31</sup> Chaypacha waquin fariseos kayllamuspa Jesusta nerkanca:

—Ripuy caymanta camachej Herodes wañuchisuya munashaskanraycu, —nispa.

<sup>32</sup> Jesustaj paycunata nerka:

—Nimuychej chay atojjina pantachej Herodesta: “¡Khaway! Cunan p'unchay k'ayapiwan supaycunata kharkoshani, onkoska runastataj thañichishani. Minchhataj llanc'anayta tucusaj”, nispa. <sup>33</sup> Astawanpis Diospa yuyaskanmanjina uj p'unchaycunatawan purinallaypuni tiyan Jerusalenman chayanaycama. Diospa willajnenka Jerusalenpimin wañuchiska canan tiyan.

<sup>34</sup> ‘¡Mayta phuticuni kancuna Jerusalenpi tiyacojcunamanta! Unaymantapacha Diospa willajcunanta wañuchejcuna, paypa cachaskasninta ch'ankajcunataj canquichej. May ashqha cutis kancunata nokaman tantamuya munarkani. Imaynatachus wallpa chillwisninta phurusnin uraman tantan, ajinallatataj may ashqha cutis kancunata tantamuya munarkayquichej. Kancunari mana munarkanquichejchu. <sup>35</sup> Chekatapuni Dios yupaychana-wasiyquichejta sacerparipun. Niyquichejtaj: Mana ujtawan ricuwanquichejñachu “Jatunchaska cachun Diosmanta cachaska jamojka”, ninayquichejcama, —nispa nerka Jesús.

## 14

### *Jesús thañichin punquilliska runata*

<sup>1</sup> Samacuna p'unchaypi fariseocunamanta uj curaj Jesusta wajyarka paywan miqhunampaj. Curajpa wasinman Jesús yaycojin chaypi cajcuna payta watekasharkancu. <sup>2</sup> Chay quiquinpacha Jesuska ñaupakenpi uj punquilliska onkoska runata ricorka. <sup>3</sup> Jesustaj israel yachachejcunata fariseostapis taporka:

—¿Samacuna p'unchaypi runasta thañichinatachu chayrí mana thañichinatachu camachiskaka nin?

<sup>4</sup> Paycunari ch'inlla carkancu. Jesustaj qhuyacuywan jap'ispa onkoska runata thañicherka cachaporkataj wasinman ripunanta. <sup>5</sup> Israel yachachejcunaman fariseosmanwan nerka:

—Kancunamanta ujniyquichejpa burron chayrí bueyninpis jatun yacu t'okoman urmaycunman. ¿Manachu samacuna p'unchaypipis uskhayta orkhonman?

<sup>6</sup> Chay niskanmantari mana cutichiyya aterkancuchu.

### *Casamientoman wajyaskacunamanta*

<sup>7</sup> Jesustaj khawasharka paywan wajyaskacuna imaynata aswan sumaj caj tiyanasta ajllacushaskancuta. Chayraycu paycunaman uj quiquinchanawan parlarka:

<sup>8</sup> —Casamientoman wajyaska caspaka ama tiyacuychu aswan sumaj caj tiyanapeka. Ichapis kanmanta uj aswan curaj runa wajyaskallataj canman. <sup>9</sup> Chanta wajyacusojniyquichejka nisunquiman: “Cay tiyanata cay ujman koy”, nispa. Kanri p'enkacuspa astawan khepa caj tiyanata masc'ayta kallariwaj. <sup>10</sup> Astawanpis wajyaska caspaka aswan khepa caj tiyanapi tiyacuy. Chaymanta wajyasojka jamuspa kanta nisonka: “Amigóy, jamullay nokawan, cusca tiyacusun”, nispa. Chanta tucuy kanwan tiyacushajcunaj ñaupakencupi sumajpaj khawaska canqui. <sup>11</sup> Chekamanta pillapis pay quiquin jatunchacojka pisipaj khawaska canka. Pisipaj khawacojtaj jatunchaska canka, —nispa.

<sup>12</sup> Chaywanpis Jesús nillarkataj payta wajyajninman:

—Jatun miqhunata waquichispaka ama wajyaychu ni amigosniyquita, ni waukesniyquita, ni ayllusniyquita, nitaj khapaj llajta-masisniyquitapis. Chayta ruwajtiyqueka paycunapis wajyallasuncumantaj. Ajinapitaj cutichipusunquiman. <sup>13</sup> Astawanpis jatun miqhunata waquichispaka wajyay wajcha runasta, ñuc'usta, suchusta, ciegostapis. <sup>14</sup> May cusiska canqui cayta ruwaspaka paycunajta ni imancu caskanraycu. Manamin cutichisuyta atincuchu. Chekata ruwajcuna causarimunan p'unchaypeka Dios cutichipusonka, —nerka Jesús.

### *Uj quiquinchana jatun miqhunamanta*

<sup>15</sup> Chayta uyarispera ujnin paywan tiyacushajcunamanta Jesusta nerka: —¡Cusiska canka Dios camachin, chaypi miqhoj runaka! —nispa.

<sup>16</sup> Jesusrí payta nerka:

—Uj runa jatun miqhunata waquichiyya yuyarka. Waquichispataj ashqha runasta wajyarka. <sup>17</sup> Miqhuna horata camachinta cacharka wajyaska runasman willananpaj: “Jamuychej. Tucuy ima waquichiskaña”, nispa. <sup>18</sup> Wajyaskacunari tucuynincu ujlla kallarerkancu, “Mana atinichu. Ujllapiwan cachun”, niyta. Ñaupaj cajka camachita nerka:

“Cunallan jallp'ata ranterkani, chayta khawaj rinay tiyan. Amajinachu cachun, ujllapiwan”, nispa. <sup>19</sup> Ujtaj nerka: “Cunallan phishka yunta bueyesta ranterkani. Cunanka rishani yachaj imaynatachus llanc'ancu, chayta. Amajinachu cachun, qhuyariwachun”, nispa. <sup>20</sup> Wajpis nillarkataj: “Cunallan casaracorkani. Chayraycu mana atinichu jامuyta”, nispa. <sup>21</sup> Cutimuspataj camacheke señoorninman tucuy cay imasta willarka. Chanta chay wasiyojka phiñacuspa camachinta nerka: “Uskhayta riy llajta callesman ñancunamanpis. Pusamuytaj wajcha runasta, ñuc'usta, ciegosta, suchustawan”, nispa. <sup>22</sup> Paycunata pusamuspaña camacheke willarka: “Señorníy, camachiwaskayquita ruwaniña. Chaywanpis campoka canraj”, nispa. <sup>23</sup> Señortaj camachinta nerka: “Riy campoman. Jatun ñancunamanta chaqui ñancunamantapis runasta pusarimuspa yaycuchiy. Wasiy junt'a cananta munani. <sup>24</sup> Chayraycu niyquichej: Chay wajyaska runasmanta ni ujpis miqhunaytaka malenkaraku”, —nispa.

### *Jesuspa yachacojin caymanta*

<sup>25</sup> Jesús Jerusalenman rishajtin ashqha runas paywan rishallarkancutaj. Cutirimuspa paycunata nerka:

<sup>26</sup> —Yachacojniy cayta munanqui chayka, nokata munacunawayqui tiyan astawan\* quiquin tatayquimanta, mamayquimanta, warmiyquimanta, wawasniyquimanta, waukesniyquimanta, panasniyquimanta, quiquin causayniyquimantapis. Manachayka mana atinquichu yachacojniy cayta. <sup>27</sup> Kan quiuiyquipi muchunayqui tiyan nokaraycu, casunawayquipunitaj tiyan wañunayquicama. Mana chayta ruwaspaka mana yachacojniy cayta atinquichu. <sup>28</sup> Kancunamanta ujniyquichej torreta ruwayta munaspaka ñaupajta tiyaricuspa sumajta tanteyaricun. Yachanan tiyan tucunanpaj kolken caskanta. <sup>29</sup> Cimientota churaspa sichus torreta mana tucuchayta atinmanchu chayka, tucuy ricojcuna paymanta asicuya kallarenkancu. <sup>30</sup> Nenkancutaj: “Caymin chay runaka cashan, waschayta kallarerka manataj tucuchayta aterkachu”, nispa. <sup>31</sup> Chayrí uj llajtata camachej waj llajtata camachejwan makanacunan cajtenka, ñaupajta tiyaricuspa sumajta tanteyaricun. Tapuricunantaj: “Noka chunca waranka soldadosniyoj cani. ¿Caycunawan atipayta atisajchu iscay chunca waranka soldadoswan makanacuwaj jamoj camachejta?” <sup>32</sup> Mana atejjina cajtinrí enemigo carullapiraj cashajtin cachaonka allinyacuymanta parlaj. <sup>33</sup> Ajinallataj kancunawanpis cashan. Pillapis tucuy capuyninta mana sakejka manapuni atinchu yachacojniy cayta.

<sup>34</sup> ‘Cacheka sumajpuni. Sichus cacheka sumajpuni. Sichus cachi lak'ayapunman chayka ¿imaynataj sumaj cachiman cutirillanmantajrí? <sup>35</sup> Cay lak'ayapuska cacheka mana allinchu ni jallp'apaj nitaj wanuwan chajrucunapajpis. Astawanpis runas jawallaman wijch'upuncu. Ajinallataj cashan mana cheka yachacojwanpis. ¡Ningriyoj cajka sumajta uyarichun! —nerka Jesús.

## 15

### *Uj quiquinchana chincaska ovejamanta*

\* **14:26** Literal: chejninanayqui tiyan.

<sup>1</sup> Tucuy impuesto jap'ejcuna juchasapasiwan chimpaycoj cancu Jesusman uyarinancupaj. <sup>2</sup> Chayraycu fariseos israel yachachejcunapiwan Jesuspaj thutoj cancu. Nerkancutaj:

—Cay runaka juchasapasta wajyacun paycunawantaj miqhun, —nispa.

<sup>3</sup> Chanta Jesus fariseosman yachachejcunamanpis cay quiquinchanawan parlarka. Nerkataj:

<sup>4</sup>—Kancunamanta pachaj ovejasniyoj runa ujnin ovejanta chincachicuspa ¿imatataj ruwanman? Isk'on chunca isk'onniyoj ovejasninta ch'innej canchapi saken. Masc'aj rintaj chincaska ovejanta taricampunancama. <sup>5</sup> Ovejanta tarispa may cusiska lijrari campun. <sup>6</sup> Wasinman chayamusataj amigosninta llajta-masisnintawan wajyan tantacamunancupaj. Paycunata nintaj: "Cusicuychej nokawan. Ovejay chincaska carka, chayta taricampuni", nispa. <sup>7</sup> Niyquichej: Ajinallatataj cay pachapi uj juchasapa runa juchasninta sakespa Diosman cutirejtin, Dios anchata cusicun. Astawan cusicun paymantaka chay isk'on chunca isk'onniyoj chekan ruwajcunamanta niskaka. Paycuna ruwanasnincuta mana sakenancuchu tiyan, —nispa.

*Uj quiquinchana chincaska kolkemanta*

<sup>8</sup> Jesús nillarkataj:

—Chunca dracma kolkesniyoj warmipis ujnin kolkenta chincachispa ¿imatataj ruwan? C'anchayta jap'ichin. Wasin uqhuta pichan. Sumajta khawaspa masc'an chincaska kolkenta taricapunancama. <sup>9</sup> Tarispataj amigasninta llajta-masisnintawan wajyan tantacamunancupaj. Paycunata nin: "Cusicuychej nokawan. Kolkeyta chincacherkani, chayta taricampuni", nispa. <sup>10</sup> Chekatapuni niyquichej. Ajinallatataj Diospa angelesnin mayta cusicunkancu uj juchasapa juchasninta sakespa Diosman cutiriskanraycu, —nispa.

*Uj quiquinchana chincaska wawamanta*

<sup>11</sup> Jesús nillarkataj:

—Uj runa iscay khari wawasniyoj carka. <sup>12</sup> Sullc'a cajka tatanta nerka: "Tatáy, sakenawaycumanta chayakeyta, cunan koripuway", nispa. Chaymanta tatancu iscayninman chayakencuta koporka. <sup>13</sup> Pisi p'unchaycunamantari sullc'a wawanka tucuy chayakenta venderka. Kolkewantaj wasinmanta riporka caru llajtaman. Jakaypi kolkenta wayrachimorka munayninmanjina causaspa. <sup>14</sup> Tucuynin kolkenta usuchejtinña manchay yarkhay tucuy jakay jallp'api carka. Paytaj yarkhayninwan ñac'ariyta kallarerka. <sup>15</sup> Chanta jakaypi uj llajtayo-jman mañaricorka: "Llanc'arichillaway", nispataj c'ascacorka. Lla-jtaylorji jallp'anman qhuchisninta michimunanjaj payta cacharka. <sup>16</sup> Thakoj pokoyninta qhuchis miqhoj cancu. Chay pokoywantaj sullc'aka yarkhaymanta sajsacuya munasharka. Ni pipis ni ima miqhuyta payman korejchu. <sup>17</sup> Chaymantarí chekan yuyayninman cutirispa sonkonpi nerka: "Tataypa wasinpi ashqha llanc'ajcuna cashancu. Tucuynincoj miqhunancu puchunpuni. Nokarí caypi yarkhaymanta wañunayashaniña. <sup>18</sup> Jataricuspa tatayman cutipusaj. Nisajtaj: 'Tatáy, juchalicuni Diospa contranta kanpa contrayquitapis. <sup>19</sup> Chayraycu manaña wawayqui ninapajjinañachu cani. Ujnin llanc'a

runayquitajinallapis jap'icuway' ", nispa tanteyacorka. <sup>20</sup> Chanta jatarispa quiquin tatanman cutiporka.

'Carullapiraj cashajtin, tatan paytaka ricorkaña. Ricuspataj tucuy sonkonwan qhuyarka. Uskhayta kayllaycuspa wawantaka abrazaycuspa may munacuywan much'aycorka. <sup>21</sup> Wawanri nerka: "Tatáy, juchallicuni Diospa contranta kanpa contrayquitapis. Chayraycu manaña wawayqui ninapajinañachu cani", nispa. <sup>22</sup> Tatanrí camachisninta nerka: "Aswan sumaj p'achata uskhayta orkhomuspa payta p'achallichiychej. Sortejata maquinman churaychej. Chaquisninmantaj zapatosta churaychej. <sup>23</sup> Wira caj waca uñata apamuspa ñac'aychej. Miqhuspataj mayta cusiracusunchej. <sup>24</sup> Cay wawayka wañuskajina carka cunantaj causarimpunña. Chincaska carka taricapuniñataj", nerka tatan. Chaymanta kallarerkerkancu cusiracuyta.

### *Curaj caj waukemanta*

<sup>25</sup> 'Chaycamarí curaj caj wawanka chajrapi casharka. Cutimuspa chayamorka wasin kayllaman. Uyarerka sicurista tusojtawan. <sup>26</sup> Chanta ujnín camachita wajyaspa taporka: "¿Imaraycu tucuy cay ch'ajwari?" <sup>27</sup> Cuticherka: "Waukeyqui cutimpun. Tatayquitaj wira caj waca uñata ñac'achin waukeyqui allillanta payman cutimpuskanraycu", nispa. <sup>28</sup> Curajrí phiñacuspa mana munarkachu wasiman yaycuya. Chaymanta tatan wajyamoj llojsimuspa payta nerka: "Wawáy, yaycumullay", nispa. <sup>29</sup> Payrí tatanman cuticherka: "Khaway, cay chhica watastaña llanc'ashani camachiyquijina. Camachiwaskayquitapis ni jayc'aj sakespa ruwashanipuni. Kanrí ni jayc'aj uj cabritollatapis kowanquichu amigosniywan cusicunaypaj. <sup>30</sup> Cunan cay wawayqueka capuyniyquita sajra warmiswan k'alata tucuycuspaña jamun. Jamojtintaj cay wawayquipajka wira caj waca uñata ñac'achinqui", nispa. <sup>31</sup> Tatantaj munacuywan nerka: "Wawáy, kan nokawan cuscapuni cashanqui. Tucuy nokajta cajka kanpatapuni. <sup>32</sup> Cunanrí cusiracunanchej tiyan. Cay waukeyqueka wañuskajinamin carka, causarimpunña. Payka chincaska carka taricapuniñataj", nispa nerka tatan.

## 16

### *Uj quiquinchana yachaysapa khawapojojmana*

<sup>1</sup> Jesús yachacojcunaman nillarkataj:

—Carka uj khapaj runa. Paypata carka uj khawapojojin. Ujcuna chay khapaj runaman willaycorkancu: "Khawapusojniyqueka capuyniyquita usuchishan", nispa. <sup>2</sup> Chanta khapaj runaka khawapojojinta wajyaspa nerka: "¿Imatataj cayta kanmanta uyarishani? Cunanka capuyniywan ruwaskayquimanta willaway. Cunanmantapachaka manaña capuyniyya khawapuwanquichu", nispa. <sup>3</sup> Khawapojojka paypi tanteyacuspa nerka: "Camachejnyi khawapojoj caskaymanta wijch'upuwan. ¿Imanasajtaj? Mana callpay canchu jallp'ata allanaypaj. Runasmanta mañacuspa puriyta p'enkaçuni. <sup>4</sup> ¡Aja, cayta ruwasaj! Camachejnyi llanc'anaymanta wijch'uwajtin runas wasisnincuman wajyanawancupaj yachani imatachus ruwanayta", nispa. <sup>5</sup> Camachejnjinman manu runastataj ujmanta uj wajyarka. Ñaupaj cajta taporka: "¿Mayc'ataj camachejnyiyan konayquirí?" <sup>6</sup> Runaka cuticherka: "Waranka p'uñus aceite konay tiyan", nispa. Chanta

khawapojska manu runata nerka: "Cayka konayquimanta papel. Tiyayucuspa uskhayllata phishka pachaj p'uñusllataña churacuy", nispa.<sup>7</sup> Wajtapis taporka: "¿Mayc'ataj konayquiri?" Runaka cuticherka: "Waranka arrobas trigo konay tiyan", nispa. Khawapojska payta nerka: "Cayka konayquimanta papel. Pusaj pachaj arrobasllataña kelkaycuy", nispa.<sup>8</sup> Camachejnintaj mana chekan ruwaj khawapojska mentarka, yuyaywan paypaq waquichicuskanmanta. Niyquichej: Cay pacha imaspi yuyaspa causajcuna paycunapura ruwanasnincipi yachaysapas cancu. Aswan yuyaywan ruwancu cheka caj c'ancharaypi purej runasmanta niskaka.

<sup>9</sup> Nokataj niyquichej: Kolkeyquichejka cay sajra pachamanta cashan, tucuojlla. Chaywanpis qhuyacuywan kolkeyquichejmanta koychej wajcha runasman. Ajinapi wañojtiyquichej kolkeyquichej tucuojtintaj Dios wiñaypaj wasinpi wajyasonkachej.

### *Allin cajta kolkewan ruwaychej*

<sup>10</sup> Pichari pisi kolkellawan chekanta ruwajka ashqha kolkewampis chekanta ruwan. Pisi kolkellawan mana chekantachu ruwajrí, ashqha kolkewampis manallataj chekanta ruwanchu. <sup>11</sup> Cay pachapi kolkewan mana chekanta ruwajtaka ¿pitaj churanka wiñay capuya khawanapanaj? <sup>12</sup> Dios kancunaman cay pachapi kolketa kosorkachej allin cajta ruwapunayquichejpaj. Sichus chaywan mana chekantachu ruwarkanquichej chayka ¿imaynatataj chayakeyquichejtaka Dios kosonkachej?

<sup>13</sup> Ni pi iscay camachejcunata casuya atinchu. Imayraycuchus ujta chejnenka wajtari munaconka. Ujman c'ascaconka wajtari khesachanka. Cheka Diostawan khapaj capuytawan manapuni casuya atinquichu,—nerka Jesús.

### *Jesús fariseosman parlan*

<sup>14</sup> Fariseos tucuy cay imasta Jesús parlaskanta uyarerakancu. Paycunaka kolke munacojcuna caspa millayta asipayaycorkancu. <sup>15</sup> Paycunata Jesús nerka:

—Kancuna chekancunapaj runaswan khawachicuya munanquichej. Diosrí sonkoyquicheja yachan. Runaspaj sumaj khawaska cajtaka Dioska millachicunmin. <sup>16</sup> Moisespa camachiskasnin Diospa unay willajcunarpa kelkaskancupiwanka Juan willararka, chaycama carkancu. Khepataka Dios camachin, chaymanta sumaj willanasta willarashaycu. Tucuy runastaj callpacushancu Dios camachin, chayman yaycunacupaj. <sup>17</sup> Janaj pacha cay pachapis uskhaytaraj chincanman Diospa camachiskasnimanta niskaka. Cay camachiskasmanta ni jayc'aj uj juch'uy niskallanpis atiyninta chincachenkachu. <sup>18</sup> Sapa khari warmimanta t'akanacuspa waj warmiwantaj casaracun chayka, khenchachacun. Chay t'akaska warmiwan casaracoj kharipis khenchachacullantaj,—nerka Jesús.

### *Khapaj runamanta Lazaromantawan*

<sup>19</sup> Nillarkataj:

—Carka uj khapaj runa. C'achitu sumaj p'achaswan p'achallicoj. Sapa p'unchaytaj may sumaj imasta miqhoj, jatun p'unchaypijina tucuy cusiywan. <sup>20</sup> Callarkataj uj wajcha runa, Lázaro sutioj. Payka wijch'uska caj khapaj runaj wasin puncipi. Chay wajcha runari ch'upu onkoywan

junt'a casharka.<sup>21</sup> Maytataj munasharka korinancuta khapajpa miqhuanmanta t'acacoj t'unasta. Alkospis jamuspa ch'upusninta llajwaj cancu.<sup>22</sup> Chaymanta wajcha runaka wañuporka. Angelestaj, payta pusarkancu Abraham cashan, chayman samacunanganpaj. Khapaj runapis wañupullarkataj. Paytaka p'amparkancu.<sup>23</sup> Laurashaj uqhu pachapitaj khapajka manchayta ñac'arisharka. Khawarispataj carupi Abrahamta ricorka, Lazarotapis paywan cuscata ricullarkataj.<sup>24</sup> Chanta wajyacorka: "Abraham, tatáy, nokata qhuyariway. Lazarota cachamuway. Niy payta dedo puntallantapis yacuman chhapuspa apamunawanta kalluya tha-nunanpaj. Cay nina lauraypi mayta ñac'arishani", nispa.<sup>25</sup> Abrahamka cuticherka: "Wawáy, yuyaricuy causashaspaka tucuy sumaj imas kampaj carka. Lazaropajtaj mana allinpuni carka. Cunanrí payka caypi sonkochaska cashan. Kantaj ñac'arishanqui.<sup>26</sup> Chaywanpis nokaycuwan kancunawan chaupinchejpeka Dios uj manchay wayk'ota churarka. Chayraycu caymanta kancunaman riyta munajcunaka, manapuni atincuchu. Kancuna cashanquichej chaymanta cayman jamuya munajcunapis, manallataj atincuchu", nispa.<sup>27</sup> Khapajrí nerka: "Mañacuyqui, ari, tatáy, Lazarota cachanayquita tataypa wasinman.<sup>28</sup> Jakaypeka phishka waukesniyoj cani. Cachapullaway Lazarota paycunaman sumajta willananpaj, ama chayamunancupaj cay ñac'ariy pachaman", nispa.<sup>29</sup> Abrahamtajrí cuticherka: "Waukesniyquejeta tiyan Moises-pata Diospa unay willajcunampa kelkaskasnincu. Chayta uyarichuncu", nispa.<sup>30</sup> Khapajka cuticherkaraj: Abraham, tatáy, mana chaycunata uyarenkancuchu. Astawanrí wañuskacunamanta pillapis paycunaman rinman chayka, juchasnincuta sakespa Diosman cutiriconkancu", nispa.<sup>31</sup> Abrahamri cutichillarkataj: "Sichus Moisespa kelkaskanta willajcunaj kelkaskasnincuta mana uyarincuchu chayka, nillataj creenkancuchu wañuskacunamanta uj causarejtaka", nispa. Chayta nerka Jesús.

## 17

### *Runaspa pantaynincuta perdonanamanta*

<sup>1</sup> Jesús yachacojcunanta nerka:

—Juchaman urmachejka canpunimin. ¡Phuti, ari, juchaman urmachej runapajka!<sup>2</sup> Cay juch'uyccitus nokapi jap'icojcunamanta ujninta juchaman urmachejpajka phuti, ari. Aswan allin canman paypaj wañupunan. Allin canman runas jatun kochaman payta wijch'uyccunancu jatun molino rumita cuncanman warqhuyccuspa.<sup>3</sup> Sumajta khawacuychej kancuna quiuiyquicheja. Sichus hermanoyqui juchallicunman chayka, munacuywan c'amiy. Sitajchus juchanta saken chayka, juchanta konkapuy.<sup>4</sup> Uj p'unchaypi kan-chis cutitapis contrayquipi juchallicunman. Kanchis cutitataj phuticuspa cutimusunquiman. Nisunquimantaj: "Mana ujtawan ajinata ruwasajchu", nispa chayka, juchanta k'alata konkapuy.

### *Diospi jap'icuyka atiyniyojmin*

<sup>5</sup> Cachasnintaj Señorta nerkanca:

—Yanapawaycu Diospi astawan jap'icunaycupaj,—nispa.

<sup>6</sup> Señortaj cuticherka:

—Uj mostaza mujitujina pisillatapis Diospi jap'icuwajchej chayka, uj jatun sach'ata niyta atiwajchej: “Saphintin t'iracuspa jatun kochaman saphichaycucuy”, nispa. Chekamanta casusunquichejmantaj.

*Camachismanta*

<sup>7</sup> 'Kancunamanta ujniyquichej uj camachiyoj caspa, cayta ruwan. P'unchaynintin camachin paypaj llanc'apun chayrí uywata michipun. Patronka camachinta llanc'askanmanta cutimojtín mana ninchu: “Uskhayta tiyariquspa miqhuy”, nispaka. <sup>8</sup> Manachayka nin: “Waquihiy miqhunayta. Miqhunayta ujyanaytawan jaywallawaypuni sajsanaycama. Chaymanta khepata kan miqhullanqui”, nispa. <sup>9</sup> Nitaj camachinta, “Agradeceyqui”, ninchu patronnenka camachiskanta ruwajtinpis. Chay imastaka camacheke ruwananpuni carka. <sup>10</sup> Ajinallataj kancunapis Diospa tucuy camachiskasninta ruwaspa niychej: “Mana allin camachislla caycu. Ruwanaycu carka, chayllata ruwarkaycu”, —nispa.

*Jesús chunca lepra onkoyniyoj runasta thañichin*

<sup>11</sup> Jesuska Jerusalenman rishaspa Samaria jallp'awan Galilea jallp'awan tincuynejta purerka. <sup>12</sup> Uj ranchoman kayllashajtintaj chunca lepra onkoyniyoj runas paynejman jamorkancu. <sup>13</sup> Carullapitaj sayarkancu. Khaparimorkancu:

—¡Yachachej Jesús, qhuyawaycu! ¡Thañichiwaycu! —nispa.

<sup>14</sup> Jesustaj paycunata ricuspa nerka:

—Riychej Jerusalenman. Yupaychana-wasipi ruwanayojcunawan khawachicamuychej, —nispa.

Yupaychana-wasiman ñanta rishajtincu onkoynincumanta thañiskasña carkancu. <sup>15</sup> Paycunamanta ujnincurí thañiskaña caskanta ricucuspa cutirimorka Jesusman. Khaparispataj Diosta yupaycharka. <sup>16</sup> Jesuspa ñaupakenpi konkoricuspataj mayta agradecercorka. Payka samaritano carka. <sup>17</sup> Jesusrí nerka:

—Chuncantincu thañichiskaska carkancu. Chanta ¿maypitaj chay isk'onrí? <sup>18</sup> ¿Imaraycutaj Diosta yupaychaj mana cutirimorkancuchu? Cay sapan waj llajtayoj runalla cutirimun, —nispa.

<sup>19</sup> Runatari nerka:

—Jataricuy, ripuy. Diospi jap'icusayquiraycu thañiska canqui, —nispa.

*Dios caypiña camachinanpaj*

<sup>20</sup> Waquin fariseos Jesusta taporkancu:

—¿Mayc'ajtaj camachenka Dios?

Jesustaj paycunaman cuticherka:

—Dios camachin, chayka mana ricunapajjinachu. <sup>21</sup> Manallataj runas nenkancuchu: “Caypi cashan”, chayrí, “Jakaypi cashan”, nispa. Imaraycuchus, Dios chaupiyquichejpiña cashan camachinanpaj, —nispa.

<sup>22</sup> Yachacojcunanmanri nerka:

—Jamoj p'unchaycunapi noka, Diospa cachaska Runan, cutimuspa kancunawan canayta mayta munanquichej. Uj p'unchayllatapis ricuwayta munanquichej. Manaraj munaskayquichejka cankachu.

<sup>23</sup> Nisonkachejtaj: “¡Khaway! Jesús jakaypi cashan”, chayrí, “Caypi cashan”, nispa. Ama ruwanasniyquichejta sakeychejchu. Amataj paycunata khatiychejchu. <sup>24</sup> Lliuj-lliojka c'ancharichin cieloj uj

ladonmanta ujnin ladoncama. Ajinallatataj noka, Diospa cachaska Runanka, lliuj-lliuojjinamin cutimusaj.<sup>25</sup> Astawanpis ñaupajtaka anchataraj ñiac'arinay tiyan. Cay p'unchay runaspaj khesachaskancupis canay tiyan.

<sup>26</sup> 'Noka, Diospa cachaska Runan, cutimojtiyka Noepa tiempon-pijinamin canka. <sup>27</sup> Chay p'unchaypi runaska miqhusharkancu, ujyasharkancu casaracusharkancutaj. Ajinata causasharkancu Noé barcojina arcaman yaycupunancama. Uj jatun para jamorka. Yacutaj tucuy chay runasta k'alata tucucherka.

<sup>28</sup> 'Quiquillantaj carka Lot causashajtinpis. Miqhusharkancu, ujyasharkancu, rantisharkancu, vendesharkancu, tarpusharkancu, wasichasharkancutaj. <sup>29</sup> Lot Sodoma llajtamanta llojsiporka. Chay p'unchaypitaj Dioska ninata azufretawan parachimorka janaj pachamanta. Tucuy chaypi cajcunata k'alata tucucherka. <sup>30</sup> Quiquillantajmin canka noka, Diospa cachaska Runan, ricuchiska canay, chay p'unchaypeka.

<sup>31</sup> 'Chay p'unchaypi pillapis wasimanta jawapi\* cashanman capuyn-intaj uqhpipi, chay capuyninta okharicoj ama yaycuchunchu. Chajrapi cajpis amallataj cutirichunchu. <sup>32</sup> Lotpa warminwan imayna caskan-manta yuyaricuychej. <sup>33</sup> Causayninta payllapaj wakaychacuya muna-jka mana wiñay causayniyojchu canka. Cay pachapi causayninta mana wakaychacojrí wiñay causaypaj wakaychaconka.

<sup>34</sup> 'Niyquichejtaj: Noka cutimusaj, chay tutapi iscay runas uj puñunapi cashankancu. Paycunamanta ujnin nokawan cusca pusaska canka. Ujn-inrí sakeska canka. <sup>35</sup> Isçay warmis cusca maranllapi cutashankancu. Paycunamanta ujnin nokawan cusca pusaska canka. Ujnirí sakeska canka. <sup>36</sup> Isçay runas chajrapi cashankancu. Paycunamanta ujnin nokawan cusca pusaska canka. Ujnirí sakeska canka, —nerka Jesúis.

<sup>37</sup> Cayta uyarispataj Jesusta taporkancu:

—Señor ¿maypitaj ajina cankarí?

Paytaj paycunaman cuticherka:

—Maypicha aya cashan chayman alkamaris tantaconcancu, —nispa.

## 18

### *Diosmanta mañacuychejpuni*

<sup>1</sup> Jesúis uj quiquinchanawan paycunaman parlarka Diosmanta mañacunapuni caskanta, sonkopi mana llauchhuyaspa. <sup>2</sup> Nerkataj:

—Uj llajtapi carka uj juez. Payka Diosta mana casojchu nitaj manchachicojchu. Runastapis manacajpjaj khawaj. <sup>3</sup> Chay quiquin llajtal-lapitaj carka uj viuda. Pay jamojpuni juezmanta mañaspa: “Chekan cajta ruwapuway contrallicuwajmanta wakaychaspa”, nispa. <sup>4</sup> Juezka uj tiempota mana uyariyta munarkachu. Khepatari pay quiquinpi nerka: “Diosta mana casunichu nitaj manchachicunichu. Runastataj manacajpjaj khawani. <sup>5</sup> Astawanrí cay warmeka mana samarejta sake-wanchu. Chayraycu paypaj chekan cajta ruwapusaj. Cayta ruwasaj pay jamuwaspallapuni ama umayta nanachinawanpaj”, —nispa.

<sup>6</sup> Señortaj nerka:

\* 17:31 Literal: patapi.

—Uyariychej chay mana chekan juez niskanta. <sup>7</sup> Cunanrí Diosmanta yuyaychej. ¿Manachu Dioska chekan cajta ruwanka paypa ajllaska runas-ninpa? Paycuna tuta p'unchay paymanta mañacushancu. ¿Dioska paycunata yanapananpaj khepaconkachu? <sup>8</sup> Niyquichej: Dioska chekan cajta paycunapaj uskhayta ruwanka. Astawanpis noka, Diospa cachaska Runan, cutimuspa ¿nokapi jap'icuwajcunata cay pachapi tarisajrajchu?

*Uj quiquinchana fariseomanta impuesto jap'ej runamantawan*

<sup>9</sup> Jesúś waquin runasman parlarka uj quiquinchanawan. Chay runaska yuyasharkancu chekan ruwajcuna caskancuta. Tucuy waj runastataj manacajpaj khawaj cancu. Chayraycu ajinata nerka:

<sup>10</sup> —Iscay runas yupaychana-wasiman Diosmanta mañacoj rerkancu. Uj carka fariseo; wajtaj carka impuesto jap'ej runa. <sup>11</sup> Chay fariseoka sumajta sayarispa payllapaj mañacusharka: “Diosní, agradeceyqui mana waquin runasjinachu caskaymanta. Paycuna kolke orkhojcuna, mana chekan ruwajcuna, khenchacunapis cancu. Nitaj cay impuesto jap'ej runajinapischu cani. <sup>12</sup> Nokaka iscay cutita semanapi ayunanipis. Tucuy jap'iskaymantataj sapa chuncamanta ujta koyqui”, nispa. <sup>13</sup> Cay impuesto jap'ej runarí carullapi sayaricorka. Manchachicuskanraycu janaj pachata mana khawarillarkapischu. Astawanpis phutiywan pechonta tacacushaspa nerka: “Diosní, qhuyacuwaspa juchasniya khechupuway. Tucuy runas yachancu juchayoj caskayta”, nispa. <sup>14</sup> Niyquichej, chay impuesto jap'ej juchamanta llimphuchaska wasinman cutipuskanta. Chay waj runarí mana llimphuchaskachu carka. Chekamanta pillapis pay quiquin jatunchacojka, pisipaj khawaska canka. Pisipaj khawacojtaj jatunchaska canka, —nispa.

*Jesúś wawasta munacun*

<sup>15</sup> Uj cuti wawitasnincuta Jesusman pusamusharkancu maquisninta churaspa paycunapaj Diosmanta mañapunannpaj. Yachacojcunari ricuspa pusamojcunata c'amerkancu. <sup>16</sup> Jesusrí wawitasta wajyaspa nerka:

—Sakeychej wawitasta nokaman jamunancuta. Amañataj paycunata jarc'aychejchu. Paycunajina cajcunata Dios munacuywan camachenka. <sup>17</sup> Chekata niyquichej. Waquin runas wawitajina jap'incu Diosta Camachejnincupaj. Pillapis wawitajina mana jap'ejrí janaj pachaman\* yaycuya mana atinchu, —nispa.

*Khapaj camachej*

<sup>18</sup> Uj camachej Jesusta taporka:

—C'acha Yachachejný ¿imatataj ruwanay tiyan wiñay causay chayaketa jap'inaypaj?

<sup>19</sup> Jesustaj payman nerka:

—Dioslla c'achaka. Chanta kanka ¿imaynapitaj noka c'acha caskayta niwanquirí? <sup>20</sup> Yachanqui Diospa camachiskasninta: Ama khenchachacuychu; ama runata wañuchiychu; ama suwaychu; ama llullacuspa runamanta willaychu; tatayquita mamayquitapis casuy, —nispa.

<sup>21</sup> Chay camachejrí nerka:

—Tucuy cay Diospa camachiskasninta wawamantapacha casuniña, —nispa.

<sup>22</sup> Cayta uyarispa Jesuska nerka:

\* **18:17** Literal: Diospa reinonman.

—Uj imallaña jarc'asunqui. Rispa tucuy capuuniyquita vendemuy, kolketa wajcha runasman jaywaramuy. Ajinapi khapaj capuuniyqui janaj pachapi canka. Chantaka jamuspa yachacojniy cay, —nispa.

<sup>23</sup> Camachejrí uyarispaka mayta phuticorka may khapaj caskanraycu.  
<sup>24</sup> Phuticuskanta rucuspa, Jesús nerka:

—¡Khapaj capuuniyojcunaka janaj pachaman<sup>†</sup> ñac'ayta yaycuya atenkancu! <sup>25</sup> Jatun camello uywaraj astawan atinman yaycuya agujaj ningrinmanka khapaj runa janaj pachaman yaycunanmantaka, —nispa.

<sup>26</sup> Uyarejcunaka taporkancu:

—Ajina cajtin ¿pitaj janaj pachaman<sup>‡</sup> yaycuya atinmanrí?

<sup>27</sup> Jesús nerka:

—Runaspaj mana aticojka Diospajka aticun, —nispa.

<sup>28</sup> Pedrorí nerka:

—Khaway, nokaycoka tucuy imaycuta sakespa kanta khatishaycu, —nispa.

<sup>29</sup> Jesustaj cuticherka:

—Chekatapuni niyquichej. Uj runa atinman sakeyta wasinta, chayrí warminta, chayrí waukesninta, chayrí ayllunta chayrí wawasninta. Sichus cayta saken Dios runasta camachinanpaj chayka, payman cutichiska canka. <sup>30</sup> Cay pachapi sakeskanmantaka ashqha cutis astawan payman cutichiska canka. Janaj pachapipis wiñay causayniyoj canka, —nispa.

### *Jesús ujtawan willan wañuyninmanta*

<sup>31</sup> Wajnejman chay chunca iscayniyoj cachasninta pusaspa, Jesús paycunata nerka:

—Reparaychej, cunan Jerusalenman rishanchej. Noka, Diospa cachaska Runanmanta unay willajcuna kelkarkancu Diospa palabranpi. Tucuy chay kelkaskancutaj junt'aconkancu. <sup>32</sup> Waj llajtayojcuman jaywaska casaj. Paycunataj asipayawankancu, ñac'arichiwankancu, thokaycuwankancu. <sup>33</sup> Jasut'iwaspataj wañuchiwankancu. Quinsa caj p'unchaymantataj causarimpusaj, —nispa.

<sup>34</sup> Cachasnenka willaskasnimanta ni ujta entienderkancuchu. Paycunapaj chay niskaska mana sut'ichu carka. Nitaj repararkancuchu ima niytachus munaskanta.

### *Jesús Jericó llajtayoj ciegota thañichin*

<sup>35</sup> Jesús Jericó llajtaman kayllamusharka. Ñannejpitaj uj ciego tiya-cusharka mañacuspa. <sup>36</sup> Ashqha runas chaynejta purishajta uyarispataportka:

—¿Imataj chayrí?

<sup>37</sup> Runastaj payman willarkancu, Nazaret llajtayoj Jesús chaynejta rishaskanta. <sup>38</sup> Ciegotaj khaparerka:

—¡Jesús, Diospa ajllaskan, § nokata qhuyacuway! —nispa.

<sup>39</sup> Ñaupajta rejcura payta c'amerkancu: “Ch'in cay”, nispa.

Payrí aswan sinch'ita khaparerka:

—¡Diospa ajllaskan,\* nokata qhuyacuway! —nispa.

---

† **18:24** Literal: Diospa reinonman. ‡ **18:26** Literal: Diospa reinonman. § **18:38** Literal:  
Davidpa Wawan. \* **18:39** Literal: Davidpa Wawan.

**40** Chanta Jesús sayaspa camacherka:

—Payta pusamuwaychej, —nispa.  
Ciego kayllamojtín, Jesús taporka:

**41** —¿Imatataj ruwapusunayta munashanqui?  
Ciegotaj cuticherka:

—Señorníy, ujtawan ricuyta munani, —nispa.

**42** Jesús payta nerka:

—Ricuy. Diospí jap'icusayquiraycu thañiska canqui, —nispa.

**43** Chay quiquinpacha ciegoka ricuporka. Diosta yupaychaspataj Jesússta khaterka. Chayta tucuy ricojcunapis Diosta yupaychasharkancu.

## 19

### *Jesuswan Zaquéowan*

**1** Jesús Jericoman yaycuspa llajta chaupinta risharka. **2** Chaypi carka uj runa, Zaquéo sutiyoj. Payka impuesto jap'ejcunaj curajnincu carka kha-pajtaj. **3** Munasharka ricuyta imayna runachus Jesús caskanta. Juch'uy runalla caspataj mana ricuyta aterkachu runas ancha q'isqui caskan-curaycu. **4** Ajinapi payka ñaupajman correrka. Jesús rinan casharka, chaynejpi uj jatun sach'a carka. Chay sach'amantaj wasarerka ricungan-paj. **5** Jesusri chayman chayaytawan patanejman khawarispa Zaquéota nerka:

—Zaquéo, uskhayta uraycamuy. Cunan p'unchay wasiyquipi khepacunay tiyan, —nispa.

**6** Zaquéo uskhayta uraycamuspa cusiywan Jesusta nerka:

—Walejta jamunqui, —nispa.

**7** Cayta ricuytawan Jesuspaj tucuy rimaspa thutusharkancu:

—Uj rejsiska juchasapa runaj wasinman Jesús samaricoj yaycun, —nispa.

**8** Zaquéorí sayaricuspa Señorta nerka:

—¡Señorníy, uyariway! Capuuniy manta wajcha runasman cuscanta cunan kosaj. Sichus pimantapis llullacuspa kolkenta orkhorkani chayka, tawa cutista cutichipusaj, —nispa.

**9** Zaquéoj niskanmanta Jesuska nerka:

—Cunan p'unchay cay runata paywan tiyacojcunatawan Dios juchamanta cacharichin. Paypis Abrahampa ayllunmantañamin cashan.

**10** Noka, Diospa cachaska Runan, jamorkani Diosmanta chincaska runasta masc'aj juchasnincumanta cacharichejtaj, —nispa.

### *Uj quiquinchana chunca kolkesmanta*

**11** Runas cayta uyarishajtincu Jesús uj quiquinchanawan parlarka. Jerusalén llajta kayllapi casharka. Paycunataj yuyasharkancu cay pachapi chay quiquinpacha Dios runasta camachinanta. **12** Chayraycu nerka:

—Carka uj wirakochi. Caru llajtaman rerka camachej churaska cananpaj. Chaymantataj cutimunan carka camachinanpaj. **13** Ajinapi manaraj rishaspa, chunca camachisninta wajyasa kolketa sapa ujman jaywarka. Cay kolkeka quilla llanc'anapajjina carka. Nerkataj paycunaman: “Kolkeyta llanc'achiyej cutimunaycama”, nispa. **14** Cay llajtapi tiyacojcunari cay wirakochita chejnerkancu. Chayraycu khepanta cachacorkancu ninancupaj: “Mana munaycuchu chay runa camachinawaycuta”, nispa. **15** Wirakocheka camachinanpaj churaska

carka. Carumanta cutimuspataj nerka: "Kolkeyta jaywarkani, chay chunca camachisniyta wajyamuychej. Yachayta munani kolkeywan imaynata llanc'achiskancuta", nispa. <sup>16</sup> Ñaupaj caj camachin payman jamuspa nerka: "Señorniy, kolkeyqui uj chunca kolketawan mirarka", nispa. <sup>17</sup> Camachej payta nerka: "Walej, c'acha camachiy. Chunca llajtasta camachinayquipaj atiyta koskayqui juch'uy imasllapi sumajta ruwaskayquiraycu", nispa. <sup>18</sup> Isccay caj camachin jamuspataj payta nerka: "Señorniy, kolkeyqui uj phishka kolkestawan mirarka", nispa. <sup>19</sup> Camachejtaj payta nerka: "Phishka llajtasta camachinayquipaj atiyta koskayqui", nispa. <sup>20</sup> Chaymanta waj camachin jamuspa nil-larkataj: "Señorniy, caypi kolkeyqui cashan. Cayta sumajta watayucuspa jallch'arkani <sup>21</sup> manchachicususkayraycu. Kan rumi sonko canqui. Mana kanpata cajta jap'inqui mana tarpuskayquitapis cosechanqui", nispa. <sup>22</sup> Camachejka payta nerka: "Sajra camachiy, niskasnillayquiwantaj juchachayqui. Yachanqui noka rumi sonko caskayta, mana nokaj cajta jap'iskayta, mana tarpuskayta cosechaskaytapis. <sup>23</sup> Chanta *¿imaraycutaj* kolkeyta mana llanc'acherkanquichu? Nokataj cutimuspa miraynintawan kolkeyta jap'icapuymana carka", nispa. <sup>24</sup> Chaypi sayashaj yanapajcunata nerka: "Kolkeyta paymanta khechuychej. Koychejtaj chunca kolkesniyoj runaman", nispa. <sup>25</sup> Paycunataj payta nerkancu: "Señor, chunca kolesta jap'ishanña", nispa. <sup>26</sup> Chay camachejka nerka: "Chekatapuni jap'ejmanka astawan koska canka. Mana jap'ejmantari pisi capuskanpis khechuska canka. <sup>27</sup> Astawanpis camachinayta mana munaj enemigosniyta cayman pusamuwaychej. Ñaupakeypi paycunata wañurachiychej", nispa nerka.

### *Jesús Jerusalenman yacyun*

<sup>28</sup> Chayta niytawan purispallapuni Jerusalén llajtaman risharka. <sup>29</sup> Betfagé, Betania ranchoswan Olivos niska orkonejpiña cashaskancipi Jesuska iscay yachacojcunanta cacharka. Nerkataj:

<sup>30</sup> —Riychej chimpá ranchoman. Chayman yacyuspataj manaraj chajnana malton burrota wataskata tarinquichej. Chay burrota phascaraspataj cayman khatimuychej. <sup>31</sup> Sichus pipis tapusunquichejman: "¿Imaraycutaj burrota phascarashanquichej?" nispa chayka, payta niychej: "Señorninchej cayta munan", —nispa.

<sup>32</sup> Cachaskastaj rispa Jesús niskanmanjinata tarerkancu. <sup>33</sup> Burrota phascarashajtinctaj burroyojcuna paycunata taporkancu:

—¿Imaraycutaj burroycuta phascarashanquichej?

<sup>34</sup> Cuticherkancu:

—Señorninchej cayta munan, —nispa.

<sup>35</sup> Burrotataj khaterkancu Jesusman. Ponchosnincuta burroman caronaycuspataj wasanman Jesusta llok'acherkancu. <sup>36</sup> Jesús rishajtintaj runaska ponchosnincuta ñanninman mast'arkancu Jesús chay patata rinanpaj. <sup>37</sup> Olivos orkomanta Jerusalenman uraycuna kaylapiña casharka. Tucuy cay ashqha khatejcunataj may cusiywan Diosta yupaycharkancu. Jesuspa tucuy jatun ruwaskasninta ricuskancumanta khaparispa Diosta yupaychasharkancu. <sup>38</sup> Nerkancu:

—¡Yupaychaska cachun Diospa sutinpi jamoj camachejka! ¡Dios runasta payman allinyachicun! ¡Tucuy atiyniyoj Dioska yupaychaska cachun! —nispa.

<sup>39</sup> Chay ashqha runasmanta waquin fariseostaj Jesusta nerkancu:

—Yachachej, khatejcunayquita c'amiy ch'inyanancuta, —nispa.

<sup>40</sup> Jesustaj cuticherka:

—Chekatapuni cay runas yupaychanancu tiyan. Manachayka cay quiquin rumispis khaparincuman Diosta yupaychaspas, —nispa.

### *Jesús Jerusalenmanta wakan*

<sup>41</sup> Jesuska Jerusalenman kayllaycamuspa tucuy llajtataña ricorka. Paytaj chay llajtamanta llaquicuspa wakarka. <sup>42</sup> Nerkataj:

—¡Jerusalenpi tiyacojcuna! Dios payman allinyachicuya munarka. Kancunataj chayta mana reparaspa payta khesacharkanquichej. Cunánri manaña chayta reparayta atinquichejchu. <sup>43</sup> Chayraycu mana allin p'unchaycuna kancunapaj canka. Enemigosniyquichej llajtayquichejpa jawanta jatun perkata ruwankancu contrayquichejpi makanancupaj. Tucuy muyuyniyquichejpi tiyaycuonkancu, tucuynejmanta wisk'asonkachej. <sup>44</sup> Tucuy wasisniyquichejta jallp'aman urmachenkancu. Kancunatataj wañurachisonkachej. Llajtayquichejpi ni uj rumillatapis sayashajta sakenkancuchu. Ajina canka Dios qhuyacuyninpi jamuspa yanapasuya munaskanta mana reparaskayquichejraycu, —nispa.

### *Jesús yupaychana-wasiman yaycun*

<sup>45</sup> Jesús yupaychana-wasi patioman yaycuspataj vendejcunata rantejcunatawan kharkoya kallarerka. <sup>46</sup> Paycunatataj nisharka:

—Dioska palabranpi nin: “Yupaychana-wasiyka nokamanta mañacuna wasi canan tiyan”. Kancunári pacaymanta suwanayquichejpaj ruwaycacapunquichej, —nispa.

<sup>47</sup> Jesús yupaychana-wasej pationpi sapa p'unchay runasta yachachisharka. Chay wasimanta curajcunari israel yachachej-cunawan curajcunapiwan imaynallapipis Jesusta wañuchiya munarkancu. <sup>48</sup> Astawanrí runas Jesuspa parlaskanta sonko junt'askata uyarisharkancu. Chayraycu chay curajcunaka imaynapichus Jesusta tucuchiya mana yacharkancuchu.

## 20

### *Jesuspa atiyninmanta tapuncu*

<sup>1</sup> Chay p'unchaycunamanta uj cajpi yupaychana-wasi patiopi Jesús runasman sumaj willanasmanta yachachisharka. Chaypacha israel curajcuna churanacoj Jesusman chimpaycorkancu. <sup>2</sup> Taporkancutaj:

—Niwaycu: ¿Ima atiywantaj cay imasta ruwashanqui? Chayrí ¿pitaj cay atiyta kosorka?

<sup>3</sup> Jesusrí paycunaman cuticherka:

—Nokapis uj tapunata tapuskayquichej, kancunapis cutichiwaychej.

<sup>4</sup> ¿Pitaj cachamorka Juanta runasta bautizanapaj? ¿Dioschu chayrí runaschu?

<sup>5</sup> Paycunapura tanteyacuspa ninacusharkancu:

—Sichus nisunman Dios payta cachamuskanta chayka, Jesús tapuwasun: “¿Imaraycutaj paypa niskanta mana creerkanquichejchu?”

<sup>6</sup> Sitajchus nisunman runas payta cachamuskancuta chayka, tucuy runas rumiwan ch'ankawasunchej. Imaraycuchus runaska tucuy

sonkowanmin creencu Juan Diospa willajnin caskanta, —nispa tanteyacorkancu.

<sup>7</sup> Chayraycu Jesusman cuticherkanca:

—Pichus payta cachamuskanta mana yachaycuchu, —nispa.

<sup>8</sup> Jesustaj paycunata nerka:

—Ni nokapis willaskayquichejchu ima atiywanchus cay imasta ruwashaskayta, —nispa.

*Sajra llanc'ajcunamanta quiquinchana*

<sup>9</sup> Jesús runasman cay quiquinchanawan parlayta kallarerka:

—Uj runa jallp'ampi ashqha uva sach'itasta yuracharka. Llanc'aj runasman jallp'anta arrendarka pokoyninmanta konancupaj. Chanta jallp'ayoj runaka unaypaj caru llajtaman riporka. <sup>10</sup> Úva pallana tiempotataj uj camachinta cacharka llanc'ajcunaman, uvasta payman konancupaj. Llanc'ajcunari payta sek'ospataj mana imayojjlata cutichiporkancu. <sup>11</sup> Jallp'ayojtaj ujnin camachinta cachallarkataj. Chay ujnintapis llanc'aj runas sek'orkancu p'enkaytataj paywan ruwarkancu. Mana imayojjlatataj cutichiporkancu. <sup>12</sup> Jallp'ayoj runaka quinsa caj camachinta cachallarkataj. Llanc'aj runasri payta sinch'ita makaycuspa jallp'amanta kharkorkancu.

<sup>13</sup> 'Chayraycu jallp'ayoj señorka nerka: "¿Imanasajtaj? Munaska wawayta cachasaj. Camachisniya khesacharkancu. Ichapis paytaka jatunpaj khawankancu", nispa. <sup>14</sup> Llanc'aj runasri camachejpa wawanta ricuspa paycunapura tanteyanacusharkancu: "Cay wawanman cay jallp'a koska canka. Wañuchinachej chayaken nokanchejpata cananpaj", nispa. <sup>15</sup> Jallp'amanta kharkospataj payta wañucherkanca.

'Chanta ¿imanankataj uva jallp'ayoj señorka chay llanc'aj runastari?

<sup>16</sup> Cayta ruwanka: Jamuspa chay llanc'aj runasta wañurachenka jallp'antataj wajcunaman arrendayconka, —nispa.

Chayta uyarejcunataj nerkanca:

—¡Ni jayc'aj ajinaka cachunchu! —nispa.

<sup>17</sup> Jesusri paycunata sinch'ita khawaspa nerka:

—Cay kelkaskata ¿imaynatataj entiendenquichejri? Nin: Wasichajcuna rumita khawaspa khesacharkancu. Wasita sinch'ita sayachinanpajri chay khesachaska rumeka aswan sumaj cashan tucuy waj rumismanta niskaka. <sup>18</sup> Chay rumiman urmacoj runaka t'unaska canka. Pimanchus chay rumi urmaycunman chayka, payta fiut'urparenka, —nispa.

<sup>19</sup> Israel yachachejcunawan yupaychana-wasimanta curajcunawanka repararkancu Jesús chay quiquinchanata paycunamanta parlaskanta. Chayraycu payta jap'iycuchiya churacorkancu.

*Uj tapuna impuestosmanta*

<sup>20</sup> Curajcunari Jesusta jap'iycuya munaspa sinch'ita khawasharkancu. Chayraycu watekajcunaman kolketa kospa cacharkancu Jesusta parlaskanpi jap'erkonancupaj. Chaywan curaj camachejpa atiyninman jaywaycuya munarkancu. Watekajcunaka c'acha runasjinalla tucorkancu puraj uyas cashaspapis. <sup>21</sup> Paycunataj Jesusta nerkanca:

—Yachachej, yachaycu chekanta parlaskayquita yachachiskayquitapis. Runastapis mana rijch'acuynillanmantachu khawanqui, manachayri caskancumanta. Astawanpis cheka cajta

yachachishanqui imatachus Dios munan runas ruwanancuta chayta.  
 22 Cunan kan niwaycu: Nokanchej, israelcuna ¿romano gobiernomana  
 impuestota konachus manachus?

23 Jesuska puraj uyawan watekaskancuta sumajta reparaspa nerka:

24 —Uj kolketa ricuchiwaychej, —nispa.

Payman ricuchejtinctaj Jesús taporka:

—¿Pejpa uyantaj pejpa sutintaj cay kolkepi cashanrí?

Cuticherkanqui:

—Romano curaj camachej Cesarpata, —nispa.

25 Jesustaj paycunata nerka:

—Cesarpata cajtaka Cesarman koychej; Diospata cajtataj Diosman koychej, —nispa.

26 Mana aterkancuchu Jesusta parlaskanpi jap'erkoya runaspa ñiaupakencipi. Cutichiskanmanta t'ucuspataj ch'inyacorkancu.

### *Jesusta tapuncu causarimuymanta*

27 Saduceos nej cancu wañuska runaska mana ujtawan causarimunancuta. Paycunamanta waquin Jesusman jamuspa nerkancu:

28 —Yachachej, Moisés nokanchejpaj kelkarka: “Sichus uj casaraska runa mana wawayoj wañupuman chayka, paypa wauken casarachun wañojpa viudanwan. Chayta ruwachun wawa cananpaj curaj waukenpa sutin ama chincapunapaj”, nispa. 29 Cunari, carkancu kanchis waukes. Curaj cajka casaracorka mana wawayoxtaj wañuporka.

30 Chanta iscay caj khareka wañoj waukenpa viudanwan casaracorka. Paypis wañuporka mana ni uj wawata rejsispa. 31 Quinsa cajwanpis quiquillantaj carka. Ajinataj carka kanchis waukesnintinwanpis. Sapa uj curaj waukenpa viudanwan casaracorkancu. Sapa ujtaj mana ni uj wawata rejsispa wañuporka. 32 Khepata chay warmipis wañupullarkataj.

33 Cunanka wañuska runas causarimojtincu chay warmi kanchis runaswan casaracuskamanta ¿maykennincoj warmintaj cankarí?

34 Jesús paycunata cuticherka:

—Cay pachapi kharis warmispis casaracuncu. 35 Wañuyamanta causarimpojcunari janaj pachaman yaycunancupajina khawaskasmin cancu. Paycunaka causarimuspa mana casaraconcancuchu.

36 Imaynachus angeles mana wañupuncuchu, ajinallataj causarimoj runaspis mana ujtawan wañonkancuchu. Paycunaka janaj pachaman yaycoj Diospa wawasnin cancu. 37 Chaywanpis Moisés ricucherka wañuska runas chekatapuni causarimunancuta. Kelkarka, Dios nina lauraj sach'itamanta nimuskanta: “Noka cani Abrahampa Diosnin, wawan Isaacpa Diosnin, allchhin Jacobpatapis Diosnintaj”. Abraham Isaacwan Jacobwanpis may unay wanupuskancumantaña, chayta nerka Dios. 38 Diospajka wañuskaspis causashancu. Chayraycu pay mana wañuskacunaj Diosnincuchu, manachayrí causashaj runaspa Diosnincumin, —nispa.

39 Waquin israel yachachejcunataj nerkancu:

—Yachachej, sumajta cuticherkanqui, —nispa.

40 Ajinapi manaña astawan imatapis Jesusta tapoj churacorkancuchu.

*Cristoka Davidpa miraynintaj Señornintaj*

41 Jesusrí paycunata taporka:

—Cristoka Davidpa wawan\* caskanta ¿imaynapitaj nincuri? <sup>42</sup> Quiquin Davidka taquina libropi kelkarka:

Señor Diosninchej nerka Señorniy Cristoman:

“Nokawan cusca tiyaycucuy camachinanchejpaj

<sup>43</sup> churanacojcunayquita k'alata atipanaycama”.

<sup>44</sup> Ajinata Davidpis Cristota, Señorñiy, nerka. Chanta ¿imaynatataj Cristoka Davidpa wawallan<sup>†</sup> canman? —taporka Jesú.

### *Israel yachachejcunamanta*

<sup>45</sup> Tucuy runas uyarishajtincu, Jesuska yachacojcunanta nerka:

<sup>46</sup> —Sumajta khawacuychej israel yachachejcunamanta. Paycuna sumaj p'achalliskas puriya munancu. Munancutaj plazaspi sumajta napaycuchicuya. Tantacuna-wasipitaj curajcunaj tiyanasnincipi tiyacuya munancu. Jatun miqhunaspipis sumaj khawaskacunaj tiyanasnincipi tiyacuya munancu. <sup>47</sup> Chaywanpis viudaspa pisi capuynincuta suwaspaajina khechuncu. Diosmanta anchata mañacushaskanciwan sajra munaynincuta pacayta munancu. Cay runastaka Dios aswan sinch'iwan juchachanka, —nispa.

## 21

### *Wajcha viudaj koskan*

<sup>1</sup> Yupaychana-wasipi cashaspa Jesú ricorka khapaj runas Diosman konasta kolke churanasman churashajta. <sup>2</sup> Ricullarkataj uj wajcha viudata iscay kolkesitusninta churashajta. <sup>3</sup> Chanta nerka:

—Chekatapuni niyquichej. Diospajka cay wajcha viudaj churaskan astawan carka tucuy ujcunajmanta niskaka. <sup>4</sup> Tucuy chay waj runas ashqha capuynincoj puchuskanmanta Diosman korkancu. Payríwajcha caynimanta tucuy kolkenta korka. Chayka causananpaj casharkapis, —nispa.

<sup>5</sup> Waquin ninacusharkancu yupaychana-wasi may c'achitu caskanta. Imaraycuchus sumaj rumiswan, Diosman khapaj koskaswan ima, c'achachaska carka. Jesusrí nerka:

<sup>6</sup> —Tucuy cay c'achitu rumi wasista ricushanquichej, chaycunaka urmachiskas cankancu. Jamoj p'unchaycunapi cay yupaychana-wasejta ni uj rumillapis sayashaj sakeskachu canka, —nispa.

### *Jesús sut'ichan ñac'ariy p'unchaycunamanta*

<sup>7</sup> Paycunataj Jesusta taporkancu:

—Yachachiwajni, ¿mayc'ajtaj ajina cankarí? ¿Imastaj ricuchiwasajcu, chay imas canayashaskantari?

<sup>8</sup> Jesú cutichispa nerka:

—Sumajta khawacuychej ama pantachiskas canayquichejpaj. Ashqhas llullacuspa jamonkancu sutypi. Nenkancu: “Nokamin Diospa ajllaskan Cristoka cani”; “Cunan chay p'unchay chayamunña”, nispa. Ama paycunaj khatejnincoka caychejchu. <sup>9</sup> Chaywanpis guerrasmanta uyarispas guerrasmanta parlajta uyarispapis ama manchachicuychejchu. Cay imaska ñaupajta cananpuni. Astawanrí manaraj tucucuyrajchu canka, —nispa.

<sup>10</sup> Chanta nillarkataj:

\* **20:41** Ninayan: descendencia, miraynimanta. † **20:44** Literal: chaquisniyqui urapi churanaycama.

—Uj ayllo waj aylloj contranpi okhariconka. Uj llajtayoj runas waj llajtayoj runaspa contranpi okhariconka.<sup>11</sup> Jallp'apis may sinch'ita qharcatitenka. Caynejpi jakaynejpi yarkhaycuna, onkoycuna canka. Mancharinasta janaj pachamanta jatun ricuchinastawan runas riconkancu.

<sup>12</sup> 'Manaraj tucuy cay pasashajtintaj, runaska kancunata jap'iycuspa ñac'arichisonkachej. Jaywaycusonkachej tantacuna-wasipi curaj runasman juchachaskas wisk'aycuskaspis canayquichejpaj. Camachejcunaman pusasonkachej sutiyraycu, nokaj yachacojcunay caskayquichejraycu. <sup>13</sup> Ajinapi kancunaka paycunaman nokamanta willarayta atinquichej. <sup>14</sup> Imatachus cutichinayquichejtarí ama ñaupajta yuyaychejchu. <sup>15</sup> Imaraycuchus noka quiuiymin yachayniyoj parlaycunata parlachiskayquichej. Chay niskasniyquichejta juchachasojcuna mana atipayta nitaj cutichiyytapis atenkan-cuchu. <sup>16</sup> Tatasniyquichej, waukesniyquichej, ayllusniyquichej, amigosniyquichejpis enemigosniyquichejman jaywasonkachej. Kancunamanta waquinta wañurachisonkachej. <sup>17</sup> Tucuy runas chejnisonkachej, nokaj yachacojcunay caskayquichejraycu. <sup>18</sup> Chaywanpis ni uj chujchapis umayquichejmanta chincaponkachu. <sup>19</sup> Diospi jap'icuspapuni allinta sayaskayquichejwan wiñay causayta jap'inquichej.

### *Jerusalenpa urmayninmanta*

<sup>20</sup> Soldados Jerusalenta muyuycamoja ricuspa yachanquichej cay llajtaka tucuchiskaña cananta. <sup>21</sup> Chaypacha Judea jallp'api cashajcuna orkosman aykecuchuncu. Jerusalenpi cashajcuna llojsichuncu. Llajta jawapi cashajcunapis ama chayman yaycuchuncu. <sup>22</sup> Jakay p'unchaycunaka chaypi tiyacojcunaj juchancuraycu Dios sinch'ita phiñaconka. Ajinapi Diospa tucuy kelkaskan paycunamanta junt'aconka. <sup>23</sup> ¡Phutiy, ari, jakay p'unchaycunapi wijsayoj warmispaj ñuñoj wawitasniyoj warmispajpis! Manchay ñac'ariymin cay pachapi canka. Cay runaspaj Dios c'ajajta phiñaconka. <sup>24</sup> Ashqhas jatun cuchilloswan\* wañurachiskas cankancu. Ashqhastaj waj llajtasman jap'iycuska apaskas cankancu. Waj llajtayojcunaka Jerusalenta saronkancu chay niska p'unchaycuna tucucunancama.

### *Jesuspá cutimuyninmanta*

<sup>25</sup> Cutimuyniypaj ricuchinas canka intipi, quillapi, ch'askaspiwan. Cay pachapi runaska mayta llaquiconkancu jatun kochaj ch'ajwaskanmanta khallacuskanmantawan. Manchachicuymantataj musphankancu. <sup>26</sup> Runaska cay pachawan imachus cananta manchachicuywan suyaspa wañunayashankancu. Cielopi cajcunata Dios cuyuchenka. <sup>27</sup> Chaymantamin runas ricuwankancu. Noka, Diospa cachaska Runanta, uj phuyupi jamushajta atiyniywan lliphipej c'anchaywanpis ricuwankancu. <sup>28</sup> Kancunari chay imas kallaricojtin sumajta Diospi jap'icuychej, nokata suyawaspa. Cacharisca canayquichej p'unchayka kayllamushanña,—nerka Jesús.

### *Higo sach'amanta quiquinchana*

<sup>29</sup> Quiquinchaspataj nerka:

\* **21:24** Literal: espadawan.

—Reparaychej higo sach'ata tucuy sach'astapis. <sup>30</sup> Laphisnincu ch'illchimojtinña yachanquichej k'oñi tiempo chayamushaskantaña. <sup>31</sup> Ajinallatataj kancunapis chay imasta ricuspa yachanquichej Dios tucuya camachinanpaj chayamushaskanta. <sup>32</sup> Chekamanta niyquichej cunán p'unchay runas cashajtincuraj tucuy cayka ruwacunanta. <sup>33</sup> Janaj pacha cay pachapis chincaponkancu; niskasniyri junt'aconkancupuni.

*Diosmanta mañacuspa sumajta khawacuychej*

<sup>34</sup> 'Kancuna quiuiyquichejta sumajta khawacuychej. Pajtataj sonkoyquichej rumiyapumman. Pajtataj millay causaywan, machaywan, cay pacha causay imasmanta llaquicuywanpis atipachicuwajchej. Pajtataj ajinapi chay p'unchay mana yuyayllata kancunaman chayamusunquichejman. <sup>35</sup> Trampaka ujllata animalta jap'iycun. Ajinallatataj jakay p'unchaypis tucuy cay pachapi tiyacoj runasman jap'irparenka. <sup>36</sup> Kancunari tuta p'unchay Diosmanta mañacuspa rijch'ariskas caychej. Chaywan sonkoyquichejpi sumaj callpachaskas canquichej tucuy chay canayashajcunata muchunayquichejpaj. Ajinapi noka, Diospa cachaska Runanman jakay p'unchaypichimpacuwanquichej,—nerka Jesús.

<sup>37</sup> P'unchaycunaka payka yupaychana-wasi patiopi yachachej. Tuttastaj Olivos orkoman samacoj rej. <sup>38</sup> Tucuy runastaj tutamanta payta uyarej yupaychana-wasiman rej cancu.

## 22

*Masc'ancu imaynapichus Jesusta wañuchiyyta*

<sup>1</sup> Israelcunaj pascuancu kayllamusharkaña, mana pokochinayojoj t'antata miqhuna p'unchaycuna. [Yuyarichinapaj carka Dios unay tatas-nincuta cavarichiskanmanta.]\* <sup>2</sup> Chay p'unchaycunapi yupaychana-wasimanta curajcuna israel yachachejcunapiwan Jesusta wañuchiyyta mayta munasharkancu. Runasta manchachicuskancuraycutaj imaynapichus wañuchiyyta mana yacharkancu.

<sup>3</sup> Jesuspa chunca iscayniyoj cachasnimanta Iscariote niska Judaska ujnin caj carka. Supay Satanasrí sonkonman yaycorka. <sup>4</sup> Ajinapi payka yupaychana-wasimanta curajcunawan, guardia camachejcunawan parlamorka Jesusta jaywaycunapaj. <sup>5</sup> Paycunataj mayta cusi-cuspa Judasta nerkanca:

—Jaywawaskaycumanta kanman kolketa kosajcu,—nispa.

<sup>6</sup> Judastaj nerka:

—Allin canka,—nispa.

Chanta masc'asharka imaynapichus pacayllamanta Jesusta jayway-cuyta chay ashqha runas mana yachashajtillancu.

*Pascua miqhunapaj waquichispas*

<sup>7</sup> Mana pokochinayojoj t'anta p'unchay chayamorka. Chay p'unchaypeka pascua corderota wañuchinancu caj. <sup>8</sup> Jesuska Pedrota Juantawan nerka:

—Rispa, pascua miqhunata miqhunanchejpaj waquichimuychej,—nispa.

<sup>9</sup> Paycunataj payta taporkancu:

—¿Maypitaj munashanqui chay miqhunata waquichinaycuta?

\* 22:1 Ninayan.

**10** Paytaj paycunata nerka:

—Uyariwaychej: Llajtaman yaycuspa uj yacu p'uñuta apaj runawan tincunquichej. Payta khatiychej maymanchus yayconka, chay wasiman.

**11** Chay wasiyojtataj niychej: “Yachachejninchéj nisunqui: ‘¿Maypitaj cashan chay sala yachacojcunaywan pascua miqhunata miqhunaypaj?’”

**12** Paytaj uj allinchaska jatun salata alto pisopi ricuchisonkachej. Chaypi waquichimuychej nokanchejpaj, —nispa.

**13** Yachacojcunataj llajtaman rispa tucuy imata Jesuspa niskanmanjina tarerkancu. Pascua miqhunatataj waquichimorkancu.

### *Diospa mosoj traton*

**14** Miqhunancupaj hora chayamojin, Jesús tiyaycucorka cachasniwan. **15** Paycunata nerka:

—Maytapuni munarkani kancunawan cay pascua miqhunata miqhuuya manaraj noka ñac'arishaspa. **16** Chekatapuni manaña ujtawan cay pascua miqhunata miqhusajchu Dios tucuya camachin, chaypi miqhunaycama. Chay p'unchaypi Diospa mosoj traton runasninpaj juntaconka, —nispa.

**17** Chanta Jesuska copata jap'ispa Diosman graciasta kospataj nerka:

—Cay ujyanata jap'iychej ujyacuychejtaj. **18** Niyquichej: Cunanmantapachaka cay uvasmanta ruwaskata manaña ujyasajchu Dios tucuya camachejtin, chay p'unchaycama, —nispa.

**19** T'antata maquisninwan jap'ispataj Diosman graciasta kospa t'antata parterka. Cachasninman jaywaspataj nerka:

—Cayka cuerpoyninacun. Kancunaraycu koska cashan. Cayta ruwaynej miqhuspa nokamanta yuyaricunawayquichejpaj, —nispa.

**20** Miqhuskancumanta Jesús quiquillantataj copawan ruwaspa nerka:

—Cay copaka Diospa mosoj tratonmin. Yawarniyka traton atiyniyoj cananpaj jich'askamin cashan ama wiñaypaj wañunayquichejpaj.

**21** Chaywanpis cunanka jaywaycojniypa maquin maquiywan cusca mesapi cashan. **22** Noka, Diospa cachaska Runanka, paypa yuyaskanmanjina wañunay tiyan. Astawanpis iphutiy, ari, chay jaywaycojpajka! —nispa.

**23** Cachasnintaj tapunacuya kallarerakancu maykennincuchus chayjina sajrata ruwaj rishaskanmanta.

### *Aswan curaj caymanta*

**24** Chanta cachasnin churanacusharkancu pichus paycuna uqhupi aswan curajpaj khawaska cananmanta. **25** Jesusrí paycunata nerka:

—Llajtasta camachejcuna runasta llaquichispa camachincu. Chaywanpis allin imasta ruwaj, nichicuytaraj munancu. **26** Kancuna uqhupirí mana ajinachu canka. Astawanpis kancuna uqhupi curaj cajka sull'ajina cachun. Camachejtaj yanapajjina cachun. **27** ¿Miqhunapaj tiyacojchu chayrí miqhunata jaywajchu astawan curajpaj khawaska? Miqhunapaj tiyacojmin astawan curajpaj khawaska cashan. Nokari yanapajniyquichejjina kancuna uqhupi cashani.

**28** ‘Nokawan cuscapuni cacorkanquichej ñac'arishajtiy.

**29** Ñac'ariskaymanta Tatay Dios camachinaypaj churawanka. Quiquillantataj nokapis camachinayquichejpaj churaskayquichej.

**30** Ajinapi camachishajtiy nokawan cusca miqhunquichej

ujyanquichej. Churaskayquichejtaj chunca iscayniyoj Israel ayllusta camachinayquichejpaj,<sup>†</sup>—nispa.

*Jesús sut'inchan Pedroj urmayninmanta*

<sup>31</sup> Jesús nerka:

—Simonníy, uyariway. Supay Satanás kancunata sinch'i llaquiy-cunawan<sup>‡</sup> juchaman urmachisunapaj mañarka. <sup>32</sup> Nokari kanpaj Diosmanta mañaporkayqui, Diospi jap'icuyniyqui ama chincapunapaj. Nokaman cutiricamuskayquimanta cay hermanosniyquita sonkoncupi callpachanqui,—nispa.

<sup>33</sup> Simoní payta nerka:

—Señorníy, kanwan cusca rinaypaj carcelmanpis wañuymanpis waquichiska cani,—nispa.

<sup>34</sup> Jesusrí payta nerka:

—Kanta niyqui, Pedro, cunan tutapacha manaraj gallo wakashajtin quinsa cutita ninqui nokata mana rejisiwaskayquita,—nispa.

*Kolke jallch'ana, wayaka, espadapiwan*

<sup>35</sup> Jesús cachasninta nerka:

—Ñaupajpi willarajta cacharkayquichej mana kolke churanayoja ni wayakayoja ni ojot'asniyoja. Chaypacha ¿imapis pisisorkachejchu?

Cuticherkancutaj:

—Ni imapis pisiwarkaycuchu,—nispa.

<sup>36</sup> Chanta paycunata nerka:

—Cunanrí kolke churanayojoj caj chayrí wayakayojoj apacuchun.

Mana jatun cuchilloyoj<sup>§</sup> cajtaj p'achanta vendechun ujta rantiinanpaj.

<sup>37</sup> Imarayecuchus cay kelkaskaka nokapi junt'acunan tiyan: “Payka yupaska carka juchasapaswan cusca”. Cay pachapi ruwanasniy tucucapun,—nispa.

<sup>38</sup> Paycunarií nerkanca:

—Señorníy, khaway, caypi iscay jatun cuchillos\* tiyan,—nispa.

Jesustaj paycunata nerka:

—Chayllaña cachun,—nispa.

*Olivos orkopi mañacun*

<sup>39</sup> Jesús wasimanta llojsispas Olivos orkoman rerka, rej caskanmanjina. Yachacojcunapis khatillarkancutaj. <sup>40</sup> Chayman chayaspataj paycunata nerka:

—Diosmanta mañacushaychej ama juchaman urmanayquichejpaj,—nispa.

<sup>41</sup> Paycunamanta caruncharicuspa uj rumi chokaymanjina Jesús konkoricorka. Diosmantataj mañacusharka:

<sup>42</sup> —Tatáy, munanqui chayka, cay ñac'ariypi wañunayta nokamanta khechupuway. Astawanpis ama munayniyka ruwacuchunchu. Manachayrí munayniyqui ruwacuchun,—nispa.

<sup>43</sup> Janaj pachamanta uj angel riqhurispa payta callpacharka. <sup>44</sup> Jesús sonkonpi mayta ñac'arispa aswan sinch'ita mañacusharka. Jump'intaj sut'uspi yawarjina pampaman urmarka.

<sup>†</sup> 22:30 Literal: juzganayquichejpaj.    <sup>‡</sup> 22:31 Literal: trigotajina thalaninanpaj.    <sup>§</sup> 22:36

Literal: espadayo.    \* 22:38 Literal: espadas.

45 Jesús Diosmanta mañacuskamanta jatarispa yachacojcunaman cutterka. Paycunata phutiyywan puñuskasta tariparka. <sup>46</sup> Chanta nerka:

—¿Imaraycutaj puñushanquichej? Jatarispa Diosmanta mañacuychej ama juchaman urmanayquichejpaj.

*Jesús jap'iycunancupaj jaywaska*

47 Jesús parlashajtillanraj, ujllata ashqha runas riqhurimorkancu. Judas paycunata pusamusharka. Payka chunca iscayniyoj yachacojcunamanta ujnin carka. Jesusman kayllamuspataj much'aycorka. <sup>48</sup> Jesusrí payta nerka:

—Judas, uj much'awanchu jaywaycunqui Diospa cachaska Runanta?

49 Jesuswan cashajcunaka repararkancu imatachus chay runas ruwanayashaskancuta. Chayraycu nerkancu:

—Señorníy, ¿cuchillosniyuwan† wajtasajcuchu?

50 Paycunamanta ujintaj cuchillonwan‡ wajtaspa uj runaj paña ningrinta kholurparerka. Chay runari yupaychana-wasipi camachejpa camachin carka. <sup>51</sup> Jesusrí yachacojcunanta nerka:

—Chayllata. Sakellaychej paycunata.

Cayta nispataj chay camachej kholuska ningrinta llanqharispa thañicherka.

52 Yupaychana-wasimanta curajcuna, yanapajcunancawan israel curajcunapiwanpis jap'iyoj jamuspa chaypi casharkancu. Jesustaj paycunata nerka:

—Jatun cuchilloswan§ makana c'aspiswan uj runa wañuchi suwamanjinachu jamuwanquichej? <sup>53</sup> Sapa p'unchay kancunawan casharkani yupaychana-wasi patiopi manataj jap'iycuwarkanquichejchu. Cunanrí atillanquichej, supay lakhaj atiyninwan camachishajtin, —nispa.

*Pedro nin Jesusta mana rejiskanta*

54 Jesusta jap'ispataj yupaychana-wasipi camachejpa wasinman apaycorkancu. Pedrorí chayman caru khepallanta khaticusharka.

55 Runastaj uj sumaj ninata jap'icherkanca patio chaupipi. Paycuna chaupincipitaj Pedro tiyacusharka k'oñicupsa. <sup>56</sup> Chaypitaj uj camachi warmi Pedrona nina c'anchaypi tiyacushajta ricorka. Allinta Pedrona khawaspataj nerka:

—Cay runapis Jesuswan casharka, —nispa.

57 Pedrorí mananchacorka:

—Mana rejsinichu paytaka, —nispa.

58 Unitaymantawan uj runapis Pedrona ricuspa nerka:

—Kanpis Jesuspa yachacojcunamanta ujnin canqui, —nispa.

Pedrorí cuticherka:

—Manapuni, tatáy, —nispa.

59 Uj horamantajinataj waj runa aswan sinch'ita nerka:

—Chekatapuni yachani cay runaka Jesuswan cashaskanta paypis Galileamanta caskanraycu, —nispa.

60 Pedroka nerka:

—Tatáy, mana yachanichu imatachus nishanqui, —nispa.

Chay quiquinpachataj Pedro parlashajtillanraj galloka wakarka.

61 Señortaj cutiricamuspa Pedrona khawarimorka. Chaytaj yuyaricherka

† 22:49 Literal: espada. ‡ 22:50 Literal: espada. § 22:52 Literal: espada.

Pedrota Señorpa niskanta: "Cunan tutapacha manaraj gallo wakashajtin kanka quinsa cutita ninqui nokata mana rejsiwaskayquita", nispa.  
<sup>62</sup> Pedrotaj llojsispa sonko nanajta wakarka.

*Jesusta asipayancu*

<sup>63</sup> Wakaychaj camachis Jesusta sek'ospa asipayarkancu. <sup>64</sup> Ñawisninta wataspataj tapusharkancu:

—Sut'inchaspa willawaycu pitaj makasorka, —nispa.

<sup>65</sup> May ashqha waj sajra imastawan payta nisharkancu.

*Curajcunaj tantacuynincoj ñaupakenpi*

<sup>66</sup> Tutamanta tucuy israel curajcuna tantacorkancu. Chay jatun tanta-cuyman\* Jesusta pusachimorkancu. <sup>67</sup> Nerkancutaj:

—Willawaycu ¿Diospa ajllaskan Cristochu canqui?

Payrí nerka:

—Sichus willayquichejman chaypis, mana creewanquichejmanchu.

<sup>68</sup> Imata tapuyquichejman chaypis, manapuni cutichiwajchejchu nitaj cachariwanquichejmanchu. <sup>69</sup> Cunanmantapacharí noka, Diospa cachaska Runanka, curaj atiyniyoj Dioswan cusca camachisaj, —nispa.

<sup>70</sup> Tucuy paycunataj taporkancu:

—Chanta ¿kanka Diospa Wawanchu canqui?

Paytaj nerka:

—Nishanquichejrina, noka Diospa Wawan cani, —nispa.

<sup>71</sup> Chayraycu nerkanca:

—Manaña astawan willajcunata munanchejchu, caytaka quiquin sim-inmanta uyariskanchejraycu, —nispa.

## 23

*Pilatoj ñaupakenpi*

<sup>1</sup> Chay israel curajcuna, tucuynincu, camachej Pilatoman Jesusta pusarkancu. <sup>2</sup> Paypa ñaupakenpitaj tumpayta kallarerkancu. Nerkancutaj:

—Cay runapi tarerkaycu llajtaycuta romano camachejpa contranpi ch'ajwachej caskanta. Camachejman impuestota konaycuta jarc'an. Nicunpis pay camachej Cristo caskanta, —nispa.

<sup>3</sup> Pilatori Jesusta taporka:

—¿Kanchu israelcunaj camachejnин canqui?

Jesustaj payman cuticherka:

—Kan ninqui, ajinamin, —nispa.

<sup>4</sup> Pilatotaj yupaychana-wasimanta curajcunaman chaypi caj ashqha runasmanwan nerka:

—Cay runapeka mana ni ima juchatapis tarinichu, —nispa.

<sup>5</sup> Paycunari sinch'ita nisharkancu:

—Tucuy Israel jallp'api Galilea jallp'amanta kallarispa caycamapis yachachispa ch'ajwachishallanpuni, —nispa.

*Herodespa ñaupakenpi*

<sup>6</sup> Cayta uyarispa Pilatoka taporka:

—¿Cay runa Galileamantachu?

<sup>7</sup> Galileamanta nejtinctutaj, Pilatoka Jesusta cacharka camachej Herodesman. Herodeska Galilea runaspa camachejnincu carka. Payka

\* **22:66** Literal: sanedrín.

chay p'unchaycunapi Jerusalenpi casharka. <sup>8</sup> Jesusta ricuspataj mayta cusicorka. Unayñā Jesusmanta runas parlaskancuta uyariskanraycu ricuya munajpuni. Cunanka ñaupakenpi Jesuspa ruwaskan ima ricuchinallatapis ricuya munasharka. <sup>9</sup> Ashqha tapunastapis Jesusta tapusharka. Jesusrí Herodesmanka ni imata cuticherkachu. <sup>10</sup> Chaypi casharkancu yupaychana-wasimanta curajcuna israel yachachejcunapiwan. Paycunaka sinch'iwan tumpasharkancu Jesusta. <sup>11</sup> Herodestaj soldadosninpíwan Jesusta manacajpjaj khawarkancu. Asipayanancupajtaj camachejpa p'achanwanjiná p'achalliyucuherkancu. Ajinatataj watejmanta Pilatoman cacharka. <sup>12</sup> Chay p'unchaypi Herodeswan Pilatowanka allinyanacaporkancu; ñaupajpeka phiñanaska carkancu.

*Pilato Jesusta jaywan wañuchiska cananpaj*

<sup>13</sup> Pilatoka chay curajcunata, runastawan tantachimuspa <sup>14</sup> nerka:  
—Cay runata pusamuwarkanquichej “runasta ch'ajwachej” nispa. Nokarí ñaupakeyquichejpi ch'ataskayquichejmanta khawaspa,\* cay runapeka ni ima juchatapis tarerkanicu. <sup>15</sup> Nillataj Herodespis juchayoj caskanta tarerkachu. Chayraycu cutichimorka. Uyariychej, ni imatapis wañunanpajjinaka ruwarkachu. <sup>16</sup> Chayraycu sek'ochispa cacharipusaj,—nispa.

<sup>17</sup> Pascua p'unchaycunapi Pilatoka costumbrencumanjina cacharianan caj wisk'aska runasmanta ujta. <sup>18</sup> Tucuy chay runastaj cusca sinch'itapuni khaparerkerka:

—¡Wañuchiay chay runataka! Barrabastataj cacharipuwaycu,—nispa.  
<sup>19</sup> Chay Barrabaska runasta llajtapi ch'ajwachiskanmanta runa wañuchiskanmantawan wisk'aska carka.

<sup>20</sup> Pilatoka Jesusta cacharichiya munaspa ujtawan ch'ajwaj runasman khaparerka. <sup>21</sup> Paycunariá awsan sinch'ita khaparerkerka:

—¡Payta chacataycuy, payta chacataycuy! —nispa.  
<sup>22</sup> Quinsa caj cutita Pilato paycunaman nerka:  
—¿Ima mana allintataj ruwarkari? Ni imatapis wañunanpajjina paypi tarerkanicu. Chayraycu sek'ochispa cacharipusaj,—nispa.

<sup>23</sup> Paycunariá Jesús chacataska cananta sinch'ita khaparishal-larkancupuni. Paycunataj khapariskancuwan Pilatota atirparkancu.

<sup>24</sup> Ajinata Pilatoka camacherka mañaskancumanjina ruwaska cananta.

<sup>25</sup> Paycunaj mañaskancu Barrabasta cacharerka. Payka runasta ch'ajwachiskanmanta runa wañuchiskanmantawan carcelpi wisk'aska caj, chay runa carka. Jesustarí jaywaycorka khaparejcunaj munaynincumanjina wañuchiska cananta.

*Wañuchinancupaj Jesusta pusancu*

<sup>26</sup> Jesusta pusashajtincu Cirene llajtayoj Simonpis Jerusalenman yay-cumushallarkataj. Soldadosri payta camacherkerka chacatanata lijray-cucuspa Jesuspa khepanta apananta.

<sup>27</sup> Ashqha runas khatisharkancu. Warmispis may phutiywan Jesusmanta wakaspa risharkancu. <sup>28</sup> Jesusrí paycunaman cutirispa nerka:

—Jerusalén llajtayoj warmis, ama nokamantaka wakaychejchu. Astawanka wakaychej kancuna quiuiyquichejmanta wawasniyquichejmantawan. <sup>29</sup> Uyariwaychej: Jamoj p'unchaycunapitaj

\* **23:14** Literal: juzgaspa.

runaska nenkancu: “Cusiskas cancu mana wawa rejsejuncuna, mana ñuñuchejcunapis”. <sup>30</sup> Chanta runas niyta kallarenkancu orkosta: “¡P'ampaycuwaycu!” Lomastataj: “¡Pacaycuwaycu!” nispa. <sup>31</sup> Mana juchayoj runa k'omer sach'atapis cayjinata cunan ruwashancu. Khepatari ñimaynapunichus ch'aqui sach'api ruwaconka?

<sup>32</sup> Jesusta iscay sajrata ruwajcunatawan pusarkancu wañuchiskas canancupaj.

### *Jesusta chacatancu*

<sup>33</sup> Llajta jawa T'oju niska lugarman chayaspa soldados chacatarkancu Jesusta chay iscay runa wañuchi suwastawan. Chacatarkancu ujninta Jesuspa pañannejpi ujnintataj llok'ennejpi, sapa ujta waj chacatanapi. <sup>34</sup> Jesustaj payta chacatashajtincu nisharka:

—Tatáy, paycunata perdonay ruwashaskancuta mana yachaskancu-raycu, —nispa.

Soldadostaj paycunapura suerteta chocarkancu yachanancupaj pipajchus Jesuspa p'achasnin cananta. <sup>35</sup> Runastaj sayaskas khawasharkancu. Curajcunari Jesusta manacajpaj khawaspa asipayarkancu. Nisharkancutaj:

—Wajcunata cacharicherka. Sichus chay runa Cristo, Diospa ajllaskan chayka, pay qui quinta cacharichicuchun, —nispa. <sup>36</sup> Soldadospis Jesusta asipayashallarkancutaj, akhancuta ujyachinancupaj kayllaspa. <sup>37</sup> Paycuna nisharkancu:

—Sichus kan israelcunaj camachejinin canqui chayka, kan qui qui yquita cacharichicuy, —nispa.

<sup>38</sup> Tucuy runas yachanancupaj imaraycuchus Jesús chacataska caskanta uman patanejpi kelkaska carka: Cay runaka israelcunaj camachejininmin.

### *“Jesusníy, yuyaricuway”*

<sup>39</sup> Runa wañuchi suwas warqhuska casharkancu, paycunamanta ujntaj Jesusta millayta c'amisharka:

—¿Manachu kanka Diospa ajllaskan Cristo canquirí? Cacharichicuy, nokaycutapis cacharichiwaycu, —nispa.

<sup>40-41</sup> Ujnínrí payta rimaspa nerka:

—¿Manachu kan Diosta manchachicunqui? Nokanchej juchanchej-manjina juchachaskas canchej ñiac'arinapajjina ruwaskanchejraycu. Cay runarí ni ima mana allintapis ruwarkachu, —nispa.

<sup>42</sup> Jesustataj nerka:

—Jesusníy, camachinqui, chaypacha yuyaricuway, —nispa.

<sup>43</sup> Jesustaj payman cuticherka:

—Chekatapuni niyqui cunan p'unchaymin janaj pachapi nokawan cusca canayquita, —nispa.

### *Jesuspa wañuynin*

<sup>44</sup> Chaupi p'unchayjinaña cashajtin tucuy jallp'api lakhayaycorka chaupi tardecama. <sup>45</sup> Intipis mana c'ancharkañachu. Yupaychana-wasipi warqhuska caj khatanaka cuscanninmanta iscayman lliq'icorka. <sup>46</sup> Jesustaj sinch'ita khaparerka:

—Tatáy, maquisniyquiman causayniyta jaywacuyqui, —nispa.

Chayta nispataj tucucaporka.

<sup>47</sup> Romano capitán chayta ricuspa Diosta yupaycharka. Nerkataj:

—Chekamanta payka chekan runa carka, —nispa.

<sup>48</sup> Tucuy chay ashqha khawaj jamojcuna ruwaskancuta ricuspa llajtaman cutipusharkancu. Phuticuskancuta ricuchinancupaj pechoncuta tacacuspa risharkancu. <sup>49</sup> Jesuspa tucuy allin rejsiskasnin carunejpi sayacusharkancu ruwacuskanta ricunancupaj. Galileamanta Jesusta khatimoj warmispis chaypi casharkancu.

### *Jesusta p'ampancu*

<sup>50</sup> Carka uj runa israel curajcunaj tantacuyninmanta, José sutiyoj. C'acha runa chekanta ruwaj carka. <sup>51</sup> Payka curajcunaj yuyaskan cuwan ruwaskancuwanpis mana ujllachu carka. Israel llajta Arimateamanta carka. Dios tucuy runasta camachinanta mayta munaj. <sup>52</sup> Payka camachej Pilatoman rispa Jesuspa cuerponta mañarka apacapunanpaj. <sup>53</sup> Chacatanamanta uraycuchispataj linomanta awaskawan mayt'uycorka. Chanta uj orko rumipi jusc'uska p'ampaman Jesusta p'ampaycorka. [Jatun muyu p'alta rumitataj p'ampaña puncuman churarka.]† Chay p'ampanapeka ni uj ayapis churaskarajchu carka. <sup>54</sup> Samacuna p'unchaypis kallaricusharkaña. Waquichicuna p'unchay carka.

<sup>55</sup> Galileamanta Jesuswan jamoj warmispis Joséj khepanta khaticorkancu. Ricorkancutaj p'ampaña jusc'uta, imaynatachus Jesús p'ampaska caskantapis. <sup>56</sup> Llajtaman cutimuspataj k'apajcunata jawinatawan waquicherkancu. Samacuna p'unchaypiri Diospa camachiskanmanjina samacorkancu.

## 24

### *Jesuspa causarimuyin*

<sup>1</sup> Semana kallariy Domingo p'unchayta allin tutamanta cay warmiska p'ampamanan cuterkancu. Chay waquichiskancu k'apayniyoj jampista aparkancu. <sup>2</sup> Warmiska chay jatun rumita p'ampamananta wajnejman muyurparichiskata tarerkancu. <sup>3</sup> Yaycusparí Señor Jesuspa wañuska cuerponta mana tariparkancuchu. <sup>4</sup> Chay imasmanta ni imata ruwayta yacharkancuchu. Ajinallapi iscay kharis lliphipej p'achasniyoj sayashaj paycunaman riqhurerkancu. <sup>5</sup> Warmiska manchachicuywan mana khawariyta munarkancuchu. Kharistaj paycunata nerkan:

—¿Imaraycutaj causashajta wañuskas chaupipi masc'ashanquichej? <sup>6</sup> Jesuska mana caypichu, causarimpunña. Yuyaricuychej Galilea jallp'apiraj cashaspa nisuskayquichejmanta. <sup>7</sup> Payka nerka: “Noka, Diospa cachaska Ñunan, juchasapa runaspa atiynincuman jaywaska chacataskataj canay tiyan. Quinsa caj p'unchaypitaj causarimpunay tiyan”, nispa.

<sup>8</sup> Warmistaj Jesuspa niskasninta yuyaricorkancu. <sup>9</sup> P'ampamananta cutimuspataj tucuy chay imasta chunca ujnyijoj Jesuspa cachasninman willarkancu, tucuy paycunawan cajcunamanpis. <sup>10</sup> Chayta willajcuna carkancu Magdala llajtayoj María, Juana, Jacoboj maman Mariawan. Paycunawan waj warmispis chay imasta cachasninman willashal-larkancutaj. <sup>11</sup> Cachasmanrí chay niskancoka mana yuyayniyojmanjina rijch'acorka, manataj creerkancuchu.

† 23:53 Ajinata nin Mateo 27:6.

<sup>12</sup> Pedrorí jataricuspa p'ampanaman correrka. C'umuyucuspataj Je-suspa mayt'unasninta ch'usajllata ricorka. Payri chay ruwacuskamanta t'ucuspa wasinman riporka.

*Emaús ñanpi*

<sup>13</sup> Chay p'unchayllapitaj iscay yachacojcuna risharkancu Emaús niska ranchoman. Jerusalenmanta iscay leguasjina carka.

<sup>14</sup> Chay p'unchaycunapi tucuy ruwacuskamanta, rishaspa parlanacusharkancu. <sup>15</sup> Chay ruwacuskanta parlanacushajtincu mayta yuyashajtincu ima, quiquin Jesús taripaycorka. Paycunawan risharka.

<sup>16</sup> Ricushaspapis mana Jesusta rejsiyta aterkancuchu. <sup>17</sup> Jesustaj paycunata taporka:

—Ñanta purispa ¿imamantataj sinch'ita parlanacushanquichej?

Paycunari sayarkancu ancha llaquiska uyaslla. <sup>18</sup> Ujnin paycunamanta, Cleofas sutiyoj, cuticherka:

—Kanka purej runallachá cawaj, cay p'unchaycuna Jerusalenpi ruwakuskanta mana yachaspaka,—nispa.

<sup>19</sup> Chanta Jesús paycunata taporka:

—¿Imataj ruwacorkari?

Paycunataj cuticherkerka:

—Nazaret llajtayoj Jesusta ruwaskancuta. Payka Diospa willajnin caskanta ricucherka jatunta ruwaskanwan yachachiskanwan. Atiyniyoj carka Diospa khawayninpí runaspa ñaupakencupipis.

<sup>20</sup> Cayjina carka: Yupaychana-wasimanta curajcunanchej camachejcunanchejpiwan Jesusta jaywaycorkancu wañuyman juchachaska cananpaj. Chacatacherkancutaj. <sup>21</sup> Nokaycurí yuyasharkaycu pay israel runasta cacharinanta. Chaywanpis cunanwan Jesusta chacatachiskancoka quinsa p'unchayña cashan.

<sup>22</sup> Cunanrí cay tiyan: Nokaycumanta waquin warmis tutamanta p'ampanaman rispa t'ucuchiwarkaycu. <sup>23</sup> Jesuspa cuerponsa mana taripaskancuchu. Cutimuspataj nishawarkaycu moskoypijina angelestas ricoskancuta niskancutataj Jesús causashaskanta. <sup>24</sup> Chaywanpis nokaycumanta waquin runas p'ampanaman rerkancu. Warmis niskancumanjinataj taripaskancu. Jesustari mana ricoskancuchu,—nispa.

<sup>25</sup> Jesustaj paycunata nerka:

—¡Ancha pisi yuyayniyoj canquichej! ¡Diospa unay willajcunanpa tucuy willaskancutapis ñac'aypi creej sonko canquichej! <sup>26</sup> Diospa ajllaskan Cristoka chekamanta ñac'arinan carka. Chaymantataj Tatan Dioswan wiñaypaj jatunchaska canan carka,—nispa.

<sup>27</sup> Chaymanta paycunaman Jesús sut'incharka Diospa tucuy palabranpi paymanta cajta. Moisespa kelkaskasnintawan kallarispa Diospa tucuy unay willajcunanpa kelkaskasnintawan sut'incharka.

<sup>28</sup> Yachacojcuna risharkancu, chay Emausman kayllamorkancu. Jesustaj rejjinallapuni churacorka. <sup>29</sup> Paycunataj jarc'arkancu:

—Nokaycuwan khepacuy ch'isiyaycushaskanraycu,—nispa.

Jesustaj wasiman yaycorka paycunawan khepacoj. <sup>30</sup> Payka paycunawan miqhunanpaj tiyaycucuytawan t'antata jap'ispa Diosman graciasta korka. T'antata partispataj paycunaman jaywarka. <sup>31</sup> Ajinallapi

Jesús caskanta reparaspa rejsirparekancu. Paytaj paycunamanta chin-cariporka.<sup>32</sup> Paycunari ninacorkancu:

—Nanpi parlawashajtinchej Diospa palabranta sut'inchawajtinchejpis mayta sonkosinchejka cusiywan t'ucusharkancu!

*Jerusalenman cutincu*

<sup>33</sup> Chay ratutaj chay iscayka jataricuspa Jerusalenman cutiporkancu. Jakaypi tariparkancu tantaskastaña chay chunca ujniyoj Jesuspa cachasninta paycunawan cajcunatawan.

<sup>34</sup> Tantaskacunataj nisharkancu:

—Chekamanta yachanchej Señorka causarimpuskanta. Simonpis payta ricuska, —nispa.

<sup>35</sup> Chanta chay iscay paycunaman willasharkancu ñanpi paycunawan caskanmanta. Imaynatachus t'antata partishajtin Jesusta rejsiskancuta willasharkancutaj.

*Jesús yachachojcunaman riqhuriskanmanta*

<sup>36</sup> Chay imasmanta parlashajtillancuraj Jesuska chaupincipi sayashaj riqhurerka. Napaycorkataj:

—Kancunapaj c'acha causay cachun, —nispa.

<sup>37</sup> Paycunataj mayta mancharicorkancu almata ricuskanuta yuyaspa.<sup>38</sup> Jesusri paycunata nerka:

—¿Imaraycutaj manchariskas cashanquichej? ¿Imaraycutaj sonkojquichejpi iscayrayashanquichej?<sup>39</sup> Khawaychej maquisniyta chaquisniytawan. Nokaka quiuiymin cani. Llanqhariwaychej reparanawayquichejpaj. Almaka mana aychayojochu nitaj tulluyojochu. Ricushawanquichejjina, noka aychayojo tulluyojo cani, —nispa.

<sup>40</sup> Cayta nispataj Jesuska maquisninta chaquisnintawan paycunaman ricucherka. <sup>41</sup> Cusiymanta t'ucuymantawan manaraj creerkancuchu Jesús caskanta. Iscayrayashajtincutaj Jesús taporka:

—¿Caypi canchu imallapis muqhunapaj?

<sup>42</sup> Paycunataj uj chhican challwa cancata lachiwana misq'itawan payman jaywarkancu. <sup>43</sup> Paytaj chayta jap'ispa ñaupakencipi miqhorka.

<sup>44</sup> Paycunatataj nerka:

—Kancunawanraj cashaspa caycunata nerkyayquichej: Tucuy nokamanta kelkaska junt'acunan tiyan, Moisespa kelkaskan, unay willajcunaj kelkaskancu, taquina libropipis, —nispa.

<sup>45</sup> Chanta tucuy chay imasta paycunaman sut'incharka yuyayni-cuwan Diospa palabranta entiendenancupaj.<sup>46</sup> Nillarkataj:

—Dios palabranpi nin paypa ajllaskan Cristo wañunanta, quinsa p'unchaypitaj causarimpunanta.<sup>47</sup> Sutinpitaj willaracunan tiyan runas Diosman cutiricunancuta juchasnincu khechuska canancupaj. Tucuy jallp'api tiyacojcunaman willaraska canan tiyan kallarispa Jerusalenpi.<sup>48</sup> Kancuna cay imasta ricuskayquichejraycu willajcuna canquichej.<sup>49</sup> Sumajta uyariwaychej. Tatay cachamuskayquichej sumajta nerka, paytaka noka quiuiy cachamuskayquichej. Kancunarí Jerusalenpi suyashaychej Diospa atiyninwan junt'aska canayquichejcama, —nispa.

*Jesús janaj pachaman okhariska*

<sup>50</sup> Chaymanta Jesuska Betania ranchonejman yachacojcunanta pusarkorka. Maquisninta patancunejman aysarispataj nerka:

—¡Dios kancunawanpuni cachun! —nispa.

<sup>51</sup> Chayta niytawantaj Jesuska paycunamanta riporka. Janaj pachaman okhariska carka. <sup>52</sup> Yachacojcunaka Jesusta yupay-charkancu. Jatun cusiywantaj Jerusalenman cutimporkancu. <sup>53</sup> Diosta jatunchaspa yupaychana-wasipipuni carkancu. Ajina cachun.

## EL SANTO EVANGELIO SEGUN SAN JUAN

*Causayniyoj Niskaka Cristomin*

<sup>1</sup> Kallaricuypi carkapuniña causayniyoj Niskaka. Chay Niskataj Dioswan cusca carka Diospuni caspa. Paymin Jesucristoka. <sup>2</sup> Paytaj carka Dioswan cusca kallariypi. <sup>3</sup> Diostaj tucuy cajta ruwarka Paynejta. Ruwaska cajmanta ni imapis canchu mana Paynejta ruwaskaka. <sup>4</sup> Payllataj tucuy causashajman causayta kon. Causaynинејта runasman yuyayta kon Diosta rejsinancupaj. Chay paymanta yuyayka sonkoncupi c'anchayjinamin. <sup>5</sup> Cristoka c'anchaymin, jucharí lakhayaymin. Imaynatachus c'anchayka lakhayayta atipan, ajinallatataj Cristoka juchata atipan.

<sup>6</sup> Diospa cachamuskan runa riqhurimorka. Paypa sutintaj Juan. <sup>7</sup> Payri cheka cajta willananpaj jamorka. Willarkataj cheka c'anchay Jesucristomanta, Paynejta tucuy runas Diospi jap'icunancupaj. <sup>8</sup> Juanka mana chay cheka c'anchaychu carka. Manachayrí chay c'anchaymanta runasman willanallanpaj carka. <sup>9</sup> Chay cheka c'anchayrí causayniyoj Niskamin. Tucuy runaj yuyayninman c'anchamoj c'anchayka Diosmanta cay pachaman yaycumusharkaña. [Yaycumusharka juchata atipaj.]\* <sup>10</sup> Payka cay pachapi casharka runas chaupipi. Cay pachataj Paynejta ruwaska carka. Cay pacha runastaj mana payta rejserkan-cuchu. <sup>11</sup> Paypata cajman jamorka. Paypata caj runasnirí mana payta jap'itya munarkancuchu. <sup>12</sup> Astawanpis tucuy paypi jap'icojcunamanrí atiyta korka Diospa wawasnin canancupaj. Paycunaka Diospa Wawan Cristopi jap'icojcuna cancu. <sup>13</sup> Chaywanpis Diosnejta nacecuspa wawasnin cancu paypi jap'icuskancuraycu. Manataj cay pacha runaj nace-cuyninmanjinachu, ni cay pacha runaj munaynинејtachu, nitaj kharej yuyaynинејtachu Diospa wawasnin cancu.

<sup>14</sup> Chay Niska, Cristoka, runaman tucuspa nacecorka. Payri nokay-cuwan tiyacorka. Paypi Diospa cayninta ricorkaycu. Dios Tataj c'ata Wawan caskanraycutaj paypeka Diospa cayninta ricorkaycu. Cristoka c'acha cayninwan cheka cajwanpis junt'amin. <sup>15</sup> Paymantataj Juan tucuyman sut'ita willara. Nejtaj:

—Cay runamantamin nerkyayquichej, khepayta jamoja nokamanta may curajpaj churaska caskanta. Payka manaraj nacecushajtiy carkapuniña, chayraycumin nokamantaka curaj, —nispa.

<sup>16</sup> Cristoka tucuy c'acha cayninwan tucuy nokanchejta yanapawarkanchej. Chay c'acha yanapaynimbanta astawan astawanraj jap'ishanchej. <sup>17</sup> Unayñamin Dios camachiskasninta Moisesnejta israelcunaman korka. Astawanpis cunanka c'acha yanapayninta cheka cajtapis Jesucristonejta kowanchej. <sup>18</sup> Ni pi ni jayc'ajpis Dios Tatata ricorkachu. C'ata Wawan, Dios caspa, munacuypi yuyaypipis Tatanwan ujllamin. Chayraycu paylla Dios Tatanta sut'inchawarkanchej.

*Caymin bautizaj Juanpa willaskan*

---

\* **1:9** Ninayan.

<sup>19</sup> Jerusalén llajtamanta israel curajcuna cacharkancu yupaychana-wasipi ruwanayojcunata yanapajcunatawan Juanta tapunancupaj:

—¿Kan, pitaj canquirí?

<sup>20</sup> Juantaj cutichispa sut'ita willarka:

—Mana nokaka Diospa ajllaskan Cristochu cani, —nispa.

<sup>21</sup> Tapullarkancutaj:

—Chanta ¿kan unay willaj Eliaschu canqui?

Payri cuticherka:

—Mana Eliaschu cani, —nispa.

Ujtawan tapullarkancutaj:

—¿Diospa willajnin jamunan cashan, chaychu canqui?

Paytaj cuticherka:

—Mana paychu cani, —nispa.

<sup>22</sup> Chayraycu payta nerkanca:

—Willawaycu pichus caskayquita cachamuwarkaycu, chaycunaman willanaycupaj. Kan quiuiyquimanta ¿imatataj ninquirí?

<sup>23</sup> Juantaj nerka:

—Nokaka ch'in pampapi khaparej runa cani. Diospa unay willajnin Isaiaspa niskanmanjina niyquichej: “Señorninchej jamunanpaj sonkoyquichejta waquichicuychej”, —nispa.

<sup>24</sup> Chay tapojcunaka fariseospa cachamuskasnincu carkancu.

<sup>25</sup> Taporkancutaj:

—Mana Cristo caspa nitaj Elías nillataj chay jamoj willajpis caspa ¿imaraycutaj bautizashanquirí?

<sup>26</sup> Juantaj paycunaman cuticherka:

—Juchancumanta Diosman cutirejcunata noka yacunejta bautizashani. Astawanpis chaupiyquichejpiña cashan uj runa. Paytari mana rejsinquichejchu. <sup>27</sup> Khepaytaña jamushan. Nokarí mana paypa [camachinpajjinallapischu cani, runalla caskayraycu,]† —nispa.

<sup>28</sup> Ajina carka Betábara, Jordán mayoj chimpanpi, Juan bautizasharka chaypi.

*Juan Jesusmanta willan: “Diospa Corderon”, nispa*

<sup>29</sup> Khepan p'unchaytaj payman jamushajta Jesusta ricuspa Juan nerka: —¡Caymin Diospa Corderonka! Dios payta jaywanka cay pacha runaspa juchancuta khechunapaj. <sup>30</sup> Paymantamin nerkanquichej, khepayta jamoj khareka nokamanta may curajpaj churaska caskanta. Payka manaraj nacecushajtiy carkapuniña. <sup>31</sup> Ni nokapis Diosmanta caskanta yacharkanichu. Astawanpis Dios cachamuwarka yacupi bautizaspa israelcunaman Cristota rejsichinaypaj, —nispa.

<sup>32</sup> Juanka caytapis willarka:

—Ricorkani Santo Espirituta palomatajina janaj pachamanta uraycamushajta, Jesuspitaj tiyaycushajta. <sup>33</sup> Ni nokapis pi caskanta rejsarkanichu. Astawanrí yacupi bautizanaypaj cachamuwaj Dios niwarka: “Santo Espirituta ricunqui uraycamushajta uj runapi tiyaycushajtataj. Cayta ricuspamin yachanqui chay runaka Santo Espiritupi bautizaj caskanta”, nispa. <sup>34</sup> Nokaka ricorkaniña willaniñataj pay Diospa Wawan caskanta, —nerka Juan.

*Ñaupaj yachacojcuna*

† 1:27 Ninayan.

<sup>35</sup> Khepan caj p'unchaypi watejmanta Juan iscay yachacojcunanan sayaricorka. <sup>36</sup> Chaynejpi Jesusta purishajta khawaspataj nerka:

—¡Caymin Diospa Corderonka! —nispa.

<sup>37</sup> Chay iscay yachacojcunataj Juanpa niskanta uyarispa Jesusta khaterkancu. <sup>38</sup> Jesusri khatejcunaman cutiricamuspa paycunata khawarerka. Nerkataj:

—¿Imatataj munanquichejrí?

Paycunataj nerkanca:

—Yachachejný ¿maypi tiyaričushanqui?

<sup>39</sup> Jesuska paycunaman nerka:

—Jamuychej, ricuchiskayquichej, —nispa.

Paywantaj rerkancu maypichus tiyaričusharka, chayman. Chaupi p'unchay pasaskaña. Chay p'unchaypitaj Jesuswan khepacorkancu.

<sup>40</sup> Juanta uyarispa Jesusta iscay khatejcunamanta ujenka Andrés sutiyoj carka. Payka Simón Pedroj wauken carka. <sup>41</sup> Payri ñaupajta wauken Simonta tarerka. Nerkataj:

—Chay Mesiasta tariycu, —nispa. Mesías niyta munan Diospa ajllaskan Cristo.

<sup>42</sup> Nispataj Jesusman pusarka. Jesustaj allinta payta khawarisparí nerka:

—Kan canqui Simón, Jonaspa wawan. Sutiyqui canka Pedro, —nispa. Pedro niyta munan jatun rumi.

*Jesús wajyan Felipeta Natanaeltawan*

<sup>43</sup> Khepan p'unchayta Jesús Galilea jallp'aman rinanpaj llojsisharka. Felipewan tincuspataj nin:

—Jamuy, yachacojniy cay, —nispa.

<sup>44</sup> Feliperi Betsaida llajtamanta carka. Chayllamatataj Andreswan Pedrowanpis carkancu. <sup>45</sup> Felipe Natanaelta tarispa nin:

—Yachanqui camachiskaspi Moisés uj runamanta kelkaskanta. Paymanta Diospa unay willajcunapis kelkarkancu. Paytamin tariycu, José wawan Nazaret llajtayoj Jesusta, —nispa.

<sup>46</sup> Natanaeltaj payta tapun:

—¿Ima allintaj Nazaretmanta jamunman?

Feliperi cutichin:

—Jamuy ricunayquipaj, —nispa.

<sup>47</sup> Jesús Natanaelta jamushajta ricuspa nin:

—¡Caymin cheka israel runaka, tucuy sonkowan Diosta yupaychaj! —nispa.

<sup>48</sup> Natanaelri payta tapun:

—¿Imaynapitaj rejsiwanquirí?

Jesustaj cutichin:

—Manaraj Felipe wajyashasojtin higo sach'a urapi cashajtiyqui ricorkayquiña, —nispa.

<sup>49</sup> Natanael payman nin:

—¡Yachachejný, kanmin Diospa Wawan canqui, israelcunaj Camachejin! —nispa.

<sup>50</sup> Jesustaj payman cutichispa nin:

—Higo sach'a urapi ricorkayqui, nisuskayraycu nokapi jap'icushanqui. Astawan jatun imastaraj ricunqui, —nispa.

<sup>51</sup> Nillantaj:

—Chekatapuni niyquichej: Janaj pachata quichariskata ricunquichej, Diospa angelesnintapis chayman rishajta uraycamushajtataj noka, Diospa cachaska Runanman, —nispa.

## 2

### *Caná llajtapi casamiento*

<sup>1</sup> Quinsa caj p'unchaypi Galilea jallp'a Canapi uj casamiento carka. Chaypitaj Jesuspa maman casharka. <sup>2</sup> Jesuspis yachacojcunanwan chay casamientoman wajyariskas carkancu. <sup>3</sup> Vino tucucapojtintaj maman Jesusta nin:

—Manaña vinoncu canñachu, —nispa.

<sup>4</sup> Jesustaj nin:

—Mamáy, chayka nokallamanta. Horayka manaraj chayamunchu, —nispa.

<sup>5</sup> Mamanri yanapajcunaman nin:

—Imatachus nisonkachej chayta ruwaychej, —nispa.

<sup>6</sup> Chaypitaj carka rumimanta sojta yacu p'uñus israelcuna llimphuchacunancupaj churaska. Chay p'uñusmanka sapa ujman pachaj botellajina yaycoj. <sup>7</sup> Jesustaj paycunata nin:

—Chay p'uñusman yacuta junt'achiychej, —nispa.

Wasarishajta junt'acherkancu. <sup>8</sup> Jesustaj paycunata nin:

—Cunan wiserkospa apaychej dispenseroman, —nispa.

Paycunataj aparkancu. <sup>9</sup> Dispenseroka yacumanta ruwaska vinota mallerka. Payri mana yacharkachu maymantachus caskanta. Yacu wisej yanapajcunalla yacharkancu. Chaymanta dispenseroka casaracotta wajyaspa nin:

<sup>10</sup> —Tucuy runamin ñaupajta sumaj caj vinota runasman jaywan. Runas sajsajtinctaj khepata lak'allataña jaywan. Kanrí cay sumaj vinota cunancama wakaychaskanqui, —nispa.

<sup>11</sup> Cay ricuchinaspa kallariyninta Jesús ruwarka Galileapi caj Caná llajtapi. Chayta ruwaspa atiyninta runasman ricucherka. Yachacojcunantaj paypi jap'icorkancu.

<sup>12</sup> Chaymanta Jesús Capernaum llajtaman riporka. Pay, maman, waukesnin, yachacojcunan rerkancu. Chaypi pisi p'unchaycunallatawanña cacorkancu.

### *Yupaychana-waseka Dios Tatanpata*

<sup>13</sup> Israelcunaj pascua p'unchaycunancu kayllamusharkaña. Jesustaj Jerusalén llajtaman rerka. <sup>14</sup> Chayaspataj yupaychana-wasej pationpi tariparka chay vendej runasta. Paycuna vendej cancu Diosman jaywanaspaj bueycunata, ovejacunata, palomacunata. Taripallarkataj kolke cambiajcunata tiyaskasta. <sup>15</sup> Chaypi caj phalamanta sek'onata ruwaspa Jesús yupaychana-wasimanta tucuy paycunata kharkomorka ovejasnincutawan bueyesnincutawanpis. Cambiajcunaj kolkesnincuta jich'arka mesasnincutapis tijrarka. <sup>16</sup> Palomata vendejcunaman nerktaj:

—Caycunata jawaman apaychej. Amañataj Tataypa wasinta khatu wasiman tucuchiychejchu, —nispa.

<sup>17</sup> Yachacojcunanri Diospa palabranpi cay niskanta yuyaricorkancu: “Yupaychana-wasiyquita tucuy sonkoywan munacuskayraycu wakaychanapaj causayniya kosaj”.

<sup>18</sup> Israel curajcuna chay ruwaskanmanta Jesusta nerkanca:  
—Nokaycuman ricuchiwaycu ima atiywanchus chayta ruwaskayquita,—nispa.

<sup>19</sup> Jesustaj paycunaman cuticherka:  
—Ruwaskayquichejwan tucuchillaychej cay yupaychana-wasita. Nokataj quinsa p'unchaypi cayta jatarichisaj,—nispa.

<sup>20</sup> Chay curajcunataj nerkanca:  
—Tawa chunca sojtayoj watashi wasichacushan cay yupaychana-waseka. Kanrí ¿quinsa p'unchaypichu cay yupaychana-wasita jatarichiwaj? —nispa.

<sup>21</sup> Caytarí mana chay yupaychana-wasimantachu Jesús nerka. Manachayrí quiquin cuerponmanta parlasharka. <sup>22</sup>Jesús wañuymanta causa rimojtin yachacojcunan yuyaricorkancu chayta niskanta. Diospa palabrantataj creerkancu, Jesuspa niskantapis.

### *Jesuska runaj yuyayninta yachan*

<sup>23</sup> Pascua p'unchaycunapi Jerusalenpi Jesús cashajtin ashqhas paypi jap'icorkancu ricuchinasta ruwaskanta khawaspa. <sup>24</sup> Jesusrí tucuy runaj yuyayninta yachaskanraycu paycunaman mana confiacorkachu. <sup>25</sup> Runaj sonkonta pay quiquin rejsiskanraycutaj runamantaka mana willanatachu suyanan caj.

## 3

### *Jesús Nicodemowan*

<sup>1</sup> Fariseocunamanta uj runa carka Nicodemo sutiyoj. Payka israel curajcunamanta carka. <sup>2</sup> Cay runaka tuta Jesusman jamuspa payta nerka:

—Yachachejný, yachaycu Diosmanta cachamuska yachachej caskayquita. Mana Dios paywan cajtenka ni pipis ruwayta atinmanchu kanpa ruwaskayquijina ricuchinastaka,—nispa.

<sup>3</sup> Jesusri payman nerka:  
—Chekatapuni niyqui: Diosta Camachejninpaj rejsinanpaj uj runa watejmanta naceska canan tiyan,—nispa.

<sup>4</sup> Nicodemo payta nerka:  
—¿Imaynatataj uj runa machuña caspa watejmanta nacecuya atinman? ¿Imaynataj chayrí? Ni jayc'aj atinmanchu uj runa mamaンpa wijsanman ujtawan yaycuya nacecuytatajka,—nispa.

<sup>5</sup> Jesusri cuticherka:  
—Chekatapuni niyqui: Diosta Camachejninpaj rejsinancupaj uj runaka yacunejta Santo Espiritunejtapis nacecunán tiyan. [Ajinapi juchamanta llimphuchaska cajtin, Santo Espíritu mosoj causayta kon.]<sup>\*</sup>  
<sup>6</sup> Runamanta nacecojka runalla. Santo Espiritumanta nacecojrí Diospa wawanmin. <sup>7</sup> Ama t'ucuychu, “Watejmanta nacecunayquichej tiyan”, nisuskaymanta. <sup>8</sup> Wayraka maymanchá munan chayman wayrallan. Wayraskanta uyarispataj wayra caskanta reparanqui. Maymanta jamuskanta mayman riskantataj mana yachanquichu. Ajinamin Santo Espiritumanta nacecojka,—nerka Jesús.

\* 3:5 Ninayan.

<sup>9</sup> Nicodemotaj payta taporka:

—¿Imaynataj cayka canmanrí?

<sup>10</sup> Jesustaj payman cuticherka:

—Chay israelcunaj yachachejinin canqueka. ¿Manachu yachanqui cay imasmanta? <sup>11</sup> Chekatapuni niyqui: Yachaskaycu chayta parlaycu, ricuskaycu chaytataj willaycu. Willaskaycutari mana jap'inquichejchu. <sup>12</sup> Cay pacha imasmanta nerkyawquichej manataj creerkanquichejchu. Chanta ¿imaynatataj creewajchej janaj pacha imasmanta willayquichejman chayka?

<sup>13</sup> 'Ni pipis janaj pachaman wichererkachu, manachayrí janaj pachamanta uraycamojlla, Diospa cachaska Runallan. Payka Dioswanpuni tiyacun. <sup>14</sup> Moisespis unayña ch'in pampapi uj catarita c'aspipi warqhuspa okharerka onkoska runas khawanancupaj. Diospi jap'icuspa, chay catarita khawaskancuraycu, Dios paycunata thañicherka. Ajinallataj Diospa cachaska Runan okhariska canan tiyan <sup>15</sup> tucuy runa paypi jap'icojka wiñay causayniyoj cananpaj.

#### *Dios tucuy runasta munacun*

<sup>16</sup> Dioska tucuy runasta maytapuni munacorka. Chayraycumin c'ata Wawanta korka. Cay pachaman payta cachamorka paypi tucuy jap'icojka ama wiñaypaj wañupunanpaj astawanrí wiñay causayniyoj cananpaj. <sup>17</sup> Diosri mana cay pacha runasta juchachananpajchu Wawanta cachamorka, manachayrí cay pacha runas Paynejta juchamanta cachariskas canancupaj. <sup>18</sup> Paypi jap'icojka mana juchachaskachu. Paypi mana jap'icojri juchachaskañamin, Diospa c'ata Wawanpi mana jap'icuskanraycu. <sup>19</sup> Cheka c'ancharay Cristoka tucuy runasman jamorka. Runastaj sajra lakhayayta astawan munacorkancu paymanta niskaka, ruwaskasnincu sajra caskanraycu. Chayraycu Dioska paycunata juchachan. <sup>20</sup> Sapa uj manacajta ruwajka cheka c'ancharayta chejnín. Manataj Cristoman jamunchu ruwaskasnín sajra caskan mana ricuchiska cananpaj. <sup>21</sup> Cheka cajta ruwajrí Cristoman jamun sumaj ruwaskasnín sut'i ricuchiska cananpaj, Diospa atiyninneja ruwaska caskanraycu.

#### *Bautizaj Juan Jesusta jatunchan*

<sup>22</sup> Chay khepata Jesús yachacojcunawan llojserka Judea jallp'aman. Chaypitaj caricorka paycunawan runasta bautizaspa. <sup>23</sup> Juanpis bautizashallarkataj Enonpi Salim kayllapi, chaypi ashqha yacu caskanraycu. Runastaj jamullaj cancu bautizacoj. <sup>24</sup> Juanri manaraj carcelpi wisk'askarajchu carka. <sup>25</sup> Ajinapi chay bautismo jawa uj jap'inacuy kallaricorka Juanpa yachacojcunawan uj israel runawan. <sup>26</sup> Yachacojcunantaj Juanman jamuspa nerkanca:

—Yachachejný, Jordán mayuchimpapi kanwan carka chay runa, paymanta willarkanquipis. Chay runaka cunan bautizashan tucuytaj payman rishancu, —nispa.

<sup>27</sup> Juantaj cuticherka:

—Dios kojtilan runaka imatapis jap'iyta atin. <sup>28</sup> Kancuna quiuiyquichej yachanquichej cay niskayta: Noka mana chay Cristochu cani. Manachayka paypa ñaupakenta Diospa cachamuskallan cani, —nispa.

<sup>29</sup> Nerkataj:

—Casamientoijina casaracoj kharimin curajpaj khawaskaka casarcushaskanraycu. Amigoní paywan cashaspa payta uyarispataj anchata cusicun. Ajinallataj nokapis may cusiska cani Jesús jatunchaska caskan-raycu. <sup>30</sup> Payka astawan astawanraj curajpaj khawaska canan tiyan. Nokataj astawan pisillapajña khawaska canay tiyan.

### *Diosmanta jamojka atiyniyojmin*

<sup>31</sup> 'Diosmanta jamojka tucuy runasmanta aswan atiyniyojmin, payka aswan curaj caskanraycu. Cay pachamanta runaka cay pacha imasllamanta parlan cay pachallamanta caskanraycu. Diosmanta jamojrí tucuy runasmanta aswan curajmin. <sup>32</sup> Diosmanta ricuskanta uyariskantataj willan. Runasrí willaskasninta mana jap'incuchu. <sup>33</sup> Willaskanta jap'icoj runarí ricuchin Dios wiñaypaj cheka caskanta. <sup>34</sup> Diospa cachamuska Wawanka Diospa niskasninta parlan. Diostaj Espiritunta mana mich'acuspa payman kon. <sup>35</sup> Dios Tataka Wawanta munacun, tucuy imatataj churarkaña paypa atiyninpi cananpaj. <sup>36</sup> Wawanpi jap'icojka wiñay causayniyojmin. Wawanpi jap'icuya mana munají wiñay causayman mana yayconcachu. Astawanpis Diospa c'ajaj phiñacuynin chay runapaj wiñaypaj cashan,—nerka Juan.

## 4

### *Jesús Samaria jallp'api*

<sup>1</sup> Fariseos uyarerkancu astawan ashqha runas Jesusta khatishaskan-cuta Juanmanta niskaka. Payka astawan ashqha runasta bautizashanpis, niskata. <sup>2</sup> Manapis quiquin Jesús bautizarkachu, manachayrí yachacojcunan. <sup>3</sup> Jesús yacharka fariseos chayta uyariskancuta. Chayraycu Judeamanta llojsispa ujtawan Galileaman cutimorka.

<sup>4</sup> Samaria jallp'anejta rinan carka. <sup>5</sup> Ajinapi Samaria jallp'api uj llajtaman chayamorka, Sicar sutiyojman. Chay llajtari Joséj jallp'an kayllapi carka. Tatan Jacobka unayña chay jallp'ata Joseman koska. <sup>6</sup> Chaypitaj Jacobpa yacu pujuun carka. Puriskanmanta ancha sayc'uska caspa Jesuska pujuu canto perkapi tiyarirocra samaricunampaj. Chaipi p'unchayjinaiña carka.

### *Samaritana warmi*

<sup>7-8</sup> Jesusta sapallanta sakespa yachacojcunan llajtaman miqhunata rantej rerkancu. Chaycamataj uj samaria warmi Sicarmanta yacuta orkhoj jamorka. Jesustaj payta nin:

—Yacuta koriway,—nispa.

<sup>9</sup> Chay warmitaj Jesusman nin:

—Israel runa caspa ¿imaynatataj noka samaria warmimanta yacuta mañacuwanquirí?

Israelecuna samariacunawan mana parlajchu cancu. Chayraycu warmeka ajinata taporka.

### *Causachej yacu*

<sup>10</sup> Jesusri payman cutichin:

—Dios mana mich'acuspa runasman koskanta, ichapis mana yachanchiquichu. “Yacuta koriway”, nisojtapis ichapis mana rejsiniquichu. Yachawajchus chayka, kan nokamanta mañacuwanquiman carka. Nokataj causachej yacuta koyquiman carka,—nispa.

<sup>11</sup> Warmi payman nin:

—Señor, aysanayqui mana capusunquichu, pujyupis ancha uqhu-rajtaj cashan. ¿Maymantataj chay causachej yacu capusunquimanrí? <sup>12</sup> Naupa tatanchej Jacob cay pujyuta kowarkanchej. Cay pujumanta pay, wawasnin, uywasnincupis ujyarkancu. Cunan ¿kan aswan curajchu paymanta cawaj?

<sup>13</sup> Jesusri payman cutichin:

—Cay yacumanta ujyajka watejmanta ch'aquichicun. <sup>14</sup> Nokaj koskay yacuta ujyajrí wiñaypaj ni jayc'ajpis ch'aquichiconkachu. Astawanpis koskay yacoka paypi yacu pujyujina canka. Wiñay causaypaj phullchimonka, —nispa.

<sup>15</sup> Warmeka payman nin:

—Señor, chay yacuta koriway ama ch'aquichicunaypaj nitaj cayman yacuman jamunaypajpis, —nispa.

<sup>16</sup> Jesustaj payta nin:

—Riy, kosayquita wajyamuy. Chanta cutimuy, —nispa.

<sup>17</sup> Warmeka cutichin:

—Maná kosayojochu cani, —nispa.

Jesusri payman nin:

—Chekata ninqui, mana kosayojoj caskayquitaka. <sup>18</sup> Phishka cuti kharilliskaña canqui. Cunan causashanqui, chaytaj mana kosayquichu. Caytaka chekata ninqui, —nispa.

<sup>19</sup> Warmi payman nin:

—Señor, Diospa willajnin caskayquita reparani. <sup>20</sup> Chayraycu caymanta yachayta munani: Tatasniycu nincu, cay orkopí yupaychanata. Kancuna israelcunataj ninquichej, Jerusalenllapi yupaychana caskanta. ¿Kanrí, ima ninquita?

<sup>21</sup> Jesustaj payman nin:

—Doña, cay nisuskayta creey: Uj sumaj p'unchay chayamunña. Chay p'unchaypi Dios Tatata yupaychanquichej ni cay orkopichu nitaj Jerusalenpipischu. <sup>22</sup> Mana entiendes kayquichejta kancunaka yupaychanquichej. Nokaycutaj rejsiskaycuta yupaychaycu. Runasta juchamanta Cacharichejka israelcunamantamin jamun. <sup>23</sup> Arí, p'unchaycuna jamushan, cunantaj chay p'unchaycunaka. [Cunantajmin cheka yupaychajcuna Dios Tatata tucuy sonkowan cheka yuyaywantaj payta yupaychanancu.]\* Chayjina yupaychajcunata Dios Tataka munan. <sup>24</sup> Diospa caynenka Espiritumin manataj ricucunchu. Payta yupaychajcunataj tucuy sonkowan cheka yuyaywantaj yupaychanancu tiyan, —nin Jesús.

<sup>25</sup> Warmeka payman nin:

—Arí, yachani Diospa ajllaskan Cristo jamunanta. Pay chayamuspa tucuy imasta sut'inchawasajcu, —nispa.

<sup>26</sup> Jesusri payman nin:

—Noka Cristo cani, kanwan parlaspa, —nispa.

### *Yachacojcunana cutimuncu*

<sup>27</sup> Ajinata parlashajtinctaj yachacojcunanka cutimorkancu. T'ucorkancutaj Jesús uj warmiwan parlashaskanmanta. Chay jawarí mana payta nerkanccu: “¿Imatataj munanqui?” chayrí “¿Imatataj paywan parlashanqui?” nispapis.

\* 4:23 Ninayan.

<sup>28</sup> Warmirí p'uñunta sakespa llajtaman rerka. Chaypitaj runasta nerka:

<sup>29</sup> —Jamuychej uj runata ricoj. Payka tucuy ruwaskayta niwan. ¿Manachu cayka Cristo canman? ¿Imaynataj canmanrí?

<sup>30</sup> Chanta llajtamanta llojsimorkancu Jesús casharka, chayman jamunancupaj.

### *Diospa cosechan*

<sup>31</sup> Chaycamataj yachacojcunanka Jesusta nisharkancu:

—Yachachejný, miqhullayña, —nispa.

<sup>32</sup> Payrí paycunaman nerka:

—Nokajta sumaj miqhunay capuwan. Kancunari chaymanta mana yachanquichejchu, —nispa.

<sup>33</sup> Chayraycu yachacojcunanka paycunapura ninacusharkancu:

—Manachá pipis miqhunapaj apamunmanchu carka, —nispa.

<sup>34</sup> Jesustaj paycunaman nin:

—Nokajtaka wajjina miqhunamin. Cachamuwajniyapa munayninta ruwanay, paypa ruwayninta tucunaypis miqhunajina nokapajka.

<sup>35</sup> Caypi caj chajrasta ricuspa nishanquichej, tawa quillaraj cashan cosecha okharinapajka. Nokataj niyquichej: Allinta khawariychej ricunayquichejpaj cay waj laya chajrasta. Runaska pokoska chajrajinañamin. Wiñay causayman pusananchejtaj cosecha okhariyjina. <sup>36</sup> Okharejka cusiywan chay wiñay causaypaj pokoya okharishanña. Ajinapi tarpojka okharejwan cusca cusicuncu. <sup>37</sup> Cayka Diospa cosechanmanta nincujina: “Ujmin tarpojka wajtaj okharejka”, nispa. <sup>38</sup> Diospa cosechanpeka noka kancunata cacharkayquichej mana llanc'askallayquichejmanta okharimunayquichejpaj. Wajcuna llanc'arkancu okharinayquichejpaj.

### *Jesús samaria runaswan khepacun*

<sup>39</sup> Chay samaria llajtamanta cajcuna ashqhas Jesuspi jap'icorkancu warmej willaskanraycu: “Jesús tucuy ruwaskayta niwan”, nispa. <sup>40</sup> Chay samaria runastaj payman chayamuspa nisharkancu:

—Nokaycuwan kheparicuy, —nispa.

Ajinamanta chaypi iscay p'unchaycunata khepacorka. <sup>41</sup> Aswan ashqastaj Jesuspi jap'icorkancu paypa niskanta uyarispá. <sup>42</sup> Warmita nisharkancutaj:

—Mana kanpa niskallayquimantachu paypi jap'icuyucu, manachayrí pay qui Quinta uyariskaycuraycu. Yachaycutaj cay runaka chekapuni cay pacha runasta juchamanta Cacharichej caskanta, —nispa.

### *Jesús thañichin uj wawata*

<sup>43</sup> Isbay p'unchayta chaypi caskanmanta Jesuska llojserka Galileaman rinapaj. <sup>44</sup> Quiquin Jesusri cayta nerka: “Uj willajka pisipaj khawaskamin paypa quiquin llajtanpeka”, nispa. <sup>45</sup> Chayraycu Galileaman rerka. Chaymanjinataj Jerusalenpi jatun p'unchaycunapi tucuy ruwaskanta ricuskancuraycu Galilea runaska Jesusta cusiywan jap'erkancu. Paycunapis jatun p'unchaypaj Jerusalenpi caskancu.

<sup>46</sup> Ajinapi Jesús Galilea jallp'a Caná llajtapi yacuta vinoman tuucherka, chay llajtaman ujtawan chayamorka. Chaypachataj Capernaum llajtapi uj camachej runa carka. Paypa wawantaj onkoska casharka. <sup>47</sup> Cay runa uyererka Jesús Judeamanta Galileaman jamushaskanta. Chayraycu pay jamorka Jesusman, nericusharkataj:

—Señorníy, waway wañojña rishan. Jamuy Capernaumman payta thañichipunawayquipaj, —nispa.

<sup>48</sup> Ajinapi Jesús payman nerka:

—Sichus ricuchinasta mana ricuwajchej chayka, ni jayc'aj nokapi jap'icuwanquichejmanchu, —nispa.

<sup>49</sup> Camachejka payman nerka:

—Señorníy, jamullayña manaraj wawitay wañupushajtin, —nispa.

<sup>50</sup> Jesús payta nerka:

—Rillaryña, wawayqueka causashan, —nispa.

Jesuspa niskanta creespa chay runaka riporka. <sup>51</sup> Ripushaspataj camachisninwan ñanpi tincorka. Chay camachisnenka Capernaummanta payman willaj jamusharkancu. Willarkancutaj:

—Wawayqui causashan, —nispa.

<sup>52</sup> Camachejka paycunata taporka:

—¿Ima horasmantañataj allinyacun?

Paymantaj nerkantru:

—Kayna chaupi p'unchaytajina sinch'i k'oñi onkoynin chincaporka, —nispa.

<sup>53</sup> Tatantaj repararka chay horapi Jesús payman, “Wawayqui causashan”, niskanta. Paytaj Jesuspi jap'icorka tucuy wasinpi cajcunapis.

<sup>54</sup> Chay jatun ruwaskanwan Jesuska iscay caj cutitaña Galileapi atiyninta ricucherka. Cayri carka Judeamanta cutimuspa.

## 5

*Jesuska samacuna p'unchaypi onkoska runata thañichin*

<sup>1</sup> Chay khepata israelcunaj Diosta yupaychana p'unchaycunancu carka. Chaypajtaj Jesús Jerusalenman rerka. <sup>2</sup> Jerusalenpi oveja khatiycuna puncu kayllapi Betesda sutiyoy yacu estanque wasi tiyan. Chayka phishka jatuchej arcosniyoj. [Unaycunamanta chay estanque yacoka mana yuyaymanta jatunta phullchimoj.]\* <sup>3</sup> Chay arcospitaj ashqha onkoska runas sircusharkancu. Paycunataj thañicunancuta suyasharkancu. Carkancu ciegos, cojos, imaymana onkoskas. <sup>4</sup> Paycuna yuyarkancu sapa cuti yacu phullchimojtin onkoskacunamanta ñaupajta yacuman yaycojka thañiska cananta. <sup>5</sup> Chaypitaj uj runa casharka quinsa chunca pusajniyoj wata onkoska. <sup>6</sup> Jesusri payta sircushajta ricorka. Ashqha watasña onkoska caskanta yachaspa payman nin:

—¿Thañicuya munanquichu?

<sup>7</sup> Onkoska runari payman cutichin:

—Señorníy, mana canchu yanapawajniy yacu phullchimojtincama churanawanpaj. Noka jamushajtiy wajña ñaupajniyta yaycun, —nispa.

<sup>8</sup> Jesutaj payman nin:

—Jataricuy, callapuyquita okhariy, puriy, —nispa.

<sup>9</sup> Runaka chay quiquinpachita thañiska carka. Callapunta okharerka purisharkataj. Chay p'unchayrí samacuna p'unchay carka. <sup>10</sup> Chayraycu israel curajcuna nisharkancu thañichiska runaman:

—Ama callapuyquita apaychu. Samacuna p'unchay caskanraycu mana aticunchu, —nispa.

<sup>11</sup> Paycunaman cuticherka:

\* **5:2** Ninayan.

—Thañichiwarka, chay runa niwarka: “Callapuyquita okhariy, puriy”, —nispa.

<sup>12</sup> Payta taporkancu:

—¿Pitaj okhariy, puriy, nisorkari?

<sup>13</sup> Thañiska runaka mana yacharkachu pichus thañichiskanta, Jesús ashqha runas chaupipi chincaripuskanraycu. <sup>14</sup> Chaymanta khepata Jesús yupaychana-wasi patiopi payta tariparka. Nerkataj:

—¡Khaway! Thañiska canqui, amañataj juchalllicuychu, caymanta astawan ima sajrapis manaña jap'isunanpaj, —nispa.

<sup>15</sup> Thañiska runaka rispa israel curajcunaman willarka, Jesús sutiyopayta thañichiskanta. <sup>16</sup> Chayraycu israel curajcuna Jesusta muchuchiyya munasharkancu samacuna p'unchaypi chayjinata ruwaj caskanraycu.

<sup>17</sup> Jesusri paycunata nerka:

—Tatayka sumaj cajta ruwashallanpuni. Chayraycu nokapis chaymanjinallataj ruwashani, —nispa.

<sup>18</sup> Jesús samacuna p'unchaypi mana paycunajinachu ruwarka. Ajinamanta yuyarkancu samacuna p'unchayta chincachiyta munaskanta. Chaywanpis, “Dioska Tataymin” niskanwan Dioswan quiquincha-cusharka. Chayraycu chay israel curajcuna payta wañuchiyya munarkancu.

### *Diospa Wawanpa atiyninmanta*

<sup>19</sup> Ajinata yuyaskancuraycutaj paycunaman Jesús cuticherka:

—Chekatapuni niyquichej: Noka, Diospa Wawanri, munaynillaymanta ni imata ruwayta atinichu. Astawanka Tataypa ruwaskanta ricuspa chayllatataj ruwani. Tatay ruwashan, chayta nokapis quiquilantataj paypa atiyninwan ruwashani. <sup>20</sup> Tatay noka Wawanta munacuwan. Chayraycu tucuy ruwashaskanta ricuchiwan. Chay runata thañichiskaymanta astawan jatun ruwanastaraj ricuchiwanka kancuna t'ucunayquichejpajjina. <sup>21</sup> Imaynatachus Dios Tata wañuskacunata causarichimun causaytataj kon, ajinallatataj noka, Wawanpis, pimanchá munani chayman causayta koni. <sup>22</sup> Dios Tataka mana pitapis juchayojchus manachus caskanta ninchu. Manachayrí noka, Wawanman, runasta juchayojchus manachus caskancuta ninaypaj atiyya kowarka. <sup>23</sup> Chayta ruwarka noka, Wawanta, tucuy runas jatunchanawancupaj. Dios Tatata jatunchancu quiquillantataj noka, Wawan-tapis, jatunchanawancu. Mana jatunchawajri nillataj jatunchanchu cachamuwjnij Dios Tatataka.

<sup>24</sup> ‘Chekatapuni niyquichej: Niskayta tucuy sonkowan uyarejka cachamuwjnijpipis jap'icojka wiñay causayniyojmin. Manañataj juchanmanta juchachaskachu canka. Manachayrí wiñay wañuymanta wiñay causaymanña yaycun. <sup>25</sup> Chekatapuni niyquichej: Cunanka sumaj p'unchay chayamunña. Cunanmin noka, Diospa Wawan, chay juchapi wañuskacunata wajyashani. Paycunataj uyariwankancu. Chay uyariwajcunataj wiñay causayniyoj cankancu. <sup>26</sup> Imaynatachus Dios Tatalla causayta kon, ajinallatataj noka, Wawanman, atiyninta kowarka causayta konaypaj. <sup>27</sup> Runasta juchayojchus manachus ninaypaj atiyytapis kowarka cachaska Runan caskayraycu. <sup>28</sup> Cay niskasmanta amaña t'ucuychejchu. Cunan chay p'unchay chayamunña. Tucuy p'ampaskacunaka wajyaskayta uyarispa llojsimonkancu. <sup>29</sup> Sumaj cajta

ruwajcunaka wiñay causayman yaycunancupaj jatarenkancu. Manacajta ruwajcunataj juchachaskas canancupaj jatarenkancu. <sup>30</sup> Noka munaynillaymanta ni imata ruwayta atinichu. Astawanpis Tataymanta uyariskaymanjina runasta khawani, juchayojchus manachus niskayka chekanmin cachamuwajniypa munaynillanta ajllaskayraycu. Manataj nokaj munayniytachu ajllani.

*Jesusmanta Dios willan*

<sup>31</sup> 'Noka quiquiymanta willacuyman chayka, mana chekapaj khawaskachu willaskay canman. <sup>32</sup> Nokamanta willajka ujmin. Payka Dios Tata, yachanitaj nokamanta willaskanka cheka caskanta. <sup>33</sup> Chaywanpis kancuna runasta cacharkanquichej bautizaj Juanta tapunancupaj. Paytaj nokamanta cheka cajta willasorkachej. <sup>34</sup> Nokarí cheka caskayta ricuchinaypajka mana runasllamanta willaskatachu munani. Astawanpis juchamanta cacheriskas canayquichejpaj paymanta kancunaman parlashayquichej. <sup>35</sup> Juanka uj c'anchayjina carka sut'ita nokamanta willananpaj. Kancunataj pisi ratullapaj cusiywan payta uyarerkanquichej. <sup>36</sup> Willajniyrí Juanmanta aswan curajmin. Chay ruwaskasiymin willajniyka. Chay ruwanasniya Tatay kowarka tucunaypaj. Chaymanjina ruwashaskay, Dios Tata cachamuwaskanmanta willashan. <sup>37</sup> Chaywanpis cachamuwajniy Tatayka nokamanta willarka. Kancunari paypa wajyaskanta ni jayc'aj sonkoyquichejwan uyarerkanquichejchu nitaj paymantapis repararkanquichejchu. <sup>38</sup> Mana Tataypa niskanka sonkoyquichejpi canchu paypa cachamuskan caskayta mana creeskayquichejraycu. <sup>39</sup> Entiendenayquichejpaj sumajta leeychej Diospa palabranta. Kancuna palabranpi wiñay causayniyoj caskayquichejta yuyanquichej. [Astawanpis nokapimin wiñay causayka cashan.]† Chay palabrantaj nokamanta willan. <sup>40</sup> Kancunari mana nokaman jamuya munanquichejchu wiñay causayniyoj canayquichejpaj.

*Moisés Jesusmanta kelkarka*

<sup>41</sup> 'Mana runaj mentacuyninta munanichu. <sup>42</sup> Astawanpis kancunata rejsiyquichej. Yachanitaj Diospa munacuynin sonkoyquichejpi mana caskanta. <sup>43</sup> Noka Tataypa munayninmanjina jamorkani pay imaynachus caskanta ricuchinaypaj. Kancunataj khesachawanquichej. Wajchus paypa munayninmanjinalla jamunman chayka, paytaka cusiywan jap'iwajchej. <sup>44</sup> Kancuna purajmanta mentacuya munajcuna canquichej. Mana masc'anquichejpischu c'ata Diosmanta mentayninta. Ajina cajtenka ¿imaynatataj Diospi jap'icuya atiwajchej? <sup>45</sup> Ama yuyaychejchu noka Dios Tataj ñaupakenpi kancunamanta willaycuspa ch'atanaytaka. Ch'atasojniyquichejka Moisesmin. Paypimin kancuna confiacunquichej. <sup>46</sup> Sichus Moisespa niskanta creenquichej chayka, nokaj niskaytapis creewajchej carka. Moiseska nokamantamin kelkarka. <sup>47</sup> Paypa kelkaskasnintapis mana creenquichejchu chayka ¿imaynatataj niskasniya creewajchej? —nerka Jesús.

## 6

*Jesuska phishka waranka runasman miqhuchin*

---

† 5:39 Ninayan.

1-2 Chay khepata Jesús Galilea jallp'aman riporka. Chaypitaj ashqha runas khatisharkancu. Paycunaka Jesús onkoska runasta thañichishajta cusiywan khawarkancu. Chayraycu payta khatisharkancu. Chay ashqha runasta sakespa Jesús Tiberias niska, Galilea kocha chimpaman rerka. <sup>3</sup> Orkoman rerka chaypitaj yachacojcunanwan tiyari-corka samaricunancupaj. <sup>4</sup> Israelpaj pascua p'unchaynincu kayllaña carka. <sup>5</sup> Chay tiyacushaskanmanta Jesuska ashqha runa payman jamushaskanta ricorka. Felipemantaj nerka:

—¿Imaynatataj t'antata rantisunman paycuna miqhunancupaj?

<sup>6</sup> Felipej yuyaskanta yachanallanpaj chayta nerka. Payka yacharka runasman t'antata konanta. <sup>7</sup> Feliperi cuticherka:

—Uj wata llanc'aska kolkewan t'antata rantisunman chaypis, niraj sapa uj pisillatapis jap'incumanchu, —nispa.

<sup>8</sup> Yachacojninemanta Simón Pedroj wauken, Andrés, Jesusman nerka:

<sup>9</sup> —Uj wawa caypi cashan. Paypata capushan phishka cebada t'antas iscay challwitaswan. Cayllaka ni imapischu chay ashqha runaspajka, —nispa.

<sup>10</sup> Jesusri yachacojcunaman nerka:

—Chay ashqha runasta tiyaycuchiyye, —nispa.

Chaynejpi ashqha pasto carka. Runastaj tiyaycorkancu. Kharislla yupaska carkancu phishka warankajina. <sup>11</sup> Jesustaj t'antasta okharispa Diosman graciasta korka. Chay tiyacushaj runasmantaj jaywaramorka. Ajinallataj challwitanpis ruwarka tucuy munaskancuta kospa.

<sup>12</sup> Runas sajsacojtingutaj yachacojcunaman Jesús nerka:

—Tucuy puchojta okhariychej ama usuchiska cananpaj, —nispa.

<sup>13</sup> Ajinatataj miqhuskancumanta puchojta okharerkancu chunca iscayniyoj canasta junt'ata. Chayka puchorka chay phishka cebada t'antasmanta. <sup>14</sup> Chay jatun ricuchinata ricuskancumantataj runas nisharkancu:

—Ciertopuni cay runaka cay pachaman Diosmanta jamunan carka chay willajmin, —nispa.

<sup>15</sup> Chay runas camachejnincupaj payta jap'iyya munarkancu. Chayraycu Jesuska paycunaj yuyaskancuta allinta yachaspa chay ashqha runata cacharpayaporka. Chaymanta payka sapallan orkoman riporka.

### *Jesús yacu patata purin*

<sup>16</sup> Ch'isiyajtinña yachacojcunan kochaman uraycamorkancu.

<sup>17</sup> Barcoman yaycuspataj kochanejta Capernaum llajtaman riyta kallaererkancu. Tutayaskaña carka Jesustaj manaraj paycunaman cutimorkachu. <sup>18</sup> Yacutaj sinch'i wayramanta mayta okharicusharka.

<sup>19</sup> Uj leguatajinaña barcowan riskancupi Jesusta ricorkancu yacu patata purishajta. Pay barcoman kayllaycamushajtintaj mancharicorkancu.

<sup>20</sup> Payrí paycunaman nerka:

—Noka cani. Amaña manchachicuychejchu, —nispa.

<sup>21</sup> Chayraycu paycuna mayta munarkancu Jesús barcoman yaycunanta. Barcotaj ujllata Capernaumman chayarka.

### *Runas miqhorkancu chayllapitaj Jesusta masc'ancu*

<sup>22</sup> Astawanrí chay ch'in pampapi waquenka chay ashqha runasmanta khepacorkancu. Ch'isiyayta uj barcolla chaypi

caskanta ricorkancu. Ricorkancutaj Jesusta barcoman mana yaycuskantapis, yachacojcunallan ripuskancutapis. Runaska tutapi khepacuspa, khepan p'unchay tutamanta quiquin lugarpi Jesusta masc'asharkancuraj. <sup>23</sup> Paycunaka Jesús runasman miqhuchiska, Diosman graciasta kospa, chaypi masc'asharkancu. Chaycamari Tiberias llajtamanta waj juch'uy barcos jamorkancu chaynejman. <sup>24</sup> Ajinallatataj Jesús manaña chaypichu caskanta ricuspa nitaj yachacojcunanpis, runaska chay juch'uy barcosman yaycorkancu. Capernaummantaj rerkancu Jesusta masc'aspá.

<sup>25</sup> Taripaspataj payta nerkanca:

—Yachachejný ¿mayc'ajtaj chayamorkanqui?

<sup>26</sup> Jesustaj paycunaman nerka:

—Chekatapuni niyquichej: Mana chay Diospa atiyninmanta ricutchinasta khawaskayquichejraycuchu masc'ashawanquichej. Manachayrí chay t'antata miqhuspa sajsacuskayquichejrayculla masc'ashawanquichej. <sup>27</sup> Ama tucucoj miqhunallapajka llanc'aychejchu. Astawanrí wiñay causayta koj miqhunata masc'aychej. Chay miqhunata noka, Diospa cachaska Runan, koskayquichej. Noka Dios Tataya ajllaskan caskayta chekata pay ricucherka, —nispa.

<sup>28</sup> Chaymanta payta nerkanca:

—¿Imatataj ruwanaycu tiyan Diospa munayninmanjina ruwanaycupajrí?

<sup>29</sup> Jesús paycunaman cuticherka:

—Diospa munayninta ruwanayquichejpajka paypa cachamuskanpi jap'icunayquichej tiyan, —nispa.

### *Janaj pachamanta t'anta*

<sup>30</sup> Paytataj nerkanca:

—Astawan jatun ricuchinata ruwanayqui tiyan, chayta ricuspa kanpi jap'icunaycupaj. Atiynyquita ricuchinawaycupaj ¿imatataj ruwashansquirí? <sup>31</sup> Ñaupa tatasninchej ch'in pampapi t'antatajina, maná sutiyota, miqhorkancu. Ajinatataj Diospa palabranpipis nin: Payka janaj pachamanta t'antata paycunaman korka”, —nispa.

<sup>32</sup> Chay niskancumanta Jesuska nerka:

—Chekatapuni niyquichej: Mana Moiseschu kancunaman chay janaj pachamanta t'antata kosorkachej, manachayrí Tatay. Cunantaj payka kosunquichej chekata uraycamoja, janaj pacha miqhunata. <sup>33</sup> Chay miqhunaka janaj pachamanta uraycamojmin runasmantaj causayta kon, —nispa.

<sup>34</sup> Chayraycu paycuna nerkanca:

—Señorný, chay miqhunata kollawaycupuni, —nispa.

<sup>35</sup> Jesusrí paycunaman nerka:

—Noka cani chay causayta koj miqhunaka. Nokaman jamojka ni jayc'aj yarkhachiconkachu. Nokapi jap'icojka nitaj jayc'ajpis ch'aquchiconkachu. <sup>36</sup> Nerkayquichejña: “Ricushawaspa kancunari mana nokapi jap'icuwanchiquejchu.” <sup>37</sup> Tataypa tucuy kowaskan runaka nokaman jamun. Nokaman jamojtarí ni jayc'aj khesachanichu.

<sup>38</sup> Janaj pachamantataj uraycamorkani mana munaynipta ruwanaypajchu, manachayrí cachamuwajniypa munayninta ruwanaypaj. <sup>39</sup> Cachamuwajniypa munaynenka, tucuy kowaskan

runasmanta ni uj chincapunan; manachayrí khepa p'unchaypi paycunata causarichimunay. <sup>40</sup> Tatay munan tucuy runa Wawan caskayta reparaspa nokapi jap'icunanta. Nokapi jap'icunanta munan wiñay causayniyoj cananpaj. Chaywanpis munan nokapi jap'icojta khepa p'unchaypi causarichimunayta,—nerka Jesús.

*Runas Jesusta mana entiendencucho*

<sup>41</sup> Israel runas Jesusmanta thutusharkancu, “Noka Diosmanta uraycamoj miqhuna cani” niskanmanta. <sup>42</sup> Nisharkancutaj:

—¿Cayka manachu José wawan Jesús? Nokanchej rejsinchej tatanta mamantapis. ¿Imaynatataj cunan nin, Diosmanta uraycamuskanta?

<sup>43</sup> Jesustaj paycunaman nerka:

—Amaña kancunapura thutuychejchu. <sup>44</sup> Ni pi nokaman jamuya atinchu sichus cachamuwajniy Tatay payta mana pusamunchu chayka. Nokaman jamojtari khepa p'unchaypi causarichimusaj. <sup>45</sup> Diospa unay willajcunarpa kelkaskasnincupipis nin: “Tucuy runasninta Dios yachachenka”. Chayraycu tucuy runa Dios Tatata sonkonwan uyarispa yachachiska caspataj nokaman jamun. <sup>46</sup> Mana ninichu, runa Dios Tatata ricuscantaka. Noka paymanta jamojlla Tataytaka ricorkani.

*Jesuska causayta koj miqhunamin*

<sup>47</sup> ‘Chekatapuni niyquichej: Nokapi jap'icojka wiñay causayniyojmin. <sup>48</sup> Noka cani chay causayta koj miqhuna. <sup>49</sup> Unay tatasniyquichej chay maná t'antata ch'in pampapi miqhorkancu. Chaywanpis wañuporkancu. <sup>50</sup> Nokarí Diosmanta uraycamoj miqhuna cani. [Manamin maná t'antajinachu cani.]<sup>\*</sup> Astawanpis nokamanta miqhojka mana wañuponkachu. <sup>51</sup> Noka cani chay wiñay causaj miqhuna Diosmanta jamoj. Ajinallataj wiñay causayniyoj canayquichejpaj nokamanta miqhunayquichej tiyan. Cay pacha runas wiñay causayniyoj canancupaj cuerpojta koni,—nerka Jesús.

<sup>52</sup> Israel curajcuna paycunapura phiñacuywan churanacusharkancu:

—¿Imaynatataj cay runaka cuerponsa koyta atinman miqhunanchejpajrí?

<sup>53</sup> Jesustaj paycunaman nerka:

—Chekatapuni niyquichej: Sichus nokamanta mana miqhunayquichejchu nitaj yawarniymantu ujyanquichejchu chayka, mana wiñay causayniyojchu canquichej. <sup>54</sup> Nokamanta miqhojka yawarniymantapis ujyajka wiñay causayniyojmin. Nokataj payta khepa p'unchaypi causarichimusaj. <sup>55</sup> Nokamanta miqhojka yawarniymantu ujyajpis cheka miqhunayoj cheka ujyanayojtaj canka. <sup>56</sup> Chay cheka miqhunayoj ujyanayoj runaka nokawan ujchaskamin. Causaynintaj nokamanta jamun sonkonpi tiyacuskayraycu. <sup>57</sup> Causayniyoj Dios Tata cachamuwarka nokataj Paynejta causani. Ajinallatataj nokamanta miqhojka nokaraycu causan. <sup>58</sup> Noka cani chay Diosmanta jamoj miqhuna. Ñaupa tatasniyquichej manáti miqhuspapis wañuporkancu. Mana chayjina miqhunachu cani. Astawanpis nokamanta miqhojka wiñaypaj causanka,—nerka Jesús.

<sup>59</sup> Capernaumpi tantacuna-wasipi yachachishaspa chayta nerka.

*Wiñay causaymanta niskas*

\* **6:50** Ninayan.

<sup>60</sup> Ashqhas khaticojcunamanta Jesuspa niskanta uyarispa nerkanca: —Chay niskanka manchay sinch'i jap'inapajka. ¿Pitaj chayta khatiyta atinman?

<sup>61</sup> Khaticojcunaj thutuskancuta Jesús sonkonpi reparaspa paycuman nerka:

—¿Cay niskaychu kancunata sinch'ita urmachisunquichej? <sup>62</sup> Noka, Diospa cachaska Runanta, ujtawan janaj pachaman wicherishajta ricuspa ¿imatataj yuyawajchej? <sup>63</sup> Diospa Espiritullan causayta kon, manamin runaka atiynijojchu chayta ruwananpajka. Cay palabras noka kancunaman niskayrí Santo Espiritumantamin. Chayraycu niskasniiy causayta kon. <sup>64</sup> Astawanrí waquin kancunamanta nokapi mana jap'icunquichejchu, —nispa.

Paypi mana jap'icojcunamanta payta jaywaycojmantapis Jesuska yacharkapuni. Chayraycu chayta nerka. <sup>65</sup> Chaywanpis nillarkataj:

—Chayraycu nerkyayquichej, ni pi nokaman jamuwayta atinchu sichus Dios Tata atiya mana konchu chayka, —nispa.

<sup>66</sup> Ajinaka chay khatejcunamanta ashqhas khepaman cutiporkancu manañaataj paywan purerkancudu. <sup>67</sup> Jesustaj chay chunca iscayniyoj yachacojcunanman nerka:

—¿Kancunapis ripullaytatajchu munanquichej?

<sup>68</sup> Simón Pedrori payman cuticherka:

—Señorníy ¿pimantaj riycuman? Kanpa niskayquimin wiñay causayta kojka. <sup>69</sup> Nokaycupis kanpi jap'icuycuña sumajtataj yachaycu kanka Diospa cheka† cachamuskan caskayquita, —nispa.

<sup>70</sup> Jesús payman nerka:

—Noka kancunata, chunca iscayniyojta ajllacorkayquichej. Kancunamantari ujka supay Satanaspá casojninmin, —nispa.

<sup>71</sup> Judas Iscariote Simonpa wawanmanta chayta nerka. Payka Jesusta jaywaycoj risharka. Judasri chunca iscayniyoj yachacojcunanmanta ujnin carka.

## 7

### *Jerusalenpi israelcunaj jatun p'unchaynincipi*

<sup>1</sup> Chay khepatataj Jesús Galilea jallp'anellapi purisharka yachachispá. Israel curajcuna payta wañuchinancupaj masc'asharkancu. Chayraycu Judea jallp'apeka puriyta mana munarkachu. <sup>2</sup> Astawanpis Jerusalenpi israelcunapaj jatun yuyaricuna p'unchaycuna kayllamusharka. [Unay ch'in pampapi ch'ujllaspi tiyacoj cancu. Chayta yuyaricunancupaj Jerusalenman rej cancu Diosta yupaychaj.]\* <sup>3</sup> Chayraycu Galileapi Jesuspa waukesninpis payman nerkanca:

—Yachachiskasniyquipes ruwaskayquita khawanancupaj rillaryña caymanta Judea jallp'aman. <sup>4</sup> Ni pipis pacayllata ruwanchu ricuchicuya munaspaka. Chayraycu caycunata ruwashaspaka tucuy runasman ricuchicuy, —nispa.

<sup>5</sup> Waukesninpis pay Diospa cachamuskan caskanta mana creerkan-cudu. <sup>6</sup> Jesustaj paycunaman nerka:

—Rinay p'unchayka manaraj chayamushanchu. Kancunapajrí p'unchayka waquichiskallapuni cashan. <sup>7</sup> Cay pacha runaska mana kancunata chejnisunquichejmanchu. Nokatarí chejniwancu

† <sup>6:69</sup> Literal: santo. \* <sup>7:2</sup> Ninayan.

ruwaskasnincu mana allin caskanta reparachiskayraycu. <sup>8</sup> Kancunalla riychej cay jatun p'unchaycunapajka. Nokaj ricuchicunay p'unchayka manaraj chayamushanchu. Chayraycu mana risajchu cay jatun p'unchaypi ricuchicojka,—nispa.

<sup>9</sup> Chayta niytawan payka Galilea jallp'allapi cacorka.

*Jesús pacayllamanta rin Jerusalenman*

<sup>10</sup> Waukesnin Jerusalenman jatun p'unchaypaj riskancutawancama chaymanta paypis rillarkataj. Mana ricuchicuspa pacayllata rerka. <sup>11</sup> Israel curajcunataj chay jatun p'unchaypi payta masc'asharkancu. Nisharkancutaj:

—¿Maypitaj chay runarí? —nispa.

<sup>12</sup> Jatun p'unchaypaj chay ashqha jamojcunataj Jesusmanta mayta chhichinacusharkancu. Ujcuna nisharkancu: “Payka c'acha runa”, nispa. Waquinrí nisharkancu: “Mana c'achachu. Runasta pantachejmin payka”, nispa.

<sup>13</sup> Israel curajcunata manchachicuskancuraycu ni pi Jesusmanta sut'ita parlajchu runaspa ñaupakencupeka.

<sup>14</sup> Chay jatun p'unchaycunamanta tawa p'unchayña carka. Jesuska yupaychana-wasiman rerka chaypitaj yachachiyta kallarerka. <sup>15</sup> Israel curajcunataj payta uyarispa t'ucorkancu nerkancautaj:

—Cay runaka Diospa palabranmanta ni jayc'aj nokaycuwan yachachiskachu carka. ¿Imaynapitaj cayjinata yachanrí?

<sup>16</sup> Chayraycu Jesuska chay ashqha runaspa ñaupakencupi nerka:

—Cay yachachinayka mana nokajtachu, manachayka cachamuwajniypatamin. <sup>17</sup> Pillapis Diospa munayninta ruwayta ajllajka cay yachachinamanta yachanka parlaskayka Diosmantachus chayrí nokallamantachus caskanta. <sup>18</sup> Payllamanta parlajka payllata jatunchacuya munan. Cachamojninpá jatunchayninta munajrí cheka yachachejmin. Nitaj paypi pantayka canchu.

<sup>19</sup> ‘Camachiskasta Moisés kosuskayquichejta yachanquichej. Astawanpis kancunamanta ni pi chay camachiskasta casunchu. Nokatapis wañuchiwaytaraj munashanquichej,—nerka Jesús.

<sup>20</sup> Chay ashqha runas jatun p'unchaypaj jamojcuna nerkanca:

—¡Locochu cawaj! ¿Pitaj wañuchisuya munanrí?

<sup>21</sup> Jesusri paycunaman nerka:

—Samacuna p'unchaypi uj runallata thañicherkani. Chaymanta tucuy manchariskas cashanquichej. <sup>22</sup> Diosman t'akaska caskanta ricuchinapaj khari wawata cuerponpi señalta ruwanayquichejta Moisés camachisorkachej. Chay circuncidayka mana Moisesllamantachu. Manachayka ñaupa tatasniyquichejmantapacha cashan. Samacuna p'unchay cashajtinpis pusaj p'unchayniyoj wawapaj chay juch'uy ruwayta ruwanquichejpuni. <sup>23</sup> Chayta ruwanquichej Moisespa camachiskasninta casunayquichejpaj. Chanta ¿imaraycutaj nokapaj phiñacunquichej samacuna p'unchaypi uj runata tucuy cuerponta onkoyninmanta thañichiskayraycu? <sup>24</sup> Amaña jawa imallataka khawaychejchu. Manachayrí cheka yuyaywan sumajta reparaychej,—nerka Jesús israel curajcunaman.

*Jesús Diosmanta jamuskanta ricuchin*

<sup>25</sup> Jerusalén llajtayojcunamanta waquinrí nisharkancu:

—¿Manachu wañuchinancupaj masc'asharkancu chay runa, cayka?  
 26 ¡Khaway, mana manchachicuspa tucuypa ñaupakencupi parlacushan! Nitaj payta imanancuchu. ¿Cunanri curaj camachejcunapis chekachá jamoj ajllaska Cristo caskanta rejsincuman? <sup>27</sup> Nokanchejpis yachanchej cay runaka maymantachus caskanta. Cristo jamojtenka ni pi yachankachu maymanta caskantapis, —nisharkancu.

<sup>28</sup> Yupaychana-wasi patiopi yachachispa tucuy uyarinancupajjina Jesús cayta nerka:

—¡Arí! Kancuna nokata rejsiwaspa maymantachus jamuskaytapis yachaskayquichejta yuyanquichej. Astawanrí mana nokallamantachu jamuni, manachayka cachamuwajniy Diosmanta. Payka chekamin. Kancunari mana payta rejsinquichejchu. <sup>29</sup> Nokarí payta rejsini paywan cusca caskayraycu. Paytaj nokata cachamuwarka, —nispa.

<sup>30</sup> Chayraycu payta jap'iycuya munasharkancu. Nitaj pipis payta imanarkachu manaraj wañunan horachu caskanraycu. <sup>31</sup> Jatun p'unchaypaj jamojcunamantataj ashqhas Jesuspi jap'icorkancu. Nisharkancutaj:

—¿Jamoj Cristoka cay runamanta aswan jatuchej ricuchinastachu ruwanman?

#### *Curajcuna Jesusta jap'iycunancupaj cachamuncu*

<sup>32</sup> Ashqha runas Jesusmanta chhichiskancuta fariseos uyarerkan. Chayraycu yupaychana-wasimanta curajcuna fariseospipan yanapajnincuta cachamorkancu payta jap'iycunancupaj. <sup>33</sup> Chayraycu Jesús paycunaman nerka:

—Pisi p'unchaycunatawanraj casaj kancunawan. Chaymanta ujtawan ripusaj cachamuwajniypaman. <sup>34</sup> Jamoj p'unchaycunapi masc'awanquichej manataj tariwanquichejchu. Noka cashani, chaymantaj kancuna mana atinquichejchu jamuya, —nispa.

<sup>35</sup> Israel curajcunataj paycunapura asicuspa ninacusharkancu:

—Cay runaka ¿maymantaj ripunman mana payta tarinanchejpaj? ¿Waj llajtayojcuna chaupipi tiyacoj israelcunamanchu rinman? Chayrí ¿chay waj llajtayojcunatachu yachachimunman? <sup>36</sup> ¿Imaynataj cay niskanri? “Jamoj p'unchaycunapi masc'awanquichej manataj tariwanquichejchu”. ¿Chaywanpis? “Noka cashani, chaymantaj kancuna mana atinquichejchu jamuya”. —nerkancu israel curajcuna.

#### *Wiñay causayta koj yacu*

<sup>37</sup> Tucuy chay jatun p'unchaycunamanta khepa caj p'unchayka aswan sumaj carka. Chay p'unchaypitaj Jesuska tucuypa ñaupakencupi sayaricuspa nerka:

—Ch'aquichicoj runajina wiñay causayta munajka nokaman jamuchun wiñay causayta jap'inanpaj. <sup>38</sup> Dios palabranpis nin: “[Nokapi jap'icojka c'acha yanapayniywan sajsaskamin. Paymantaka chay c'acha yanapaynintaj jatun mayusjina llojsenka paynejta waj runasmanpis wiñay causayta jap'inancupaj]”, † —nerka Jesús.

<sup>39</sup> Chaytarí nerka Santo Espiritumanta. Dios paypi jap'icojcunaman Espirituta cachamunan carka. Yachacojcunaman Santo Espíritoj jatun atiynenka manaraj koskachu carka, Jesús atiyninwan manaraj jatunchaska caskanraycu.

#### *Runas Jesusmanta yuyancu*

† 7:38 Ninayan.

<sup>40</sup> Ashqha runas Jesuspa niskanta uyarejcunamanta waquin nisharkancu:

—Chekatapuni cayka Diosmanta jamoj willaj, —nispa.

<sup>41</sup> Waquintaj nisharkancu:

—Diospa ajllaskan Cristo payka, —nispa.

Ujcunarí nisharkancu:

—Cristoka mana Galileamantaka jamunmanchu. Chayraycu mana Cristochu payka. <sup>42</sup> Dios palabranpipis cayta nin: “Davidpa mirayn-inmanta jamunan tiyan”. Davidpa llajtan Belenpitaj nacecunan tiyan Cristoka, —nisharkancu.

<sup>43</sup> Chay jawataj churanacuy jatarerka Jesusmanta chay ashqha runas chaupipi. <sup>44</sup> Waquin paycunamanta Jesusta jap'iycuya munasharkancu. Astawanpis ni pi payta imanarkachu.

### *Curajcunaj yanapajnincu cutimuncu*

<sup>45</sup> Chay cachaska yanapajcunari yupaychana-wasimanta curajcuman fariseocunamanpis cutimuspa mana Jesusta pusamuspalla cutimorkancu. Chayraycu chay curajcuna paycunaman nerkan:

—¿Imaraycutaj payta mana pusamunquichejchu?

<sup>46</sup> Yanapajcunataj paycunaman cuticherkan:

—Ni pipis ni jayc'ajpis parlarkachu chay runajinaka, —nispa.

<sup>47</sup> Fariseocunataj phiñacuywan paycunaman nerkan:

—¿Kancunapis paywan engañachicunquichejchu? <sup>48</sup> Ni pi curajcunamanta nitaj fariseocunamantapis paypi jap'icunchu. <sup>49</sup> ¡Chay ashqha campo runasrí camachiskasta mana yachaspa Diosmanta juchachaskas cachuncu! —nerkan.

<sup>50</sup> Nicodemopis paycunamanta carka. Payka ñaupajpi Jesusman jamoj carka. Payri paycunata reparachinanpaj nerka:

<sup>51</sup> —¿Camachiskasrinchejmanjina uj runata juchachayta aticunmanchu manaraj payta uyarishaspa nitaj ruwaskanta sumajta yachashaspapis?

<sup>52</sup> Paycunataj phiñacuywan cuticherkan:

—¿Kanka Galilea jallp'amantachu canquirí? Riy, sumajta librospi masc'amuy. Galileamanta Diosmanta willajnin mana canchu, —nispa.

<sup>53</sup> Sapa ujtaj wasinman riporka.

## 8

### *Khencha warmita Jesusman pusancu*

<sup>1</sup> Jesusrí Olivos niska orkoman riporka. <sup>2</sup> Ujtawan tutamanta yupaychana-wasi patioman yaycorka. Tucuy runastaj payman jamorkancu. Paytaj tiyaycuspa paycunata yachachisharka.

<sup>3</sup> Chaymanta israel yachachejcuna fariseocunawan Jesusman pusamorkancu juchapi jap'iska uj khencha warmita. Chay warmita tucuypa ñaupakencupi sayaycuchispataj <sup>4</sup>Jesusman nerkan:

—Yachachej ¡khaway! Cay warmeka quiquin khenchachacuypi jap'iska carka. <sup>5</sup> Ajinata ruwajcunaka rumiwan ch'ankaskas wañunancuta, Moiseska camachiwarkanchej. Kanrí ¿imatataj ninqui?

<sup>6</sup> Chayta taporkancu Jesusta pantachiyta munaspa payta juchachanancupaj. Jesusrí pampaman c'umuycuspa maquinwan jallp'api kelkayta kallarerka. <sup>7</sup> Paycuna tapojtillancupunirí Jesuska chekanyaricuspa nerka:

—Kancunamanta mana juchayoj caj payta ch'ankayta kallarichun,—nispa.

<sup>8</sup> Ujtawan pampaman c'umuycuspa kelkallarkataj. <sup>9</sup> Pusamojcunataj chay niskanta uyarispa ujmanta ujmanta llojsiraporkancu curaj cajcunamanta kallarispa. Jesusta sapallanta sakerkancu, warmitaj runaspa ñaupakencupi sayashallarkaraj. <sup>10</sup> Jesusri chekanyaricuspa warmita nerka:

—¿Maytaj chay runasrí? ¿Manachu ni pipis juchachasunqui?

<sup>11</sup> Paytaj nerka:

—Señorníy, ni pipis,—nispa.

Jesusri payta nerka:

—Ni nokapis kanta juchachaskayquichu. Ripuy, amañataj cunamanta juchallicuychu,—nispa.

### *Wiñay causayta koj c'anchay*

<sup>12</sup> Jesús ujtawan ashqha runasta yachachisharka. Nerkataj:

—Noka cani cay pacha runaspa c'anchaynincu. Nokapi jap'icojka manaña jucha lakhapi purenkachu. Manachayrí wiñay causayta koj c'anchay sonkonpi tiyaconka,—nispa.

<sup>13</sup> Fariseosri payta nerkanca:

—Kanka, kan quiquipuimanta willacushanqui. Chayraycu willacuskayqueka mana jap'inapajjinachu,—nispa.

<sup>14</sup> Jesustaj paycunaman cuticherka:

—Arí, noka quiquipuimanta willani. Cay willaskayrí chekamin cashan maymantachus jamuskayta maymanchus ripushaskaytapis yachaskayraycu. Kancunari mana yachanquichejchu maymantachus jamuskayta maymanchus ripushaskaytapis. <sup>15</sup> Kancunaka cay pacha yuyaymanjinalla chay willaskay chekachus manachus caskanta ninquichej. Nokari ni pita juchachashanichu. <sup>16</sup> Sitajchus noka juchachani chayka, juchamanta niskayka chekamin. Cachamuwajniy Tatay nokawan cusca, manataj sapallaychu. Chayraycu willaskayka chekamin. <sup>17</sup> Chaywanpis Moisespa camachiskasnipi kancunapaj kelkaska cashan: “Iscay runas quiquinta willatillancu chay willaskaka cheka”. <sup>18</sup> Noka cani nokamanta willaj, cachamuwajniy Tataypis nokamanta willan,—nerka Jesús.

<sup>19</sup> Chayraycu taporkancu asicunancupaj:

—¿Maypitaj tatayquirí?

Jesusri cuticherka:

—Mana nokata rejsiwanquichejchu nitaj Tataytapis. Sichus nokata rejsiwanquichejman chayka, Tataytapis rejsiwanquichej carka,—nispa.

<sup>20</sup> Tucuypa ñaupakencupi Jesús chay imasta parlasharka kolke churana chaypi, yupaychana-wasi patiopi yachachishaspa. Nitaj pipis payta jap'iycorkachu wañunan hora manaraj chayamuskanraycu.

<sup>21</sup> Ujtawan paycunaman nillarkataj:

—Noka ripusaj. Chaymantataj kancunaka masc'awanquichej. Juchayquichejpitaj wañunquichej. Noka ripushani, chaymantaj kancuna mana jamuya atinquichejchu,—nispa.

<sup>22</sup> Israel curajcunari asicunancupaj nerkanca:

—¿Cunari pay quiquinchu wañuchiconka, “Noka ripushani, chaymantaj kancuna mana jamuya atinquichejchu”, ninanpaj?

<sup>23</sup> Paycunamantaj nerka:

—Kancuna cay pachamanta canquichej. Nokataj janaj pachamanta cani. Kancuna cay pacha runaslla canquichej. Nokari sapallay mana cay pachamantachu cani. <sup>24</sup> Nerkayquichej, juchasniyquichejpi wañunayquichejta. [Noka Diosmanta jamuni runasta juchamanta cacharichinaypaj.]<sup>\*</sup> Chayraycu manachus nokapi jap'icuwanquichej chayka, juchasniyquichejpi wañunquichej, —nerka Jesús.

<sup>25</sup> Israel curajcunataj taporkancu:

—¿Kan pitaj canquirí?

Jesusri paycunaman cuticherka:

—Nishayquichej, ajinamin noka cani. <sup>26</sup> Kancunamanta ashqhatara-jmin parlanay tiyan, juchamanta reparachinaypis tiyan. Astawanpis cachamuwajniyka chekapunimin. Nokataj paymanta uyariskallayta cay pacha runasman willashani, —nispa.

<sup>27</sup> Paycunaka mana entienderkancchu Dios Tatamanta parlaskanta.

<sup>28</sup> Chayraycu Jesús paycunaman nerka:

—Noka, Diospa cachaska Runanta, wañupaj okharinquichej. Chaypacha nokamanta yachanquichej. “Nishayquichej, ajinamin noka cani”, nisuskayta yachanquichej. Ni imatapis nokallamanta ruwanichu. Astawanrí Tatay yachachiwaskanmanjina chay imasllata parlani. <sup>29</sup> Cachamuwajniyapa munaynintapuni ruwani. Chayraycu payka nokawan cuspunimin. Manataj sapallaytachu sakewan, —nispa.

<sup>30</sup> Chay imasta parlaskanmanta ashqha paypi jap'icorkancu.

### *Cheka cajka juchamanta cacharichin*

<sup>31</sup> Paypi jap'icoj israelcunaman Jesús nerka:

—Nokaj niskayta casuspalla kancunaka cheka yachacojcunay canquichej. <sup>32</sup> Cheka cajta yachanquichejtaj chay cheka cajri cacharichisonkachej, —nispa.

<sup>33</sup> Mana creejcunari cuticherkan:

—Nokaycoka Abrahampa miraynin caycu. Nitaj jayc'ajpis pe-jpa camachinpischu carkaycu. Chanta kan ¿imaynatataj nishanqui: “Cachariskas canquichej”, nisparí?

<sup>34</sup> Jesusri paycunaman cuticherka:

—Chekatapuni niyquichej: Juchata ruwajka juchaj camachin cashan.

<sup>35</sup> Camachecha mana wiñaypajchu camachejinipa wasinpeka khepacun. Manachayrí wawallan wiñaypajka tiyacun. <sup>36</sup> Chayraycu sichus Diospa Wawan juchamanta cacharichisunquichejman chayka, wiñaypaj cachariskas canquichej. <sup>37</sup> Arí, yachani Abrahampa miraynin caskayquichejta. Niskaytarí sonkoyquichejpi mana jap'inquichejchu. Chayraycu wañuchinawayquichejpaj masc'ashanquichej. <sup>38</sup> Nokaka Tataywan cusca caspa, ricuskayta parlashani. Kancunari tatayquichejmanta uyariskallayquichejta ruwashanquichej, —nerka Jesús.

### *“Abraham tataycoka”, nerkan*

<sup>39</sup> Paycunataj cuticherkan:

—Abrahammin tataycoka, —nispa.

Jesustaj paycunaman nerka:

---

\* **8:24** Ninayan.

—Sichus Abrahampa wawasnin cawajchej chayka, Abrahamjina ruwawajchej.<sup>40</sup> Astawanpis cunanka wañuchiwayta munanquichej kancunaman cheka cajta parlajtiy. Abrahamka mana chayta ruwarkachu. Nokarí Dios Tataymanta chay cheka cajta uyarispa cheka cajta parlani.<sup>41</sup> Kancunaka tatayquichejpa ruwanasninta ruwanquichej, —nerka Jesús.

**Paycunataj mayta cuticherkan:**

—Ujlla tataycoka, paytaj Dios. Nokaycoka mana khenchachacuymantachu nacerkaycu, —nispa.

**<sup>42</sup> Jesustaj paycunaman nerka:**

—Dioschus tatayquichej canman chayka, munacuwanquichejman carka, noka Diosmanta llojsimuspa caypi cashaskayraycu. Nokaka mana munayniymanjinachu jamorkani. Manachayrí pay cachamuwarka.<sup>43</sup> Kancuna niskanta mana jap'inquichejchu simi parlaskayta mana rejsiskayquichejraycu. Chayraycu niskayta uyariyta mana atinquichejchu.<sup>44</sup> Kancunaka tatayquichej supay Satanasmanta canquichej. Tatayquichejpa munayninta ruwaytatay ajllanquichej. Payka kallariymantapacha runa wañuchi carka. Cheka cajtapis ni jayc'aj munarkachu. Manachayrí paypeka llullacuylamin. Tucuy llulla cayka paymanta jamun. Chayraycutaj llullata parlaspaka payllamanta parlan.<sup>45</sup> Noka kancunaman cheka cajta nejtiyri mana creewanquichejchu.<sup>46</sup> Kancunamanta ¿pitaj juchayoj caskayta ricuchiyta atinman? Cheka cajta niyquichej chayka ¿imaraycutaj mana creewanquichejchurí?<sup>47</sup> Diosmanta cajka paypa niskanta uyarin. Kancunari mana Diosmantachu canquichej. Chayraycu niskanta mana uyarinquichejchu, —nerka Jesús.

### *Jesuska carkapuni*

**<sup>48</sup> Israel curajcuna payman cuticherkan:**

—Nokaycu chekata niycu, kanka chejniska samaritano supayniyojtaj caskayquita, —nispa.

**<sup>49</sup> Jesustaj nerka:**

—Nokaka mana supayniyojchu cani. Manachayrí Tatayta jatunchani. Kancunari mana jatunchawanquichejchu.<sup>50</sup> Nokaka mana jatunchacuyniyllatachu munani. Tataymin jatunchawaytaka munan. Paypa nokamanta parlaskantaj chekamin.<sup>51</sup> Chekatapuni niyquichej: Niskayta casojka ni jayc'aj wiñaypaj wañonkachu, —nerka Jesús.

**<sup>52</sup> Israel curajcunari nerkan:**

—Cunan yachaycu supayniyoj caskayquita. Abraham wañuporka, Diospa unay willajcunapis. Kanri ninqui: “Niskayta casojka ni jayc'aj wiñaypaj wañonkachu”, nispa.<sup>53</sup> ¿Unay tatanchej Abrahammanta kanka aswan curajchu canqui? Payka unayña wañuporka. Unay willajcunapis wañuporkanu. Kanri ¿pi caskayquitataj yuyanquirí?

**<sup>54</sup> Jesustaj cuticherka:**

—Nokalla jatunchacuyman chayka, jatunchacuskayka mana imachu canman. Jatunchawajniyka Tataymin. Kancunataj paymanta ninquichej, “Payka Diosninchej”, nispa.<sup>55</sup> Astawanpis payta mana rejsinkuichejchu. Nokarí payta rejsini. Sichus niyman payta mana rejsiskayta chayka, kancunajina llulla cayman. Nokarí paywan cusca caspa rejsini niskantapis casunipunitaj.<sup>56</sup> Tatayquichej Abrahamka Diospa sumaj

niskanmanta cusicorka. Niskanta junt'askantapis ricorka. Chaywanpis jamushaskayta ricuspa cusicorka,—nerka Jesús.

<sup>57</sup> Chayraycu israel curajcuna payman nerkanca:

—Kanka ni phishka chunca watayojpis canquirajchu. ¿Imaynatataj Abrahamta ricorkanquirí?

<sup>58</sup> Jesusri paycunaman nerka:

—Chekatapuni niyquichej: Manaraj Abraham nacecushajtin nokaka carkanipuniña,—nispa.

<sup>59</sup> Chayraycu israel curajcuna rumista okharicorkancu payta ch'ankaycunancupaj. Jesusri pacaycucorka yupaychana-wasimantataj llojsiporka.

## 9

*Nacecuyninmantapacha uj ciego runata Jesús thañichin*

<sup>1</sup> Jerusalenpi purishaspa Jesús uj ciego runata ricorka. Chay runaka nacecuyninmantapacha ciego carka. <sup>2</sup> Yachacojcunantaj Jesusta taporkancu:

—Yachachejný ¿pitaj juchallicorka ajina ciego nacecunanpajrí? ¿Paychu chayrí tatasninchu?

<sup>3</sup> Jesustaj nerka:

—Cayka mana juchanraycuchu nitaj tatasninka juchanraycupischu. Manachayrí paypi Diospa ruwaskasnín ricuchiska cananpaj ciego nacecorka. <sup>4</sup> Cachamuwjaniipa ruwanasninta ruwananchej tiyan p'unchay cashajtin. Tutaña cajtenka ni pi llanc'ayta atinchu. <sup>5</sup> Caypi cashanaycamaka cay pacha runaspa 'anchaynincu cani,—nispa.

<sup>6</sup> Chayta nispataj pampaman thokarka. Thokayninvantaj t'uruta ruwaspa chaywan ciegoj ñawisninta jawiyorka. <sup>7</sup> Paytataj nerka:

—Riy, Siloé estanquepi mayllacamuy,—nispa. Cay estanquej sutin, Siloé, niyta munan, cachamuska.

Chay ciegotaj rispa mayllacamorka. Chaymantataj ricorka.

<sup>8</sup> Chayraycutaj llajta-masisnin, ñaupajta mañacojpaj rejsejcupanpis nisharkancu:

—Cay runaka mañacunapaj tiyacushaj. ¿Paychu cay canman?

<sup>9</sup> Ujcunari nisharkancu:

—Arí, paypuni,—nispa.

Waquitaj nisharkancu:

—Maná paychu. Payman rijch'acun,—nispa.

Thañiskarí nisharkaca:

—Noka cani,—nispa.

<sup>10</sup> Chayraycu payta taporkancu:

—¿Imaynapitaj ñawisniyqui quicharicorkari?

<sup>11</sup> Paytaj cuticherka:

—Chay Jesús sutijoj runa t'uruta ruwaspa ñawisniyman jawiyocuwaspataj niwarka: “Riy, Siloé estanquepi mayllacamuy”, nispa. Nokari rerkani mayllacamoj. Chaymantataj ricuni,—nispa.

<sup>12</sup> Paytataj taporkancu:

—¿Maypitaj chay runa?

Payri nerka:

—Maná yachanichu,—nispa.

*Fariseosman thañiska runata pusancu*

<sup>13</sup> Ñaupajpi ciego carka, chay runata fariseospa ñaupakencuman pusarkancu. <sup>14</sup> Jesú斯 t'uruta ruwaspa ñawisninta jawiycuskan quichariskanpis, samacuna p'unchaypi carka. <sup>15</sup> Cunari chay fariseos ujtawan chay runata taporkancu:

—¿Imaynatataj ricorkanqui?

Paycunamantaj nerka:

—T'uruwan ñawisniyta jawiycuwarka. Nokari maylacorkani ricuntaj, —nispa.

<sup>16</sup> Chayraycu fariseos Jesusmanta nisharkancu:

—Chay runaka samacuna p'unchayta mana wakaychanchu. Chayraycu mana Diosmantachu, —nispa.

Ujcunataj nisharkancu:

—Uj juchasapa runaka mana ruwayta atinmanchu chayjina jatun ricuchinataka, —nispa.

Paycuna uqhpui churanacuy carka chay jawa. <sup>17</sup> Ciego carka, chay runatataj ujtawan taporkancu:

—Kanri, ñawisniyquita quicharejmanta ¿imata ninquitaj?

Payri nerka:

—Diosmanta willajninmin, —nispa.

<sup>18</sup> Israel curajcunari chay runamanta mana creeyta munarkancuchu pay ñaupajta ciego caskanta cunan ricuskantapis. Chayraycu tatanta mantawan wajyamorkancu tapunancupaj. <sup>19</sup> Paycunatataj taporkancu.

—¿Payka wawayquichejchu? ¿Ciegochu nacecorka? Cunari ¿imaynapi-taj ricun?

<sup>20</sup> Tatan mamanri cuticherkan:

—Arí, payka wawaycu ciego nacecuskantapis yachaycu. <sup>21</sup> Cunari imaynapichus ñawisnin quicharicuskanta chayrí pichus ñawisninta thañichiskantapis, mana yachaycuchu. Payta tapuychej. Payka runaña. Atin paymanta parlayta, —nispa.

<sup>22</sup> Tatan maman chayta nerkanca israel curajcunata manchachicuskancuraycu. Chay curajcuna tantacuynincipi cayta yuyaychacuskancu: “Pillapis Jesuska Diospa cachamuskan Cristo caskanta willacoja tantacuna-wasimanta wijch'uska canka”, nispa. <sup>23</sup> Chayraycu tatan maman nerkanca: “Payta tapuychej. Runaña payka”, nispa.

### *Ciego carka chay runata c'amincu*

<sup>24</sup> Ciego carka chay runata watejmanta wajyaspa payta nerkanca:

—Diosta jatunchanayquipajjina chekata parlay. Nokaycoka chekata yachaycu chay runaka juchasapa caskanta, —nispa.

<sup>25</sup> Payri cuticherka:

—Juchasapachus manachus juchasapa, mana yachanichu. Ciego carkani, cunantaj ricushani. Chayllata yachani, —nispa.

<sup>26</sup> Paycunataj taporkancu:

—¿Imatataj ruwasorka? ¿Imaynatataj ñawisniyquita thañichisorka?

<sup>27</sup> Paytaj cuticherka:

—Nerkayquichejñaka ¿manachu uyariwarkanquichej? ¿Imapaj ujtawan uyariyta munanquichejri? ¿Kancunapis yachacojcunanchu cayta munanquichej?

<sup>28</sup> Mayta phiñacuspataj payta c'amiycorkancu:

—¡Kanchá chay runaj yachacojin caway! ¡Nokaycoka Moisespa yacha-cojungan caycu! <sup>29</sup> ¡Nokaycoka yachaycu Dios Moisesman parlaskanta! ¡Chay runari maymantachus mana yachaycuchu! —nispa.

<sup>30</sup> Paytaj cuticherka:

—¡Cayka uj t'ucunapaj, maymanta caskanta mana yachaskayquichej ñawisniya quichariwaskantapis! <sup>31</sup> Yachanchej Dioska mana uyariskanta juchasapastaka. Manachayrí payta yupaychajta munayninta ruwajtataj Dioska uyarin. <sup>32</sup> Ni jayc'aj uyaricorkachu nacecuyninmantapacha ciegoj ñawisninta pipis quichariskanka. <sup>33</sup> Manachus cay runa Diosmanta jamunman chayka, ni imata ruwayta atinmanchu, —nispa.

<sup>34</sup> Paycunataj cuticherkanca:

—Chekapuni kanka juchapi naceska runa canqui. ¿Chaychu cunanka nokaycuta yachachiwaycuman?

Chaymantataj payta wijch'orkancu.

*Thañiska runa Jesuspi jap'icun*

<sup>35</sup> Jesusri uyererka payta wijch'uskancuta. Payta taripaspataj nerka:

—Kan ¿Diospa Wawanpi jap'icunquichu?

<sup>36</sup> Thañiska runataj nerka:

—Señorníy, willaway pichus caskanta paypi jap'icunaypaj, —nispa.

<sup>37</sup> Jesusri payman nerka:

—Payta ricorkanquiña. Kanman parlashayqui, chay noka cani, —nispa.

<sup>38</sup> Runari nerka:

—Señorníy, kanpi jap'icuni, —nispa.

Konkoricuspataj Jesusta yupaycharka. <sup>39</sup> Jesusri nerka:

—Cay pachaman jamorkani runaspa yuyaynincuta reparachinaypaj. Ajinapi mana ricojcuna riconkancu. Ricojcuna caskancuta yuyajcunari ciegos caskancuta ricuchisaj, —nispa.

<sup>40</sup> Paywan caspa waquin fariseosmanta uyarejcuna chay jawa nerkanca:

—Cunan ¿nokaycupis ciegos caskaycutachu yuyanqui?

<sup>41</sup> Jesustaj nerka:

—Juchamantachus ciego cawajchej chayka, mana juchayojochu cawajchej. Cunanrí juchamanta yachaskayquichejta, ninquichej. [Chayraycu nokapi jap'icuya mana munanquichejchu wiñay causayta ricunayquichejpaj.]<sup>\*</sup> Cunapis juchallapipuni cacushanquichej ciegojina, —nerka Jesús.

## 10

*Ovejasmana quiquinchana*

<sup>1</sup> Jesús nillarkataj:

—Chekatapuni niyquichej: Oveja canchaman mana puncunejta yaycojka, astawanpis pacacuspa wajnejta yaycun chayka suwamin wañuchejtaj. <sup>2</sup> Puncunejta yaycojrí ovejaspa michejnínmin. <sup>3</sup> Canchata khawajka michejpaj puncuta quicharipun. Ovejasnintaj payta uyarincu. Paypa ovejasnintataj sutincumanta wajyaspa canchamanta pusán. <sup>4</sup> Ovejasninta canchamanta pusaspataj ñaupakencuta rin. Ovejasnintaj payta khatincu wajyaskanta rejsiskancuraycu. <sup>5</sup> Waj runa

\* **9:41** Ninayan.

mana michejnincuchus jamunman chayka, paytaka mana khatincuchu. Astawanpis paymanta aykecuncu wajcunaj wajyaskancuta mana rejsiskancuraycu, —nerka Jesús.

<sup>6</sup> Chay quiquinchanata Jesús runasman nisharka. Paycunari mana entienderkancuchu paypa parlaskanta.

### *Jesuska c'acha michejmin*

<sup>7</sup> Quiquinchanata sut'inchananpaj Jesús nerka:

—Chekatapuni niyquichej: Noka cani ovejaspa puncuncu. <sup>8</sup> Tucuy nokamanta ñaupajta jamojcunaka suwas cancu wañuchejcunataj. Ovejasniyri paycunata mana uyarerkancuchu khatinancupaj. <sup>9</sup> Noka cani cheka puncoka. Diosta rejsinanpaj nokanejta yaycojka allinpi purenka. Yaucuspa llojsispa wiñay causayta koj miqhunatataj tarenka.

<sup>10</sup> Suwaka runata pantachinallanpaj Diosmanta t'akananpaj, tucuchinanpajtaj jamun. Nokaka jamorkani wiñay causayta ovejasniyman konapaj. Mana mich'acuspataj causayta kosaj. <sup>11</sup> Noka cani chay c'acha michejka. C'acha michej caspataj causayniyta churani ovejasniy wiñay causayniyoj canancupaj. <sup>12</sup> Minc'askalla michejka mana paypatachu ovejaska, atoja jamushajta ricuspa ovejasta sakerpan aykecuntaj. Atojtaj ovejasta jap'iran t'akarachintaj. <sup>13</sup> Chay runaka kolkeraycu minc'askalla, mana ovejasta munacuskancutaj aykecun.

### *Jesuspi jap'icojcuna ovejasnin cancu*

<sup>14</sup> Noka cani chay c'acha michejka. Sumajta rejsini ovejasniyta. Paycunataj nokata sumajta rejsiwancu. <sup>15</sup> Imaynatachus nokata Tatay rejsiwancu nokapis Tatayta rejsini, ajinallatataj ovejasniyta rejsini. Causayniytataj koni ovejasniy wiñay causayniyoj canancupaj. <sup>16</sup> Waj ovejasniyjis capuwan mana cay tropamantachu. Paycunata pusamunay tiyan. Paycunapis wajyaskayta uyarenkancu jamunancupaj. Ajinapi uj tropalla uj michejllataj canka.

<sup>17</sup> Nokaka causayniyta wañunaypaj churani. Ujtawantaj causarimusaj ovejasniyta michinaypaj. Chayraycu Tatayka munacuwan. <sup>18</sup> Causayniytiari ni pi khechuwanchu. Manachayrì munaynillaymanta causayniyta churacuni. Atiyniyojtaj cani causayniyta churanaypaj ujtawan jap'icapanaypajpis, Tataypa niskanmanjinamin, —nerka Jesús.

<sup>19</sup> Chayta parlaskanmantataj israel curajcuna uqhupi ujtawan churanacuy jatarerka. <sup>20</sup> Ashqhas paycunamanta nisharkancu:

—¡Supayniyoj payka manataj yuyaymipichu! ¡imapaj uyarinquichej?

<sup>21</sup> Waquintaj nisharkancu:

—Cayjina parlaycunaka mana supayniyoj runajtachu. Nitaj supayniyojka ciegospa ñawisninta thañichiyya atinmanchu, —nispa.

### *Jesús Tatanwan uylla*

<sup>22</sup> Jerusalenpi jatun p'unchaycuna carka yupaychana-wasita ruwaskancumanta yuyaricunancupaj. Para tiempotaj carka. <sup>23</sup> Ajinapi Jesús purisharka chay yupaychana-wasimanta Salomón sutiyoj corredorpi. <sup>24</sup> Israel curajcuna payta muyucuspa nerkanca:

—¿Jayc'ajcamataj suyanaycu tiyan kanmanta yachanaycupaj? Diospa ajllaskan Cristo canqui chayka, sut'ita willawaycu, —nispa.

<sup>25</sup> Jesustaj cuticherka:

—Willarkayquichejña manataj creenquichejchu. Nokaka Tataypa sutinpi sumaj ruwanasta ruwashani. Chay ruwanas sut'ita willashancu

nokamanta. <sup>26</sup> Astawanpis kancunaka mana creenquichejchu mana ovejasniymana caskayquichejraycu. <sup>27</sup> Ovejasniyka wajyaskayta uyarincu. Nokataj paycunata sumajta rejsini. Paycunapis nokata casuspa khatiwancu. <sup>28</sup> Wiñay causayta paycunaman koni. Nitaj jayc'ajpis wiñaypaj chincaponkancuchu. Maquiymantapis ni pi ovejasniyta khechuwankachu. <sup>29</sup> Tatay ovejasniyta kowajka tucuymanta aswan atiyniyojmin. Chayraycu Tataypa maquinmanta ni pi paycunata khechuya atinchu. <sup>30</sup> Nokawan Tataywanka ujlla caycu,—nerka Jesús.

*Jesuska willan Diospa Wawan caskanta*

<sup>31</sup> Israel curajcunaka ujtawan rumista okharicullarkancutaj Jesusta ch'ankaycunancupaj. <sup>32</sup> Chayraycu Jesús paycunata nerka:

—Tataymanta caj ashqha c'acha ruwaskasta ricucherkyquichej. ¿Chaycunamanta maykenraycutaj ch'ankaycuwayta munashanquichejrí?

<sup>33</sup> Chay israel curajcunataj payman cuticherkanca:

—Mana ni mayken c'acha ruwaskayquimantachu kanta ch'ankaycu, manachayrí Diosta phiñachiskayquimanta. Kan, runalla Diosman ruwacupusa Diosta phiñachinqui,—nispa.

<sup>34</sup> Jesustaj paycunaman nerka:

—Kancuna yachanquichej, Dios kosorkachej, chay camachiskaspeka caymin kelkaska cashan: “Dios nerka, dioscuna caskayquichejta”.

<sup>35</sup> Diospa palabranta ni pi ni jayc'aj tucuchiya atinchu. Yachanquichejtaj Dios ajllaska runasman niskanta apachimuspa paycunata dioscunata sutichaskanta. <sup>36</sup> Nokatarí Dios Tata ajllawarka cachamuwarkataj cay pacha runasta juchancumanta cacharichinaypaj. Cunari ¿atiwajchejchu “Diosta phiñachinqui”, niwayta? <sup>37</sup> Sichus mana Tataypa ruwanasnintachu ruwani chayka, ama creewaychejchu, ari. <sup>38</sup> Tataypa ruwanasninta ruwani chayka, ruwanasnitya creeychej, amapis nokata creewaychejchu. Chaywan yachanquichej reparanayquichejpaj noka Tataywan ujlla caskaya, Tataytaj nokawan ujlla caskanta cayniycupi,—nerka Jesús.

<sup>39</sup> Chayraycutaj ujtawan payta jap'iycuya munasharkantu. Payrí maquisnincumanta aykecaporka.

*Jesús ripun Jordán mayu chimpaman*

<sup>40</sup> Jesusri ujtawan Jordán mayu chimpaman riporka. Juan ñaupajpi bautizasharka chaypitaj tiyacamorka. <sup>41</sup> Ashqha runastaj payman jamorkantu. Ninacusharkancutaj:

—Juanka ni uj ricuchinata ruwarkachu. Cay runamantarí Juanpa tucuy ima niskanka chekamin,—nispa.

<sup>42</sup> Chaypi Jesús cashajtintaj ashqha runas paypi jap'icorkantu.

## 11

*Lázaro sutiyoy runa onkoska*

<sup>1</sup> Chaymantaka Lázaro sutiyoy onkoska casharka Betania llajtapi. Chay llajtaka Maríaj llajtan carka ñañan Martajtawans. <sup>2</sup> Chay Mariaka k'apaj aceitejinawan Señorninchejpa chaquisninta jawiska chujchasniwantaj pichaska. Chay onkoska Lazaroka paypa hermanon carka.

<sup>3</sup> Chayraycu hermanasnín Señor Jesusman willajta cacharkantu:

—¡Khaway, munacuskayqueka onkoska cashan! —nispa.

<sup>4</sup> Jesusri chayta uyarispa nerka:

—Cay onkoyka mana wañuyajchu. Manachayrí Dios jatun atiyninta ricuchinallanpajmin. Cay onkoynejtataj noka, Diospa Wawan, jatunchaska casaj, —nispa.

<sup>5</sup> Jesusri munacorka Martata, ñañan Mariata, Lazarotawan. <sup>6</sup> Onkoska caskanta uyarispapis chaypi iscay p'unchaycunatawan kheparicorka.

<sup>7</sup> Chaymantataj yachacojcunanman nerka:

—Jacu ripunachej ujtawan Judea jallp'aman, —nispa.

<sup>8</sup> Yachacojcunantaj payman nerkanca:

—Yachachejný, cunallan curajcunaka ch'ankaycusuya munasharkancoka. ¿Ujtwanchu chayman rinquiri?

<sup>9</sup> Jesustaj paycunaman cuticherka:

—Uj p'unchayka chunca iscayniyoj horasniyoj. P'unchaypi purejri mana urmanchu c'anchay caskanraycu. [Quiquillantataj Diospa munayninta junt'anaycama mana urmasajchu. <sup>10</sup> Astawanpis mana Diosmanjina causayman chayka, urmayman,]\* —nispa.

<sup>11</sup> Chayta niytawan paycunaman nerka:

—Munaska Lazaronchej puñushan. Nokarí payta rijch'arichimoj risaj, —nispa.

<sup>12</sup> Yachacojcunantaj payman nerkanca:

—Señorný, puñuspachá thañiconka, —nispa.

<sup>13</sup> Jesusrí wañuyinmanta parlarka. Paycunataj yuyarkancu puñuspa samaricuymanta parlashaskanta. <sup>14</sup> Chayraycu Jesuska sut'ita paycunaman nerka:

—Lazaroka wañupun. <sup>15</sup> Mana jakaypi caskaymantataj cusiska cani kancunaryaycu astawan nokapi jap'icunawayquichejpaj. Cunanka jacu rinachej paypaman, —nispa.

<sup>16</sup> Mellizo niska Tomastaj yachacoj-masisninman nerka.

—Jacu nokanchejpis paywan cusca wañumunanchejpaj, —nispa.

### *Jesús Martawan parlan*

<sup>17</sup> Jesustaj Betaniaman chayamuspa tawa p'unchay p'ampaskataña Lazarota tariparka. <sup>18</sup> Betania llajtari Jerusalenmanta cuscan leguapi-jina carka. <sup>19</sup> Chayraycu ashqhas israelcunamanta jamorkancu Martata Mariatapis hermanoncumanta sonkochaj. <sup>20</sup> Ajinapitaj Martaka Jesús chayamushaskanta uyarispa paywan tincoj llojserka. Mariataj wasillapi tiyariusharka. <sup>21</sup> Jesuswan tincuspataj Martaka nerka:

—Señorný, caypichus cawaj carka chayka, hermanoyka mana wañupunmanchu carka. <sup>22</sup> Chaywanpis yachani imatapis mañacusquiquita Dios kosunanta, —nispa.

<sup>23</sup> Jesustaj payman nerka:

—Hermanoyqui causarimonka, —nispa.

<sup>24</sup> Martari payman nerka:

—Arí, yachani causarimunanta chay khepa p'unchaypi runas causarimonkancu, chaypeka, —nispa.

<sup>25</sup> Jesustaj payman nerka:

—Noka cani causarichej. Nokataj cani causayta koj. Nokapi jap'icojka wañunman chaypis causarimonka. <sup>26</sup> Tucuy nokapi jap'icuspa causajcunataj ni jayc'aj wiñaypaj wañonkancchu. ¿Chayta creenquichu? —nispa.

\* **11:10** Ninayan.

27 Martataj nerka:

—Arí, Señorní, tucuy sonkoywan creeni cay pachaman jamoj Diospa Wawan Cristo caskayquita, —nispa.

28 Chayta niytawan ñañan Mariata wajyaj rerka. Pacayllamantataj payman nerka:

—Yachachejinchej caypi cashan wajyarisunqui, —nispa.

29 Uyariytawancamataj Mariaka uskhay uskhayllata jataricorka payman rinanpaj.<sup>30</sup> Jesusri manaraj ranchoman yaycorkarajchu. Aswanka Marta paywan tincorka chayllapiraj casharka.<sup>31</sup> Mariata sonkochanan-cupaj wasipi cashaj israelcunataj ricorkancu payta uskhayllata llojsiskanta. Paycunataj yuyarkancu p'ampaskaman wakaj rishaskanta. Chayraycu payta khaterkancu.

### *Jesús Mariawan parlan*

32 Mariataj Jesús casharka, chayman chayarka. Jesusta ricuytawantaj chaquisninman wijch'uyucuspa nerka:

—Señorní, caypichus cawaj carka chayka, hermanoyka mana wañupuanmanchu carka, —nispa.

33 Jesusrí pay wakaskanta paywan cusca jamoj israelcuna wakaskan-cutapis ricorka. Chayraycu sonkonpi sinch'ita llaquicorka paytaj qhar-catiterka.<sup>34</sup> Nerkataj:

—¿Maypitaj payta p'amparkanquichejrí?

Paycunataj nerkancu:

—Señorní, jamuy ricunqui, —nispa.

35 Jesustaj wakarka.<sup>36</sup> Chayta ricuspa israelcuna nerkancu:

—¡Khaway, may chhicatachus payta munacorka! —nispa.

37 Paycunamanta waquintaj nerkancu:

—Cay runaka ciegoj ñawisnintapis quicharerka. Chanta ¿manachu Lazarota wañuymanta jarc'anman carka?

### *Jesús Lazarota causarichin*

38 P'ampana jusc'uman chayamuspa Jesús ujtawan sonkonpi sinch'ita llaquicorka. Chay p'ampanari orko c'uchupi ruwaska carka. Jatun p'alta rumiwantaj wisk'aska carka.<sup>39</sup> Jesusri nerka:

—Rumita okhariychej, —nispa.

Wañojpa hermanan Martataj nerka:

—Señorní, asnashanña; tawa p'unchay p'ampaskaña, —nispa.

40 Jesustaj payman nerka:

—¿Manachu nerkayqui, nokapi jap'icuwanqui chayka, Diospa jatun atiyninta ricunqui?

41 Runastaj rumita okharerkancu. Jesusri patata khawarispa nerka:

—Tatáy, graciasta koyqui kanman uyariwaskayquimanta.

42 Yachanitaj uyariwaskayquitapuni. Cay ashqha runasraycutaj chayta nerkani paycuna creenancupaj kan cachamuwaskayquita, —nispa.

43 Chayta niytawantaj jatunta khaparerka:

—Lázaro, llojsimuy, —nispa.

44 Wañuska runataj llojsimorka, chaquisnin maquisnin mayt'uska, uyanpis maychus p'ampanapaj khataska. Jesustaj paycunaman nerka:

—Phascaraychej, sakeychej rejta, —nispa.

*Curajcuna nincu Jesús wañunanta*

<sup>45</sup> Ashqhas israelcunamanta Jesuspi jap'icorkancu chay ruwaskanta ricuspa. Chay jap'icojcunaka Mariata sonkochaj jamojcunamanta carkancu. <sup>46</sup> Waquin chay jamojcunamantari Jesuspa ruwaskanta fariseosman willaj rerkancu. <sup>47</sup> Chayraycu yupaychana-wasimanta curajcuna fariseocunapiwan jatun tantacuyta† wajyacorkancu. Nisharkancutaj:

—Chay runaka ashqha ricuchinasta ruwashan. ¿Nokanchejri imatataj ruwashanchejri? <sup>48</sup> Sichus payta sakellasunchej chayka, tucuy paypi jap'iconkancu. Roma runastaj jamuspa atiyninchejta khechuwasun. Yupaychana-wasita llajtanchejtapis paycunallaña camachenkancu, —nispa.

<sup>49</sup> Yupaychana-wasimanta curajka chay wata casharka Caifás sutioy. Payri tantacojcunamanta carka. Nerkataj:

—¡Kancunaka ni imata yachanquichejchu! <sup>50</sup> Cayta mana reparan-quichejchu: Kancunapajka aswan allin cashan uj runa wañunan tucuy Diospa ajllaska runasninpaj, manataj tucuynincuchu wañunanka, —nispa.

<sup>51</sup> Chaytaka mana payllamantachu nerka. Astawanpis yupaychana-wasimanta curaj chay wata caskanraycu sut'incharka Jesús wañunanta Diospa ajllaska israelcunapaj. <sup>52</sup> Manataj israelcunallapajchu wañunan carka, manachayrí tucuy cay pachapi caj ajllacuskasninpaj. Wañunan carka tucuy Diospa wawasnin tucuynejmanta ujchaska canancupaj. <sup>53</sup> Chay p'unchaymantapacha chay camachejcunaka Jesusta wañuchinancupaj unancharkancu.

### *Jesús Efraín llajtaman ripun*

<sup>54</sup> Chayraycu Jesuska manaña israelcunaj ñaupakencipi purerkañachu. Astawanrí Efraín llajtaman riporka. Chay llajtari ch'in pampa kayllapi carka. Chaypitaj yachacojcunawan caricorka.

<sup>55</sup> Israelcunaj pascuancu p'unchaycuna kayllaña casharka. Ashqha runastaj tucuy camposmanta Jerusalenman rerkancu. Paycuna pas-cua ñaupajta sonkoncuta llimphuchaj cancu Diosta yupaychanancupaj.

<sup>56</sup> Chay runastaj Jerusalenpi Jesusta masc'asharkancu. Yupaychana-wasipi sayashaskancupitaj paycunapura tapunacusharkancu:

—¿Imatataj yuyanquichej? ¿Jesuska manachu cay jatun p'unchaycunapaj jamonka?

<sup>57</sup> Yupaychana-wasimanta curajcuna fariseoswan cayta camachiskancu: “Jesús maypichá cashaskanta yachajka willawaycu payta jap'inaycupaj”, nispa. Chayraycu chay runaska ajinata parlasharkancu.

## 12

### *María Jesusta jawiskanmanta*

<sup>1</sup> Pascuaman sojta p'unchay cashajtin Jesús Betaniaman chayamorka. Chaypitaj Lázaro tiyacorka. Jesús wañuskamanta causaricherka, chaymin cay Lázaro carka. <sup>2</sup> Chay Betania llajtayoj runastaj jatun miqhunata Jesuspaj waquichiporkancu. Martapis yanapacusharka. Lazarori Je-suswan tiyacushajcunamanta ujnin carka. <sup>3</sup> Mariataj apamorka uj libra

† 11:47 Literal: sanedrín.

c'achitu k'apayniyoj aceitetajina. Chaytaj nardo purumanta ashqha valorniyoj carka. Chaywantaj Jesuspa chaquisninta jawiyorka. Chujchanwantaj chaquisninta pichayorka. Wasitaj chay c'achitu k'apaywan junt'a carka. <sup>4</sup>Iscariote caj Judas yachacojcunamanta ujin carka. Pay Jesusta jaywanayasharkaña. Nerkataj:

<sup>5</sup>—Cay k'apaj aceitejinaka ¿imaraycutaj mana vendecorkachurí? Uj wata pagopajina carka. Chayka wajcha runasman koska canman carka,—nispa.

<sup>6</sup> Chaytaka nerka mana wajcha runasta qhuyaskanraycuchu, manachayrí suwa caskanraycu. Payka paycuna uqhupi kolketa jallch'aj runa carka. Chay jallch'askancumantataj suwacoj. <sup>7</sup>Judas niskanraycutaj Jesús nerka:

—Sakellay. Ama jarc'aychu Mariata. Chayta jallch'arka p'ampacunay p'unchaypaj. <sup>8</sup>Wajcha runaska kancunawanpuni cashancu. Nokarí mana unaytañachu kancunawan casaj,—nispa.

*Curajcuna Lazarota wañuchiyya yuyancu*

<sup>9</sup> Chay may ashqha Jerusalenman chayamojcuna yacharkancu Jesús Betaniapi cashaskanta. Paycunataj chayman jamorkancu mana Jesusta ricuya munaspallachu astawanka Lazarota ricuya munaspa. Payta ricuya munarkancu wañuskamanta Jesús causarichiskanraycu. <sup>10-11</sup>Ashqhas israelcunamanta curajcunanca sakerpaspa Jesuspi jap'icusharkancu. Chayraycu yupaychana-wasimanta curajcuna Lazarota wañuchiyya yuyarkancu.

*Jesús Jerusalenman yaycun*

<sup>12</sup> May ashqha runas Jerusalenman rerkancu chay jatun p'unchaycunapi Diosta yupaychaj. Jesusri Betaniamanta Jerusalenman risharka. Chay ashqha runastaj Jesús jamushaskanta uyarerkancu.

<sup>13</sup> Chayraycu palmasta okharicuspa llajtamanta payta taripaj llojserkancu. Khaparisharkancutaj:

—¡Dios yupaychaska cachun!\* ¡May jatunchaska Israelman Diospa cachamuskanka! ¡Payka Camachejinchej! —nispa.

<sup>14</sup> Jesusri uj malton burrota tariytawan llok'acyuspa tiyaycucorka. Chaytaj Diospa palabranmanjina carka. Nin:

<sup>15</sup> Israelecuna ama manchachicuychejchu.

Khawaychej, Camachejnyquichej jamushanña uña burro patapi tiyaska, nispa.

<sup>16</sup> Chaypachapi yachacojcunanka mana entienderkancuchu runas ruwaskanca. Jesús jatunchaska cajtinrí paycuna yuyaricorkancu paymanta kelkaska caskanta, runas junt'askancupis.

<sup>17</sup> Jesuswan Betaniamanta ashqha runas jamusharkancu. Chay ashqha runasmanta waquinri Jesús Lazarota causarichimoja ricojcuna carkancu. Paycunaka tucuyman willasharkancu imaynatachus Lazarota p'ampana jusc'umanta wajyaspa payta wañuskamanta causarichimuskanta. <sup>18</sup>Jerusalenmantapis ashqha runas Jesús chay may jatun ricuchinata ruwaskanta uyarerkancu. Chayraycumín paycunaka Jesusta taripaj Jerusalenmanta llojserkancu. <sup>19</sup>Fariseosrí chay imasta ricuspa paycunapura ninacorkancu:

\* **12:13** Literal: hosanna.

—¡Ni imapajpis ruwaskayquichejka! ¡Khaway, tucuy runas payta khatej ripushancu! —nispa.

*Griegocuna Jesusta masc'ancu*

<sup>20</sup> Waquin griego runas jatun p'unchaycunapaj jamoj cancu Diosta yu-pachaj. <sup>21</sup> Paycunamanta waquin kayllaycorkancu Felipeman, paypis Betsaida llajtayo Galileamanta caskanraycu. Nerkancutaj:

—Señor, Jesuswan tincuya munaycu, —nispa.

<sup>22</sup> Felipetaj Andresman chayta nerka Andreswan Felipewantaj rispa Jesusman chayta willamorkancu. <sup>23</sup> Jesustaj nerka:

—Diospa cachaska Runan jatunchaska cananpaj p'unchay chaya-munña. <sup>24</sup> Chekatapuni niyquichej: Uj trigo muju jallp'aman urmaspa mana wañunchu chayka, sapallan cacun. Wañun chayrí ashqhatataj pokon. <sup>25</sup> Ajinallatataj cay pacha causayninta munacojka causaynintaka wiñaypaj chincachin. Cay pacha causayninta mana munacojrí wiñay causaypaj wakaychan. <sup>26</sup> Ruwanasniypi llanc'anapaj causayninta kojka khatiwachun. Chanta maypichá noka cashani chaypi paypis wiñaypaj nokawan cusca canka. Nokapaj ruwajtarí Tatay sumajpaj khawanka, —nispa.

*Jesús wañuyninmanta parlan*

<sup>27</sup> Chaywanpis nerka:

—Cunanka may sinch'i llaquiska sonkoyka! ¿Imatataj niyta atini? “Tatáy, cay ñac'ariymanta cacharichiway” ¿nisajchu? Manachayka, cay ñac'ariyta muchunaypajmin jamorkani. <sup>28</sup> Chayraycu: Tatáy, jatun atiynyquita ricuchiy runas kanta jatunchasunancupaj, —nispa.

Ajinapitaj Dios janaj pachamanta nimorka:

—Jatun atiynyta ricucherkani kannejta, watejmantapis ricuchillasaj-taj, —nispa.

<sup>29</sup> Chaypi caj ashqha runastaj chayta uyarispa nisharkancu, para tronaskanta. Waquintaj nisharkancu, uj angel payman parlaskanta.

<sup>30</sup> Jesustaj nerka:

—Mana nokapajchu Dioska parlamuwarka, manachayrí kancunaj allinniyquichejpaj. <sup>31</sup> Cunanri Dios juchachashan cay pacha runasta juchancuraycu. Cunantaj cay pachata sajra camachej supay Satanasta Dios kharkonka. <sup>32</sup> Nokari jallp'amanta okhariska caytawan tucuya nokaman c'ascachimusaj nokapi jap'icunancupaj, —nispa.

<sup>33</sup> Chayta nerka imaynapichus wañunanta willananpaj. <sup>34</sup> Chayraycu chay ashqha runas payta nerkan:

—Nokaycoka cayta yacharkaycu camachiskasmanta, Cristoka wiñaypaj caypi tiyacunanta. Kanri ¿imaynataj nishanqui, “Diospa cachaska Runanka okhariska canan tiyan”, nisparí? ¿Imayna runataj chay Diospa cachaska Runanrí?

<sup>35</sup> Jesusri paycunaman nerka:

—Noka cani cheka c'anchayka. Pisi p'unchaycunallatawanña kancunawan casaj. Chayraycu noka caypi cashajtiy c'anchaypi puriychej lakha juchawan ama atipaskas canayquichejpaj. Lakhapi purejka mana yachanchu maymanchus rishaskantapis. <sup>36</sup> Noka kancunawan cashajtiy cheka c'anchaypi jap'icuwaychej nokajina canayquichejpaj,<sup>†</sup> —nispa.

† 12:36 Literal: c'anchaypa wawasnin.

*Jesuska chay imasta parlaytawan ripuspa paycunamanta pacacorka.*

*Paypi mana jap'icojcunamanta*

<sup>37</sup> Jesús chay ashqha ricuchinasta runaspa ñaupakencipi ruwashajtinpis paycuna manapuni paypi jap'icorkancchu. <sup>38</sup> Ajinapi junt'acusharka Diospa unay willajnin Isaiasca kelkaskan. Nin:

Señorníy, pisilla willanaskaycuta jap'icorkancchu.

Atiynyquita ricuchejiyquipis ni pi repararkachu, nispa.

<sup>39-40</sup> Ujtawanpis Isaias kelkaskanpi nillantaj:

Dioska ñawisnincuta ciegyoyerka ama ricunancupaj.

Sonkosnincutapis rumiyacherka ama entiendenancupaj.

Ajinapi Diosman mana cutirincuchu nitaj juchancuta pay khechunchu, nispa.

Chayraycu mana paypi jap'icuya aterkancchu. <sup>41</sup> Chayta nerka Isa-  
iaska jamoj Cristo atiyninta ricuskanraycu paymantataj kelkarkapis.

<sup>42</sup> Chaywanpis curajcunamanta ashqhas Jesuska Cristo caskanta creerkancu. Fariseocunaraycutaj chayta mana willacorkancchu tantacuna-wasimanta ama kharkoskas canancupaj. <sup>43</sup> Paycunaka astawan munarkancu runas paycunata sumajpaj khawanancuta Dios-  
manta niskaka.

*Cayka Jesuspa niskasnинmanta ajllaska*

<sup>44</sup> Jesustaj runaspa ñaupakencipi nerka cayta: Nokapi jap'icojka mana nokallapichu jap'icushan. Manachayrí cachamuwajniypipis jap'icushan. <sup>45</sup> Nokata rejsiwajka cachamuwajniytapis rejsillantaj.

<sup>46</sup> Noka wiñay causayta koj c'anchay caspa cay pacha runasman jamorkani tucuy nokapi jap'icojka amaña juchapi causanapaj. <sup>47</sup> Pillapis niskasniyta uyarin manataj casunchu chayka, paytaka mana nokachu juchachani. Nokaka mana cay pacha runasta juchachanapajchu jamorkani. Manachayrí cay pacha runasta juchamanta cacharichinapaj jamorkani. <sup>48</sup> Pillapis nokata khesachawaspa niskasniyta mana jap'ejka juchachaska canka. Chay niskay payta khepa p'unchaypi juchachanka. <sup>49</sup> Nokari mana nokallamantachu parlarkani. Manachayrí cachamuwajniy Tatay niwarka imatachus ninayta parlanaytapis. <sup>50</sup> Yachanitaj chay niwaskanka wiñay causayta koj caskanta. Chayraycu Tatay niwarka chayta quiquillantataj nokapis parlani. Chay imasta nerka Jesús.

## 13

*Jesús yachacojcunarpa chaquisnincuta mayllan*

<sup>1</sup> Pascua ñaupajta Jesuska yachaskaña cay pachamanta ujtawan Tatan-  
man cutipunan hora chayamushaskanta. Payka cay pachapi caj ajllaska  
runasninta munacorkapuni. Cunantaj chay munacuyninta may jatun  
caskanta, tucuya paycunaman ricucherka.

<sup>2</sup> Pascua miqhuypi casharkancu. Supay Satanastaj Judasta sonkonpi yuyaychaskaña Jesusta jaywaycunapaj. Judaska Simonpa wawan, Iscariote niska carka. <sup>3</sup> Jesusri yachaskaña tucuy imata atiyninman Tatan jaywaskanta. Yachaskañataj Diosmanta jamuskanta Diosman cutipushaskantapis. <sup>4</sup> Chay tucuya yachaspataj Jesuska miqhuymanta jatarispa ponchonta lluch'ucun, camachijinataj p'achallicun.

<sup>5</sup> Mayllacunaman yacuta jich'aicuspa yachacojcunarpa chaquisninta

mayllayta kallarin, chanta toallawan ch'aquichin. <sup>6</sup> Chaquisnincuta mayllaspa Simón Pedroman chayan. Payri Jesusman nin:

—Señorníy ¿maytataj chaquisniya mayllawanquirí?

<sup>7</sup> Jesustaj payman cutichin:

—Kan mana yachanquichu cunan noka ruwashani, chayta. Khepatarí yachanqui,—nispa.

<sup>8</sup> Pedroka nin:

—¡Ni jayc'aj chaquisniytaka mayllawanquimanchu! —nispa.

Jesustaj cutichin:

—Mana mayllayquimanchu chayka, mana nokawan ujchaskachu canqui,—nispa.

<sup>9</sup> Simón Pedrotaj nin:

—Señorníy, ama chaquisnillaytaka, manachayrí maquisniya umaytawan mayllaway,—nispa.

<sup>10</sup> Jesustaj payman nin:

—Llimphuchaskaña cajka manaña mayllanachu. Manachayka chaquisnillanta mayllana tiyan juchamanta llimphuchaska caskanraycu. Kancunaka llimphuchaskasña canquichej, astawanrí mana tucuyniyquichejchu,—nispa.

<sup>11</sup> Jesuska yacharka pichus payta jaywaycunanta. Chayraycu nerka: “Mana tucuyniyquichejchu juchamanta llimphuchaskas canquichej”, nispa.

### *Jesús ruwaskanwan yachachin*

<sup>12</sup> Chaquisnincuta mayllaytawan p'achanta churacorka. Ujtawan tiyaycuspataj paycunaman nerka:

—¿Entiendenquichejchu cayta kancunawan ruwaskayta? <sup>13</sup> Kancuna sutichawanquichej, “Yachachejníy, Señorníy”, nispa. Chaypuni caskayraycu chekata niwanquichej. <sup>14</sup> Imaynatachus noka, Señorniyquichej mayllayquichej, ajinallatataj kancunapis chaquisniyquichejta mayllanacuychej. <sup>15</sup> Ricuchiyquichejña kancunapura quiquillantataj ruwanayquichejpaj. <sup>16</sup> Chekatapuni niyquichej, camachecka mana aswan curajpaj khawaskachu camachejninemantaka. Nitaj cachaskapis aswan curajpaj khawaskachu cachamojnimanta niskaka. <sup>17</sup> Sichus cayta yachanquichej chayka, cusiska canquichej cayta ruwaspa.

<sup>18</sup> ‘Maykencunachus ajllacuskasniy cancu paycunata noka rejsini. Chayraycu mana tucuy kancunamantachu parlashani. Nokamanta Diospa palabranpi cay kelkaska junt'acunan tiyan. Nin: “T'antayta miqhojka contraypi sayaycuspacha quinta okharin”, nispa. <sup>19</sup> Manaraj cayjina cashajtin willayquichej ruwacojtín yachanayquichejpaj. Nokaka niskaymanjina caskaytataj creenquichej. <sup>20</sup> Chekatapuni niyquichej: Cachamuwajniyta jap'ejka nokata cusiywan jap'iwan. Nokata jap'ejka cachamuwajniyta cusiywan jap'in,—nerka Jesús.

### *Jesús jaywaycusska cananmanta sut'inchan*

<sup>21</sup> Chay imasta nispataj Jesuska sonkonpi mayta llaquicorka nerka taj:

—Chekatapuni niyquichej: Kancunamanta ujniyquichej jayway-wauj rishan,—nispa.

<sup>22</sup> Yachacojcunantaj t'ucuspa paycunapura khawanacorkancu. Ni imata yachaspataj pimantachus parlaskanta yachayta munasharkancu.

<sup>23</sup> Yachacojcunamanta ujnin, Jesús munacorka chay, paywan cusca tiyaska casharka. <sup>24</sup> Ajinapi Simón Pedroka chay yachacojman ch'illmpipayarka pimantachus Jesús parlashaskanta tapunanpaj. <sup>25</sup> Chay yachacojka Jesusman astawan kayllaycurispa taporka:

—Señorníy ¿pitaj chayrí? —nispa.

26 Jesustaj cuticherka:

—Noka t'antata jok'ochaspa payman kosaj. Chaymin payka, —nispa.

Ajinaka t'antata jok'ochaspa Simonpa wawan Judas Iscarioteman korka. <sup>27</sup> Chay t'antata jap'ejtincama supay Satanás Judasman yaycorka. Jesusri Judasta nerka:

—Imatachus ruwashanqui chayta ruwallayña uskhayta, —nispa.

<sup>28</sup> Chaypi tiyaska cashajcunamantari ímapajchus parlaskanta ni mayken repararkancchu. <sup>29</sup> Judaska kolke jallch'ajnincu carka. Chayraycu waquin yuyarkancu Jesús payman cayta niskanta jatun p'unchaycunapaj rantinanpaj, chayrí, wajchasman konanpaj. <sup>30</sup> Ajinata t'antata jap'iyytawancama Judaska llojserka. Tutataj carka.

### *Jesuspa mosoj camachiskan*

<sup>31</sup> Judas llojsejtincamataj Jesuska nerka:

—Cunanka noka, Diospa cachaska Runan, jatunchaskaña cashani, Diospis nokawan jatunchaska cashan. <sup>32</sup> Chayraycu ajinallatataj paywan Dios jatunchawanka. Cunanpachataj jatunchawanka.

<sup>33</sup> Munaska wawasníy, manaña unaytañachu kancunawan casaj. Masc'awanquichejtaj. Israel curajcunaman nerkaní, ajinallatataj cunan kancunamanpis niyquichej: Noka ripushani, chayman kancuna mana atinquichejchu chayamuya. <sup>34</sup> Uj mosoj camachiskata koyquichej: Kancunapura munanacuychej. Imaynatachus nokapis munacorkayquichej quiquinta kancunapis munanacuychej. <sup>35</sup> Ajinata purajmanta munanacuspa causatiyquichej tucuy runas yachankancu yachacojcunay caskayquichejta, —nerka Jesús.

### *Pedroj urmayninmanta Jesús sut'inchan*

<sup>36</sup> Simón Pedrori payta nerka:

—Señorníy ¿maymantaj rishanqui?

Jesustaj cuticherka:

—Noka rishani, chaymanka cunan mana khatiwayta atiwajchu. Khepatari khatiwanqui, —nispa.

<sup>37</sup> Pedroka payta nerka:

—Señorníy ¿imaraycutaj cunan khatisuya mana atiyanchu? Kan-raycu causayniyta konapajpis waquichiska cani, —nispa.

<sup>38</sup> —¿Causayniyquita nokaraycu kowajchu? Chekatapuni niyqui: Manaraj gallo wakashajtin quinsa cutita ninqui, nokata mana rejsi-waskayquita, —nispa.

## 14

### *Cutimuyninmanta Jesús sut'inchan*

<sup>1</sup> 'Ripushaskaymantaka ama sonko nanayta llaquicuychejchu. Diospi jap'icuychejpuni, nokapipis jap'icullawaychejtaj. <sup>2</sup> Tataypa wasinpeka ashqha tiyacunas tiyan chaypi ashqha runas paywan cusca wiñaypaj causanancupaj. Chayraycu chekata willayquichej. Cunanri rishani kancuna chaypi tiyacunayquichejpaj waquichej. <sup>3</sup> Kancunapaj waquichej

rispa ujtawan cutimusaj kancunata pusacapunaypaj. Ajinaka noka cashani, chaypi kancunapis canquichej. <sup>4</sup> Noka rishani, chaymanka ñanta rejsinquichejña, —nerka Jesús.

<sup>5</sup> Tomasri payta nerka:

—Señorníy, mana yachaycuchu maymanchus rishanqui. ¿Imaynatataj chay ñanta rejsiyumanrí? —nispa.

<sup>6</sup> Jesustaj nerka:

—Noka cani chay ñanka, chay cheka caj, chay wiñay causayta kojpis. Runaka nokanejjllatataj Dios Tataman jamun. <sup>7</sup> Sichus nokata rejsi-warkanquichej chayka, Tataytapis rejsiwajchej carka. Cunamanta-pachataj payta rejsinquichej ricorkanquichejtaj —nispa.

<sup>8</sup> Feliperi payta nerka:

—Señorníy, ricuchiwaycu Dios Tatata. Chayllata munaycu, —nispa.

<sup>9</sup> Jesustaj nerka:

—Chhica unayña kancunawan cani, Felipe ¿manachu rejsiwanqui? Nokata ricuwajka Dios Tatata ricun. ¿Imaynatataj nishawanqui: “Dios Tatata ricuchiwaycu”, nisparí? <sup>10</sup> Noka Tataywan ujlla cani, Tataytaj nokawan ujllamin. ¿Chay niskayta manachu creenquichej? Kancunaman niskaytaka mana nokallamantachu niyquichej. Astawanpis nokapi tiyacoj Tatay ruwanasninta ruwan. <sup>11</sup> Nokaka Tataywan ujlla cani, Tataytaj nokawan ujllamin. Chayta creeychej noka niskayraycu. Manachayrí ruwaskasniyraycu creeychej. <sup>12</sup> Chekatapuni niyquichej: Nokapi jap'icojka chay ruwaskasniy quiquillantataj ruwanka. Nokaka Tatayman ripushani. Chayraycu nokapi jap'icojka ruwaskasniymantapis aswan jatuchejtaraj ruwanka. <sup>13</sup> Nokawan ujchacuspa imatapis Diosmanta mañacunquichej chayta noka ruwasaj. Ajinapi Dios Tatay, noka Wawannejta jatunchaska canka. <sup>14</sup> Nokawan ujchacuspa sutiypi imatapis mañacuwaskayquichejta noka ruwasaj.

### *Santo Espíritoj jamunanmanta*

<sup>15</sup> 'Nokata munacuwanquichej chayka, niskasniyta casunquichej.

<sup>16</sup> Nokari Tatayman nisaj kancunaman ujta cachamunanta yanapsunayquichejpaj. Chay Yanapajka kancunawan tiyaconka wiñaypaj.

<sup>17</sup> Payka Santo Espiritumin. Paytataj cay pacha runas mana atincuchu ricuya nitaj rejsiyatapis. Chayraycu payta mana jap'iyta atincuchu. Kancunari payta chekata rejsinquichej kancunawan tiyacushaskan-raycu. Paywan ujchaskataj canquichej. <sup>18</sup> Cay pachapi manamin wajchatajinachu sapasllata sakeskayquichej. Manachayrí kancunaman cutimusaj. <sup>19</sup> Uj chhicamantawan cay pacha runas manaña ricuwankancuchu. Kancunari ricuwankquichejraj. Nokaka wiñay causayniyoj cani. Chayraycu kancunapis wiñay causayniyoj canquichej. <sup>20</sup> Sumaj p'unchay jamushan. Chay p'unchaypi yachanquichej nokaka Tataywan ujchaska caskayta. Chaypacha kancunapis nokawan ujchaska canquichej, nokataj kancunawan. <sup>21</sup> Niskasniyta jap'ispa casojka, chay runalla munacuwan. Chay munacuwajtataj Tatay munaconka. Nokapis chay runataka munacusaj, sonkonpitaj sut'ita rejsichicusaj, —nerka Jesús.

<sup>22</sup> Judas, mana Iscariote cajchu, payta taporka:

—Señorníy ¿imaynataj cunan nokallaycuman sut'ita rejsichicuwasajcu, manataj cay pacha runasmanka?

<sup>23</sup> Jesustaj cuticherka:

—Nokata munacuwajka niskayta casonka, Tataytaj payta munaconka. Paymantaj jamusajcu sonkonpi tiyacunaycupaj. <sup>24</sup> Nokata mana munacuwajka niskayta mana casunchu. Niskayta uyariskayquichejka mana nokajtachu, manachayrí cachamuwajniy Tataypatamin.

<sup>25</sup> Chay imastari nerkyayquichej kancunawan cashasparaj. <sup>26</sup> Chay Yanapaj Santo Espiritutari Tatay sutypi cachamonka. Paymin mosoj causayniyquichejpi tucuy imata yachachisonkachej. Noka nerkyayquichej, tucuy chay niskasniyta yuyarichisonkachejtaj.

<sup>27</sup> C'acha causaypi canayquichejpaj Diosman allinyacherkayquichej. Nokanejllata c'acha causayka tiyan. Nokalla c'achata causachiyquichej. Cay pacha runaska chayta mana atincuchu. Ama sonko nanaya llaquicuychejchu nitaj manchachicuychejchu. <sup>28</sup> Noka kancunaman niskayta uyererkanquichejña. Nerkani: Ripushani, ujtawan kancunaman cutimusajtaj, nispa. Munacuwaspaka cusicuwajchej carka Tatayman ripushaskayraycu. Tatayka aswanmin cashan nokamanta niskaka. Chayraycu kancunapaj cusiy canka. <sup>29</sup> Cunanri chayta nerkyayquichej manaraj rishaspa khepata nokapi jap'icunayquichejpaj.

<sup>30</sup> Manaña ashqhatañachu kancunawan parlasaj. Cay pachata camachej supay Satanás jamushanña. Nokatarí mana camachiwayta atinchu. <sup>31</sup> Astawanrí Tataypa yuyaskanmanjina tucuy ima ruwaska canka. Chaynejtataj tucuy runas yachankancu Tatayta munacuskayta Tataypa niskanmanjina tucuy imata ruwaskaytapis. Jataricuychej, jacu llojsipuna.

## 15

### *Uva sach'amanta quiquinchana*

<sup>1</sup> Noka cani cheka uva sach'a, Tataytaj chayta llanc'ajka. <sup>2</sup> Uvawan llanc'ajka tucuy mana pokoj ramata c'utun. Tucuy pokoj ramatari c'utun astawan pokonanpaj. Ajinallatataj nokawan ujchaska runasniywan Tatayka ruwan. <sup>3</sup> Nisuskayquichejnejta juchamanta llimphuchaskasña canquichej. <sup>4</sup> Nokapi jap'icuwaspa cacuychej, nokataj kancunawanpuni cucusaj. Ajinapi ujchaska canchej. Uj rama mana sach'api cucuspaka mana pokoya atinchu. Quiquillantataj sichus nokapi jap'icuspaka mana cacuwajchejchu chayka, kancunapis mana c'acha runas cayta atinquichejchu.

<sup>5</sup> Noka cani uva sach'ajina kancunataj ramasniyjina. Nokawan ujchaska cajlla c'acha causayniyoj cashanquichej ashqha pokoyniyoj ramajina. Mana nokawan ujchaska caspaka ni imata ruwayta atinquichejchu. <sup>6</sup> Nokawan mana ujchaska cacoj runaka c'utuska ramajinamin. C'utuska ramaska wijch'ucun ch'akinanpaj. Chaymantataj tantacun ninaman ruphachiska cananpaj.

<sup>7</sup> Nokawan ujchaskachus cacunquichej niskasniyjis sonkoyquichejpi chayka, imatachus munaskayquichejta Diosmanta mañacuychej. Kancunamantaj kosonka. <sup>8</sup> C'acha causayniyoj caskayquichejka ashqha pokoyjinamin. Chaywan Tatayta jatunchanquichej, yachacojcunay caskayquichejtataj ricuchinquichej. <sup>9</sup> Imaynatachus Tatay munacuwan, ajinallatataj nokapis munacuyquichej. Ajinata munacuyniypi causacuychej. <sup>10</sup> Niskasniyta casuspalla munacuyniypi causacunquichej. Imaynatachus noka Tataypa niskasninta casuni,

paytaj munacushallawanpuni, ajinallatataj niskasniya casuwajchej chayka, nokapis munacuyquichej.

<sup>11</sup> ‘Chay imasta nerkayquichej nokajina cusiskas canayquichejpaj quiquin cusiywan junt'a canayquichejpajtaj.

### *Jesuswan ujchaska cajcuna munanacuncu*

<sup>12</sup> ‘Caymin niskayka: Imaynatachus noka munacorkayquichej quiquillantataj kancunapura munanacuychej. <sup>13</sup> Uj runa amigosninraycu wañuycama churacojenka chekatapunimin munacun. Chayjina munacuymanta astawanka mana canchu. <sup>14</sup> Niskasniymanjinachus ruwanquichej chayka, amigosniy canquichej. <sup>15</sup> Manaña camachitachu sutichayquichej. Uj camachecka camachejnин imatachus ruwashaskanta mana yachanchu. Tataymanta tucuy uyariskayta willarkayquichej. Chayraycu amigosniya sutichayquichej. <sup>16</sup> Mana kancunachu nokata ajllacuwarkanquichej. Manachayrí noka kancunata ajllacorkayquichej [runasman willajtataj cacharkayquichej. Willaskayquichejwan runas nokapi jap'icojtincu cusiskas canquichej. Cusiyniyquichejtaj wiñaypaj canka.]<sup>\*</sup> Ajinapitaj nokawan ujchaska caspa imatachus Dios Tatamanta mañacunquichej, chayta kosonkachej. <sup>17</sup> Cayta niyquichej: Kancunapura munanacuychej,—nerka Jesús.

### *Cay pacha runaska Jesuspi jap'icojcunata chejnincu*

<sup>18</sup> Nerkataj:

—Cay pacha runas kancunata chejnisojtiyquichejka reparaychej nokata ñaupajta chejniwaskancuta. <sup>19</sup> Cay pacha runaswan causaynincipi ujlla cawaychej chayka, cay pacha runaska munacusunquichejman carka. Astawanrí cay pacha runaswan causaynincipi mana ujllachu canquichej. Manachayrí noka cay pacha runasmanta ajllacorkayquichej nokapi jap'icunayquichejpaj. Chayraycu cay pacha runas chejnicusunquichej. <sup>20</sup> Yuyaricuychej kancunaman cayta nisuskayta: Camachecka mana aswan curajpaj khawaskachu camachejninnmantaka. Sichus nokata ñac'arichiwarkancu chayka, kancunatapis ñac'arichillasonkachejtaj. Sichus niskayta casorkancu chayka, kancunajtapis casullankancutaj. <sup>21</sup> Astawanrí tucuy mana allin cajta ruwasonkachej nokaj yachacojcunay caskayquichejraycu. Paycunaka cachamuwajniya mana rejsincuchu.

<sup>22</sup> ‘Sichus paycunaman mana jamuymanchu nitaj parlaymanchu carka chayka, mana juchachaskachu cancuman carka. Cunanrí ni imata atincuchu juchancuraycu cutichiyyta. <sup>23</sup> Nokata chejniwajka Tatay-tapis chejnicullantaj. <sup>24</sup> Tucuy runamanta aswan jatuchej ruwanasta paycunaj ñaupakenkipi ruwarkani. Chay jatuchej ruwaskasniytachus mana ricuncumanchu carka chayka, mana juchachaskaschu cancuman carka. Cunanrí ricuncuña chejniwaycutaj nokata Tataytapis. <sup>25</sup> Ajinaka Diospa palabranpi paycunamanta kelkaska junt'acun: “Khasimanta chejnicuwarkancu”, nispa.

### *Jesús Yanapajta cachamunanmanta*

<sup>26</sup> ‘Tataymanta Yanapajta kancunaman noka cachamusaj. Payka cheka Espíritu Tataymanta cajmin. Mayc'ajchus jamonka chaypacha

\* **15:16** Literal: rispa pokonyijoj canayquichejpaj.

sut'ita nokamanta pay willanka. <sup>27</sup> Kancunapis nokamanta willan-quichej wajyacususkaymantapacha nokawan caskayquichejraycu.

## 16

*Yachacojcunanman Jesús sut'inchan ñac'arinancuta*

<sup>1</sup> 'Cay imasta nerkayquichej Diospi jap'icuskayquichejmanta ama urmanayquichejpaj. <sup>2</sup> Ñac'ariy p'unchaycuna jamushan. Chay p'unchaycunapeka tantacuna-wasisnincumanta kharkosonkachej. Astawanpis wañuchisojka yuyanka chaywan Diosta yupaychashaskanta. <sup>3</sup> Paycunaka Dios Tatata mana rejsincuchu ni nokatapis rejsiwancuchu. Chayraycu ajinata ruwankancu. <sup>4</sup> 'Cay imastari nerkayquichej chay p'unchaycuna chayamojtin cay niskayta yuyaricunayquichejpaj. Ñaupajpiri muchunayquichejmantaka mana willarkayquichejchu kancunawanraj cashaskayraycu. <sup>5</sup> Cunanka ripushaniña cachamuwajniyaman. Kancunamantarí ni pi tapuwanchu: “¿Maymantaj rishanqui?” nispa. <sup>6</sup> Astawanpis chay imasta nisuskayquichejmanta maytaraj phuticushanquichej.

*Jesús ripun Santo Espiritu cachamunanpaj*

<sup>7</sup> Nokaka chekata niyquichej, kancunaj allinniyquichejpaj ripunayta. Mana ripuymen chayka, chay Yanapajka mana jamunmanchu. Ripusaj chayrí kancunaman payta cachamuskayquichej. <sup>8</sup> Jamuspataj payka cay pacha runasta juchamanta, chekan caymanta, juiciomantawan reparachenka. <sup>9</sup> Juchamanta reparachenka nokapi mana jap'icuskancuraycu. <sup>10</sup> Chekan caymanta reparachenka Tatayman ripushaskayraycu manañataj ricuwanquichejchu. Ruwanasniyta tucuspaña Tatayman ripushani. [Chay ruwanasniynejllata Tatayka runata chekanpaj khawan.]\* <sup>11</sup> Juiciomantataj reparachenka sajra camachejnincu supay Satanás juchachaskaña caskanraycu. [Chay quinsa imasmanta Santo Espíritu cay pacha runasta reparachenka.]†

<sup>12</sup> Cay niskasniymanta ashqhataraj parlanay tiyan. Cunari mana chayta entiendeyta atinquichejchu. <sup>13</sup> Santo Espiriturí jamuspa kancunata pusasonkachej tucuy cheka cajta yachanayquichejpaj. Payka mana pay quiquinmantachu parlanka. Manachayrí imatachus uyariskanta parlanka. Paytaj jamoj imasmantapis sut'inchasonkachej. <sup>14</sup> Niskayta jap'ispa kancunaman sut'inchasonkachej. Ajinapi nokata jatunchawanka. <sup>15</sup> Dios Tatajtia tucuy niskanka nokajtapis. Chayraycu nerkayquichej: Nokaj niskayta jap'ispa Santo Espíritu sut'inchasonkachej.

*Phutiymanta khepata wiñay cusiy jamonka*

<sup>16</sup> 'Uj chhicamantawan manaña ricuwanquichejchu. Uj chhicamantawantaj ujtawan ricuwanquichej,—nerka Jesus.

<sup>17</sup> Chay niskanmanta waquin yachacojcunan paycunapura ninacusharkancu:

—¿Imataj chay niwaskanchejrí? Nin: “Uj chhicamantawan manaña ricuwanquichejchu. Uj chhicamantawantaj ujtawan ricuwanquichej”, nispa. ¿Imataj chay: “Tatayman ripushani”, niwaskanchejrí?

<sup>18</sup> Ninacusharkancutaj:

\* **16:10** Ninayan. † **16:11** Pusaj caj versiculopi quiquinta nin.

—¿Imaynataj cay “chhicamantawan?” Mana yachanchejchu imaman-tachus parlaskanta, —nispa.

<sup>19</sup> Chay niskanmanta tapuya munashaskancuta Jesús yacharka. Chayraycu paycunata nerka:

—Nerkayquichej: Uj chhicamantawan manaña ricuwanquichejchu. Uj chhicamantawantaj ujtawan ricuwanquichej. ¿Chay niskaymantachu tapunacushanquichej? <sup>20</sup> Chekatapuni niyquichej: Kancunaka phutiyw-an wakanquichej. Cay pacha runasí cusiconkancu. Astawanpis kancunapajka chay phutiyniyquichej cusiyman tuconka. <sup>21</sup> Yachanquichej onkocoj warmeka onkocunan hora chayamojtín llaquicun. Wawan nacecojtinñarí llaquiyninta manaña yuyaricunchu. Astawanrí cay pachapi uj wawa nacecuskanraycu cusicun warmeka. <sup>22</sup> Ajinallataj kancunapis cunan llaquiskas cashanquichej. Nokarí ujtawan ricuskayquichej. Sonkoyquichejtaj cusiska canka. Chay cusiytari kancu-namanta ni pi khechusonkachejchu.

<sup>23</sup> ‘Chay p'unchaypitaj nokamanta ni imata tapuwanquichejchu. Chekatapuni niyquichej: Imatachus Dios Tatamanta mañacuwajchej sutipi chayta kosonkachej. <sup>24</sup> Manaraj cunancama ni imata sutipi Diosmanta mañacorkanquichejchu. Nokawan ujhaska caskayquichejray-curí sutipi Tataymanta mañacuychej jap'inquichejtaj cusiywan junt'a canayquichejpaj.

### *Jesús cay pachata atipan*

<sup>25</sup> ‘Chay niskasniyka manaraj sut'ichu, rijch'acuycunallarajmin. Chay jamoj p'unchaypirí manaña ajinawanchu parlaskayquichej. Man-achayrí sut'ita Tataymanta parlaskayquichej. <sup>26</sup> Chay p'unchaypi nokata sonkoyquichejwan rejsiwaspa sutipi Diosmanta mañacunquichej. Mana niyquichejchu Tatayta kancunapaj nipurusunaytaka, <sup>27</sup> pay quiquin kancunata munacususkayquichejraycu. Nokata kancuna munacuwan-quichej, Diosmanta cachamuska Wawan caskaytataj creenquichej. Chayraycu Tatay munacusunquichej. <sup>28</sup> Tataymanta llojsimorkani cay pachamantaj jamorkani. Cunantaj cay pachamanta llojsipushani, Tataymantaj ripushani, —nerka Jesús.

<sup>29</sup> Yachacojcunanka payta nerka:

—Cunanka sut'ita parlanqui manataj rijch'acuywanchu ninqui. <sup>30</sup> Cunammin yachaycu tucuy imata yachaskayquita manataj runa tapusunanta suyanayquichu tiyan. Chayraycu Diosmanta cachamuska Wawan caskayquita jap'icuycu, —nispa.

<sup>31</sup> Jesús paycunaman nerka:

—Cunanka nokapi jap'icushanquichej. <sup>32</sup> ¡Khaway! Chay hora ja-munña chayamunñataj. Kancunari ch'ekeraskas canquichej sapa ujtaj quiquin wasinman aykecunquichej. Nokatataj sapallayta sakerpawan-quichej. Nokarí manataj sapallaychu cani. Tatay nokawanpuni cashan. <sup>33</sup> Chay imasta nerka quichej nokanejta Diosman allinyachiskas caspa allillanta causanayquichejpaj. Cay pachapi llaquichiskas canquichej. Nokarí cay pachata atiparkaniña. Chayraycu sonkoyquichejpi call-pachacuychej, —nerka Jesús.

<sup>1</sup> Chay imasta nispaka Jesús janaj pachaman khawarerka nerkataj:

—Tatáy, chay hora chayamunña. Noka Wawayquita jatunchaway noka Wawayquitaj kanta jatunchasunappaj. <sup>2</sup> Imaraycuchus nokaman atiyta kowarkanqui tucuy runas atiyniypi canancupaj. Ajinapi tucuy nokapi jap'icojcunaman wiñay causayta kosaj. <sup>3</sup> Kan c'ata cheka Dios canqui nokatataj cachamuwarkanqui. Kanta nokatapis rejispalla nokanchejwan ujchacuspataj runaka cheka causayman yaycun. Ajina ujchaska caymin wiñay causayka. <sup>4</sup> Noka cay pachapi kanta jatuncharkayqui, kowaskayqui ruwanata tucuspa. <sup>5</sup> Tatáy, manaraj cay pacha ruwaska cashajtin, kanwan cuscapuni carkani. Kanpa cheka cayniyquiwantaj jatunchaska carkani. Cunanka jatunchaway chay quiquin atiyniyoj cayniyquimanjina.

*Jesús mañapun yachacojcunapaj*

<sup>6</sup> 'Cay pacha runasmanta ajllaskacunata kowarkanqui nokajta canancupaj. Kanpata carkancu nokamantaj kopuwarkanqui. Chay ajllaskacunamantaj cheka cayniyquita sut'ita ricucherkaní niskayquitataj casorkancu. <sup>7-8</sup> Cay runasniyman willanayta niwarkanqui, chay niskayquita paycunaman willarkani. Paycunataj niskayquita jap'icorkancu, kanmanta caskanta chekata yachaspa. Yachancuñataj noka kanmanta jamuskayta. Kan cachamuwaskayquitapis creerkancu.

<sup>9</sup> Paycunapaj noka nicushayqui, manataj cay pacha runaspajchu. Manachayrí kowaskayqui runasniypaj nicushayqui kanpata caskancuraycu. <sup>10</sup> Tucuy nokajta cajka kanpata cashan. Tucuy kanpata cajpis nokajtamin. Cay runasinchejnejtataj jatunchaska cani.

<sup>11</sup> 'Manañ cay pachapichu caj rishani. Paycunarí cay pachapi cancu. Nokataj kanman jamushani. Santo Tatáy, kowaskayquicuna atiyniysiwan wakaychay, nokanchejjina ujlla canancupaj. <sup>12</sup> Paycunawan cashaspaka kowaskayquicunata atiyniysiwan wakaycharkani. Chayraycu ni uj paycunamanta chincapunchu. Astawanrí chincapunan carka, chaylla chincapun palabrayquimanjina.

<sup>13</sup> 'Cunanrí kanman jampushaniña. Cay pachapi cashaspataj cay imasta parlani kowaskayquicuna mayta cusicunancupaj, <sup>14</sup> Niskayquita paycunaman willarkaniña, cay pacha runastaj paycunata chejnerkancu. Imaynachus noka mana cay pachamantachu cani, quiquillantaj paycunapis mana cay pacha runaswan causaynincipi ujllachu cancu. Chayraycu cay pacha runas paycunata chejnincu. <sup>15</sup> Mana nishayquichu cay pachamanta paycunata orkhopunayquita. Manachayrí sajra cajmanta wakaychanayquita nicuyqui. <sup>16</sup> Imaynachus noka mana cay sajra pachamantachu cani quiquillantaj paycunapis mana cay sajra pachamantachu cancu. <sup>17</sup> Cheka cajmanjina paycunata kanman t'akay llimphu sonkoyoj canancupaj. Niskayqueka cheka cajmin. <sup>18</sup> Imaynatachus nokata cachamuwarkanqui cay pachaman, ajinallatataj nokapis paycunata cacharkani cay pacha runasman willaramunancupaj. <sup>19</sup> Noka kanman t'akacuni munayniyquipi paycunata wakaychanapaj. Ajinapi paycunapis cheka niskayquinejta kanman t'akaskas cankancu.

*Jesús mañapun tucuy paypi jap'icojcunapaj*

<sup>20</sup> 'Maná paycunallapajchu nicuyqui. Manachayrí willaskancunejta nokapi jap'icojcunapajpis nicuyqui <sup>21</sup> ujlla canancupaj. Kan, Tatáy,

nokapi cashanqui nokapis kanpi cani. Ajinapi nokanchejpis tucuy paycunawan ujlla casunchej. Ajinapitaj cay pacha runas kan cachamuwaskayquita creenkancu. <sup>22</sup> Kanwan ujlla caskaypi jatunchawarkanqui. Nokapis paycunawan ujchacuspa paycunata jatuncharkani nokanchejjina ujlla canancupaj. <sup>23</sup> Noka paycunapi tiyacuni, kantaj nokapi tiyacunqui, paycunapis ujlla canancupaj. Causaynincipi ruwashani nokaman rijch'acoj ujlla canancucama. Munacuyninchejpi ujlla cajtinctutaj cay pacha runas cachamuwaskayquita yachankancu. Yachankancutaj imaynatachus nokata munacuwaskayquita, paycunatapis munacuskayquita.

<sup>24</sup> Tatay, munani kowaskayqui runasniy nokawan cusca canan-cutu. Ajinapi paycunaka wiñaypaj jatunchawaskayquita khawaspa cusi-conkancu. Manaraj cay pachata ruwashaspa munacuwaskayquiraycu jatunchawanqui. <sup>25</sup> Chekan Tatay, cay pacha runaska mana munarkan-cuchu rejsisuya. Nokari kanta rejsiyquipuni. Kowaskayqui runas-niypis cachamuwaskayquita yachancu. <sup>26</sup> Imaynachus caskayquita paycunaman sut'incharkani, sut'inchasajpunitaj c'acha munacuyniyquita rejsinancupaj. C'acha munacuyniyquiwan munacuarkanqui. Cay munacuywantaj nokapis paycunapi tiyacusaj, —nerka Jesús.

## 18

### *Jesusta enemigos nin man jaywaycuncu*

<sup>1</sup> Chay imasta niskanmanta Jesús yachacojcunanwan llajta jawa-man llojserka. Cedrón niska ch'aqui mayu chimpaman uj huertaman rerkancu. Chay huertamantaj yachacojcunanwan yaycorka. <sup>2</sup> Jesuska yachacojcunanwan ashqha cutita chayman rejponi. Chayraycu payta jaywaycusharka, chay Judaska chay huertata rejserka. <sup>3</sup> Ajinamanta Judaska uj jatun tropa soldadosta pusariycucuspa chayman jamorka. Pusamuskasnin uqhupi carkancu israel curajcunaj yanapajcunancu. Jamorkancu, jatun c'anchanaswan ima, makanaswanpis. <sup>4</sup> Jesuska tucuy imata paywan ruwanancuta yachaspa llojserka nerktaj:

—¿Pitataj masc'anquichej?

<sup>5</sup> Paycunataj cuticherkerancu:

—Nazaret llajtayoj Jesusta, —nispa.

Jesusri nerka:

—Noka cani, —nispa.

Jaywaycushaj Judasri jap'iyojcunawan sayasharka. <sup>6</sup> Jesús paycuman: “Noka cani” nejtintaj paycunaka khepaman ithirispa pampaman urmarkancu. <sup>7</sup> Jesuska chayraycu ujtawan taporka:

—¿Pitataj masc'anquichej?

Nerkancutaj:

—Nazaret llajtayoj Jesusta, —nispa.

<sup>8</sup> Jesusrí cuticherkerka:

—Noka cani, nerkyquichejñaka. Sichus nokata masc'awanquichej chayka, sakeychej cay runas ripunancuta, —nispa.

<sup>9</sup> Ajinapi junt'acorka Jesuspa niskan: “Kowaskayquicunamanta ni uj chincapunchu”, nispa. <sup>10</sup> Simón Pedrotaj espadayoj carka. Chayta orkhospa uj runaj paña ningrinpi wajtaspataj c'uturparerka. Chay runari yupaychana-wasipi camachejpa camachin carka, Malco sutiyoy.

<sup>11</sup> Jesusrí Pedroman nerka:

—Espadayquita churay wakaychanaman. Tatay cay ñac'arinaypaj churawarka ¿chayta manachu junt'asaj?

*Anaspa ñaupakenman Jesusta pusancu*

<sup>12</sup> Ajinapi chay tropa soldados camachejnincuwan curajcunaj yanapajcunancipiwan Jesusta jap'iycuspa wataycorkancu. <sup>13</sup> Ñaupajtari pusarkancu Anaspa ñaupakenman. Payka yupaychana-wasimanta curaj Caifaspa suegron carka. Cay watapaj Caifaska curaj cananpaj churaska carka. <sup>14</sup> Payka israel curajcunata caywan yuyaycharka: “Aswan allin cashan uj runa wañunan tucuy Diospa ajllaska runasninpaj”, nispa.

*Pedro nin, Jesusta mana rejiskskanta*

<sup>15</sup> Caifaspa wasinman Jesusta khatisharkancu Simón Pedrowan waj yachacoipiwan. Cay waj yachacojka curajpa rejiskskan caspa patioman Jesuswan yaycorka. <sup>16</sup> Pedrorí puncu jawapi sayacusharka. Chayraycu curajpa rejiskskan yachacojka llojsispa puncu khawaj warmiman nerka Pedro yaycumunanta. <sup>17</sup> Ajinapi chay puncu khawaj warmeka Pedroman nerka:

—¿Manachu kanpis chay runaj yachacojcunamanta canqui?

Pedrori nerka:

—Mana, —nispa.

<sup>18</sup> Chiri caskanraycu wasi camachis chay yanapajcunapiwan patiopi ninata jap'icherkancu k'oñicunancupaj. Pedropis paycunawan casharka chaypi k'oñicuspa.

*Jesús curaj camachejpa ñaupakenpi*

<sup>19</sup> Yupaychana-wasimanta curajka Jesusta taporka yachacojcunamanta yachachiynmantapis. <sup>20</sup> Jesusri cuticherka:

—Nokaka tucuy runaspa ñaupakencupipuni sut'ita parlarkani. Tantacuna-wasispipuni yupaychana-wasi patiopipis yachacherkani. Chaypeka tucuy israelcuna tantacuncu. Nitaj imatapis pacaypeka parlarkanichu. <sup>21</sup> ¿Imaraycutaj tapuwanqui? Tapuy uyariwajcunata. Paycuna yachancu imatachus niskayta, —nispa.

<sup>22</sup> Chayta niskantawantaj chaypi sayashaj yanapajcunamanta ujka Jesusta lak'arka nerktaj:

—¿Ajinatachu curajnjinchejman cutichinqui?

<sup>23</sup> Jesusri cuticherka:

—Sichus mana allinta parlarkani chayka, chay parlaskaymanta sut'ita willay. Allintachus parlarkani chayka ¿imaraycutaj lak'awarkanquirí?

<sup>24</sup> Anastaj Jesusta ajina wataskata cacharka curaj Caifaspaman.

*Ujtawan Pedro nin, Jesusta mana rejiskskanta*

<sup>25</sup> Simón Pedrotaj nina kayllapi sayacusharka k'oñicuspa. Ajinapi chaypi cajcunaka payta nerkanca:

—¿Manachu kanpis yachacojcunamanta canqui?

Paytaj sinchi'ita nerka:

—Manapuni, —nispa.

<sup>26</sup> Curajpa uj camachenka nillarkataj:

—¿Manachu kanta huertapi paywan ricorkayqui?

Huertapi Pedro ningrinta c'utorka chay runaj ayllun carka chayta nejka.

<sup>27</sup> Ujtawan Pedroka mananchacorka. Chay quiquinpachataj galloka wakarka.

*Jesusta pusancu Pilatoj ñaupakenman*

<sup>28</sup> Ajinapi Caifaspa ñaupakenmanta Pilato tiyacoj sumaj wasiman Jesusta pusarkancu. Tutamantataj carka. Israel curajcunaka liimphu canancu caj costumbrencumanjina pascua miqhnata miqhnancupaj. Chayraycu chay sumaj wasiman yaycuya mana munarkancuchu.

<sup>29</sup> Ajinamanta Pilatoka llojsimorka paycuna casharkancu, chayman, nerktaj:

—¿Imata juchachaspataj cay runata apamunquichej?

<sup>30</sup> Paymantaj cuticherkancu:

—Mana sajrata ruwaj cajtenka mana kanman jaywaycumanchu carka, —nispa.

<sup>31</sup> Pilatotaj paycunaman nerka:

—Kancuna payta apaychej. Leyniyquichejmanjina juchanta khawaychej, —nispa.

Israel curajcunataj payman nerkanca:

—Romano leymanjina mana atiyecucho runata wañunanpaj juchachaytaka, —nispa.

<sup>32</sup> Jesús ñaupajta sut'incharkaña imaynata wañunanta. Ajinapi chay niskancunejta Jesuspa niskan junt'acorka. <sup>33</sup> Pilatoka wasiman ujtawan cutiyorka. Jesusta ñaupakenman pusachimuspataj taporka:

—¿Kanchu canqui israelcunaj camachejnín?

<sup>34</sup> Jesusri nerka:

—¿Yuyaniyquimantachu chayrí nokamanta willaskancuraycullachu chayta tapuanqui?

<sup>35</sup> Pilatotaj cuticherka:

—¡Nokaka mana paycunajina israel runachu cani! Llajtamasisniyqui yupaychana-wasimanta curajcunapiwan nokaman kanta jaywaycuwarkancu. ¿Ima mana allintataj ruwarkanquirí?

<sup>36</sup> Jesusri cuticherka:

—Mana cay pachamanta camachejchu cani. Sichus cay pachamanta camachej cayman chayka, yanapajcunay cancuman carka. Paycunataj makanacuncuman carka israel curajcunaman mana jaywaycuska canaypaj. Cunanka camachinaypaj atiyinyka mana cay pachamantachu, —nispa.

<sup>37</sup> Chayraycu Pilatoka nerka:

—Ajinaka ¿camachejchu kanka canqui?

Jesusri cuticherka:

—Kan ninqui ajinamin, camachej cani. Chaypaj nacecorkani. Camachej caspataj cheka cajta willanaypaj cay pachaman jamorkani. Cheka cajta munacojcunaka niskayta uyarispa casuncu, —nispa.

<sup>38</sup> Pilatotaj payman nerka:

—¿Imataj cheka cajrí?

*Cachariska cananpaj Barrabasta ajllancu*

Pilatoka chayta niskanmanta ujtawan llojsimorka israel curajcunaman nerktaj Jesusmanta:

—Nokaka paypi ni imata tarinichu juchachanapajjinaka. <sup>39</sup> Cunari costumbremanjinaka pascua p'unchaypi uj wisk'aska runata cacharinay tiyan kancunapaj. Chayraycu ¿munanquichejchu israelcunaj camachejninta cacharinayta kancunapaj?

<sup>40</sup> Chaymantataj ujtawan sinch'ita khaparerkancu:

—¡Ama chay runataka, manachayrí Barrabasta cucharipuwaycu! —nispa.

Barrabasri runa wañuchi suwa carka.

## 19

*Jesús wañunanpaj juchachaska*

<sup>1</sup> Chayraycu Pilatoka Jesusta pusaycuchispa jasut'icherka.

<sup>2</sup> Asipayanancupajtaj qhishcamanta uj pilluta soldados simp'arkancu. Chaytataj umanman churarkancu. Camachejtajinataj p'achallerkancu culli-puca p'achawan. <sup>3</sup> Payman kayllamusharkancu nisharkancutaj:

—¡Viva, israelcunaj camachejnín! —nispa.

Payta lak'asharkancutaj.

<sup>4</sup> Watejmanta Pilatoka jawaman llojsimorka paycunamantaj nerka:

—¡Khawaychej, jawaman payta pusamuyquichej ni ima juchata paypi tariskayta yachanayquichejpaj! —nispa.

<sup>5</sup> Jesusri llojsimorka umanpi qhishca pilluwan churaska chay culli-puca p'achawan p'achalliskataj. Pilatoka paycunaman nerka:

—¡Cay chay runaka! —nispa.

<sup>6</sup> Yupaychana-wasimanta curajcunari yanapajcunapiwan Jesusta ricuspa mayta khaparerkancu:

—¡Chacataycuy, chacataycuy! —nispa.

Pilateri nerka:

—Kancuna jap'iychejpis, chacataychejpis, imanaychejpis. Nokaka mana paypi juchata tarinichu, —nispa.

<sup>7</sup> Israel curajcunaka cuticherka:

—Nokaycojta leyniyu capuwaycu. Chaymanjinataj chay runaka wañunan tiyan Diospa Wawan ruwacapusanraycu, —nispa.

<sup>8</sup> Chay niskancuta uyariskanmanta Pilatoka astawan manchachicaporka. <sup>9</sup> Ujtawan wasiman yaycuspataj Jesusta taporka:

—¿Maymantataj canquirí?

Jesusrí ni imata cuticherka:

<sup>10</sup> Chayraycu Pilatoka taporka:

—¿Manachu nokaman parlawanqui? ¿Manachu yachanqui atiyniyoj caskayta cacharisunappaj chayrí chacatasunappajpis?

<sup>11</sup> Jesustaj cuticherka:

—Manachus Dios atiyya kosunquiman chayka, ni imata atiwajchu nokawan ruwayta. Chayraycu nokata kanman jaywawaqka aswan juchayoj cashan, —nispa.

<sup>12</sup> Chayta niskanraycutaj Pilatoka masc'asharka imaynapijis payta cucharipuya. Israel curajcunari khaparishallarkancupuni:

—Sichus cay runata cacharipunqui chayka, mana Roma camachej Cesarpa amigonchu canqui. Pillapis pay quiquin camachejpaj ruwacojka Cesarpa contranpi churacun, —nispa.

<sup>13</sup> Chayta uyarispá Pilatoka jawaman pusacherka Jesusta. Chaypiri autoridad tiyaycunapaj uj jatun tiyana churaska carka. Chay lugartaj, Gabata sutiyoj, rumiwan c'achitu ruwaska plazajina carka. Pilatotaj chay tiyanapi tiyaycucorka. <sup>14</sup> Chay p'unchaytaj carka pascua waquichi-cuna, pakarin. Pilatori israel curajcunaman nerka:

—¡Cayka camachejniyquichejka! —nispa.

<sup>15</sup> Chayraycu paycunaka khaparerkancu:

—¡Wijch'uy, wijch'uy! ¡Chacataska cachun! —nispa.

Pilatotaj paycunaman nerka:

—¿Imayna? ¿Camachejniyquichejtachu chacatasaj?

Yupaychana-wasimanta curajcunataj cuticherkanca:

—¡Cesarlla camachejniycoka! ¡Mana wajka canchu! —nispa.

<sup>16</sup> Chayraycu Pilatoka paycunaman Jesusta jaywarka chacataska cananpaj. Paycunataj Jesuswan munaynincumanjinra ruwarkancu.

### *Jesusta chacatancu*

<sup>17</sup> Jesusri cruzninta apaspa llojserka T'oju sutichaska lugarman. Hebreo parlaypi nej cancu, Gólgota. <sup>18</sup> Chaypitaj payta chacatarkancu waj iscay runastawan ladosninpí. Jesustaj chaupi caj cruzpi carka. <sup>19</sup> Pilatoka uj kelkaskata ruwachispa cruznin patapi churacherka. Kelkaskaka nerka: “Cayka Nazaret llajtayoj Jesús, israelcunaj camachejnín”, nispa. <sup>20</sup> Jesús chacataska chay lugarka llajta kayllapi carka. Ajinapi israelcunamanta ashqhas chay kelkaskata leerkanca. Chaytaj hebreo, latín, griego parlaycunapi kelkaska carka. <sup>21</sup> Chayraycu yupaychana-wasimanta curajcunaka Pilatomana nerkanca:

—Ama kelkaychu, “Israelecunaj camachejnintaka” Manachayrí, “Chay runa nerka, ‘Noka cani israelcunaj camachejnín’”. Ajinata kelkaycuy, —nispa.

<sup>22</sup> Pilatotaj cuticherka:

—Kelkaskayka, kelkaskaña, —nispa.

<sup>23</sup> Soldadoska Jesusta chacataskancumanta khepata p'achasninta jap'ispa tawaman parterkancu sapa ujnincupaj. Ujnín p'achantaj pata-mantapacha uj awaskalla carka, mana sirayniyoj. <sup>24</sup> Chayraycu soldadoska ninacusharkancu:

—Ama lliq'inachu caytaka, manachayka suertepi yachacuchun pipajchus cananta, —nispa.

Chay ruwaskancuwan Diospa palabranpi cay kelkaska junt'acorka: “Suertesta chokaspa p'achasnitya partinacorkancu”. Ajinatataj chay soldadoska ruwarkancu.

<sup>25</sup> Jesuspa cruznинејпи sayasharkancu maman, Cleofaspa warmin María (payka mamanpa hermanan), Magdala llajtayoj Mariapiwan.

<sup>26</sup> Jesuska mamanta munaska yachacojnintawan cusca sayashajta ricuspa, mamanman nerka:

—Mamáy, caymin wawayqueka, —nispa.

<sup>27</sup> Chay yachacojnintmantaj nerka:

—Caymin mamayqueka, —nispa.

Chaymantapachataj chay yachacojka Jesuspa mamanta wasinman wajyacaporka.

### *Jesuspa wañuynin*

<sup>28</sup> Chaymantataj Jesús tucuy imas paymanta tucuskaña caskanta yachaspa Diospa palabranmanjina nerka:

—Ch'aquiwan, —nispa.

<sup>29</sup> Uj yuru junt'a c'arcu ujyana chaypi carka. Uj esponjataj chay ujyanaman chhapuspa hisopo c'aspiman churarkancu. Chaywantaj Jesuspa simincama taripacherkanca. <sup>30</sup> Chay ujyanata ch'onkaricorka. Chaymantataj nerka:

—Ruwanayta tucuniña, —nispa.

Umanta c'umuycuspataj causayninta Diosman jaywacorka.

*Jesús t'uisiska carka*

<sup>31</sup> Chayka samacuna p'unchaypaj waquichicunapi carka. Israel curajcunaka munarkancu ayas chacatanasmanta uraycuchiskas canancuta manaraj samacuna p'unchayta. Chay samacuna p'unchay may jatun caskanraycu ajinata munarkancu. Ajinapi Pilatoman nerkanca, cruzpi cajcunaj chaquisnincta soldados p'aquiranancuta aswan uskhayta wañunancupaj. <sup>32</sup> Chayraycu soldados Jesuswan chacataska cajcunamanta ujman chimpaspa chaquisninta p'aquerkancu. Ujnintapis quiquillantataj ruwarkancu. <sup>33</sup> Jesusman chimpamusparí paytaka wañuskataña tariparkancu. Chayraycu paypa chaquisnintaka mana p'aquerkancchu.

<sup>34</sup> Astawanrí chay soldadosmanta ujenka espadanwan Jesuspa wajtanta t'ujsiyorka. Chay quiquinpacha yawarwan yacuwan uqhumanta llojsimorka.

<sup>35</sup> Noka chayta ricuspa willarkayquichejña. Willaskaytaj chekamin. Niskay cheka caskantataj Dios yachan. Chaytataj willarkayquichej Jesuspipuni jap'icunayquichejpaj. <sup>36</sup> Chay imasnejtamin Diospa palabran junt'acorka: "Ni uj tullunpis p'aquiskachu canka". <sup>37</sup> Wajnejpitaj palabranka cayta nin: "T'ujsiskancu runata paycuna khawankancu".

*Jesús p'ampaska*

<sup>38</sup> Chay imasmanta khepata Arimatea llajtayoj José Pilatoman rerka ayata mañaj. Chay Joseka Jesuspa khaticojnin carka. Payka pacayllamanta khaticorka israel curajcunata manchachicuskanraycu. Pilatomanta mañajtintaj Pilatoka, "Apacapullay", nerka. Chayraycu payka jamuspa Jesusta apacaporka. <sup>39</sup> Nicodemopis jamullarkataj. Ñaupajpi Jesusman tuta jamoj runa, payka. Apamorka sumaj k'apayniyoj jampita mirrawan aloeswan chajruskata. Chay apamusanka quintaljina carka. <sup>40</sup> Paycunaka Jesusta okharispataj mayt'unaswan chay sumaj k'apayniyoj jampitawanpis churaycuspa mayt'uyorkancu. Chayta ruwarkancu israelcunaj p'ampana costumbrencumanjina. <sup>41</sup> Chacataska carka chaynejpi uj huerta carka. Chay huertapitaj uj mosoj p'ampana ruwaska carka. Chay p'ampanapi ni uj ayapis churaskarajchu carka. <sup>42</sup> Israelpunka waquichicuna p'unchaynincu caskanraycu, kayllitapi chay p'ampana caskanraycupis, Jesusta chayman churarkancu.

## 20

*Jesuspa causarimuyin*

<sup>1</sup> Domingo p'unchaypi Magdala llajtayoj María tutamanta lakhallataraj p'ampaman jamorka. P'ampanapi churaska p'alta rumitataj wajnejman cuyuriskata ricorka. <sup>2</sup> Chayraycu Simón Pedroman Jesuspa munaska yachacojninmanpis willaj uskhayta rerka. Nerkataj:

—¡Señorinchejta p'ampamananta apacapuskancu! Manataj yachaycuchu maymanchus payta churamuskanca, —nispa.

<sup>3</sup> Chayraycu Pedroka chay waj yachacojwan p'ampamanan rinancupaj llojserkancu. <sup>4</sup> Chanta correspa iscaynincu rerkanca. Chay waj yachacojri aswan uskhayta rispa Pedrota atiparka. Ñaupajta p'ampamanan chayaspa <sup>5</sup> khawaycurispataj chaypi caj mayt'unasta ricorka, manataj yayorkachu. <sup>6</sup> Chaymanta Simón Pedroka paypa

khepanta chayamorka. P'ampanamantaj yaycorka. Mayt'unastari sakeskata ricorka.<sup>7</sup> Umanpi churaska mayt'unatataj manaña cay waj mayt'unaswan cuscatachu ricorka. Manachayka wajnejpi ricorka, imayna mayt'uskachus carka ajinata.<sup>8</sup> Chanta ñaupaj jamoj yachacojpis p'ampanaman yaycuspa ricullarkataj, creeytataj kallarerka.<sup>9</sup> Paycunaka manaraj entienderkancuchu Jesusmanta cayjina kelkaska caskanta, pay wañuymanta causarimunan tiyan.<sup>10</sup> Chayraycu yachacojcunataj wasincuman cutiporkancu.

*Magdala llajtayoj Mariaman Jesús riqhurin*

<sup>11</sup> Mariaka p'ampana justu jawapi wakaspa sayacusharka. Wakashaspataj p'ampana uqhuta khawaycorka.<sup>12</sup> Chaypitaj iscay angeesta yuraj lliphipej p'achasniyoja tiyashajta ricorka. Jesús churaska carka, chaypi paycunata tiyashajta ricorka. Ujninta cabeceranpi, ujnintataj jayt'anani ricorka.<sup>13</sup> Angelestaj nerkanca:

—Doña ¿imaraycutaj wakashanquirí?

Mariataj nerka:

—Señorniyya apacapuskancu. Manataj yachanichu maymanchus payta churamuskanquita, —nispa.

<sup>14</sup> Chayta niytawan khepaman cutiricuspa, Jesusta sayashajta ricorka manataj yacharkachu Jesús caskanta.<sup>15</sup> Jesusri payta nerka:

—Doña ¿imaraycutaj wakashanquirí? ¿Pitataj masc'ashanquirí?

Mariaka hortelano caskanta yuyaspa payman nerka:

—Señor, kan payta apacaporkanqui chayka, willaway maymanchus churamuskanquita, nokataj apacapusaj, —nispa.

<sup>16</sup> Jesusri payta nerka:

—¡María! —nispa.

Paytaj cutirimuspa kayllaycorka nerktaj:

—¡Yachachejný!

<sup>17</sup> Jesustaj nerka:

—Amaña jap'iwaychu. Pisillataña kancunawan casaj, manaraj Tatayman wicherishaskayraycu. Kanrí riy hermanosniyman nimuy paycunaman: Wicheripushani Tataypaman, Tatayquichejpaman; Diosniyman, Diosniyquichejman, —nispa.

<sup>18</sup> Magdala llajtayoj Mariataj rerka yachacojcunaman willamoj:

—¡Señorninchejta ricuni! —nispa.

Willallarkataj imatachus payman niskantapis.

*Yachacojcunaman Jesús riqhurin*

<sup>19</sup> Quiquin Domingo p'unchaypi ch'isiyayta yachacojcunanka tanta-corkancu. Israel curajcunata manchachicuskancuraycu sumajta pun-custa wisk'aycucorkancu. Jesusri yaycumorka paycunaj chaupincupitaj sayaycorka. Napaycorkataj:

—Kancunapaj c'acha causay cachun, —nispa.

<sup>20</sup> Chayta niskanmanta maquisninta wajtantawan paycunaman ricuchicorka. Chayraycu yachacojcunan Señornincuta ricuspa mayta cusicorkancu.<sup>21</sup> Ujtawantaj paycunaman nerka:

—Kancunapaj c'acha causay cachun. Dios Tatay nokata cachamuwarka, ajinallatataj nokapis kancunata cachayquichej, —nispa.

<sup>22</sup> Chayta niytawan paycunaman phucuycorka nerktaj:

—Santo Espirituta koshayquichej, jap'icuychej.<sup>23</sup> Ajinaka pimantapis juchasninta khechunquichej chayka, juchasnenka khechuskaña. Pitapis juchasninpi sakenquichej chayka, juchasnenka wiñaypaj apan, —nispa.

*Tomaspis Jesusta ricun*

<sup>24</sup> Mellizo niska Tomásri chunca iscayniyoj yachacojcunanmanta uj carka. Payka Jesús jamorka, chay ch'isi mana chaypichu carka paycunawan.<sup>25</sup> Chayraycu chay waj yachacojcunaka payman nisharkancu:

—Señornincheja ricorkaycu, —nispa.

Payrí nerka:

—Sichus maquisnippi clavo jusc'usta mana ricuymanchu, nitaj dedoya chay clavo jusc'usman churaycuymanchu, maquiytapis mana wajtanman churaycuymanchu chayka, ni jayc'aj creesajchu pay causashaskantaka, —nispa.

<sup>26</sup> Khepan Domingo ujtawan yachacojcuna chayllapitaj tantacorkancu. Tomaspis paycunawan casharka. Puncustaj sumaj wisk'askas carkancu. Jesusri yaycumorka, paycunaj chaupincipitaj sayaycorka. Napaycorkataj:

—Kuncunapaj c'acha causay cachun, —nispa.

<sup>27</sup> Tomastataj nerka:

—Dedoyquita apamuy khawaytaj maquisniyta. Maquiyquita apamuy wajtayman churaycuy. Amañataj mana jap'icojka caychu. Manachayrí nokapi jap'icuy, —nispa.

<sup>28</sup> Tomastaj cutichispa nerka:

—¡Señorní, Diosní! —nispa.

<sup>29</sup> Jesustaj payman nerka:

—Ricuskayquiraycu nokapi jap'icunqui. Waquinrí mana cayjinata riconkancuchu chaywanpis nokapi jap'icuwankancu. Paycunaka may cusiskas cankancu, —nispa.

*Cay ricuchinas jap'icunayquichejpaj kelkaska*

<sup>30</sup> Jesuska yachacojcunarpa ñaupakencipi ashqha waj ricuchinas taraj ruwarka. Chaycunaka mana cay libropi kelkaskachu cancu.

<sup>31</sup> Manachayrí cay waquin ricuchinaslla cay libropi kelkaskas cancu. Ajinapi chayta leespa yachanquichej Jesuska jamunan carka chay Cristo, Diospa Wawan, caskanta. Chayta creespa paypi jap'icuspataj wiñay causayniyoj canayquichejpaj cay libroka kelkaska carka.

## 21

*Galilea kocha cantopi Jesús riqhurin*

<sup>1</sup> Chaymanta khepata ujtawan Jesuska yachacojcunaman pay quiquin ricuchicorka. Chayka carka Galilea kocha cantopi. Cayjinata riqhurerka. <sup>2</sup> Chaypi kanchis yachacojcuna cusca casharkancu. Simón Pedro, mellizo Tomás, Caná llajtayoj Natanael, Zebedeoj wawasnin, iscay waj yachacojcunapiwan carkancu. <sup>3</sup> Simón Pedrori paycunaman nerka:

—Challwa jap'ej rishani, —nispa.

Ujcunataj nerkanca:

—Jacu nokaycuwanpis, —nispa.

Rispataj barcoman yaycorkancu. Chay tutapirí nitaj uj challwatapis jap'erkancuchu. <sup>4</sup> Sut'iyamuytataj Jesuska kocha cantopi sayashaj

riqhurerka. Yachacojcunari mana yacharkancchu Jesús caskanta.  
<sup>5</sup> Jesustaj paycunaman nerka:

—Amigos ¿manachu challwa capusunquichej?

Paycunataj cutichererkancu:

—Manamin, —nispa.

<sup>6</sup> Jesustaj paycunaman nerka:

—Barcoj pañannejman ch'ipayquichejta chokaycuychej  
 jap'inquichejtaj, —nispa.

Ajinataj paycunaka ch'ipancuta chokaycorkancu. Orkhoytataj  
 manaña aterkancchu challwa junt'a caskanraycu. <sup>7</sup> Chayraycu Jesuspa  
 munacuskan yachacojka Pedroman nerka:

—Señorninchej, payka, —nispa.

“Señorninchej, payka”, nejta uyarispataj Simón Pedroka jawa  
 p'achanta chumpiycucorka, chay p'achaka llanc'ashaskanraycu  
 orkhoska carka. Chayta ruwaspataj kochaman phinquiycorka.

<sup>8</sup> Barcoka mana carupichu carka cantomanta, pachaj metropijinalla.  
 Chayraycu chay waj yachacojcunaka cantoman bartoca apamorkancu  
 challwatataj ch'ipa junt'ata aysamusharkancu. <sup>9</sup> Jallp'aman llojsispataj  
 nina brasa patapi challwatawan t'antatawan churaskata ricorkancu.

<sup>10</sup> Jesusri paycunaman nerka:

—Jap'iskayquichejmanta challwasta apamuychej, —nispa.

<sup>11</sup> Ajinapi Simón Pedroka ch'ipata challwa junt'askata jallp'aman  
 aysamorka. Pachaj phishka chunca quinsayo jatuchej challwastaj  
 carka. Chaywanpis ch'ipancoka mana lliq'icorkachu. <sup>12</sup> Jesustaj paycu-  
 naman nerka:

—Jamuychej, miqhucuychej, —nispa.

Yachacojcunanmantataj ni mayken tapoj churacorkancchu: “¿Pitaj  
 canqui?” nispa, Señornincu caskanta yachaspa. <sup>13</sup> Jesustaj nina  
 brasaman chimpaspa t'antata okharispa paycunaman jaywarka, chall-  
 watapis quiquillantataj.

<sup>14</sup> Wañuymanta causarimuskanmanta Jesús yachacojcunanman  
 riqhuriskanka quinsa caj cuti carka.

Jesús tapun Pedrota: “¿Munacuwanquichu?”

<sup>15</sup> Miqhuskancutawan Simón Pedrota Jesuska taporka:

—Jonaspa wawan Simonníy ¿paycunamanta astawanchu munacuwan-  
 qui?

Pedrotaj nerka:

—Arí, Señorníy, kan yachanqui munacususkayta, —nispa.

Jesusri nerka:

—Yachachiy mosoj nokapi jap'icuwajcunya,\* —nispa.

<sup>16</sup> Iscay caj cutita payman taporka:

—Jonaspa wawan Simonníy ¿munacuwanquichu?

Paytaj nerka:

—Arí, Señorníy, kan yachanqui munacususkayta, —nispa.

Jesustaj nerka:

—Runasniyta khawapuway,<sup>†</sup> —nispa.

<sup>17</sup> Quinsa caj cutita taporka:

—Jonaspa wawan Simonníy ¿munacuwanquichu?

\* **21:15** Literal: ovejitasniyta miqhuchipuway. † **21:16** Literal: ovejasniyta michiy.

Pedrori quinsa cutita, “¿Munacuwanquichu?” tapuskanraycu phuticorka. Nerkataj:

—Señorníy, tucuy imata yachanqui. Kan yachanquiña munacususkayta,—nispa.

Jesustaj nerka:

—Munaska runasniyta yachachiy.<sup>‡</sup> <sup>18</sup> Chekatapuni niyqui: Joven cashaspaka chumpiyucuoj canqui maymanchus munaskayquimantaj rej canqui. Viejoña casparí maquisniyquita okharinqui wajñataj chumpichisonka mana munaskayquimantaj pusasonka,—nispa.

<sup>19</sup> Chaytataj nerka sut'inchananpaj Pedroka imayna wañuywanchus Diosta jatunchananta. Chayta niytawantaj Jesuska nerka:

—Khaticuway,—nispa.

<sup>20</sup> Pedrotaj cutircamuspa uj yachacoja khepanta rishajta ricorka. Chay yachacoja Jesuspa munaskan carka. Payka carka pascua miqhunata miqhunanpaj Jesuswan cusca tiyaycoj tapojtaj: “Señorníy ¿pitaj jaywaycsonkarí?” Chay yachacoja Pedroka ricorka. <sup>21</sup> Ricuspataj Pedroka Jesusta taporka:

—Señorníy ¿imaynataj paywan canka?

<sup>22</sup> Jesustaj nerka:

—Sichus munayman cutimunaycama pay causananta ¿imatá ruwanayqui tiyan? Khaticuway,—nispa.

<sup>23</sup> Chay niskanta uyariskancutawan yachacojpura parlaskancu carka, chay yachacoj mana wañunamanta. Jesusrí mana nerkachu pay mana wañunantaka, manachayrí: “Sichus munayman cutimunaycama pay causananta ¿imatá ruwanayqui tiyan?”

#### *Cay kelkaska chekamin*

<sup>24</sup> Chay imasmanta willaj cay librotapis kelkaj yachacojka chaymin. Yachaycutaj willaskasnin cheka caskanta.

<sup>25</sup> Jesuska may ashqha ruwaskasta ruwarka. Sichus chaycuna, uj-manta uj, librospi kelkacunman carka chayka, chay librosta churanapajka mana, sina, cay pachantinpipis campo canmanchu. Ajina cachun.

---

<sup>‡</sup> **21:17** Literal: ovejasniyta miqhuchipuway.

## LOS HECHOS DE LOS APÓSTOLES

<sup>1-3</sup> Munaska Teófilo, ñaupajpi kelkamorkani Jesuspa tucuy ruwaskasninta yachachiskantawan Dios payta pusacapuskancama. Jesús cachasninta ajllacuspa Santo Espíritoj atiyninnejta yachacherka. Wañuskanmanta khepatataj pay quiquin causashaj cachasninman ashqha cutista riqhurerka. Tawa chunca p'unchaycunata paycunawan caspa ashqha jatuchej ricuchinasta ruwarka. Arí, pay munarka paycuna sumajta yachanancuta wañuskanmanta causarimpuskanta. Chay p'unchaycunapi paycunaman parlarka Dios camachin, chaymanta. Chanta khepatataj Dioska Jesusta okharispa janaj pachaman pusacaporka.

<sup>4</sup> Jesuska cay pachallapiroj cashaspa cachasninwan tantacorka. Camacherkataj paycunata:

—Jerusalén llajtapi suyaychej Santo Espíritu kancunaman cachamuska canancama. Paytamin Tatay Dioska cachamunantapuni sumajta nerka. Chaytataj noka willarkayquichejña. <sup>5</sup> Juanka runasta yacupi bautizarka, juchasnincuta sakejtincu. Pisi p'unchaycunamantarí Dios kancunata bautizaspa Santo Espirituta sonkoyquichejman cachamusonkachej payllapaj causanayquichejpaj, —nerka Jesús.

*Dios Jesusta janaj pachaman pusacapun*

<sup>6</sup> Jesuspa cachasnenka paywan tantaska cashaspa taporkancu:

—Tucuy atiyniyoj Señor ¿cunanchu Israel llajta-masisninchejta cacharichispas sayachinqui camachinancupaj?

<sup>7</sup> Jesustaj paycunaman nerka:

—Dios Tatallay chay imastaka munayninmanjina atiyninwantaj ruwanka. Mana munanchu yachanayquichejta jayc'ajchus nitaj imaynatachus chayta ruwanantaka. <sup>8</sup> Kancunapi Santo Espíritu tiyacojinri atiyninta jap'inquichej nokamanta willajcuna canayquichejpaj. Ajinapi willanayquichej tiyan Jerusalén llajtapi, tucuy Judea jallp'api, Samaria jallp'api, cay jallp'aj tucucuynincamapis.

<sup>9</sup> Chayta niskantawan cachasnin khawashajtincu Dios Tataka pusacaporka Jesusta janaj pachaman. Uj phuyutaj Jesusta pacaycorka. Chayraycu payta manaña ricorkancuchu. <sup>10</sup> Jesús ripushajtintaj paycunaka janaj pachata khawasharkancu t'ucurispa. Ajinamanta iscay kharis yuraj p'achasniyoj paycunaman riqhurimuspa <sup>11</sup> nerkanca:

—Galilea runacuna ¿imaraycutaj janaj pachata khawashanquichej? Jesuska janaj pachaman okhariskaña, pay quiquin ujtawan cutimonka. Janaj pachaman rishajta ricorkanquichej ajinallatataj cutimonka, —nispa.

*Matiasta ajllancu*

<sup>12</sup> Chanta Jesuspa cachasnenka Olivos niska orkomanta Jerusalén llajtaman cutimporkancu. Chay orkoka Jerusalén kayllalla cashan. Diospa unay runasnenka samacuna p'unchaypi ajinallata purinancu caj. <sup>13</sup> Jesuspa cachasnenka Jerusalenman yaycuspa wasej pata caj pisonman rerkanca. Chaypi pisi p'unchaycunapaj tiyacoj: Pedro, Jacobo, Juan, Andrés, Felipe, Tomás, Bartolomé, Mateo, Alfeoij

wawan Jacobo, zelote partemanta Simonwan, Jacoboj wauken Judaspiwan. <sup>14</sup> Tucuy paycuna tantacojpuni cancu uj yuyaylla Diosmanta mañacunancupaj. Warmispis paycunawan casharkancu, Jesuspa maman María, Jesuspa waukesninwan.

<sup>15</sup> Pedroka chay p'unchaycunapi Jesuspa yachacojcunampa chaupincupi sayaycucorka. Cristopi chay hermanoska carkancu pachaj iscay chuncayojjina. Pedrotaj nerka:

<sup>16</sup> —Hermanosníy, Santo Espiritoka Diospa palabranpi unay tatanchej Davidnejta Judasmanta sut'incharka. Chay sut'inchaskaka junt'acunapuni carka. Chay Judasmin runasta pusarka Jesusta jap'iycunancupaj. <sup>17</sup> Chay runaka nokanchejwan cusca ruwananpaj churaska carka. Ajinapi nokanchejmanta ujnin carka. <sup>18</sup> Payri sajra ruwaskanmanta kolketa jap'erka. Chay kolkewantaj uj jallp'a rantiska carka. Chanta uray umayoymanta urmaspa ch'akecorka. Ajinaspataj tucuy wijsan t'ojyarka. <sup>19</sup> Jerusalenpi tucuy tiyacojcuna ajinamanta wañuskanta yacharkancu. Chayraycu chay jallp'ataka Yawar Jallp'ata suticharkancu. <sup>20</sup> Ajinatataj camachej Davidpis paymanta uj taquinapi kelkarka:

Wasenka sakeska cachun.

Amataj pipis chaypi tiyacuchunchu.

Nillantaj:

Diospaj ruwanan carka, chay ruwanapaj waj runa churaska cachun.

<sup>21-22</sup> 'Ajinata Judas wañuporka. Chayraycu waj runa churaska canan tiyan. Caypi cashancu nokanchejwan purej hermanos Señor Jesús cay pachallapiraj caskanmantapacha. Paycuna nokanchejwan carkancu Jesús Juanwan bautizacusanmantapacha Dios payta janaj pachaman okhariskancama. Chaywanpis paycunaka Jesús causarimpuskanta ricorkancu. Chayraycu paycunamanta uj churaska canan tiyan nokanchejwan causarimuyninmanta willaj cananpaj,—nerka Pedroka.

<sup>23</sup> Chaypi tantacojcunataj iscay sutista okharerkancu: Chekan runa Jose Barsabás sutiyoyta, Matiastawan. <sup>24</sup> Chanta paycunaka Diosmanta mañacupsa nerka:

—Señorniycu Jesús, kan yachanqui sonkonpi runaj yuyaskanta. Chayraycu sut'ita ricuchiwaycu cay iscay runasmanta maykenta ajllacuskayquita. <sup>25</sup> Ajinapi churaska canka cachayqui cananpaj. Chay ruwanata Judaska juchallicuspa sakeporka. Wañorkataj juchanmanjina wiñaypaj ñiac'arinanpaj,—nispa.

<sup>26</sup> Ajinaspataj suertesta chokarkancu. Suertetaj Matiasman chayarka. Chaymanta payka chunca ujniyoj cachaswan cusca Jesuspa cachanpaj khawaska carka.

## 2

### *Dios Espíritu runaspi tiyacun*

<sup>1</sup> Jesucristopi jap'icojcuna Jerusalenpi uj wasillapi tucuy tantaskas casharkancu. Phishka chunca p'unchayña carka Jesús causarimpuskamanta. <sup>2</sup> Ajinapi ujllata sinch'i wayraj sonaynijina janaj pachamanta sonamorka. Tiyacushaskancu, chay wasipi tucuynincu sonajta uyarererkancu. <sup>3</sup> Paycunataj ricorkancu ashqha laurashaj kallustajina sapa ujnincuman raq'iycucojta. <sup>4</sup> Tucuy paycunaman Santo Espíritu yaycuspa sumajta callpacharka yuyaynincipi. Chaymantataj

Santo Espíritu parlachiskanmanjina waj ashqha parlaycunata parlayta kallarerkancu.

<sup>5</sup> Chay p'unchaycunapi Jerusalenpi tiyacorkancu Diospa ajllaska runasnin, israelcuna. Paycunaka yachacuskanmanjina Diosta sumajpajpuni khawaj cancu cay pachapi tucuy llajtasmanta jamuspa. <sup>6</sup> Chay sonayta uyariytawanka ashqha runas tantacorkancu. Paycunaka sapa ujincoj quiquin parlaynincipi uyarerkancu Jesuspi jap'icojcunaj parlaskancuta. Uyariskancumanta <sup>7</sup> mayta t'ucuspataj ninacusharkancu:

—Tucuy cay parlajcunaka ¿manachu Galilea jallp'amanta cancu? <sup>8</sup> ¿Imaynapitaj paycunata uyarishanchej sapa ujinchejpa parlayninchepi parlajtarí? <sup>9-10</sup> Nokanchej tucuynejmanta canchej: Partiamanta, Mediamanta, Elammanta, Mesopotamiamanta, Judeamanta, Capadociamanta, Pontomanta, Asiamanta, Frigiamanta, Panfiliamanta, Egipo jallp'amanta, Africa jallp'anemanta, Cirene llajtaj aswan carunmantataj. Chaywanpis Roma llajtamanta caypi tiyacojcuna ima cashancu. Paycunamanta waquenka nacecuynincumantapacha Diospa unay runasnin cancu. Waquintaj jatunmantaña Diospa ajllaska runasnin israelcuna canancupaj tijracaporkancu. <sup>11</sup> Caypi cashanchej Creta jallp'amanta Arabia jallp'amantawan. Ajinata parlayninchepi uyarishanchej Jesuspi jap'icojcunaj parlaskancuta: “¡May jatuchej tucunasta Dios ruwan!” —nispa ninacusharkancu.

<sup>12</sup> Tucuy chay runastaj mayta t'ucusharkancu. Manaña ni imata niyta atispataj paycunapura tapunacusharkancu:

—¿Ima niytataj munan tucuy cay imasrí?

<sup>13</sup> Waquinrí Jesuspi jap'icojcunata p'enkaypi riqhurichinancupaj asi-payasharkancu:

—Machaskas cashancu, —nispa.

### *Pedro tucuy runasman willaran*

<sup>14</sup> Pedroka chay chunca ujniyoj cachaswan runaspas ñaupakencupi sayaricorka. Jatunmanta parlaspataj runasta nerka:

—Israel llajta-masis, Jerusalenpi tucuy tiyacojcunapis uyariwaychej. Cayta yachanayquichejta munani. <sup>15</sup> Cay runas mana machaskaschu cashancu yuyaskayquichejmanjinaka. Reparaychej allinta, cay jallp'anchejpi runaska mana machaycuncuchu manaraj pakarin miqhuna horastaka. <sup>16</sup> Manachayrí cayka Diospa unay willajnin Joelpa niskanmanjinamin. Payka nerka:

<sup>17</sup> Wiñaypaj Camachej Dioska nin khepa p'unchaycunapi cayjina cananta:

Tucuy jallp'amanta runasman Santo Espirituta cachamusaj.

Khari wawasniyquichej ususisniyquichejpis atiynywan sut'inchankancu.

Jovenesniyquichejtapis yuyaychasojcunayquichejtapis cheka cajniy-manta ricuchisaj.

<sup>18</sup> Noka Espirituta cachamusaj chay p'unchaycunapi tucuy casuwajcunaman, kharismanpis warmismanpis.

Paycunataj atiynywan willankancu.

<sup>19</sup> Janaj pachapi jatuchej t'ucunasta ruwasaj.

Cay pachapitaj ricuchinasta ruwasaj [tucuy runas juchancuraycu phiñacuskayta reparanancupaj.]<sup>\*</sup> Chay ricuchinas ninawan, yawarwan, k'osfiwanpis cankancu.

<sup>20</sup> Inteka lakhayaponka. Quillapis yawarjina pucaman tucuponka.

May sinch'i mancharina canka manaraj Señor cutimushajtin.

<sup>21</sup> Noka, tucuy atiyniyoj Diosmanta tucuy mañacojcunata juchasnincumanta cacharisaj wiñay causayniyoj canancupaj, —nerka Dios.

<sup>22</sup> Llajta-masisný, uyariwaychej. Dioska ricuchisorkachej Nazaret llajtayoj Jesusta sumajpaj khawaskanta. Chaywanpis t'ucunastawan jatun ricuchinastawan chaupiyquichejpi Jesusnejta atiyninwan ruwarka. Ajinapi kancunaman rejsichisorkachejña Jesuska paypa ajllaskan caskanta. Chaytataj kancunaka sumajta yachanquichej.

<sup>23</sup> Dioska munayninmanjina yachayninmanjinataj unaymantaña yuyarka Jesús wañunanta juchasincheyraycu. Ajinapimin kancuna payta jap'iycorkanquichej Diospa camachiskasninta mana casuspa. Sajra runasman jaywaspataj payta wañuchicherkanquichej chacatanapi.

<sup>24</sup> Payta Dioska wañuskanmantaña causarichimorka. Ajinapi payta sinch'i llaquichej wañuymantा cacharichiporka. Chekatapuni chay wañuyka mana aterkachu payta atipayta. <sup>25</sup> Unay camachej Davidpis Jesucristoj causarimuyninmanta nerka:

Señor Diosniy়pi tucuy sonkoywan jap'icorkani.

Pay nokawanpuni cashan yanapawaspa.

Sayacuwaskanraycutaj paypi jap'icuskayta manapuni sakesajchu.

<sup>26</sup> Chayraycu may cusiska cani.

Simiywanpis cusiyta taquini.

Runas caspapis causasaj sumaj niwaskayquipi jap'icuspa.

<sup>27</sup> Noka kanllata casoj camachiyquimin cani.

Manapuni sakewanquichu wañuska runas cancu, chaypi.

Nitaj cuerpojta ismunanta sakenquichu.

<sup>28</sup> Wiñay causaymanta yachachiwaspapuni pusawarkanqui.

Kan nokawanpuni caspa mayta cusichiwanqui.

<sup>29</sup> Llajta-masis, unay tatanchej Davidmanta sut'ita parlariskayquichej. Payka wañupuspa p'ampaska carka. P'ampananri caypi cunancama cashan. <sup>30</sup> Davidka Diospa willajnin carka. Dioska palabranwan unay payman nerka: "Kanpa khepa alchhisniyquimanta kanjina camachinanpaj ajllaskay Cristota churasaj", nispa. <sup>31</sup> Chayta unayña yachaspa Davidka Jesucristoj causarimuyninmanta kelkarka. Nerka mana sakeskachu cananta wañuska runas cancu, chaypeka, nitaj cuerponpis ismunanta. <sup>32</sup> Dios chay Jesucristota wañuymantा causarichimorka. Tucuy nokaycutaj chayta ricuskaycuraycu Jesucristomanta willajcunan caycu. <sup>33</sup> Ajinaka Dios atiyta kospa payta jatunpaj khawarka tucuya camachinanpaj. Dios Tatana sumaj palabranmanjina Jesuspa sonkonman Santo Espiritu cachamorka, tucuy nokaycumanspis. Chayraycu ricuskayquichejka uyariskayquichejpis chay Espíritoj ruwaskanmin. <sup>34-35</sup> Camachej Davidka mana cuerponpichu janaj pachaman wichererka Jesusjina. Payrí Jesucristomanta kelkarka:

Señorninchej Dios nerka Señorniy Cristoman:

\* 2:19 Ninayan.

“Nokawan cusca tiyaycucuy camachinanchejpaj churanacojcunayquita k'ala atipanaycama”.†

<sup>36</sup> ‘Chayraycu tucuy kancuna, Diospa ajllaskan israelcuna sumajta yachanayquichej tiyan: Dioska chay Jesustamin ajllacuspa churarka tucuya atiywan camachinanpaj. Paytamin kancunaka chacataspa wañuchicherkanquichej.

<sup>37</sup> Pedrota uyariytawan paycunaka sonko nanaya llaquicorkancu. Chayraycu paytawan chay waj cachastawan tapurerkancu:

—Llajta-masis ¿imatataj nokaycu ruwanaycu tiyanrí?

<sup>38</sup> Pedrotaj paycunaman cuticherka:

—Sapa ujniyquichej juchasniyquichejta sakespa Diosman cutiricuychej. Bautizacuychejtaj Señor Jesucristopi jap'icusquichejta ricuchinayquichejpaj. Ajinapi Dioska juchasniyquichejta khechusonkachej. Kancunamantaj Dios c'acha caskanraycu cachamusonkachej Santo Espíritu sonkoyquichejpi tiyacunapaj. <sup>39</sup> Dioska palabranwan nerka: “Payta kancunaman cachamusaj”, nispa. Kancunapaj chay sumaj niskanka cashan, khepan allchhisniyquichejpajpis, carupi tiyacoj tucuy runaspajpis. Señor Diosninchéj picunatachá munan wajyacuya paypi jap'icunancupaj, tucuy chaycunapajpis sumaj niskan cashan, —nispa.

<sup>40</sup> Ajinata Pedroka ashqataraj parlaspa Jesusmanta paycunaman willarka. Mayta reparacherkataj:

—Jesusta wañuchejcuna wiñaypaj sinch'i ñac'arichiskas cankancu. Kancunari ama payta khesachaychejchu paycunajinaka. Ajinapi mana ñac'arichiskaschu canquichej, —nispa.

<sup>41</sup> Ajinataj uyarejcunamanta waquenka Pedroj niskanta casorkancu. Chaymantataj paycunaka Jesucristopi jap'icusquancuta ricucherkanca bautizacusp. Chay p'unchaypitaj yapacorkancu quinsa warankajina Jesuspi jap'icojcuna. <sup>42</sup> Chay jap'icojcunaka Jesuspa cachasninpa yachachiskancuta sumajta casusharkancu. Paycunapurapis cus-cachacuypi allinta causacoj cancu. Ajinallatataj miqhuytawan Jesuspa wañuskanta yuyaricoj cancu t'antata partispa. Diosmantapis cusca mañacoj cancu.

### *Jesucristopi jap'icojcuna cuscalla causacoj cancu*

<sup>43</sup> Jesuspa cachasninta Dioska ashqha t'ucunasta jatun ricuchinastawan ruwacherka. Chayraycu tucuy runas mayta manchachicorkancu, Diosta jatunpaj khawaspera. <sup>44</sup> Jesucristopi jap'icojcuna tucuynincu uj yuyaylla carkancu. Capuynincumantapis pisichicuskancumanjina yanapanacoj cancu. <sup>45</sup> Jallp'asnincutapis capuynincutapis venderaspa tucuy hermanosman pisichicuskancumanjina t'akaspa koj cancu. <sup>46</sup> Yupaychana-wasimanpis sapa p'unchay uj yuyaylla rej cancu. Sapa ujincoj wasincipi miqhoj cancu t'antata partispa Jesuspa wañuskanta yuyaricunancupaj. Miqhunancutapis may cusiywan llamp'u sonkowan cusca miqhucoj cancu. <sup>47</sup> Paycunaka Diosta yupaychaspa causacorkancu. Tucuy runastaj paycunata sumajpaj khawarkancu. Señor Jesuska atiyninwan sapa p'unchay yapamoj paypi jap'icuspa tantacojcunaman. Chay yapacamojcunataj carkancu juchamanta cachariskas cajcuna.

† 2:34-35 Literal: chaquisniyqui urapi churanaycama.

**3***Pedro suchu runata thañichin*

<sup>1</sup> Uj p'unchay Pedrowan Juanwan yupaychana-wasiman risharkancu chaupi tardeta. Chaytaj Diosmanta mañacuna hora carka. <sup>2</sup> Yupaychana-wasej C'achitu puncumman uj suchuta sapa p'unchay runas apaj cancu. Chay runari nacecuskanmantapacha ajina suchu carka. Chayman yay-cojcunamanta limosnasta pay mañacoj. <sup>3</sup> Chay suchu runataj ricorka Pedrota Juantawan yupaychana-wasiman yaycushajta. Paycunaman-tataj pisichicuskanpi mañacorka. <sup>4</sup> Pedrowan Juanwanka payta allinta khawaycorkancu. Pedrotaj nerka:

—Khawariwaycu, —nispa.

<sup>5</sup> Suchu runataj sumajta khawasharka paycunamanta imallatapis jap'iyya suyaspas. <sup>6</sup> Pedro nerka:

—Mana phatayoj cani. Capuwaskantarí koskayqui. Nazaret llajtayoj Jesucristoj atiyninwan camachiyqui: Jatarispa puriy.

<sup>7</sup> Chayta nispataj Pedroka suchuta paña maquinmanta aysarispa sayaycucherka. Chaypachataj suchoj chaqui mokosnin callpachaskas caspa thañicaporkancu. <sup>8</sup> Chanta suchu carka, chay runaka phinquirispa sayarerka. Puriyta kallarispataj paycunawan cusca yupaychana-wasiman yaycorka. Paytaj phinquirispa sumajta purispataj Diosta mayta jatuncharka. <sup>9</sup> Tucuytaj ricorkancu purishajta Diosta yupay-chashajtawan. <sup>10</sup> Runastaj reparaspa chay runaka unay suchu caskanta rejserkancu. Yacharkancutaj pay yupaychana-wasi C'achitu puncipi tiyaska mañacoj caskantapis. Mayta mancharicuspataj t'ucorkancu chay suchu runa thañicuskanmanta.

*Pedro willaran yupaychana-wasipi*

<sup>11</sup> Suchu carka, chay runataj Pedromanta Juanmantawan mana cacharicojchu. Tucuy runastaj t'ucuspa uskhayta paycunata khaterkancu chay Salomón niska yupaychana-wasi yaycunaman. <sup>12</sup> Pedrorí ashqha runasta ricuspa paycunaman parlarka:

—Israel llajta-masis ¿imaraycutaj runa runa thañicuskanmanta t'ucushanquichejri? Ama nokaycuta t'ucuspa khawawaycuchu. Mana nokaycoj atiyniycuwanchu cay runaka thañicorka. Nitaj chekan runas caskaycuraycuchu cayka ruwacun. <sup>13</sup> Manachayrí Dios ruwarka. Payllata unay tatasninchej Abraham, Isaac, Jacobpis casuspa yupaycharkancu. Dios churarka ajllaska camachin Jesusta may jatunpaj khawaska cananpaj. Paytataj kancuna cay pacha curajcunawan jap'iycucherkanquichej Pilatoman jaywanancupaj. Chaywanpis paypaa ñaupakenpi Jesusta wijch'uytokanquichej. Pilatoka sumajta khawaspa cacharipuya munashajtinpis kancunaka chacatanantapuni mañarkanquichej. <sup>14</sup> Ajinapi khesacharkanquichej Jesusta. Payka Diosllata casoj, chekan ruwajmin. Astawanpis mañarkanquichej runa wañuchi cachariska cananta. <sup>15</sup> Ajinamanta wañuchicherkanquichej wiñay causayta koj Jesusta. Payta Dios causarichimorka wañuymanta. Nokaycutaj Jesusta causarimuskanmanta khepata ricuspa willaycu payka chekata causarimuskanta. <sup>16</sup> Jesús tucuy atiyniyoj caskanta jap'icuspa cay runa thañicorka. Payta rejsinquichej ricunquichejtaj. Jesuspi jap'icuspa cay runa sumajta thañicorka tucuuniyquichej ricushajtiyquichej.

<sup>17</sup> ‘Cunanka llajta-masis, yachani kancuna mana reparaspa Jesúsp Diospa ajllaskan caskanta payta ñac'arichiskayquichejta. Curajcunayquichejispi mana repararkancchu. <sup>18</sup> Astawanrí Dioska ajinapi junt'arka unay willajcunannejta niskanta. Chay willajcuna unaymantapacha sut'incharkancu Diospa ajllaskan Cristoka ñac'arinanta. <sup>19</sup> Chayraycu juchasniyquichejta sakespa Diosman cutiricapuychej juchasniyquichejmanta llimphuchaskas canayquichejpaj. Chanta Señor Dios sonkosniyquichejta callpachasonkachej cusiskas causanayquichejpaj. <sup>20</sup> Chaypaj Dios unay ajllaskan Jesusta cachamusonkachej camachinanpaj. Payka Cristomin. <sup>21</sup> 4.27 Janaj pachapeka cacunan tiyan\* Dios tucuy imata allinyachinan, chay p'unchaycama. Tucuy chayta Dios nerka payman t'akaska unay willajcunannejta. <sup>22</sup> Chekatapuni Moisés unay tatasninchejman nerka: “Señor Dios cay pachaman cachamusonkachej nokatajina uj willajta. Aylluyquichejmanta canka. Payta nokamanta tucuy nisuskayquichejta casunquichej. <sup>23</sup> Chay willajta mana casoj runarí Diospa cheka runasninnmanta wijch'uska canka. Wiñaypajtaj wañonka”, nispa nerka Moisés.

<sup>24</sup> Ajinata, ari, Diospa unay willajnin Samuelmanta khepaman tucuy willajcuna unayña willarkancu cunan p'unchaycunapi ruwacunamanta. <sup>25</sup> Chay unay sut'inchaskancoka kancunapaj carka. Kancunaj allinniyquichejpaj Dioska uj tratota ruwarka tatasninchejwan. Parlaspa Abrahamman nerka: “Khepa caj alchhisniyquinejta cay pacha runas jap'enkancu sumaj cajta wiñay allinnincupaj”, nispa. <sup>26</sup> Dios ñaupajta kancunaman cachamusorkachej ajllaska Camachin Jesucristota wañuskamanta causarichimuspa. Cachamorka kancunata yanapayta munaspa sajra causayniyquichejmanta payman cutirinayquichejpaj,—nerka Pedro.

## 4

### Pedro Juanwan jatun tantacuypa ñaupakenpi

<sup>1</sup> Ajinata Pedro, Juanwan runasta nisharkancu. Chayllaman yupaychana-wasipi ruwanayojcunawan uj camachejnincuwan saduceo partecunawan paycunaman kayllaycamorkancu. <sup>2</sup> Pedropaj Juanpajwan phiñaskas casharkancu Jesucristoj causarimuskanta yachachiskancuraycu. Tucuy runaspis Paynejta wañuskancumanta causarimunallantataj willaskancumanta phiñacorkancu. <sup>3</sup> Chanta chay curajcunaka jap'iycorkancu Pedrote Juantawan. Ch'isiña caskanraycutaj k'ayantincama wisk'aycucherkancu. <sup>4</sup> Willaskancuta uyaricojcunamantarí ashqhas jap'icorkancu Jesucristopí. Kharisllata yupaspa phishka warankajina jap'icorkancu.

<sup>5</sup> K'ayantintaj Jerusalén llajtapi curajcuna\* tantacorkancu. <sup>6</sup> Chay jatun tantacuypi casharkataj yupaychana-wasimanta curaj runa Anaspis, ayllunmanta tucuy cajcunantin, Caifaswan, Juanwan, Alejandrowan. <sup>7</sup> Juanta Pedrotawan chaupincuman pusaycuchispataj taporkancu:

—¿Imaynatataj thañicherkanquichej cay runata? ¿Pejpa atiyninwantaj ruwarkanquichej caytarí?

\* 3:21 Literal: recibinan tiyan. \* 4:5 Literal: yupaychana-wasimanta curajcuna, israel llajta curajcunawan yachachejcunapiwan.

<sup>8</sup> Chanta Santo Espirituwan junt'a caspa Pedro sumaj yuyayninwan† cuticherka:

—Israel llajtapi camachejcuna, curajcunawan, uyariwaychej. <sup>9</sup> Cunan tapuwaycu cay suchu runata allinta ruwaspa thañichiskaycumanta. <sup>10</sup> Chayraycu willaskayquichej tucuy kancunaman tucuy llajtamasinchejmanpis yachanayquichejpaj pejpa atiyninwanchus ruwaskaycuta. Jesucristoppi jap'icuspa paypa atiyninwantaj cay runata thañichiycu. Jesuska Nazaret llajtapi wiñacorka. Kancunataj payta chacataspa wañuchicherkanquichej. Paytataj Dioska causarichimorka wañuskamanta. Paypa atiyninwanmin cay runaka ñaupakeyquichejpi thañiska cashan. <sup>11</sup> Dioska wiñaypaj churarka Jesucristota sumaj esquina rumitajina runas wiñay causayniyoj canancupaj. Kancuna wasichajcunari cay rumita khawaspa wijch'uporkanquichej. Wasita sayachinanpajri chay wijch'uska rumeka aswan sumaj carka tucuy waj rumismanta niskaka. <sup>12</sup> Chekamanta Jesusllata Dios churarka juchamanta c'ata Cacharichiwajnchej cananpaj. Paynejllata runas wiñay causayniyoj cayta atincu, paypi jap'icuspa. Manamin wajnejtachu,—nispa.

<sup>13</sup> Chay curajcuna repararkancu Pedrowan Juanwan mana manchachicuspa parlaskancuta. Mana escuelapi estudiamoj, khasi runasjni nalla caspapis sumajta parlaskancumanta mayta t'ucorkancu. Rejserkancutaj Jesuswanpuni purejcuna caskancuta. <sup>14</sup> Thañiska runata Pedrowan Juanwan cusca sayashajta ricorkancu. Chayraycu ni imatapis cutichiyta aterkancuchu. <sup>15</sup> Chanta chay curajcunaka paycunata tanta-cuynincumanta llojsinancuta camacherkancu. Munarkancu yachachinacuya sapallancipi. <sup>16</sup> Paycunapurataj ninacorkancu:

—¿Imatataj ruwasun cay runaswanrí? Tucuy Jerusalén llajtapi tiyacojcuna yachancuña imaynatachus uj t'ucunapaj ricuchinawan thañichiskancuta. Nokanchejtaj mana atinchejchu niyta mana ruwaskan-cutaka. <sup>17</sup> Amaña ni jayc'aj pimanpis Jesusmanta willanancupaj ni-nachej: “Willanquichej chayka, ñac'arichisajcu”. Chaywanka manaña runapura willanaconcancuchu,—nispa.

<sup>18</sup> Chanta chay quinsa runasta wajyaspa sinch'ita c'amerkancu:

—Jesusmantaka ni imaynamantapis willaranquichejchu. Nitaj paymanta pimanpis yachachinquichejchu,—nispa.

<sup>19</sup> Pedrowan Juanwanrí cuticherkancu:

—Tanteyacuychej kancunallapis. Diospa ñaupakenpi ¿kancunatachu astawan casunaycu tiyan? chayrí ¿Diostachu? <sup>20</sup> Nokaycoka manamin ch'in cacuya atiycuchu. Manachayrí willanaycu tiyan ricuskaycuta uyariskaycutaka,—nispa.

<sup>21</sup> Tantaska curajcunaka ñac'arichinancupajjina imaynamantapis paycunata juchachayta mana aterkancuchu. Chayraycu phiñaskas sinch'ita c'amispa cachariporkancu. Imaraycuchus tucuy runasmin Diosta yu-paycharkancu Jesusspa cachasninpa ruwaskancumanta. <sup>22</sup> Chay thañicoj runaka tawa chunca curaj watayoj carka. Chayraycu chaymin may t'ucunapajka.

*Diosmanta mañacuncu sonkoncupi callpachaskas canancupaj*

<sup>23</sup> Cachariskas caytawantaj Pedro Juanwan rerkancu Cristoppi jap'icoj hermanospaman. Paycunamantaj willarkancu chay curajcunaj tucuy

† 4:8 Ninayan.

niskancuta. <sup>24</sup> Chayta uyarispataj tucuynincu cusca uj sonkolla Diosmanta wajyacorkancu:

—Diosniycu, jatun Camachiwajniycu canqui. Cay pachata, janaj pachata, jatun kochasta, chaypi tucuy cajcunatapis ruwarkanqui. <sup>25</sup> Kan parlarkanqui camachiyqui Davidnejta. Pay Santo Espíritoj atiyninwan kanmanta taporkaña:

¿Imaraycutaj waj llajtayojcuna may phiñacuywan contrayquipi ch'ajwashancurí?

Diospa ajllaskan israelcuna jatunchacuspa contrayquipi ruwayta yankhalla yuyashancu.

<sup>26</sup> Llajtasta camachejcuna jatarimuncu Señor Diospa contranpi.

Ajinallataj curajcunapis tantaycucuspa Diospa contranpi churacuncu.

Paypa ajllaskan camachinanpaj contranpipis jataricuncu.

Ajinata ruwaytarí ni jayc'aj atenkancuchu.

Mañacus pallapuni nerkancu:

<sup>27</sup> —Chekatapuni cay llajtapi ashqha runas tantaycucorkancu ajllaska<sup>‡</sup> Camachiyqui Jesuspa contranpi. Payka kanllaman takaskamin tucuya camachinanpaj. Chekatapuni cay llajtapi Herodeswan Poncio Pilatowan tantaycucorkancu. Llajtamasiniyuwan waj llajtayojcunapiwan cusca Jesuspa contranpi churacorkancu. <sup>28</sup> Kan, atiynijoj caspataj tucuy chay ruwanancutaka yacharkanquiña. Paycunaj ruwaskancutaj kanpa yuyaskayquimanjina munayniyuimanjina carka. <sup>29</sup> Cunanka tucuy atiynijoj Señor Diosniycu, “ñac'arichiskayquichej” niskancuta khaway, ari. Nokaycu camachisniyqui caycu. Yanapawaycu niskasniyquita tucuy sonkowan willaranaycupaj mana manchachicuspa. <sup>30</sup> 5.24 Chaypaj atiyniyoj ricuchi onkoskasta thañichispa. Chaywan kanman t'akaska<sup>§</sup> Camachiyqui Jesús willaraypi yanapawasajcu. May t'ucunapaj ricuchinas jatun ruwanaswan paypa atiyninwan ruwaska cachun, —nispa mañiacorkancu Diosmanta.

<sup>31</sup> Ajinata Diosmanta wajyacuytawan tantacorkancu, chay waseka qharcatiterka Santo Espíritu chaypi caskanraycu. Tucuy chaypi cajcunataj Espirituwan junt'a carkancu. Chanta Jesuspa cachasnenka Diospa niskanta tucuy sonkowan willarkancu.

*Jesuspi jap'icojcuna uj yuyaylla tucuy imapi*

<sup>32</sup> Jesucristopi chay ashqha jap'icojcunaka uj sonkolla uj yuyaylla tucuy imapi causacorkancu. Paycunamantataj ni uj runapis capuyninta “nokajllata” nejchu. Manachayrí tucuynincu hermanospura capuynincumantapis pisichuskancumanjina yanapanacoj cancu.

<sup>33</sup> Señor Jesuspa cachasnenka paypa causarimpuyinmanta jatun atiyninwan willashallarkancupuni. Diostaj tucuy paycunata munacuywan khawaspa yanaparka. <sup>34</sup> Paycuna uqhupi ni ujpis pisichicojka cajchu. Wasiyojcunapis jallp'ayojcunapis capuynincuta vendej cancu. Vendeskancu kolketataj apamoj cancu Cristopi hermanospa tantacuynincuman.

<sup>35</sup> Jesuspa cachasnenman jaywaj cancu. Paycunataj sapa ujman pisichuskancumanjina kolketa raq'icoj cancu. <sup>36</sup> Carkataj Cristopi uj hermano, José sutiyoj. Cachaspis payta Bernabeta suticharkancu. Bernabé niyta munan yuyaychaj runa. Pay

<sup>‡</sup> 4:27 Literal: santo. <sup>§</sup> 4:30 Literal: santo.

Chipre jallp'amanta carka, Levij ayllunmantapis. <sup>37</sup> Payka uj jallp'anta vendespa kolketa apamorka. Jesuspa cachasnimantaj jaywarka.

## 5

### *Ananías Safirawan*

<sup>1</sup> Waj hermanorí Ananías, warmin Safirawan jallp'ancuta vendel-larkancutaj. <sup>2</sup> Ananiastaj vendeskancumanta waquin kolketa paycunapaj pacarka. Chaytaka warmin sumajta yacharka. Chanta Jesuspa cachasninman waquin kolkellata apaspa tucuynin caskantajina jaywarka. <sup>3</sup> Pedrori nerka:

—Ananías, kanka vendeskayquimanta waquin kolketa orkhospa kanpaj pacarkanqui. ¿Imaraycutaj supay Satanaswan atipachicunqui sonkoyquipi Santo Espirituman llullacunayquipaj? <sup>4</sup> Kanpatapuni jallp'a carka. Vendespaka atillarkanqui chay kolkewan ruwayta munayniyquimanjina. Chanta ¿imaraycutaj cayta ruwayta yuyarkanquirí? Mana runallamanchu llullacunqui manachayrí Diosman, —nispa.

<sup>5</sup> Cayta uyarispataj Ananiaska wañuska pampaman urmarka. Chayta tucuy uyarejcunataj Diosta mayta manchachicorkancu. <sup>6</sup> Chanta waynas jamuspa wañuskata mayt'uyctawán p'ampaj aparkancu.

<sup>7</sup> Quinsa horas pasaymantajinataj Ananiaspa warmenka Jesuspa cachasninpaman yaycorka. Manaraj yacharkachu kosan wañupuskantaka. <sup>8</sup> Pedrori taporka:

—Niway, ¿chay chhicapichu jallp'ayquichejta venderkanquichej?

Safira cuticherka:

—Ari, chay chhicapi, —nispa.

<sup>9</sup> Chanta Pedro payta nerka:

—Iscayniyquichej tucuy atiyniyoj Señor cachamuska, chay Espirituman llullacuspa unanchacorkanquichej yachanayquichejpaj yachamanchus manachus, chayta. ¿Imaraycutataj ajinata ruwarkanquichejrí? Khaway, cutimushancuña kosayquita p'ampamojcunaka. Cunan kantapis p'ampaj apallasonkancutaj, —nispa.

<sup>10</sup> Chaypachallataj Safirapis wañuska urmarka Pedroj ñaupakenman. Chay waynas yaycojtincutaj Safira wañuskaña carka. Payta apaspataj kosanpa ladonpi p'ampamorkancu. <sup>11</sup> Mayta mancharicorkancu Jesucristopijap'icoj tucuy tantacojcuna, chay wañuskancumanta tucuy uyarejcunapis.

### *Jatun ricuchinaswan t'ucunaswan*

<sup>12</sup> Runas ughupitaj Jesuspa cachasnin ashqha jatuchej ricuchinasta t'ucunastawan atiyninwan ruwarkancu. Cristopi tucuy jap'icoj hermanoska uj sonkolla tantacoj cancu yupaychana-wasiman Salomón niska jatun yaycunapi. <sup>13</sup> Tucuy wajcunari chay hermanoswan tanta-cuya manchachicoj cancu. Chaywanpis paycunata sumajpaj khawaj cancu. <sup>14</sup> Ashqha runasraj Señor Jesuspi jap'icorkancu kharismanta warmismantapis. <sup>15</sup> Ajinamanta runas onkoskasta ñancunaman apamoj cancu phullusnincupi puñunasnincupipis churaspa. Pedro chayne-jpi purejtin llanthullanpis waquinman chayananpaj apamoj cancu. <sup>16</sup> Mana Jerusalén llajtallamantachu jamoj cancu. Manachayrí kaylla llajtasmantapis ashqhas jamoj cancu onkoskasnincuta apamuspa. Supaycunaj ñac'arichiskasnintapis apamoj cancu. Tucuynincutaj thañichiskas carkancu.

*Pedro Juanwan ñac'arichiskas*

<sup>17</sup> Yupaçhana-wasimanta curajka, saduceo partemanta, tucuy yana-pajcunawan mayta phiñacorkancu Jesuspa cachasninpaj. <sup>18</sup> Paycunatataj jap'ichispa runaspa ñaupakenpi carcelman wisk'acherkancu. <sup>19</sup> Tucuy atiyniyoj Señormanta uj cachamuska angelrí tutapi carcel puncuta quicharka. Jesuspa cachasninta carcelmanta pusarkospataj nerka:

<sup>20</sup> —Riychej yupaychana-wasiman. Yaycuspataj runasman willamuy-chej Jesucristopi jap'icuspa tucuy cay mosoj causaymanta, —nispa.

<sup>21</sup> Jesuspa cachasnirri uyariskancuta casorkancu. Yupaychana-wasiman tutamanta rispa chaypi yachachiyyta kallarererkancu.

Chaycamataj yupaychana-wasimanta curaj, paywan cajcunawan jamuspa israel llajta curajcunata tantachimorkancu. Chay tantacuyka jatun tantacuy niska carka. Cacharkancutaj yanapajcunancuta Jesuspa cachasninta carcelmanta pusamunancupaj chay tantacuyman. <sup>22</sup> Yanapajcuna carcelman chayaspa Jesuspa cachasninta mana tar-erkancuchu. Curajcunaman cutispataj <sup>23</sup> willarkancu:

—Carcelman chayaspa puncusta sumaj wisk'askasta tariparkaycu, wakaychajcunatapis puncuspi sayashajta. Puncuta quicharisparí ni pita uqhipi tariparkaycuchu, —nispa.

<sup>24</sup> Chay curajcuna\* ajina ruwacuskamanta uyarerkancu. Iscayra tapunacusharkancu imapitaj cay t'ucunas tucunanta. <sup>25</sup> Chanta chayllaman uj runa chayamorka nispa:

—Kancuna carcelman wisk'acherkanquichej, chay khariska yupaychana-wasipi runasta yachachishancu, —nerka.

<sup>26</sup> Chaymanta camachejka yanapajcunapiwan ujtawan yupaychana-wasiman rerkancu. Manchachicorkancu runas rumiswan paycunata ch'ankaycunancuta. Chayraycu Jesuspa cachasninta mana imanas-palla pusamorkancu jatun tantacuyman. <sup>27</sup> Pusajtincutaj yupaychana-wasimanta curajka <sup>28</sup> paycunata taporka:

—¿Manachu sinch'ita camacherkaycu kancunata amapuniña yachachinayquicheja chay Jesusmanta? ¡Khawaychej! Jerusalén llajtapi tucuy tiyacojcuna yachachiskayquicheja yachancu. Chay Jesús wañuskamantapis nokaycuta juchachayta munashanquichej, —nispa.

<sup>29</sup> Pedro chay waquin cachaswan cutichispa nerkanca:

—Diosta astawan casunaycu tiyan runasmanta niskaka. <sup>30</sup> Kancuna Jesucristota chacataspa wañuchicherkanquichej. Tatasninchej Diosta yupaçharkancu. Chay Diosninchetaj Jesusta wañuskamanta causarichi-morka. <sup>31</sup> Payta jatunchaspataj sumaj atiyniyoj Camachej cananpaj churarka, juchamanta Cacharichejpis cananpaj. Chayta Dios ruwarka Israel llajta-masisninchej juchancuta sakespa payman cutimunancupaj. Ajinapi juchasnincumanta llimphuchaskas cayta atincu. <sup>32</sup> Tucuy chaymanta willanaycupaj nokaycu cachaskas caycu. Santo Espiritupis chay imasmanta runasta reparachispa willan. Dios Tatataj casojcu-nanpa sonkoncuman chay Espirituta cachamorka chaypi tiyacunananpaj, —nispa.

<sup>33</sup> Runas tucuy chay jatun tantacuyipi cay imasta uyarispa manchayta-puni phiñacorkancu. Ajinapi uj yuyayman churacorkancu imaynamanta cachasta wañuchinancupaj. <sup>34</sup> Carka chay jatun tantacuymanta uj runa

\* <sup>5:24</sup> Literal: yupaychana-wasimanta curaj soldadocunaj camachejin yupaychana-wasi-manta curajcunawan.

fariseo partemanta, Gamaliel sutiyoj. Pay uj yachachejpis carka. Tucuy runas payta sumajpaj khawaj cancu. Parlananpaj sayaycuspataj pay camacherka Jesuspa cachasninta ascamallapaj tantacuymanta jawaman llojsichinancuta.<sup>35</sup> Chanta curajcunaman nerka:

—Israel llajta-masis, cay runaswan ruwanayashaskayquichejta sumajta reparacuychej. <sup>36</sup> Yuyaricuychej manaraj unaychu uj runapis Teudas sutiyoj riqhurimuskanta. Payka nerka jatun runa caskanta. Tawa pachajjina runas payta khaterkancu. Payta runas wañuchejtinctaj tucuy khatejcunapis chincapullarkancutaj. Ajinata tucucorka. <sup>37</sup> Chay runaj khepanta runa yupachicuy p'unchaycunapi Judas sutiyoj riqhurimullarkataj. Pay Galilea jallp'amanta carka. Ashqastataj okharerka payta khatinancupaj. Payta wañuchejtincu khatejcunapis tucuynin ch'ekerapullarkancutaj. <sup>38</sup> Chayraycu cunan yuyaychayquichej sakenallayquichejta chay runasta. Amataj contrancupi churacuychejchu. Sichus chay yuyaskancu chayrí ruwaskancu runaj atiynillanwan chayka, tucucaponka. <sup>39</sup> Diospa atiyninwanchus ruwashancu chayrí kancuna manapuni atipayta atinquiachejchu. ¡Pajtataj Diospa contranpi churacushawaijchej! —nispa.

<sup>40</sup> Chaymanta chay curajcunaka Gamalielpa niskanta casorkancu. Jesuspa cachasninta wajyaspataj jasut'icherkanca. Amaña pimanpis parlanancuta camachiytawan cachariporkancu. <sup>41</sup> Ajinamanta chay cachacunaka jatun tantacuymanta llojsiporkancu. Cusiskastaj riporkancu Jesuspa munayninta ruwaskancipi muchuyta atiskancuraycu. <sup>42</sup> Sapa p'unchaytaj yachachillarkancupuni. Jesucristo Diospa ajllaskan caskanta willarkancu yupaychana-wasipi, runaspa wasisnincupipis.

## 6

### *Kanchis yanapajcunamanta*

<sup>1</sup> Chay p'unchaycunapitaj Jesuspi jap'icojcuna ashqhamanña wiñasharkancu. Griego parlajcuna rimasharkancu hebreo parlajcunaj contranta. Nerkancu:

—Viudasniycuman chay hebreo parlajcuna sapa p'unchay jaywaranapi mana allintachu jaywarancu, —nispa.

<sup>2</sup> Chanta chunca iscayniyoj cachas Jesuspi tucuy jap'icojcunata wajyarkancu tantacunancupaj. Nerkancutaj:

—Nokaycoka Diospa niskanta willaranaycu tiyan. Mana allinchu pisichicojcunaman jaywaspa Diospa niskanta willarayta sakepunaycoka. <sup>3</sup> Hermanosníy, chayraycu kancunamanta ajllaychej kanchis runasta cay ruwanapi yanapanancupaj. Cachuncu sumajpaj khawaskas, Dios Espirituwan junt'a, sumaj yuyayniyoj runas. Paycunata churasunchej cay ruwaypi khawanancupaj. <sup>4</sup> Nokaycutaj tucuy sonkowan Diosmanta mañacuspapuni casajcu. Camachiskas caskaycumanjina Diospa niskantapis yachachillasajcupunitaj, —nispa.

<sup>5</sup> Chay niskancoka tucuynincupaj allin carka. Ajllarkancutaj Estebanta. Payka Jesuschristopi chekamanta jap'icoj runa carka, Santo Espirituwan junt'a. Ajllallarkancutaj Felipeta, Procorota, Nicanorta, Timonta, Parmenasta, Nicolastawan. Cay Nicolaska Antioquia llajtamanta carka. Ñaupajpi payka Diosta casoj runaman tijracaporka. <sup>6</sup> Chanta tantacocunaka chay kanchis ajllaskanca pusarkancu Jesuspa cachasnina-

ñauapkencuman. Cachastaj Diosmanta mañapuspa maquisnincuta umancuman churarkancu Dios sumajta callpachananpaj ruwaynincipi.

<sup>7</sup> Ajinamanta astawan astawanraj runas Diospa palabranta uyarererkancu Jerusalén llajtapi. Jesucristopi jap'icojcunataj mayta yapacamoj cancu. Paycunataj Diosta casusharkancu. Yupaychana-wasipi ruwanayoj runaspis ashqhas, Jesuspi jap'icuspaa palabranta casorkancu.

<sup>8</sup> Santo Espíritu Estebanman atiyta kospa sumajta yanaparka. Jesuspi jap'icuspataj may jatuchej t'ucunasta ricuchinastawan ruwaj runas chaupipi. <sup>9</sup> Chanta tantacuna-wasimanta waquin cachariska camachis niskacuna jatarerkancu. Chaycunawan Cirene llajtamanta carkancu Alejandría llajtamanta, Cilicia jallp'amanta, Asia jallp'amantapis. Chay runasmanta waquincuna Estebanwan churanacuya kallarererkancu. <sup>10</sup> Espiritunneja Dios sumaj yachayta Estebanman korka parlananpaj. Chayraycu payta mana aterkancuchu atipayta parlaskasnincuwan.

<sup>11</sup> Chanta paycuna waquin runasman lluq'iycorkancu llullacunancupaj:

—Cay Esteban Moisespa camachiskasnimanta sajrata parlajta uyariyuci, Diospa contranpipis, —nispa.

<sup>12</sup> Ajinamanta runasta, curajcunata, yachachejcunatawan okharicherkerkancu ch'ajwanancupaj. Ujllata phawaycuspataj Estebanta jap'iycorkancu. Phiñaskas pusarkancutaj jatun tantacuyman. <sup>13</sup> Llulla parlajcunataj churarkancu. Llullacojcunataj paypa contranpi churaycucuspa nerka:

—Cay runa Diosta yupaychana-wasipaj sajrata rimashallanpuni, Moisespa camachiskasnimantapis. <sup>14</sup> Cay runamanta uyarillaycutaj Nazaret llajtayoj Jesús chay yupaychana-wasita urmachinanta. Moisés yachachiwaskanchejtapis wijch'uspa waj yachachinaswan Jesús tijrayta munaskanta, nerka cay runaka, —nispa.

<sup>15</sup> 7.8 Chaymanta curaj tantacuypi cajcuna tucuynincu allinta khawarkancu Estebanta. Uyantataj lliphishajta ricorkancu janaj pachamanta uj willajpa\* uyantajina.

## 7

### *Estebanpa cutichiskan*

<sup>1</sup> Chanta yupaychana-wasimanta curaj taporka Estebanta:

—Cay runas contrayquipi niskancoka ¿chekachu?

<sup>2</sup> Paytaj cuticherka:

—Sumajpaj khawaska tatacuna, llajta-masispis uyariwaychej. Tucuy atiyniyoj Dios riqhurerka unay tatanchej Abrahamman jakay Mesopotamia jallp'api cashajtin. Abraham manaraj Harán llajtamani tiyacoj rishajtin, <sup>3</sup> Dios nerka: “Jallp'ayquimanta ripuy, tatasniyquita sakepuspa waj jallp'ata ricuchiskayqui, chayman”, nispa. <sup>4</sup> Chanta Abraham Caldea jallp'api wasinmanta llojserka. Riporkataj Harán llajtamani tiyacoj. Tatan wañupuskanmanta khepantataj Dios cay tiyacushaskanchej jallp'aman Abrahamta tiyacunananpaj pusamorka. <sup>5</sup> Cay jallp'ata payman wawasnimannpis konanta Dioska sumaj niskanwan nerka. Jallp'atarí manaraj ni ujincha quinta saruycurinallapajpis korkachu. Abrahamka mana jallp'ayoj wañuporka. Diosrí sumaj

\* **6:15** Literal: angel.

niskanwan nerka chay jallp'ata konanta, Abrahamman wawasninmawan pay manaraj wawayoj cashajtin. <sup>6</sup> Dios willallarkataj Abrahamman khepa alchhisnimmanta: “Forasterosjina causankancu waj caru jallp'api. Chaypitaj runas paycunata camachisnincupaj jap'enkancu mayta ñac'arichenkancutaj. Ajinallataj paycuna khepa alchhisnincupis cankancu tawa pachaj watasta. <sup>7</sup> Chay llajtata noka juchachasaj wawasniyquita ñac'arichiskanmanta. Chanta jakaymanta khepa alchhisniyqui llojsimuspa cay jallp'apeka munayniyta ruwaspa yupaychawankancu”, nispa nerka Dios. <sup>8</sup> Paytaj Abrahampaj uj tratota\* churarka: “Uj señalta churacuy cuerpo y quipis khari wawasniyquipipis”, nispa. Abrahamtaj chay señalta churacuspas Dioswan uj yuyayman yaycorka. [Ajinapi ricucherka Diospa ajllaskan caskanta.]† Chayraycu wawan Isaac nacecojtin pusaj p'unchaypi Abraham paypi chay señalta churarka. Isaacsipis ajinallatataj wawan Jacobpi chay señalta churarka. Chaymanta Jacob ajinallatataj churarka chunca iscayniyoj wawasnipipis. Paycuna unay tatasninchej carkancu.

<sup>9</sup> ‘Chay unay tatasninchekja envidiacorkancu sullc'ancu Josewan. Chayraycu payta venderkancu Egipto jallp'api camachi cananpaj. Diosri paywan casharka yanapaska. <sup>10</sup> Tucuy llaquiyninpi wakaychasharka atipanancama. José chayamojtin camachej Faraonpa ñaupakenman Dios payta c'achapaj khawacherka. Jasetataj sumaj yachayniyota ruwarka. Ajinapi Faraón payta churarka camachinanpaj Egiptopi tiyacojcunata, wasinpi tucuy cajcunatawan.

<sup>11</sup> ‘Chaypacha jatun yarkhay carka tucuy Egipto jallp'api tucuy Canaán jallp'apipis. Jakay jallp'aspi tiyacojcuna jatun llaquiyyta ñac'arerkanca. Unay tatasninchepis miqhunata mana tariyta aterkancuchu. <sup>12</sup> Unay tatanchej Jacobrí uyarispa yacharka jakay Egiptopi miqhuna caskanta. Chayraycu chayman wawasninta ñaupaj cutita rantej cacharka. <sup>13</sup> Khepan cuti riskancupi José rejischicorka waukesninwan. Chanta Egipto camachejin yacharka José Diospa unay runasni israelcunamanta caskanta. <sup>14</sup> Chaymanta José wajyachicaporka tatan Jacobta tucuy ayllunpi cajcunatawan. Chaypachataj tucuynincu yupacorka kanchis chunca phishkayoj runas. <sup>15</sup> Ajinamanta Jacob uraycamorka Egipto jallp'aman tiyacoj. Chaypi tiyacushaspataj pay wañuporka, unay tatasninchepis. <sup>16</sup> Khepataña ayasnincu apaskas carkancu caru Siquem llajtaman p'ampanapaj. Jakaypi kolkewan unayña Abraham uj p'ampanata ranticorka, Hamorpa wawasninmanta. Chay p'ampanapitaj Abrahampa wawasnin payta p'ampacaporkancu.

<sup>17</sup> ‘Unayka Dios sumaj niskanwan parlarka Abrahamman. Nerka paypa khepa alchhisninta uj sumaj jallp'aman pusac-punanta. Chay niskan junt'acunan p'unchay cashajtintaj Diospa runasni, unay tatasninchej, ashqhayarkancu Egipto jallp'api. <sup>18</sup> Ashqhayallarkancupuni waj camachej Egiptota camachinancama. Paytaj Joseta mana rejserkachu unayña wañupuskanraycu. <sup>19</sup> Chay camachejtaj ayllusninchejta pantachinaswan atiparka. Ajinapi ñac'aricherka tatasta juch'uy wawitasnincutapis wijch'ucherka manaña causanancupaj. <sup>20</sup> Chay p'unchaycunapi Moisés nacecorka. Dios paymanta mayta cusicorka. Tatan mamanri quinsa quillata payta

\* 7:8 Literal: traton circuncisionmanta. † 7:8 Ninayan.

pacaspa wasincupi uywarkancu. <sup>21</sup> Chanta mayupi pacaska cashajtin camachejpa ususin Moisesta orkhorka. Quiquin wawantajinataj uywarka. <sup>22</sup> Ajinamanta Moisés sumaj yachachiska carka Egipto runas yacharkancu, tucuy chaycunata. Sumaj yuyayniyoj parlayniyojtaj carka, ruwanapajpis callpayo.

<sup>23</sup> Tawa chunca watayoj cashaspataj Moisés yuyarka watucuya israel ayllusninta yachananpaj imaynachus cashaskancuta. <sup>24</sup> Chaypitaj tariparka uj Egipto runa muchuchishajta paypa ayllu-masinta. Ayllu-masintaman sayacuspataj chay muchushajta jarc'acorka. Ajinapitaj chay Egipto runata wañucherka ayllu-masinta makaycuskanraycu. <sup>25</sup> Moisés yuyarka ayllu-masisnin entiendenancuta paynejta Dios paycunata cacharinanta chay ñac'arichej runasmanta. Paycunari mana repararkan-cuchu. <sup>26</sup> K'ayantintaj Moisés tariparka iscay ayllu-masisninta paycunapura makanacushajta. Allinyanachiya munaspa chimpaycorka. Nerkataj: "Kancunaka aylluntin canquichej. Amaña makanacuy-chejchu", nispa. <sup>27</sup> Ñac'arichej cajrí Moisesta tankarparispa nerka: "¿Pitaj kanta curaj camachejniycu canayquipaj churasorkarí? ¿Pitaj kanta nokaycuta chekanchanawaycupaj churasorkarí? <sup>28</sup> Kayna chay Egipto runata wañucherkanqui ¿ajinallatatajchu wañuchiwayta munashanqui?" <sup>29</sup> Chayta uyarispataj Moiseska aykecorka Madián jallp'aman. Chaypiri forasterojina tiyacorka. Casaracuspataj chaypi iscay wawasniyoj carka.

<sup>30</sup> Tawa chunca watastaña tiyacushajtin chay Madián jallp'api Dioska Moisesman riqhurerka. Sinaí orko kayllapi ch'in lugarpi cachamuska angelninnejta riqhurerka laurashaj qhishcarara sach'api. <sup>31</sup> Moiseska t'ucorka riqhuriskanmanta. Kayllaycorkataj astawan allinta yachananpaj. Ajinallaman Dios parlapayarka: <sup>32</sup> "Noka sapallay Dioska cani. Unay tatasniyqui Abrahampis Isaacpis Jacobpis yupaychaspas casuwarkancu", nispa. Moisestaj manchachicuspa qharcatiterka. Chayraycu chay laurashajta mana khawarinayarkachu. <sup>33</sup> Señor Dios nillarkataj: "Ojot'asniyquita lluch'ucuy noka, tucuy atiyniyoj Dios, caypi cashaskayraycu. <sup>34</sup> Chekamanta noka ricuni ajllaskacunayta Egipto jallp'api ñiac'arichiskas caskancuta. Uyarinitaj paycunaj wakaskan-cuta. Cayman uraycamushani tucuy chay jatun ñac'ariymanta paycunata orkhomunapaj. Chayraycu cunan nokaman kayllamuway. Cachaskayquitaj Egipto jallp'aman", nispa.

<sup>35</sup> 'Diospa runasnin israelcunarí Moisesta khesacharkancu. Taporkancutaj: "¿Pitaj camachejniycupaj churasorka chekanchawan-jniycupajpis?" nispa. Chaywanpis Dios payta churarka camachinanpaj, runasninta ñac'arishaskancumanta cacharichinanpajpis. Ajinata Dioska Moisesta churarka angelninnejta riqhurispalaurashaj qhishcarara sach'api. <sup>36</sup> Ajinamanta Moisés unay tatasnincheta Egiptomanta llojsichispalawa chunca watata pusaycacharka. Chaypitaj t'ucunasta may jatun ricuchinastawan ruwarka jatun Puca Kochapipis jakay ch'in jallp'apipis. <sup>37</sup> Moiseska nerka Diospa runasnininman: "Diosniyquichejka uj willajta cachamusonkachej. Kancunaj aylluquichejmantataj canka. Nokata Dios cachamuwarka, ajinallatataj ujta cachamusonkachej. Paytari casunquichej nokamanta tucuy niskanta", nispa. <sup>38</sup> Moisessllataj ch'in pampapi Diospa tantaska runasnинwan carka tatasninchewantaj. Sinaí orkopipis Dios janaj pachamanta payman parlarka. Paytaj

Diospa wiñaypaj atiyniyoj palabranta jap'erka khepata nokanchejman konawanchejpaj.

<sup>39</sup> ‘Chaywanpis unay tatasninchekja Moisesta mana casuya munarkancchu. Manachayrí payta khesacharkancu. Sonkosnincupitaj yuyasharkancu Egipto jallp'aman cutiripuya. <sup>40</sup> Chayraycutaj Moisespa wauken Aaronta nerkanca: “Ruwapuwaycu dioscunata ñaupakeycuta apanaycupaj. Egipotamanta pusamuwajniycu, chay Moisesmantarí cu-nan mana yachaycuchu imachus caskanta”, nispa. <sup>41</sup> Ajinamanta uj uña wacata kirimanta ruwacorkancu. Uywacunata wañuchispri ruphacherkancu chay wacata yupaychanancupaj. Chayjinamanta cusi-corkancu maquisnincuwan ruwaska khasi diosmanta. <sup>42</sup> Chanta Dios paycunamanta carunchacapuspa sakerparerka patapi caj ch'ascasta yupaychanancupaj. Ajinallatataj Diospa willajníñ Joelnejta paycunamanta nerka:

Ajllaska israelcuna, ch'innejpi tawa chunca watata uywasta wañucherkanquichej jaywanapaj.

Chaywan mana nokatachu yupaychawarkanquichej.

<sup>43</sup> Manachayrí Molocpa yupaychana-toldonta apaycachacorkanquichej, Renfán niska ch'ascantawan.

Paypa rijch'ayninta kancunalla ruwacorkanquichej yupay-chanayquichejpaj.

Chayraycu llajtayquichejmanta apachiskayquichej jakay Babilonia jallp'aman.

<sup>44</sup> ‘Ch'in jallp'api unay tatasninchej apaycacharkancu Diosta uj yupaychana-toldota. Chaypi jallch'aska carka Moisespa chunca camachiskasnin iscay kelkaska rumispi. Dios Moisesman ricucherka imaynatachus chay yupaychana-toldota ruwananta. “Ricucherkyqui, chay qui quinta ruway”, nispa camacherka. <sup>45</sup> Chanta chay toldota unay tatasninchej wawasnincoj wawasnincama sakerkancu. Aparkancutaj Josuewan rishaspa jakay ashqha jallp'asman. Chaypi tiyacojcunata Dios kharkorka jallp'ancu ajllaska tatasninchejpata cananpaj. Ajina chay yupaychana-toldo caypi carka David causarka chaypachacama.

<sup>46</sup> Camachej David cusicherka Diosta. Munarkataj Diospaj uj yupaychana-wasita ruwachiyta. Unay tatanchej Jacobpis Diosta yupaycharka. <sup>47</sup> Khepantarí Salomón yupaychana-wasita Diospaj ruwacherka. <sup>48</sup> Tucuy atiyniyoj Diosrí mana tiyacunchu runaspa ruwaskan wasillapeka. Ajinata paypa unay willajninpis nerka: Señor Dios nin:

<sup>49</sup> Janaj pachamanta tucuy imata camachini.

Cay pachapitaj casuchicuni.

Chanta ¿imayna wasitataj ruwapuwanquichejrí?

¿Maytaj samacunaypajjinari?

<sup>50</sup> ¿Manachu nokallataj maquisniywan ruwarkani tucuy cayta?

<sup>51</sup> Esteban nillarkapuni:

—Kancunaka c'ullu runas, rumi sonkos canquichej. Diosta mana uyarinquichejchu nitaj Santo Espiritutapis casunquichejchu. Unay tatasniyquichejjinapuni kancunapis canquichej. <sup>52</sup> Diospa tucuy willajcunanta chejnispá unay tatasniyquichejka ñac'aricherkancu. Chay willajcuna unayta willarkancu Diospa ajllaska camachin Jesús jamunanta. Chay willajcunatapis wañucherkanca. Cunantaj pay jamojtin chejnicoj-cunaman jaywaycorkanquichej wañuchicherkanquichejtaj. <sup>53</sup> Kancunaka

Diospa camachiskasninta janaj pachamanta cachamuska angelesnejta jap'erkanquichej. Ni chaywanpis casorkanquichejpunichu,—nispa.

*Esteban ch'ankaska*

<sup>54</sup> Chayta uyarispa tucuynincu maytapuni phiñacorkancu Estebanpaj, [uyasnincu pucayanancama].<sup>‡</sup> <sup>55</sup> Estebanrí sonkonpi Santo Espirituwan junt'a carka. Janaj pachaman allinta khawaspataj tucuy atiyniyoj Diosta ricorka. Jesustataj paywan cusca sayashajta ricorka jatun atiyninwan camachinanpaj. <sup>56</sup> Chaymanta nerktaj:

—¡Uyariwaychej! Janaj pachapi ricushani Diospa cachaska Runan Je-susta atiyninpi Dioswan cusca sayashajta, —nispa.

<sup>57</sup> Paycunataj sinch'ita khaparerakancu. Ningrisnincutataj tapaycucorkancu chay palabrasnejta sonkoncupi mana ch'ichichaskas canancupaj. Uj yuyaylla Estebanman sinch'ita correycorkancu. <sup>58</sup> Payta llajta jawaman wijch'uspataj chaypi ch'ankaspa wañucherakancu. Ch'ankajcunataj ponchosnincuta uj jovenman sakecorkancu. Chay jovenka Saulo sutiyoj carka. <sup>59</sup> Rumiwan ch'ankashajtinctaj Estebanka Diosmanta mañacusharka:

—Señor Jesusníy, nokamanta causayniya apacapuy, —nispa.

<sup>60</sup> Chanta konkoricuspa Estebanka sinch'i khapariywan mañacorka:

—Señorníy, ama juchachaychu paycunata cay juchancumantaka.

Cayta niytawantaj Estebanka tucucaporka.

## 8

*Saulo ñac'arichin Jesucristopijap'icojcunata*

<sup>1</sup> Estebanta wañuchiskancoka Saulopaj allin carka. Jerusalén llajtapitaj chay p'unchaypi kallarerakancu sinch'ita ñac'arichiyyta Jesucristopijap'icuspa tantacojcunata.\* Jesuspa cachasnillan chayllapipuni casharkancu. Chay ujcunari tucuynincu ch'ekerachiskas carkancu Judea jallp'aman Samaria jallp'amannis. <sup>2</sup> Waquin cheka sonkoyoj runastaj Estebanta p'amparkancu may phutiyywan wakaspá. <sup>3</sup> Saulorí tucuy atiskanwan tucuchiyyta munarka Jesuspi jap'icuspa tantacojcunata. Sapa wasimanta wasi yaycuspa kharista warmistapis orkhomoj carcelman wisk'achinanpaj.

*Sumaj willanas Samariapi willaska*

<sup>4</sup> Chay ch'ekerachiskas cajcunataj sumaj willanasta willarasharkancu tucuy riskancupi. <sup>5</sup> Paycunamanta uj curaj yanapaj runa, Felipe sutiyoj, Samaria jallp'aman rerka. Chaypi aswan jatun caj llajtapi Jesucristomanta willararka. <sup>6</sup> Ashqha runastaj uj yuyaylla sumajta japej cancu Felipej willaraskanta. Ajinallataj jatun ricuchinasta ruwaskantapis sumajta khawarkancu. <sup>7</sup> Felipetaj Diospa atiyninwan ashqha runamanta supaycunata kharkorka. Chay supaycunataj sinch'ita khaparispa llojserkancu. Ashqha suchu runasta wist'usta thañicherka Felipeka. <sup>8</sup> Ajinapi chay llajtapi tiyacojcuna mayta cusicorkancu.

<sup>9</sup> Chay llajtapi uj runa carka, Simón sutiyoj. Felipe manaraj ja-mushajtintaj payka layka ruwaskasniwan Samaria runasta pantachej. Pay qui quintapis atiyniyoj caskanta khawacorka. <sup>10</sup> Tucuytaj Simonta sumajta uyarej cancu wawacunapis curaj runaspis.

<sup>‡</sup> 7:54 Literal: quirusnincu c'arucorkancu. \* 8:1 Literal: iglesia.

—Cay runapimin jatun atiyniyoj dioska riqhurimun, —nispa nej cancu.

<sup>11</sup> Chayraycu runaska Simonpa niskanta jap'icoj cancu. Unaymantaña layka ruwaskasninwan pantachiskas carkancu. <sup>12</sup> Astawanpis Felipe willararka sumaj willanasta Dios runasta munacuywan camachiskanta. Jesucristo Diospa ajllaskan camachinanpaj caskantawan Felipe willararka. Warmispis kharispis chay willaraskanta creespataj bautizacorkancu. <sup>13</sup> Simón, quiquinpis creerka. Bautizacuspataj Felipewan cusca purej. Payka mayta t'ucoj Felipe Diospa atiyninwan jatun ricuchinasta t'ucunastawan ruwaskanmanta. <sup>14</sup> Ajinata Samaria jallp'api tiyacojcuna sumaj willanasta Jesucristomanta uyarispa jap'icorkancu. Jesuspa cachasnin Jerusalenpi chayta uyarispa Pedrota Juantawan paycunaman cachamorkancu. <sup>15</sup> Paycunataj chayman chayspa Diosmanta mañaporkancu Jesucristopí hermanospaj. Mañaporkancu paycuna Santo Espírituta jap'inancuta. <sup>16</sup> Imaraycuchus payka manarajmin sonkosnincuman atiyninwan uraycamorkachu. Jesús tucuy atiyniyoj Señor caskanta jap'icuspallaraj bautizaskas carkancu. <sup>17</sup> Chanta Pedrowan Juanwan maquisnincuta Jesuspi jap'icojcunaman churarkancu. Ajinamanta paycuna Santo Espírituta atiyninwan jap'erkancu.

<sup>18</sup> Simonka ricorka Jesuspa cachasnin maquisnincuta churajtincu chay hermanosman Santo Espíritu yaycuskanta. Chayraycu cachasman kolketa koyna munaspa <sup>19</sup> nerka paycunata:

—Nokamanpis chay atiyta kowaychej noka maquisniya pimanpis churajtiy paycuna Santo Espírituta jap'inancupaj, —nispa.

<sup>20</sup> Pedrori payman cuticherka:

—Kolkeyqueka kanwan cusca tucucuchun Diospa atiyninta kolkewan ranticuya yuyaskayquiraycu. <sup>21</sup> Sonkoyquipi Diosman mana allinyaskachu canqui. Chayraycu cay imaspi nokaycuwan mana cusca cawaichchu. <sup>22</sup> Sajra yuyayniyquita sakespa Diosman cutiricuy. Paymanta mañacojtiyqui ichapis qhuyacususpa sonkoyquita juchamanta llimphuchasunquiiman. <sup>23</sup> Reparani sonkoyqui ancha sajrawan junt'a caskanta juchawan apaycachaska ima caskayquita, —nispa.

<sup>24</sup> Chaymantataj Simón cuticherka:

—Amajinachu caychej. Señor Diosmanta mañapuwaychej nokapaj chay niwaskayquichej mana ruwacunananpaj, —nispa.

<sup>25</sup> Chanta Señor Jesuspa cachasnenka runasman paymanta sumajta willarkancu. Niskantapis willararkancu. Chaywanpis Jerusalén llajtaman cutishaspa rejjiña ashqha ranchospi Samaria jallp'api sumaj willanasta willararkancu.

### *Felipe Etiopiamanta curaj runawan*

<sup>26</sup> Diosmanta cachamuska uj willaj angeltaj Felipeta parlapayarka:

—Waquiuchicuspa riy uraman ch'innej ñanninta. Chay ñan Jerusalenmanta Gaza llajtaman rishan, —nispa.

<sup>27-28</sup> Felipetaj chaypachita casuspa rerka. Rishaspataj ñanpi uj curaj runawan<sup>†</sup> tincorka. Payka camachejpa kolkenta jap'ej runa carka Etiopía jallp'amanta. Chaypitaj Candace warmi camacherka. Chay

<sup>†</sup> 8:27-28 Literal: eunuco.

curaj yanapajka Diosta yupaychaj Jerusalenman riskanmanta cutim-pusharka. Sumaj c'achitu carretonpi tiyaska leesharka Diosmanta unay willaj Isaiaspa kelkaskanta.<sup>29</sup> Chanta Santo Espiritoka Felipeta nerka:

—Kayllaycuspa chay carretonta taripay, —nispa.

<sup>30</sup> Felipe kayllaycuspataj uyererka chay curaj runa leeshaskanta unay willaj Isaiaspa kelkaskanmanta. Tapurerkataj:

—Wirakochi ¿entiendoenquichu imatachus ninayan chayta?

<sup>31</sup> Chay curaj runataj cuticherka:

—Maná pi sut'inchawajtin ¿imaynatataj sapallay atiyman entiendeyta? Felipetataj carretonman wajyaycuspa kayllanpi tiyacucherka.

<sup>32</sup> Diospa palabranta leeshaskanka cayjina carka:

Payka uj ovejajina ch'inllamanta apachicorka wañuchinancupaj.

Ruthojcuna ruthushajtincu corderojina ch'inlla cacorka.

Ajinapi ni imata parlarerkachu.

<sup>33</sup> Mana juchayoj cashaspapis payka llamp'uchacorka.

Mana qhuyaspa khasillamanta wañucherkancu.

Nitaj pipis payman sayacorkachu.

Khatejcuntarí ¿pitaj yupaya atinman?

<sup>34</sup> Curajtaj Felipeta taporka:

—Niway, Diospa unay willajnin ¿pimantataj chayta parlashan? ¿Pay quiquinmantachu? chayrí ¿wajmantachu?

<sup>35</sup> Felipetaj Etiopía curajpa leeskan, chaymanta kallarispa willararka.

Sut'ita nerka Jesú斯 wañuskanta tucuyman wiñay causayta konanpaj.

<sup>36</sup> Rishaspataj yacuman chayarkancu. Chay curaj runataj nerka:

—¡Khawariy, caypi yacu tiyan! ¿Imajtintaj mana bautizawanquichu juchasniymanta Diosman cutiriskayta ricuchinaypaj?

<sup>37</sup> Felipetaj cuticherka:

—Kan tucuy sonkoyquiwan Jesuspi jap'icunqui chayka, aticun, — nispa.

Chay curaj runa nillarkataj:

—Noka sumajta jap'icuni Jesucristo Diospa c'ata Wawan caskanta, — nispa.

<sup>38</sup> Curajka carretoninta sayachinanta camacherka. Felipewan curajwanka yacuman uraycorkancu. Chaypiri Felipe payta bautizarka.

<sup>39</sup> Yacumanta llojsimojtincuri Señor Diosmanta cachamuska Espiritoka

Felipeta ujllata pusacaporka. Chay curajtaj manaña Felipeta astawan ricorkachu. May cusikataj ripullarkapuni ñanninta. <sup>40</sup> Felipetaj Azoto llajtapi riqhurerka. Riskanpitaj Jesusmanta willararka tucuy llajtaspi Cesarea llajtaman chayanancama.

## 9

### *Saulo Jesucristopijap'icun*

<sup>1-2</sup> Chaycamataj Sauloka mayta chejnispa nishallarkapuni: “Wañuchisaj Jesucristota casojcunata”, nispa. Chayraycu yupaychanawasimanta curajman kayllaycuspa paymanta uj kelkaskata mañarka. Munarka atiyta Damasco llajtapi tantacuna-wasispi Diospa ñanninpi purejcunata masc'amun nanopaj. Paycunata tarispataj jap'iycuchiya munarka Jerusalenman wataskata apachinanpaj, kharistapis warmistapis. <sup>3</sup> Rispataj, Saulo Damasco llajtaman kayllaycusharka. Mana yuyashajtillan janaj pachamanta uj sinch'i

c'anchay paypa muyuyninpi c'ancharerka. <sup>4</sup> Paytaj pampaman chokacamorka. Payta parlapayajtataj uyarerka:

—Saulo, Saulo ¿imaraycutaj nokata ñac'arichinawayquipaj khatiy-cachawanquiri?

<sup>5</sup> Chanta Saulo taporka:

—¿Kanchu cawaj, Señor Dios?

Chay parlajtaj cuticherka:

—Noka Jesús cani. Nokata khatiy-cachawanqui. Kan quiquilayquitataj ñac'arichicushanqui. Uj animal t'ojsinaman jayt'aspa nanachicun ajinata nanachicushanqui,—nispa.

<sup>6</sup> Saulotaj manchachicuywan qharcatitispay taporka:

—¿Imatataj munashanqui ruwanayta, Señor?

Jesustaj nerka:

—Jataricuspa cunapacha llajtaman yaycuy. Chaypi uj runa willasonka imatachus ruwanayquitapis,—nispa.

<sup>7</sup> Saulowan rejculataj manchaymanta t'ucushaj sayasharkancu. Uyarerkancu parlapayajta nitaj pitapis ricorkancuchu. <sup>8</sup> Chanta Sauloka chokacuskamanta jataricorka. Ñawisninta quicharispataj mana ni imatapis ricorkachu ñawisnintutayapuskanraycu. Chayraycu maquinmanta aysaspa pusarkancu Damascocama. <sup>9</sup> Chaypitaj quinsa p'unchayta mana imata ricuya aterkachu. Manataj miqhorkachu nitaj ujyarkachu.

<sup>10</sup> Damascopi tiyacorka Jesuspi uj jap'icoj runa, Ananías sutiyoj. Señor payman riqhurerka uj moskhoypijina. Nerkataj payta:

—¡Ananías! —nispa.

Paytaj cuticherka:

—Caypi cashani, Señorníy,—nispa.

<sup>11</sup> Chanta Señor Jesús payta nerka:

—Rillayña chay Chekan sutiyoj ñanman. Chaypi Judaspa wasinpitaj tapucunqui Saulo sutiyojmanta. Payka Tarso llajtamantamin. Cunitanpis Diosmanta mañacushan. <sup>12</sup> Uj moskhoypijina ricusorka yaycushaskayquita maquiyquita payman churashajta ima. Chay ruwaskayquiwan watejmanta ricunapaj moskhoypi ricusorka.

<sup>13</sup> Chayta uyarispaka Ananías cuticherka:

—Señorníy, ashqha runas willawancu chay Saulomanta. Kanpi jap'icoj t'akaska wawasniyquita Jerusalenpi mayta ñac'arichiskanmantapis uyarini. <sup>14</sup> Cunapispis yupaychana-wasimanta curajcunaj atiynincuwani caypi cashan jap'irachinanpaj kanmanta tucuy wajyacojcunata,—nispa.

<sup>15</sup> Señor Jesusrí nerka:

—Kanka rillay payman. Paytaka ajllarkani nokamanta willaramunapaj. Diosmanta manaraj yachajcunaman,\* curaj camachejcunaman, israel runasniymanpis willaramunan tiyan. <sup>16</sup> Noka quiquiy ricuchisaj payman may chhicata nokaraycu ñac'arinanta,—nispa.

<sup>17</sup> Ajinapi Ananías rispa maypichá Saulo casharka, chay wasiman yaycorka. Napaycuytawan maquisninta Pabloj umanman churaspataj nerka:

—Hermano Saulo, ñanpi jamushajtiyqui riqhurisoj, chay tucuy atiyniyoj Señor Jesús cachamuwan. Chayraycu jamuni ujtawan

\* <sup>9:15</sup> Literal: waj llajtayojcunaman.

ricunayquipaj Santo Espirituwan junt'a sonkoyquipi canayquipajtaj, —nispa.

<sup>18</sup> Chay quiquinpachataj Sauloj ñawisninmanta wisk'ajcuna t'akacorkancu. Ricorkataj. Jatariytawantaj bautizacorka, ricuchinanpaj Jesucristopi jap'icuskanta. <sup>19</sup> Chanta miqhuytawan callpachacorka. Damascopitaj Jesuspi jap'icojcunawan uj p'unchaycunata carka.

### *Saulo Damasco llajtapi willaran*

<sup>20</sup> Chay quiquinpachataj tantacuna-wasispi willarasharka Jesuska Diospa c'ata Wawan caskanta. <sup>21</sup> Tucuy uyarejcunataj t'ucuspa tapuna-cusharkancu:

—¿Manachu cay runallataj Jerusalenpi khatiycachasharka Jesuspi jap'icojcunata ñiac'arichinanpaj? ¿Manachu payka cayman jamorka paycunata wataskata yupaychana-wasipi curajcunaman apananpaj?

<sup>22</sup> Saulorí astawan callpachacuspa Dios Espirituwan willaraj Jesuska Diospa ajllaskan caskanta camachinanpaj. Chayraycu Damascopi tiyacoj israelcunaka niña ni imatapis cutichiya atejchu cancu sut'ita willaraskanraycu.

### *Saulo israelcunamanta aykecun*

<sup>23</sup> Unay p'unchaycunamantaña israelcuna parlanacorkancu imaynamantapis Saulota wañuchinancupaj. <sup>24</sup> Saulorí yachacorka wañuchinayashaskancuta. Israelcunataj llajta llojsinaspi tuta p'unchay sumajta khawasharkancu payta wañuchinancupaj. <sup>25</sup> Sauloj yachacojcunanri payta uj jatun canastapi tutallan orkhorkancu. Llajta alto perkanejtataj uraycucherkanca Saulo aykecunamanpaj.

### *Saulo Jerusalenpi*

<sup>26</sup> Ajinamanta Saulo chayarka Jerusalenman. Jesuspi jap'icojcunawantaj chaypi ujchacuya munarka. Paycunataj manchachicorkancu creespa pay mana chekamantachu Jesuspi jap'icuskanta. <sup>27</sup> Bernaberí pusarka Saulota Señor Jesuspa cachasninman rejichinanpaj. Sut'ita willarkataj imaynatachus Saulo ñanpi Jesusta ricuskanta Jesustaj paywan parlaskantapis. Willallarkataj imaynatachus Damascopipis mana manchachicuspa Jesuspa atiyninwan willaraskanta. <sup>28</sup> [Cristopi cheka hermano caskanta yachaytawan munarkancu paycunawan tantacunanta Jerusalenpi.]<sup>†</sup> Hermanoswan cusca purispataj <sup>29</sup> Señor Jesuspa atiyninwan willararka mana manchachicuspa. Pay griego parlajcunamanpis tapuynincuman cutichej allinta yachachejpis. Paycunari Saulota wañuchej churacorkancu. <sup>30</sup> Chayta yachaspa Cristopi hermanos pusarkancu Saulota Cesarea llajtaman. Chaymantataj Tarso llajtaman payta cachaporkancu.

<sup>31</sup> Ajinamanta Jesuspi jap'icuspa tantacojcuna allillanta tiyacorkancu tucuynejpi —Judeapi, Galileapi, Samaria jallp'aspipis. Diosta casuspa causacorkancu. Santo Espíritu paycunata callpacharka sonkosnincupi. Astawan ashqastaj Jesucristopi jap'icorkancu.

### *Eneas thañiska*

† 9:28 Ninayan.

<sup>32</sup> Pedro tucuynejta purisharka Jesuspi jap'icojcunata watucuspa. Ajinapi chayarka Lida llajtaman hermanosta watusco. <sup>33</sup> Chaypitaj tariparka uj runata, Eneas sutiyojta. Payka mana cuyurej carka, puñunapi siriska pusaj watataña. <sup>34</sup> Pedrotaj nerka:

—Eneas, Jesucristo cunanpacha thañichisunqui. Jatarispa phullusniyquita c'uchuchay,—nispa.

Chay quiquinpachataj Eneaska thañiska jataricorka. <sup>35</sup> Lida llajtapi Sarón jallp'apiwan tucuy tiyacojcuna Eneasta purishajta ricorkancu. Ajinamanta paycuna juchasnincuta sakespa Señor Jesuspi jap'icuspataj payta casorkancu.

### *Dorcus causarimpun*

<sup>36</sup> Jope llajtapi carka Cristopi uj jap'icoj warmi, Tabita sutiyoj. Griego parlaypitaj sutin Dorcas taruca ninayan. Payka allin cajtапuni ruwaj pisichicojcunatapis yanapajpuni. <sup>37</sup> Chay p'unchaycunapi Tabitaka onkoycuspa wañuporka. Chaypi caj runastaj ayata mayllarpaytawan wasi pata pisoman churarparkancu. <sup>38</sup> Jope llajtamanta Lidakanka mana caruchu carka. Yachaspa Pedro chaypi caskanta Jesuspi jap'icojcuna iscay runasta payman cachamorkancu willanancupaj:

—Jamuriwaycu nokaycuman ushkhayllata.

<sup>39</sup> Chanta Pedroka waquichicuspa rerka chay iscay runaswan. Chayjtintaj pusarkancu maypichus aya casharka chay wasej pata caj pisonman. Chaypi manaña kosayoj tucuy viudas wakaspa Tabitamanta willarkancu Pedroman. Ricucherkançutaj causashaspallaraj p'achasta sirasharka, chaycunata. <sup>40</sup> Pedrotaj nerka tucuy llojsinancuta. Paytaj konkoricuspa Diosmanta mañacorka. Ayaman cutirispataj nerka:

—Tabita, jataricuy,—nispa.

Paytaj ñawisninta quicharispa Pedroti khawarispataj tiyaycucorka. <sup>41</sup> Pedrotaj payta maquinwan aysarerka sayaricunapaj. Diosman t'akaska hermanosta viudastawan wajyaspataj Tabitata causashajta paycunaman ricucherka. <sup>42</sup> Chayta yacharkancu tucuy runas Jope llajtapi. Ashqha runastaj Señor Jesucristopi jap'icorkancu. <sup>43</sup> Chanta Pedroka ashqha p'unchaycunata Jopepi kheparicorka. Uj suela ruwaj Simonpa wasinpitaj tiyacorka.

## 10

### *Pedro Cornelio man willan*

<sup>1</sup> Cesarea llajtapi tiyacoj uj runa, Cornelio sutiyoj. Camacherka pachaj soldadosta Italiano niska tropata. <sup>2</sup> Payka tucuy wasinpi tiyacojcunawan Diosta jatunchajpuni casojpunitaj carka. Diospa unay runas-nin israelcunatapis capuyninwan yanapaspa causacoj. Diosmantapis mañacusapuni caj. <sup>3</sup> Uj p'unchay chaupi tardeta moskopyijina Diosmanta cachamuska uj willaj angelta sut'ita ricorka. Payman chimpaycuspataj chay angel nerka:

—¡Cornelio!

<sup>4</sup> Corneliotaj payta allinta khawarerka. Manchachicuspa taporkataj:

—Señor ¿imataj cayrí? —nispa.

Chay angeltaj cuticherka:

—Diosmanta mañacusayquipis pisichicojcunata qhuyaskayquipis Diosta cusichin. Paytaj uyarishasunqui. <sup>5</sup> Cunanka runasta Jope llajtaman cachaspa Simón Pedro sutiyojta wajyachimuy. <sup>6</sup> Payka suela

ruwaj Simonpa wasinpi caricushan. Chay Simonpa wasenka jatun kocha kayllapimin. Simón Pedromin nisonka imatachus ruwanayquita, —nispa.

<sup>7</sup> Angel paymanta ripojtin Cornelioka wajyarka iscay camachisninta, uj soldadontawan. Chay soldadoka Corneliojina Diosta casojllataj carka yanapajcunanmanta paypa atinicuskantaj. <sup>8</sup> Chay quinsa runasninman moskoypi ricuskanta tucuya willarka. Chanta paycunata cacharka Jopeman.

<sup>9</sup> K'ayantintaj paycunaka kayllasharkancuña Jope llajtaman. Pedro-taj chaypi wasej patanman rerka Diosmanta mañacunapaj. [Chay wasi pataka pampalla carka.]<sup>\*</sup> Ñapis chaupi p'unchayña carka. <sup>10-11</sup> Yarkhachicuspataj miqhuyta munarka. Waquichipunancucamataj Pedro moskoypijina ricorka janaj pachata quichacushajta. Chay-manta uj jatun phullujina, tawantin puntasninmanta warqhuska cay pachaman uraycamushajta ricorka. <sup>12</sup> Chaypi carkancu tucuy imaymana tawa chaquiyoj q'ita animalcuna suchoj animalcuna, q'ita p'iskocunapis. <sup>13</sup> Diostaj Pedrota parlapayarka:

—Pedro, jataricuy. Chaycunata wañuchispa miqhuy.

<sup>14</sup> Pedrorí cuticherka:

—Ni jayc'aj chayta miqhuymanchu, Señor Diosníy. Imaraycuchus kan unayña camachiwaskaycumanjinaka manapuni miqhorkanichu cay mana miqhuna animalestaka, —nispa.

<sup>15</sup> Dios nerka ujtawan:

—Miqhuna llimphuchaskaña niskayka allillanña miqhunapaj. Chay-taka amaña manacajpaj khawayaychu, —nispa.

<sup>16</sup> Ajinata ruvacorka quinsa cutita. Chanta chay phullujinaka janaj pachaman okharicaporka. <sup>17</sup> Simón Pedrotaj yachayta munasharka imatachus Dios payman ninayarka moskoypi chay ricuchiskanwan. Ajinallapi Cornelioj cachamuskasnin Simón casharka, chay wasita masc'aspas chayamorkancu. Puncipi sayaycuspataj <sup>18</sup> khaparispa taporkancu:

—Simón sutichaska Pedro ¿caypichu caricushan?

<sup>19</sup> Pedrorí chayllapiraj cashaspa chay ricuskanta entiendeyta munashajtin Santo Espíritu payta nimorka:

—Khaway, quinsa runas masc'ashasuncu. <sup>20</sup> Waquichicuspa riy pay-cunawan ama iscayrayaspa noka paycunata cachamuskayraycu, —nispa.

<sup>21</sup> Uraycuspataj Pedroka cachamuska runasman nerka:

—Pitachus masc'ashanquichej, noka chay cani. ¿Imamantaj jamorkan-quichej?

<sup>22</sup> Paycunataj cuticherkanca:

—Soldadosta camachej Cornelio cachamuwaycu. Payka chekan runamin Diostapis casunpuni. Tucuy Israel llajta-masisniyqui payta c'acha runapaj khawancu. Diosmanta cachamuska uj angel payman sut'inchaspa nerka wasinman wajyasunanta. Pay tucuy ninayquita uyarisuyta munan, —nispa.

<sup>23</sup> Pedroka paycunata wasinman pusaycuytawan tutata chaypi puñucorkancu. K'ayantintaj rerka paycunawan Cornelioj wasinman. Jope llajtamanta waquin hermanospis paywan rillarkancutaj.

\* **10:9** Ninayan.

<sup>24</sup> Khepan p'unchaytaj Cesarea llajtaman chayarkancu. Corneliotaj chaypi paycunata suyasharka ayllusninta allin rejsiskasnintawan tantaspa. <sup>25</sup> Pedro wasinman yaycushajtinña Cornelioka llojserka payta napaycoj. Konkoricuspataj Pedrota yupaycharka. <sup>26</sup> Pedrorí payta jatarichispa nerka:

—Sayaricullay. Nokapis kanjina runallataj cani, —nispa.

<sup>27</sup> Ajina parlaspa yaycorkancu wasinman. Pedrotaj ashqha runasta tantaskata ricorka. <sup>28</sup> Nerkataj:

—Kancuna yachanquichejjina israel runaspa unay yachachiskas caycu waj llajtayo runaj wasinmanka ama chayanaycuta, nitaj paycunaman kayllanaycuta. Cunanrí Dios ñapis reparachiwanña waj llajtayo runasta sumajpaj khawanayta. <sup>29</sup> Chayraycu jamuni mana iscayrayaspa wajyachimuwaskayquichejtawan. Munani willarinawayquichejta imapajtaj wajyachiwarkanquichejrí, —nispa.

<sup>30</sup> Corneliotaj cuticherka:

—Ñapis tawa p'unchayña pasan, cunan chaupi tardetajina wasiypi Diosmanta mañiacusharkani. Ajinallaman ricorkani moskoypijina uj runata c'anchashaj p'achayyoja. <sup>31</sup> Payri niwarka: “Cornelio, Dios mañacuskayquita uyarishasunqui. Mana konkapunchu pisichicojcuman tucuy qhuyaskayquita. <sup>32</sup> Cunan cachay runasta Jope llajtaman wajyachimuytaj Simón sutichaska Pedrota. Uj suela ruwaj Simonpapi wajyariska cashan. Chay Simonpa wasenka kocha kayllapimin. Pedrotaj kanman parlasonka”, nispa. <sup>33</sup> Uyariytawancamataj wajyachimorkayqui. Walejtapuni jamunqui. Chayraycu cunan tucuyniyu Diospa ñaupakenpi cashaycu uyarinaycupaj tucuy atiyniyoj Señor tucuy camachisuskanta ninawaycupaj, —nispa.

<sup>34</sup> Chanta Pedroka paycunaman parlaspa nerka:

—Cunan chekamanta yachani may llajtayo runaspis Diospajka quiquillanpuni caskancuta. <sup>35</sup> Diosrí munan tucuy runas paypi jap'icuspa chekan cajta ruwanancuta may llajtamantapis cachuncu. Ajinapi paycunata jap'in. <sup>36</sup> Dios willarka israel runasminman paywan allinyacuya atinancuta Jesucristopi jap'icuspa. Payka atiyniyoj Señormin, tucuy runastataj camachin. <sup>37</sup> Kancuna yachanquichej Juan willaskanta. Nerka runas juchasnincuta sakespa yacupi bautizacusa Diosman cutiricunancuta. Jesús chay khepatataj Galilea jallp'amanta kallarispa tucuy Judea jallp'apipis ruwaskanta yachanquichejña. <sup>38</sup> Dioska Nazaret llajtayo Jesucristota ajllacuspa Santo Espirituta sonkonman churaskantapis yachanquichejñataj. Ajinapi Jesuska atiyniyoj caspa runasta sumajta yanaparka. Supay Satanaspa tucuy llaquchiskancunata thañicherka. Dios paywan caskanraycu tucuy chayta ruwarka. <sup>39</sup> Nokaycu ricorkaycu Jesuspa tucuy ruwaskanta Judea jallp'api Jerusalén llajtapijis. Israelcunataj payta cruzpi chatachispa wañucherkanca. <sup>40</sup> Quinsa p'unchayninman Dios paytaka causarichimorka. Nokaycu willajcunallaman riqhurichiwarkaycu <sup>41</sup> manataj tucuy runasmancu. Causarimuskanmanta willanaycupaj Dios unayña ajllacuwarkaycu. Jesús wañuymanta causarimuskanmanta paywan cusca miqhorkaycu. <sup>42</sup> Camachiwarkaycutaj tucuy runasman sut'ita willaranaycuta paymanta sumajta parlanaycutapis. Willanaycu tiyan Dios churaskanta Jesusta tucuy runasta khawaspa

ninanpaj ruwaskancu allinchus manachus caskanta. Cachun causasha-jcunapis wañuskacunapis. <sup>43</sup> Diospa tucuy unay willajcunapis Jesus-manta sut'ita willarkancu. Nerkancutaj Jesuspi tucuy jap'icojcuna atiyn-inraycu juchasnincumanta llimphuchaskas canancuta,—nispa.

<sup>44</sup> Pedro chay imasta parlashajtillanraj Santo Espíritu uraycamorka willaskanta tucuy uyarejcunaj sonkoncuman. <sup>45</sup> Pedrowan jamoj israel-masisnin Jesucristopí jap'icojcuna carkancu. Paycunaka t'ucorkancu waj llajtayojcunamanpis Diospa qhuyacuyninraycu Espirituta cachamuskanmanta. <sup>46</sup> Imaraycuchus waj parlaycunata parlashajta Diosta jatunchashajtataj uyererkancu. <sup>47</sup> Chanta Pedro nerka:

—Paycunapis nokanchejjinallataj Santo Espirituta sonkoncupi tiyacu-nanpaj jap'erkancu. Chayraycu ni pi jarc'anmanchu paycuna yacupi bautizacunancuta Diosman cutiriskancuta ricuchinancupaj,—nispa.

<sup>48</sup> Camacherkataj chaypi cajcunata bautizacunancuta Jesucristo tucuy atiyniyoj caskanta sut'ita willaspa. Chanta mayta nerka Pedrota uj pisi p'unchaycunata paycunawan kheparicunanta.

## 11

### *Pedro willan Jerusalenpi tantacoj hermanosta*

<sup>1</sup> Jesuspa cachasnin Judea jallp'api caj hermanospis chayta uyererkancu. Ajinapi yacharkancu waj llajtayoj runaspis Diospa palabranta jap'iskancuta. <sup>2-3</sup> Chanta Pedro Jerusalén llajtaman cutejtin israel-masisninmanta Cristopí hermanos paywan churanacorkancu:

—¿Imaraycutaj chayacorkanqui waj llajtayojcunajmanrí? ¿Imaraycutaj paycunawan miqhorkanquirí?

<sup>4</sup> Pedrotaj paycunaman tucuyninta ujmanta uj willayta kallarerka:

<sup>5</sup> —Jope llajtapi casharkani Diosmanta mañacuspa. Uj moskoypijinataj Dios ricuchiwarka uj jatun phullujina janaj pachamanta uraycamoja. Tawantin puntasninmanta warqhuskataj nokaman chayamuwarka.

<sup>6</sup> Khawaycuspataj sut'ita ricorkani tucuy imaymana tawa chaquijoy animalcunata, q'ita animalesta, suchoj animalcunata p'iskocunatapis.

<sup>7</sup> Diostaj niwarka: “Pedro, jataricuy. Chaycunata wañuchispa miqhuy”, nispa. <sup>8</sup> Nokarí nerka: “Ni jayc'aj, Señor Diosní. Imaraycuchus kan unay camachiwaskaycumanjinaka cay mana miqhuna\* animalesta mana miqhorkanichu”, nispa. <sup>9</sup> Chaymanta pay nillawarkataj:

“Miqhuna llimphuchaskaña niskayka allillanña miqhunapaj. Chaytaka amaña manacajpaj khawaychu”, nispa. <sup>10</sup> Ajina ruwacorka quinsa cutita. Chanta phullujinaka janaj pachaman okharicaporka.

<sup>11</sup> Chayllaman chayamorkancu, noka casharkani chay wasi puncuman, quinsa runas cachamuscas Cesarea llajtamanta. Jamuskancu nokata masc'aj. <sup>12</sup> Santo Espiritutaj cachawarka paycunawan rinaypaj mana iscayrayaspa waj llajtayojcuna caskancumanta.

Nokawan rillarkancutaj Cristopí cay sojta hermanospis. Tucuy nokaycutaj chayaspa yaycorkaycu Cornelioj wasinman. <sup>13</sup> Corneliori willawarkaycu Diosmanta cachamuska uj willaj angelta ricuskanta wasinpi sayashajta. Willaspataj niska: “Cachay runasta Jope llajtaman wajyachimuytaj Pedro sutichaska Simonta. <sup>14</sup> Pay nisonka kanta wasiyquipi cajcunatawan imaynata wiñay causayniyoj canayquichejta”,

\* **11:8** Literal: mana llimphuchu.

nispá. <sup>15</sup> Parlayta kallarishajtijat, chaypacha Santo Espíritu uraycamorka sonkoncuman. Imaynatachus ñaupajpi nokanchejman uraycamorka ajinallatataj. <sup>16</sup> Chanta yuyaricorkani Señor Jesuspa uj cuti niskanta: "Chekamanta Juanka runasta yacupi bautizarka juchasnincuta sakejtincu Diosman cutiriskancuta ricuchinancupaj. Pisi p'unchaycunamantarí kancunata bautizaspa cachamusonkachej Santo Espirituta sonkoyquichejman payllapaj causanayquichejpaj". Ajina niskanta yuyaricorkani. <sup>17</sup> Señor Jesucristopi jap'icojtinchemin Dioska cachamorka Santo Espirituta sonkonchejman. Chay quiquin Espiritutataj cachamorka. Chayraycu ¿pitaj carkani noka, Dios munayninta ruwananta jarc'anaypajri?

<sup>18</sup> Chayta uyarispataj Cristopi hermanos manaña Pedrowan churana-corkancu. Manachayrí Diosta jatuncharkancu:

—¡Chayka niyta munan Dioska munaskanta waj llajtayoj runaspis payman cutiricunancuta wiñay causayniyoj canancupaj! —nispá.

### *Cristopi hermanos Antioquía llajtapi tantacojcuna*

<sup>19</sup> 12.2 Runas Estebanta wañucherkanca Jesusmanta willaraskan-raycu.<sup>†</sup> Chaypachataj runas sinch'ita hermanosta ñac'aricherkanca. Ajinapi waquin hermanos ch'ekerachiskas caspa rerkanca jakay Fenicia jallp'acama. Waquenka Chipre jallp'acama waquintaj Antioquía llajtacama rerkanca. Chay caru jallp'aspi willarkanca Jesusmanta israel llajta-masisnillancuman. Manataj waj llajtayojoj runasmanka willarkan-cucho. <sup>20</sup> Chaywanpis Cristopi waquin hermanos Chipremanta Ciren-emantawan rerkanca Antioquía llajtaman. Rispa jakay waj llajtayojoj runasmanpis sumaj willanasta willarkanca. Nerkancutaj Jesús tucuy atiyniyoj Señor caskanta. <sup>21</sup> Dios paycunta sumajta yanapasharka. Ashqhas millay causaynincuta sakespataj Jesuspi jap'icorkanca.

<sup>22</sup> Jerusalén llajtapi tantacoj hermanos chayta uyererkanca. Chayraycu cacharkanca Bernabeta Antioquía llajtacama. <sup>23</sup> Paytaj chayaytawan khawarka imaynatachus Dios atiyninwan paycunata yanapaskanta. Ricuskanmanta mayta cusicuspataj yuyaycharka tucuy paycunata Jesuspi jap'icuspa tucuy sonkowanpuni payta casunancuta. <sup>24</sup> Cay Bernabeka c'acha runa carka sonkonpi Santo Espirituwan junt'a. Jesuspi sumajta jap'icojtaj carka. Ajinapi astawan ashqha runas Jesuspi jap'icorkanca.

<sup>25</sup> Chanta Bernabé rerka Tarso llajtaman Saulota masc'aspá. Payta tarispataj pusarka Antioquiaman. <sup>26</sup> Chaypi Cristopi tantacojcunawan-taj uj wata junt'ata tantacorkanca. Yachacherkancutaj ashqha runasta Jesusmanta. Caypi ñaupajta suticharkanca Cristopi jap'icojcunata "Jesu-cristoipata cajcuna", Cristianos nispá.

<sup>27</sup> Chay p'unchaycunapi Diospa willanasninta willarajcuna Jerusalen-manta rerkanca Antioquía llajtaman. <sup>28</sup> Paycunamantataj uj hermano Cristopi, Agabo sutiyoj, tantacojcunaj chaupincupi sut'incharaka. Santo Espíritujoj atiyninwan willarka uj jatun yarkhay jamunanta tucuy jallp'asman. Chay yarkhaytaj carka camachej Claudio camachishajtin.

---

† 11:19 Ninayan.

<sup>29</sup> Ajinamanta Antioquiapi tantacoj hermanos Judea jallp'api tantacoj-cunaman yanapayta yuyarkancu. Tucuynincu unanchacuspa atiskan-cumanjina tantarkancu kolketa apachinancupaj. <sup>30</sup> Ajinataj paycunaka apacherkancu Judea jallp'api tantacojcunaj curajnincuman. Chay apachicuta Bernabewan Saulopiwan aparkancu jaywanancupaj.

## 12

*Runas astawan ñac'arichinu Cristopi hermanosta*

<sup>1</sup> Chay p'unchaycunapi camachej Herodes ñac'arichiya kallarerka Cristopi tantacojcunamanta waquin hermanosta. <sup>2</sup> Juanpa wauken Jacobotapis uj jatun makana cuchillowan\* wañuchicherka. <sup>3</sup> Herodesrí repararka israelcunata chay ruwaskanwan cusichiskanta. Chayraycu Pedrotapis jap'iycucherka israelcunaj jatun p'unchaycunancipi. Chay p'unchaycunapi paycunaka mana pokochinayoj t'antata miqhoj cancu. <sup>4</sup> Chanta Herodes wisk'acherka Pedrota carcelman. Chaypi chunca sojtayoj soldadosman jaywarka tawamanta tawa tuta p'unchay sumajta khawanancupaj. Yuyasharka Pedrota orkhomuya israelcunaj ñaupakenci† juchachaska cananpaj pascua jatun p'unchaycuna pasaytawan. <sup>5</sup> Ajinapi Pedroka carcelpi wisk'aska casharka sumaj khawaska. Cristopi jap'icuspa tantacoj hermanostaj tucuy sonkowan Pedropaj Diosmanta mañapushallarkancupuni.

*Angel orkhon Pedrota carcelmanta*

<sup>6</sup> Herodestaj k'ayantin Pedrota runaspa ñaupakencuman orkhonan casharka. Chay tutataj Pedroka puñusharka iscay soldados chaupipi. Paycunaman wataska casharka iscay cadenaswan. Soldadostaj carcel puncipi sayasharkancu wakaychanancupaj. <sup>7</sup> Ajinallaman Dios cachamorka uj willaj angelta. Sumaj c'anchaytaj riqhurerka carcelpi. Chay angeltaj Pedrota maquinwan thalaspa rijch'aricherka. Nerkataj:

—¡Jataricuy uskhayta! —nispa.

Chayllaman cadenasnin phascaracaporkancu Pedroj maquisnigmanta. <sup>8</sup> Angelri nerka:

—¡Chumpiyucuy! ¡Abarcasniyquita churacuy!

Pedrotaj casorka. Chanta angel nillarkataj:

—Ponchoyquita churaycucuy. Khatiwaytaj, —nispa.

<sup>9</sup> Ajinamanta Pedro llojsispa risharka angelpa khepanta. Mana yacharkachu ruwacusan chekachus manachus caskanta. Manachayrí yuyarka musphashaskanta chay angelwan. <sup>10</sup> Ajinapi angelwan llojsikerka ñaupaj caj wakaychaj soldados chayninta khepan cajtapis. Llajtaman llojsinapaj fierro puncuman chayamojtintaj chay puncoka payllamanta quicharicaporka paycunapaj. Llojsispataj ñanta purerkancu uj chhicanta. Chanta angel Pedrota ujllata sakerpayaporka. <sup>11</sup> Pedrotaj yuyayninman churacuspa nerka:

—Cunan chekamanta yachani Señor Dios angelta cachamuskanta Herodespa maquinmanta khechunawanpaj. Israelecuna ñac'arichiwayta tucuy munaskancumantapis jarc'awarka, —nispa.

<sup>12</sup> Chay ruwacuskanta reparaspa Maríaj wasinman rerka. Cay Mariaka Juan Marcospa maman carka. Chaypitaj ashqha tantaska hermanos

\* **12:2** Literal: espadawan. † **12:4** Ninayan.

Diosmanta mañapusharkancu Pedropaj.<sup>13</sup> Calle puncuta tocajtintaj uj camachi warmi, Rode sutiyoj, llojserka uyarej.<sup>14</sup> Payri Pedrota parlaskan manta rejsirpaspa cusiymanta puncuta mana quicharkarajchu. Manachayrí uqhuman correycuspa paycunaman willamorka Pedro puncupi cashaskanta.<sup>15</sup> Wasipi cajcunataj nerkanca:

—¡Manachá yuyayniyquipichu cashanqui!

Paypuni caskanta nisharka. Hermanosrí ninacorkancu:

—Ni paychu canman. Paypa wakaychaj angelninchá,—nispa.

<sup>16</sup> Chaycamataj Pedroka puncuta tocamushallarkapuni. Paycuna puncuta quichaspa Pedrota ricuspataj t'ucorkancu.<sup>17</sup> Payrí maquinwan ch'inyanancuta nerka. Paycunaman willarkataj imaynata tucuy atiynijoj Señor payta carcelmanta orkhomuskanta. Nerkataj:

—Caycunata Jacoboman willamuychej chay waquin hermanosmanpis,—nispa.

Llojsispataj Pedro wajnejman riporka.

<sup>18</sup> Sut'iyajtincamatay carcel soldados uqhu sinch'ita ch'ajwarkancu Pedromanta yachayta munaspa.<sup>19</sup> Herodeska Pedrota masc'acherka. Soldadosnirí payta mana tariyta aterkancuchu. Khawaj soldadosta sumajta tapuspataj camacherka paycuna wañuchiskas canancuta. Chay pasayta riporka Judea jallp'amanta Cesarea llajtamani tiyacoj.

<sup>20</sup> Camachej Herodestaj ancha phiñaska carka chay Tiowan, Sidón jallp'apiwan tiyacojcunapaj. Paycunaj curajcunancuri uj yuyaylla churacorkancu Herodespaman rinancupaj. Herodeswan allinyacuynincipi yanapananpajtaj Blastowan munachicorkancu. Chay Blastoka Herodespa wasinpi jatun camachi carka. Herodespa jallp'asninemanta jamoj miqhunawan causaskancuraycu allinyacuyta munarkancu.<sup>21</sup> Herodeska paycunawan parlananpaj uj p'unchayta ajllarka. Chay p'unchaypitaj camachinan p'achasta churaycucorka. Camachina tiyananpi tiyaycuspataj parlamorka.<sup>22</sup> Runastaj khaparerkanca:

—Parlamushan, payka uj diosjinamin, manataj runajinallachu,—nispa.

<sup>23</sup> Chaypachitataj Señor Diosmanta uj cachamuska angel onkoycucherka Herodesta. Diosta mana jatunchaskanraycu qhuruyucuskataj wañorka.

<sup>24</sup> Diospa sumaj willanasnintarí astawan ashqhas uyarerkanca jap'icorkancutaj.

<sup>25</sup> Bernabewan Saulowan ruwanancuta junt'arkancu. Chanta Juan Marcostawan pusaspa Jerusalén llajtamanta cuterkancu.

## 13

*Tantacoj hermanos Bernabeta Saulotawan churancu willaranancupaj*

<sup>1</sup> Antioquiapi tantaska hermanosmanta carkancu Diospa niskanta willajcuna, yachachejcuna ima. Carkancu Bernabé, yana runa niska Simón, Cirenemanta Lucio, camachej Herodeswan cusca uywaska caj Manaén, Saulopiwan.<sup>2</sup> Uj p'unchaypi paycuna mana imata miqhuspa tantaskas Diosta yupaychasharkancu mañacusharkancutaj. Ajinapitaj Santo Espíritu paycunataj parlapayarka:

—Nokapaj ruwanancupaj t'akapuwaychej Bernabeta Saulotawan. Paycunatamin chaypaj wajyarkani,—nispa.

<sup>3</sup> Chanta Diosta yupaychanapaj mana miqhuspa paymanta mañacorkancu. Ajinapi maquisnincuta chay ajllaska runaspa umasnincuman churarkancu ricuchispa Diospaj ruwanancupaj churaskas caskancuta. Chaymanta paycunata cacharparerkancu.

*Chipre willarancu*

<sup>4</sup> Khepanta Santo Espíritu rinancuta niskanraycu Bernabé Saulowan Seleucia llajtaman uraycamorkancu. Chaymanta yacunta barcopi rerkancu Chipre jallp'aman. <sup>5</sup> Chayman chayaspataj kocha canto Salaminapi willarayta kallarererkancu. Chaypi Diospa sumaj willanasninta israelcunaj tantacuna-wasisnincipi willararkancu. Juan Marcospis paycunawan rispa yanapasharka. <sup>6</sup> Yacuwan muyuska, tucuy chay jallp'ata purerkancu willaraspa. Pafos llajtaman chayarkancu. Chaypi tariparkancu uj israel runata. Payka Barjesús sutiyoj uj layka carka. Llullacuspa "Diospa willajnin cani", nej. <sup>7</sup> Chay jallp'api Sergio Paulo camacherka, sumaj yuyayniyoj runataj carka. Chay layka paywan caj. Camachej Sergiotaj munarka yachayta Diospa sumaj willanasninta. Chayraycu wajyacherka Bernabeta Saulotawan. <sup>8</sup> Chay laykarí paycunata anchata jarc'arka. Griego parlaypi sutenka, Elimas, layka niyta munan. Camachejtataj Jesuspi ama jap'icunapajpis atiskanta yuyaychasharka. <sup>9</sup> Saulorí, ujin sutinpis Pablo, Santo Espirituwan junt'a yuyaynini pi callpachaska\* carka. Ajinataj laykata allinta khawaycuspa <sup>10</sup> nerka:

—¡Tucuya pantachej llulla runa! ¡Sajrataj canqui! ¡Supay Satanaspera apaycachaskan! ¡Tucuy chekan cajta chejnicopuni! ¿Runas Jesucristojoj cheka munayninta casunancuta jarc'allanquipunichu? <sup>11</sup> Chay ruwaskayquimanta cunan tucuy atiyniyoj Señor Dios ñac'arichisonka. Ciegoman tucunqui. Intej c'anchayninta mana ricunquichu uj p'unchaycunapaj,—nispa.

Chaypachitantaj laykaka ñawisnin tutayaycojtin lakhapi ricucorka. Thamaycachaspataj uj pusaycachajta masc'acorka. <sup>12</sup> Chayta ricuspa Sergio Paulo Jesuspi jap'icorka. Maytataj t'ucorka Señor Jesuspa yachachinasninta uyarispa.

*Pablo Bernabewan waj Antioquia llajtapi*

<sup>13</sup> Pablloka llanc'aj-masisnинwan yacunta rerkancu Pafos llajtamanta Perge llajtacama. Chay llajta Panfilia jallp'api carka. Juan Marcosí paycunata sakerparipuspa Jerusalén llajtaman cutiriporka. <sup>14</sup> Paycunataj rillarkancupuni Perge llajtamanta Pisidia jallp'api Antioquia llajtacama. Chaypi caspataj samacuna p'unchaypi yaycorkancu tantacuna-wasiman. Tiyaycucorkancutaj. <sup>15</sup> Moisespa camachiskasninnmanta unay willajcunaj kelkaskasnincumantawan leeja uyarkerkancu. Khepanta tantacuypa curajcunan Pablota Bernabetawan nichimorkancu:

—Llajta-masis, ima yuyaychanapis tiyan nokaycupaj chayka, cunan niwaycu,—nispa.

<sup>16</sup> Pablota sayaycucuspa maquinwan ch'inayacunancuta mañaspera nerka:

—Israel llajta-masis, waj llajtasmanta Diosta tucuy casojcunawan, uyariwaychej. <sup>17</sup> Israel llajta yupaychan, chay Dioska unay tatasninchetaj ajllacorka. Jatun llajtamantaj ashqhayacherka

\* 13:9 Ninayan.

Egipto jallp'allapiraj forasteros cashajtincupis. Dios chaymanta jatun atiyninwan paycunata Egipto jallp'amanta orkhomorka. <sup>18</sup> Tawa chunca watatajina mana runa tiyacuna jallp'aspi paycunata pusaycacharka. May munacuywantaj pantaskasnincuta qhuyaspa muchorka. <sup>19</sup> Payka kanchis ayllucunata Canaán jallp'api atipaspa tucucherka. Chay jallp'ancutataj unay tatasniychejman koporka jap'inancupaj. <sup>20</sup> Chaymanta churarka yuyaysapa chekanchajcunata camachinacupaj. Ajinata Dios unay tatasniycuta camachicherka tawa pachaj phishka chuncayoj watatajina unay willajnin Samuelcama. <sup>21</sup> Chanta unay israel tatas uj jatun camachejta mañacorkancu. Diostaj churarka Saulta tawa chunca watata camachinanpaj. Pay carka Benjamín ayllumanta Cispa wawan. <sup>22</sup> Diosrí Saulta wijch'uspa Davidta churarka camachinanpaj. Paymantataj allinta parlaspa nerka: "Cay David Isaipa wawanka sonkoymojinamin. Pay tucuy munayniymanjina ruwanka", nispa. <sup>23</sup> Chay Davidpa khepa alchhisninemanta Jesús carka. Paytataj Dios churarka israel llajtanta juchamanta cacharichinanpaj sumaj niskanmanjina. <sup>24</sup> Juan jamorka Jesuspa ñauapakenta. Pay willararka tucuy israel runasman millay causaynircumanta Diosman cutiricunancuta. Cutiriskancuta ricuchinancupajtaj yacupi bautizacunancuta willararka. <sup>25</sup> Payllataj willayninta tucuchashaspa nerka: "Diospa ajllaskanta suyashaskayquichejka mana nokachu cani. Manachayrí khepayta jamojmin. Diospa c'ata Wawan caskanraycu mana paypajka camachinpajjinallapischu cani", nispa.

<sup>26</sup> Llajta-masis, Abrahammanta jatun tatanchej cajcuna, Diosta tucuy casojcunawan: Cay sumaj willanaska nokanchejman apachimuskamin wiñay causayniyoj cananchejpaj. <sup>27</sup> Chay Jerusalén llajtapi tiyacojcuna curajcunancuwan mana yacharkancuchu Jesús juchamanta Cacharichej caskanta. Nitaj entienderkancuchu unay willajcunaj kelkaskasnincuta sapa samacuna p'unchay leespapis. Ajinapi chay sut'inchaskas junt'acorkancu Jesusta wañunananpaj juchachaskancuwan. <sup>28</sup> Camachejcuna Jesuspi wañunananpajina juchata mana tarerkancuchu. Chaywanpis Jerusalencuna curajcunancuwanka mañarkancu Pilato payta wañuchinantapuni. <sup>29</sup> Ajinapi chay ruwaskancuwan junt'acorka Jesusmanta tucuy unay kelkaskas. Chanta Jesuspa yachacojcunana payta chacatanamanta uraycuchispas p'ampaycorkancu. <sup>30</sup> Diosrí wañuymanta causarichimorka. <sup>31</sup> Galilea jallp'amanta Jerusalén llajtaman Jesuswan cusca rejculaka causarimpuskanmanta ashqha p'unchaycunata payta ricorkancu. Cunantaj israel runasman paymanta willajcuna cancu.

<sup>32</sup> Nokaycupis sumaj willanasta kancunaman willashaycu unay israel tatasniychejman Diospa sumaj niskanta. <sup>33</sup> Nokanchej, paycunaj khepa alchhisninemanta Dios sumaj niskanta junt'arka Jesusta causarichimuspa. Iscay caj taquinapi Jesusmanta Dios nin: Waway canqui.

Cunan p'unchay noka kanta jatunchayqui.†

<sup>34</sup> Ajinata Dios nerka Jesusta causarichimunanta, cuerpon ni jayc'aj ismunanpaj. Chayraycu nillarka: "Kancunata yanapaskayquichej Davidman sumaj niskaymanjina", nispa. <sup>35</sup> Chayraycu ujnin caj taquinapi nillantaj: "Ajllaska runayquej cuerpontaka mana ismunanta

† 13:33 Literal: yumarkayqui.

sakenquichu", nispa. <sup>36</sup> Ciertopuni Davidka causaj-masisninta sumajta yanaparka Diospa munayninmanjina. Chanta wañupuspa tatasninwan cusca p'ampacorka. Paypa cuerpointaj ismuporka. <sup>37</sup> Diospa causarichimuskan, Jesuspa cuerponrí mana ismorkachu. <sup>38</sup> Llajta-masis, chayraycu yachanayquichej tiyan willaraskayka Jesusnejta runas juchasnincumanta llimphuchaskas canancuta. <sup>39</sup> Moisespa camachiskasninta casuspallaka runa mana atinchu juchasninnmanta llimphuchaska cayta. Jesuspi tucuy jap'icojllata, juchasninnmanta llimphuchaska caskanraycu chekan runapaj Dioska khawan. <sup>40</sup> Khawacuychej allinta. ¡Pajtataj unay willajcunaj niskasnincu kancunamantapis canman! Dios paycunata kelkacherka:

<sup>41</sup> ¡Allinta khawacuychej nokamanta asicojcuna!

Noka Dios cani.

May jatun t'ucunata ruwashani ñaupakeyquichejpi.

Ujcuna willasunquichejman chaypis, manapuni creenquichejchu.

Chayraycu ¡ruwaskasniymanta t'ucusaspapis wiñaypaj chincapun-quichej!

<sup>42</sup> Pablo Bernabewan chay willanasta tucuchaspa llojsipusharkancu tantacuna-wasimanta. Runastaj paycunata mayta mañacorkancu cu-timunancuta khepan samacuna p'unchayta paycunaman astawanraj willanancupaj. <sup>43</sup> Tantacuy tucucojtintaj ashqha israel runas paycunata khaterkancu, israelpa Diosninta yupaychajcunaman tucojcunapis. Pablo Bernabewantaj tucuy paycunata yuyaycharkancu c'acha Diospa yanapaynillanwanpuni causacunancuta.

<sup>44</sup> Khepan samacuna p'unchaytataj tantacorkancu yakhalla tucuy llajtantin. Paycuna munarkancu uyariyta Diospa palabranta.

<sup>45</sup> Israelecunaka sinch'ita phiñacorkancu chhica runa Pablota uyarej riskanmanta. Chayraycu churanacorkancu Pabloj niskasninpá contranpi sajrata parlaspa. <sup>46</sup> Callpachacuspa Pablowan Bernabewantaj nerkan:

—Kancuna israelecunaman ñaupajta willanaycu carka Diospa palabranta. Kancunari payta mana jap'icorkanquichejchu. Mana wiñay causayniyojpajjinapischu khawacunquichej. Chayraycu waj runasman ripusajcu. <sup>47</sup> Cayjinatamin Señor Dios camachiwarkaycu:

Uj c'ancharaytajina churayqui tucuy runas yachanancupaj juchancumanta cacharichiyya munaskayta.

Tucuy cay pachapi runasman wiñay causaymanta willanayquipaj cacharkayqui.

Ajinata Pablo Bernabewan parlarkancu.

<sup>48</sup> Chayta uyarispataj mana israelecuna cusicorkancu:

—Señor Diospa niskanka may sumajmin, —nispa.

Wiñay causaypaj tucuy ajllaskaña cajcunataj Jesuspi jap'icorkancu.

<sup>49</sup> Señorpa palabranka tucuy chay jallp'api tiyacojcunaman willaraska carka. <sup>50</sup> Chay israelecunari masc'asharkancu imaynatachus ñac'arichiyya Pablota Bernabetawan. Diosta masc'aj, khapaj warmisman, llajtapi khapaj runasmanwan yuyayta korkancu Jesuspa cachasninta ñac'arichinancupaj. Ajinapi llajtancumanta wijch'orkancu. <sup>51</sup> Chanta Pablo Bernabewan ojot'asnincuta thalaycorkancu ricuchinancupaj chay runas juchawan juchachaskas caskancuta. Iconio llajtamantaj

riporkancu. <sup>52</sup> Jesuspi jap'icojuncuna Antioquiapi may cusiskas carkancu Dios Espirituwan junt'ataj.

## 14

### *Pablo Bernabewan Iconio llajtapi*

<sup>1</sup> Pablo Bernabewan Iconio llajtaman chayaspataj israelcunaj tantacuna-wasincuman rerkancu. Chaypitaj sumajtapuni willararkancu. Ajinapi ashqhas, israel runaspis, waj runaspis Jesuspi jap'icorkancu. <sup>2</sup> Jesucristopi manapuni creej israelcunari waj runasta yachaycucherkancu. Okharicherkancutaj hermanospa contranta phiñacunancupaj. <sup>3</sup> Chayraycu Pablo Bernabewan chaypi unayta khepacorkancu. Callpachacuspataj sumajta willararkancu Dios runasta maytapuni yanapayta munashaskanta. Dios ricuchinasta t'ucunastawan ruwarka paycunanejta, runas yachanancupaj chay willanas cheka caskanta. <sup>4</sup> Chay llajtayojcuna ashqhasrí iscayman t'akacorkancu. Ujcuna israelcunaman sayaskas carkancu ujcunataj Jesuspa cachasninman. <sup>5</sup> Ajinaka israelcunawan waj runaswan curajcunancuwan uj yuyayllaman tucuspa yachachinacorkancu. Ninacorkancu:

—Chay cachasta ñac'arinachej, rumiswan ch'ankaspa wañuchinachej, —nispa.

<sup>6</sup> Pablowan Bernabewanrí chay unanchacuskancuta reparaspa chaymanta aykecorkancu. Licaonia jallp'api Listra llajtaman riporkancu, chanta Derbe llajtaman, chay jallp'aj kayllasninmanwan. <sup>7</sup> Chaycunapipis Jesusmanta willararkancu.

### *Listra llajtapi, Derbe llajtapiwan Pablotá ch'ankaycuncu*

<sup>8</sup> Listra llajtapi carka uj runa, chaquinmanta mana puriy atej. Payka ajina suchupuni nacecorka. Tiyaskalla cacoj ni jayc'aj purerkachu.

<sup>9</sup> Pablo willashajta uyarissharkataj. Pablori payta sumajta khawaycorka. Repararkataj thañicunancupaj chay runa Diospi jap'icuskanta. <sup>10</sup> Chanta jatunmanta nerka:

—Sayacyu chekanta, —nispa.

Chay suchu runataj ujllata phinquirispa sayaycucorka. Puriytataj kallarerka. <sup>11</sup> Runastaj chayta ricuspa Licaonia parlaynincipi kha-parerkancu:

—¡Dioscuna runaman tucuspa uraycamuwanchej! —nispa.

<sup>12</sup> Bernabeta suticharkancu Júpiter dios. Pablotataj suticharkancu Mercurio dios pay curaj parlaj caskanraycu. <sup>13</sup> Jupiterta yupaychana-waseka llajtaman yaycunapi carka. Jupiterta yupaychachej runataj chayman apamorka wacasta t'ica pillustawan. Paywan ashqha runaswan munarkancu apamuskasnincuta jaywaspa yupaychayta Bernabeta Pablotawan. <sup>14</sup> Jesuspa cachasninrí chayta uyarispa p'achasnincuta lliq'icorkancu mana munaspa runas paycunataj yupaychanancuta. Chay ashqha runas chaupiman correycuspataj kha-parerkancu:

<sup>15</sup> —Tatacuna, ¿imaraycutaj cayta ruwashanquichejrí? Nokaycupis kancunajina runaslla caycu. Sumaj willanastataj willaraj jamuycu. Chay ruwaska dioscunaman yankha yupaychayta sakespa causaj Diosman cutiricunayquichejta, niycu. Pay ruwarka janaj pachata, cay pachata, jatun kochasta, tucuy chay ruwaskasnini cajcunatawan.

<sup>16</sup> Unay p'unchaycunapi tucuy runacuna munaynincumanjina causancuta Dios sakellarka. <sup>17</sup> Astawanpis payka runaswan sut'ita rejsichicorka c'acha Dios caskanta. Pay apachimuwanchej parata. Paylataj miqhunatapis pokochipuwanchej. Pay sajsachiwanchej miqhunawan. Sonkonchejpitaj mayta cusichiwanchej, —nispa.

<sup>18</sup> Tucuy cay imasta nishajtincupis runaska manapuni munarkan-cuchu casuya. Ñac'ayta Pablo Bernabewan chay ashqha runasta jarc'arkancu ama paycunaman uywasta jaywaspa yupaychananca.

<sup>19</sup> Chanta waquin israelcuna chayamorkancu Antioquía llajtamanta Iconio llajtamantawan. Paycuna runasta yuyaychaspa Pabloj contranpi okharichererkancu. Ajinamanta runas payta rumiswan ch'ankarkancu. Wañuchiskancuta yuyaspataj llajta jawaman khataterkancu. <sup>20</sup> Jesuspi jap'icojcunari Pablojman muyuchaycucorkancu. [Paycuna manaña jatarinanta yuyashajtincutaj Pabloka jatarerka.]<sup>\*</sup> K'ayantintaj Pabloka Bernabewan Derbe llajtaman riporkancu.

<sup>21</sup> Chay llajtapi tiyacojcunaman Jesusmanta sumaj willanasta willararkancu. Ashqha runastaj Jesuspi jap'icuspa payta casorkancu. Chaymanta Pablo Bernabewan cutimorkancu Listra, Iconio, Antioquia, chay quinsa llajtasman. <sup>22</sup> Chay llajtaspi Jesuspi jap'icojcunata sonkoncupi callpacharkancu. Yuyaycharkancutaj paycunaka Cristota casuspapuni causanancuta. Chantapis nerkanca: "Dios camachin, chaymanka sinch'ita muchuspa yaycunanchej tiyan", nispa. <sup>23</sup> Cristopi hermanos tantacoj cancu, chaypi Pablo Bernabewan curajcunata churarkancu sapa uj tantacuypaj. Mana imata miqhuspa Diosmanta mañaporkancu. Señor Jesucristopi ñapis jap'icuskanca tucuy paycunata wakaychananpajtaj paymanta mañaporkancu.

### *Pablo Bernabewan waj Antioquía llajtaman cutimpuncu*

<sup>24</sup> Chanta Pisidia jallp'anejta pasaspa Panfilia jallp'aman chayarkancu. <sup>25</sup> Perge llajtapi Jesusmanta willaraspataj Atalia llajtaman uraycamorkancu. <sup>26</sup> Chanta barcopi yacusnejta rerkancu Siria jallp'api caj Antioquiaman. Chaypi hermanos ñaupajpi mañapuskancu ruwaynincipi Dios paycunata yanapananpaj. Cunantaj ruwanancuta tucuspaña chay llajtaman cutimporkancu. <sup>27</sup> Pablo Bernabewan Antioquía llajtaman chayampuspataj Cristopi tucuy hermanosta tantacherkancu. Chaycunamantaj willarkancu Dios paycunawan tucuy ruwaskanta. Willarkancutaj imaynata Dioska willaraskancunejta ricuchiskanta waj llajtayojcunatapis Jesuspi jap'icuya atiskancuta.

<sup>28</sup> Chaypitaj paycuna Cristota casojcunawan unayta khepacorkancu.

## 15

### *Jerusalén llajtapi parlanacu*

<sup>1</sup> Chay p'unchaycunapi waquin runas uraycamorkancu Judea jallp'amanta chay Siriapi caj Antioquiaman. Chaypi paycuna yachachisharkancu Cristopi hermanosta. Nerkancutaj:

—Moisespa camachiskanmanjina kharej cuerponpi uj señalta\* churanayquichej tiyan. Mana churawajchej chayka, mana wiñay causayniyoj cayta atiniquichejchu, —nispa.

\* 14:20 Ninayan. \* 15:1 Literal: circuncidacuy.

<sup>2</sup> Chayraycu Pablopis Bernabepis paycunawan churanacuspa sinch'ita parlarkancu. Chantaña tantacoj hermanos ajllarkancu Pablotá Bernabeta ujcunatawan rinancupaj Jerusalén llajtaman. Chaypitaj parlanancu carka Jesuspa cachasniwan, Cristopi hermanosmanta curajcunawan cay imasmanta sut'ita yachamunancupaj.

<sup>3</sup> Antioquiapi tantaska hermanos paycunata cacharkancu. Chanta cachaskacunaka pasarkancu Fenicia jallp'anejta Samaria jallp'anejta ima. Chaycunapi willararkancu imaynatachus mana israel cajcuna juchancuta sakespa Jesuspí jap'icuskancuta. Cristopi tucuy hermanostaj chayta uyarispá mayta cusicorkancu.

<sup>4</sup> Chanta chay cachaskacunaka Jerusalenman chayarkancu. Chaypi tantaska hermanoswan, Jesuspa cachasniwan, curajcunawanpis paycunata cusiywan tariparkancu. Cachaskacunataj willarkancu Dios paycunawan sumajta ruwaskanta tucuy chay imasta. <sup>5</sup> Waquin fariseo parte caj hermanosrí sayarispa nerkanca:

—Maná israelmanta hermanoska kharej cuerponpi uj señalta churanancu tiyan wiñay causayniyoj canancupaj. Chaywanpis paycuman willananchej tiyan Moisespa camachiskasninta casunancuta, —nispa.

<sup>6</sup> Ajinapi tantacorkancu Jesuspa cachasniwan hermanosmanta curajcunawan chay jawa sumajta khawanancupaj. <sup>7</sup> Ashqhataña parlaycuskancumantataj Pedroka sayarispa nerka:

—Hermanosní, yachanquichej Dioska ñaupajpi cachacunamanta ajllawaskanta waj llajtayojcunata willaramunapaj. Ajinapi sumaj willanasta willarajta cachawarka paycuna uyarispá paypi jap'icunancupaj. <sup>8</sup> Runaj sonkonpi tucuy yuyaskanta sut'ita yachan Dios. Chay waj llajtayojcunatapis wawasninpaj jap'iskanta sut'ita ricucherka. Dioska cachamuspa Santo Espiritu sonkoncuman tiyacunampaj chayta sut'incharka. Paycunaj sonkoncumanpis chay Espiritu cachallarkataj nokanchejpamanjina. <sup>9</sup> Paypajka uj rejilla canchej waj llajtayojcunapis, nokanchej israelcunapis. Sonkoncutataj juchamanta llimpucharka Jesuspí jap'icuskancuraycu. <sup>10-11</sup> Dios munayninta ricucherkaña Moisespa camachiskasnинејта. Ni unay tatasninchejpis nitaj nokanchejpis chayta junt'ayta aterkanchejchu. Astawanpis c'acha Señor Jesucristopi jap'icuspá qhuyacuyninraycu nokanchejpis wiñay causayniyoj canchej. Ajinallatataj waj llajtayojcunapis wiñay causayta jap'incu. Chanta ¿imaraycutaj Jesusta casojcunaman waj ruwanasta k'epichinquichejrí?

<sup>12</sup> Chayta uyarispá tucuy chay ashqha hermanos ch'inyacorkancu. Uyarerkancutaj Pablotá Bernabetawan Dios paycunanejta waj llajtayojcuna uqhupi ruwaskanta. Imaynatachus Dios atiyninwan c'acha jatushej t'ucunastawan ricuchinasta ruwaskanta uyarillarkancutaj. <sup>13</sup> Parlayta tucojtinctutaj Jacobo nerka:

—Hermanosní, uyariwaychej. <sup>14</sup> Simón Pedro willawarkanchejña ñaupajpis Dios qhuyacuskanta waj llaytayoj runastapis. Paycunamanta runasta ajllarka cheka wawasin canancupaj. <sup>15</sup> Unay willajcunaj kelkaskancupipis Dioska ajinatapuni nin:

<sup>16</sup> Uj runa urmaska wasita ujtawan wasichan, ajinallataj noka camachej Davidpa khepa alchhisnimbanta uj runata churasaj ujtawan camachinanpan.

<sup>17</sup> Waj llajtasmanta tucuy chay runaspis rejsiwayta munanancupaj chayta ruwasaj.

Paycunata wajyarkani nokajpata canancupaj.

<sup>18</sup> Ajinata nin tucuya ruwaj Dios. Payka cayta unaymantapacha runasta uyaricherka.

Jacoboka nillarkapuni:

<sup>19</sup> —Chayraycu noka yuyani waj llajtayojcunata amaña llaquichinanchejta waj ruwanaswan. Paycuna sajra ruwaskasnincuta sakespa Diosman cutirerkancuña. <sup>20</sup> Astawanpis paycunaman kelkasunman: “Amaña ruwaska dioscunapaj jaywanasta miqhunancuta, ni khenchachacunancuta, nitaj sipiska uywaj aychanta miqhunancuta yawarnintin caskanraycu, nillataj ima yawarta miqhunancuta”. <sup>21</sup> Imaraycuchus Moisespa camachiskasnintaka runas unaymantapacha sapa llajtapi yachachincupuni. Sapa samacuna p'unchaypitaj runas chayta leencu tantacuna-wasispi, —nispa nerka Jacobo.

*Apachincu cartata Jesucristopi jap'icoj waj llajtayojcunaman*

<sup>22</sup> Chanta Jesuspa cachasninwan, tucuy tantacoj hermanoswan, curajcunawan unanchanacorkancu. Tantacuynincumantataj ajllarkancu runasta cachanancupaj Antioquia llajtapi caj hermanosman. Pablowan Bernabewan rinancupaj ajllarkancu Judasta Silastawan. Paycunaka sumajpaj khawaska hermanos carkancu. Cay Judasta Barsabás nispa sutichallajtaj cancu. <sup>23</sup> Paycunawan apacherkancu uj cartata nispa:

“Nokaycu Jesuspa cachasnin, curajcunawan, Cristopi hermanospawan napaycamuycu tucuy kancuna waj llajtayoj hermanosman. Kancuna Antioquiapi, Siria, Cilicia jallp'aspi tiyacojcunamanwan napaycamuycu. <sup>24</sup> Uyarispa yachaycu waquin hermanos mana nokaycumanta cachaskalla jamuskancuta. Paycuna llaquichispa pantachisunayquichejpaj nerkanca: Moisespa camachiskasninta casunayquichej, kharej cuerponpi uj señalta ruwanayquichejpis tiyan wiñay causayta jap'inapaj, nispa. <sup>25</sup> Chayraycu yuyaycu ajllaska hermanosta cachamunaycoka allin caskanta sumaj sut'i cananpaj. Tucuyniyucu uj yuyayman chayaspa paycunata cachamuycu. Paycuna jamushancu munaska hermanosninchey Pablowan Bernabewan.

<sup>26</sup> Pablo Bernabewan yakha wañorkancu Señorninchej Jesucristomanta willaskancuraycu. <sup>27</sup> Ajinaka cachamushaycu Judasta Silastawan. Paycunamin chay kelkaskaycujinatapuni willasonkachej. <sup>28</sup> Santo Espiritupis nokaycupis yuyaycu allin caskanta cay yuyaychaskasllata casunayquichejta: <sup>29</sup> Amaña ruwaska dioscunaman jaywaska aychata miqhuychejchu. Nitaj yawarta miqhuychejchu. Nitaj sipiska uywaj aychanta miqhuychejchu yawarnintin caskanraycu. Nitaj khenchachacuychejchu. Chaywanka allilan canka. Allillanta causacuychej”, nispa kelkarkancu.

<sup>30</sup> Ajinataj cachaskacunaka rerkanca Antioquia llajtaman. Chaypi Cristopi tucuy hermanosta tantaspa cartata jaywarkancu. <sup>31</sup> Hermanoska chay yuyaychaj cartata uyarispataj mayta cusicorkancu.

<sup>32</sup> Judas Silaspiwan Diospa willajcunana carkancu. Ashqhata willaraspa hermanosta yuyaycharkancu. Sonkoncupitaj callpacharkancu Jesucristopi astawan jap'icunancupaj. <sup>33</sup> Uj p'unchaycunata caricuspa paycunapis cachamojnincuman riporkancu Jerusalén llajtaman. Tucuy hermanostaj paycunata cachaporkancu:

<sup>34</sup> Silasrí kheparicuya yuyarka. <sup>35</sup> Pablo Bernabewanri Antioquía llajtapi kheparicuspa yachachillarkancupuni. Ashqha waj hermanospipwan willararkancu Señor Jesucristomanta sumaj willanasta.

*Pablo yuyan hermanosta ujtawan watucamuya*

<sup>36</sup> Khepan p'unchaycunamanta Pablo Bernabeman nerka:

—Jacu ujtawan watucamuna hermanosta ñaupajpi willararkanchej Señor Jesucristoj niskanmanta, tucuy chay llajtasman. Watumunataj imaynachus Cristopi cashancu, —nispa.

<sup>37</sup> Bernabeka paycunawan pusayta munarka Juan Marcosta.

<sup>38</sup> Pablórí mana munarkachu. Nerka mana allinchu caskanta riskancipi Panfiliamanta cutiripuskanraycu ruwananta mana tucuchaysispa.

<sup>39</sup> Chay jawa mayta rimanacorkancu t'akanacunancucama. Ajinamanta Bernabé pusarka Marcosta. Chipre jallp'amantaj yacunta rerka.

<sup>40</sup> Pablotaj Silasta ajllarka. Hermanostaj Diosmanta mañaporkancu Señor paycunata yanapaspapuni wakaychananpaj. Chanta Pablo llojserka.

<sup>41</sup> Rerkataj Siria jallp'anejta Cilicia jallp'anejtawan. Chay jallp'aspi Cristopi jap'icuspa tantacojcunata sonkoncupi sumajta callpacharka astawan paypi jap'icunancupaj. †

## 16

*Timoteo purin Pablowan Silaswan*

<sup>1</sup> Pablo Silaswan chayarkancu Derbe llajtaman. Chaymantataj Listra llajtaman rerkancu. Chaypitaj tarerkancu Jesuspi uj jap'icoj runata Timoteo sutijoja. Mamanpis Jesuspi jap'icoj carka, Diospa unay ajllaskan israelcunamanta. Tatanrí griego llajtayo runa carka. <sup>2</sup> Hermanos Listrapi Iconiopipis Timoteota sumaj hermanopaj khawarkancu. <sup>3</sup> Pablori munarka Timoteo paywan purinanta. Chaycunanejpi tiyacoj israel runasraycutaj Pablo Timoteoj cuerponpi uj señalta churacherka. [Chaytataj israelcuna ruwaj cancu sapa uj kharita Diospa unay ajllaskas-nin caskancuta ricuchinancupaj.]<sup>\*</sup> Tucuy chaycuna yacharkancu Timoteoj tatan griego runa caskanta. Chayraycu Pablo yuyarka chay señalta churanañ caskanta. <sup>4</sup> Tucuy llajtasman chayaspataj Pablowan llanc'aj-masisinwan hermanosta yachachisharkancu. Jesuspa cachas-ninwan Jerusalenpi curaj hermanoswan niskancu ruwanancuta chayta casunancuta munacuywan camacherkancu. <sup>5</sup> Tucuynejpi Jesuspa cachasnenka tantaska hermanosta astawan callpacharkancu Jesuspi jap'icunancupaj. Sapa p'unchaytaj astawan runas Jesuspi jap'icorkancu.

*Pablo Macedonia runata ricun moskoypijina*

<sup>6</sup> Santo Espíritu jarc'arka Pablotá chay llanc'aj-masisnintawan Asia jallp'api sumaj willanasta Jesusmanta willaramunancuta. Chayraycu Frigia jallp'anejta Galacia jallp'anejtawan rerkancu. <sup>7</sup> Ajinapitaj Misia jallp'a kayllaman chayamorkancu. Paycunataj Bitinia jallp'amán riyta yuyarkancu. Jesuspa cachamuskan, chay Espirituri, rinancuta jarc'allarkataj. <sup>8</sup> Chayraycu Misia jallp'a ladollanta pasaspa Troas llajtaman chayarkancu. <sup>9</sup> Chaypitaj Pabloka tutapi moskoypijina Macedonia jallp'amanta uj runata ricorka sayashajta. Chay runari Pablotá mayta niricorka: “Macedonia jallp'amán jamuspa yanapariwayaycu”, nispa.

† **15:41** Literal: circuncidanancu tiyan. \* **16:3** Literal: circuncidacherka.

<sup>10</sup> Ajinata Pablo ricuskantawancama Macedonia jallp'aman rinaycupaj churacorkaycu. Nokaycuri chekamanta yacharkaycu Dios camachi-waskaycuta paycunaman sumaj willaranaycupaj.

*Pablo Silaswan Filipoſpi*

<sup>11</sup> Troas llajtamanta yacunta barcopi puririmuspa chekanta Samotracia jallp'aman chayarkaycu. K'ayantintaj Neápolis llajtaman chayarkaycu. <sup>12</sup> Rispa chaymanta Filipos llajtaman chayarkaycu. Filiposka Macedonia jallp'api jatun llajta carka. Chaypitaj Roma llajtamanta runaspis tiyacuncu. Chaypi nokaycu pisi p'unchaycunata khepacorkaycu. <sup>13</sup> Samacuna p'unchaypitaj llajtamanta mayu cantoman llojserkaycu. Chaypi yuyarkaycu tincuya Diosmanta mañacoj rejcunawan. Ajinapi tantacoj warmiswan parlaspataj Jesusmanta yachacherkaycu. <sup>14</sup> Carka paycunamanta uj uyarej warmi, Lidia sutiyoj. Payka Tiatira llajtamanta carka, Diostapis munacoj. Culli-puca, sumaj p'achata vendejpis carka. Señor Jesucristo payman sumaj yuyayta korka Pabloj parlaskanta casunanpaj. <sup>15</sup> Ajinapi payka wasinpi tiyacojcunawan bautizacorkancu Jesuspi jap'icuskanuta ricuchinancupaj. Chaymantataj payka mayta niwasharkaycu:

—Señor Jesuspi chekamanta jap'icojpaj khawawanquichej chayka, wasiyman jamuychej caricunayquichejpaj, —nispa.

Ajinata wasinman pusawarkaycu.

*Pablo Silaswan wisk'askas Filipos llajtapi*

<sup>16</sup> Diosmanta mañacoj rincupuni, uj cuti chayman risharkaycu. Ajinallapi uj camachi sipaswan mana yuyaymanta tincucorkaycu. Chay sipaska supaywan apaycachaska carka. Chayraycu runasman mana yachaska imasta willaj. Ajinaspataj patronninpaj ashqha kolketa ganaj carka. <sup>17</sup> Chay sipaska Pablotawan nokaycutawan khatiya kallariwarkaycu. Khaparispataj nisharka:

—Cay runaska tucuy atiyniyoj Diospa camachisnin cancu. Paycuna willasonkachej imaynata juchamanta cachariskas canayquichejta, —nispa.

<sup>18</sup> Ashqha p'unchaycunata ajinata khaparillajpuni. Pablórí chayta muchuyta manaña aterkachu. Chayraycu cutiricamuspa sajra supayta nerka:

—Jesucristoj atiyninwan camachiyqui: Llojsiy paymanta, —nispa.

Chay quiquinpachataj supayka sipasmanta llojsiporka.

<sup>19</sup> Chay sipaspa patronesnin ricorkancu manaña paywan kolketa ganayta atinancuta. Chayraycu Pablotawan Silastawan jap'icherkancu. Ajinaspataj plazapi llajta camachejcunaman khatatarkancu juchachanancupaj. <sup>20</sup> Camachejcunaman chimpaycuchispataj nerkanca:

—Cay runaska israelcunamanta caspa llajtanchejta okharishancu ch'ajwachinancupaj. <sup>21</sup> Wajjina ruwanasta manchayta willashancu. Nokanchejri romanos caskanchejraycu manapuni chaycunata cheka ruwanaspaj jap'iyta atinchejchu, nitaj ruwaytapis, —nispa.

<sup>22</sup> Ashqha runaspis Pabloj contranpi Silaspawan contranpi okharicorkancu. Camachejcunataj iscaynincoj p'achasnincuta lluch'urparicherkancu. Camacherkancutaj c'aspiwan wajtaskas canancuta. <sup>23</sup> Ashqhata wajtachispataj carcelman churaycorkancu. Carcelta khawajtataj camacherkancu paycunata sumajta khawananta

ama aykecunancupaj. <sup>24</sup> Khawajri camachiskancuta casuspa uqhu caj carcel wasiman paycunata churaycorka. Chaquisnincutataj raqhu c'aspi jusc'usman churaraska jap'iracherka.

<sup>25</sup> Chaupi tutatajina Pablowan Silaswanka Diosmanta mañacuspa payta yupaychaspataj taquisharkancu. Chaypi wisk'aska runaspis uyarisharkancu. <sup>26</sup> Ajinapi ujllata jallp'aka mayta qharcatiterka. Carcelpa cimientosninpis cuyurerkancu. Chay quiquinpacha carcelpa tucuy puncusninpis quicharicaporkancu. Wisk'aska runaspata tucuy cadena watanasnincupis phascaracaporkancu. <sup>27</sup> Carcelta khawaj runari puñuymanta rijch'arispa carcel puncusta quichariskata ricorka. Payka wisk'aska runas aykecapuskancuta yuyarka. Chayraycu jatun cuchillonta<sup>†</sup> siq'ispa wañuchicunayasharkaña. <sup>28</sup> Pablórí sinch'ita kha-parispa nerka:

—Ama imanacuychu. Tucuyniyu caypi cashaycu, —nispa.

<sup>29</sup> Carcelta khawaj runataj c'anchata mañacuspa carcel wasiman uskhayta yaycorka. Qharcatitispataj Pabloman Silasmanwan konkoricorka. <sup>30</sup> Paycunata jawaman pusarkamuspataj nerka:

—Wirakochis, juchamanta cachariska canaypaj ¿imatataj ruwanay tiyanrí?

<sup>31</sup> Paycunataj cuticherkerkancu:

—Señor Jesucristopi jap'icuy. Chaywanka kanpis wasiyquipi tiyaco-junapis ajinataj jap'icuspia juchamanta cachariskas canquichej, —nispa.

<sup>32</sup> Ajinatataj paycunaka sumaj willanasta Jesusmanta willararkancu payman tucuy wasinpi tiyacojcunamanpis. <sup>33</sup> Carcelta khawaj runaka Pablotawan Silastawan chay chaupi tutapacha jamperka nanachicuskasnincuta. Chay quiquinpachataj payka tucuy wasinpi tiyacojcunawan bautizacorkancu Jesuspi jap'icuspia. <sup>34</sup> Chaymantataj Pablotawa Silastawan wasinman pusaspa miqhunata jaywarka. Payka may cusiska casharka tucuy wasinpi tiyacojcunapis Diospi jap'icuskancuraycu.

<sup>35</sup> P'unchayamojtínlla llajta camachej curajcunaka yanapajcunancuta khawajcunaman cachamorkancu. Nichimorkancutaj: "Chay runasta cacharipuychej", nispa. <sup>36</sup> Ajinataj carcelta khawaj runaka chay niskancuta Pabloman willarka:

—Camachejcuna camachimuncu cachariska canayquichejta. Chayraycu cunanka allillanta ripuychej, —nispa.

<sup>37</sup> Pablórí paycunataj nerka:

—Roma llajtayoj runas cashajitiyu tucuy runas ricushajtincu jasut'ichiwarkaycu. Chaywanpis ajinata ruwawarkaycu mana juchachaskasllata. Ajinaspataj carcelman wijch'uycuwarkaycu. Cunani¿pacayllamantachu cacharipuya munawaskaycu? Mana ajinachu canka. Manachayrí paycuna quiquinco jamuspa runaspa ñaupakencupi orkhowachuycu carcelmanta, —nispa.

<sup>38</sup> Yanapajcunaka chayta willarkancu camachejcunaman. Camachejcunari Roma llajtayoj runas caskancuta yachaspa mayta manchachicorkancu. <sup>39</sup> Paycunari carcelman jamuspa Pabloman Silasmanwan niricusharkancu:

—Pantarkaycu, perdonariwaycu, —nispa. Paycunata cacharipuspataj nerka:

—Cay llajtamanta ripullaychej, ari, —nispa.

<sup>†</sup> 16:27 Literal: espadanta.

<sup>40</sup> Carcelmanta llojsispataj Lidiaj wasinman yaycorkancu. Chaypiri Cristopi hermanosta tantaskata ricorkancu. Chayraycu Cristopi sumajta jap'icunancupaj hermanosta callpacharkancu. Ajinaspataj riporkancu.

## 17

### *Tesalónica llajtapi okharicuncu*

<sup>1</sup> Pablowan Silaswanka Anfípolis llajtanejta Apolonia llajtanejtawan rispa Tesalónica llajtaman chayarkancu. Chaypi Diospa ajllaskan israelcunaj tantacuna-wasincu carka. <sup>2</sup> Pablori tantacuna-wasiman yayullajpuni, ajinata chaypipis yaycorka. Chanta payka quinsa sama-cuna p'unchaycunata Diospa palabranmanta yachacherka sumajta parlanacuspa. <sup>3</sup> Payka sut'ita willararka. Ricucherkataj Diospa ajllaskan muchunanpuni caskanta, wañuymantapis causarimunapunitaj caskanta. Nerka:

—Chay Jesuska Diospa ajllaskan Cristo caskanta kancunaman willashayquichej,—nispa.

<sup>4</sup> Israelmanta cajcuna Jesucristopi waquin jap'icorkancu. Ajinapi Pabloman Silasman c'ascacorkancu. May ashqhas, Diosta yupaychaj griego runaspis sumajpaj khawaska warmispis paycunaman c'ascacorkancu. <sup>5</sup> Jesucristopi mana jap'icoj israelcunari paycunawan phiñacuspa chhokanacorkancu. Chayraycu runa tantacunasmanda sajra runasta tantaycorkancu. Chay ashqha runaswantaj llajtata ch'ajwacherkancu. Pablotawan Silastawan masc'asp Jasonpa wasinman callpawan yaycuycorkancu. Ajinaspa llajtapi runaspa tantacuynincuman pusayta munarkancu juchachanancupaj. <sup>6</sup> Chay runasri paycunata mana chay wasipi tarerkancuchu. Chayraycu Jasontawan waquin hermanostawan llajta camachejcunaman khataterkancu. Sinch'ita khaparispataj nerkan:

—Cay runasmin tucuynejpi ch'ajwachincu, caymanpis chayaramul-lancutaj. <sup>7</sup> Paycunata Jasonka wajyacorka. Tucuy paycunajtaka waj camachejnincu tiyan Jesús sutiyoj, nincu. Chaywanka romano camachi-wajninchejpa camachiskasninta mana casuncuchu,—nispa.

<sup>8</sup> Chay imasta uyarejcunatawan llajta camachejcunatawan sinch'ita ch'ajwacherkancu. <sup>9</sup> Jasonmanta Cristopi jap'icojcunamantawan kolketa orkhorkancu cacharipunancupaj. Kojtincutaj paycunata cachariporkancu.

### *Berea llajtapi willarancu*

<sup>10</sup> Hermanosrí chay tutapacha Pablotawan Silastawanka Berea llajtaman cachaporkancu. Ajinataj Pablowan Silaswanka Bereaman chayaytawancama Diospa ajllaskan israelcunaj tantacuna-wasincuman rerkancu. <sup>11</sup> Tesalónica llajtapi tiyacojcunamantaka Bereapi tiyacojcuna astawan c'acha runas carkancu. Paycunaka tucuy sonkowan Diospa palabranta jap'icorkancu. Sapa p'unchaytaj Diospa palabranta sumajta khawasharkancu yachanancupaj Pabloj parlaskan Diospa niskan-manjinachus caskanta. <sup>12</sup> Chayraycu paycunamanta ashqhas Diospi jap'icorkancu, griego parlaj rejsiska warmis, ashqha griego kharispis. <sup>13</sup> Tesalonicamanta israelcunari yacharkancu Pablo Berea llajtapi pis Diospa niskanta willashaskanta. Chayraycu Berea llajtaman runasta ch'ajwachinancupaj okharej jamullarkancutaj. <sup>14</sup> Hermanos chay quiquinpacha Pablotá waquin hermanostawan jatun kocha cantoman

cacharkancu. Chay Berea llajtapi Silaswan Timoteowan khepacorkancuraj. <sup>15</sup> Pablotra pusajcunaka Atenas llajtacama payta pusarkancu. Pablotaj pusajcunaman nerka:

—Niychej, Silasman Timoteoman uskhayllata jamunawancuta, —nispa.

Chanta Berea llajtaman cuterkancu.

*Pablo Atenas llajtapi willaran*

<sup>16</sup> Pabloka Atenas llajtapi Silastawan Timoteotawan suyasharka. Suyashaspataj Pablo sonkonpi mayta phuticorka chay llajta runas ruwaska dioscunata yupaychayman koska caskancuraycu. <sup>17</sup> Ajinapi payka tantacuna-wasipi israel-masisniñpiwan Diosta casoj waj runaspiwan parlanacuspa yuyaycharasharka. Khatupipis sapa p'unchay parlasharka runasta taripaskanmanjina. <sup>18</sup> Chaypi carkancu waquin yachayniyoj epicureocunamanta estoicocunamantawan. Paycuna Pablowan tapunaycucorkancu. Waquintaj nisharkancu:

—Cay thautej runari ¿imatataj niyta munanrí?

Ujcunataj nisharkancu:

—Waj dioscunamanta willarajman rijch'acun.

Chayta nerkanca Jesusmanta causarimuyinmantawan willaraskan-raycu. <sup>19</sup> Ajinataj Pablotaka wajyaspa Marte niska loma pataman pusarkancu. Chaypi yachayniyoj runacuna yachachej cancu. Pablotataj nerkanca:

—Cay mosoj yachachinasta parlaskayquimanta yachayta munaycu.

<sup>20</sup> Mana uyariskaycu parlaycunata kanmanta uyarishaycu. Chayraycu yachayta munaycu ima ninayanchus chay parlaskayqueka, —nispa.

<sup>21</sup> Ajinataj tucuy Atenas llajtayojcuna caru llajtasmanta chaypi tiyacojcunapis mosoj cajllaman churacoj cancu. Tuta p'unchay churacoj cancu mosoj cajta uyariyman chayrí willaymanpis.

<sup>22</sup> Chanta Pabloka Marte niska lomapi runas tantacuynincoj chaupinpi sayaricorka. Nerkataj:

—Atenas llajtayoj runas, reparani kancunaka ashqha dioscunata may yupaychajcuna caskayquichejta. <sup>23</sup> Imaraycuchus llajtayquichejpi purishaspa yupaychanasniyquichejta khawarerkan. Ricullarkanitaj uj yupaychana lugartapis. Chay patapiri kolkaska carka: “Maná rejsiska Diosta yupaychanapaj”. Chay kelkachiskayquichejraycu cheka Diosmanta nokaka willashayquichej.

<sup>24</sup> Willashayquichej chay tucuy atiyniyoj Señor Diosmin ruwarka cay pachata, cay pachapi caj imastapis. Payka janaj pachapipis cay jallp'apipis Camachej Diosmin. Chayraycu mana runaj ruwaskan yupaychana-wasillapichu tiyacun. <sup>25</sup> Nitaj runa yanaparinanta pay necesitanchu uj imatapis pisichicushanmanjinaka. Imaraycuchus paymin tucuyman causayta samaytawan kon, tucuy imatapis.

<sup>26</sup> Dioska uj runata ruwarka. Chay runallamantataj tucuy ayllus riqhurimorkancu. Chaymantataj tucuy cay pachapi tiyacunancupaj churarka. Manaraj paycunata ruwashaspataj yuyaskanmanjina ima p'unchaycunatachus, maypichus tiyacunancutapis camacherka. <sup>27</sup> Chayta Dios churarka runas payta masc'anancupaj. Chayta ruwarka ichá imaynallamantapis reparaspa payta tarinancupaj. Payrí sapa ujnichejpa kayllanchejpipis cashanpuni. <sup>28</sup> Payraycumín causashanchej, purishanchej, runaspis canchej. Waquin wayñuta

ruwajcunayquichej chayjinata nerkancu: "Nokanchejpis Diospa wawasnin canchej pay ruwawaskanchejraycu", nispa.<sup>29</sup> Paypa ruwaskasnin caspaka mana yuyananchejchu Dios korijinaman kolkejinaman rumijinaman rijch'acuskantaka. Nitaj runaj yuyayninmanjina uj c'achitu ruwaskalla caskantapis.<sup>30</sup> Unay runas Diosmanta mana yachashajtincupis pay yuyarka mana jasut'inanta ruwaskancumanjinaka. Cunanrí tucuy runasta tucuynejpi camachin juchancuta sakespa payman cutiricapunancuta.<sup>31</sup> Imaraycuchus Dioska uj p'unchaytamin churan. Chay p'unchaypi tucuy runasta khawanka ruwaskancuta ninanpaj juchayojchus manachus caskancuta. Chayta chekanta ruwanka paypa ajllaskan Jesucristonejta. Dios tucuyman sut'ita ricucherka Jesús ajllaskan caskanta payta causarichimuspa,—nispa nerka Pablo.

<sup>32</sup> Wañuskacuna causarimuskancuta uyariytawan waquenka asicorkancu. Waquintaj nerkancu:

—Chay causarimuymantaka ujllapiwanña uyarisajcu,—nispa.

<sup>33</sup> Chayraycu Pabloka chaupincumanta llojsiporka.<sup>34</sup> Waquinri payman ujchacapuspa Jesucristoppi jap'icorkancu. Chay jap'icojcunamanta carkancu chay llajtapi uj curaj runa Dionisio, Dámaris sutiyoj warmipis, waj runaspiwan.

## 18

### *Pablo Aquilawan tincun*

<sup>1</sup> Chaymanta Pablo Atenas llajtamanta llojsispa Corinto llajtaman rerka.<sup>2</sup> Chaypitaj payka uj israel runa Aquilawan tincorka. Aquilaka Ponto llajtapi naceska carka. Warmin Priscilawan chay p'unchaycunallapi Italiamanta chayamorkancu. Imaraycuchus llajtancumanta camachej Claudio tucuy israelcuna ripunancuta camacherka. Pablotaj paycunata watoj rerka.<sup>3</sup> Paycunawan tiyacorka toldos ruwaj-masincu caskanraycu. Paycunaka cusca llanc'arkancu toldosta ruwaspa chaywan causanancupaj.<sup>4</sup> Pablotaj tantacuna-wasipi sapa samacuna p'unchaypi allinta yuyaycharka. Ajinapitaj niskasnín cheka caskanta reparacherka israelcunaman wajcunamanpis.

<sup>5</sup> Silaswan Timoteowan Macedoniamanta Corinto llajtaman jamorkancu. Chayaytawan Pabloka tucuy sonkowan israelcunaman willarka tuta p'unchay. Jesuska Diospa ajllaskan Cristo caskanta sut'ita willararka.<sup>6</sup> Chay israelcunarí Pabloj contranpi jatarerkancu sajrata rimaspa. Chayraycu Pabloka p'achasninta thalacorka paycunata sakerparinanta ricuchinanpaj. Nerkataj:

—Kancuna wiñay wañuyman wijch'uycuchicunquichej chayka, kancunallataj juchayoj canquichej. Kancunamanta mana juchayojchu casaj. Cunanmantapachataj risaj waj runasman willaranapaj,—nispa.

<sup>7</sup> Chay tantacuna-wasimanta llojsispa Justo sutiyoj runaj wasinman riporka. Chay runaka Diosta casucoj carka. Paypa wasintaj tantacunawasej ladonpi carka.<sup>8</sup> Tantacuna-wasimanta curaj runa Crispopis Señor Jesuspí jap'icorka, tucuy wasinpi tiyacojcunapis. Corinto llajtayoj runaspis sumaj willanasta uyarispa ashqhas Jesucristoppi jap'icorkancu. Jesucristo illata caskancuta ricuchinancupajtaj bautizacorkancu.

### *Señor Jesucristo Pablotá parlamuñ moskoypijina*

<sup>9</sup> Chaymantataj uj tutu moskoypijina Señor Jesús Pabloman nerka:

—Ama manchachicuychu. Manachayrí ama ch'inyacuspa sumaj willanasta willarallaypuni. <sup>10</sup> Chekatapuni noka kanwan cashani. Chayraycu ni pipis imanasonkachu. Astawanpis nokapi jap'icojcuna ashqhas cay llajtapi cankancu,—nispa.

<sup>11</sup> Ajinataj Pabloka chaypi uj wata cuscanniyojta tiyarka. Chaypi tiyacojcunamantaj Diospa palabrantha yachachisharka.

#### *Camachej Galionpaman apancu Pablota*

<sup>12</sup> Galión Acaya jallp'ata camachishajtin israelcuna uj yuyaylla Pabloj contranpijatarerkancu. Chaymantataj llajta camachejman pusarkancu.

<sup>13</sup> Israelcunataj Pablota ch'atarkancu:

—Cay runaka Diosta yupaychachinayashan manataj Moisés camachi-waskaycumanjinachu,—nispa.

<sup>14</sup> Pablo parlarinan cashajtintaj Galionka israelcunaman nerka:

—Tatacuna, uyariwaychej. Runas ima mana allinta ruwasojtiyquichej chayrí jatun juchachaycuy cajtinpis sumajta kancunata uyariyquichejman. <sup>15</sup> Cay rimanacuyka jawa niskasllamanta camachiskasniyquichej-mantawan cancu. Chayraycu kancunalla caytaka khawamuychej. Nokaka caycunamanta ni imata nisajchu,—nispa.

<sup>16</sup> Chanta ñaupakenmanta Pablota paywan cajcunatawan kharkochimorka. <sup>17</sup> Tucuy runastaj tantacuna-wasimanta curaj runa Sostenesta jap'iycorkancu. Ajinaspataj camachej Galionpa ñaupakenpi makay-corkancu. Paymanrí ni imapis kocorkachu.

#### *Antioquía llajtaman cutimpuncu*

<sup>18</sup> Pabloka ashqha p'unchaycunatawanraj Corinto llajtapi khepacorka. Chanta hermanosmanta cacharpayacuspataj Siria jallp'aman jatun barcopi rerka. Paywan cusca rerkancu Aquila Priscilapiwan, khari warmi. Cencrea llajtapi cashasparí Pabloka chujchanta k'alata c'utuchicorka Diosman palabranwan niskanta junt'anapaj. <sup>19</sup> Efeso llajtaman chayaspa Pabloka Priscilata Aquilatawan chaypi sakerka. Payrí tantacuna-wasiman rispa israelcunawan parlanacuspa sut'ita yuyaycharka. <sup>20</sup> Paycunamanta waquintaj mayta mañarkancu astawanraj khepacunanta. Payri: “Mana khepacuymannpunichu”, nerka.

<sup>21</sup> Paycunawan cacharpayanacushaspa nerka:

—Dios munajtenka kancunaman cutimuskayquichej,—nispa.

Chaymantataj Pabloka barcopi Efeso llajtamanta riporka, <sup>22</sup> Cesarea llajtamtaj chayarka. Chaymanta Jerusalenman rispataj chaypi Cristopi jap'icuspa tantacojcunata napaycamorka. Ajinaspataj Antioquiaman jamporka. <sup>23</sup> Chaypi uj p'unchaycunata tiyacorka. Chaymantataj Galacia jallp'anepta Frigianejtawan purerka. Puriskanpitaj Jesuscristopi tucuy jap'icojcunata yachachispa sonkoncupi callpacharka.

#### *Apolos Efeso llajtapi willaran*

<sup>24</sup> Chay p'unchaycunapitaj uj israel runa, Apolos sutiyoj, Efeso llajtaman chayamorka. Payka Alejandría llajtapi naceska carka. Diospa unay palabranmantataj paypa ñanniñipi purinanpaj sumaj yachachiska carka, cosata parlajtaj. <sup>25</sup> Jesusmantataj tucuy sonkowan parlaspa sut'ita yachachej carka. Payrí runas juchasnincuta sakeskancuta ricuchinancupaj, chay Juanpa yacupi bautizacuñillanmanta yacharka. <sup>26</sup> Apoloska tantacuna-wasipi mana manchachicupsa kallarerka Jesusmanta parlayta. Priscila Aquilawantaj chayta uyarerkerca. Chayraycu

payta wasincuman pusaspa paywan sumajta parlarkancu. Aswan sut'ita yachacherkancu imaynata runa causanan Diospa ñanninpi purinanpaj. <sup>27</sup> Acaya jallp'aman Apolos riyta munashaskanpitaj hermanos payta Cristopi callpacharkancu. Paycunataj uj cartata kelkarkancu Acaya hermanosman Apolosta sumaj sonkowan wajyanancupaj. Ajinataj payka chayman chayarka. Chaypipis runas Jesuspi jap'icorkancu Dios paycunata qhuyaskanraycu. Chay jap'icojcunata Apoloska sumajta yanaparka. <sup>28</sup> Chekatapuni tucuypa ñauakenpi Diospa ajllaskan israelcuna pantaska caskancuta sumaj yuyaywan ricucherka. Kelkasasmanta paycunata sumajta yuyaricherka Dios ajllaskanta Jesusta camachinanpaj.

## 19

### *Pablo Efeso llajtapi*

<sup>1</sup> Apoloska Corinto llajtapi casharka. Chaycamataj Pabloka chay pata caj jallp'asninta purimuspaña Efeso llajtaman chayamorka. Chaypitaj payka Jesuspi waquin jap'icojcunawan tincorka. <sup>2</sup> Ajinaspataj payka paycunata tapurerka:

—Jesucristopi jap'icushaspa ¿Santo Espirituta jap'icorkanquichejchu?

Paycunataj cuticherkerkancu:

—Santo Espíritu caskanta ni uyarillarkaycupischu, —nispa.

<sup>3</sup> Paytaj tapurerka:

—¿Imatataj yachachisorkachej Diosman t'akacuspa bautizacushajtiyquichejrí?

Paycunataj cuticherkerkancu:

—Bautizacunaycupajka Juan yachacherka, ajinallatataj yachacorkaycu juchasniycuta sakenaycuta, —nispa.

<sup>4</sup> Pablotaj nerka:

—Juanka runasta bautizarka yacupi ricuchinanpaj paycuna juchasnincuta sakespa Diosman cutircuskancuta. Juantaj runasta unaytaña nerka: “Khepayta uj runa jamushan, paypi jap'icunayquichej tiyan. Payka Diospa ajllaskan Jesucristomin”, —nispa.

<sup>5</sup> Chay jap'icojcunaka uyariytawan bautizacorkancu Señor Jesús tucuy atiyniyoj caskanta jap'icuspa. <sup>6</sup> Pablo maquisninta paycunaman churajtintaj Santo Espiritoka sonkoncuman uraycamorka. Paycunataj waj parlaycunata parlarkancu. Diosmanta willanastapis willararkancu.

<sup>7</sup> Paycunari tucuynincu chunca iscayniyojjina kharis carkancu.

<sup>8</sup> Pabloka tantacuna-wasiman rispa mana manchachicuspa sut'ita parlarka entiendenancucama. Dios camachinantaka chekapuni caskanta yachacherka quinsa quilla junt'ata. <sup>9</sup> Waquin runasí rumi sonkos ruwacaporkancu. Ajinapitaj Diospi mana jap'icorkancuchu. Astawanpis tucuypa ñauakenipi sajrata parlarkancu Diospa cheka ñanninpi purinanpaj, chay yachachinasmana. Chayraycu Pabloka paycunamanta t'akacaporka. Cristopi jap'icojcunatapis wajnejman pusarka tantacunancupaj. Chaypitaj sut'ita yachacherka sapa p'unchay Tiranno sutiyojpa yachachina wasinpi. <sup>10</sup> Ajinata Asia jallp'api Pablo yachacherka iscay wata junt'ata. Chaypi tucuy tiyacojcunataj Señor Jesuspa niskanmanta uyarerkerkancu israelcunapis waj llajtayojcunapis. <sup>11</sup> Diostaj Pabloman atiyta korka jatuschej t'ucunasta ruwananpaj. <sup>12</sup> Ajinapi Pablo cuerponmanta

pañuelosta chayrí uj juch'uy p'achallatapis apaj cancu onkoskasman churanancupaj. Diospa atiyninwanka chay onkoyniyojcuna thañicapo, supaycunapis runasmanta llojsillajtaj cancu.

*Escevaj wawasnin Pablojinallataj ruwayta munancu*

<sup>13</sup> Waquin purisquiri israelcunarí supaycunata kharkollajtaj cancu. Ajinapi Jesuspa sutinta okharispa yuyaskancumanjina supaycunata nerkanca:

—Pablo willarashan, chay Jesuspa sutinpi, noka camachiyquichej llojsinayquichejta, —nispa.

<sup>14</sup> Chayta ruwajcunaka Esceva sutiyoj, israel runaj, kanchis wawasnin carkancu. Payka yupaychana-wasimanta uj curaj carka. <sup>15</sup> Supayrí paycunaman cutichispa nerka:

—Rejsini Jesustaka. Pichus Pablo caskantapis yachani. Kancunari ¿pi caskayquichejtataj yuyacapunquichejrí?

<sup>16</sup> Chay supayniyoj runataj paycunaman phawaycorka. Tucuynin-cutataj callpawan atiparka. Paycunaka makaskas k'araslla chay wasimanta aykecorkancu. <sup>17</sup> Chayjina ruwacuskanta tucuy Efeso llajtapi tiyacojcuna, Diospa ajllaskan israelcuna, waj runaspis yacharkancu. Tucuy paycunataj mayta manchachicorkancu. Señor Jesustataj jatun-charkancu.

<sup>18</sup> Jesuspi jap'icojcunamanta ashqhas ajina layka ruwaynincumanta sut'ita willacoj jamorkancu. <sup>19</sup> Ashqha pantaska laykacunapis mil-lay librosnincuta tantamorkancu. Tucuypa ñaupakencupitaj ruphay-cucherkanca chaycunata. Phishka chunca waranka jornalesmanjina chay libros valerka. <sup>20</sup> Ajinapi Señor Jesusmanta willanas tucuynepi uyaricorka atiynintataj ricucherka. Astawan ashqhastaj Jesuspi jap'icorkancu.

*Efeso llajtapi ch'ajwa*

<sup>21</sup> Chay imas ruwacuskampa khepantataj Pabloka sonkonpi yuyasharka:

—Macedonia jallp'anepta Acaya jallp'anepta Jerusalén llajtaman risaj. Jakayman chayaspari Roma llajtamanpis rinallaytaj tiyan, —nispa.

<sup>22</sup> Ajinataj payka yanapajcunan Timoteotawan Erastotawan chay iscaynincuta, Macedonia jallp'aman cacharka. Payri waquin p'unchaycunatawan Asia jallp'api cacorka.

<sup>23</sup> Chaypacha uj jatun ch'ajwa okharicorka. Chay ch'ajwari Diospa cheka ñanninpi purinampaj, chay yachachinas jawa okharicorka. <sup>24</sup> Uj runa, Demetrio sutiyoj, chayta okharicherka. Payka ruwaj carka kolkemanta mamita Dianaj yupaychana-wasinman rijch'acojta. Ajinapi Demetrio ashqha kolketa ganachej paywan llanc'açunaman. <sup>25</sup> Kolkewan ruwajcunata payjina platerocunatawan tantaycuspataj nerka:

—Llanc'aj-masis, yachanquichej cay llanc'aymanta ashqha capuyniyoj caskanchejta. <sup>26</sup> Kancuna ricushanquichej uyarishan-quichejtaj chay Pablota. Payka ashqha runasta umallichishan runaj ruwaskancunaka mana dioscunachu caskancuta nispa. Ajinata ruwashan mana cay Efeso llajtallapichu manachayrí tucuy Asia jallp'antinpiña. <sup>27</sup> Chaywanpis mana chayllachu. Astawanka llanc'ayninchepis khesachaska canman. Ajinallataj jatun mamitanchej Dianapis khawaraska canman. Chay yupaychana-wasintaj manaña

jatunpaj khawaskachu canman. Asia jallp'api tiyacojcuna ashqhas, waj runaspis paytaka yupaychancu, —nispa.

<sup>28</sup> Chayta uyarispa paycunaka maytapuni rabiacorkancu. Kha-parisharkancutaj:

—¡Efesocunaj mamita Dianancoka jatunpaj khawaskamin! —nispa.

<sup>29</sup> Tucuynin runas chay llajtamanta uj ch'ajwaypi okharicorkancu. Pabloj purej-masisnin Macedonia jallp'amanta Gayotawan Aristarcotawan jap'iycuspa khatatarkancu. Ajinaspataj jatun tantacuncuman uj yuyaylla uskhayta junyarkancu. <sup>30</sup> Pablori chay tantska runasman rispa parlayta munasharka. Jesuspa yachacojcunaní payta mana sakerkancuchu yaycunanta. <sup>31</sup> Waquin Asia jallp'api camachejcuna Pabloj amigosnin carkancu. <sup>32</sup> Paycunapis Pabloman willachimorkancu amapuni chay runa tantacuyman parlananta. Tucuy chay tantaska runaska khasi ch'ajwallata ch'ajwarkancu. Ujcuna ujjinata khaparisharkancu. Waquintaj wajjinata khaparisharkancu. Ashqhas paycunamanta mana yacharkancuchu imapajchus chayman tantacuskancuta. <sup>33</sup> Israelcuna Alejandrota chay ashqha runaspia ñaupakencuman tankarkancu. Chayraycu runas yuyarkancu pay parlayta munaskanta. Alejandrotaj maquinta okharispa tantaska runasta ch'inyachinayasharka pay quinquinta jamach'acunanpaj. <sup>34</sup> Runasrí Alejandro israel runa caskanta repararpayarkancu. Chayraycu unayta tucuynincu uj yuyayllawan khaparerkancu iscay horatajina:

—¡Efeso llajtayojcunaj mamita Dianancoka jatunpaj khawaskamin! —nispa.

<sup>35</sup> Llajtata camachejcunaj kelkaj runantaj chay ashqha runasta ch'inyachispa paycunata nerka:

—Efeso llajtayojcunaj tatacuna, tucuy runaspis yachancu nokanchej caypi tiyacojcunaka mama Dianata paypa wasintapis khawapojcuna caskanchejta. Janaj pachamanta uraycamoj rumipi rijch'acuynintapis khawapojcuna canchej. <sup>36</sup> Chaytaka ni pi atinchu niyta mana ajina caskantaka. Chayraycu ch'inyacapullaychej. Manaraj allinta yuyaspaka ama imatapis ruwaychejchu. <sup>37</sup> Chay khatatamuskayquichej runaska yupaychana-wasimanta mana imatapis suwarkancuchu. Nitaj mamitanchejpajpis sajrata rimarkancuchu. <sup>38</sup> Demetrio llanc'aj-masisninwan uj runaj contranpi cashan chayka, curajcunaman willachuncu. Chaypaj curajcuna tiyan, churaska p'unchaycunapis chay imasmanta autoridadcuna uyarispa khawanancupaj. Chaypi paycuna uyanchanacuspa sut'inchanacuchuncu. <sup>39</sup> Waj imamanta yachayta munanquichej chayka, jatun chekanchana tantacuypi sut'inchaconka. <sup>40</sup> ¡Pajtataj juchachaska casunman cunan p'unchay ch'ajwaskamanta! Imamantachus chay ch'ajwa caskanta ni ima niyta atisunman khasillamanta caskanraycu, —nispa.

<sup>41</sup> Chayta niytawantaj tucuy runasta cacharpayaraporka.

## 20

*Pablo Macedonia jallp'aman Grecia jallp'amanwan rin*

<sup>1</sup> Chay ch'ajwa ch'inyacuskanmanta Pablota Cristota casojcunata wajyachimorka. Ajinaspataj paycunata sonkoncupi sumajta call-pacharka. Chaymantataj "ripusaj", nispa, Macedonia jallp'aman riporka. <sup>2</sup> Tucuy chaynejta purishaspataj ashqha niskasnинwan Cristopoli

hermanosta yuyaycharka. Ajinaspataj Grecia jallp'aman chayamorka. <sup>3</sup> Chaypitaj Pablo quinsa quillata cacorka. Siria jallp'aman llojsej rishajtinña israelcuna payta wañuchinancupaj okharicushaskancuta pay yachacorka. Chayraycu payka Macedonia jallp'anejta cutipuya yu-yarka. <sup>4</sup> Paywantaj rerkancu Berea llajtamanta Sópater, Tesalónica llajtamanta Aristarco, Segundowan, Derbe llajtamanta Gayo, Timotewan, Asia jallp'amanta Tíquico, Trofimowan. <sup>5</sup> Paycuna ñaupaycuspua Troas llajtapi suyamuwarkaycu. <sup>6</sup> Nokaycuri mana pokochinayoq t'anta fiesta pasayta Filipos llajtamanta barcopi llojserkaycu. Chaymantataj phishka p'unchayninpi Troasman chayaspa paycunawan tincunacorkaycu. Chaypitaj kanchis p'unchaycunata khepacorkaycu.

*Pablo Eutico sutiyoj joventa causarichin*

<sup>7</sup> Domingo p'unchayta nokaycu, Cristopi jap'icojcuna, t'antata partej tantacorkaycu paypa wañuskanmanta yuyarinacycupaj. Pablori k'ayantin puririna caskanraycu chaipi tutacama tapunacuspa paycunawan par-larka. <sup>8</sup> Wasej pata caj pisonpi tantaskas casharkaycu. Chay wasipitaj ashqha c'anchaycuna carkancu. <sup>9</sup> Uj joventaj, Eutico sutiyoj, ventanapi tiyacusharka. Pablo unayta parlaskanraycutaj Eutico puñuywan c'aywicusharka. Ajinaspataj payka puñuywan atipachicuspa quinsa caj pisomanta urmaycamorka. Chaymantataj wañuskata okharerkancu. <sup>10</sup> Pablori uraycamuspa chay jovenman c'umuycorka. Chanta munacuywan joventa ojllaycorka. Nerkataj runasman:

—Amaña llaquicuychejchu. Cay jovenka causarinña, —nispa.

<sup>11</sup> Chanta Pabloka watejmanta patallamantaj rerka. Hermanoswan cusca, t'antata partispa Jesucristomanta yuyaricunancupaj miqhorkancu. Chaymanta parlallarkapuni sut'iyamunancama. Chantaña riporka. <sup>12</sup> Joventaka causashajta wasinman pusacaporkancu. Chayraycu sonkochacuspa mayta cusicorkancu.

*Troas llajtamanta Pablo rin Mileto llajtaman*

<sup>13</sup> Nokaycoka barcopi ñaupaycorkaycu kochanta rispa Asón llajtacama. Chaypitaj Pablota okharinacycu carka chaquillapi chaycama riyya munaskanraycu. <sup>14</sup> Ajinataj payka Asón llajtapi taripawarkaycu. Chanta pay barcoman yaycumorka. Mitilene llajtamantaj chayarkaycu. <sup>15</sup> Chay llajtamantataj k'ayantin barcopi rispa Quío llajta chimpacama rerkaycu. Khepan p'unchaytaj Samos jallp'aman chayarkaycu. Trogilio llajtaman rispa samarerkaycu. K'ayantintaj Mileto llajtaman chayarkaycu. <sup>16</sup> Pablori yuyarka Asia jallp'api mana unaytachu khepacuya. Chayraycu Efeso llajtata pasapullarkaycu. Ajinapi payka uskhayta Jerusalén llajtaman chayayta munarka. Aticojenka Espíritu jatun p'unchaypaj chayayta munarka.

*Pablo Efeso llajtapi curajcunata yuyaychan*

<sup>17</sup> Pabloka Mileto llajtapi cashaspa Efeso llajtaman uj willajta cacharka. Cristopi tantaskacunamanta curajcunancuta wajyachimorka. <sup>18</sup> Paycuna jamojtinctuj Pabloka nerka:

—Asia jallp'aman chayamuskaymantapacha kancunawan carkani allinta causaspa llanc'aspataj. Chayta kancuna sumajta yachan-quichej. <sup>19</sup> Phutichiska cashaspapis may llamp'u sonkowan Jesucristopaj llanc'asharkanipuni munaska camachinjina. Diospa ajllaskan

israelcuna contraypi churaycucojcunatapis muchorkani. Chaywan paycuna juchaman urmachiwayta munarkancu. <sup>20</sup> Astawanpis kancuna yachanquichej allinniyquichejpaj cajtaka tucuyninta willarkayquichej ni imata pacaspa. Chaytaka tantacuyniyquichejpi wasisniyquichejppipis yachacherkayquichej. <sup>21</sup> Israelcunamanpis waj runasmanpis sut'ita willarkani. Ajinata sinch'ita nerkaní paycuna juchancuta sakespa Diosman cutiricunanca, Señorninchej Jesucristopi jap'icunancutapis. <sup>22</sup> Cunanrí Santo Espirituwan sumaj pusaska caspa Jerusalén llajtaman rishani. Mana yachanichu imachus nokawan jakaypi cananta. <sup>23</sup> Santo Espíritu tucuy llajtaspi sut'inchawaskallanta yachani. Payka niwan: "Carcelpi wisk'aska caywan llaquiycunawan kanpaj canka", nispa. <sup>24</sup> Nokarí quiquin causayniytapis mana astawan curajpajchu khawani. Manachayrí cay sumaj willanasta willaraspa purishani. Chayllata imaynamantapis junt'ayta cusiywan munanipuni. C'acha Dios runasta yanapayta munaskanta willaranapajmin Señor Jesús churawarka.

<sup>25</sup> Ajinapi puerkani willaraspa tucuy kancunaman Dios camachishaskanta payta tucuy munacojcunata. Cunanka yachani manaña uyayta ricunawayquichejta. <sup>26</sup> Chayraycu cunán willapushayquichej manaña nokachu juchayoj caskayta wiñay wañuman maykenpis wijch'uycuska cawajchej chayka. <sup>27</sup> Imaraycuchus tucuy callpaywan Diospa tucuy munayninta willarkayquichej mana imatapis pacaspa. <sup>28</sup> Chayraycu Dioswan causayniyquichejta sumajta wakaychacuychej. Ajinallatataj tucuy hermanostapis wakaychaychej. Santo Espiritumin paycunaj wakaychajnincupaj churasorkachej. Uj sumaj michejjina Diospi jap'icuspa tantacojcunata michimuychej. Señorninchej Jesuska yawarninwan paycunata juchamanta cacharicherka paypata canancupaj. <sup>29</sup> Yachani nokaj ripuskaymantaka llulla yachachejcuna jamunanca. Paycuna Cristopi hermanosta munancu pantachiyta. Yarkhaska atojcuna mana qhuyaspa ovejasta wañuchincu, ajinallatataj kancunawan ruwayta munankancu. <sup>30</sup> Kancuna uqhullamantataj k'ewiska yuyaywan chay yachachejcuna jatarenkancu. Paycuna llullasta yachachispas casucoj hermanosta pantachiyta munankancu paycunajina canancupaj. <sup>31</sup> Chayraycu allin yuyaywan khawacuychej. Yuyaricuychejtaj nokaka tuta p'unchay quinsa watantinta sapa ujniyquichejta yuyaychasuskaytapuni. Chayta ruwarkani llaquiycunata muchuspapis. Chayraycu tucuy chayta yuyayniyquichejpi sumajta jap'icuychej.

<sup>32</sup> Cunari, hermanosní, mañacuni c'acha Dios niskanmanjina kancunata khawasunayquichejta yanapasunayquichejtapis. Ajinapi sonkojquichejpi callpachaskas cayta atinquichej. Ajinallataj Señor Jesuspa tucuy lliphuchaskasnинwan cusca chay sumaj willanasnejta wiñay causayniyoj canquichej. <sup>33</sup> Nokaka manamin pejpa kolkentapis nitaj p'achasnintapis munapayarkanichu. <sup>34</sup> Cayta kancuna sumajta yachanquichej. Noka pisichicuspa chayrí nokawan cajcuna pisichicojtincupis maquisniywan llanc'arkani causanaycupaj. <sup>35</sup> Ajinata llanc'aspas pisi callpayojcunata tucuypi yanapanana caskantaka yachacherkayquichej. Chayraycu Señor Jesuspa niskanta yuyaricuychej: Wajcunaman koymín astawan jatun cusiyka kanllapaj jap'iymanta niskaka.

<sup>36</sup> Chay imasta niytawan Pabloka konkoriycucuspa tucuy

paycunawan Diosmanta mañacorka. <sup>37</sup> Tucuy paycunataj mayta wakarkancu. Pablotataj munacuywan abrazaycuspá cacharpariporkancu. <sup>38</sup> Paycunaka mayta llaquiracorkancu manaña uyanta ricunancuta niskanmanta. Chaymantataj barcocama Pablota pusarpayaporkancu.

## 21

### *Pablo Jerusalén llajtaman rin*

<sup>1</sup> Hermanoswan ñac'ayta cacharinacapuspa Cos sutiyoj llajtaman barcopi chekanta rerkaycu. Khepan p'unchaytaj Rodas llajtaman chayaspa rerkaycu Pátara llajtaman. <sup>2</sup> Jakaypitaj Fenicia jallp'amán rishaj barcota tariparkaycu. Chay barcoman yaycuspataj mama kochanejta riporkaycu. <sup>3</sup> Riskaycupidaj Chipre jallp'ata ricorkaycu. Chayta pasaytawan llok'e ladopijina sakeporkaycu. Chaymantataj Siria jallp'amán chayarkaycu. Barcoka carganta sakenan carka. Chayraycu Tiro llajtaman yaycorkaycu. <sup>4</sup> Chaypitaj Jesuspi jap'icojcunata tarispa paycunawan kanchis p'unchayta khepacorkaycu. Paycunatataj Santo Espíritu atiyninwan reparacherka Pablota yuyaychanancupaj ama Jerusalén llajtaman rinanta. <sup>5</sup> Chay p'unchaycuna pasajtintaj llojsi-pusharkaycu. Tucuynin hermanostaj kharis warmis wawasnintin llajta jawacama pusarpariwarkaycu. Kocha cantopi konkoricuspá Diosmanta mañacuytawan <sup>6</sup> cacharparinacorkaycutaj. Chaymanta abrazanacuspá nokaycu barcoman yaycorkaycu. Paycunataj wasisnincuman cutiporkancu.

<sup>7</sup> Nokaycurí Tiro llajtamanta Tolemaida llajtaman chayarkaycu. Ajinapi yacusnejta purinaycoka tucucorka. Chay llajtapi uracyuytawantaj tantaska hermanosta napaycuspá uj p'unchayta paycunawan khepacorkaycu. <sup>8</sup> K'ayantintaj chaymanta llojsispá Cesarea llajtaman rerkaycu. Chaypitaj Felipej wasinman chayaspa paywan caricorkaycu. Payka sumaj willanasta willaj carka. Unayña Jerusalenpi kanchis ajl-laskacunamanta ujnin carka, Diospa tantacoj wawasninta yanapanan-paj churaska. <sup>9</sup> Paypata carkancu tawa ususisnin, mana kharí rejse-jcuna. Paycunataj Diospa niskanta sut'inchaj cancu. <sup>10</sup> Nokaycurí chaypi ashqha p'unchaycunatañá khepacorkaycu. Ajinallaman uj runa, Agabo sutiyoj, Judea jallp'amanta chayamorka. Payka Diospa willajnin carka. <sup>11</sup> Nokaycutataj watucoj jamorka. Pabloj chumpinta okharispataj maquisninta chaquisnintawan wataycucorka. Nerkataj:

—Santo Espíritu nin: “Cay chumpiyoja ajinata israelcuna Jerusalén llajtapi watayconkancu. Chaymantataj waj llajtayojcunaman jayway-conkancu”, —nispa.

<sup>12</sup> Chay imasta uyariytawantaj nokaycupis chay llajtayojcunapis Pablota maytapuni nerkaycu:

—Amapuni Jerusalenman riychu, —nispa. <sup>13</sup> Chanta Pabloka cutichispá niwarkaycu:

—¿Imaraycutaj wakaspa sonkoyta nanachishawanquichejrí? Nokaka mana wataycussa canallaypajchu waquichiska cani. Manachayrí Jerusalenpi Señor Jesusraycu waflunaypajpis waquichiska cani, —nispa.

<sup>14</sup> Manaña jarc'ayta atispataj sakellarkaycuña. Nerkaycutaj:

—Tucuy atiyniyoj Señor Diospa munaynin ruwaska cachun, —nispa.

<sup>15</sup> Chay p'unchaycunaj khepanta tucuy imata waquichicuspa Jerusalenman rinaycupaj llojserkaycu. <sup>16</sup> Cesarea llajtayoj hermanospis nokaycuwan rerkancu. Pusawarkaycutaj Mnasonpa wasinman chayacunaycupaj. Payka Chipre jallp'amanta unay hermanoñataj carka.

*Pablo Jacobota watucamun*

<sup>17</sup> Jerusalenman chayajtiycutaj hermanoska cusiywan niwarkaycu: —Waleja jamunquichej, —nispa.

<sup>18</sup> K'ayantintaj Pablowan nokaycoka Jacobota watuscoj rerkaycu. Chaypi hermanosmanta tucuy curajcunapis carkancu. <sup>19</sup> Paycunata napaycuspataj Pablo tucuyninta willarka. Nerka imaynatachus paynejta Dios ruwaskanta waj llajtayojcuna uqhupi. <sup>20</sup> Hermanosri chayta uyarispa Señor Diosta jatuncharkancu. Pablotataj nerkancu:

—Hermanóy, kan ricushanqui chay chhica israelcuna Jesuspi jap'icojcuna caskancuta. Tucuynincutaj nincu Moisespa camachiskasninta casunapuni caskanta. <sup>21</sup> Capyi cajcunaka kanmanta uyariskancu yachachiskayquita. Waj llajtaspi tiyacoj tucuy ayllumasisninchejta Moisespa contranta yachachiskayquita uyariskancu. Uyarillaskancutaj niskayquita: “Khari wawaspa cuerponcupi amaña señalta churaychejchu\* nitaj yachacuskanchejmanjina cajtapis ruwaychejchu”, nispa. <sup>22</sup> Cunánri ¿imatataj ruwasunchej? Chayamusquita yachaspa runaka tantaconka. <sup>23</sup> Allin canman ruwanayqui cay nisuskaycuta. Nokaycu uqhupi tawa runas cashancu. Paycunataj Diosman palabrawan niskancumanjina ruwanancu cashan. <sup>24</sup> Kanpis paycunajina ruwaspa paycunawan cusca Diospaj ch'uyachacamuspa llimphuchacuy. Llimphuchacamuskancumantataj kan pagapuy, chanta umancutapis k'alata c'utuchicuya atincu. Chaywan runas yachankancu kanmanta parlaskancuta tucuy uyariskancoka mana chekachu caskanta. Astawanpis kanka camachiskasta casuspa ruwashaskayquita yachankancu. <sup>25</sup> Waj llajtayoj hermanosmanrí yuyaskaycuta paycunaman kelkarkaycuña. Nerkaycu ama miqhunancuta ruwaska dioscunaman jaywaska uywasta, nitaj uywa yawarta. Nitaj sipiska uywa aychata miqhunancuta yawarnin mana llojsichiska cajtin. Paycunataj camacherkaycu ama khenchachacunanca, —nispa nerkyaycu.

<sup>26</sup> Chanta Pablota chay niskancu runasta pusarka. K'ayantintaj sonkonta llimphuchacamorka chay tawa runaswan cusca. Yupaychana-wasimantaj willaj rerka llimphuchacuy p'unchaycunata junt'askanta. Willayta munarka mayc'ajchus jaywananta sapa ujnincumanta konan caskanta.

*Yupaychana-wasipi Pablota jap'iycuncu*

<sup>27</sup> Kanchis p'unchaycuna junt'acushajtinña Asia jallp'amanta waquin israelcuna Pablota ricurparerkancu yupaychana-wasipi. Paycunataj tucuy chaypi caj runasta ch'ajwacherkancu. Pablota jap'iycuspataj khaparisharkancu:

<sup>28</sup> —¡Diospa ajllaskan israelcuna, yanapawayaycu! Caymin chay tu-cuynejpi tucuyman yachachispa purej runaka. Cay runa yachachin

\* **21:21** Literal: circuncidaychu.

khesachayta llajtanchejta, Moisespa camachiskasintapis, yupaychana-wasinchejtapis. Cunapis cayka waj llajtayo runasta yupaychana-wasinchejta juchawan ch'ichichashan,—nispa.

<sup>29</sup> Paycunaka ñaupajta Efeso llajtayo Trofimowan Jerusalén llajtapi pay purishajta ricuskanca. Chayraycu paycuna yuyaskancu Pablo payta yupaychana-wasiman pusaycuskanta. Pablóri payta mana pusaycorkachu.

<sup>30</sup> Ajinamanta tucuy chay llajtapi tiyacojcuna ch'ajwanancupaj okharicuspa tantaycacamorkancu. Chanta Pablota jap'iycorkancu kharkonancupaj. Yupaychana-wasimantataj jawaman khatatarkancu. Chaypachitataj puncusta wisk'arkancu. <sup>31</sup> Runas okharicuspa Pablota wañuchiya munasharkancu. Soldadocunaj curaj camachejnincumantaj willamorkancu tucuy Jerusalén llajtapi tiyacojcuna ch'ajwashaskancuta. <sup>32</sup> Payka chaypachita soldadostawan camachejcunantawan pusaricuspa ch'ajwaj runaspaman uskhayta rerkancu. Paycunari curaj camachejta soldadostapis ricuytawan manaña Pablota makarkancuchu. <sup>33</sup> Chanta curaj camachejka kayllaycuspa Pablota jap'erka. Ajinaspa iscay watanaswan wataycunancutataj camacherka. Chaymantataj runasta taporka pichus caskanta, imatachus ruwaskantawan. <sup>34</sup> Chay ashqha runaska ujcuna ujjinata, ujcunataj wajjinata khaparisharkancu. Payri mana sut'ita entiendeyta aterkachu ch'ajwaskancuraycu. Ajinapitaj payka Pablota cuartel wasiman pusaycunancuta camacherka. <sup>35</sup> Soldados Pablota gradascamaña pusashajtincuri runas manchay callpawan payta makayta munasharkancu. Chayraycu soldadoska Pablota okharispa apasharkancu. <sup>36</sup> Tucuy chay runaska khaparispa khatimusharkancu. Nisharkancutaj:

—¡Wañuchinachej cay runata! —nispa.

### *Contranpi cajcunaman Pablo cutichin*

<sup>37</sup> Soldados cuartel wasiman pusaycushajtincuña Pabloka curaj camachejnincuman nerka:

—Ujta niricuſuyta munani, —nispa.

Chay camachejtaj nerka:

—Griego parlayta yachaskanqui, —nispa.

—Arí, yachani, —nerka Pablo.

<sup>38</sup> Chanta camachej nerka:

—Ñaupaj p'unchaycunapi uj Egipto runa camachejpa contranpi runasta ch'ajwacherka. Chaymantataj tawa waranka runa wañuchista ch'innejman pusarka. Cunan reparani kanka mana chay runachu caskayquita, —nispa.

<sup>39</sup> Pablota jnerka:

—Nokaka Tarso llajtamanta cani Diospa ajllaskan israelcunamanta. Tarsoka Cilicia jallp'api sumaj rejsiska llajtamin. Astawanpis cay runasman parlajta sakenawayquita niricuyqui, —nispa.

<sup>40</sup> Camachejka payta parlajta sakerka. Ajinapi Pablo gradas patapi sayaycuspa maquinta okhariytawan runasta ch'inyacherka. Runas ch'inyacapojtincutaj payka hebreo parlaynincupi parlarerka. Nerkataj:

## 22

<sup>1</sup> —Caypi tiyacoj tatacuna, wiñay-masi waukecuna, cunanka cutichi-cuskayta uyariwaychej, —nispa.

<sup>2</sup> Pabloka hebreo parlaynincipi paycunaman parlarerka. Chayta uyarispa paycunaka astawanraj ch'inayacorkancu. Chanta Pabloka nerka:

<sup>3</sup> —Nokapis Diospa ajllaskan israelcunamanta cani. Cilicia jallp'a Tarso llajtapi naceska, cay Jerusalén llajtapi uywaskataj. Chaywanpis sumaj yachaj wirakochi Gamaliel escuelanpi yachachiwarka Moisés unay tatasninchejta camachiskasnimanjina. Cunan tucuy kancuna Diosta casuya munashanquichej, ajinallatataj nokapis tucuy sonkoywan casuya munanipuni. <sup>4</sup> Jesucristoj ñanninpi purejcunata mayta ñac'arichej cani wañuchinaycama. Kharista warmistawan wataycuchispa carcelman churaycuchej cani. <sup>5</sup> Yupaychana-wasimanta curaj runapis tucuy curajcunapis nokamanta sut'ita yachancu willanancupaj. Paycuna cartasta kelkarkancu Damasco llajtapi israel-masisninchejman Jesucristopí jap'icojcunata apamunaypaj. Jakaypi cajcunatataj wataskasta Jerusalenman apamoj risharkani ñac'arichiskas canancupaj.

### *Jesucristopí jap'icuskanta Pablo willan*

<sup>6</sup> 'Nokaka Damasco llajtaman rishaspa ñapis chayman kaylasharkaniña. Chaypi chaupi p'unchaytajinataj ujllata uj sinch'i c'anchay janaj pachamanta c'anchorispa nokata muyuycuwarka. <sup>7</sup> Nokataj pampaman chokacamorkancu. Chaymanta uj parlapayawajta uyarerkani: “Saulo, Saulo ¿imaraycutaj ñac'arichinawayquipaj khatiy cachawanquirí?” nispa. <sup>8</sup> Nokataj tapuspa nerkaní: “¿Kanchu cawaj, Señor Dios?” nispa. Cutichispa niwarka: “Kan khatiy cachashanqui, chay cani, Nazaret llajtayoj Jesús”, nispa.

<sup>9</sup> Nokawan cajcunaka chay sinch'i c'anchayta ricorkancu. Chay parlawaskantari mana uyarerkancchu. <sup>10</sup> Nokataj tapurispa nerkaní: “Tucuy atiñiyoy Señor, ¿imatataj ruwasajrí?” nispa. Señor Jesustaj niwarka: “Cunanpacha jataricuy, Damasco llajtaman riy. Chaypitaj uj runa nisonka Diospa tucuy munaskanta ruwanayquita”, nispa. <sup>11</sup> Chay ancha sinch'i c'anchaymanta manaña ricuyta aterkanichu. Chayraycu nokawan cajcuna maquiymanta aysaspa Damasco llajtaman pusawarkancu.

<sup>12</sup> Chaypi carka uj runa, Ananías sutiyoj. Payka Diospa camachiskasninta chekanta casoj. Tucuy chaypi tiyacoj israelcunataj payta sumaj runapaj khawaj cancu. <sup>13</sup> Chay Ananías nokata watucoj jamuspa niwarka: “Hermano Saulo, thañicuspa ricullayñá”, nispa. Nokari chay-pachita watejmanta ñawiyoy capuspa ricorkani, paytapis ricullarkantaj. <sup>14</sup> Paytaj niwarka: “Únay tatasninchejpa Diosnincu kanta unayña ajllacusorka munayninta yachanayquipaj. Chekanta ruwaj camachin Jesusta ricunayquipaj, parlaskantapis uyarinayquipajtaj ajllacusorka. <sup>15</sup> Chayraycu kanka ricuskayquita uyariskayquitapis tucuy runasman willanayqui tiyan. <sup>16</sup> Cunanrí ni ima jarc'asunquichu. Cunanpacha Jesús tucuy atiñiyoy caskanta tucuy sonkowan jap'icuspa bautizacuy juchasniyqui llimphuchaskas canancupaj”, nispa.

*Dios Pablota churan waj llajtayojcunaman willarajta*

17 Ajinataj nokaka Jerusalén llajtaman cutimporkani. Yupaychana-wasimantaj yaycuytawan Diosmanta mañacushaspa, uj moskoypijina riqhurirparkani. 18 Jesustataj niwashajta ricorkani: "Uskhayta cunapacha Jerusalemanta ripuy. Caypi tiyacojcunaka nokamanta willaskayquita manamin jap'iconkancuchu", nispa. 19 Nokataj nerkan: "Señor Jesusníy, kanpi jap'icojcunata carcelpi wisk'achej caskayta sumajta yachancu, tantacuna-wasipi jasut'ichej caskaytapis. 20 Estebanta wañuchishajtincu chaypi noka quiuiy casharkani. Wañuchiska cananpajpis paycunawan cusca yuyaysicorkani. Chaywanpis nokaka wañuchejcunaj ponchosnincuta wañuchinancucama khawaporkani", nispa. 21 Señortaj niwarka: "Riy, noka caru waj llajtayojcunamanmin cachaskayquiraycu", —nispa.

*Camachej Pablota jamach'an*

22 Waj llajtayojcunaman ninancamaka chay israelcuna Pablota uyarishallarkancu. Chanta khapariyta kallarererkancu:

—¡Wañuchun cay runaka! ¡Manamin causanapajjinachu! —nispa.

23 Paycunaka astawan sinch'iwan khaparererkancu. Man-chayta phiñacuskas caskancuta ricuchinancupaj p'achasnincuta chokararkancu. Jallp'ata khallaspataj wayrachiyya kallarererkancu Pablo Diospa contranta ruwashaskanta yuyaspa. 24 Chayraycu curaj camachejka Pablota soldadocunaj cuartelnincu uqhuman pusaycunancuta camacherka. Nerkataj jasut'inancuta yachanancupaj imamantachus contranpi runas khapariskancuta. 25 Payta jasut'inancupaj wataycojtínha Pablota chaypi caj camachejta nerka:

—¿Manaraj juchachaspa uj romano runata aticullanchu jasut'inayquichejka?

26 Camachejka chayta uyariytawan curajninman willamorka:

—Sumajta reparay. ¿Imatataj ruwashankuirí? Cay runaka romanomin, —nispa.

27 Chayraycu curajka Pabloman kayllayucuspa nerka:

—Kanka ¿romano runachu canqui?

Paytaj cuticherka:

—Ari, romano runa cani, —nispa.

28 Curajtaj nerka:

—Romano llajtayoj canaypaj nokaka ashqha kolketa korkani, —nispa. Pablota jnerka:

—Nokarí tatasniymantapachapuni romano cani, —nispa.

29 Ajinapi jasut'inayashajcunaka chaypachita payta manaña imanarkancuchu. Curaj camachejpis manchachicorka Pablota wataycuchiskanmanta, romano runa caskanta yachaspa.

*Jatun parlanacupi Pablo cutichin*

30 Curaj camachejka k'ayantin Pablota phascararka. Paytaj munarka sut'ita yachayta imamantachus israelcuna Pablota juchachaskancuta. Ajinamanta camacherka yupaychana-wasimanta curajcunata tucuy curajcunatawan jatun tantacuyman tantacunancuta. Chanta Pablota uraman pusachimuspa paycunaj ñaupakencuman sayacherka.

## 23

<sup>1</sup> Pablota tantaska runasta sumajta khawarispa nerka:

—Ayllu-masis, allintapuni tucuy sonkowan Diospa ñaupakenpi causacushani,—nispa.

<sup>2</sup> Chanta yupaychana-wasimanta curaj, Ananiaska, Pabloj kayllanpi sayashajcunata camacherka siminpi lak'ananta. <sup>3</sup> Chanta Pabloka payta nerka:

—Dios kanta lak'achisonka, puraj uya. Yurajchaska perkajina canqui. Kan churaska carkanqui chekanta khawanawayquipaj Diospa camachiskasninmanjina ninayquipaj juchayojchus manachus caskayta. Chanta ¿imaraycutaj camachiskata mana casuspa nokata lak'achiwanquiri?

<sup>4</sup> Chaypi cashajcunataj payta taporkancu:

—¿Ajina sajratachu c'amispa cutichinqui Diosmanta chay curajn-inchejman?

<sup>5</sup> Pablo nerka:

—Ayllu-masis, pay curaj caskanta mana yacharkanichu. Dios pal-abranpi nin: “Llajtayquej camachejninpaj ama sajrata parlanquichu”, —nispa.

<sup>6</sup> Pabloka chay tantaskacunata repararka saduceo partemanta t'akacoj fariseo partemantawan caskancuta. Chayraycu jatun tantacuypি tantaska runasman khaparispa nerka:

—Ayllu-masis, nokaka chay t'akacoj partemanta cani tatasniymantapacha. Wañuymanta runas causarimunanca suyaskayraycutaj caypi jap'iska cashani,—nispa.

<sup>7</sup> Chay parlajta uyarispa iscay partesmanta cajcunaka paycunapura churanacoj sayaycorkancu. Chay tantacuytaj iscayman t'akacaporka.

<sup>8</sup> Saduceo partecuna nincu runa mana wañuymanta causarimuskanta. Nillancutaj Diosmanta willaj angeles mana caskancuta. Ni almas nitaj chaycunajina mana cuerpoyojcunapis caskancuta nincu. T'akacojcunari tucuy chaytaj caskanta nincu. Chayraycu t'akanacaporkancu. <sup>9</sup> Tucuynincu sinch'ita khaparerkancu. Ajinapi t'akacoj partemanta waquin yachachejcuna sayaricorkancu. Chaymantataj sinch'iwan churanacuspa nerkanca:

—Cay runaka mana ima juchayojchu. Diospa contranpi ama churacunachu. Ichapis uj willaj angel chayri uj mana cuerpoyoj caj payman parlarka,—nispa.

<sup>10</sup> Paycunataj astawan sinch'ita churanacusharkancu. Chayraycu curaj camachejka manchachicorka Pablota t'unanancuta. Ajinapi soldadosta camacherka orkhonancuta payta chay chaupimanta soldadocunaj cuartelnincumantaj pusarparinancuta.

<sup>11</sup> Chay ch'isitaj Señor Jesús Pabloman chimpaycuspa nerka:

—Callpachacuy, Pablo. Imaynatachus Jerusalenpi kan nokamanta runasman willarkanqui, ajinallatataj Roma llajtapipis nokamanta willanayqui tiyan,—nispa.

*Pablo yachacun payta wañuchiyya yuyariskancuta*

<sup>12</sup> P'unchayña cajtintaj waquin israelcunaka Pablota wañuchinancupaj cusca yuyaychanacorkancu. Diospa sutinta okharispataj nerkanca:

—Pablota wañuchinanchejama mana miqhusunchu nitaj ujyasunchu,—nispa.

<sup>13</sup> Ajinata Diospa sutinta okharejcuna carkancu tawa chunca curaj.

<sup>14</sup> Chanta paycuna yupaychana-wasimanta curajcunaman waj curajcunamanwan chimpaspa nerkancu:

—Nokaycu Diospa sutinta okharispa nerkaycu mana ni imata miqhusaycuta Pablota wañuchinaycucama. <sup>15</sup> Chayraycu cunanka kancuna jatun tantacuywan camachejman Pablota pusarkamunanta mañaychej. Aswan sut'ita paymanta yachanayquichejpaj mañajjinalla tucuychej. Nokaycurí manaraj jatun tantacuyman kayllamushajtin payta wañuchinaycupaj waquichiskas cashaycu,—nispa.

<sup>16</sup> Pabloj pananpa wawan uyarerka wañuchiyya munashaskancuta. Chanta cuartel wasiman rispa chayta Pabloman willamorka.

<sup>17</sup> Chaymanta Pablota soldado camachejta wajyaspa nerka:

—Cay joventa curaj camachejniyquipaman pusay. Payka uj imata payman willanan tiyan,—nispa.

<sup>18</sup> Chayraycu camachej curajninman joventa pusarka. Nerkataj:

—Wisk'aska Pablo wajyawaspa niricuwarka cay joventa kanman pusamusunayta. Payka uj imata kanman willasunan tiyan,—nispa.

<sup>19</sup> Curaj camachejtaj joventa maquinmanta wajnejman sapallanta aysarka. Payta taporkataj:

—¿Imatataj willanawayqui tiyanrí?

<sup>20</sup> Joventaj nerka:

—Israelpuna tucuy cusca yuyashancu Pablota mañasuya. K'aya tantaska runasman Pablota pusanayquita mañayta yuyancu. Paycunaka aswan sut'ita paymanta yachanancupaj mañajjinalla tuconkancu. <sup>21</sup> Kanrí mañaskancuta ama casuychu. Tawa chunca runas Diospa sutinta okharispa nerkancu: “Maná miqhusunchu nitaj ujyasunchu Pablota wañuchinanchejcama”, nispa. Cunantaj paycunaka waquichiskas pacaypi suyashancu kanpa ninallayquitaña.

<sup>22</sup> Chanta curajka chay joventa cachaporka: “Ama pimanpis willaychu chay willaskayquita”, nispa.

### *Pablota pusancu camachej Felixman*

<sup>23</sup> Curaj camachejka iscay camachejcunata wajyaspa nerka:

—Iscay pachaj soldadosta, kanchis chunca caballoyojcunatawan iscay pachaj jatun cuchilloyojcunatawan,\* waquichipuway. Paycuna puñuna horata tutapi Cesarea llajtamán rinancupaj waquichiskas cashachuncu. <sup>24</sup> Chaywanpis Pablota llok'achinayquichejpaj caballosa waquichipuichej. Ajinapi paytaka camachej Felixpaman mana imanaskallata chayachinquej,—nispa.

<sup>25</sup> Cayjina cartatataj kelkaspa paycunawan apacherka:

<sup>26</sup> “May curajpaj khawaska camachej Félix: Noka, Claudio Lisias, napaycamuyqui. <sup>27</sup> Israelpuna cay Pablota jap'iycucherkanca. Paytataj wañuchiyytaña munasharkancu. Nokarí romano runa caskanta yachaspa soldadosniywan maquisnincumanta cacharichimorkani. <sup>28</sup> Runas juchachaskancuta sut'ita yachayta munaspataj paytaka tantacuynincuman pusacherkanca. <sup>29</sup> Khawaskaymantarí yacharkani payka mana wañunanpajjina juchayojchu, nitaj wisk'aska cananpajjinapischu. Manachayrí paycunaj camachiskasnincupi caj imasllamanta juchacharkancu. <sup>30</sup> Israelpuna payta wañuchinancupaj churacuskancuta

\* <sup>23:23</sup> Literal: espadayojcunatawan.

yacharkani. Chayraycu chay quiquinpacha kanpaman cachamuyqui. Chaywanpis camacherkani contranpi cajcuna kanpa ñaupakeyqupi Pablota ninancuta. Allillanta caricushay", nispa kelkarka.

<sup>31</sup> Chanta soldadoska camachiskata casuspa Pablota tutapi Antipatriscama pusarkancu. <sup>32-33</sup> K'ayantintaj chaquipi caj soldadoska cuartelnincuman cutimporkancu. Caballospi soldadostaj Pablota pusaspa Cesarea llajtaman chayarkancu. Chay jallp'aj camachejninandaj cartata jaywarkancu Pablotapis. <sup>34</sup> Camachejtaj cartata leespa taporka maymanta Pablo caskanta. Cilicia jallp'amanta caskanta yachaytawan <sup>35</sup> Pablota nerka:

—Juchachasojcuna chayamojtincu kanmanta parlasunchej,—nispa.

Chanta soldadosta camacherka Herodespa ruwachiskan sumaj wasinpi wisk'anancuta khawanancutataj.

## 24

### *Pabloj contranta willaycuncu*

<sup>1</sup> Phishka p'unchaymanta yupaychana-wasimanta curaj runa, Anniaska chayamorka Cesarea llajtaman. Paywan jamorkancu israel curajcunawan uj sumaj parlaysapa runa Tertulowan. Ajinapi paycuna camachej Felixman Pabloj contranta willaycoj kayllaycorkancu. <sup>2-3</sup> Pablota wajyachimojtintaj Tertuloka paypa contranpi willaycuya kallarerka. Nerkataj:

—May c'acha camachej Félix, anchata agradececeuytu kanman tucuynejpi allillanpi causacuskaycumanta. Kanpa sumaj yachayniyquwan llajtaycuta astawan allinyacherkanqui. <sup>4</sup>Nokarí capi mana unayta khepachisuyta munanichu. Chayraycu niricuyqui uj pisi palabrasta qhuyaspa uyarinawaycuta. <sup>5</sup> Reparaycu cay runaka israel runaspaj manapuni allinchu. Imaraycuchus payka runasta t'akanachishan. Cay pachantinpi tucuy paycunata ch'ajwachinanpaj okharishan. Chaywanpis payka Nazaret llajtayoj Jesusta khatejcunaj curaj pusajnincumin. <sup>6</sup> Cay runaka yupaychana-wasitapis juchawan ch'ichichachej churacorka. Chayraycu nokaycu payta jap'iycorkaycu camachiskasniy-cumanjina juchachaska cananpaj. <sup>7</sup>Camachej Lisisasrí nokaycu chaupiman yaycumuytawan Pablota sinch'i callpawan khechurpariwarkaycu. <sup>8</sup> Camacherkataj Pablota juchachayta munajcunata kanman jamunancuta. Nokaycu paypa contranpi tucuy willaskaycumantaka kanlla payta tapurispa yachayta atinqui,—nispa.

<sup>9</sup> Israelcunapis Tertulowan cusca ajinapuni caskanta nerkancu. <sup>10</sup> Chantaka camachej Félix Pablota parlarinanta nejtin nerka:

—C'acha camachej, kanka unay watasmantapachaña cay llajtata camachishanqui. Chaymantataj ninqui runaspa ruwaskancu allinchus manachus caskanta. Chayraycu juchachawayta munajcunamantaka ñaupakeyqupi cusiywan cutichicusaj. <sup>11</sup> Chunca iscayniyoj p'unchayllaraj Jerusalenman Diosta yupaychaj riskayka cashan. Chaymanta kanka atinqui tapuricuya. <sup>12</sup> Cay israel runaska ricuwancumanchá carka yupaychana-wasipi, llajta uqhupipis. Nipunitaj jayc'ajpis runasta ch'ajwachisharkanichu nitaj churanacusharkanichu chaycunapi. <sup>13</sup> Chayraycu paycunaka contraypi niskancutapis cheka caskanta mana ricuchisuyta atincuchu. <sup>14</sup> Sut'ita parlarisparí willaskayqui. Tatasniycoj Diosninta yupaychani paypa

chekan ñanninpi purispa. Chaytataj paycuna nincu pantaska t'aka caskanta. Nokarí tucuy sonkowan yuyani Diospa tucuy palabran cunan cheka caskanta, cachun Moisespa camachiskasnín, cachun unay willajcuna kelkaskasnincupis.<sup>15</sup> Paycunaka nincu tucuy wañuscacuna causarimunancuta. Allinta ruwajcunapis mana allinta ruwajcunapis causarimonkancu. Ajinata chay kelkajcuna Diospi suyacuncu. Nokapis ajinallatataj Diospi jap'icuspa suyacuni.<sup>16</sup> Chayraycu nokaka alin sonkowanpuni causayniya wakaychacuni Diospa ñaupakenpi runaspa ñaupakencupipis.

<sup>17</sup> Nokaka unay watasmanta israel-masisniypaj uj yanapata apamuspa Jerusalenman jamorkani. Chaywanpis Diosman jaywanasta koj jamorkani.<sup>18</sup> Camachiskasnícumancinataj yupaychana-wasipi Diospaj llimphuchacusharkani. Ajinata ruwashajtiy Asiamanta waquin israel-cuna taripawarkancu. Chaypirí mana ashqha runas carkancuchu nitaj ch'ajwapis carkachu.<sup>19</sup> Ima juchaypis contraypi cajtenka paycuna ñaupakeyquiman willaj jamunancu carka.<sup>20</sup> Mana cajtinrí caypi cajcuna nichuncu juchayojtachus orkhowarkancu jatun tantacuynincipi.<sup>21</sup> Chayrí ¿tantacuynincipi sayarisca cay ujllata khapariskaymantachu juchachawayta munashancu? Nerkani runas wañuymanta causarinancuta. Chay niskayraycu caypi juchachawayta munancu,—nispa nerka Pablo.

<sup>22</sup> Camachej Felixka Jesucristoj ñanninpi purinamanta sumajta yacharka. Chayraycu iscayrayaspa kheparicherka. Nerkataj:

—Soldadota curaj camachej Lisias cayman jamojtin cay niskasniyquichejmanta aswan sumajta uyarisaj,—nispa.

<sup>23</sup> Chanta Felixka soldado camachejta nerka Pabloka presollapuni cananta. Sakenallantataj llojsejta yaycoja uj soldadowan. Payta watu-cojcuna pisichicuyninpi yanapanancutapis ama jarc'ananta nerka.

<sup>24</sup> Uj p'unchaycunamanta Felixka warmin Drusilawan chayman cutimorka. Drusilaka israelcunamantamin carka. Ajinapitaj Félix Pablota wajyachimorka. Jesucristopi jap'icunamanta parlaskantataj uyarerka.<sup>25</sup> Pabloka runa chekanta ruwaspa causananmanta, quiquin munayninta atipananmantawan paywan parlarka sut'ita entiendenanpaj. Chaywanpis nerka Dios runasman ruwaskancumanjina khepata cutichinanta. Chayta uyarispa Felixka manchachicaporka. Nerkataj:

—Cunanka ripullay. Tiempoy cajtin wajyachimullaskayqui,—nispa.

<sup>26</sup> Chaywanpis munasharka Pablo kolketa konanta payta cacharichinanpaj. Chayraycu ashqha cutita Pablota wajyachimorka paywan parlaj.<sup>27</sup> Isçay wataña junt'acuytawan Félix manaña camachejtin, Porcio Festo camacherka. Felixri israelcunawan sumaj runapaj khawachicuya munaspa Pablota carcelpi wisk'askata sakeporka.

## 25

### *Pablo romano camachejman riyta mañan*

<sup>1</sup> Cesarea llajtamanta israel jallp'aman Festo chayarka camachinanpaj. Quinsa p'unchaynimantaj rerka Jerusalenman.<sup>2</sup> Chaypi cashajtin-taj yupaychana-wasimanta curajcunawan, israel curajcunawan Pabloj contranta payman willarkancu.<sup>3</sup> Festomanta mañacuspataj nerkan-

—Amajinachu cay, Pablota Jerusalenman cachampuwaycu, ari,—nispa.

Paycunari yuyarkancu watekaspa wañuchiyya ñanpi rishajtin. <sup>4</sup> Festo paycunaman cutichispa nerka:

—Nokaka pisi p'unchaycunamantawan chayman cutipunay tiyan. Chayraycu Pabloka Cesarea llajtapi wisk'askallapuni canan tiyan. <sup>5</sup> Kancunamanta curajcunata cachayta atinquichej nokawan rinancupaj. Ajinapi Pablo ima juchayojtaj chayka, paycuna willachuncu, —nispa.

<sup>6</sup> Festoka pusaj chayrí chunca p'unchaytajinalla Jerusalenpi khepacorka. Chanta Cesareaman uraycaporka. K'ayantintaj camachina-wasiman yaycuspa Pablomanta chekata yachananpaj tiyaycucorka. Pablotataj pusachimorka. <sup>7</sup> Pay chayman yaycumojtinri Jerusalenmanta israelcuna payta muyuycorkancu. Paycunataj paypa contranta ashqha sajra imasta willaycorkancu. Cheka caskanta ricuchiytarí mana aterkancuchu. <sup>8</sup> Pablotaj willaycuskancumanta cuticherka:

—Manapuni juchayojchu cani. Ni israelcunaj camachiskasnincu contrapichu cani. Nitaj yupaychana-wasitapis juchawan ch'ichicharkanichu. Nitaj romano curaj camachejpa contranta ima sajratapis ruwarkanichu, —nispa.

<sup>9</sup> Festoka israelcunawan sumaj runapaj khawachicuya munaspa Pablota tapurerka:

—Kanmanta sumajta khawasunaypaj ¿Jerusalenman riyta munan-quichu?

<sup>10</sup> Chanta Pablo cuticherka:

—Romano camachej khawanawanta mañani romano caskayraycu. Kanka sumajta yachashanqui israelcunaj contrancutaka ni ima mana allintapis ruwaskayta. <sup>11</sup> Camachiskastapis p'aquiyman chayrí wañuypajjinapis juchallicuyman chayka, mana niymanchu ama wañuchinawayquichejtaka. Contraypi niwaskancu mana chekachu cajtinri ni pipis atinchu jaywaycuwayta cay chejniwajcunamanka. Romano curaj camachej cay contraypi niwaskancuta khawanawanta\* mañani, —nispa.

<sup>12</sup> Chanta Festoka yuyaychaj runasniwan parlanacuytawan Pablota nerka:

—Romano curaj camachej khawasunanta† mañarkanqui. Chayraycu paymanmin rinqui, —nispa.

#### *Camachej Agripaj ñaupakenman Pablota pusachimuncu*

<sup>13</sup> Waquin p'unchaycunamantawan camachej Agripa Berenicewan Cesarea llajtaman chayamorkancu. Festota napaycoj jamorkancu.

<sup>14</sup> Ashqha p'unchaycunata chaypi cashajtinctaj Festoka camachej Agripaman Pablota juchachayta munaskancuta willarka. Nerkataj:

—Camachej Félix caypi uj runata wisk'askata sakerka. <sup>15</sup> Cay runaj contranpimin yupaychana-wasimanta curajcuna, israel curajcunawan willawarkancu Jerusalenpi cashajtiy. Paycuna mañawarkancu payta juchachanayta. <sup>16</sup> Nokataj paycunaman cuticherkan: Nokaycu romanocuna caspa ruwanaycumanjinaka mana atiycuchu uj mana juchachaska runata jaywaycuytaka. Manachayrí “juchayoj” nejcunan uyanchanancu tiyan. Paytaj chay niskancumanta cutichicungan tiyan, nispa. <sup>17</sup> Chayraycu paycuna cayman chayamojtincu mana

\* **25:11** Literal: juzganawanta. † **25:12** Literal: juzgasunanta.

suyarkanichu. Manachayrí k'ayantin camachina-wasiman yaycuspa Pablota pusachimorkani paymanta chekata yachanaypaj.<sup>18</sup> Nokari yuyarkani astawan jatuchej sajra ruwaskasnimanta willaycunawancuta.<sup>19</sup> Paycunari uj imallamanta willaycuwarkancu. Chayri carka paycunaj diosnincuta yupaychayllamanta. Uj wañuska runa, Jesús sutiyojta “causarimuspa causashan” Pablo niskallanmanta willaycuwarkancu.<sup>20</sup> Nokaka chay imasmanta imatachus ruwanayta mana yacharkanichu. Chayraycu Pablota taporkani: “¿Jerusalenpi camachej khawasunayquipaj,<sup>‡</sup> chayman riyta munanquichu? Paytaj kanmanta sumajta khawasuspa nenka juchayojchus manachus caskayquita”, nispa.

<sup>21</sup> Pablórí romano caspa camachej Augusto paypamanta khawananta mañarka. Chayraycu camachejman cachaska canancama payta wisk'aycucherkerkani,—nispa nerka Festo.

<sup>22</sup> Chanta Agripa payta nerka:

—Nokapis chay runaj parlaskanta uyariyta munayman,—nispa.

—K'ayapacha uyarinqui,—nerka Festoka.

<sup>23</sup> K'ayantintaj Agripawan Berenicewanka sumaj c'achachaskas jatun camachina-wasiman uyarej yaycorkancu. Soldado camachejcunawan llajtapi curaj wirakochiswan chayman yaycorkancu. Festori Pablota pusamunanta camacherka.<sup>24</sup> Chantataj nerka:

—Camachej Agripa, nokaycuwan caypi tantacoj wirakochiswan, cay runata ricunquichej. Jerusalén llajtapis caypipis ashqha israelcuna paypa contranta parlawarkancu. Khaparispataj mañashallawancupuni cay runa wañuchiska cananta.<sup>25</sup> Nokarí wañun nanopajina ruwaskanta mana tarerkanichu. Pay quiquin romano camachej khawaspa yachananta mañarka. Chayraycu yuyarkani payman pusachiyyta.

<sup>26</sup> Curaj camachejniyman cay runamanta kelkanaypaj manaraj sut'ita yachanichu. Chayraycu payta ñaupakeyquichejman pusamuyquichej. Astawanka kanman pusamuyqui, camachej Agripa, payta sumajta tapurinayquipaj. Ajinapi noka cay runamanta camachejinchejman kelkasaj.<sup>27</sup> Manataj allinmanchu rijch'awan uj wisk'aska runata camachejman cachay, juchanta mana willaspallaka,—nispa.

## 26

### *Pablo parlaricun Agripaj ñaupakenpi*

<sup>1</sup> Chanta camachej Agripa Pablota nerka:

—Atinqui kan jawa parlaricuya,—nispa.

Ajinata Pabloka maquinta okharispa paycunata jatunpaj khawaskanta ricuchinanpaj pay jawa parlaricorka:

<sup>2</sup> —Curajpaj khawaska camachej Agripa, cunan ñaupakeyquipi mayta cusicuni nokajmanta parlaricuya atispa. Parlasaj tucuy chay israelcuna nokamanta manacajta willasuskancumanta.<sup>3</sup> Kanka israelcunaj ruwanasnincuta imamantachus churanacuncu chaytapis sumajta yachanqui. Chayraycu ari, mayta niricuyqui sumajmanta uyarin-awayquita.

<sup>4</sup> Tucuy israel llajta-masis joven caskaymantapacha rejsiwancu. Chaywanpis yachancu imaynata paycuna chaupipi causaskayta jallp'aypi Jerusalenpipis.<sup>5</sup> Unaymantapachaña rejsiwaspa yachancu

<sup>‡</sup> 25:20 Literal: juzgasunayquipaj.

t'akacoj fariseo partecunaka sinch'ita ruwanasta casuycu Diosta yupaychanaycupaj. Chekanmantachus nokamanta willayta munancuman carka chayka, atincuman carka. <sup>6</sup> Unay tatasniyu suyarkancu Dios sumaj niskanta junt'ananta. Cunanka nokapis chayta suyani. Chayraycu caypi cashani nokajmanta khawanayquipaj. <sup>7</sup> Chunca iscayniyoj israel ayllusniycupis chayllatataj tucuy sonkowan suyancu. Diosta yupaychaspa tuta p'unchay suyancu niskanmanjina wañuskacuna causarinancuta. Camachej Agripa, nokapis paycunajinallataj causarimupi suyaskayraycu israelcunaka contraypi willaycuncu. <sup>8</sup> Chanta kancunaka ¿imaraycutaj yuyanquichej Dios wañuskacunata causarichimunan mana creey atina caskantari?

<sup>9</sup> 'Nokapis Nazaret llajtayoj Jesuspa contranpi imaymanasta ruwanay caskanta ñaupajta yuyaj cani. <sup>10</sup> Chaymanjinataj nokaka Jerusalenpi ruwarkani. Yupaychana-wasimanta curajcunamantapis atiyta mañarkani. Chaywantaj Jesucristoj cajcunanta ashqasta carcelman wisk'aracherkani. Paycunata wañuchejtincupis nokaka ruwaskancumanta allin caskanta nerkani. <sup>11</sup> Noka ashqha cutista paycunata jasut'icherkena. Ajinata ruwarkani tucuy tantacuna-wasispi "manaña Jesucristopí jap'icuycuchu" ninancupaj. Paycunapaj sinch'i phiñaska carkani. Chayraycu caru llajtascama khatiycachamorkani.

### *Pablo Jesucristopí jap'icusanmanta willan*

<sup>12</sup> 'Chayta ruwajllatajmin nokaka Damasco llajtaman risharkani. Yupaychana-wasimanta curajcuna atiynincuwan nokata cachawarkancu. <sup>13</sup> Camachej Agripa, chaupi p'unchaypi ñanta risharkani. Ujjlatataj uj c'anchay intimanta astawan sinch'ita c'ancharerka. Chay c'anchaytaj tucuy muyuyniypi lliphiperka. Ajinallataj nokawan rishajcunaj muyuynincipipis lliphiperka. <sup>14</sup> Tucuy nokaycutaj pampaman chokacamorkaycu. Hebreo parlaypi nishawajtataj uyarerkena: "Saulo, Saulo ¿imaraycutaj ñac'arichishawanquirí?" Yunta waca uj t'ujsinata jayt'aspaka pay quiquinta nanachicun ajinata kan quiuiyqui ñac'arichicushanqui", nispa. <sup>15</sup> Nokataj cuticherkena: "¿Kanchu cawaj, Señor Dios?" nispa. Señortaj niwarka: "Nac'arichiwaskayqui, Jesusmin cani. <sup>16</sup> Kantaj jataricuspa sayacyu. Nokallapaj llanc'anayquipaj ajllaskay caskayquiraycu riqhurerkayqui, cay ricuskayquimanta willajniy canayquipajtaj. Khepatapis ashqha imastaraj ricuchiskayqui nokamanta runasman willanayquipaj. <sup>17</sup> Israelcunamanta waj llajtayoj runasmantawan sumajta wakaychaskayqui. Paycunamantaj willanayquipaj cachaskayqui. <sup>18</sup> Runasman cheka cajta reparachinayquipaj cheka causayman cutiricunancupajtaj cachaskayqui. Supay Satanasmanta cacharichiskas caspa runas Diosta casunancupaj, paycuna nokapi jap'icupsa juchancumanta llimphuchaskas canancupaj ima, willaj rinqui. Diosman t'akaska wawasninwan cusca wiñay causayniyoj canancupajwan cachaskayqui", —nispa.

### *Pablo "Jesucristota ricuspa casuni", nin*

<sup>19</sup> 'Camachej Agripa, ajinamanta chay riqhuriwaj Jesusta casorkani. <sup>20</sup> Ajinapi nokaka runasman willararkani juchasnincuta sakespa Diosman cutirinancupaj. Chaywanpis nerkani cheka cajta ruwanancuta Diosman cutiriskancuta ricuchinancupaj. Damasco llajtapi

kallarerkaní willarayta, chaymanta Jerusalenpipis. Ajinata tucuy Judea jallp'api tiyacojcunaman waj llajtayojcunamanpis willararkani. <sup>21</sup> Willaraskayraycu yupaychana-wasipi cashajtiy israelcunaka jap'iycuwarkancu. Ajinaspataj paycunalla wañuchinayawarkancu. <sup>22</sup> Diospa yanapayninwanka sinch'ita willarallanipuni. Sumaj willanasta tucuyman willarashani, pisipaj khawaskasmanpis jatunpaj khawaskasmanpis. Diospa unay willajcunanwan Moisespawan ruwacunanta niskancumanjina nokaka willarashani, manataj wajtachu. <sup>23</sup> Paycuna nerkanca Cristo juchasninchejraycu wañunanta, wañuymantapis ñaupaj caj causarimoj cananta. Israelpumanpis waj llajtayojcunamanpis Cristonejta Diosman allinyaskas cayta atiskancuta willarkancu. Willanataj sonkosinchejpaj uj c'anchayjinamin, —nispa.

<sup>24</sup> Pablo chayta cutichicushaska camachej Festoka sinch'iwan nerka: —iPablo, umayqui muyuska cashanqui! Anchata yachaskayqui umayquita muyuchishasunqui, —nispa.

<sup>25</sup> Pablórí cuticherka:  
—May c'acha camachej Festo, mana umay muyuskachu cashani. Astawanpis cheka cajta sumaj yuyayniyojtaj parlashani. <sup>26</sup> Camachej Agripaka cay imasmanta sumajta yachan. Chayraycu payman mana manchachicuspa parlashani. Yachani paypis Jesuspa wañuyningmanta causarimpuyinmantawan allinta yachaskanta. Chekatapuni cayka mana uj c'uchupichu ruwacorka. <sup>27</sup> Camachej Agripa, Diospa unay willajcunaj kelkaskancuta creenquichu? Arí, yachani kanpis creeskallayquitataj, —nispa.

<sup>28</sup> Camachej Agripataj Pabloman cuticherka:  
—Uskhayllata Jesucristopi jap'icoj runaman tijranayawanqui, —nispa.

<sup>29</sup> Pablotaj nerka:  
—Diosmanta mañacuni cunitanpis chayrí unaypipis nokajina Cristopi jap'icoj canayquita. Mana kanllapajchu, manachayrí tucuy cunan uyariwashajcunapis Jesucristopi jap'icunancupaj mañacuni Diosmanta. Nokajina wataskas canancutarí mana munanichu, —nispa.

<sup>30</sup> Chay niskanmantataj curaj camachej Agripaka jataricaporka. Ajinallataj camachej Festopis Berenicewan tucuy paycunawan cajcuna jataricaporkancu. <sup>31</sup> Ripuspataj paycunaka Pablomanta parlancusharkancu:

—Chay runaka ni imatapis wañunapajjina ruwarkachu nitaj wataska cananpajjinapis ruwarkachu, —nispa.

<sup>32</sup> Camachej Agripataj Festoman nerka:  
—Nokanchej cacharipusunman carka chay runataka. Payrí romano camachejman riyta mañarka pay ninanpaj juchayojchus manachus caskanta. Chayraycu manaña cacharipuya atinchejchu, —nispa nerka Agripa.

## 27

*Pablotá Roma llajtamán apachincu barcopi*

<sup>1</sup> Italia jallp'aman rinaycuta nerkanca. Chanta Pablo waj jap'iycuska runaswan Julioman jaywaskas carkancu. Julioka pachaj soldadosta camachej carka. Chay tropaka romano camachej Augustoja carka.  
<sup>2</sup> Cesarea llajtapi casharka Adramitio llajtamanta yacupi purej uj jatun

barco. Chay barcoka Asia llajtasnejta rinan carka. Ajinapi chay barcopi rerkaycu. Macedonia jallp'amanta Tesalónica llajtayo Aristarcopis nokaycuwan risharka.<sup>3</sup> K'ayantintaj Sidón llajtaman chayarkaycu. Chaypitaj Julioka Pablota qhuyaspa amigosninman rinanta sakellarka pisichicuskanta konancupaj.<sup>4</sup> Chanta Sidón llajtamanta llojserkaycu. Wayra sinch'ita ñaupakeycumanta wayramuskanraycu Chipre jallp'a kaylanta rerkaycu, chay wayramanta jarc'askas canaycupaj.<sup>5</sup> Cilicia jallp'a Pamfilia jallp'a kayllancipi uqhu kocha cashan. Chay uqhu kochata chimpaspa Licia jallp'api Mira llajtaman chayamorkaycu. [Chaypitaj barcomanta uraycorkaycu.]\*

<sup>6</sup> Chaypitaj soldadosta camachej Julioka tariparka Italia jallp'aman rishaj uj jatun barcota. Chay barcotaj Alejandría llajtamanta carka. Nokaycuta chay barcoman Julio yaycuchiwarkaycu, paypis yaycullarkataj.<sup>7</sup> Ajinapi ashqha p'unchaycunata allimanta rerkaycu. Ñac'aytataj Gnido llajta chimpaman chayarkaycu. Wayra sinch'ita ñaupakeycumanta wayramuskanraycu Salmón jallp'a chimpata pasaspa Creta jallp'aj ladonta rerkaycu.<sup>8</sup> Chaymanta cantollantapuni ñac'ayta rispa Sumaj Chayacuy niska llajtaman chayarkaycu. Chayri Lasea llajta kayllapi carka.

<sup>9</sup> Kochapi purispa ancha unaytaña khepacorkaycu. Chay p'unchaycuna barcopi puriyka manaña allinchu carka sinch'i wayra tiempoña caskanraycu. Ajinata Pablota paycunata yuyaychaspas<sup>10</sup> nerka:

—Runa-masis, reparani rinanchejka mana allin caskanta. Risunman chayka, cay barcopis cargapis chincaponka. Chaywanpis nokanchejpis wañusunchej, —nispa.

<sup>11</sup> Soldadosta camachejrí Pablota mana casorkachu. Astawan barco apaycachajtawan dueñotawan casuspa pusallawarkaycupuni.<sup>12</sup> Chay llajtari wayra tiempopi khepacunapaj mana allinchu carka. Chayraycu yakha tucuy yuyarkancu rinallancutapuni. Paycunataj nerkanca sonkoncupi: “Ichapis imaynamanta Fenice llajtaman chayayta atisuman”, nispa. Chay llajtataj Creta jallp'api sinch'i wayrasmanta sumaj jarc'aska† carka. Ajinapi wayra tiempopi chaypi khepacunancu allin cananta yuyarkancu.

### *Jatun kochapi ñac'arincu*

<sup>13</sup> Uramanta allicituwan wayramojtintaj yuyarkancu yuyaskan-cumanjina rinancuta. Ajinapi chaymanta llojsispas Creta jallp'a kayllanejta risharkancu.<sup>14</sup> Uj pisimantawantaj wayra Creta jallp'amanta barcoj contranpi sinch'ita wayramorka.<sup>15</sup> Manaña wayraj contránta riyya aterkaycuñachu. Chayraycu wayrawan apachicullarkaycuña.<sup>16</sup> Chaynejpi carka uj juch'uy jallp'a yacuwan muyuska, Clauða niska. Chay jallp'a kayllanta rerkaycu. Chaypitaj manaña sinch'itachu wayrarka. Juch'uy barquitota ñac'ayta ja'piyta aterkaycu.<sup>17</sup> Chaymantataj chay barquitota jatun barcoman runas churarkancu. Ajinaspataj wasqhaswan jatun barcota uramanta mat'erkancu ama p'aquicunpanpaj. Chantataj barco purichina p'achasta uraycuchiporkancu manchachicuspa t'iyyuman barco sat'icunanta. Ajinapi wayra barcota apawarkaycu.<sup>18</sup> K'ayantinpis sinch'ita

\* 27:5 Ninayan. † 27:12 Ninayan.

wayrallarkapuni. Chayraycu waquin cargata kochaman wijch'uyta kallaererkancu barco mana ancha llasa cananpaj.<sup>19</sup> Quinsa caj p'unchaypitaj apaycachajcuna quiquin maquisiniciwan barcomanta waquin purichina imasta wijch'uytokancu.<sup>20</sup> Ashqha p'unchaycunata manaña ni intitapis nitaj ch'ascacunatapis ricorkaycuchu. Chayraycu yuyarkaycunu manaña causashaj jallp'aman chayayta atinaycuta.

<sup>21</sup> Unayña mana miqhorkaycuchu. Pablotaj paycuna chaupipi sayaycuspa barcopi cajcunata nerka:

—Runa-masis, allin canman carka uyarinawayquichejka. Amataj Creta jallp'amanta llojsimusunmanchu carka. Llojsimuskanchejraycuri tucuy chayta muchushanchej. Chaywanpis ashqha imastawan chin-cachishanchej.<sup>22</sup> Cunanrí sonkoyquichejpi callpachacapuychej. Chekamanta ni upis kancunamanta wañunquichejchu puriyninchejpi. Manachayrí barcolla yacuman chincaycaponka.<sup>23-24</sup> Cunan ch'isimin cheka Dios uj willaj angelta cachamuwarka. Chay Diospa wawan nokaka cani, paypa camachintaj. Chay willaj angelta niwarka: “Pablo, ama manchachicuychu. Romano camachejman Cristomanta willanayqui tiyan. Tucuy kanwan rishajcunatataj Dios qhuyacun. Qhuyacuyninraycutaj mana sakenkachu pitapis kochapi wañojtaka”, nispa.<sup>25</sup> Chayraycu, runamasis, sumajta callpachacuychej. Allinta yachani niwaskanmanjina Dioska ruwanka.<sup>26</sup> Astawanrí wayra uj jallp'aman chayachinawanchej tiyan,—nerka Pablo.

<sup>27</sup> Chunca tawayoj caj tutapiña casharkaycu ajina sinch'i wayrapi rispa. Chayri carka Adria niska kochapi. Wayrataj chay kochapi caynejta jakaynejta apaycachashawarkaycu. Chaupi tuta chaynejtataj barco apaycachaj runas yuyarkancu jallp'aman kayllashaskaycuta.<sup>28</sup> Yacoj uqhunta yachanancupaj llasayniyoj wasqhata yacuman cachaycorkancu. Ajinasparaj yacharkancu yacu uqhuman iscay chunca brazadas caskanta. Uj chhicitawan ñaupajman rispa ujtawan wasqhata yacuman cachaycullarkancutaj. Ajinaspari chunca phishkayoj brazadasjina uqhullanña carka yacoka.<sup>29</sup> Manchachicorkancutaj barco rumisman wajtacunanta. Chayraycu tawa barco jap'ichinasta khepannejta yacuman chokaycorkancu. Ancha phutiywantaj sut'iyamunanta suyasharkancu.<sup>30</sup> Barco apaycachaj runaska barcomanta aykecuya munasharkancu. Chayraycu barco jap'ichinasta ñaupakenta churaj churajlla tucorkancu. Astawanrí juch'uy barquitota uraycuchisharkancu chaypi aykecunancupaj.<sup>31</sup> Pablotaj chayta reparaspa camachejman soldadosmanwan nerka:

—Cay barco apaycachajcuna mana barcopi khepaconcancuchu chayka, wañunquichej,—nispa.

<sup>32</sup> Soldadostaj barquitoj wasqhasninta qhuchuraspa barquitota yacuman cachaycarpaporkancu.

<sup>33</sup> Sut'iyamuytañari Pabloka tucuyta yuyaycharka miqhunancuta. Nerkataj:

—Chunca tawayoj p'unchaycunaña manchaywan khawaskanchejpi ni imata miqhuspa cashanquichej.<sup>34</sup> Chayraycu niyquichej miqhunayquichejta allinniyquichejpaj. Ajinapi mana ni imanacunquichejpischu.

<sup>35</sup> Chayta niytawantaj t'antata okharispa Diosta agradececorka tucupya ñaupakencupi. Chaymantataj t'antata partispa miqhuya

kallarerka. <sup>36</sup> Ajinaskanmanta tucuynincu sonkochacapuspa miqhorkancu. <sup>37</sup> Tucuyniyutaj barcopi iscay pachaj kanchis chunca sojtayo runas carkaycu. <sup>38</sup> Miqhuywan sajsacuskancumantataj trigo cargata kochaman jich'aycorkancu barco ch'usajyananpaj.

*Barco yacuman chincaycun*

<sup>39</sup> P'unchayamojtinñataj barco apaycachajcunaka jallp'ata ricuskancuta mana rejserkancchu. Astawanrí t'iyu patapi uj chhica yacullata ricorkancu. Chay jallp'aman barcota orkhoya yuyarkancu. <sup>40</sup> Barco jap'ichinasta qhuchurparispa kochapi sakerparerkancu. Barco apaycachana c'aspistapis phascaporkancu. Barco apaycachana p'achastataj wayraman okharejtincu wayra barcota ch'aquinejman apasharka. <sup>41</sup> Iscay yacus sinch'iwan tincushancu, chayman chayarka barcoka. Chaypitaj barco t'iyuman sat'icorka. Barcoj ñaupakentaj sat'iyucuspa manapuni cuyurerkachu. Khepanrí p'aquiracuya kallarerka yacoj sinch'i wajtaskanwan. <sup>42</sup> Soldadostaj jap'iyucuska runasta wañurachinancuta yuyaychanacorkancu ama aykecunancupaj wayt'asp. <sup>43</sup> Camachejrí Pablo wañunanta mana munarkachu. Astawanpis payka barco apaycachajcunata jarc'arka yuyaskancuta ama ruwanancupaj. Camacherkataj:

—Wayt'ayta yachajcuna ñaupajta yacuman phinquiycuychej jallp'aman chayanayquichejpaj. <sup>44</sup> Wajcunataj c'aspi patasman ujcunataj barcoj imasninanmpis llojsiychej,—nispa.

Ajinata jallp'aman tucuynincu causashaj chayarkancu.

## 28

*Malta niska jallp'aman llojsincu*

<sup>1</sup> Tucuyniyucausashaj jallp'aman chayaspataj yacharkaycu chay yacu chaupipi jallp'aj sutenka Malta caskanta. <sup>2</sup> Chaypi tiyacoj runastaj mayta qhuyaspa nokaycupaj jatun ninata jap'ichipuwarkaycu. Chaymantaj tucuyniyuta wajyawarkaycu ancha chiri para ima caskan-raycu. <sup>3</sup> Pablori uj chhica llant'ata tantamuspa ninaman churay-cusharka. Ajinallapi nina kankeymanta aykespa uj qhanispa wañuchej catari Pabloj maquinman ch'uwiyucorka. <sup>4</sup> Chaypi tiyacoj runastaj Pabloj maquinpi chay catarita ch'uwiyuskata ricorkancu. Chanta ni-nacusharkancu:

—Cay runaka runa wañuchichá canman. Yacupi p'ulticuymanta ayke-cuska. Cunanrí Dios mana sakenchu causajta,—nispa.

<sup>5</sup> Pablórí cataritaka ninaman chokaycorka. Nitaj catareka payta imanarkachu. <sup>6</sup> Tucuy runas suyasharkancu Pablo punquillicunanta chayrí ujllata wañunanta catarej qhaniskanwan. Paycunari unaya-taña suyasharkancu manataj Pabloka imanacorkachu. Chayraycu ujji-natañataj yuyaspa Pablo uj dios caskanta nerkan-

<sup>7</sup> K'oñicusharkaycu, chay kayllapi uj runaj jallp'asnín carka. Chay yacu chaupi jallp'apitaj payka camachej, Publio sutiyoj. Chay runataj munacuywan wajyaspa wasinpi sumajta khawawarkaycu quinsa p'unchayta. <sup>8</sup> Publiojoj tatanri k'oñi onkoywan evacuwantaj onkoska puñunani siricusharka. Pablotaj wasinman yaycorka waturicoj. Diosmanta mañacuytawan maquisinta payman churaspa onkoyninmanta thañicherka. <sup>9</sup> Ajinata ruwaskanmanta chay jallp'api waj onkoskaska Pablojan jamoj cancu. Paycunapis thañichiskas caj

cancu.<sup>10</sup> Paycunataj may cusiywan sumajpaj khawawarkaycu. Khepata ripushajtiycupis tucuy pisichicuskaycuta churapuwarkaycu.

*Pablo Roma llajtaman chayasca tiyacun*

<sup>11</sup> Barco phiricuskanmanta quinsa quillanman waj barcopi riporkaycu. Chay barcori Alejandría llajtamanta carka. Chay jallp'api chiri wayra p'unchaycunapi khepacorka. Barcoj t'icanpitaj iscay quiquinca malla dioscuna carkancu, sutisnincutaj Polux Castor carka. <sup>12</sup> Rispataj Siracusa llajtaman chayarkaycu. Chaypi quinsa p'unchayta caricorkaycu. <sup>13</sup> Chay llajtamantari kocha cantonta rispallapuni Regio llajtaman chayarkaycu. K'ayantintaj ura wayra wayramorka. Ajinapi iscay caj p'unchaypi Puteoli llajtaman chayarkaycu. <sup>14</sup> Chaypi waquin hermanoswan tincorkaycu. Paycuna mayta nicuwarkaycu kanchis p'unchayta caricunaycupaj. Chaymanta Roma llajtaman rerkyaycu. <sup>15</sup> Romapi tiyacoj hermanoska chayanaycuta uyarispa nokaycuta ñanman taripaj llojsimorkancu. Paycunaka Apio niska khatucuna, Quinsa Tambocamapis jamorkancu. Pablori paycunata ricuspa Diosta agradececorka. Ajinaspataj sonkonpi callpachacaporka. <sup>16</sup> Roma llajtaman chayaskaycutawanka soldadosta camachej runaka jap'iycuska runasta wakaychajman jaywaycorka. Pablotari uj khawai soldadotawan wajnejpi payta sapallanta tiyacunanta sakellarka.

<sup>17</sup> Quinsa p'unchaymanta Pabloka Romapi caj curaj israelcunata wajyachimorka. Paycuna tantacamojtincutaj nerka:

—Llajta-masis, nokaka llajtanchejpa contranpi ni imatapis ruwarkanichu. Nitaj unay tatasinchejpa ruwanasnincoj contrantapis ruwarkanichu. Jerusalenpi waquincunari romano curajcunaman jaywaycuwarkancu wisk'aycuchiwanancupaj. <sup>18</sup> Chay romano curajcunari sumajta tapuwaskancumanta ni ima ruwaskaytapis wañunaypajjina tarerkancuchu. Chayraycu cacharipuwayta munarkancu. <sup>19</sup> Israelcunari mayta churanacorkancu. Contraypi willaskancuraycu nokaka romano camachej khawanawananta mañanay carka. Payka ninmanpuni carka juchayojchus manachus caskayta. Manapunitaj llajtanchejtaka juchachayta munarkanichu. <sup>20</sup> Cunanka chayraycu kancunata ricunaypaj parlanaypajtaj wajyachimorkayquichej. Nokanchej israelcunata juchamanta Cacharichej Jesucristo jamunanta suyashaskanchejta yachachiskayraycu nokapis caypi wataska cashani,—nispa nerka Pablo.

<sup>21</sup> Paycunataj payman cuticherkerkancu:

—Nokaycoka ni uj cartatapis Judea jallp'amanta jap'erkaycuchu kanmanta willajtaka. Nitaj jakaymanta jamoj llajta-masisinchejpis ni ima sajratapis kanmanta parlancuchu. <sup>22</sup> Uyariyta munaycu yuyaskayquita chay Jesuspa t'akanmanta, kanpis chay t'akanmanta caskayquiraycu. Chay mosoj t'akajcunamantaka cunan tucuynejpi contranpi parlashancu,—nispa.

<sup>23</sup> Ajinata paycunaka uj p'unchayta tantacunancupaj ajllarkancu. Ajllaska p'unchaypitaj Pablo tiyacorka, chayman ashqha runas jamorkancu. Pablotaj paycunaman sut'ita willarka Dios ajllaskan Cristowan tucuya wiñaypaj camachishaskancuta. Moisespa camachiskasnin unay willajcunaj kelkaskasnincumantawan sumajta sut'incharka. Chaywan Jesusmanta paycunaman tucuy atiskanta willarka munaspa paypi jap'icunancuta. Ajinata yachachisharka

tutamantapacha ch'isiyaycunancama. <sup>24</sup> Waquin runaska Pabloj niskasnin cheka caskanta creerkancu. Waquinrí mana creerkancuchu. <sup>25</sup> Paycunari chay niskanwan mana uj yuyayllachu caspa ripurasharkancu. Manaraj ripushajtinctaj Pabloka paycunaman nerka:

—Sumaj yuyaywan Santo Espiritoka unay tatasninchejman parlarka. Isaías willajinnejta nerka:

<sup>26</sup> Chay runasman rispa willamuy:

Uyarispa chay uyariskayquichejtaka mana entiendenquichejchu.

Khawaspa chay khawaskayquichejtapis mana reparanquichejchu.

<sup>27</sup> Imaraycuchus chay runaspa sonkoncu rumiyacapuska manaña munancuchu entiendeyta palabrayta.

Ningrisnincoka niskayta manaña allintachu uyarincu.

Ñawisnincutapis ch'illmiyacapuncu mana ricunancupaj.

Ningrisnincuwanpis nokata mana uyarincuchu mana munaspa entiendewayta.

Chaywanpis sonkoncupi mana reparayta munancuchu.

Chayraycu nokaman mana cutiricamuncuchu juchasnincuta khechuspa paycunata thañichinaypaj. Ajinata nin Dios.

<sup>28</sup> 'Chayraycu sumajta reparaychej Dioska runasta juchamanta cacharichinapaj Wawanta cachamuskanta. Cay sumaj willanastaj waj llajtayojcunaman willaraska canka. Paycunataj uyarispa casonkancu, —nispa.

<sup>29</sup> Pablo chay imasta nejtintaj israelcunaka paycunapura may phiñacuywan tapunacuspa riporkancu.

<sup>30</sup> Pablori chaypi uj arrendacuskan wasipi iscay watantinta tiyacorka. Tucuy payta watucojcunatapis sumajwan taripaj. <sup>31</sup> Ajinataj payka sumaj willanasta Diosmanta\* willaraj. Mana manchachicuspa yachachisharka Señor Jesucristomanta. Manataj pipis jarc'arkachu.

---

\* **28:31** Literal: Diospa reinon.

## LA CARTA DEL APOSTOL SAN PABLO A LOS ROMANOS

*Cristomanta sumaj willanaswan Dios Pablota cachamun*

<sup>1</sup> Noka, Pablo, Cristo Jesuspa camachin cani, cahan canaypaj ajlaska ima. Diostaj t'akawarka sumaj willanasninta willaranaypaj. Ajinamanta kelkamushayquichej. <sup>2</sup> Chay sumaj willanasta unaymantapacha runasman Dios konanta nerka willajcunannejta santa palabranpi. <sup>3</sup> Chay sumaj willanaska Wawan Cristomantamin. Payka cay pachapi runa cananpaj, Davidpa miraynimanta nacecorka. <sup>4</sup> Payta Dioska wañuymanta causarichispa atiyniyoj Wawan caskanta Santo Espiritunejta sut'ita ricucherka. Payka Señorninchej Jesucristo. <sup>5</sup> Paynejta c'acha Dios qhuyacuyninwan atiyta kowarkaycu cachasnin canaycupaj. Sutinpitaj cachamuwarka tucuy llajtasman willarajta, paycunaka paypi jap'icuspa casunancupaj. <sup>6</sup> Kancuna waj llajtayojcunatapis Dios wajyasorkachej Jesucristopí jap'icunayquichejpaj. <sup>7</sup> Cunanka Roma llajtapi tiyacojcunaman kelkamushayquichej. Kancunata munacuspa Dios wajyasorkachej payman t'akaska canayquichejpaj. Dios Tatanchejpa, Señorninchej Jesucristojo c'acha yanapaynín tucuy kancunawan cachun. Ajinapi Cristowan ujchaska allillanpi causacuychej.

*Pablo paycunata watucuya munan*

<sup>8</sup> Ñaupajtaka Diosniyman graciasta koshani Jesucristonejta tucuy kancuna Diospi jap'icuskayquichejraycu. Chay jap'icuskayquichej tucuy cay pachapi willaska caskanraycu graciasta koni. <sup>9</sup> Payta tucuy sonkoywan yupaychani Wawan Cristomanta willaraspa. Mana sakespa kancunapaj Diosmanta mañacoj caskayta paymin yachan. <sup>10</sup> Mañacushanipunitaj kancunata watucunaypaj, Dios munajtenka jامunaypuni cananpaj. <sup>11</sup> Mayta ricuya munashayquichej yanapasunayquichejpaj Cristowan ujchaska causayniyquichejpi aswan callpachaskas canayquichejpaj. <sup>12</sup> Purajmanta sonkochanacusunchej. Ajinapimin Diospi jap'icuskayquichejraycu sonkochawanquichej. Nokapis paypi jap'icuskaywan sonkochaskayquichej.

<sup>13</sup> Hermanosníy, cayta willaskayquichej: Ashqha cutista kancunata watucuya munarkani. Astawanpis cunancama jarc'aska cani. Munanitaj kancuna chaupipipis waj llajtaspijina sumaj pokoya ricuya. Chayka canman Diospi jap'icuspa wiñajtiyquichej.

<sup>14</sup> Diosman manu cani tucuyman willaranaypaj, griego parlajcunaman mana griego parlajcunamanapis, yachayniyojcunaman mana yachayniyojcunamanapis. <sup>15</sup> Chayraycu kancuna Romapi tiyacojcunamanpis tucuy atiskaywan Cristomanta willaranaypaj listo cashani.

*Sumaj willanaska Diospa atiyninmin*

<sup>16</sup> Cay sumaj willanasmantaka mana p'enkaunicu Diospa atiynin caskanraycu. Juchamanta wiñaypaj cacharichinanpaj atiyniyojmin tucuy paypi jap'icojcunata, ñaupajta israelcunata waj llajtayojcunatapis. <sup>17</sup> Cay sumaj willanaspinmin Diospa chekan caynin ricuchicun. Ricuchicun imaynatachus paypi jap'icoj runata chekanpaj khawananta.

Ricuchicullantaj Diospi jap'icuspa runaka wiñaypaj paywan cusca causananpis. Chayka Diospa palabran niskanmanjina: "Chekan runaka causanka Diospi jap'icuskannejta".

*Manap'icojpaj Diospa phiñacuynin ricuchicun*

<sup>18</sup> Janaj pachapi tiyacoj Dioska ricuchin phiñacuyninta tucuy mana casucojcunaman tucuy sajrata ruwajcunamanpis. Paycunaka sajra ruwaskasnincuwan cheka cajta jarc'ancu. <sup>19</sup> Yuyaynincupeka Diosmanta yachancuña. Diosmin chay yachayninta paycunaman sut'incharka. <sup>20</sup> Diostaka runas mana atincuchu ricuyta. Astawanpis tucuy imata ruwaskanmantapacha yachayninta runas sut'ita ricuncu entiendenancupaj. Wiñay atiynin, Dios cayninpis ruwaskannejta ricuchiska cashan. Chayraycu ni imata atincuchu cutichiyyta juchayoj caspaka. <sup>21</sup> Ajinaka paymanta yachashaspapis mana Diostajinachu jatuncharkancu nitaj graciasta korkancuchu. Astawanpis yankha tanteyacuskancunejta sonkoncupis lakhayachiskajina cajtin yuyaskasnicu manacajman tucorkancu. <sup>22</sup> Yachayniyoj caskancuta nicospapis, mana yuyayniyojman tucuporkancu. <sup>23</sup> Ni jayc'aj wañoj Diosta jatunchayta sakepuspataj tucuoj ruwaska dioscunata jatunchayta kallarerkancu. Chay ruwaskacunataj cancu: runajina, p'iskojina, uywajina, catarijinapis.

*Dios runasta juchancuraycu munaynincuman sakerparen*

<sup>24</sup> Chayraycu Diospis munaynincuman runasta sakerparerka millay ruwaskasnincuwan paycunapura cuerposnincuta p'enkachinancupaj. <sup>25</sup> Diospa cheka cayninnmanta cajta khesachaspa llulla cajta khaterkancu. Ruwaskasnillanta jatunchaspa yupaycharkancu. Manataj yupaycharkancu tucuy imata ruwaj Diostaka. Payka wiñaypaj yupaychaskamin. Ajina cachun.

<sup>26</sup> Chayraycu Dios paycunata sakerparerka millay sinch'i munaynincuman. Warmispis warmi canancuta khesacharkancu cuerposnincuwan waj sajra imasta ruwaspa. <sup>27</sup> Ajinallatataj kharispis warmiwan chekan causayta sakeporkancu. Millay munaynincuwan k'oñirispataj kharis kharipura p'enkay cajta ruwancu. Chay millay munaynincumanta juchancumanjinataj cuerposnincipi ñiac'ariyta jap'incu.

<sup>28</sup> Paycunaka manacajpjaj Diosta khawarkancu. Diospis chaymanjinallatataj paycunata sakerparerka manacaj yuyaymanjina mana ruwana cajta ruwanancupaj. <sup>29</sup> Cayjina imaymana sajra ruwaycunawanan junt'a cancu: Mana chekan ruwaycuna, sajra ruwaycuna, munapayaycuna, sajra yuyaycuna. Ajinapi cancu envidianacoj, runa wañuchi, phiñanacoj, pantachej, sajra yuyaywan ruwaj, cuento apaj, <sup>30</sup> ch'ataj, Diosta chejnicoj, insultaj, jatunchacoj, mayta mentacoj, yuyayninwan sajra imasta waquichej, tatata mamata mana casoj, <sup>31</sup> mana yuyayniyoj, niskasninta mana junt'aj, mana munacuyniyoj, mana allinyacuyniyoj, mana qhuyacuyniyoj. <sup>32</sup> Paycunaka yachancu Diospa chekan niskanmanjina chayjinata ruwajcunaka wañunancupaj juchachaskas caskancuta. Chayta yachashaspapis sajra cajta ruwallancupuni astawanpis chayta ruwajcunawan cusca cusicuncuraj.

## 2

*Dios runaman ruwaskanmanjina konka*

<sup>1</sup> Chayraycu kan, juchachaj runa, pipis cay, ni imata cutichiyyta at-inquichu ruwaskasniyquimanta. Wajta juchachaspa juchachacullan-quitaj kanpis chay quiquillantataj ruwaskayquiraycu. <sup>2</sup> Yachanchejjina chayjinata ruwajcunata, Dioska cheka cajmanjina juchachaskanta. <sup>3</sup> Kanpis, juchachaj runa, chayjinallatataj ruwaspa ¿yuyanquichu Diospa phiñacuyninmanta aykecuya? Mana atinqui. <sup>4</sup> Chayrí ¿man-acajpajchu khawanqui Diospa c'acha qhuyacuyninta? Dioska may-tapuni qhuyacusunqui. Chaymanjina suyasunqui mana uskhaya phiñacuspa. ¿Manatajchu yachanqui juchasniyquita sakespa payman cu-tiricunayquipaj jatun qhuyacuyninwan wajyasuskanta? <sup>5</sup> Astawanpis rumi sonkoyoj canqui nitaj phuticunquichu juchayoj caskayquimanta. Ajinapi astawan astawan Diosta phiñachishanqui jakay jamo juicio p'unchaycama. Chay p'unchaypi Dios chekan caskanta ricuchenka. <sup>6</sup> Sapa uj runaman ruwaskasnimmajina cutichenka. <sup>7</sup> Waquenka sumaj cajta ruwaspapuni causashancu. Ajinata causaspa mentaska cayta, sumajpaj khawaska cayta, mana tucucoj causaytataj masc'ashancu. Paycunaman wiñay causayta Dios konka. <sup>8</sup> Waquinrí quiquin munayn-incuta masc'ancu Diospa cheka niskanta mana casuspataj sajra cajta casuncu. Paycunapaj Diospa sinch'i c'ajaj phiñacuynin canka. <sup>9</sup> Sapa uj sajra ruwaj runapaj llaquiy, ñac'ariy canka, ñaupajta israelcunapaj, waj llajtayojcunapajpis. <sup>10</sup> Sapa uj sumajta ruwajrí mentaska sumajpaj khawaska, Diosman allinyaskataj canka. Ajina canka ñaupajta israelcunapaj waj llajtayojcunapajpis. <sup>11</sup> Dioska uj runata waj runamanta manamin astawan sumajpajchu khawan.

*Dios tucuy runasta quiqinta khawan*

<sup>12</sup> Waj llajtayojcunaka Moisespa camachiskasninta mana rejsincuchu. Juchallicuspataj wiñaypaj tucuchiskas cankancu juchancuraycu. Israelcunapajrí Dios camachiskasninta churarka. Juchallicuspataj chay camachiskasninta juchachaskas cankancu juchancuraycu. <sup>13</sup> Uyarejcunallaka manamin chekanpaj khawaskachu cancu Diospa ñaupakenpeka. Manachayrí camachiskasninta casojcunalla chekanpaj khawaskas cankancu. <sup>14</sup> Waj llajtayojcuna Moisespa camachiskasninta mana rejsispapis yuyaynincumanjinalla camachiskata ruwancuman. Ajina cajtenka paycunaj camachiynincu cashan. <sup>15</sup> Ruwaskasnincu ricuchin Diosmanta camachiska ruwanas sonkoncupi kelkaska caskanta. Ajinapi sonko-yuyaynincu paycunaman willan. Unanchacuspataj yachancu ruwaskasnincu mana allin caskantapis chayrí allin caskantapis. <sup>16</sup> Jakay jamo juicio p'unchaypi Jesucristonejta runacunaj pacaypi ruwaskasnincuta Dios sut'inchanka. Sapa ujtaj nenka chekan caskanta chayrí juchayoj caskanta. Chayka sumaj willanasta willaraskaymanjinamin canka.

*Israelpuna camachiskasta mana casuncuchu*

<sup>17</sup> Cunanka, israel runa, kan Judá miraynin sutichacunqui, Moisespa camachiskasnini confiacunqui, Diospa ajllacuskanmanta caskayquimanta jatunchacunquitaj. <sup>18</sup> Diospa munayninta yachanqui. Camachiskasnini yachachiska caspataj aswan sumaj cajta ajllayta atinqui. <sup>19</sup> Ajinapi yuyacunqui Diosta mana rejsej runaspa Diosman pusajnincu c'anchaynincutaj caskayquita. <sup>20</sup> Yuyacunquitaj pisi yuyayniyojcunaj yuyaychajnincu, wawaspa yachachejnincutaj

caskayquita. Chayta yuyacunqui Dios ricuchisuskanraycu yachay cajta cheka cajtapis Moisespa camachiskasnini. <sup>21</sup> Chayraycu yachachej, kanta tapuyqui: Runata yachachispá ¿imaraycutaj mana kan quiuiyquita yachachicunquichu? Mana suwanata, willaraspa ¿suwawajchu? <sup>22</sup> Mana kenchachacunachu, nispa ¿kenchachacuwajchu? Ruwaska dioscunata chejnej caspa ¿paycunamanta suwawajchu? <sup>23</sup> Camachiskasmanta jatunchacunqui, Diospa camachiskasninta mana casuspataj manacajpaj payta khawashanqui. <sup>24</sup> Israelcunamanta Diospa palabranpipis ninmin: “Kancunaraycu waj llajtayojcuna Diospa sutinmanta sajrata rimancu”.

### *Tucuy sonkowan Diosta casojcuna runasnin cancu*

<sup>25</sup> Diospa ajllaska runan caskayquita ricuchinapaj cuerpopi señalaska caspa, chay circuncidanamanta jatunchacunqui. Chay señal sumajpis cashan sichus Moisespa camachiskasninta ruwanqui chayka. Astawanrí camachiskasninta mana casojtiyqueka chay cuerpopi señalniyoj caskayqui mana ricuchinchu Diospata caskayquita. <sup>26</sup> Ajinamanta sichus waj llajtayoj runa ruwanman sumaj imasta camachiskasmanjina chayka ¿manachu chekan runapaj khawaska canka? Chayka mana jawa cajllawanchu canman. <sup>27</sup> Chayjina khawaska casucoj runa kanta juchachasonka camachiskasta mana casuskayquiraycu. Kelkaska camachiskasiyoj circuncidaska ima cashajtiyquipis kanta juchachasonka. <sup>28</sup> Dioska israel runata mana jawallamantachu khawan nitaj chay cuerpopi señalacuymantachu israelcunaman rijch'acojtilanka. <sup>29</sup> Astawanpis uqhumanta sonkopi Espíritoj llimphuchaskanmin cheka israel runaka, manataj kelkaskamanjina ruwajllachu. Payka Judáj miraynin sutichaskamin, mana runacunaj mentaskallanchu. Manachayrí Dios payta mentan.

## 3

### *Ajllaska runasnipis Diosta mana casuncuchu*

<sup>1</sup> Ajina cajtenka ¿ima sumajtaj canman israel runa cayrí? Chayrí ¿ima sumajtaj canman chay camachiskamanjina señalaska cayrí? <sup>2</sup> Tucuy imaymanapi aswan sumaj cashan. Astawan caskanka israelcunaman Dios niskasninta koskanmin. <sup>3</sup> Yachanchej waquin paycunamanta mana casuskancuta. Ni chaywanpis nisunmanchu Dioska niskasninta mana junt'anantaka. <sup>4</sup> Paycunaj mana junt'askancoka ni jayc'aj jarc'anchu niskasninta junt'ananta. Tucuy runas llulla cashajtincupis Dioska chekapunimin. Quiquillantataj palabranpi nin:

Niskasniyquipi chekan caskayquita reparankancu.

Tucuypa ñaupakenipi chekan ricuchiska canqui.

<sup>5</sup> Chaymantarí runamanjina parlaspa nisunman: Sichus juchanchejejta Dios chekan caskanta ricuchisunman chayka, Dioska juchanchejmanta phiñacojtin ¿mana chekanchu? <sup>6</sup> Dioska chekanpunimin. Jakay juicio p'unchaypi tucuy runas Diospa ñaupakenman riqhurinancu tiyan. Dios chekan caspalla sut'inchayta atin. Ajinalla sapa uj runata juchachanapaj caskanta chayrí chekan caskanta nenka.

<sup>7</sup> Cunan, runaka ninmarchá: “Sichus llullacus kaywan Diosta jatunchayman cheka caskantataj ricuchiymán chayka ¿imaraycutaj juchachaska canirí?” nispa. <sup>8</sup> Cayjinata nillanmantaj: “Sajrata

ruwanachej allin caj jamunanpaj". Waquin sajra parlaywan chayta nincu nokanchejpis nisunman carkajina. Chekatapuni chayjina parlaicunaka juchachaskas canancu tiyan.

*Tucuy runas juchachaskas cancu*

<sup>9</sup> Cunanka ¿israelcunachu chayrí waj llajtayojcunachu aswan sumaj cancu? Tucuynin quiquin cancu. Sut'ita ricucherkaniña israelcunapis waj llajtayojcunapis tucuynincu juchachaskas caskancuta.

<sup>10</sup> Quiquillantataj Dios palabranpi nin:

Ni ujpis chekan runaka canchu.

<sup>11</sup> Ni uj entiendenchu; ni uj Diosta masc'anchu.

<sup>12</sup> Tucuy payta sakeporkancu.

Manacajman tucorkancu.

Ni uj canchu allin cajta ruwajka, ni ujllapis.

<sup>13</sup> [Sajra sonkoncumanta millay parlanas llojsimun.]\*

Simincuwan parlancu runasta pantachinancupaj.

Niskasnincu runasta nanachin catarej qhaniskanjina.

<sup>14</sup> Simincoka maldicionwan jaya palabraswan junt'a.

<sup>15</sup> Uskhayta rincu runasta wañuchinancupaj.

<sup>16</sup> Puriskancumanta llaquiylla, nac'ariylla jamun.

<sup>17</sup> Mana yachancchu allin causaypi puriyta.

<sup>18</sup> Yuyaynincupeka Diosta manchachicuylapis mana canchu.

<sup>19</sup> Cayta yachallanchejtaj: Camachiskasta rejsejcunaman tucuy kelkaska chayjinata nin tucuy ch'inyachiska canancupaj. Ajinaka tucuy cay pachapi cajcuna Diospa ñaupakenpi juchachaskas cancu. <sup>20</sup> Chayraycu camachiskasta ruwaskannejta ni pita Dios chekanpaj khawanchu. Astawanpis camachiskaska juchata rejsechinallawanchejpaj koska carka.

*Paypi jap'icojta chekanpaj Dios khawan c'acha yanapaynиннејта*

<sup>21</sup> Cunanrí Dioska ricuchinña imaynatachus mana camachiskasta ruwaskancuraycullachu runasta chekanpaj khawananta. Chayta willan Moisespa kelkaskanpi Diospa unay willajcunarpa kelkaskasnincupipis.

<sup>22</sup> Jesucristopi tucuy jap'icojcunata chekanpaj Dios khawan jap'icuskancunejllata, tucuya quiquinta khawaspa. <sup>23</sup> Tucuymín juchallicorkancu. Diospa c'acha munaynimanta carunchacuspataj ni pi paymanjina causanchu. Nitaj pipis chekan cayta taripanchu. <sup>24</sup> Diosrí c'achata yanapawarkanchej khasillamanta nokanchejta chekanpaj khawaspa Cristo Jesús juchamanta cacharichiwaskanchejraycu.

<sup>25</sup> Tucuypa ñaupakencipi payta Dios churarka juchanchejraycu wañunanpaj, yawarninta jich'aspá. Wañunanchejmanta Cristo wañuskanta jap'icojtinchej juchanchejmanta Dios lliphuchawanchej. Ajinapi Cristo Jesuspa wañuynin ricuchin Dioska chekanpuni caskanta. Ñaupa tiemposepeka qhuyacuyninpi manarajmin juchata c'ajaj phiñacuyninwan jasut'erkarajchu. <sup>26</sup> Astawanpis cunancama suyarka chekan caskanta ricuchinanpaj. Cunantaj Dioska chekan caskanta ricuchin Cristo Jesús juchanchejraycu wañuskanwan. Ricuchillantaj Jesuspi jap'icojta chekan runapaj khawaj caskanta.

*Manamin ruwaskannejtachu runaka chekanpaj khawaska*

\* 3:13 Ninayan.

<sup>27</sup> Ajinaka ni pipis atinchu chekan caymanta jatunchacuya. Chekan cayka mana runaj ruwaskannejtachu, manachayrí Diospi jap'icuskannejllata. Chayraycu jatunchacuyka manacajllañamin. <sup>28</sup> Reparanchej, runaka Diospi jap'icuskannejllatamin chekanpaj khawaska caskanta manataj camachiskasmanjina ruwaskanraycuchu. <sup>29</sup> Chaywanpis Dioska mana israelcunaj Diosnillancuchu. Waj llajtayojcunajtapis Diosnillancutajmin. <sup>30</sup> Dioska ujllamin. Israelcunata chekanpaj khawan paypi jap'icuskanjcunejta. Quiquillantataj waj llajtayojcunatapis chekanpaj khawan paypi jap'icuskanjcunejta. <sup>31</sup> Ajinaka ¿jap'icuskanchejnejta tucuchinayanchejchu Diospa camachiskasninta? ¡Ni imaynamantapis! Aswanpis sinch'ita sayachinchej camachiskasta.

## 4

### *Abraham Diospi jap'icuskanjejta chekanpaj khawaska*

<sup>1</sup> Runamanjina unay tataycu Abrahammanta chay quiquin yachachinallatataj Diospa palabranpi willawanchej. <sup>2</sup> Abrahamka ruwaskasninenjtachus chekanpaj khawaska carka chayka, jatunchacunman carka. Diospa ñaupakenpirí mana jatunchacuya aterkachu. <sup>3</sup> Palabranpi Abrahammanta nin: “Pay Diospi jap'icorka. Diostaj jap'icuskanraycu payta chekan runapaj khawarka”, nispa. <sup>4</sup> Llanc'aj runamanrí pagonka mana regalopaj khawaskachu. Manachayrí llanc'askanmanta pagonta jap'inanpuni. <sup>5</sup> Astawanpis uj runa ni imata ruwaspapis Diospi jap'icuspaka chekanpaj khawaskamin. Diostaj juchasapataka paypi jap'icojtin juchasninta khechuspa chekanpaj khawan. Ajinata chekanchaj Diospi jap'icuspa runaka chekanpaj khawaska.

<sup>6</sup> Chaywanpis unay camachejniyu Davidpis kelkarka cusiska runamanta. Chay cusiska runata Dios chekanpaj khawan paypi jap'icuskanraycu manataj ruwaskanraycuchu. <sup>7</sup> Palabranpi nin: Runas cusicuyniyoj cancu Dios sajra ruwaskasnincuta khechuspa pam-pachajtin, juchasnincutaj manaña cajtin.

<sup>8</sup> Runaka cusicuyniyojmin juchasninta Señorninchej manaña juchachananpaj jap'ejtin.

<sup>9</sup> Chayjina cusicuyniyojcuna mana israelcunallamantachu cancu, manachayrí waj llajtayojcunamantapis callancutaj. Nerkanchejña paypi jap'icojtin Abrahamtaka Dios chekanpaj khawaskanta. <sup>10</sup> Ajinaka ¿imayna cashajtintaj chekanpaj khawaska carkarí? ¿Señalpaj cuerponpi circuncidaska cashajtinchu chayrí manaraj chayjina señalaska cashajtinchu? Dios paytá chekanpaj khawarka manaraj chayjina señalaska cashajtin. <sup>11</sup> Manaraj cuerponpi señalaska cashaspa sonkonwan Diospi jap'icorka. Chaymantaña Dios camacherka Abrahama cuerponpi señalaska cananta. Chayka carka ricuchinanpaj paypi jap'icuskanjejta chekanpaj khawaska caskanta. Ajinapi ñaupa tatancujina cashan Diospi jap'icoj waj llajtayojcunapajpis. Cuerposnicipi mana chayjina señalaska cashajtincupis sonkowan jap'icojtin Dios paycunata chekanpaj khawan. <sup>12</sup> Diospi jap'icoj israelcunajtapis tatallancutajmin. Chaywanpis paycunaka mana chay señalniyojllachu cancu. Manachayrí Abraham Diospi jap'icuskanmanjina jap'icuncu. Payka manaraj chay señalniyoj cashaspa chekanpaj khawaska cananpaj Diospi jap'icorka.

*Abrahamman Dios sumaj niskanta junt'arka*

<sup>13</sup> Dioska sumaj niskanta Abrahamman mirayninmanpis willarka: "Kanman cay pachata kopuskayqui", nispa. Caytaka mana camachiskasta casuskanraycuchu willarka. Astawanpis jap'icuskannejta chekanpaj khawaskanraycuyu chay sumaj niskanta willarka. <sup>14</sup> Ajina cajtenka sichus camachiskasta casuskancunejjlata sumaj niskanta jap'incuman chayka, Diospi jap'icuskanru khasilla, sumaj niskanpis manacaj canman. <sup>15</sup> Sitajchus camachiskas mana canchu chayka, ni pi juchachaskachu canman mana casuskanmantaka. [Astawanri Dios camachiskasninta kowarkanchej. Mana camachiskasninta casojmantaj Diospa c'ajaj phiñacuynin jamun.]<sup>\*</sup> Ajinapi camachiskasmantaka Diospa phiñacuynillan jamun jucharaycu. <sup>16</sup> [Abrahamri camachiskasta casuya mana aterkachu.]<sup>†</sup> Astawanpis Diospi jap'icuskanraycuyu Dios sumaj niskanta paypaj churarka. Ajinata ruwarka sumajta yachananchejpaj c'acha yanapayninnejlata sumaj niskanta nokanchejpaj junt'ananta. Tucuy Abrahampa mirayninpajpis sumaj niskanta Dios junt'ankapuni Abrahamjina Diospi jap'icojtincu. Camachiskasniipi cajcunapajjis tucuy nokanchejpajpis junt'anka. Abrahamka tatanchejmin Diospi jap'icuskanchejraycu. <sup>17</sup> Dios palabranpipis payman nin: "Ashqha llajtaspa tatancupaj kanta churarkayqui", nispa. Diospa ñaupakenpi Abrahamka sumaj niskanpi jap'icorka. Chay atiyniyoj Dioska wañuskacunata causarichimun. Yuyaskanmanjinataj parlan mana ruwaska imasmantapis cunan cashaskantajina.

<sup>18</sup> Ni ima suyananpaj cashajtin Abrahamka Diospi jap'icuspa suyarka. Ajinamanta sumaj niskanmanjina ashqha llajtaspa tatancupaj tucorka. Diospa sumaj niskan carka: "Mirayniyqui mana yupay atina canka".

<sup>19</sup> Abrahamka pachaj watayojjinaña carka. Cuerpontapis wañuskapajña khawacorka. Sara, warminpis, ashqha watasniyoj caspa manaña wawata rejsejjinachu carka. Chaywanpis Abraham sonkonwan Diospi jap'icuyninpi mana pisiyacorkachu. <sup>20</sup> Sumaj niskanmantapis mana iscayrayarkachu. Astawanpis Diospi jap'icuyninpi astawan callpachacorka. Ajinapi Diosta jatuncharka, <sup>21</sup> chekata yachaspa Dioska atiyniyoj caskanta sumaj niskanta junt'ananpaj. <sup>22</sup> Dioska payta chekanpaj khawarka ajinata jap'icuskanraycu.

*Diospi jap'icuskanchejnejta chekanpaj khawaska canchej*

<sup>23</sup> Manataj Abrahamllapajchu kelkaska carka Dios payta chekanpaj khawaskantaka. <sup>24</sup> Manachayrí nokanchej tucuy paypi jap'icojcunapajjis nillantaj. Ajinapi cunanka Diospi jap'icuspa chekanpaj khawaskas casunchej. Paymin Señorninchej Jesusta wañuymanta causarichimorka. <sup>25</sup> Juchasninchejraycu Dios payta wañuyman jaywarka. Chekanpaj khawaskas cananchejpajtaj causarichimorka.

## 5

*Jesucristonejta allinyachiskas canchej Diosman*

<sup>1</sup> Cunanka Diospi jap'icuskanchejraycu chekanpaj khawaskas caspa payman allinyachiskas canchej Señorninchej Jesucristonejta.

\* 4:15 Ninayan. † 4:16 Ninayan.

<sup>2</sup> Ajinapi c'acha yanapayninwan causacojcuna canchej. Paynejtataj cusicunchej atiyniyoj Dioswan cusca wiñaypaj cacunanchejmanta. <sup>3</sup> Mana chayllachu astawanraj llaquiyuncunapi cusicunchejpis yachaspa llaquiyka mana sayc'uspa muchuyta yachachiwaskanchejta. <sup>4</sup> Ajinata muchuskanchejtaj ricuchin paypi jap'icuspa callpayoj caskanchejta. Ajina callpachaskastaj Diospi confiacunchej jamoj imaspaj yanapanawanchejpaj. <sup>5</sup> Ajinata confiacuspataj yachanchej Dios niskanta junt'ananta. Espirituntataj kowarkanchej sonkonchej munacuyninwan junt'a cananpaj. Chayraycu ajinata Diospi confiacunchej. <sup>6</sup> Ajinapimin mana callpayoj cashajtinchejpis Diospa ajllaskan p'unchaypi Cristoka wañorka sajra ruwajcunapaj. <sup>7</sup> Chekatapuni yakha mana pipis wañunmanchu uj chekan ruwajpajka. Uj c'acha runapajka ichapis mayken causayninta konman. <sup>8</sup> Cristorí juchasapasllaraj cashajtinchejpis wañupuwarkanchej. Ajinapi Dioska munacuyninta nokanchejman chekata ricuchiwarkanchej. ¡Chayjina munacuya Diospallata! <sup>9</sup> Chayraycu cunan Cristojoj wañuyninnejta chekanpaj khawaskas canchej. May astawanraj Diospa c'ajaj phiñacuynimantapis cachariskas casunchej. <sup>10</sup> Payta mana casuspa enemigonjina cashajtinchej Wawanpa wañuyninnejta Dios allinyachicuwarkanchej. Ajina cajtenka may astawanraj causarimoj Cristowan ujchaska wiñaypaj cachariskas causasunchej. <sup>11</sup> Mana chayllachu astawanraj Diospipis mayta cusicushanchej Señorninchej Jesucristonejta, cunan Diosman wiñaypaj allinyachiskas caskanchejraycu.

### *Adannejita tucuy wañuncu*

<sup>12</sup> Yachanchejjina uj runanejta jucha cay pachaman yaycumorka. Juchanejtataj tucuy wañuncu. Ajinamanta tucuy runaspaj wañuy jamun tucuy runas juchallicuskancuraycu. <sup>13</sup> Ajinapi manaraj Moisespa camachiskasnin koska cashajtin juchaka cay pachapi carkapuniñamin. Manachus camachiskas tiyan chayka, runaka mana juchachaskachu. <sup>14</sup> Astawanrí Adammantapacha Moisescama tucuy runas wañorkancu mana Adanjina juchallicojcunapis. [Payka Diospa contranpi churacorka Dios payman niskanta mana casuspa.]<sup>\*</sup> Adanka ñaupaj runa caskanraycu tucuy cay pacha runaspa curajnincu cashan. Payka Diospa cachamuskan Runaman rijch'acun. [Cristorí mosoj causayniyojcunaj Curajnincu cashan.]<sup>†</sup>

<sup>15</sup> Paynejta Dioska ashqhasman munacuyninta ricucherka. Astawanka aswan jatunmin Diospa c'acha yanapaynenka Adanpa juchamanta niskaka. Chay mana casuskan juchamanta tucuy runas wañuncu. Diosrí may astawanraj c'acha yanapayninta mana mich'acuspa kowarkanchej Jesucristonejllata. <sup>16</sup> Nitaj chay ujpa juchanjinachu Diospa koskanka carka. Chay ujpa juchamanta juchachayka jamun nokanchejpaj. Astawanpis may ashqha juchasta khechuspa Dioska c'acha yanapayninnejta chekanpaj khawawanchej. <sup>17</sup> Adannejtaka, paypa mana casuskanraycu, tucuy wañuncu. May astawanraj Dioska munacuyninwan chekan cayta korillan. Chay chekan cayta jap'ejcunari Jesucristonejllata jap'incu. Paywan cuscataj jatunchaska wiñaypaj causankancu.

\* 5:14 Ninayan. † 5:14 Ninayan.

*Jesucristowan ujchaska wiñaypaj causanchej*

<sup>18</sup> Cunanka, Adanpa mana casuskanwan tucuy juchachaskas carkancu. Ajinallataj Cristoj casuskanwanka tucuy pаж chekan cayka wiñaypajmin. <sup>19</sup> Imaynachus Adanpa mana casuskannejtaka tucuy juchayojcuna carkancu, ajinallataj Cristoj casuskannejta ashqhas chekan ruwajcuna cankancu. <sup>20</sup> [Dios camachiskasnini pi munayninta ricucherka. Runasri camachiskasta mana casuspaj‡ astawanraj juchallicorkancu. Aswan jucha cajtintaj may astawanraj Diospa c'acha yanapaynin runasman chayamorka. <sup>21</sup> Ajinapi imaynatachus juchanejta runas wañorkancu chaymanjinallatajmin c'acha yanapaynинnejta chekanpaj Dioska khawawanchej. Señorninchej Jesucristonejtataj wiñay causaya kowanchej.

## 6

*Jesucristowan ujchacuyka Diospaj causanapajmin*

<sup>1</sup> Chay tucuymanta cunanka ¿imanisunmantaj? ¿Yuyanquichejchu Diospa c'acha yanapaynin aswan jatun cananpaj? <sup>2</sup> ¡Ni imaynamanta! Nokanchejka juchapaj wañuporkanchejña. Chayraycu manaña juchapi causaya atinchejchu.

<sup>3</sup> Yachanquichejina Cristopi jap'icuspa bautismonejta ricucherkanchej Cristowan ujchaska caskanchejta. Cayka, wañuynipni ujchacuymin. <sup>4</sup> Wañuskajinataj paywan cusca bautismonejta p'ampachicorkanchej. Imaynatachus Dios Tataka jatun atiyninwan Cristota causarichimorka, ajinallataj nokanchejwanpis carka mosoj causaypi purinanchejpaj. <sup>5</sup> Imaynatachus Cristo wañorka, ajinallataj juchapaj wañorkanchej paywan ujchacuspaka. Chayraycu chekatapuni causarimuynipijnallataj ujchacusunchej. <sup>6</sup> Cayta yachanchej: Ñaupa causayninchekja Cristowan cusca wañuchiskajinañamin carka. Ajinapi juchaj atiynin manaña cuerponchejta camachinchu. Juchaj atiynenka tucuchiskamin manaña munayninchekta ruwananchejpaj. <sup>7</sup> Sichus runa wañunña chayka, juchamanta cuchariskamin. <sup>8</sup> Yachanchej mauc'a causayninchekja Cristowan cusca wañuska caskanta. Chayraycu creenchej paywan cusca mosoj causayniyoj caskanchejta. <sup>9</sup> Yachanchejtaj Cristo wañuymanta causarimuspaña ni jayc'aj wañonkachu. Wañuypa atiyninmantaka wiñaypaj cachariskaña. <sup>10</sup> Juchanchejpaj Cristoka uj cutillata wañorka tucuy juchata atipananpaj. Cunanri Diospaj causashan. <sup>11</sup> Ajinallataj kancunapis juchapaj wañuskajina khawacuychej juchamanta t'akaskaña caskayquichejraycu. Cristo Jesuswan ujchaskataj Diospaj causaychej.

*Diosta casuspa chekanta ruwanachej*

<sup>12</sup> Chayraycu amaña jucha camachichunchu, sajra camachejjina, cay pacha causayniyquichejta. Amañataj juchata casuspa sajra munayninanjinra ruwaychejchu. <sup>13</sup> Niñataj juchaj yuyaskanmanjinra cuerpoyquichejwan sajrata ruwaychejchu. Manachayri wañuskamanta causarimuskasjina tucuy causayniyquichejta Diosman jaywacuychej. Cuerpoyquichejtapis payman jaywacuychej chekanta ruwanayquichejpaj. <sup>14</sup> Manañamin juchaj camachiskasninchu canquichej, manaña camachiskasta ruwaynejta chekanpaj khawaska yuyaskayquichejraycu.

‡ 5:20 Ninayan.

Astawanpis Dios c'acha yanapayninnejta chekan runaspaj khawasunquichej.

<sup>15</sup> Cunanka, manaña camachiskasta ruwayllawanchu causanchej, manachayrí Dios c'achata yanapawaskanchejmanjina. ¿Chayraycchu juchallicusun? ¡Ni imaynamanta! <sup>16</sup> Cayta sumajta yachanquichejjina: Patronman casunayquichejpaj churacuspaka payta casuspataj camachisnin canquichej. Juchata camachejtajina casuspaka casuskayquichejmanta wañunquichej. Diosta casuspataj chekanta causanquichej. <sup>17</sup> Ñaupajpi juchaj camachisnin carkanquichej. Cunanrí, gracias Diosman, tucuy sonkowan cheka yachachinata casorkanquichejña yachachiska caskayquichejmanjina. <sup>18</sup> Juchamanta cachariskas caspataj cunanka chekan ruwanaman camachis canquichej. <sup>19</sup> Caytaka cay pacha causayninchejmanjina camachismanta quiquinchanawan parlani kancunapaj aswan sut'illa cananpaj. Ñaupajpi millay imasman mana Diosta casuymantaj cuerpoquichejta camachisjina jaywacorkanquichej mana casojcunaman tucunayquichejcama. Cunanka ajinallatataj camachisjina chekan ruwanaman cuerpoquichejta jaywacuychej Diosman t'akaska canayquichejpaj.

### *Dios wiñay causayta kowanchej*

<sup>20</sup> Ñaupajpi juchaj camachisnin cashaspaka libre carkanquichej chekan ruwayman churacuymantaka. <sup>21</sup> Chay ruwaskasniyquichej ¿imata kancunapaj ruwarkarí? Ni ima allintapis. Astawanrí cunanka p'enkachisunquichej. Chay ruwaskasmantataj runaka wiñaypaj wañun. <sup>22</sup> Cunanrí juchamanta cacharichiskaña canquichej Diospa camachisnin canayquichejpaj. Payman t'akaska llimphu causayniyoj caspataj c'acha ruwanasta ruwanquichej. Chay ruwanasmantari runaka wiñaypaj causan. <sup>23</sup> Runaka juchamanta pagotajinamin wiñay wañuya jaþ'enga. Diosrí c'acha munacuywan Señorninchej Cristo Jesusnejta wiñay causayta kowanchej.

## 7

### *Juchamanta cachariskas*

<sup>1</sup> Hermanosníy, leycunamanta reparaspa, cayta yachanquichej: Uj runaka causanancamalla leytaka casun. <sup>2</sup> Leymanjina uj casaraska warmipis kosanwan ujchaska cashan causanancamalla. Sitajchus kosan wañupunman chayka, casaraska caymanta libreña. <sup>3</sup> Kosan causashajtillanraj waj kosayoj canman chayka, warmeka khenchapaj rejsiska canka. Sichus kosan wañupunman chayka, manaña paywan ujchaskachu. Leymanjina warmeka mana khenchachu canka waj kosayoj caspapis.

<sup>4</sup> Ajinallataj, hermanosníy, kancunapis Cristoj wañuynipi Moisespa camachiskasninpaj wañuporkanquichejña. Wañuyninnejtataj cachariskas carkanquichej waj kosawanjina ujchaska canayquichejpaj, wañuymanta causarimoj Cristowan. Ajinamanta paywan ujchaska caspa c'acha ruwanasta mosoj causaypi Diospaj ruwanchej. <sup>5</sup> Ñaupajpi manaraj Diospa munayninmanjina causashajtinchej camachiskaska sajra munayninchejta rijch'aricherka. Ajinapi juchaka cuerponchejpi ruwarka. Chay ruwaskamanta wiñay wañuy jamun. <sup>6</sup> Cunanrí camachiskasmanta

cachariskasña canchej juchapaj wañuskasña caspa. Manañataj mauc'a kelkaskacunamanjinachu ruwanchej jawa imasllata. Manachayrí Santo Espiritumanjina mosoj causayinchejpi Diosta casunchej.

*Camachiskaska ricuchin jucha manchay sajra caskanta*

<sup>7</sup> Chay jawa cunanka ¿yuyasunchu camachiskas jucha caskanta? ¡Ni imaynamanta! Astawanpis camachiskasnejllata juchata rejserkani. Camachiska "Ama wajpa capuyninta munapayaychu", nejtillan munapayayniy jucha caskanta yacharkani. [Ajinamanta camachiskasnejta repararkani munayniy Diospa munaynimpá contranpi caskanta.]<sup>\*</sup> <sup>8</sup> Juchaka chay camachiskasmanta valecuspa tucuy imaymana sajra munayta nokapi ruwarka. <sup>9</sup> Ñaupajpi mana camachiskaswanka munayniymanjina allinjinallata causasharkani. Camachiskasta rejiskaytawantaj juchaka astawan callpawan causayniypi ruwarka. <sup>10</sup> Juchaynejtataj wañuskajina carkani. Noka yuyarkani camachiskaska causayta konawanta Diospa munayninta ricuchiskanraycu. Astawanrí wañuyllapaj caporka. <sup>11</sup> Juchaka chay camachiskapi engañanawanpaj tarispa wañuchiwarka, [sajra munayniyta casuskayraycu].†

<sup>12</sup> Ajinaka Moisespa camachiskasnenka Diosmantamin. Sapa camachiskaka paymanta caspa santa chekan, runaj allinninpajtajmin.

<sup>13</sup> Chayraycu ¿chay sumaj cajka nokapaj wañuyllapajchu caporka? ¡Ni imaynamanta! Manachayrí chay sumaj camachiskasta mana casuskayraycu juchaka wañuya nokapaj ruwarka. Ajinata ruwarka jucha sut'i ricuchiska cananpaj. Ajinapi chay sumaj camachiskas ricucherka juchaka manchay sajra caskanta.

*Runaka juchaj camachinmin jucha paypi tiyacojtin*

<sup>14</sup> Yachanchej camachiskaska Diosmanta caskanta. Nokari cay pacha runa cani juchaman camachi. <sup>15</sup> Ruwaskasniytaka manamin entiendenichu. Ajinapi mana munaskaytachu ruwani; manachayrí chejniskayta ruwani. <sup>16</sup> Mana munaskaytachus ruwani chayka, ricuchini sonkoypi reparaskayta camachiskas sumaj caskanta. <sup>17</sup> Ajinapeka ruwaskasniyta manaña nokachu ruwani. Manachayrí jucha nokapi tiyacuspá ruwan. <sup>18</sup> Yachanitaj cay pacha runa cajtiy ni ima c'acha nokapi caskanta. Chayraycu sonkoypian sumaj cajta ruwayta munaspa mana atinichu. <sup>19</sup> Ajinapi c'acha cajta ruwayta munaskayta mana ruwanichu. Astawanpis mana munaskay chay sajra ruwayta ruwani. <sup>20</sup> Sitajchus mana munaskayta ruwani chayka, manaña nokachu ruwani. Manachayrí jucha nokapi tiyacuspá ruwan.

<sup>21</sup> Ajinaka cayjina ruwayta nokapi tarini: Sumaj imasta ruwayta munaspa juchata ruwaskallay tiyan. <sup>22</sup> Sonkoy uqhupeka Diospa sumaj camachiskasninpimin cusicuni. <sup>23</sup> Astawanri waj camachejtajina nokapi reparani. Chay camachej, juchari, sonkoypi makanacushan contrayta. Chay jucha cuerpoypi tiyacuspataj camachinpaj jap'iwan.

<sup>24</sup> ¡May phutiy cani! ¡Juchapi wataska cani! ¿Wañuyman pusaj ismoj causaymanta, pillataj cacharichiwankarí? <sup>25</sup> ¡Dioslla cacharichiwayta atin Señorninchej Jesucristonejta! ¡Gracias payman! Ajinaka noka quiquiri yuyayniywan Diospa camachiskasninta casuni. Sitajchus cay pacha

\* 7:7 Ninayan. † 7:11 Ninayan.

runamanjina munayniya ajllayman chayka, juchaj camachiyninta casuyman.

## 8

### *Santo Espiritumanjina causajcunamanta*

<sup>1</sup> Chayraycu cunanka Cristo Jesuswan ujchaska cajcuna manaña ni imapi juchachaskachu cancu. <sup>2</sup> Cristo Jesuswan ujchacojtiy wiñay causayta koj Espíritoj camachiyninmin cacharichiwarka. Cacharichiwarkataj jucha camachiyninmanta wiñay wañuymantapis. <sup>3</sup> Moisespa camachiskasnenka ni jayc'aj causayta koyta aterkachu. Manamin atiyniyojchu carka juchaj camachisnin caskanchejraycu. Diosrí causayta kowanchej cayjinapi: Munacuywan quiquin Wawan Cristota cachamorka cay pacha runaman tucunanpaj. Payka mana juchayoj carka. Cay pacha runa caspa juchapaj wañorka. Ajinapi Dios juchata juchachaspa Cristoj cuerponpi k'alata atiparka. <sup>4</sup> Chayta ruwarka Diospa camachiskasninmanjina chekan ruwayta junt'ananchejpaj. Nokanchej manaña juchaj camachisnin purejcunachu canchej. Manachayrí Espiritumanjina purinchej.

<sup>5</sup> Yachanchej, cay pacha sajra munaymanjina causajcunaka chay munaypipuni yuyancu. Santo Espiritumanjina causajcunari Espíritoj munayninmanjinapuni yuyancu. <sup>6</sup> Chay sajra munaymanjina yuyaymantaka wiñay wañuymin jamun. Santo Espiritumanjina yuyaymantataj wiñay causay allillanpi tiyacuywan jamun. <sup>7</sup> Sajra munaymanjina yuyayka Diospa contranta churacunpuni. Chayraycu Diospa camachiskasninta mana casunchu ni casuytapis atinchu. <sup>8</sup> Sajra munaymanjina causajcunaka ni jayc'aj Diosta cusichiya atincuchu.

<sup>9</sup> Kancunari mana sajra munaymanjinachu causashanquichej. Manachayrí Diospa Espiritunmanjina causashanquichej sonkoyquichejpi tiyacuskanraycu. Maykenpi mana Cristoj Espíritun tiyacunchu chayka, payka mana Cristo tachu. <sup>10</sup> Cristochus sonkoyquichejpi tiyacun chayka, cuerpo quichejka jucharaycu wañollja. Espiritunmanjinari causayniyoj canquichej chekanpaj khawaskasñamin caskayquichejraycu. <sup>11</sup> Dioska Jesusta causarichimorka Santo Espiritunejta. Chaywanpis sichus chay Espíritu sonkoyquichejpi tiyacun chayka, Dios kancunaj wañoj cuerpo quichejta causarichimonka chay sonkoyquichejpi tiyacoj Espiritunnejta.

### *Diospa wawasnin canchej*

<sup>12</sup> Chayraycu, hermanosníy, sajra munayninchej manaña camachiwanchejchu. Manaña chaymanjinaka causananchejchu tiyan. <sup>13</sup> Sichus sajra munaymanjina causanquichej chayka, wiñaypaj wañunquichej. Sitajchus sajra munaymanjina ruwanasta wañuchinquichej Santo Espíritoj atiyninwan chayka, wiñaypaj causanquichej.

<sup>14</sup> Ajina Diospa Espiritunnejta pusaska cajcunaka Diospa wawasnin cancu. <sup>15</sup> Diospa wawasnin canquichej Espiritunta kosuskayquichejraycu. Espirituntataj mana manchachicoj camachislla canayquichejpajchu jap'erkanquichej, manachayrí Diospa wawasnin canayquichejpaj. Chay Espiritunnejtataj cusiywan khaparinchej: ¡Munaska Tatáy! nispa. <sup>16</sup> Quiquin Espíritu sonkonchejpi willawanchej Diospa wawasnin caskanchejta. <sup>17</sup> Wawasnin caspataj Diospa wiñay

causay koskanta jap'ejcuna canchej. Cristowan cuscataj jap'isunchej sichus paywan cusca cay pachapi muchunchej chayka. Ajinamanta wiñaypaj paywan cusca jatunchaska casunchej.

*Diospa ruwaskasnin suyashan cachariska cayta*

<sup>18</sup> Chekamanta cunan muchushaskasnichejka ni imapischu cashan jakay jamoj jatunchaymanta niskaka. Chaypacha nokanchejpis jatunchaska rijqurisun Cristojo cutimuyninpi jatunchayninan cusca. <sup>19</sup> Diospa tucuy ruwaskasnis may munaywan suyashancu Diospa wawasninta Cristojo rijch'acuyninpi ricuchiska canancuta. <sup>20</sup> Chay ruwaskaska manamin paycunallamantachu yankhayachiskas carkancu. Manachayrí Dios chaycunata yankhayacherka runa juchallicojtin. Astawanpis cachariskas canancuta suyashancu. <sup>21</sup> Ruwaskas quiquintaj wañuy ismuy jap'iymanta cacharichiskas cankancu Diospa wawasninan cusca. Wawasnenka Cristojo sumaj rijch'acuyninpi cankancu. <sup>22</sup> Yachanchej: Tucuy ruwaskaska cusca cunancama phutiywan khaparishancu. Tucuy cuscataj nanaya apashancu onkocushaj warmijina. <sup>23</sup> Manatajmin chaycunallachu, nokanchej, Santo Espirituta jap'ejcunapis, uqhunchejpi phutiywan khaparishanchej. Espíritu mosoj causayta kowarkanchej. Chay causayri wiñay causayta konawanchejmanta uj seña cashan. Reparachiwanchejtaj cuerponchejta causarichispa wawasninpaj reconocenawanchejta. Chayta may munaywan suyashanchej. <sup>24</sup> Chayta suyaspa juchamanta cacharichiskas carkanchej. Ricuskatañaka manaña suyanchejchu. ¿Pitaj ricuskatañaa suyanmanrí? <sup>25</sup> Astawanrí mana ricuskatachus suyacunchej chayka, Diospi jap'icupsa cusikas munaywan suyacunchej.

*Diosman t'akaska runasninpaj Espíritun mañapushanpuni*

<sup>26</sup> Ajinallatataj pisi callpayo caskanchejta Santo Espíritu yanapawanchej. Nokanchejka manamin yachanchejchu imaynatachus Diosmanta mañacuna caskanta. Astawanrí chay Espiritullataj may munaywan mana parlay atina samaycunawan mañapuwanchej. <sup>27</sup> Sonkonchejta sut'ita rejsej Dioska yachan Espíritojo yuyayninta. Chayraycu Diospa munayninmanjina runasninpaj Espíritu mañapushanpuni.

*Cristojo rijch'acuyninman Dios wawasninta ruwawanchej*

<sup>28</sup> Chaywanpis Diosta munacojcunata yuyaskanmanjina wajyarka runasnin canancupaj. Yachanchejtaj Dios tucuy imaymanawan ruwaskanta paycunaj allinnincupaj yuyaskanta junt'anapajpuni. <sup>29</sup> Paycunataka manaraj cay pachata ruwashaspa ajllacorka. Causaynincupitaj Wawan Cristojo rijch'acuyninmanjina paycunata ruwayta yuyarka. Munarka Wawan ashqha hermanos uqhupi Curajnincu cananta. <sup>30</sup> Unayña ajllaska cajcunata wajyan. Wajyaskacunanta chekan ruwajcunata ruwan. Chekanta ruwajcunataj Wawanpa rijch'acuyninman ruwan. Wiñaypajtaj pusan paywan cusca lliphipej c'anchaypi causanancupaj.

*May jatunmin Diospa munacuynenka*

<sup>31</sup> Cunanka, chay jawa ¿imanisunmantaj? Dios nokanchejman sayacuwanchej chayka, ni pipis contranchejpi sayayta atinmanchu.

<sup>32</sup> Dioska munaska Wawantapis mana jarc'acorkachu. Astawanpis tucuy nokanchejraycu wañunapaj payta jaywarka. Chayraycu chekatapuni paywan tucuy ima allin cajta korillawasunchej. <sup>33</sup> Diospa ajllacuskasninta ni pi ch'ataya atinchu. Diosmin chekanpaj khawajka. <sup>34</sup> Ni pi juchachayta atiwanchejchu. Cristomin nokanchejpaj wañorka. Astawanpis wañuymanta causarimpun. Chaywanpis jatunchaska Dioswan cusca caspa nokanchejpaj mañapuwashanchej. <sup>35</sup> Ni imapis Cristojo munacuyninmanta t'akawasunmanchu —ni phutiy, ni llaquiy, ni nac'ariy, ni yarkhay, ni wajcha cay, ni peligropi cay, nitaj wañuchiyy chaupipi riqhuriypis. <sup>36</sup> Diospa palabranpis niwanchej, Cristoraycu wañunapaj waquichiskas cananchejta ima ratullapis. Ñac'ana ovejajina khawaska cajtinchejpis Cristomin wakaychawasun munacuywan. <sup>37</sup> Munacuwajninchey Cristonejtataj tucuy chay imasta atipallanchejpun. <sup>38</sup> Chayraycu seguro cani: Ni jayc'aj ni ima nokanchejta Diospa munacuyninmanta t'akayta atiwanchejchu —ni wañuy, ni causay, ni angeles, ni camachejcuna, ni cunan caj, ni jamoj caj, ni atiyniyojcuna, <sup>39</sup> ni janaj pacha atiy, ni cay pacha atiy, nitaj waj ruwaska imaspis Diospa munacuyninmanta t'akayta atiwanchejchu. Chay munacuyninta Señorninchej Cristo Jesusnejta ricuchiwanchej.

## 9

### *Diospa ajllaskan Israelmanta*

<sup>1-2</sup> Cristowan ujhaska chekata nishayquichej, mana llullacunichu, may llaquiska caskayta llajta-masisniyamanta. Sonkoypipis sinch'itapuni phuticuni paycunamanta. Cayka cheka caskanta sonko-yuyayniypi Santo Espíritu willawan. <sup>3</sup> Ajinapi noka quiuiypis munayman Cristomanta wiñaypaj t'akaska cayta hermanosniy llajta-masisniyta yanapanaypajka. <sup>4</sup> Paycunaka israelcuna cancu, Diospa ajllaska runasnin. Paycunaman atiyninta ricucherka. Munayninmanjina tratosninta camachiskasninta ima churarka. Payta yupaychanancuta yachacherka paycunawan caspa. Sumaj niskasnintapis paycunaman korka. <sup>5</sup> Paycunaka ñaupa tatasniycoj miraynin cancu. Paycunamanta Cristo runa cananpaj nacecorka. Payka tucuya Camachej Dios, wiñaypaj yupaychaskapis. Ajina cachun.

<sup>6</sup> Chayta nispaka mana ninichu Dios niskanta mana junta askantaka. Manamin tucuy israel runaschu Diospa ajllaskasnин cancu. <sup>7</sup> Abrahamka ashqha mirayniyoj. Astawanka mana tucuynincuchu cheka wawasninpaj yupaskas cancu. Manachayrí Diospa sumaj niskanmanjina cajcunalla yupaskas cancu. Palabranpis nin: "Isaacnejta ajllaska miraynenka jamonka". <sup>8</sup> Ajinapi mana aychamanjina miraymantachu Diospa runasnin cancu. Manachayrí Diospa sumaj niskanmanjina cajcunalla miraynin cancu. <sup>9</sup> Diospa sumaj niskanka caytamin Abrahamman nin: "Jamoj watapi atiyniyya ricuchisaj. Warmiyqui Sarataj wawayoj canka", nispa.

<sup>10</sup> Nitaj cayllachu: Rebecajtapis mellizos nacecorkancu. Chay wawaspa tatancoka Isaac, ñaupa tataycu. <sup>11</sup> Manaraj nacecushajtinctaj ni sumajta ni sajrata ruwashajtincu Dioska ujta paycunamanta ajllarka. Chayta ruwarka ajllaskan yuyaskanmanjinapuni cananpaj. <sup>12</sup> Mana runaj ruwaskanmantachu carka. Manachayrí Diospa ajllaskanmanjinapuni carka. Rebecamanpis nerka: "Curajka sullc'aj camachin canka",

nispá. <sup>13</sup> Chayka palabranpi Dios niskanmanjinamin: “Jacobta munacorkani, Esautataj chejnicorkani”, nispá.

*Dioska munayninmanjina runata qhuyan*

<sup>14</sup> Cunanka ¿imanisumantaj? ¿Dioska mana chekan ruwaj nisunchu? <sup>15</sup> ¡Ni imaynamanta! Moisesmanpis nerkapuni: “Munayniymanjina runasta qhuyacusaj, munayniymanjinataj runasta yanapasaj”, nispá. <sup>16</sup> Chayraycu Diospa yanapaynenka mana runaj munayninmantachu nitaj runaj ruwayninmantachu. Manachayrí Diospa qhuyacuyninmanta. <sup>17</sup> Palabranpipis Faraonman nin: “Kannejta atiynyta ricuchinapaj camachejta churarkayqui. Ajinapi tucuy cay jallp'a patapi runas Dios caskayta yachankancu”, nispá. <sup>18</sup> Chayraycu Dioska munayninmanjina runata qhuyacun, munayninmanjinataj runaj sonkonta rumiyachin.

<sup>19</sup> Ajina cajtenka tapuwanquichá: Ni pi munayninta jarc'ayta atejenka ¿imaraycutaj Dioska runata juchachanrí? nispá. <sup>20</sup> Kanrí runa caspa Dioswan churanacuytaka mana atiwajchu. Mancapis mana ruwajninman niyta atinmanchu: “¿Imaraycutaj ajinata ruwawanquirí?” <sup>21</sup> Ruwajka uj t'urullamanta mancata ruwayta atin sumaj cajpajpis chayrí pisi cajpajpis.

*Israelmantapis waj llajtayojcunamantapis Dios wajyawanchej*

<sup>22</sup> Chantapis Dioska juchapaj phiñacuyninta atiynintapis ricuchiyta munaspa juchasapasta unaymantapacha muchullarka. Paycunaka juchancuwan tucuchicuya waquichicuncu. <sup>23</sup> Dioska munarkatajmin ricuchiyta qhuyacuskasninman khapaj atiyninta. Paycunata wiñay causapaj unaymantapacha waquierka. <sup>24</sup> Paycunatapis nokanchejtapis wajyawarkanchej, mana israelcunallamantachu, manachayrí waj llajtayojcunamantapis. <sup>25</sup> Oseaspa kelkaskanpi Dios ninjina: Mana runasniy cajcunata, ajllaska runasniy nisaj.

Mana munaska cajcunatapis munacusaj.

<sup>26</sup> Ujnejipipis waj llajtayojcunaman nerka:  
“Mana runasniychu canquichej”.

Chayllapitaj renka: “Causashaj Diospa wawasnin niskas cankancu”, nispá.

<sup>27</sup> Israelcunamantarí Diospa unay willajnin Isaiska rimarka: “Israelcuna t'iojina ashqha cajtincupis pisi puchojlla causanancupaj cachariskas cankancu. <sup>28</sup> Señorka chekanta uskhaytatajmin tucuy niskanta junt'anka cay pachata tucuchispa”. <sup>29</sup> Sut'inchallarkataj Isaiska:

Tucuya atipaj Señor Dios pisi runasta sakepuwarkanchej puchojtajina. Sichus mana sakepuwasunmanchu carka chayka, Sodoma, Gomorra llajtasjina tucuchiska casunman carka, nispá.

*Ruwaskancunejta israelcunaka chekan cayta masc'ancu*

<sup>30</sup> Cunanka chay jawa ¿imanisumantaj? Waj llajtayojcunaka chekan cayta mana khatispalla tariparkancu. Diospi jap'icuynejtamin chay chekan cayta tariparkancu. <sup>31</sup> Israelcunari chekan cayta tarinapaj imay-mana ruwaycunata\* khatispa mana tarerkancuchu, <sup>32</sup> mana Diospi jap'icuynejllata khatiskancuraycu. Manachayrí ruwaskasnincuwampis tarincumanjina masc'arkancu. Chayraycu urmarkancu misc'ana rumipi. <sup>33</sup> 10.15 Ajinatatajmin Diospa palabranpi nin:

\* 9:31 Literal: camachiskasta.

Sion llajtaypi misc'ana rumitajina churani.

Chay rumipi runas urmancu. [Cristo chay rumeka.]<sup>†</sup>  
Paypi jap'icojka niskasninta junt'askanta riconkapuni.

## 10

<sup>1</sup> Hermanosníy, tucuy sonkoywan munani israelcuna juchachay-manta cuchariskas canancuta. Chaypaj Diosmanta mañacunipuni.  
<sup>2</sup> Paycunamanta allinta yachaspa willayquichej: Mayta munancu Dios jatunchaska cananta, astawanrí mana cheka yachaymanjinachu.  
<sup>3</sup> Diospa chekan caynintaka manamin rejserkancuchu. Paycunaj chekan caynincuta sayachicuya munaspataj Diospa chekan cay koricuyninta khesacharkancu. <sup>4</sup>Cristomin Diospa camachiskasninta tucuya junt'arka. Chayraycu tucuy paypi jap'icojcunata chekanpaj Dios khawanka.

### *Jesucristonejllata runaka juchamanta cuchariska*

<sup>5</sup> Camachiskasta ruwananejta chekan caymanta parlaspa Moisés kelkarka: “Camachiskasta junt'ajka ruwaskannejta causanka”.  
<sup>6</sup> Astawanrí Diospi jap'icuyneta chekan caymantataj palabranpi ajinata nin: “Ama sonkoyquipi tanteyacuychu ¿pitaj janaj pachaman wicharenkari?” nispaka. Chayka Cristota uracycuchimuymin. <sup>7</sup>“Amataj tanteyacuychu ¿pitaj uqhu pachaman urayconkari?” nispaka. Chayka Cristota wañuymanta causarichimuymin. <sup>8</sup> Astawanka ajinata nin: “Diospa niskan kanpa kayllayquipi cashan, simiyquipi, sonkoyquipipis”, nispaka. Cayka Diospi jap'icuymanta willaraskaycumin.  
<sup>9</sup> Runaspa ñaupakencupichus Jesuska Señorniyqui caskanta willanqui, sonkoyquiwantajchus creenqui Dios wañuymanta causarichimuskanta chayka, pay cucharichisonka. <sup>10</sup> Runaka Diospi sonkonwan jap'icun chekanchaska cananpaj; Jesuska Señornin caskantataj siminwan willacun juchamanta cuchariska cananpaj.

### *Señormanta mañacojta juchanmanta cacharenka*

<sup>11</sup> Diospa palabranka ninmin: “Tucuy paypi jap'icojka Dios niskanta junt'askanta riconkapuni”. <sup>12</sup> Diospajka israelcunapis waj llajtayocunapis quiquillan cancu tucuypa Señornincu caskanraycu. May quhuyacuynijojtaj tucuy paymanta mañacojcunapajka. <sup>13</sup> Palabranpipis nin: “Señormanta mañacojcunata tucuynincuta juchancumanta cacharenka”, nispaka. <sup>14</sup> Astawanrí runaska Señorpi jap'icuspalla paymanta mañacuya atincu. Señormanta uyaris pallataj paypi jap'icuya atincu. Señormanta paycunaman willarajtillantaj uyariyta atincu. <sup>15</sup> Cachamuska caspallataj willarajka sumaj willanasta paycunaman willarayta atin. Diospa palabranpi niskanmanjina: “Diosman allinyachiyimanta sumaj willanaswan cachamuska cajcunaka may cusiywan jap'iskamin”.\*

### *Sumaj willanas tucuypaj*

<sup>16</sup> Astawanrí mana tucuychu sumaj willanasta casorkancu. Isaiaska kelkaskanpi nin: “Señorníy, pisisslla willanasniycuta jap'icorkancu”, nispaka. <sup>17</sup> Ajinaka Diospi jap'icuya sumaj willanasta uyariy manta ja-mun. Sumaj willanastaj Cristoj niskashinmin.

† 9:33 Ninayan. \* 10:15 Literal: c'acha chaquisniyoj.

<sup>18</sup> Chanta ¿manachu uyarincuman carka? ¡Uyarerkancupuni! Dios palabranpipis nin:

Tucuy cay pachapi willanasta uyarerkancu.

Maycunapichus runa tiyacun chaycama niskasnincu chayarka.

<sup>19</sup> Chayta israelcunaka ¿mananchu repararkancu? Reparancupuni carka.

Chaymanjinamin ñaupajta Moiseska Diospa niskanta mana casucoj israelcunaman kelkarka:

Pisipaj khawaska runaswan envidiachiskayquichej.

Mana yuyayniyoj runaswantaj phiñapayachiskayquichej.

<sup>20</sup> Chanta Isaiaspis mana p'enkacuspa kelkallarkataj Diospa niskanta:

Mana masc'awajcuna tariwarkancu.

Mana nokamanta tapucojcunamantaj sut'inchacorkani.

<sup>21</sup> Israelcunamantari Dios nerka: "P'unchaynintinta munacuywan wajyarkani cay mana casucoj churanacoj runasta".

## 11

### *Israelcunamanta puchojta Dios ajllan*

<sup>1</sup> Cunanka ¿Dios runasninta khesachaporkapunichu? ¡Ni imaynamanta! Nokapis israel runamin cani, Abrahampa mirayninmanta, Benjamín ayllumantapis. <sup>2</sup> Manaraj cay pachata ruwashaspa Dioska yuyarka runasninta wajyayta. Paycunataka mana tucuytachu khesacharka. Yachanquichejchá kelkaskata. Unay willajnin Eliasca israelcunaj contranta rimaspa Diosman nin: <sup>3</sup> "Señorní, willajcunayquita wañucherkancuña, yupaychanasniyquitapis urmacherkancuña. Noka sapallayña khepani. Wañuchiwaytatay munancu", nispa. <sup>4</sup> Astawanapis Dioska Eliasman cuticherka: "Kanchis waranka kharis khepapuwancuraj nokata yupaychanawancupaj. Paycunaka Baal sutichaska ruwaska diosman ni jayc'aj konkoricorkancuchu", nispa. <sup>5</sup> Ajinallataj cunan p'unchaycunapi cashan. Israelcunamanta puchojta Dios c'acha yanapayninmanjina ajllacun. <sup>6</sup> Sitajchus c'acha yanapayninnejta runasta ajllacun chayka, manaña ruwaskasnincunejtachu. Mana ajina cajtinri c'acha yanapaynenka mana khasillamantachu canman.

<sup>7</sup> Chayraycu ajina cashan: Israelcunaka masc'askancuta mana tarerkancuchu. Paycunamanta chay pisi puchojtarí Dios ajllarka chekan cayta tarinancupaj. Ashqhastaj rumi sonkos tucorkancu. <sup>8</sup> Palabranpi ninjina: "Mana casuskancuraycu sumaj willanaspaj sonkoncuta Dioska tunuyacherka. Ajinapi ñawisnincuwan mana ricuyta atincuchu. Ningrisnincuwantaj mana uyariyta atincuchu cunancama". <sup>9</sup> Diospa palabranpi Davidpis nillantaj:

Fiestancu paycunata urmachichun, ch'ipajina jap'iycuchun.

Misc'anataj cachun mana casuskancumanjina muchunancupaj.

<sup>10</sup> Ñawisnincu lakhayachun ama ricunancupaj.

Llasa juchancu wasancuta c'umuycuchichunchupuni.

[Ajinata nin Moisespa camachiskasnillanpi confiacapuskancuraycu.]\*

### *Israelcunaj Diosman cutircunancumanta*

<sup>11</sup> Cunanka ¿israelcuna pantaynincuwan wiñaypajpunichu urmaporkancu? ¡Ni imaynamanta! Astawanrí pantaynincunejeta wajllajtayojcuna wiñay causaypaj cachariskas cankancu cusiconkancutaj

\* **11:10** Ninayan.

Cristowan ujchaska. Ajinapi israelcunata chay cusiyka envidiachinman Diosman cutirinancupaj.<sup>12</sup> Paycunaj pantaynincunejta runas tucuy cay pachapi sumaj willanasmanta cusicuncu. Israelecunaj atipachicuynincuwanchus waj llajtayojcuna cusicuncu chayka, may cusiy canka israel aylluntin cutirejtin.

<sup>13</sup> Cunanka kancuna waj llajtayojcunaman niyquichej: Kancunapaj Cristojo cachan cani. Cay ruwayniya sumajpaj khawani.<sup>14</sup> Cay ruwaynejta imaynallamantapis israel hermanosniya envidiachiyyta munani waquenka Cristopi jap'icunancupaj.<sup>15</sup> Paycunaj carunchacuynincuwan cay pacha runas Diosman allinyachiskas cancu. Ajinallataj israelecunaj Diospa camachiyninman yaycuskancoka wañuymanta causarimuy canka.<sup>16</sup> Ñaupa tatasniycuchus Diosman t'akaska cancu chayka, tucuy israel ayllupis quiquillantaj canka. Sumaj saphiyoj sach'aka sumaj ramasniyojllatajmin.

### *Olivio sach'amanta quiquinchana*

<sup>17</sup> Quiquinchanapaj nisun israelecuna uj olivo sach'ajina caskancuta. Waquenka mana Diospi jap'icuspa sach'amanta c'ajllaska ramamanjina tucorkancu. Waj llajtayojcunataj uj q'ita olivo sach'ajina cancu. Kan waj llajtayojtaj, Diospi jap'icuspa c'ascachiska ramajina canqui. Olivo sach'aman c'ascaskayquimanta allin uywaska canqui.<sup>18</sup> Chayraycu amaña jatunchacuychu israelecunamanta. Astawanpis yuyariy ramataka saphi causachin, manataj ramachu saphita causachin.

### *Waj llajtayojcuna llamp'u sonko canancu tiyan*

<sup>19</sup> Ninguchá: "Dios israelecunata khesacharka noka paypa runan canaypaj", nispa.<sup>20</sup> Khaway: Paycunata khesacharka mana jap'icuskancuraycu. Kanrí paypi jap'icuspalla allinta sayashanqui. Ajinaka ama jatunchacuychu, astawanpis Diosta manchachicuy.<sup>21</sup> Sichus Dios khesacharka israel runasninta chayka, kantapis khesachallasunquimantaj.<sup>22</sup> Yuyaricuy Dioska qhuyacuynijoymín. Astawanpis juchapaj chekanta phiñacoj caskanta. Urmajcunapajka phiñacuynijoymín. Kanpajrí qhuyacuynijo paypa qhuyacuyninpi sayajtiyqui. Manachus paypi jap'icuspa sayawaj chayka, khesachaska canqui.<sup>23</sup> Paycunachus Diosman cutiricapuncuman paypi jap'icuspa chayka, ujewan paycunaman qhuyacuyninta ricuchenka. Chekamanta Dioska atin paycunata watejmanta sayarichiyyta.<sup>24</sup> Kan waj llajtayojcashajtiyquipis Cristowan ujchasorka qhuyacuyninwan. Ajina cajtenka may astawanraj unaymanta wajyaska israelecunanman Dios qhuyacuyninta ricuchenka.

### *Israel ayllu juchanmanta cachariska*

<sup>25</sup> Hermanosníy, Diospa cay pacaska yuyayninta yachanayquichejta munani ama kancunalla jatunchacunayquichejpaj. Israelecunaman-taka mana tucuychu rumi sonkos tucorkancu. Nitaj ajinallapunichu cankancu. Astawanrí waj llajtayojcunaka sumaj willanasnejta Diosman cutirinancucamalla ajina tunuyaskas cankancu.<sup>26</sup> Chanta tucuy Israel ayllu juchanmanta cachariska caspa Diosman cutirenka. Dios palabranpi ninjina:

Sion llajtamanta Cacharichej llojsenka.

Payka sajra ñanmanta Israelta cutirichenka.

<sup>27</sup> Chay Cacharichejnejtataj tratopta Israelman junt'asaj, juchasninta khechuspa.

<sup>28</sup> Sumaj willanasmanjinaka israel ayllu Diospa enemigonjina tucorka kancunaj allinniyquichejpaj. Diospa ajllacuyninmanjinari ñaupa tatasniycuraycu chay aylloka Diospa munacuskan. <sup>29</sup> Dios c'achapuni caspa churaska atiynintapis wajyaskantapis manamin jayc'aj konkapunchu. <sup>30</sup> Kancunaka ñaupa tiempospi mana casucojcuna carkanquichej. Cunanri Dios qhuyacusorkachej israelcuna mana casucuskancuraycu. <sup>31</sup> Paycunaka cunan mana casuncuchu. Astawanri cutirejtincu Dios paycunata qhuyaonkapuni kancunatajina. <sup>32</sup> Dioska tucuytamin mana casucojcunapaj yuparka waj llajtayojcunatapis israelcunatapis. Chayta ruwarka tucuyman qhuyacuyninta ricuchinanpaj.

*Dios wiñaypaj jatunchaska cachun*

<sup>33</sup> ¡May chhica munacuynijo ni jayc'aj tucucojtaj Diospa yuyaynimpis yachaynimpis! ¡Yuyaskasnenka ni jayc'aj yachay atina! ¡Ruwaynintaj mana entiendey atina! <sup>34</sup> Palabranpi nin:

Ni pi Señorpa yuyaskasninta yachanchu.

Ni pi payta yuyaycharkachu.

<sup>35</sup> Ni pi ni imata payman korkachu paymanta ujtawan mañacapunanpaj.

<sup>36</sup> Tucuy imamin paymanta Paynejta paypajtaj cashan. Jatunchaska cachun wiñaypa wiñaynimpaj. Ajina cachun.

## 12

*Causayniyquichejta Diosman jaywacuychej*

<sup>1</sup> Hermanosny, Dios mayta qhuyacuwaskanchejraycu cayta mañacuyquichej: Causashaj jaywanatajina t'akaskata\* Diosta cusichinapaj cuerpoquichejta payman jaywacuychej. Chaymin tucuy sonkowan Diosta yupaychayniyquichejka. <sup>2</sup> Amañataj cay pacha manacaj runas causancu ajinataka causaychejchu. Astawanpis sonkoyquichejpi yuyayniyquichejpi mosojyachiskas caychej Diospa munayninta yachanayquichejpaj. Munaynenka cosa, c'acha, may sumajtaj cashan tucuy imapaj.

*Diosman t'akaska runasnin chaupipi ruwanasmana*

<sup>3</sup> Dios c'achata yanapawarka cachan canaypaj. Ajina cachanpaj churaska sapa ujman nishayquichej: Ama jatunchacuychejchu maychus cananmanta astawanka. Manachayrí cheka yuyaywan khawacuychej. Sapa ujman yuyaskanmanjina Dios atiyta kon runasnin chaupipi ruwananpaj. Chaymanjina khawacuychej. <sup>4</sup> Yachanchej, cuerpopeka maquis, chaquis, uma ima capuwanchej. Chay tucuyrí mana uj ruwanayoillachu cancu. <sup>5</sup> Ajinallataj tucuy nokanchejpis Cristowan ujhaska uj cuerpolla canchej. Sapa ujtaj purajmanta ujhaska canchej.

<sup>6</sup> Dios c'achata yanapawaskanchejmanjina ashqha imaymana atiyucanayoj canchej. Runasnin chaupipi Dios atiyta sapa ujman kowarkanchej ruwananchejpaj. Ujman atiyta korka willarananpaj. Chay atiymanjina willarachun. Wajman atiyta korka runasninta yanapananpaj.

<sup>7</sup> Chay atiymanjina yanapachun. Yachachejka atiy koska caskanmanjina yachachichun. <sup>8</sup> Yuyaychajka atiy koska caskanmanjina yuyaychachun. Pisichicoj runasman kojka cheka sonkowan kochun amataj puraj uya

\* **12:1** Literal: santo.

caywanka. Camachejka allin yuyaywan camachichun. Qhuyacuywan runasta yanapajka cusiywan yanapachun.

*Runa-masiwan ruwanasmana*

<sup>9</sup> Cacha munacuyniyquichejka ama puraj uya caymanta cachunchu. Sajra cajmanta carunchacuspa allin cajman c'ascaychej. <sup>10</sup> Munanacuychej c'acha familiajina. Respetanacuypeka ñaupaj caychej. <sup>11</sup> Sumaj ruwanaspi c'uchi caychej. T'icarishaj sonkowanpunitaj Señorninchejpaj llanc'aychej. <sup>12</sup> Cusiywan Diospi confiacuychej llaquiytataj muchuychej. Diosmantataj mañacullaychejpuni. <sup>13</sup> Diospa runasnin pisichicotjincu munacuywan yanapaychej. Wasiyquichejman wajyariyta yachaychej. <sup>14</sup> Kancunata llaquichejcunapaj Diosmanta mañapuychej. Diosmanta mañapuychej, amataj niychejchu Dios paycunata tucuchinantaka. <sup>15</sup> Cusicojcunawan uj familiajinalla cusicuychej; wakajcunawanpis wakaychej. <sup>16</sup> Uj sonkolla kancunapura caychej. Mana jatunchacuspalla llamp'u sonkoyojcunawan cuscachacuychej. Ama kancunallaka yachayniyoj cawajchejjinaka khawacuychejchu.

*Enemigoswan ruwanasmana*

<sup>17</sup> Ama sajramanta sajrallatatajka cutichiychejchu. Ruwaskas-niyquichej tucuy runaspa ñaupakencipi c'acha cachun. <sup>18</sup> Atiskayquichejmanjinataj tucuy runaswan allinpi causacuychej. <sup>19</sup> Munaska hermanosní, runas kancunaman sajrata ruwasojoitiyquichej ama cutichiychejchu. Astawanpis Diosllaman sakeychej. Palabranpi Señorninchejka nin: "Sajrata ruwajman ruwaskasninanmajina cutichiyka nokamantamin". <sup>20</sup> Nillantaj: "Enemigoysi yarkhachicojtin miqhunata koy. Ch'aquichicotin payman ujyanapaj koy. Chayta ruwajtiyqueka p'enkaricuspa phutiriconka". <sup>21</sup> Amataj sajra ruwaskaswan atipachicuychejchu. Manachayrí sumaj ruwaskaswan sajra cajta atipaychej.

## 13

*Camachejcunata casuychej*

<sup>1</sup> Sapa uj runa autoridadcunata casuchun. Autoridad cajka Diosllamantamin. Tucuy runapis atiyniyojka atiyninta camachinanpaj Diosllamanta jap'in. <sup>2</sup> Chayraycu autoridadadpa contranpi churacojka Diospa churaskanta mana casunchu. Mana casojcunataj juchachaska cankancu. <sup>3</sup> Allin cajta ruwajka mana manchachicunanchu tiyan camachejcunataka. Manachayrí mana allin cajta ruwaj manchachicunan tiyan. Autoridadmanta mana manchachicuspa causacuytachus munanqui chayka, allin cajta ruway. <sup>4</sup> Chanta pay mentasonka. Payka Diospa camachinmin kanpa allinniyquipaj. Mana allintachus ruwasparí manchachicuy. Yachanchej, tucuy autoridadadka manamin yankhapaj churaskachu, juchamanjina muchuchinpuni. Payka Diospa camachinmin mana allinta ruwajcunata Diospa phiñacuyninwan cutichinanpaj. <sup>5</sup> Chayraycu casunayquichej tiyan manataj phiñacuya manchachicuyraycullachu astawanka sonko-yuyayraycupis. <sup>6</sup> Chayraycutaj paycunaman impuestota paganquichej. Paycunaka Diosmanta churaskas cancu cay imaspi ruwanallancupajpuni. <sup>7</sup> Obligacionniyquichejta tucuyman junt'aychej.

Impuesto jap'ejman impuestota pagaychej. Ruwanata churajtincu chayta ruwaychej. Autoridadta autoridadpaj khawayachej. Curajtataj curajpaj khawayachej.

*Munacojka camachiskasta junt'an*

<sup>8</sup> Ama pimanpis ni ima manun caychejchu, aswanka munanacuyllamanta. Munanacuymanta caj manullata tucuyman junt'aychej atiskayquichejmanjina. Runa-masinta munacojka Diospa tucuy camachiskasninta junt'anmin. <sup>9</sup> Camachiskaska ninmin: "Ama khenchachacuychu, ama runata wañuchiychu, ama suwaychu, ama llullacuspa runata juchachaychu, amataj waj runaj capuyninta munapayaychu". Sitajchus waj camachiska canman chaypis, chay camachiskaka caypi junt'acun: "Runa-masiyquita munacuy kan quiuiyquitajina". <sup>10</sup> Munacojka mana sajrata ruwanchu runa-masinta; chayraycu munacojka camachiskasta junt'anpuni.

*Cristoj cutimuynin kayllapiña*

<sup>11</sup> Munanacuspa causaychej. Yachanchej Cristo cutimunanpaj cunan pisi tiempollaña caskanta. Chayta yachaspa rijch'ariskas cananchej tiyan. Mosoj causaya kallariskanchejmantapacha cunan aswan kayllapiña canchej chay cacharina p'unchayman. <sup>12</sup> Cay pacha causayka tutajina tucucapushan. Nokanchejpajri wiñay causay p'unchay sut'iaymushanña sumaj c'anchaywan. Chayraycu cay pacha sajra ruwanasta sakepunachej, lakhamanta manacaj caskanraycu. Astawanrí sumaj imasta ruwanachej, Diospa c'anchayninwan p'achalliskasjina. <sup>13</sup> Paypa sumaj c'anchayninpajina allinta purinachej. Manataj purinachu ch'ajwa fiestaspí, ni machaycunapi, ni khenchachacuycunapi, ni millay ruwaycunapi, ni phiñanacuyapi, nitaj envidianacuyipipis. <sup>14</sup> Astawanrí Señorninchej Jesucristowan ujchaskalla causaychej. Amataj yuyaychejchu cay pacha sajra munayta sajsachiyta.

## 14

*Hermanoyquita ama khawaraychu*

<sup>1</sup> Pisitaraj Diospi jap'icoj hermanota allinta jap'iychej. Amataj yuyaskasninemanta churanacuy cachunchu. <sup>2</sup> Uj hermanoka yuyan tucuy laya miqhuna allin caskanta miqhunapaj. Ujtaj, pisitaraj Diospi jap'icuspa, aychata mana miqhunchu. <sup>3</sup> Chay tucuy layata miqhojka ama pisipaj khawachunchu mana aychata miqhojta. Mana aychata miqhojpis ama khawarachunchu tucuy layata miqhojta. Paytapis Diosmin wajyarka. <sup>4</sup> ¿Pitaj kan canqui wajpa uywaskanta khawaranayquipajri? Quiquin Señorninpa ñaupakenpi sayan chayrí urmanpis. Arí, sayanka, Señor payta sayachiyta atiskanraycu.

<sup>5</sup> Chaywanpis uj hermano yuyan uj p'unchay aswan sumaj caskanta waj p'unchaycunamanta. Ujtaj yuyan tucuy p'unchaycuna Diosman t'akaskas caskanta. Chayjina imasmantaka sapa uj yuyaynippi allin sayaska cachun. <sup>6</sup> Jatun p'unchaypaj khawajka ajinata khawan Señorta jatunchananpaj. Mana jatunpaj khawajpis ajinata ruwan Señorta jatunchananpaj. Tucuy imata miqhojpis miqhun Señorta jatunchananpaj, Diosman graciasta koskanraycu. Aychata mana miqhojpis Señorta jatunchananpaj aychata mana miqhunchu. Paypis Diosman graciasta kon.

<sup>7</sup> Nokanchejmanta manamin pipis payllapaj causanchu nitaj payllapaj wañunchu. <sup>8</sup> Sichus causanchej chayka, Señorta jatunchananchejpaj causanchej. Sitajchus wañunchej chayka, Señorta jatunchananchejpaj wañunchej. Ajinapi causasunmanpis chayrí wañusunmanpis Señorman t'akaska runasnin canchej. <sup>9</sup> Chaypajmin Cristo wañorka causari-morkataj camachinawanchejpaj wañuskacunatapis causashajcunatapis.

<sup>10</sup> Kan ¿imaraycutaj hermanoyquita khawaranquirí? ¿Imaraycutaj hermanoyquita pisipaj khawanquirí? Jakay jamoj juicio p'unchaypi Diospa ñaupakenpi tucuy riqhurinanchej tiyan. <sup>11</sup> Palabranpi Señor cayta nin: Noka causaj cani.

Ñaupakeypitaj tucuy runa konkoriconka.

Tucuy simitaj Dios caskayta willaconka.

<sup>12</sup> Ajinaka sapa uj nokanchejmanta Diosman ruwaskasninemanta cuen-tata konka.

### *Hermanoyquita ama urmachiychu*

<sup>13</sup> Chayraycu amaña nokanchejpura khawaranacunachu. Astawanri caymanta allinta khawacuychej: Ama pipis urmachina imawan her-manonta juchallichichunchu. <sup>14</sup> Señor Jesuswan ujchaska caspa chekata yachani ni imapis payllamanta mana allinpaj khawanapaj caskantaka. Uj ima mana allinpaj khawanapaj caskanta yuyajllapaj ajina cashan. <sup>15</sup> Sitajchus kan miqhuna jawa hermanoyquita phutichi-waj chayka, manamin munacuymanjinachu purishanqui. Paypajpis Cristo wañorka. Chayraycu ama miqhuskayquiwan payta chincachiy-chu. <sup>16</sup> Kancunapaj chay allin cajka ama sajrata parlanancupajchu cachun. <sup>17</sup> Manamin miqhunachu nitaj ujyanachu ricuchin Dios causaynincheta camachiskantaka. Astawanpis causanchej chekanta ruwaspa, nokanchejpura allinpi cacuspa, cusicuspataj Santo Espiritune-ja. <sup>18</sup> Ajinata Cristota casuspamin Diosta cusichinchet runaspis allinpaj khawawanchej.

### *Hermanoyquita mosoj causayninpí tucuy atiskayquiwan yanapay*

<sup>19</sup> Chayraycu allillanpi cacuya mosoj causaypi wiñachinacuytawan tu-cuy atiskanchejwan masc'anachej. <sup>20</sup> Chay mosoj causayka Diospa ruwaskanmin. Chayta ama tucuchiychu miqhunaraycoka. Chekata-puni tucuy miqhunaka allinmin. Astawanri mana allinchu runapaj miqhuskanwan urmananka. <sup>21</sup> Allinmin mana aychata miqhuyska ni-taj vinota ujyayka nitaj mayken urmachej imata ruwaypis. Imachá hermanoyquita juchallichinman chayrí Diospi jap'icuyninpí pisiyach-inman, chayta ama ruwaychu. <sup>22</sup> Sumajta Diospi jap'icuspa chay jap'icuyniyquimanjina Diospa ñaupakenpi causacuy. Cusiska canqui ruwaskasniyquipi mana iscayrayaspaka sonkoyqui mana juchacha-suskanraycu. <sup>23</sup> Astawanpis iscayrayaspas miqhojka juchachacun mana Diospi jap'icuspa miqhuskanraycu. Tucuy mana Diospi jap'icuymanta ruwaskaka juchamin.

<sup>1</sup> Nokanchej sumajta Diospi jap'icojcunaka pisi jap'icuyniyoy hermanospa iscayrayaynincuta muchucunanchej tiyan yanapaspa. Amataj yuyaskasniñchejmajina ruwaspa nokallanchejtaka cusichicunanchejchu. <sup>2</sup> Astawanpis sapa ujníncanjej runa-masinchejta cusichicunanchej tiyan allinninpaj payta wiñachinanchejpaj. <sup>3</sup> Cristopis manamin payllatachu cusichicorka. Diospa palabran causaynippi junt'acorka: "Camisojcunaj c'amisuskancuta noka muchorkani", nispa. <sup>4</sup> Imapis ñaupa tiempospi kelkaska cajka yachachinawanchejpaj kelkaska carka. Ajinapi sinch'ita sayanchej Dios niskanta junt'ananta suyaspa, palabranwanpis sonkochacuspa. <sup>5</sup> Dioska llaquiyta muchuypi callpachaj sonkochajtaj. Paymantataj mañacuni uj yuyayniyojlla canayquichejpaj Cristo Jesuspa yachachiskanmanjina. <sup>6</sup> Ajinapi uj sonkolla uj simillataj Señorninchej Jesucristoj Diosnin Tatanta yupaychanquichej.

*Dios qhuyacuyninta tucuyman ricuchin*

<sup>7</sup> Chayraycu kancunapura mana khawaranacuspa ujpis ujpis munacuywan jap'inacuychej. Imaynachus Cristopis kancunata jap'isorkachej Diosta jatunchananpaj, ajinata ruwaychej. <sup>8</sup> Chayta niyquichejmin: Cristoka jamorka israelcunata yanapananpaj. Paynejta Dios niskasninta ñaupa tatasniycuman junt'arka cheka caskanta ricuchinanpaj. <sup>9</sup> Cristonejta yanapaspataj Dioska waj llajtayojcunamanpis qhuyacuyninta ricucherka paycunapis payta jatunchanancupaj. Palabranpi ninjina:

Qhuyacuyniyquiraycu kanmanta willasaj waj llajtayojcuna chaupipi. Sutiyquitataj taquinaswan yupaychasaj, nispa.

<sup>10</sup> Ujtawan nin:

Waj llajtayojcuna cusicuychej paypa runasnинwan cusca.

<sup>11</sup> Waj llajtayojcunaman nin:

Tucuy kancuna Señorta jatunchaychej.

Tucuy runastaj payta yupaychachuncu, nispa.

<sup>12</sup> Ujtawanpis unay willajnin Isaías nillantaj:

Isaipa ayllunmanta Camachejka jamonka waj llaytayojcunata camachin nanopaj.

Waj llajtayojcunataj juchancumanta cachariskas canancupaj paypi confiaconcancu.

<sup>13</sup> Dioska paypi confiacuya yachachiwajniñchejmin. Chayraycu munani tucuy cusiyan junt'a payman allinyaskastaj canayquichejta paypi jap'icuskyquichejraycu. Ajinapi Santo Espíritoj atiyninwan astawan astawan confiacullanquichejpuni Dioska niskanta junt'ananta.

*Pabloka Cristoj cachanmin waj llajtayojcunapaj*

<sup>14</sup> Hermanosniy, noka seguro cani kancunaka c'acha sonkoyojo caskayquichejmanta. Imaymana yachaywan junt'a canquichej purajmanta yuyaychanacunayquichejpajpis waquichiskas.

<sup>15</sup> Chaywanpis yuyarichinapaj waquin imasmanta mana p'enkaspa kelkamorkayquichej c'acha Dios yanapawaskanmanjina.

<sup>16</sup> Chaymanjinataj Cristo Jesuspa camachin cani Diospa sumaj willanasninta waj llajtayojcunaman willaranaypaj. Ajinapi paycuna Santo Espiritunejta payman t'akaska llimphuchaskataj uj jaywanajina cankancu. Chaymin Diosta cusichin.

<sup>17</sup> Chayraycu Cristo Jesuswan ujchaska caspa Diospaj ruwanaypi cusicuni. <sup>18</sup> Manamin waj runamantachu parlashani. Astawanrí Cristo nokanejta ruwaskanmanta parlashani. Niskaypi ruwaskaypipis pay callpachawarka waj llajtayojcuna payta casunancupaj. <sup>19</sup> Cristoj atiyninta ricuchinaypaj jatuchej t'ucuna ruwanaswan willararkani Santo Espíritoj atiyninwan. Ajinamanta Jerusalenmantapacha tucuynnejpi Ilírico jallp'acama Cristoj sumaj willanasninta willarayta junt'arkani. <sup>20</sup> Maytapuni willarayta munarkani manaraj Cristomanta uyarejcuman, ama wajpa kallariskanman yaycunaypaj. <sup>21</sup> Astawanka Diospa palabranmanjina ruwayta munani. Nin:

Mana willaska cajcuna payta rejsenkancu.

Mana uyarejcunataj paymanta entiendenkancu, nispa.

### *Pablo Romaman watucoj riyta yuyan*

<sup>22</sup> Chay willaranayta junt'anayraycumin kancunata watucunaymanta ashqha cuti jarc'aska carkani. <sup>23</sup> Cunanrí cay jallp'aspi chay ruwanaypaj manaña campo canchu. Unay watasmantapacha kancunataj watucuya mayta munashani. <sup>24</sup> Chayraycu Españaman rejina kancunata watucuya yuyani rishaspa. Kancunawan cusircuskaymantañari jakayman rinaypaj yanapawanquichejpis. <sup>25</sup> Cunanka Jerusalén llajtaman rishani Diosman t'akaska runasninpaj yanapa kolketa apaspa. <sup>26</sup> Macedoniajapi Acayapi caj hermanosmin yuyarkancu Jerusalenpi pisichicoj hermanosta yanapayta. <sup>27</sup> Hermanosnincuman cuscachacuspa pisichicuynincipi yanapaytaka sumajtamin yuyarkancu paycunaman manu caskancuraycu. Israelmunamanta Cristopi jap'icojcuna ñaupajta sumaj willanasta waj llajtayojcunaman willarkancu. Paycunapis Cristopi jap'icoj israelmunataka pisichicusancupi yanapanancupuni. <sup>28</sup> Chayraycu cayta junt'aspas munacuywan koskancuta paycunaman jaywamuskaymantaña, Españaman kancunajejta risaj. <sup>29</sup> Yachani jamuspaka mosoj causaypaj Cristoj ashqha yuyanasnинwan kancunata sonkochanaypaj chayamunayta.

### *Pablopaj Diosmanta mañapunancu*

<sup>30</sup> Hermanosníy, Señorinchej Jesucristoraycu, Santo Espíritoj kowaskanchej munacuyninraycupis mayta nicuyquichej: Cusca nokawan sinch'ita Diosmanta mañapuwaychej <sup>31</sup> Judea jallp'api Diosta mana casoj israelmunamanta libraska canaypaj. Mañapullawaychejtaj Jerusalenpipis yanapa kolke apaskayta hermanos cusiywan jap'inancupaj. <sup>32</sup> Ajinapimin Diospa munaynинjejta cusiywan kancunaman chayamuspa cusca sonkochanacunchej. <sup>33</sup> Allinyachej Diostaj tucuy kancunawan cachun. Ajina cachun.

## 16

### *Hermana Febemanta*

<sup>1</sup> Rejsichiyquichej hermananchej Febeta. Payka Cencrea llajtapi caj Cristoj sutinpi tantacoj hermanos chaupipi yanapaj warmimin. <sup>2</sup> Señorinchejraycu payta allinta wajaychej Diosman t'akaska runasnín ruwanancumanjina. Ruwanasninpí imapi necesitasotiyquichejpis tucuy atiskayquichejwan payta yanapaychej. Payka sumajta churacorka ashqha runasta yanapananpaj, nokatapis.

### *Napaycucuna*

<sup>3</sup> Napaycapuwaychej Cristo Jesuspaj llanc'aj-masisniy Priscilata Aquilatawan. <sup>4</sup> Paycuna wañuy peligropi cashajtiy nokaraycu wañuytapis mana manchachicorkancuchu. Chayraycu paycunata agradeceni, manataj nokallachu, astawanpis tucuy waj llajtayoj Diospa ajllacuskasnin\* ima. <sup>5</sup> Wasincupi Cristoj sutinpi tantacojcunatapis napaycullaychejtaj. Napaycapuwaychej munaska Epenetojta. Payka Asia jallp'api ñaupaj pokoyjina Cristopi jap'icorka. <sup>6</sup> Napaycapuwaychej Mariata. Payka mayta llanc'arka kancunata yanapananpaj. <sup>7</sup> Napaycapuwaychej llajta-masisniy Andronicota Juniastawan. Paycuna nokawan cusca carcelpi wisk'askas carkancu. Cristoj cachasninpaj allin rejsiskas cancu. Nokamanta ñaupajta Cristopi jap'icorkancu.

<sup>8</sup> Napaycapuwaychej Señorpi munaska Ampliasniyta. <sup>9</sup> Napaycapuwaychej Cristowan ujchaska llanc'aj-masiycu Urbanota munaska Estaquisniytawanpis. <sup>10</sup> Napaycapuwaychej Cristopi jap'icuskanta allinta ricuchej Apelestapis, Aristobulocunatawan ima. <sup>11</sup> Napaycapuwaychej llajta-masiy Herodionta Narcisocunajmanta Señorpi jap'icojcunatawan. <sup>12</sup> Napaycapuwaychej Señorpaj llanc'ajcuna Trifenata Trifosatawan. Napaycapuwaychej munaska hermananchej Persidata. Payka Señorpaj sinch'ita llanc'arka. <sup>13</sup> Napaycapuwaychej allin rejsiska Señorpi jap'icoj Rufota mamantawan. Payka nokapajpis mamayjinamin. <sup>14</sup> Napaycapuwaychej Asincritota, Flegonteta, Hermasta, Patrobasta, Hermestawan, paycunawan caj hermanosta ima. <sup>15</sup> Napaycapuwaychej Filogota Juliatapis, Nereota hermanantapis, Olimpasto tucuy paycunawan caj Diosman t'akaska runasnintapis.

<sup>16</sup> Purajmanta c'acha munacuywan napaycunacuychej. Cristoj sutinpi tantacojcuna tucuynejmanta napaycamusunquichej.

### *Khepa yuyaychaycuna*

<sup>17</sup> Hermanosníy, sumaj yachachinata jap'erkanquichej mosoj causaypi wiñanayquichejpaj. Ajinaka yuyaychayquichej: Khawacuychej hermanosta t'akarachejcunamanta. Sumaj yachachinata jap'erkanquichejña. Chaymanta urmachejcunata khawacuspa paycunamanta carunchacuychej. <sup>18</sup> Chay llulla yachachejcunaka mana Señorninchej Jesucristotachu casuncu. Astawanpis quiquin munaynincuta sajsachincu. Misq'i simiwanjina llunc'upayaspa wawajinallaraj caj hermanospa sonkoncuta suwancu pantachinan-cupaj. <sup>19</sup> Kancunamantari tucuynejpi yachacushan sumaj willanasta casuskayquichej. Chayraycu kancunamanta cusicuni. Astawanri sumaj imaspi yachayniyoj canayquichejta munani sajra imaspitaj llimphu sonkos. <sup>20</sup> Allinyachej Diostaj uskhayta kancunapaj supay Satanasta atipanka sajra cajta sarunayquichejpaj. Señorninchej Jesucristoj c'acha yanapaynin kancunawan cachun.

<sup>21</sup> Napaycamusunquichej llanc'aj-masiy Timoteo, llajta-masicunay Lucio, Jasón, Sosipater ima. <sup>22</sup> Noka, Tercio sutiyoj, Pabloj kelkajnin,

---

\* **16:4** Literal: iglesias.

Señorpi napaycamuyquichej. <sup>23</sup> Wasiyojniy Gayopis napaycamusunquichej. Payka wasiyojnillancutaj cashan Cristoj sutinpi tucuy tantacojcunajtapis. Llajta kolketa wakaychaj Erasto, hermanonchej Cuartopis napaycamullasunquichejtaj.

<sup>24</sup> Señorninchej Jesucristoj c'acha yanapaynin tucuy kancunawan cachun. <sup>25</sup> Dioska atiyniyojmin callpachasunayquichejpaj sumaj willanasniymanjina Jesucristoj willaraskanmanjinapis. Chay sumaj willanaspi unay unaymantapacha Diospa pacaska yuyaynin sut'inchacun. <sup>26</sup> Cunantaj munayninmanjina yuyaskanta tucuy waj llajtayojcunaman sut'inchashan paypi jap'icuspa casunancupaj. Chaytamin sut'inchajcunapis kelkarkancu wiñay causaj Diospa yuyaskanta sut'inchaspa.

<sup>27</sup> C'ata yachayniyoj Dioska wiñaypa wiñayninpaj Jesucristonejta jatunchaska cachun. Ajina cachun.

## **PRIMERA CARTA DEL APOSTOL SAN PABLO A LOS CORINTIOS**

*Pablo napaycun Corinto llajtapi hermanosta*

<sup>1</sup> Noka, Pablo, Cristo Jesuspa cachan cani. Cachan canaypaj Dios ajllawarka paypa munayninnejta. Hermanonchej Sostenes nokawan cashan. <sup>2</sup> Kelkamushayquichej, Corinto llajtapi Diospa sutinpi tantacojcunaman. Diosllaman t'akaskas carkanquichej Cristo Jesuswan ujchaska. Dios ajllacusorkachej paypa llimphu causayniyojcunan canayquichejpaj. Kancunatapis waj ashqha hermanostapis pay ajllarka. Ajinatamin ajllacuskasnin tucuynejpi yupaychashancu Señorninchej Jesucristota. Payka paycunaj Señornincu cashan, nokanchejpatajis.

<sup>3</sup> Tatanchej Diospa, Señorninchej Jesucristo jatis c'acha yanapaynin kancunawan cachun allillanpi causacunayquichejpaj.

*Graciasta Diosman kon paycunaraycu*

<sup>4</sup> Diosniyimanka graciasta koshanipuni kancunarycu. Cristo Jesusnejta Dios c'acha yanapayninta kosorkachej. Chayraycu graciasta koni. <sup>5</sup> Dioska Cristonejta tucuy imaspi khapajyachisorkachej mosoj causayniyquichejpaj, tucuy parlaypi tucuy yachaypipis. <sup>6</sup> Caymin ricuchin Cristoj willanan causayniyquichejpi sumaj sayaska caskanta. <sup>7</sup> Ajinaka mana pisishanquichejchu Santo Espíritoj koskan atiyuncunapi. Cusiywantaj suyashanquichej Señorninchej Jesucristota Dios ricuchinanta. <sup>8</sup> Ricuchinancama Dios sayachisonkachej mana juchayoj canayquichejpaj Señorninchej Jesucristoj ñaupakenpi. <sup>9</sup> Dioska niskasninta junt'anpuni. Paytaj wajyasorkachej Wawan Jesucristo Señorninchejwan ujchaska causacunayquichejpaj.

*Munan paycuna uj yuyayllapi canancuta*

<sup>10</sup> Hermanosníy, mayta nishayquichej Señorninchej Jesucristo jatis sutinpi tucuyniyquichej uj yuyayllapi causacuychej. Ama t'akaskaska caychejchu. Astawanpis allinyaskas uj yuyayllapi uj munayllapitaj caychej. <sup>11</sup> Cayta niyquichej, hermanosníy, imaraycuchus Cloepa wasinmanta cajcuna willawarkancu kancuna chaupipi phiñanacuycuna cashaskanta. <sup>12</sup> Caywan niyta munani, sapa uj nishaskayquichejta:

“Nokaka Pabloj t'akanmanta cani”, chayrí “nokataj Apolospa t'akanmanta cani”, chayrí “nokataj Pedroj t'akanmanta cani”, chayrí “nokataj Cristoj t'akanmanta cani”, nispá.

<sup>13</sup> ¿Ujcunallapajchu Cristoka churaska carka? ¿Pablochu chacataska carka kancunarycu? Chayrí ¿Pabloj sutinpichu bautizacorkanquichej khaticojcunan canayquichejpaj? <sup>14</sup> Graciasta Diosman koni kancunamanta Crispotawan Gayotawan, chaycunallata bautizaskaymanta. <sup>15</sup> Ni pi niyta atinchu nokaj sutiypi bautizacuskayquichejtaka. <sup>16</sup> Arí, Estefanascunatapis bautizallarkanitaj. Astawanrí mana yuyarinichu ujcunata bautizaskaytaka. <sup>17</sup> Cristoka mana bautizajtachu cachamuwarka, manachayrí sumaj willanasta willarajta. Nitaj yachaysapa parlanaswanchu cachamuwarka Cristoj chacatanapi wañuynin ama yankhapaj khawaska cananpaj.

*Cristoka Diospa atiynin yachaynintaj*

<sup>18</sup> Cristo chacatanapi nokanchejraycu wañuskanmanta willanaska chincapushaj runaspaj mana yuyayniyojmin. Nokanchej wiñay causayniyojcunapajrí chay willanaska Diospa atiyninmin.

<sup>19</sup> Palabranpipis nin:

Noka, Dios, yachayniyojcunaj yachaynincuta tucuchisaj.

Yuyayniyojcunaj yuyaynincutataj chincachisaj, nispa.

<sup>20</sup> Cachun yachaysapa, cachun yachachej, cachun cay pacha imasmanta unanchajpis, Diospa ñiaupakenpeka manacajmin. Cay pacha runaj yachayninta Dioska mana yuyayniyoj caskanta ricucherka.

<sup>21</sup> Cay pacha runaska tucuy yachaynincwan Diosta mana rejsiyta aterkancuchu. Caytaj carka Diospa yuyaskanmanjina yachaynippi. Willaraskaycunejta Dios qhuyacoj munaynippi juchamanta cacharichiyya yuyarka paypi jap'icojcunata. Cay willarayka cay pacha runaspaj mana yuyayniyojman rijch'acun. <sup>22</sup> Israelecunaka jatun ricuchinata mañancupuni. Griegocunataj sumajta masc'ancu cay pacha imasta yachayta. <sup>23</sup> Astawanpis nokanchejka Cristomanta willaranchej, pay nokanchejraycu chacataska caskanmanta. Cayri israelecunapaj misc'ana, wajcunapajtaj mana yuyayniyoj. <sup>24</sup> Wajyaskanta uyarejcunapajrí Cristoka Diospa atiynintaj, Diospa yachaynintajmin. Wajyaskacunaka israelecunamanta griegocunamantapis cancu. Tucuy paycunapajpis Cristoka quiquinmin, Diospa atiynin yachaynintaj.

<sup>25</sup> Runaspajka Diospa ruwaskan mana yuyayniyojman rijch'acun. Astawanrí Diosmanta mana yuyayniyojman rijch'acojka runaspa yachaynincumanta astawan yachayniyojmin. Diosmanta mana callpayojpaj khawaska cajtaj runasmanta aswan callpayoj.

*Diostajatunchananchejpaj wajyaskas canchej*

<sup>26</sup> Reparacuychej, hermanosní, imaynata pisi cajpaj khawaskasta Dios wajyasuskayquichejta. Cay pacha runas uqhupi pisisslla yachayniyojcuna canquichej. Pisislla atiynijoj churaskas canquichej. Pisisllataj sumaj ayllumanta canquichej. <sup>27</sup> Astawanpis Dioska runaspaj mana yuyayniyoj cajta ajllacorka yachaysapacunata p'enkachinanpaj. Dioska runaspaj mana callpayoj cajta ajllacorka callpasapacunata p'enkachinanpaj. <sup>28</sup> Cay pachamanta wajcha, khesachaska runacunata Dios ajllacorka. Mana ima cajta Dios ajllacorka chaywan ima cajta tucuchinanpaj. <sup>29</sup> Ajinata ruwarka, ñiaupakenpi ni pi jatunchacunapaj.

<sup>30</sup> Kancunari mosoj causayniyoj canquichej ujchaska Cristo Jesuswan. Dios churarka Cristota cheka yachayninchaj cananpaj. Cay yachaymanjina Dios nokanchejta chekanpaj khawawanchej. Cristo Diosman allinyachiwarkanchej, causayninchajta llimpucharka, wiñay causaypajtaj cacharichiwarkanchej. <sup>31</sup> Chayraycu ruwananchej tiyan Diospa palabranmanjina: Jatunchacuya munaj runaka Señorllata jatunchachun ruwaskasnimantaka.

## 2

*Pablo willaran Jesucristo chacataska caskanta*

<sup>1</sup> Nokapis, hermanosní, mana jatun sumaj parlaywanchu nitaj yachayniywanchu jamorkani Diospa sumaj willanasninta kancunaman willaraspara. <sup>2</sup> Manachayrí kancuna chaupipi Jesucristo cheka yachaynillanta allinpaj khawarkani manataj waj imastaka. Chayraycu

willarasharkani Jesucristomanta pay juchanchejraycu chacataska caskanmantawan. <sup>3</sup> Nokaka kancuna chaupipi pisipaj khawacorkani. [Willaranaymanjina mana willarayta atinayta]<sup>\*</sup> manchachicuspa anchata qharcatitispa ima carkani. <sup>4</sup> Cay pacha yachaysapacuna creechinapajjina yachaynincuwan willancu. Nokaka mana paycunajinachu willararkani. Astawanpis Santo Espíritoj atiyninwan willararkani. Diospi jap'icuskayquichej ricuchin willaraskay cheka caskanta. <sup>5</sup> Ajinata willararkani ama runaj yachayninpí confianayquichejpaj, manachayrí Diospi jap'icuskayquichej atiyninwan sayanampaj.

### *Diospa pacaska yachayninta*

<sup>6</sup> Nerkaniña mana cay pacha yachaysapa parlaywanchu jamuskayta. Chayka mana niyta munanchu willaraskay mana yachayniyoj caskanta. Diospi wiñaska runaswan cashaspaka yachaywan parlaycu. Cay yachayrí mana cay pachaj yachayninchu nitaj cay pacha camachejcunaj yachaynincuchu. Paycunaka chincapushancu. <sup>7</sup> Astawanpis Diospa pacaska yachayninta parlaycu. Cay yachayninpí Dios manara j cay pachata ruwashaspa yuyarka nokanchej wiñaypaj c'anchayninpí causacunanchejta. <sup>8</sup> Cay yachayta cay pacha camachejcunamanta ni mayken repararkancuchu. Reparancumanchus carka chayka, wiñay atiyniyoj Señorninchejta mana chacatancumanchu carka. <sup>9</sup> Astawanpis yachaynenka palabranpi Diospa niskanmanjinamin:

Payta munacojcunapaj mana yuyay atina, c'acha imasta Dios waquiercherka.

Cayta runas ni jayc'aj ricorkancuchu, ni uyarererkancuchu nitaj repararkancuchu.

<sup>10</sup> Chay yachayta parlaycu Santo Espiritunejta chay c'acha imasta Dios ricuchiwaskanchejraycu. Santo Espiritumin tucuya yachananpaj sumajta khawan, Diospa uqhu yuyaynintapis.

<sup>11</sup> Mana pipis yachanchu uj runaj sonkonpi yuyaskantaka, manachayrí paypi caj espiritullan yachan. Ajinallataj Diospa yuyaskanta ni piyachanchu, manachayrí Espiritullan yachan. <sup>12</sup> Cunanrí nokanchejka mana cay pacha runaj yuyaynintachu jap'erkanchej. Manachayrí Diospa Espíritun capuwanchej chay c'acha imasta Dios kowaskanchejta reparananchejpaj.

<sup>13</sup> Chayta parlanchej mana yachaysapa runaspa yachachiskan- cuwanchu. Astawanrí Espíritoj yachachiskanwan parlanchej. Santo Espíritoj yuyayninta Espirituwan pusaskacunaman sut'inchanchej.

<sup>14</sup> Cay pacha yuyayniyoj runaka mana jap'inchu Diospa Espiritunpa yuyayninta. Paypajka mana yuyayniyojmin. Santo Espíritoj pusaskallan Diospa yuyayninta reparayta atin. <sup>15</sup> Santo Espíritoj pusaskan runaka tucuy imamanta allintamin reparan. Paytari cay pacha runaka mana atinhu chekanta khawayta. <sup>16</sup> Diospa palabranpipis nin: "Ni pi ni jayc'aj Diospa yuyayninta repararkachu. Ni pipis payta yachacherkachu". Astawanpis nokanchej Cristowan ujchaska caspa paypa yuyayninta jap'inchej.

---

\* 2:3 Ninayan.

**3***Pablo yachachin pisimanta pisi*

<sup>1</sup> Nokapis, hermanosníy, mana parlayta aterkayquichejchu Santo Espíritojo pusaskacunanmanjinaka. Manachayrí aycha runasmanji-nalla parlanay carka mosoj causayniyquichejpi juch'uy wawasllaraj caskayquichejraycu. <sup>2</sup> Kancunawan cashaspa yachacherkayquichej pisimanta pisi. Imaynatachus wawitas lechellata jap'incu, ajinallataj kancunapis carkanquichej. Jatuchej yachachiyuncata sonkoyquichejpi jap'icuspa sayachiyya mana aterkanquichejchu. Nitaj cunapis atis-hanquichejrajchu. <sup>3</sup> aychaj camachiskacunallan caskayquichejraycu. Kancuna chaupipi cashan envidiawan phiñacuywan. Cayka ricuchin aycha runas caskayquichejta, manataj Espíritojo pusaskacunanjinachu causaskayquichejta. <sup>4</sup> Waquin kancuna chaupipi: "Nokaka Pabloj t'akanmanta cani", chayrí: "Nokataj Apolospa t'akanmanta cani", nincu. Chayka ricuchin cay pacha runasjinallaraj caskayquichejta.

*Dioswan cusca llanc'ajcuna*

<sup>5</sup> Chayraycu ¿imataj Pabloka? ¿Imataj Apolospis? Diospa yanapajcunallan caycu. Nokaycunejta Cristopi jap'icorkanquichej. Sapa ujpis Dios churawaskaycumanjina ruwaycu. <sup>6</sup> Noka Diospa niškasninta sonkoyquichejpi tarporkani. Apostolaj uj karpajjina astawan yachachisorkachej. Diosllamin causayniyquichejpi niskanta wiñacherka. <sup>7</sup> Ajinaka tarpojpis karpajpis mana imachu. Astawanrí wiñachej Dioslla curajka. <sup>8</sup> Cunanka tarpojpis karpajpis uj yuyaylla caycu. Sapa ujpis jap'inaycuta llanc'askaycumanjina jap'isajcu. <sup>9</sup> Dios churawaycu paywan cusca llanc'anaycupaj. Kancunataj Diospa chajran canquichej.

*Diospa wasichaynin*

Diospa wasichaynin canquichej. <sup>10</sup> Dios kowarka atiyninta uj sumaj yachachiska wasichaj canaypaj. Sumaj willanasta kancunaman ñaupajta willaraskaywan cimientota churarkani. Chaymantaj waj yachachej wasichajjina ruwashan. Astawanrí sapa uj sumajta khawacuchun imay-natachus cimientoj patanpi wasichashaskanta. <sup>11</sup> Cay wasej cimientonka ujlla, Jesucristo. Waj cimientota mosoj causaypaj mana pipis churayta atinchu. <sup>12</sup> Diospa wasinta ruwananpaj uj wasichajka wiñay sayachejcunata chayrí pisi ratullapaj sayachejcunatapis ajllayta atin. Caycunajina canman: Kori, kolke, valorniyoj rumicitus, c'aspi, chhala, ichhupis. <sup>13</sup> Sapa wasichajpa ruwaskan sut'i ricuchiska canan tiyan. Allin ruwaskanpis chayrí mana allin ruwaskanpis, Cristoj cutimunan p'unchaypi ninapi sut'inchaconka. Ninamin ricuchenka sapa wasicha-jpa ruwaskan imaynachus caskanta. <sup>14</sup> Sichus paypa ruwaskan ni-nata muchun chayka, Diosmanta jap'enka. <sup>15</sup> Sichus paypa ruwaskan ruphaycunman chayka, mana jap'enkachu. Quiquin wasichajrí mana chincaponkachu. Manachayrí nina chaupintajina cachariska canka.

<sup>16</sup> ¿Manachu yachanquichej Diospa wasin caskayquichejta, Diospa Espirituntaj kancunapi tiyacuskanta? <sup>17</sup> Sichus uj runa Diospa wasinta tu-cuchinman chayka, paytapis Dioska tucuchillankataj. Diospa wasenka payman t'akaskamin. Chaymin kancuna canquichej.

*Kancuna Cristoja canquichej*

18 Ama ni pipis payllataj pantachicuchunchu. Kancuna chaupipi cay pachapi yachayniyoj caskanta yuyajka mana yuyayniyojman tucuchun. Ajinaman tucuchun cheka yachayniyoj cananpaj.<sup>19</sup> Cay pachaj yachaynenka Diospajka mana yuyayniyojmin. Palabranpipis nin: “Dios yachaysapa runasta jap'in paycunaj quiquin pantachej yachaynincipi trampawanjin”.<sup>20</sup> Nintaj: “Señor yachan yachaysapacunaj tanteyacuskancoka yankha caskanta”.<sup>21</sup> Chayraycu ama ni pi runaspi confi-acuchunchu tucuymin kancunajta caskanraycu.<sup>22</sup> Cachun Pablo, Apolos, Pedro, cay pacha, causay, wañuy, cunanpacha caj, jamojpacha cajpis, tucuynin kancunajtamin.<sup>23</sup> Kancunari Cristoja canquichej, Cristotaj Diospata.

## 4

### *Dios cachasninta camachin*

<sup>1</sup> Cunanka Cristoj yanapajcunanpaj khawawaychej, Diospa pacaska yuyayninta sut'inchanaycupaj khawapojcunantajina ima.<sup>2</sup> Chaywanpis uj runa patronpaj khawapojo caspaka ruwanasniwan junt'aj canan tiyan.<sup>3</sup> Astawanrí imaynatachus kancuna chayrí runaspis khawashawaskancutaka pisipaj churani. Nitaj noka quiuiyipis khawacunichu runalla caspa.<sup>4</sup> Reparaskaypeka ruwanasniypi junt'aj cani. Cayrí mana niyta munanchu tucuy imapi Diospaj junt'aj caskaytaka. Señorllamin khawawaytaka atin.<sup>5</sup> Chayraycu ama ni imatapis khawaraychejchu manaraj Señor jamushajtenka. Pay jamuspa lakhapi pacaska imasta c'anchayman orkhonka. Sapa uj runaj sonkonpi yuyaskantataj sut'inchanka. Chanta sapa uj runata ruwaskanmanjina Dios mentanka.

### *Ama jatunchacuychu yachachejniyquimanta*

<sup>6</sup> Hermanosníy, cay imasta ricuchinatajinalla allinniyquichejpaj willayquichej. Nokamantawan Apolosmantawan yachacuychej Diospa palabranmanjinalla runasta khawayta. Ama kancunaka uj yachachejta jatunpaj khawaychejchu wajtataj manacajpjaka.<sup>7</sup> ¿Imaynataj yuyanqui jatunchaska cashaskayquita ujcunamanta? ¿Manachu Dios kosorka tucuy jap'iskayquita? Sichus kosorka chayka, ama jatunchacuychu.

### *Corinto runas yuyancu camachejcuna caskancuta*

<sup>8</sup> ¡Kancunaka rijch'acunquichej sajsaskasmanña, mosoj causaypi khapajyachiskasmanñataj rijch'acapunquichej! ¡Mana nokaycullawan camachishanquichejña! ¡Munayman Dioswan camachishanayquichejta, nokaycupis kancunawan cusca camachiyyta atinaycupaj!<sup>9</sup> Yuyayniymentaka, Dios churawaycu nokaycu cachasninta tucuy runasmanta khepapi wañuyman juchachaskacunajinata. Uj khawanapajjina churaska caycu tucuy pachapi, angelespaj, runaspajpis.<sup>10</sup> Nokaycoka Cristoraycu wampu runas caycu. Kancunari Cristowan mosoj causayniyquichejpi yachaysapas caskayquichejta yuyanquichej. Nokaycoka pisi callpas caycu. Kancunari callpasapas caskayquichejta yuyanquichej. Kancunata runas mentasunquichej. Nokaycutarí manacajpjaj khawawaycu.<sup>11</sup> Cunancamataj yarkhayniyoj, ch'aquiyniyoj, wajchajina pisi p'achayoj, muchuchiskas, purisquirisjina caycu.<sup>12</sup> Maquisniyuwan llanc'aycu callpaycu tucucunancama. Runas insultawajtiyku, misq'i palabraswan cutichiaycu. Nanachiwajtiyku,

ch'inmanta muchushaycu. 13 Ch'atawajtiycu, munacuywan parlapayaycu. Runasmantaka millay k'opamanjina tucuycu. Ajinamin cashan nokaycupaj, Cristoj cachasninpaj, cunitancama.

*Mosoj causaypi Pablo paycunaj tatancu*

14 Cay imasta kelkamushayquichej mana p'enkaunayquichejpajchu. Manachayrí kancunata c'amiyta munani munaska wawasniytajina. 15 Cristopi jap'icojcuna uqhupi chunca waranka yachachejcunayquichej canman chaypis, ni jayc'aj uj tatamanta aswanka capusonkachejchu. Sumaj willanasta kancunaman willaraskayraycu Cristo Jesuswan mosoj causayniyquichejpi noka tatayquichej caspa 16 nishayquichej nokajina ruwajcuna canayquichejta.

17 Nokajina ruwanayquichejpajmin Timoteota cachamorkayquichej. Payka Señorpa ruwayninpí munaska wawaymin. Paypi confiani. Paymin Cristowan ujchaska causayniymanta yuyarichisonkachej. Tucuy tantacoj hermanosmanpis tucuynejpi quiqillantataj yachachini. 18 Kancunamanta waquenka jatunchacuspa nishancu: "Pabloka mana jamonkachu". 19 Astawanrí uskhayllata kancunaman jamusaj, Señor munajtenka. Ricusaj yachasajtaj cay jatunchacojcunamanta mana niskasnillancutachu astawanpis atiyninctuta. 20 6.9 Manamin simiwan parlaspallachu ricuchinchej Diosta casuskanchejtaka,\* manachayrí atiyninwan c'achata causacuspá. 21 ¿Maykentataj munanquichej, kancunata muchuchej jamunaytachu, chayrí sumaj munacuywan qhuyacuywan jamunaytachu?

## 5

*Juchaka t'antaj levaduranjinamin*

1 Tucuyña uyarishancu kancuna chaupipi khenchachacuy caskan-taka. Cayjina khenchachacuya mana canchu ni chay mana Diosta rejsejcuna uqhupipis. Uyaricun tatanya warminwan uj tiyacushaskan. 2 Chaywanpis kancunaka jatunchacushanquichejraj. Aswan allin canman wañonjiyojjina phuticushanayquichej p'enkaywan. Chay juchata ruwajtaka kancuna chaupimanta wijch'unayquichej carka. 3 Manapis chaypichu cashani, yuyayniypirí kancunawan cashani. Chaypipis cashaymanjina chay khenchachacoja yuyayniypi juchacharkaniña. 4 Kancuna Señor Jesuspa sutinpi tantacojtiyquichej nokapis yuyayniypi kancunawan casaj. Señorninchej Jesuspa atiyninwan 5 chay khenchachacoj kharita kancuna chaupimanta wijch'uychej. Ichapis Dios sakenka supay Satanás payta aychanpi muchuchinanta. Ajinapi chay muchuyneta Cristo cutimojtin espirituunta wiñay causaypaj Dios cacharichinman.

6 Jatunchacunayquichejka manapuni allinchu. ¿Manachu yachan-quichej pisi levaduralla tucuy t'anta masata pokochiskanta? Ajinamin juchaka. 7 Cunanka k'alata pichaychej mauc'a causayniyquichejpa juchanta mosoj t'anta masajina canayquichejpaj. Kancunaj mosoj causayniyquichej mana juchayojojin canan tiyan. Nokanchejpa pascua corderonchej, Cristoka, juchanchejraycu ñac'askaña cashan. 8 Ajinaka pascuanchejta ruwanachej ama mauc'a causaypa levaduranwanchu, nitaj sajra ruwanaj levaduranwanchu. Manachayrí mosoj causayn-inchejpi c'acha sonkowan pascuanchejta ruwanachej.

\* 4:20 Literal: Diospa reinon.

*Cristopi hermanosta juchancuta reparachiychej*

<sup>9</sup> Ñaupaj cutipi kelkamorkayquichej ama khenchacunawan chajrucunayquichejta. <sup>10</sup> Mana niytachu munarkani tucuy cay pachapi tiyacoj khenchacunamanta t'akacapunayquichejta. Nitaj aykecunayquichejchu tiyan mich'asmanta, suwaspa runata ñac'arichejcunamanta, ruwaska dioscunata yupaychajcunamantapis. Ajina cajtenka cay pachamanta llojsipunayquichejchá canman. <sup>11</sup> Astawanpis kelkamorkayquichej: Ama chajrucuychejchu, "Cristowan ujhaska hermano cani", nej juchapitaj causashaj runawanka. Sichus pay khencha, mich'a, ruwaska dioscunata yupaychaj, sajrata parlaj, machaj, suwaspa runata ñac'arichej cashan chayka, paywanka ama ni miqhullaychejpischu. <sup>12-13</sup> Cristowan mana ujhaska runaspa juchancuta mana juchachanaychu tiyan. Diosmin paycunaj juchancuta juchachanka. Kancuna uqhupi cajcunataka kancuna juchancuta reparachinayquichej tiyan. Wijch'uychej chay juchallicojta kancuna chaupimanta.

## 6

*Ama pusaychu hermanoyquita autoridadman*

<sup>1</sup> Waquin kancunamanta hermanospura phiñanacushancu. ¿Manachu manchachicunquichej Diospi mana jap'icoj runasman riya allinyachisunayquichejpaj, manataj Diospa runasninman? <sup>2</sup> Yachanquichejjina Diospi jap'icoj runasnenka cay pachapi tiyacojcunata juchayojchus manachus caskanta nenkancu. Ajina cajtenka ¿manachu juch'uy imasta allinyachinayquichejpajjina khawawajchej? <sup>3</sup> Dios churawasunchej angelestapis chekanchus manachus caskanta ninanchejpaj. Ajinaka ¿manachu cay pacha causay imasta allinyachinayquichejpajjina khawawajchej? <sup>4</sup> Cay pacha causay imaspi phiñanacuynijoj cajtiyquichejka Diospa ajllacuskasninpaj p'enkay. Chaypajka allinchá canman kancunamanta pisipaj khawaska cajcunata churanayquichej. <sup>5</sup> Cayta, ari, nishani kancunata p'enkachisunayquichejpaj. ¿Manachu kancuna uqhupi upjis yachayniyoj tiyan hermanosninta allinyachiysipta atejka? <sup>6</sup> Astawanrí uj hermano waj hermanonwan phiñanacuynijoj caspa payta autoridadman pusán. Chay autoridadtaj mana Diospi jap'icoj runachu cashan.

*Ama munapayaychejchu*

<sup>7</sup> Kancuna uqhupi phiñanacucuna caskanwanka Cristopi causayniyquichejta wajllichishanquichej. Aswan allin canman mana cheka ruwaskata muchunayquichej. Aswan allintaj canman capususkayquichejta suwasojtincu muchunayquichej. <sup>8</sup> Astawanpis kancunaka mana chekantachu ruwashanquichej; runasmanta khechushanquichej ima. Chaywanpis cay runaska Cristopi hermanosniyquichej cashancu.

<sup>9</sup> Sumajta yachanquichej mana chekanta ruwajcunaka mana yay-conkancuchu janaj pachaman.\* Ama pantaychejchu. Ni khenchas, ni ruwaska dioscunata yupaychajcuna, ni millaycuna, ni kharipura cuerposwan juchallicojcuna, <sup>10</sup> ni suwas, ni munapayajcuna, ni machajcuna, ni sajra parlajcuna, nitaj suwaspa runata ñac'arichejcunapis janaj

\* 6:9 Literal: Diospa reinon.

pachamanka<sup>†</sup> yayconcancchu. <sup>11</sup> Chayjina carkanquichej waquin kancunamanta. Cunanrí juchayquichejmanta mayllaskasña canquichej. Diosmanpis t'akaskasña. Chaywanpis chekanchaskasña canquichej Señor Jesucristoj sutinpi Diosnincheja Espiritunpipis.

### *Aykecuychej khenchachacuymanta*

<sup>12</sup> Atiyman tucuy imatapis ruwayta. Astawanrí manamin tucuychu allinpaj. Atiyman tucuy imata ruwaytapis. Astawanrí manamin ni mayken munayniyan atipachicusajchu. <sup>13</sup> Miqhunaka wijsapaj wijsataj miqhunapaj. Diosrí iscayninta tucuchenka. Cuerpoka manamin khenchachacuypaj ruwaskachu. Astawanrí cuerponchejka Señorpajmin, Señortaj cuerponchejpi causanampaj. <sup>14</sup> Dioska Señorta wañuymanta causaricherka. Ajinallatataj nokanchejtapis jatun atiyninwan wañuymanta causarichiwasunchej.

<sup>15</sup> Yachanquichej cuerpoquichej Cristowan ujchaska caskanta. Chayraycu ni jayc'aj khechusajchu cay cuerpoita Cristomanta uj khenchawan ujchanaypajka. <sup>16</sup> Chekatapuni yachanquichej khenchawan ujchacuspaka iscaynin uj cuerpollamanmin tucun. Palabranpi Dios parlaspa uj khari uj warmiwan cus cachaska manta, cayjinata nin: "Iscaynincu tucuncu uj aychallaman". <sup>17</sup> Señorwan ujchaska cajka uj espiritulla Señorwan. <sup>18</sup> Aykecuychej khenchachacuymanta. Runaka tucuy waj juchata ruwaspa mana khenchachacuwanjinapunichu cuerponpi juchallicun. Chay khenchachacuya runaj cuerponsa Cristomanta khechun. Quiquin cuerponpa contranpipis khenchachacojka juchallicun. <sup>19</sup> Chekatapuni yachanquichej cuerpoquichej Diospa koskan Santo Espíritojo wasin caskanta. Manataj kancunajtachu canquichej, Diospatamin canquichej<sup>20</sup> paymin may jatun preciowan rantisorkachej. Ajinaka Diosta jatunchanayquichej tiyan cuerposniyquichejpi espiritusniyquichejpipis Diospata caskancuraycu.

## 7

### *¿Diospi jap'icojcuna casaracunancchu?*

<sup>1</sup> Cunanka cutichiyquichej cartapi tapuwaskayquichejmanta. Arí, sumaj canman kharipaj mana warmiyoj cananka. <sup>2</sup> Runas chaupipi khenchachacuy caskanraycurí casaracunayquichejmin allin. Sapa khari uj c'ata warmiyoj, warmipis uj c'ata kosayoj cachuncu. <sup>3</sup> Khareka kosa caskanta warminwan junt'achun. Ajinallataj warmipis kosanwan. <sup>4</sup> Warmeka manaña cuerponmanta atiyniyojchu, astawanrí kosanña. Ajinallataj kosapis manaña cuerponmanta atiyniyojchu, astawanrí warminña. <sup>5</sup> Khari warmi causayniyquichejpi ama "mana mana" ninacuychejchu. Astawanrí unanchanacuspa munawajchej, chaylla uj p'unchaycunapaj cachun Diosmanta mañacuypí ocupaskas canayquichejpaj. Chaymantaka ujtawan cus cachaca puychej. Ajinapi supay Satanás mana juchallichisonkachejchu munayniyquichej atipa- cushiontenka.

<sup>6</sup> Cayta nishani kancunapaj allin caskanta yuyaspa, manataj uj camachiskatajinaka. <sup>7</sup> Nokamantaka munayman tucuy runas nokajina sapallancu cacunancuta. Astawanpis ujman Dios kon kosata

<sup>†</sup> 6:10 Literal: Diospa reinon.

chayrí warmita. Wajmantaj atiyta kon cusiywan sapallan cacunanpaj. Causayninchejta imayna canantapis sapa ujman qhuyacuyninpi Dios kowanchej.

<sup>8</sup>Caytarí nini mana warmiyojcunaman viudasmanwan: Allin canman paycunapaj nokajina cacunancu. <sup>9</sup> Manachus munaynincuta camachincuchu chayka, casaracuchuncu. Casaracuymín aswan allin canman sinch'i munaywan ruphacushaymantaka.

*Cristo camachin casaraskasta ama t'akacunancuta*

<sup>10</sup> Casaraskaña cajcunamanrí camachini, manataj nokallachu, astawanpis Señor cayta camacherka: Warmeka ama kosanmanta t'akacuchunchu. <sup>11</sup> T'akacusparí amaña ujwantaj casaracuchunchu. Manachayrí kosanwan allinyacapuchun. Kosataj ama warminta wijch'uchunchu.

*Mana Diospijap'icojwan casaraska cajmanta*

<sup>12</sup> Waj casaraska runasman noka nishani. Astawanrí quiquin Señorka cay jawa ni imata nerkachu. Uj hermanoj warmin mana Diospi jap'icoj canman. Sitajchus warmin paywan allinpi cacuya munan chayka, ama warminmanta t'akacuchunchu. <sup>13</sup> Uj hermanaj kosanpis mana Diospi jap'icoj canman. Sitajchus kosan paywan allinpi cacuya munan chayka, ama kosanmanta t'akacuchunchu. <sup>14</sup> Ajinapi mana Diospi jap'icoj kosaka Dioswan allinpi khawaskamin warminwan cusca caskanraycu. Mana Diospi jap'icoj warmipis Dioswan allinpi khawaskamin kosanwan cusca caskanraycu. Mana ajina cajtenka wawasniyquichejka cay pacha runaspa wawasnincujina cancumana carka. Cunanka Dios paycunata allinpaj khawan. <sup>15</sup> Mana Diospi jap'icoj cajchus t'akacuya munan chayka t'akacapuchun. Cayjina cajtenka hermanopis chayrí hermanapis libre chayta ruwananpajka. Dioska allillanpi cacunanchejpaj wajyawanchej. <sup>16</sup> Hermanáy, ichapis kosayquita Señorta rejsinanpaj pusamunqui. Hermanóy ichapis warmiyquita Señorta rejsinanpaj pusamunqui. Chayta mana yachanquichu.

*Dios wajyashasojtin imaynachus carkanqui ajinalla cacuy*

<sup>17</sup> Astawanpis sapa uj runa causacunan tiyan Señorpa koskanmanjina. Imaynachus carka Dios payta wajyashajtin, ajinalla purichun. Chaytatajmin camachini tucuynejpi iglesia tantacojcunamanpis. <sup>18</sup> Ajinaka maykenpis Diospa wajyaskanta circuncidaska caspaña uyarejka chayjinalla cacuchun. Diospa wajyaskanta mana chayjina cuerponpi señalaska caspa uyarejtaj ama circuncidacuchunchu. <sup>19</sup> Israelpunaj ruwacuynincumanjina señalniyoj cayka mana imapischu nitaj mana señalniyoj capispimapischu. Manachayrí Diospa camachiskasninta casuymín tucuyka. <sup>20</sup> Sapa uj runa imaynachus Dios wajyashajtin carka quiquin causaypi cacuchun. <sup>21</sup> Dios wajyashasojtin camachi carkanqui chayka, allillanmin cashan. Astawanpis atiwaj libracuya aticojenka. <sup>22</sup> Wajyaska runaka camachi caspapis, Señorpa libraskanmin. Ajinallataj wajyaska runapis libre caspa, Cristoj camachinmin. <sup>23</sup> Dios rantisorkachej may jatun preciowan. Chayraycu ama camachi ruwacuyclichejchu ni mayken runaman. <sup>24</sup> Ajinaka cayta niyuquichej: Hermanosní, sapa ujniyuquichej imaynachus wajyashasojtiyuquichej carkanquichej, chayjina cacuyclichej Dioswan cusca.

*Mana kosayoj sipascunamanta*

<sup>25</sup> Mana kosayojoj ususisniyquichejmanta tapucuwarkanquichej. Chay jawa mana Señorpa camachiskan capuwanchu. Astawanrí paypa qhuy-acuyninnejta chekata parlaj caspa cayta yuyaychayquichej. <sup>26</sup> Muchuy p'unchaycunapi caskanchejraycu yuyani allin caskanta sapa uj imay-nachus cashan ajinalla cacunanta. <sup>27</sup> Warmiyoj canqui chayka, ama t'akacuya munaychu. Mana warmiyoj casparí ama munay-chu warmiyoj cayta. <sup>28</sup> Casaracunqui chaypis, mana juchallinqui. Sichus uj sipas casaracun chaypis nillataj juchallinchi. Casaracojcunari llaquicuynijoj cankancu cay pacha causaynincipi. Nokaka mana munanichu cay llaquicuynijoj canayquichejtaka.

### *Señorninchej uskhayllata jamushan*

<sup>29</sup> Hermanosniy, cayta niyta munani: Señorninchej cutimunanka kayl-lapiña. Chayraycu caymanta ñaupajmanka warmiyojcuna, mana warmiyojcunajina Señorta khaticuychej. <sup>30</sup> Wakashajcunapis cusicushajcunapis manapis chaycuna canmanchujina causaychej. Rantejcunari ama rantiskayquichejta kancunajtajina khawaychejchu. <sup>31</sup> Cay pacha imaspi ocupaska cajcunaka ama cay pacha imas munylla cachuncuchu. Cay pachaj rijch'acuynenka tucucojllamin.

<sup>32</sup> Munani cay pacha imaspi ama chhica llaquicunayquichejta. Mana warmiyoj khareka Señorta imaynapipis cusichiylapimin churacun.

<sup>33</sup> Warmiyoj cajtaj cay pacha imaspi churacun chaywan warminta cusichinampaj. <sup>34</sup> Payka iscay yuyaypi churacun. Astawanpis mana kosayojoj warmirí, sipaspis Señorpa imasninpi churacuncu. Masc'ancutaj Señorta cusichiyta payman t'akaskas cayta cuerponcupipis espirituncu-pipis. Casaraska warmirí cay pacha imaspi churacun chaywan kosanta cusichinampaj.

<sup>35</sup> Cayta nishayquichej yanapasunayquichejpaj manataj jarc'asunayquichejpajchu. Munani Señorllapaj tucuy sonkowan allinpi causacunayquichejta.

### *Casaracuyka manajuchachu*

<sup>36</sup> Ususisniyquichejmanta niyquichej: Sipas casaracunannpajjinaña cajtin tatantaj casaracunan allin caskanta yuyanman chayka, munayninmanjina ruwachun. Mana juchallinchi. Wayna sipaswan casaracuchuncu. <sup>37</sup> Tatanrí mana iscayrayaspa sonkonpi yuyanman ususin sapallanpuni allin cacunanta. Mana jarc'aspatajchus munaskanta yuyaskantawan ruwayta atinman chayka, allinta ruwan ususinta mana casarachispaka. <sup>38</sup> Chayraycu ususinta casarachej tataka allinta ruwan. Mana casarachejpis aswan allintamin ruwallantaj.

### *Viudaka aswan cusiska sapallanña cacuspa*

<sup>39</sup> Casaraska warmeka kosanwan cusca canan tiyan kosan causanan-cama. Kosan wañupojinrí atillanña waj khariwan casaracuya. Cayrí Señorpa munayninmanjinalla canan tiyan. <sup>40</sup> Astawanrí yuyaskaymanta Señorpi aswan cusiska canka sapallan cacun chayka. Yuyanitaj cay imaspi Diospa Espíritun pusashawaskanta.

## 8

### *Waj dioscunaman jaywaska miqhunamanta*

<sup>1</sup> Kancuna tapuwarkanquichej waj dioscunaman jaywaska miqhunamanta. Ninquichejjina tucuymin yachayniyoj canchej. Yachayka

runata jatunchacuyman apan; munacuyrí hermanosta Señorpi wiñachin.  
<sup>2</sup> Sichus maykenpis yachaskanta yuyan chayka, manaraj yachanchu maychus yachanantaka. <sup>3</sup> Dioska rejsinmin payta munacojtaka.

<sup>4</sup> Cunán jaywaska miqhunamanta: Yachanchejjina chay waj dioska mana imapischu ruwaskalla caskanraycu. Astawanpis Dioska ujllamin. <sup>5</sup> Cancumanpis ashqhas dioscuna sutichaska janaj pachapi cay pachapipis. Cancumanpis ashqha dioscuna ashqha señorcuna. <sup>6</sup> Nokanchejpajrí uj c'ata Dioslla tiyan, Dios Tata. Tucuy ima paymanta jamun. Nokanchejtaj payllapaj causanchej. Uj c'ata Señorllataj tiyan, Señor Jesucristomin. Tucuy ima Paynejta ruwaska carka. Paynejtataj nokanchejpis causayniyoj canchej.

### *Ama urmachiychu pisi yachayniyoj hermanoyquita*

<sup>7</sup> Nishanquichej tucuymin yachayniyoj caskanchejta. Astawanpis manamin tucuychu ruwaska dioscunamanta yachayniyoj cancu. Wawamantapacha chay yupaychayman acostumbraskas cancu. Jaywaskata miqhuspataj yuyancumanraj ruwaska dioscunata yupaychashaskancuta. Sumaj yachaywan manaraj allin callpachaskas caskancuraycutaj sonko-yuyaynincipi ch'ichichacuncu. <sup>8</sup> Miqhunaka mana imanawanchejchu Diospa ñaupakenpeka. Mana miqhuspari mana aswan pisipaj khawaskachu canchej. Miqhuspapis nillataj aswan sumajpaj khawaskachu canchej. <sup>9</sup> Atiwajchej imatapis ruwayta. Astawanrí sumajta khawacuychej pisi yachayniyoj hermanosta ruwaskayquichejwan ama juchaman urmachinayquichejta. <sup>10</sup> Arí, yachaysapas canquichej. Astawanrí pisi yachayniyoj hermanoyqui karacu wasipi miqhunapaj tiyariushajta ricusunquiman. Chaywanka payta mana yanapashanquichu. Astawanrí ruwaskayquinejta paypis miqhunman urmanmantaj pisi yachayniyoj caskanraycu. <sup>11</sup> Yachayniyquinejta urmachiipa tucuchishanqui pisi callpayoja. Chaywanpis payka hermanoyquimin. Paypajpis Cristoka wañorka. <sup>12</sup> Ajinaka juchallishanquichej hermanosniyquichejpa contrancuta. Makaspajina nanachishanquichej pisi callpayojo sonko-yuyaynincuta. Cayta ruwaspaka Cristoj contranta juchallishanquichej. <sup>13</sup> Chayraycu miqhuskaychus hermanoya urmachin chayka, manaña chay miqhunasta jayc'ajpis miqhusajchu hermanoya ama urmachinapaj.

## 9

### *Cristoj cachasnín miqhunancupaj hermanos konancu*

<sup>1</sup> Atiyman munayniymanjina ruwayta. Cristoj cachantaj cani Señorninchej Jesusta ricuskayraycu. Llanc'ayniynejtataj Señorta rejserkanquichej. <sup>2</sup> Ichapis waquinpaj mana paypa cachanchu cayman. Kancunapajrí paypa cachan cani. Kancuna Señorpi uj ricuchina canquichej paypa cachan caskaymanta.

<sup>3</sup> Khawaraj yuyaywan tapuwajcunamanka cayta cutichini. <sup>4</sup> Hermanos kowaskaycutaka ¿miqhuya ujyaytapis manachus atiyu?

<sup>5</sup> ¿Cristopi uj hermanatapis warmiypaj pusayta manachu atini? Ajinata pusancu Cristoj waj cachasnín, Señorpa waukesnin, Pedropis.

<sup>6</sup> Ama yuyaychejchu willarajcuna uqhupi noka Bernabellawhan maquisniyuwan llanc'anaycu caskanta. <sup>7</sup> Sapa soldadoman koncupuni miqhunapaj. Tarpojka pokoyninta miqhunpuni. Sapa

michejpis ovejasninemanta lecheta miqhunpuni. <sup>8</sup> Caytaka mana runaj atiynillanwanchu parlani. Diospa camachiskasnipipis cay jawa willan. <sup>9</sup> Moisespa camachiskasnipi nin: "Uywa trillashajtin miqhunanta ama jarc'aychu". Cayta nispa Dioska mana uwyaj allinnillanpajchu yuyasharka. <sup>10</sup> Manachayrí nokanchejraycu ajinata parlarka. Kelkaskataj carka allinninchejpaj. Ajinaka tarpoj runa tarpunan tiyan, trillaj runapis trillanan tiyan pokoynimanta cusiywan jap'inanpaj. <sup>11</sup> Runas jallp'api tarpuncu, ajinata nokaycu kancunaman willarkaycu sumaj willanasta, c'acha mujutajina. Chayraycu chekallan uj cosechajina nokaycupaj canan. Sichus kancuna kowaycuman cay pacha causayniycupaj imasta chayka chay cosechajina canman. <sup>12</sup> Kancunaj koskayquichejta waquinpis jap'ejtincoka ¿manachu nokaycoka aswan ashqhataraj jap'inaycu canman?

*Pabloj cusiyenka khasillamanta willaraymin*

Astawanrí causanaycupaj kancunamanta mana imatapis jap'erkaycuchu. Chaywanpis tucuy imata muchushaycupuni Cristojo sumaj willanasninta ama jarc'anaycupaj. <sup>13</sup> Yachanquichejjina yupaychana-wasipi ruwanayojcunaka Diosman t'akaska cajta miqhuncu. Diosman jaywaska imasta jaywajcunapis chaycunamanta\* jap'incu. <sup>14</sup> Ajinallatataj Señorpis cayta nerka: Sumaj willanasta willarajcunamanka causanancupaj hermanosnincu konancu tiyan. <sup>15</sup> Nokarí mana jap'ejchu cani kancunamanta. Cunanpis manamin cay imasta nokaman konawayquichejpajchu kelkamushayquichej. Cusiyniyya mana jap'ispa kancunaman willaraymin. Chay cusiyniyya pipis khechuwanman chayka, wañupuya munayman cusiyniy ama yankha cananpaj. <sup>16</sup> Cristojo camachin caskayraycu paymin camachishawan. Chayraycu cay llanc'ayniyya mana jatunchacunaypajchu. Manachus willarayman chayka, may phutiuy nokapaj canman. <sup>17</sup> Sitajchus cayta ruwayta ajllani chayka, pagoy tiyan. Astawanrí encargaskachus cani chayka, Dios confiawaspa khawapoijninpaj churawan. <sup>18</sup> Ciento nokapaj pagoyka khasillamanta sumaj willanasta willaraymin. Chaywanka willaranapi llanc'askaymanta hermanosniy mana konawancuchu tiyan. Caytamin munani Cristojo cachan caspa.

*Pablo astawan munarka Cristoman runasta pusamuya*

<sup>19</sup> Ajinaka ni pejpa camachin caspapis tucuypa camachin churacorkani. Chayta ruwarkani astawan ashqha runasta Cristoman pusamunaypaj. <sup>20</sup> Israelcunapajka israel runajina churacorkani paycunata pusamunaypaj. Moisespa camachiskasnipi cajcunapajtaj ajinal-lataj churacorkani paycunata pusamunaypaj. Manapis noka Moisespa camachiskasninpichu cani. <sup>21</sup> Chay camachiskasta mana yachajcunapajpis paycunajina churacorkani paycunata pusamunaypaj. Casushanipis Diospa camachiskasninta Cristojo camachiskanpipuni caskayraycu. <sup>22</sup> Sonko-yuyaynincipi pisi callpayojcunapajpis paycunajina churacorkani paycunata pusamunaypaj. Tucuy runaspaj paycunajina churacorkani caywan imaynamantapis waquinta Cristota rejsinancupaj pusamunaypaj. <sup>23</sup> Chayllatapuni ruwani sumaj willanasraycu hermanosniywan cusca cusiyniyoj canaypaj.

\* **9:13** Literal: altarmanta.

*Pablo pay quiquinta camachicun ama khesachaska cananpaj*

<sup>24</sup> Carrerapi tucuy correncu. Correjcunamantarí ujlla premiota jap'in atipaskanmanta. Ajinallatataj kancunapis correychej jap'inayquichejpaj. <sup>25</sup> Chaywanpis atipayta munajka may sinch'ita waquichicunan tiyan. Correjcunapis waquichicuncu tucucoj premiollata jap'inancupaj. Nokanchejrí ni jayc'aj tucucoj cajta jap'inanchejpaj waquichicushanchej. <sup>26</sup> Nokaka atipanaypaj chekantamin correshani, mana waj imasta khawaspa. Ajinata causani tucuy imapi Diosta cusichinaypaj. <sup>27</sup> Nitaj jayc'ajpis sakenichu quiquin munayniy atipanawanta. Cuerpoypatis camachini casunawanpaj. Cayta ruwani wajcunaman willaraskaymantan noka ama khesachaska canaypaj.

## 10

*Ñaupa tatasninchejk uj yachachina*

<sup>1</sup> [Uj runaka atinmanmin khesachaska cayta.]\* Chayraycu yu-yarichishayquichej ñaupa tatasninchejmanta. Egipto jallp'amanta llojsimuspaka tucuynincu phuyu urata rerkancu. Tucuynincutaj kochata ch'aquita chimparkancu Dios paycunata atiyninwan pusaskanraycu. <sup>2</sup> Uj bautismopijina phuyunejta kochanejtawan tucuynincu Moiseswan cuscachacorkancu. Chaywan Moisesta pusajnincupaj jap'erkancu. <sup>3</sup> Tucuynincutaj Diosmanta koska uj quiquin miqhunata miqhorkancu. <sup>4</sup> Tucuynincutaj Diosmanta koska uj quiquin ujyanata ujyarkancu. Chay ujyanataj kakamanta llojsimusharka. Chay kakari Cristo carka. Paytaj paycunawan risharka. <sup>5</sup> Astawanpis tucuy cay jatun ruwaskasmantapis, ancha ashqhas paycunamanta Diosta mana cusickerkancchu. Diostaj paycunata khesacharka. Chayraycu wañuskas khepacaporkancu ch'in pampapi.

<sup>6</sup> Tucuy chay ruwacuskaska nokanchejpaj uj ricuchina cancu. Yachachiwanchejtaj ama paycunajina sajra imasta munajcuna cananchepta. <sup>7</sup> Amaña waj dioscunata yupaychaychejchu paycunamanta waquinjinaka. Paycunamanta kelkaska ajina cashan: "Chay runaska ruwaska diosman jaywaskata miqhoj ujyaj tiyaycucorkancu. Tusojtaj jatarerkancu". <sup>8</sup> Amaña khenchachacuychejchu paycunamanta waquin khenchachacorkancujinaka. Uj p'unchayllapitaj iscay chunca quinsayoj waranka runas wañurarkancu. <sup>9</sup> Amaña Diospa qhuyacuyninta sayc'uchiyychejchu paycunamanta waquin ruwarkancujinaka. Ujmanta ujtaj cataris paycunata wañuracherkancu. <sup>10</sup> Amañataj Diospa contrantaka thutuychejchu paycunamanta waquin thutorkancujinaka. Paycuna wañurachiskas carkancu wañuchej angelnejta.

<sup>11</sup> Tucuy chay imaska ñaupa tatasninchejwan ruwacusharka nokanchejpaj uj ricuchina cananpaj. Tucuy p'unchaycunaj junt'acunan p'unchaymanná kayllashanchej. Chayraycu chay imas kelkaska carka yachachinawanchejpaj.

*Dioska c'achamin*

<sup>12</sup> Ajinaka allinta sayashaskanta yuyajka khawacuchun juchaman ama urmananpaj. <sup>13</sup> Juchaman urmachejka ni uj ima mana runaj muchunanka kancunata jap'isorkachejchu. Diosrí

\* **10:1** Ninayan.

niskanta junt'anpuni. Payka mana sakesonkachejchu muchuyta atinayquichejmanta astawan muchojtaka. Manachayrí urmachej imapi ricucojtiyquichejka ñantajina ruwudsonkachej imaynatapis chaynejta llojsinayquichejpaj. Ajinapimin urmachejtaka atipanquichej mana juchallispalla.

*Aykecuychej waj dioscunata yupaychaymanta*

<sup>14</sup> Chayraycu, munacuskasný, carunchacapuychej waj dioscunata yupaychanamanta. <sup>15</sup> Yuyayniyojcunamanjina parlani. Niskasniya uyarispa yuyaskayquichejmanjina ruwaychej. <sup>16</sup> Diosman t'akaska copata jap'ispa payman graciasta konchej. Cay copata ujyaspataj Cristo j yawarninnejta ujchacunchej. T'antata cusca partispataj Cristo cuerponnejta ujchacunchej. <sup>17</sup> Uj t'antamanta tucuy miqhunchej. Miqhus-pataj uj cuerpolla Cristowan ruwacunchej sapa upjis uj t'antallamanta jap'iskanchejraycu.

<sup>18</sup> Khawaychej israel runasta. Diosman jaywaska miqhunata miqho-jcuna ciertota Dioswan ujchacuncu paycunapurapis. <sup>19</sup> Chaywanka mana nishanichu ruwaska dioscunaman jaywana caskantaka. Nitaj nishanichu ruwaska dioscunaka causashaskantapis. <sup>20</sup> Astawanrí mana Diosta resejcnaka supaycunaman jaywancu manataj Diosmanchu. Manataj munanichu kancuna supaycunawan ujchacunayquichejtaka. <sup>21</sup> Mana atinquichejchu Señorpa copanmantataj supaycunaj copanmantataj ujyaytaka. Nitaj atinquichejchu cusca yupaychayta miqhuspa Señorpa mesanpitaj supaycunaj mesancupitajka. <sup>22</sup> Chayrí ¿Diostachu phiñachiyya munanquichej? Yachanchejjina nokanchejka paymanta mana aswan atiyniyojchu canchej.

*Sapa uj masc'achun wajpa allinninta*

<sup>23</sup> Watejmanta nini, aticun tucuy ima ruwaypis. Astawanrí manamin tucuychu allinpaj. Aticun tucuy ima ruwaypis. Astawanrí manamin chay tucuy ruwaskanchejka hermanosta wiñachinchu. <sup>24</sup> Ama pipis paypa quiquin allinninta masc'achunchu, astawanka runa-masinpa allinninta.

<sup>25</sup> Corinto recobaspi jaywaska miqhunas ranticunapaj tiyan. Chaycunata rantispa miqhullaychej. Sonko-yuyayniyquichejraycurí ama chaymanta tapuychejchu. <sup>26</sup> Yachanchej tucuy jallp'aka tucuy jallp'api cajpis Señorpatamin, paymantataj tucuy miqhunatapis jap'inchej. <sup>27</sup> Sichus Diosta mana jap'icoj runa miqhunapaj wajyasunquichejman chayka, munaspa rillaychej. Imatapis kancunaman kosuskayquichejtatajka miqhuychej, ama tapuspa sonko-yuyayniyquichejraycu. <sup>28</sup> Astawanrí miqhushajcunamanta uj runa willasunquichejman: "Cay miqhunaka cay pacha atiyniyoj imasman jaywaskamanta", nispa. Ajinata uyarispaka ama miqhuychejchu willajpa allinninraycu sonko-yuyayraycupis. <sup>29</sup> Mana kanpa sonko-yuyayniyquimantachu parlani, manachayrí willajpamanta. Sichus paypa sonko-yuyayninta nanachiyman chayka, yankhamin cashan nokapaj tucuya munaskaymanjina ruwanayka. <sup>30</sup> Cay miqhunamanta noka Diosman graciasta koshani. Willawajpajrí cayka sajra rimaskasman rijch'acun. Chaywanka paypa pisi callpayojoj sonko-yuyayninta nanachishani.

*Tucuy imata ruwaychej Diosta jatunchanayquichejpaj*

31 Chayraycu miqhunquichejpis ujyanquichejpis chayka, tucuya ruwaychej Diosta jatunchanayquichejpaj. 32 Ajinaka ama urmachejka caychejchu ni israelcunapaj ni waj llajtayojcunapaj nitaj Diospa ajllacuskasninpajpis.<sup>†</sup> 33 Noka quiuitytaj causashani tucuypi tucuya yanapanaypaj. Manamin nokaj allinnillaytachu masc'ani manachayrí tucupa allinnincuta, runasta pusamuya Cristota rejsinancupaj.

## 11

<sup>1</sup> Nokajina ruwajcuna caychej, imaynatachus Cristojina ruwashani, ajinata.

*Corinto iglesiapi imaynachus warmis canancu*

<sup>2</sup>Cusiska cani mentayquichejtaj yuyaricuwaskayquichejraycu, jaywasuskay yachachinasniya sumajta jap'ispas. <sup>3</sup>Cayta yachanayquichejeta munani: Umaka cuerpomanta curaj caspa camachin. Ajinamin Cristopis curaj tucuy runasmanta. Cunan tucuy kharej umanka Cristomin; warmej umantaj kosan; Cristo umantaj Dios. <sup>4</sup>Sapa uj khari Diosmanta mañacuspa chayrí willaraspapis umanta khatacus-paka umanta p'enkayman churan. <sup>5</sup>Sapa uj warmichus Diosmanta mañacuspa chayrí willaraspapis umanta mana khatacuspaka umanta p'enkayman churan. Chujchan k'ala c'utuskawan ninacun. <sup>6</sup>Sichus mana umanta khatacun chayka, chujchanta c'utucuchun. Sichus Corinto runas chaupipi warmi chujchanta c'utucunan p'enkay canman chayka, warmeka umanta khatacuchunpuni. <sup>7</sup>Khareka ama umanta khatacunanchu Diospa atiyninta rijch'acuynintawan ricuchiskanraycu. Warmirí kharej atiyninta ricuchin kharimanta Dios ruwaskanraycu. <sup>8</sup>Mana kharichu warmimanta ruwaska carka. Manachayrí warmi kharimanta ruwaska carka. <sup>9</sup>Khareka mana warmej allinninpajchu ruwaska carka. Manachayrí warmi kharej allinninpaj ruwaska carka. <sup>10</sup>Chayraycu warmeka ricuchinan tiyan kosanpa atiyninpi caskanta angelespa ñaupakencupi caskanraycutaj. <sup>11</sup>Mosoj causayniyquichejpirí warmipis kharipis quiquinta ruwancu cusca Señorpaj. <sup>12</sup>Warmi kharimanta ruwaska cashajtinpis, cunanka khari warmimanta nacecun. Tucuy imastaj Diosmantamin.

<sup>13</sup> Sumajta reparaspa kancuna uqhu cay imasmanta yuyaychej. ¿Allinchu warmi umanta mana khatacuspa Diosmanta mañacunan? <sup>14</sup>Cay pachapi causayniyquichej cayta yachachin: Khareka warmijina chujchayoj p'enkaymin. <sup>15</sup>Warmipajrí chujcha wiñachicuya allillan-min, cusiytaj paypajka. Chujchaka uj khatanajina payman koskamin. <sup>16</sup>Maykenpis cay jawa astawan churanacuya munan chayka, nokay-coka cayllata niyu: Cayjinata ruwaycu. Diospa ajllacuskasninpis ajinata ruwancu tucuynepi.

*Diospa ajllacuskasnin uqhupi pantaskasmanta*

<sup>17</sup> Cunan cayta encargaspara mana mentayquichejmanchu. Tantacuspaka manamin wiñachicunayquichejpajchu ruwashanchiquichej manachayka Diosmanta aswan carunchacunapaj. <sup>18</sup>Ñaupajta uyarishani tantacojtiyquichej kancuna chaupipi t'akanacuycuna caskanta. Creeymen ajina caskantaka. <sup>19</sup>Kancuna chaupipi t'akanacuycunaka cananpuni tiyan. Chaywan ricuchiconka cheka

<sup>†</sup> **10:32** Literal: Diospa iglesianpajpis.

hermanoschus chayrí mana chekachus caskancuta. <sup>20</sup> Ajinallataj Señormanta yuyaricuspa miqhunapajka mana chaypajjinachu kancunaka tantacushanquichej. <sup>21</sup> Sapa ujmin miqhunanta apacamuspa mana hermanosninta suyaspalla miqhun. Ujri yarkhayniyoj cacushan. Wajri machaska cashan. <sup>22</sup> Mana wasiyojman rijch'acunquichej chayllapi miqhunayquichejpaj ujyanayquichejpajpis. ¿Chayrí pisipajchu khawanquichej Señorpa sutinpi tantacuya? ¿Mana imayojtachu p'enkachinquichej? ¿Imatataj niskayquichejrí? ¿Mentaskayquichejchu? Caypeka mana mentayquichejchu.

*Señorpa mesanpi miqhunaj ninayaskan*

<sup>23</sup> Caytaka noka quiquirymen Señormanta jap'erkani. Caytataj kancunaman jaywarkayquichej. Señor Jesusta jaywaycunan, chay tuta maquisninwan t'antata jap'erka. <sup>24</sup> Graciasta kospataj t'antata parterka. Nerkataj: "Cayka cuerpoysan ninacun, kancunaraycu koska. Cayta ruwaychej, miqhuspa nokamanta yuyaricunawayquichejpaj", nispa. <sup>25</sup> Miqhuskancumanta quiquillantataj copawan ruwaspa nerka: "Cay copaka Diospa mosoj tratonmin. Yawarniyka traton atiyniyoj cananpaj jich'askamin. Cayta ruwaychej, sapa cuti ujyaspas wañuuniymana yuyaricunawayquichejpaj", nispa. <sup>26</sup> Chayraycu sapa cuti cay t'antata miqhuspa cay copata ujyaspaka Señor nokanchejraycu wañuskanta ricuchinquichej. Cayta ruwanquichej pay jamunancama.

*Sapa uj yuyanan tiyan cay miqhunaj ninayaskanpi*

<sup>27</sup> Ajinaka cay t'antata miqhunachej Señorpa copantapis ujyanachej paypa yachachiskanmanjina. Sichus maykenpis mana paypa ninayaskanmanjina ruwan chayka, Señorpa cuerponpa yawarninpapiwan contranta juchallicun. <sup>28</sup> Chayraycu uj runa sumajta khawacuchun pay quiquinpa sonkonta. Ajinata ruwaspalla cay t'antamanta miqhuchun cay copamantapis ujyachun. <sup>29</sup> Cay t'anta copapiwanka Señor nokanchejraycu wañuskantamin ricuchin. Runaka chaypi mana sumajta yuyaspas miqhun chayka, pay qui Quinta juchachacun. <sup>30</sup> Chayraycu kancuna uqhupi ashqha onkoskas ashqastaj pisi callpayojcuna cancu. Waquintaj wañuporkancu. <sup>31</sup> Sichus nokanchej quiquin sonkonchejta chekanta khawacusunman chayka, mana juchachaskachu cashasunman carka. <sup>32</sup> Astawanpis Señor nokanchejta wanachispa wawasnintajina yachachiwanchej. Cayta ruwan juicio p'unchaypi ama cay pacha runaswan juchachaskas cananchejpaj.

<sup>33</sup> Ajinaka, hermanosní, Señorpa miqhunanta miqhunapaj tantacuspaka suyanacuychej tucuy cusca canayquichejcama. <sup>34</sup> Sichus maykenpis yarkhayniyoj chayka, wasinpi miqhuchun. Ajinata ruwaychej tantacuskayquichej ama juchachaska cananpaj. Chay uj imastaka jamuspa arreglasaj.

## 12

*Santo Espíritu imaymana atiycunata kowanchej*

<sup>1</sup> Cunanka, hermanosní, Santo Espíritu atiycunata koskanmanta yachanayquichejta munani.

<sup>2</sup> Yachanquichejjina manaraj Diosta rejshaspa pantaypipuni pusaycachaskas carkanquichej ruwaska upa dioscunata yupaychanapaj.

<sup>3</sup> Chayraycu kancunaman willayta munani: Ni pipis Diospa Espirituwan parlaspaka, “Jesuska maldeciska”, ninchu. Runaka Espiritunejlata, “Jesuska Señorniymin”, niyta atin.

<sup>4</sup> Ajinallataj imaymana atiycuna tiyan. Chaywanpis uj c'ata Espiritumin tucuyman kon. <sup>5</sup> Imaymana yanapaycunapis tiyan. Astawanpis uj c'ata Señornillanchejpaj tucuya ruwanchej. <sup>6</sup> Imaymana ruwanas tiyan. Astawanpis uj c'ata Dios tucuy ruwanaspi atiyninwan tu cuyninchejta callpachawanchej. <sup>7</sup> Santo Espíritu Diospa atiyninta ricuchin nokanchejnejta. Chaymanjina sapa ujman ruwanapaj atiyya kowanchej tucuy ajllacuskasninta mosoj causaypi yanapanawanchejpaj. <sup>8</sup> Espiritumin ujman atiyya kon yuyaywan willarananpaj. Ujman quiquin Espiritullataj atiyya kon cheka cajta yachachinanpaj. <sup>9</sup> Wajmantaj quiquin Espíritu kon sumajta Diospi jap'icuya atinanpaj. Ujmantaj quiquin Espíritu atiyya kon onkoskasta thañichinanpaj. <sup>10</sup> Ujmantaj atiyya kon t'ucunasta ruwananpaj. Ujmantaj atiyya kon Diosmanta willarananpaj. Ujmantaj atiyya kon willarajcunamanta yachananpaj sichus Diosmanta willarancu manachus. Wajman atiyya kon mana yachaskan parlaycunapi parlananpaj. Ujmantaj atiyya kon chay parlaskasta sut'inchananpaj. <sup>11</sup> Quiquin Espiritulla tucuy chay atiycunawan ruwan Diospa atiyninta ricuchinanpaj. Munayninmanjinataj imaymana atiyya sapa uj runaman kon.

#### *Uj cuerpopeka ashqha imas tiyan*

<sup>12</sup> Uj runaj cuerponpeka maquis, chaquis, uma, chayjina partes tiyan. Tucuy chay ashqha partes caspapis uj cuerpolla cashan. Ajinallataj cashan Cristowan ujchaska ajllacuskasnинwanpis. <sup>13</sup> Tucuy nokanchej uj Santo Espiritullawanmin bautizacuspa Cristowan ujchacorkanchej uj cuerpolla cananchejpaj. Israelpunatapis, waj llajtayojcunatapis, camachistapis, mana camachistapis tucuytapis uj Espiritullawan Dios junt'achiwarkanchej.

#### *Uj cuerpolla canchej*

<sup>14</sup> Uj cuerpopka mana uj partellachu manachayrí ashqha partespis ujlla. <sup>15</sup> Sichus chaqui ninman: “Noka mana maquichu cani. Chayraycu mana cuerpojtachu cani”. Chayta nishaspapis cuerpojtapunimin. <sup>16</sup> Sichus ningri ninman: “Noka mana ñawichu cani. Chayraycu mana cuerpojtachu cani”. Chayta nishaspapis cuerpojtapunimin. <sup>17</sup> Sichus tucuy cuerpo ñawi canman chayka ¿imaynatataj runaka uyarinmanrí? Chayrí sichus tucuy cuerpo ningri canman chayka ¿imaynatataj runaka musqhinmanrí? <sup>18</sup> Ajinaka sapa uj parteta ruwananta ruwananpaj Dios churarka munayninmanjina. <sup>19</sup> Sichus tucuynin uj partella canman chayka, cuerpo mana canmanchu. <sup>20</sup> Astawanpis chay ashqhas uj cuerpollamin.

<sup>21</sup> Ñaweka mana maquita niyta atinchu: “Mana faltachayquichu”. Nitaj umapis chaquita niyta atinchu: “Mana faltachayquichu”. <sup>22</sup> Manachayrí cuerpomanta pisi callpayojman rijch'acojcunata astawan munanchej c'achata ruwaskancuraycu. <sup>23</sup> Cuerpomanta pisipaj khawaskastaka astawan p'achallichinchej. Mana khawana cajcunatarí sumajta khatanchej astawan curajpaj khawaspa. <sup>24</sup> C'acha partesnинchejka allilan cashancu ajina mana khataskalla. Astawanpis Dios cuerpota yuyayninwan sumajta ruwarka. Chayka carka pisipaj

rijch'acoj astawan curajpaj khawaska cananpaj. <sup>25</sup> Ajinata ruwarka cuerpo ama t'aka t'aka cananpaj, manachayka tucuy munacuywan ricunacuncupaj. <sup>26</sup> Sichus ujnin nanan chayka, tucuynin cusca nanancu. Sitajchus ujnin jatunpaj khawaska cashan chayka, tucuynin cusca cusicuncu.

### *Cristowan ujchaskacunaka paypa cuerponmin*

<sup>27</sup> Cunanka kancuna Cristoj cuerpon canquichej, sapa ujtaj chay cuerpojta canquichej. <sup>28</sup> Ajinaka tantaska hermanos uqhupi Dios sapa ujta churarka ruwananpaj. Ñaupajta churarka cachasninta, iscay cajpiri willarajcunata, quinsa cajpitaj yachachejcunata. Chanta churarka: Atiyninwan t'ucunasta ruwajta, onkoskasta thañichejta, Diospa runasninta yanapajta, pusajcunata, mana yachaskan parlaycunapi parlajcunatataj. <sup>29</sup> Mana tucuychu cachasnин cancu. Mana tucuychu willarajcuna cancu. Mana tucuychu yachachejcuna cancu. Mana tucuychu jatun t'ucunasta ruwajcuna cancu. <sup>30</sup> Mana tucuychu thañichejcuna cancu. Mana tucuychu mana yachaskan parlaycunapi parlajcuna cancu. Mana tucuychu chay parlaskata sut'inchajcuna cancu. <sup>31</sup> Astawanri tucuy sonkowan munaychej sumachej atiycunata hermanosta wiñachinayquichejpaj. Cay jawaka ricuchiskayquicheraj tu-cuymanta aswan sumaj ñanta mosoj causayniyquichejpaj.

## 13

### *Ruwaskaska munacuylawan allinta wiñachin*

<sup>1</sup> Runacunaj parlaynincipi angelcunaj parlaynincupipis parlayman. Sitajchus Diosta runastataj mana munacuymanchu chayka, khasilla parlayman. Ch'usaj fierro wakan ajina chayrí thanta lata, calancalan, wakaskanmanjina tucuni. <sup>2</sup> Sichus willarajtaj cayman. Tucuy pacaska imasta sut'ita entiendeyman. Diospa tucuy cheka cajnintapis yachayman. Sitajchus tucuy sonkojwan Diospi jap'icuskay canman orkosta khepanta khepanta wajnejman okharichinaycama. Manataj munacuymanchu chayka, mana imapischu cani. <sup>3</sup> Sichus tucuy capu niyta jaywaramuyman wajcha runasman. Quiquin cuerpoytapis jaywayman ruphachiska cananpaj. Manataj munacuymanchu chayka, tucuy ruwaskasniyjis mana ni ima allinniypajchu.

### *Munacojka cayjinata ruwan*

<sup>4</sup> Munacojka mana sayc'uspа muchucun, c'acha cajtapuni ruwan. Mana envidiacunchu manataj jatunchacunchu, nitaj pay quiquinta curajpaj khawacunchu. <sup>5</sup> Munacojka ni piman p'enkay cajta ruwanchu; manataj payllapajchu masc'an; manataj phiñacunchu. Munacojka runamasinpa sajra ruwaskanta mana sonkonpi wakaychanchu; <sup>6</sup> manataj juchanmanta cusipayanchu; astawanpis c'acha ruwaskasmanta cusicun. <sup>7</sup> Munacojka hermanonpa tucuy pantaskanta ch'inllamanta muchucun; confianpuni suyanpunitaj hermanonta Dios yanapananta; tucuya muchucun hermanonpa allinninpaj.

### *Munacuyka ni jayc'aj tucucunchu*

<sup>8</sup> Munacuyka ni jayc'aj tucucunchu. Espiritoka atiycunata cu-nan p'unchaycuna koshan ajllacuskasninta wiñachinanpaj. Willaray-cuna canman, chaypis tucuconka; waj parlaycunapi parlay canman, chaypis ch'innyaponka. Cheka cajta yachay canman, chaypis tucuconka.

<sup>9</sup> Cunanka pisillata yachanchej pisillatataj sut'inchanchej. <sup>10</sup> Astawanrí jakay jamoj p'unchaypimin sumajta yachasun. Chaypacha pisi yachayn-inchej tucuconka.

<sup>11</sup> Wawa cashaspaka wawajina parlaj cani, wawajina yuyaj cani, wawajina unanchaj cani. Runaña casparí wawajina ruwanastaka sakepuniña. <sup>12</sup> Ajinallatataj cunanpis aypullata ricushanchej espejone-itajina. Jakay p'unchaypirí uya uyata Cristota ricusunchej. Cunanka pisillata yachani. Chanta sut'ita yachasaj imaynatachus Diospis allinta rejsiwan ajinata. <sup>13</sup> Ajinaka Diospi jap'icuywan, Diospi confiacuywan, munacuywanka ni jayc'aj tucuconkancuchu. Cay quinsamantari cura-jka munacuymin.

## 14

### *Willarayka ajllacuskacunata sumajta wiñachinapajmin*

<sup>1</sup> Tucuy sonkowan masc'aychej munacuywan causyta. Ajinallataj Espíritoj koskan atiycunata tucuy sonkowan munaychej. Astawanka Diospa niskanta willarayta munaychej. <sup>2</sup> Mana yachaskan parlaycunapi parlajka mana runaspajchu parlan, manachayka Diospaj. Pacaska cajtamin Espiritunejta parlan. Chayraycu ni pipis paypa niskanta uyarispa entiendenchu. <sup>3</sup> Astawanpis willarajka runaspaj parlashan wiñachinapaj, callpachanapaj, sonkochanapajpis. <sup>4</sup> Waj parlaycunapi parlajka pay quiquinta wiñachicun. Willarajrí tantaska hermanosta wiñachin.

<sup>5</sup> Munayman tucuy kancuna waj parlaycunapi parlajcuna canayquichejta. Astawanka munani willaranayquichejta. Curajmin willarajka waj parlaycunapi parlajmantaka. Astawanrí chay parlaskanta sut'inchajtillan tantaska hermanosta wiñachinapaj canman.

### *Parlay reparanapajjina*

<sup>6</sup> Cunanka, hermanosní, sichus waj parlaycunapi parlaspa jamuyquichejman chayka ¿imapitaj yanapayquichejman? Parlaskaytaka entiendenayquichej tiyan. Chayraycu kancunata wiñachinapajka cheka cajta sut'inchasunayquichej tiyan, espíritu yachayta sut'inchasunayquichej tiyan. Chayrí willarasunayquichej tiyan, yachachisunayquichejpis tiyan.

<sup>7</sup> Yachanquichejjina mana causayniyoj imaspis wakancu, kena chayrí charango.\* Tucuy chay wakay quiquillan cajtenka mana yachayta atiwajchejchu ima taquinatachus tocaskancuta. <sup>8</sup> Guerrapaj corneta mana sut'itachu tocanman chayka, mana pipis ch'ajwapaj waquichicunmanchu. <sup>9</sup> Ajinallatajmin kancunawanpis. Sichus mana sut'itachu parlawajchej chayka, ni pipis yachankachu imamantachus parlaskayquichejta. Wayraman parlajcunajinamin canquichej. <sup>10</sup> Yachanchejjina ancha ashqha parlaycuna cay pachapi tiyan. Tucuynincutaj entiendenapajjina cancu. <sup>11</sup> Chayraycu sichus waj parlayta mana entiendenichu chayka, waj llajtayoj parlajpajka forasterojina cani. Paypis nokapajka ajinallatajmin cashan. <sup>12</sup> Kancunapis ajinallataj Espíritoj koskan atiycunata ancha munashanquichej. Chayraycu tucuy sonkowan munaychej tantaska hermanosniyquichejta astawan wiñachinayquichejpaj.

\* **14:7** Literal: flauta chayrí arpa.

*Yuyayniyquiwan parlay*

<sup>13</sup> Chayraycu waj parlaycunapi parlajka Diosmanta mañacuchun parlay sut'inchay atiyta jap'inanpaj. <sup>14</sup> Sichus waj parlaycunapi Diosmanta mañacuni chayka, espírituy mañacun. Yuyayniyri mana reparanchu mañacuskayta. <sup>15</sup> Ajina cajtenka mañacusaj espiritywan, mañacusajtaj yuyayniywan. Taquisaj espiritywan, taquisajtaj yuyayniywan. <sup>16</sup> Espiritullayquiwan parlajtiyqueka mana yachachiska runaka kanpa yupaychaskayquita mana reparanchu. Chayraycu Diosman graciasta kojtiyqui: "Ajina cachun", nispa cutichiyya mana atinchu. <sup>17</sup> Chekatapuni graciasta sumajta koshanqui, ujrí mana wiñachiskachu. <sup>18</sup> Diosman graciasta koni astawan waj parlaycunapi parlasmaymanta tucuy kancunamanta. <sup>19</sup> Astawanri hermanos chaupipeka phishka palabrasta yuyayniywan parlayta munayman tucuya yachachinaypaj. Chayta astawan munani waj parlaypi chunca waranka palabrasta parlanaymanta niskaka.

<sup>20</sup> Hermanosníy, ama wawa yuyayniyoj caychejchu. Arí, sajra imasllapi wawajina caychej. Astawanri machu runa yuyayniyoj caychej. <sup>21</sup> Palabranpi israelcunaman ajinata nerka Dioska: "Waj parlayniyocunanejta parlasmayquichej juchasniyquichejraycu. Chaywanpis manapuni casuwanquichejrajchu". [Paycunaka mana casorkancuchu Diospa niskanta quiquin parlaynincipi willashajtinpis. Chayraycu juchasnicuryaycu paycunata juchacharka.]† <sup>22</sup> Ajinaka waj parlaycunapi parlayka juchachaymanta uj ricuchinajina cashan Diospi mana jap'icojcunapaj, astawanpis Diospi jap'icojcunapajka mana. Willaraytaj Diospi jap'icojcunapaj uj ricuchina cashan yanapayniinmanta, mana jap'icojcunapajri mana. <sup>23</sup> Cunanka Señorpa sutinpi tucuy tantacojtiyquichej tucuytaj waj parlaycunapi parlashawajchej. Yaycumuncumantaj mana yachachiskacuna chayri Diospi mana jap'icojcuna. Chekatapuni nenkancu locoman tucuskayquichejta. <sup>24</sup> Astawanpis tucuviyquichej Diospa niskanta willarashawajchej. Yaycumuncumantaj Diospi mana jap'icoj runa chayri uj mana yachachiskapis. Tucuy willaraskayquichej payman juchanta reparachenka. Chayta uyarispataj sonkonta allinta khawaonka. <sup>25</sup> Sonkonpa pacaska cajcunaka ricuchiconka. Ajinapitaj pampaman c'umuycuspa Diosta yupaychanka. Sut'itataj willanka, chekatapuni Dios kancuna chaupipi cashaskanta.

*Tantacuspa hermanosta wiñachinapaj cajta ruwaychej*

<sup>26</sup> Hermanosníy, tantacuspaka tucuy ruwaskayquichejka hermanosniyquichejta wiñachinapaj cachun. Sapa uj jamun yupaychanapaj taquinawanpis chayri yachachinawanpis chayri Diosmanta ricuchiskawanpis chayri waj parlaywanpis chayri cay parlaskata sut'inchawanpis. Chaytaka Espíritoj koskanmanjina wiñachinapaj sapa uj ruwachun. <sup>27</sup> Waj parlaypi parlajchus canman chayka, parlajcunamanta ujpis chayri iscaypis parlachuncu. Quinsamanta aswanri ama cachunchu; turnonpitaj parlachuncu. Chay parlaskatataj sut'inchachun uj. <sup>28</sup> Sitajchus chayta sut'inchaj mana canmanchu chayka, parlajka ch'inlla cacuchun tantacuypi. Sapan cashaspa pay quiquinpaj parlachun Diosmanpis. <sup>29</sup> Willarajcunamanta

† 14:21 Ninayan.

iscay chayrí quinsa willarachuncu. Ujcnataj sumajta uyarichuncu willaraskancu chekachus manachus caskanta yachanancupaj.<sup>30</sup> Willarashajtintajchus uyarishajman Dios uj willayta sut'inchanman chayka, willashajka ch'inyacapuchun.<sup>31</sup> Ajinapeka tucuy willarayta atinquej, ujmanta uj. Chaywanka tucuy yachaonkancu tucuytaj sonkochaonkancu.<sup>32</sup> Willarajcunaka Espíritoj koskan ruwaynincipi casuchicuncumin, turnoncutataj suyancu.<sup>33</sup> Ch'ajwayka manamin Diosta cusichinchu, manachayrí allinpi cacuylla. Diosman t'akaska runasnenka tucuynej tantacuypi chayjina yachachiskas cancu.<sup>34</sup> Warmiska ch'inlla cacuchuncu tantacuypi manamin parlanancuchu, manachayrí casucoj cachuncu. Israelcunaj camachiskasnincipipis chayta nin.<sup>35</sup> Sichus warmis imatapis yachayta munancuman chayka, wasipi kharista tapuchuncu. Warmi tantacuypi parlananka p'enkaymin.

<sup>36</sup> ¿Yuyanquichejchu kancuna Corinto llajtayojcunalla tantacuy costumbresta ajllanayquichej caskanta? Mana kancunallamantachu Diospa niskanka llojserka nitaj kancunallamanchu chayamorka.<sup>37</sup> Cay kancunaman kelkamushaskayka Señorpa camachiskanmin. Sichus maykenpis willaraj caskanta yuyan chayrí Espíritoj pusaskan caskanta chayka, chay kelkamuskayta allinta yachachun.<sup>38</sup> Sitajchus maykellanpis chayta mana rejsiyta munanchu chayka, ama payta rejsichuncuchu.

<sup>39</sup> Ajinaka, hermanosníy, Diospa niskanta willarayta tucuy sonkowan munaychej. Waj parlaycunapi parlajta amataj jarc'aychejchu.<sup>40</sup> Astawanrí tucuya c'achata, allinta cananmanjina ruwaychej.

## 15

### *Dios wañuymanta Cristota causarichimorka*

<sup>1</sup> Hermanosníy, kancunaman sumaj willanas willaskayta yuyarichisuya munani. Cayta jap'icorkanquichej caypitaj sumajta sayashanquichej.<sup>2</sup> Chay sumaj willanasnejta juchamanta cacharichicushanquichej willaraskaytachus sumajta wakaychanquichej chayka. Yuyanitaj mana yankhallaschu creeskayquichejta.

<sup>3</sup> Nokapis jap'iskaytamin kancunaman yachacherkayquichej. Caycunamanta aswan cajcunaka cancu: Diospa palabranmanjina juchanchejraycu Cristo wañuskanmin;<sup>4</sup> pay p'ampaska carka; palabranmanjina quinsa p'unchaypitaj Dios payta causarichimuskan.<sup>5</sup> Pedroman riqhurerka, chaymantataj chay Chunca Iscayniyojman.<sup>6</sup> Khepanpi riqhurerka phishka pachaj curaj tantaska hermanosman. Paycunamanta ashqhasraj causashancu. Waquincunarí wañuypi samacushancuña.<sup>7</sup> Khepanta Jacoboman riqhurerka, chaymantataj tucuy cachasninman.

<sup>8</sup> Tucuymanta khepanpitaj nokamanpis riqhuriwarka. Nokaka mana yuyaymanta uskhayta naceskajinamin cani.<sup>9</sup> Nokaka cachasninmanta astawan pisi cajninpaj khawacuni. Manataj cachan canaypajjinachu cani Diospa ajllacuskasninta wañuchiskas canancupaj sinch'ita khatiy-cachaskayraycu.<sup>10</sup> Diospa c'acha yanapaynnejtari cachan cani. Chay c'acha yanapaynenka nitaj khasillachu nokapaj carka. Manachayka tucuy cachasninmanta astawan sinch'ita llanc'arkani. Chaytarí mana nokachu, astawanpis c'acha Dios nokawan ruwarka.<sup>11</sup> Chayraycu noka

chayrí paycunapis, quiquin sumaj willanasllatapuni willarashaycu. Chaytataj jap'icorkanquichej.

*Waquin pantancu causarimuyka mana canchu, nispa*

<sup>12</sup> Willaraskaycoka Cristo wañuymanta causarimuskanmin. Chanta ¿imaynatataj waquin kancunamanta nishanquichej wañuymanta causarimuy mana caskanta? <sup>13</sup> Manachus wañuymanta causarimuy tiyan chayka, ni Cristo quiquinpis causarimorkachu. <sup>14</sup> Sichus Cristo mana causarimorkachu chayka, willaraskaycu willanaska yankhamin, yankhatataj Diospi jap'icorkanquichej. <sup>15</sup> Chaywanpis ajina cajtenka Diosmanta llulla willajcuna riqhuriycu. Ajinapeka Diospa contranpi willarkaycu, pay Cristota causarichimuskanta willaspaka. Payrí mana Cristota causarichimorkachu sichus ni jayc'aj wañuskacuna causarimuncuchu chayka. <sup>16</sup> Sitajchus wañuskacuna mana causarimuncuchu chayka, ni Cristo quiquinpis causarimorkachu. <sup>17</sup> Sitajchus Cristo mana causarimorkachu chayka, Diospi jap'icusquichejka yankhalla, juchasnillayquichejpirajtaj cashanquichej. <sup>18</sup> Chaymanjinaka Cristopi jap'icuspa wañuska hermanosniyquichejpis wiñaypaj chincaskas cancu. <sup>19</sup> Sichus Cristopi confiacushanchej cay pacha causayllapaj chayka, tucuy runasmanta aswan phutiy wajchas canchej.

*Cristoj causarimuskan ricuchin nokanchejpis causarimunanchejta*

<sup>20</sup> Astawanpis chekatapuni Cristoka wañuymanta causarimorka. Payka wañuskacuna causarimunancumanta ñaupaj pokoyjinamin. <sup>21</sup> Imaynatachus uj runaneja wañuya cay pachaman chayamorka, ajinallatataj wañuymanta causarimuyka uj runaneja tiyan. <sup>22</sup> Imaynatachus Adanwan cuscachacuspa tucuy wañuncu, ajinallatataj Cristowan tucuy cuscachacojcunatapis Dios causarichimonka. <sup>23</sup> Sapa uj caskanmanjina causarimonka. Cristo ñaupajta causarimorka. Chaymantataj pay cutimojtín paypata cajcuna causarimonkancu. <sup>24</sup> Chaymanta canka tucuchacuya. Chaypacha tucuy camachejcunata tucuy atiynijojcunatapis atipaspa paycunamanta Dios tucuy atiynincuta khechonka. Tucuy atipaska cajtintaj Cristoka camachinanpaj atiyninta Dios Tatanman jaywanka. <sup>25</sup> Cristoka camachinanmin tiyan enemigosninta Dios k'alata tucuchinancama. <sup>26</sup> Chaycunamanta khepa tucuchiska cajka wañuymen. <sup>27</sup> Palabranpi nin: Dios tucuy imata Cristoj atiynin uraman churarka. Tucuy imata nispaka sut'i cashan atipaj Dioska mana atipaskachu caskanta. <sup>28</sup> Paymin tucuy imata Cristoj atiynin uraman churarka. Chayraycu tucuy k'ala atipaska cajtintaj Wawan Cristopis pay quiquin Diospa atiynin uraman churaconka. Ajinata churaconka Dios tucuy atiynijo tucuy imapi tucuy paja cananpaj.

*Chayraycu rijch'aricuychej cheka yuyayman*

<sup>29</sup> Causarimuymanta, mana ajina cajtenka wañuskacunapaj bautismo khasilla cashan. Sichus ni jayc'aj wañuskacuna causarimuncuchu chayka ¿imaraycupunitaj paycunapaj bautizacuncu?

<sup>30</sup> Astawanpis ¿manachu nokaycupis mana yuyayniyoj runasjina riqhuriycu wañuy patapi tucuy ratupi causaspaka? <sup>31</sup> Hermanosníy, sapa p'unchay wañuspajinani. Señorninchej Cristo Jesuswan ujchacuspa chayta chekata niyquichej cusiyniyu caskayquichejraycu. <sup>32</sup> Cristoj

sumaj willanasninraycu makanacorkani cay Efeso llajtapi leonjina sajra runaswan. Chaytataj runaj yuyaynillanwan ruwayman chayka, ni ima allinpis nokapaj canmanchu. Sichus ni jayc'aj wañuskacuna causarimuncuchu chayka: Miqhunachej, ujyanachej, k'ayamin wañusun, nincujina.

<sup>33</sup> Amaña pantachicuychejchu. Sumaj runaka sajra runaswan purispaka sajramanmin tucun. <sup>34</sup> Rijch'aricuychej cheka yuyayman. Amaña juchallicuychejchu. Waquin kancunamanta manarajmin Diosta rej sincuchu. Chaytaka p'enkayniyquichejpaj nini.

*Wañuskacuna imayna cuerpowanchus causarimonkancu*

<sup>35</sup> Ichapis pipis cayjinata tapunman: ¿Imaynatataj wañuskacuna causarimuncu? ¿Imayna cuerpowantaj cutimonkancu? <sup>36</sup> ¡Mana yuyayniyoj runa! Tarpuskayqui mujuchus mana wañun chayka, mana llojsimunchu. <sup>37</sup> Tarpunqui k'ala mujuta, trigotapis chayrí waj mujutapis. Manataj k'ala mujuchu llojsimun manachayrí yura. <sup>38</sup> Diosmin chay mujuman cuerpota kon munayninmanjina. Sapa laya mujumantaj cuerpota kon caskanmanjina. <sup>39</sup> Tucuy aychapis manallataj quiquinchu. Astawanpis runa aychaka waj laya, uywa aychaka waj laya, p'isko aychaka waj laya, challwa aychapis waj laya cancu. <sup>40</sup> Ajinallataj janaj pacha imas tiyan. Cay pacha imaspis tiyallantaj. Astawanpis janaj pacha imaska waj laya lliphipiyniyoj cancu cay pacha imasmanta niskaka. <sup>41</sup> Inteka waj laya lliphipiyniyoj. Quillapis waj laya lliphipiyniyoj. Ch'ascaspis waj laya lliphipiyniyoj. Uj ch'ascaspis waj layata c'anchan ujmantaka.

*Cristoman rijch'acusunchej*

<sup>42</sup> Ajinamin wañuymanta causarimuyka: Mujujina tarpucun uj ismoj imalla. Diostaj jatarichimun ni jayc'aj ismoj cajta. <sup>43</sup> Tarpucun pisipaj khawaska. Diostaj jatarichin lliphipejta. Tarpucun pisi callpayo. Diostaj jatarichin atiyniyoja. <sup>44</sup> Tarpucun aycha cuerpo. Diostaj espíritu cuerpota jatarichin. Sichus aycha cuerpo tiyan chayka, callantaj espíritu cuerpopis.

<sup>45</sup> Ajinata Diospa palabranpipis nin: Ñaupaj runa, Adanta, Dios ruwarka causashaj runata. Khepa caj Adantaj, Cristo, causayta koj espiritumin. <sup>46</sup> Astawanpís manamin espirituchoch ñaupaj carka, manachayrí aycha cuerpo, chaymantaraj espíritu cajka. <sup>47</sup> Ñaupaj runaka jallp'amanta ruwaskamin. Iscay caj runa Cristotaj janaj pachamanta, Señormin. <sup>48</sup> Imaynachus jallp'amanta ruwaska ñaupaj runaj cuerponka, ajina cuerpoyojllataj cancu cay pacha runaspis. Imayna cuerpoyojchus janaj pacha runaka ajina cuerpoyojllataj cankancu janaj pacha llajtayo-jcunapis. <sup>49</sup> Imaynachus jallp'amanta ruwaska runaman rijch'acunchej, ajinallataj janaj pacha runaman rijch'acunchej.

*Ujjinaman cutichiskas casunchej*

<sup>50</sup> Hermanosniy, caytamin niyquichej: Aychamanta yawarmanta cuerpoka mana Dioswan causanmanchu.\* Nitaj ismoj cuerpopis janaj pachapi wiñaypaj causanmanchu. <sup>51</sup> Uyariwaychejmá sut'inchayquichej uj pacaska imata: Mana tucuychu nokanchejmanta wañupi samacusun. Astawanrí tucuymín ujjinaman cutichiskas casunchej,

\* **15:50** Literal: Diospa reinonpi.

<sup>52</sup> uj ratitupi, uj ñawi ch'illmiypi khepa corneta wakaypi. Chaypacha wañuskacunataj causarimonkancu ni jayc'aj ismoj cuerposwan. Nokanchejtaj ujjinaman cutichiskas casunchej. <sup>53</sup> Cay ismoj cuerposwan p'achallicunan tiyan ni jayc'aj ismojwan. Cay wañoj cuerpotaj p'achallicunan tiyan ni jayc'aj wañojwan.

*Manaña wanuyta manchachicunchejchu*

<sup>54</sup> Cay ismoj cuerpo ni jayc'aj ismojwan p'achallicojtin, cay wañoj cuerpo ni jayc'aj wañojwan p'achallicojintajka chantaña junt'aconka Diospa palabranka:

Wañuya k'ala tucuchiskamin.

Diosmin atipanña.

<sup>55</sup> ¿Wañuya nokanchepta atipawasunmanrajchu?

¿Atinmanrajchu wañuya wañuchej wach'inanwan nokanchepta manchachiyta?

¡Ni jayc'aj!

<sup>56</sup> Wañuya wach'inanka juchamin. Juchaj callpantaj Diospa camachiskasnin, [imaraycuchus camachiskasnin ricuchiwanchej wañuyman juchachaskas caskanchejta.]† <sup>57</sup> ¡Diosman gracias wañuya atipaj caskanraycu! Dios nokanchejpaj atipan Señorninchej Jesucristonejta.

<sup>58</sup> Chayraycu, munaska hermanosný, sumajta sayaychej, mana cuyurej rumijina. Señorpa ruwayninpí may ashqhatá llanc'allaychejpuni. Yachaychejtaj sinch'i llanc'ashaskayquichejka mana khasichu Señorpi caskanta.

## 16

*Diospa runasninpaj tantaska kolkemanta*

<sup>1</sup> Cunanka parlaskayquichej Diospa runasninpaj kolketa tantanayquichejmanta. Galacia jallp'api tantacoj hermanosman yachacherkaniña cay jawa. Quiquillantataj kancunapis ruwaychej.

<sup>2</sup> Sapa Domingo p'unchaypi sapa uj kancunamanta kolkenmanta jap'icuskanmanjina jallch'anaman churachun. Chayta wakaychaychej chayamojiy ama kolketa tantanayquichej cananpaj. <sup>3</sup> Chanta allinpaj khawaska kharista kancunamanta ajllaychej. Chayamuspaña chay kharista cartaswan cachasaj Jerusalén llajtaman. Chay qhuyacuyniyquichejwan tantaska kolketa apankancu. <sup>4</sup> Sitajchus noka rinaypis allilan rijch'acunman chayka, nokawan renkancu.

<sup>5</sup> Macedonia jallp'anejta watusoj risaj, chaypacha kancunajman jamusaj. Macedonianejman rejmin churacushani. <sup>6</sup> Kancunawanri ashqha p'unchaycunata caricusaj chaychus tucuy chiri quillastapis. Ajinapi kancuna yanapawanquichej maymanpis rinay cajtin. <sup>7</sup> Cunari manamin pasajjinalla kancunata waturiytachu munani. Señor munajtenka unay p'unchaycunata kancunawan caricuytamin munashani. <sup>8</sup> Cunapajka cay Efeso llajtapi cacuya yuyani Espíritu p'unchaycama. <sup>9</sup> Caypi ashqhasmin Diosmanta uyariyta munashancu. Chayraycu cosa riqhurishan nokapaj Señorpa atiyninwan caypi llanc'anayka. Chaywanpis ashqha churanacojcunataj jatarishancu.

*Timoteo chayajtin yanapanancuta, nin*

† 15:56 Ninayan.

<sup>10</sup> Timoteo chayajtenka sumajta khawaychej kancunawan wasinpijina ama manchachicuspalla cacunanpaj. Paypis nokajinallatajmin Señorpaj llanc'an. <sup>11</sup> Chayraycu ni pipis payta manacajpaj khawachunchu. Astawanpis payta yanapaychej allillanta cutimunawanpaj, hermanoswan cusca jamunanta suyashaskayraycu.

<sup>12</sup> Hermano Apolosmanta parlaspaka ashqhasta payta nerkaní kancunajman hermanoswan jamunanta. Cunan jamuytarí ni imaynamanta munarkachu. Astawanpis jamun nanopaj allin cajtenka jamonka.

### *Rijch'ariskaspuni caychej*

<sup>13</sup> Rijch'ariskaspuni caychej. Señorpi jap'icuspa sumajta sayachej. Kharijina ruwaychej. Callpachacuychej Señorpi. <sup>14</sup> Tucuy ruwaskayquichej munacuywan cachun.

### *Sumajpaj khawaychej Señorpi yanapajcunata*

<sup>15</sup> Hermanosný, yuyaricuychej Estefanasmanta wasinpi cajcunamantawan. Paycuna Diospi jap'icuspa ñaupaj pokojina Acaya jallp'api hermanosmanta carkancu. Sumajta churacuncu Diospa runasninta yanapanancupaj. <sup>16</sup> Niyquichejtaj cayjina ruwaj runastaka munacuywan casunayquichejta. Tucuy yanapajcunata Señorpaj sinch'ita llanc'ajcunatapis munacuywan casuychej. <sup>17</sup> Hermanocuna Estefanas, Fortunato, Acaicopis nokaman chayamuskancumanta cusicuni. Kancuna mana caypi cashajtiyquichej paycuna sutiyquichejpi yanapawarkancu. <sup>18</sup> Nokata sonkochawarkancu kancunatapis. Chayraycu sumajpaj jap'iychej cayjina caj runastaka.

### *Napaycucuna*

<sup>19</sup> Napaycamusunquichej Asia jallp'api tiyacoj Diospa ajllacuskas-nin. Ashqhata napaycamusunquichej Señorpi hermano Aquila warmin Priscawan wasincupi tantaska hermanospianpis. <sup>20</sup> Tucuy hermanos napaycamusunquichej. Kancunapura Señorpi ashqha munacuywan napaycunacuychej.

<sup>21</sup> Noka, Pablopis, quiquin maquiywan kelkarispa napaycamushayquichej.

<sup>22</sup> Maykenpis Señorta mana munacojtaka Dios payta tucuchichun. ¡Señorninchej jamushanña!

<sup>23</sup> Señor Jesuspa c'acha yanapaynin kancunawan cachun.

<sup>24</sup> Cristo Jesuswan ujchaska tucuy kancunata munacuyquichej. Ajina cachun.

## SEGUNDA CARTA DEL APOSTOL SAN PABLO A LOS CORINTIOS

*Pabloj iscay caj kelkaskan Corintopi caj hermanosman*

<sup>1</sup> Noka, Pablo, Cristo Jesuspa cachan cani Diospa munaynинејта. Hermanonchej Timoteo nokawan cashan. Kelkamushayquichej Corinto llajtapi Diospa sutinpi tantacojcunaman.\* Kelkamuyquichejtaj tucuy Acaya jallp'api Diospa runasninmanpis. <sup>2</sup> Dios Tatanchejpa, Señorninchej Jesucristoj c'acha yanapaynin kancunawan cachun allil-lanta causanayquichejpaj.

*Diosninchej llaquiypis sonkochawanchej*

<sup>3</sup> Yupaychaska cachun Señorninchej Jesucristoj Tatan Diosnintaj. Payka qhuyacuynijoj Tatanchej tucuy imapi sonkochaj Dios.

<sup>4</sup> Paymin tucuy llaquiyninchejpi sonkochawanchej. Munantaj nokanchejpis quiquin qhuyacuyninwan tucuy llaquiska cajcunata sonkochananchejta. <sup>5</sup> Imaynatachus Cristowan ujchaska ashqha phutiycunata muchunchej, quiquillantataj chay sinch'i llaquiymanjina Cristoka mayta sonkochawanchej. <sup>6</sup> Sichus llaquichiskas caycu chayka, kancunata sonkochanaycupajmin mosoj causayniyquichejpi yanapanapaj. Sitajchus sonkochaskas caycu chayka, kancunata sonkochanaycupaj. Ajinapi kancunata yanapashaycu nokaycoj llaquiyniycujinallataj chayasojtiyquichej muchunayquichejpaj Diospi confiacuspa. <sup>7</sup> Nokaycuwan cusca muchojtiyquichejka chaymanjinallatajmin cusca sonkochaskas cananchejta yachaycu, Diospi confiacuspa. <sup>8</sup> Hermanosný, cayta yachanayquichejta munaycu: Asia jallp'api cashaspa Cistoraycu llaquichiskas carkaycu. Aswan sinch'i mana atina muchuyuncutapuni muchorkaycu. Chayraycu "wañuchiwasajcuchá", nerkyaycu. <sup>9</sup> Arí, sonkoycupipis wañunaycupaj caskaycuta yuyarkaycu. Astawanrí yachachinawaycupaj caska. Ajinaka mana nokaycullapichu confiacunaycu tiyan. Manachayrí wañuymanta causarichimoj Diospi confiacuycu. <sup>10</sup> Payka chay sinch'i wañuymanta cacharichiwarkaycu. Cacharichiwashaycurajtaj. Paypitaj confiacuycu cacharichinawaycutapuni. <sup>11</sup> Chaypajtajmin kancuna nokaycuwan cusca Diosmanta mañacuspá yanapashawaycu. Ashqha hermanospis nokaycupaj Diosmanta mañacushancu. Ajinapitaj c'acha yanapayninta kowaskaycuraycu ashqha hermanos Diosman graciasta konkancu.

*Pablo Diosman t'akaska causan*

<sup>12</sup> Sonko-yuyayniycupi cusiywan yachaycu: Diosman t'akaskas, cheka caspataj cay pacha runas chaupipi causacushaycu. Manataj runaj sajra yachayninmanjinachu causaycu, manachayrí Diospa c'acha yanapayninmanjina. Astawanka kancuna chaupipeka ajinata causacuycu.

<sup>13</sup> Chayraycu leeskallayquichejta reparanayquichejpaj sut'ita kelkamuyquichej. Chay kelkaskayta tucuyninta yachanayquichejta munani.

<sup>14</sup> Waquin imaspi entiendewarkaycuña. Chayraycu cusiskas caycu.

---

\* **1:1** Literal: iglesiaman.

Quiquillantaj Diospa ñaupakenpi kancunapis nokaycuraycu cusiskas canquichej. Ajina canka Señorninchej Jesuspa cutimunan p'unchaypi.

*Diospa niskan chekapuni*

<sup>15</sup> Ajinata yuyaspa ñaupajta kancunata watucuya munasharkani iscay cutita yanapasunayquichejpaj. <sup>16</sup> Macedonia jallp'aman kancunajeja rispa chaymanta cutimuspa ujtawan kancunata watucuyllatataj munarkani. Ajinamanta Judea jallp'aman rejtiy yana-pawayta atiwaichej carka. <sup>17</sup> Chayta munaspa mana pisi yuyawanchu nitaj iscayrayaywanchu yuyasharkani. Yuyaskasniyri mana munayniymanjinachu. Nitaj, "Ari", ninichu, yuyayniypitaj, "Mana", nispa. <sup>18</sup> Chekan Dios yachan kancunaman niskaycoka ni jayc'aj llullacuywanchu caskanta, "Ari" nispa, "Mana", nispapis. <sup>19</sup> Diospa Wawan Jesucristomanta noka, Silvanowan, Timoteowan kancunaman willararkaycu. Cristoka ni jayc'aj llullacunchu, "Ari", nispa, "Mana", nispapis. Manachayka Cristota nokanchejman cachamuspa Dios ni-wanchej, "Ari", nispa. <sup>20</sup> Ajinaka Cristonejeta tucuy sumaj niskasninta junt'anpuni. Chayraycu Paynejeta ninchej, "Ajina cachun", nispa, Diosta jatunchananchejpaj. <sup>21</sup> Dioska nokaycuta kancunatawan sayachi-wanchej cheka cajpi, mana cuyurej cananchejpaj. Ajllacuwarkanchejtaj Cristopaj llanc'ananchejpaj. <sup>22</sup> Chaypaj t'akaska runasrin caskanchejta ricucherka. Mosoj causayniyoj caskanchejraycutaj Santo Espíritu tiyacun sonkonchejpi. Ajinamanta yachanchej cusiskas paywan wiñaypaj causananchejta.

*Mana phutichiyta munaspa manaraj watucunchu*

<sup>23</sup> Dioska sonkoya yachan. Chayraycu paypa ñaupakenpi cayta niyquichej: Kancunata mana llaquichiyyta munaskayraycu manaraj jamushayquichejchu. <sup>24</sup> Jamuspataj mana Diospi jap'icusquayquichejmantachu camachiyta munaycu, sumaj sayachiskasña caskayquichejraycu. Astawanrí Cristowan ujhaska aswan cusiskas canayquichejta munaycu.

## 2

<sup>1</sup> Chayraycu yuyarkani mana ujtawan kancunaman phutiywan jamuya. Nokapaj phutiy canman kancunata phutichiyka. <sup>2</sup> Sitajchus noka phutichiyquichej chayka ¿pitaj cusichiwan karí? Kancuna, phutichiskasnillaytaj cusichiwan quichej. <sup>3</sup> Chekapuni chayraycu ñaupajta kelkamorkayquichej. Chayamuspa kancunajeja phutichiska cayta mana munanichu. Astawanpis cusiyyta kancunajeja suyanay. Tucuy kancunamanta chekata yuyani cusiska cajtiy tucuy kancunapis cusiskas caskayquichejta. <sup>4</sup> May phutiska, sonkoypi llaquiska, mayta wakaspataj kelkamorkayquichej. Mana kancunata phutichiyta chun munarkani. Astawanka kancunapaj munacuyni may jatum caskanta yachanayquichejpaj kelkamorkayquichej.

*Juchallicoja perdonachuncu juchanta sakeskanraycu*

<sup>5</sup> Sichus kancunamanta mayken phutichej carka chayka, mana nokallatachu phutichiwarka. Manachayrí niyman tucuy kancunatapis phutichillasor kachejtaj. Chayraycu mana munanichu payta astawan llaquichiyytaka. <sup>6</sup> Chay juchachacoja ashqhataña c'amiyuncunquichej chayllaña paypaj cachun. <sup>7</sup> Ajinamanta amaña payta llaquichiyychejchu.

Astawanrí payta perdonaychej sonkochaychejtaj. Chayta ruwaychej astawan llaquicupsa ama chincapun nanopaj. <sup>8</sup> Chayraycu niyquichej, munacuskayquichejta payman ricuchinayquichejta. <sup>9</sup> Chayraycutaj kelkamorkayquichej tucuy imapi casucoj caskayquichejta yachanay-paj. <sup>10</sup> Cunanri maykenta imamantapis perdonaskayquichejta, nokapis perdonani. Sitajchus perdonanapaj imapis canman chayka, kancunaraycu Cristo jñaupakenpi perdonaníña. <sup>11</sup> Ajinata ruwananchejtiyan supay Satanás mana ni imapi atipanawanchejpaj. Yachanchejmin paypa tucuy yuyaynenka pantachejlla caskanta.

*Pablo willaraskan sumaj k'apayjina Cristonejta*

<sup>12</sup> Cristomanta willaranapaj Troas llajtaman rispari ashqha runasta tarerkani Señormanta uyariyta munajcunata. <sup>13</sup> Astawanrí sonkoypi may llaquiska carkani hermanonchej Titowan mana tincuskaymanta. Chayraycu Troas llajtayojcunamanta cacharpayacamupsa Macedonia jallp'aman jamporkani. <sup>14</sup> ¡Astawanpis Diosman gracias! Atipaj Cristowan ujchaska cajtiyu, jarc'ajta atipajcunatapuni ruwawaycu. Paypa yachaynintataj sumaj k'apaytajina tucuynejpi nokaycunejta runasman reparachin. <sup>15</sup> Cristo k'apaynin caycu Diospaj. Chayraycu willaraskaycoka incienso k'apayjina llojsishan juchamanta cacharichicushajcunaman, jucharaycu chincapushajcunamanpis. <sup>16</sup> Jap'ejcunaman willan juchamanta cachariskas wiñay causapaj caskancuta. Khesachajcunamanpis wiñay wañuyman juchachaskas caskancuta willan. ¿Pitaj chay atiyniyoj willanasta willarananpajjinari? <sup>17</sup> Chay ashqha pantachej willarajcuna Diospa niskanwan kolkechacunallancupaj willarancu. Nokaycoka mana chaycunajinachu caycu. Astawanrí cheka sonkowan Diosmanta cachaska caspa willaraycu. Diospa jñaupakenpi Cristowan ujchaska willarashaycupuni.

### 3

*Diospa atiyninwan mosoj niskanta willarancu*

<sup>1</sup> ¿Ujtawan mentacuya kallariskaycutachu ninquichej? Mana mentacushaycchu. Waquin, yachachejcura cartasta apancu sumaj runas caskancuta ricuchinancupaj. Chay rejsichej cartasta mana kancunaman konaycuchu tiyan nitaj kancunamanta apanaycuchu tiyan. <sup>2</sup> Kancunamin cartasniycujina canquichej sonkoycopi apanaycupaj. Mayllapipis Cristopi mosoj causayniyquichejmanta willajtiyu tucuy runas kelkaska cajta uyarispay yachancu. <sup>3</sup> Sumaj ruwaskasniyquichejta yachaspa tucuy runas reparancu Cristo sonkoypy quichejpi ruwaskanta willaraskaycunejta. Chayjina rejsichej cartaska mana tintawan kelkaskachu cancu nitaj p'alta rumipi ruwaskachu. Manachayrí causaj Diospa Espíritu sumaj willanasta causashaj sonkoypy quichejpi churarka.

<sup>4</sup> Chayta sumajta yachaycu Diospi confiacupsa Cristonejta. <sup>5</sup> Mana nokaycupichu atiy tiyan Cristomanta willaranacycupajka. Nitaj yuyaycuchu runasta imapi yanapanaycupajjina caskaycuta. Manachayrí atiyniyocoka callpachaj Diosmantamin. <sup>6</sup> Payka atiyniyojta ruwawarkaycu mosoj tratonta willaranacycupaj. Chayka mana kelkaska camachiskachu manachayrí mosoj causayta koj tratonmin Santo Espiritunejta sonkonchejpi churaska. Imaraycuchus kelkaska camachiskaka wañunapaj juchachan. Espiriturí wiñay causayta kon.

*Mosoj traton ni jayc'aj tucucunchu*

<sup>7</sup> Chay p'alta rumipi kelkaska camachiskasninta mana casuskancrucaycu runas wañuncu. Chaywanpis Dios sumaj atiyninwan israelcunaman Moisesnejta chayta korka. Chaypachataj Diospa atiyninraycu Moisespa uyan lliphipisharka. Chayraycu israelcuna uyanta mana khawariyta aterkancuchu. Chay c'anchayrí tucucapushallarkapis. <sup>8</sup> Cunanrí Santo Espiritunejta mosoj tratonka kospa aswan sumajtaraj atiyninta ricuchenka. <sup>9</sup> Sichus runasta juchachanapaj kelkaska Diospa atiyninta ricucherka chayka, mosoj tratonka may astawanraj atiyninta ricuchin. Chay mosoj tratonwan Dios runasman chekan cayta khasilla kon. <sup>10</sup> Cunanka chay ñaupa kelkaskaj lliphipej c'anchayninta manaña ricuya atinchejchu, Diospa mosoj traton atiyninwan may astawan sut'ita c'anchaskanraycu. <sup>11</sup> Sitajchus chay tucucoj ñaupa kelkaska atiynijoj carka chayka, may astawan atiynijojmin chay ni jayc'aj tucucoj mosoj tratonka.

*Mosoj tratonmanjina causayka Santo Espíritoj atiyninmantamin*

<sup>12</sup> Chayraycu mosoj tratonta Dios junt'ananta yachaspa mana manchachicuspa Cristomanta sut'ita willaraycu, <sup>13</sup> manataj Moisesjinachu. Payka camachiskasta willarashaspa khatanata uyanman churacoj. Ajinamanta israelcuna chay tucucoj c'anchayta mana khawarkan-cuchu. <sup>14</sup> Astawanrí yuyaskasnincipi rumiyacorkancu. Cunan p'unchaycama ñaupa trontona leejtincu chay khatanajinallapuni yuyaynincipi jarc'ashan mana entiendenancupaj. Cristopi jap'icojtiliancu yuyaynincumanta jarc'aj khatana khechuska canka. <sup>15</sup> Arí, cunancama Moisespa kelkaskanta mayc'ajlapis uyarispa mana entiendencudu sonkoncu khataska caskancuraycu. <sup>16</sup> Uj israel runachus Señorman cutirejtinrí chay khatana paymanta khechuskamin. <sup>17</sup> Señor Jesucristoka Espiritumin. Maypichá paypa Espíritun cashan chaypi mosoj causaymanta jarc'ajka manaña canchu. <sup>18</sup> Ajinaka mana uyata khatacuspa tucuy nokanchej Señorpa atiyninta khawashanchej c'anchayninta ricuchinanchejpaj. Chaymanjina Santo Espíritu causayninchejta cutichishan Cristo quiquinman rijch'acoj astawan astawan cananchejcama.

## 4

*Jesucristo Señorninchej caskanta cachasnin willarancu*

<sup>1</sup> Dioska qhuyacuyninwan cachasninta churawarkaycu. Chayraycu paypa camachisnin caspa callpachaskaspuni llanc'aycu. <sup>2</sup> P'enckay pacaska ruwanastapis khesacharkaycuña. Manataj ni imata ruwaycuchu runasta pantachinapaj. Nitaj sumaj willanastapis puraj uya caymantachu willaraycu. Manachayrí chay cheka willanasta sut'ita tucuyman rejsichiycu. Chayta ruwaycu Diospa ñaupakenpi tucuy runaj sonko-yuyayninman rejsichicunaycupaj. <sup>3</sup> Sitajchus sumaj willanasta willaraskaycu mana entiendenapaj khataskajina cashan chayka, chin-capushaj runasllapaj khataska. <sup>4</sup> Diospi mana jap'icuskancuraycu cay pachata camachej supay Satanás yuyaynincuta ciegotayacherka. Ajinamanta paycunapajka Cristo sumaj willanasniipa c'anchaynin ni sut'iyamullanpischu. Cristoka Dios quiquillantaj. <sup>5</sup> Chayraycu mana nokaycu quiquircumantachu willarashaycu. Manachayka Jesucristo

Señorninchej caskanta willarashaycu. Chaywanpis Jesuspa sutinpi kancunata yanapanaycupaj camachisnin caskaycuta willaycu. <sup>6</sup> Diosmin nerka, "Lakhamanta c'anchay llojsichu", nispa. Payllatajmin sonkoycupi c'ancharka yachayninta reparachinawaycupaj. Ajinamanta Diospa sumaj cayninta Cristopi ricuycu.

*Diospa khapaj capuynin pisi callpayo runasman koska*

<sup>7</sup> Chay yachaynenka khapaj capuyniycumim. Nokaycoka pisi callpayo runaslla caycu causayniycutaj t'uru mancasjinalla. Astawanrí chay khapaj capuyniycutaka sonkoycupi jallch'ashaycu Diospa atiyninta tucuman ricuchinaycupaj. Ricuchintaj may jatun atiynenka mana nokaycumantachu caskanta. Manachayrí payllamatamin. <sup>8</sup> Causayniycupi tucuy imaymanawan llaquichiskas caspapis mana atipaskaschu, iscayrayaskas caspapis Diospipuni confiacuycu. <sup>9</sup> Muchuchiskas caspapis mana churanacojman sakerpariskaschu, urmachiskas caspapis mana atipaskaschu caycu. <sup>10</sup> Runas Jesusta chejnispayta wañucherkanca. Ajinallatataj tucuynejman purejitiyu nokaycuta wañuchiya munancu. Wañuy patapipuni causashaycu causayniycupi Jesús causashaskanta ricuchinaycupaj. <sup>11</sup> Causashaspa Jesucristomanta willaranaycupaj peligropipuni caycu. Ajinata jaywaskas causaycu wañoj cuerpoypipis Jesuspa causayninta ricuchinaycupaj. <sup>12</sup> Chayjinamanta nokaycoka wañuy patapipuni caycu kancuna wiñay causayniyoj canayquichejpaj.

*Sapa p'unchay mosoj causayka mosojyashan*

<sup>13</sup> Diospa palabranpi uj runa nin: "Diospi jap'icorkani, chayraycu parlarkani", nispa. Nokaycupis Diospi jap'icuycu, chayraycu parlaspa niycu: <sup>14</sup> Señorninchej Jesusta wañuymanta Dios causarichimorka. Payka nokaycutapis Jesustawan causarichiwasajcu. Kancunatawanpis ñaupakenman pusawasunchej. <sup>15</sup> Tucuy chay imaska allinniyquichejpajmin Diospa c'acha yanapaynin ashqhasman junt'achinanpaj. Ajinamantataj may ashqhas astawan payman graciasta konkancu jatunchaska cananpaj.

<sup>16</sup> Chayraycu Señorpi callpachacuycu. Cay pachapi causayniycu tucu-cushajtinpis mosoj causayniycoka sapa p'unchay mosojyashan. <sup>17</sup> Arí, imatachá Jesuspa sutinpi muchushaycu chayka mana imapischu, pisi ratullapajmin. Chaynejtataj may astawanraj sumaj wiñay causay nokaycupaj waquichiska cashan. <sup>18</sup> Ajina cajtenka mana ricucoj cajtachu khawashanchej. Astawanrí mana ricucoj cajta khawashanchej; ricucoj cajka pisi ratullapaj caskanraycu. Mana ricucoj cajtaj wiñaypaj canka.

## 5

*Janaj pacha Diospa wasichaskanta suyashanchej*

<sup>1</sup> Caytamin yachaycu: Cay pachapi cuerpoypoka ch'ujllajinalla cashan. Cay wasiyku urmachiska cajtenka manamin maquiswan ruwaska wasipichu tiyacusajcu. Astawanpis Diospa wasichaskanpi wiñaypaj janaj pachapi tiyacusajcu. <sup>2</sup> Chayraycu cay ch'ujllajinapi causashaspa sinch'i munaywan wakashaycu. Chay janaj pachamanta cuerpowan p'achalliska cayta mayta munashaycu. <sup>3</sup> Ajinaka mosoj cuerpowan p'achalliskas caspaka mana k'alallachu casajcu. <sup>4</sup> Ajinallatatajmin cay wañoj cuerpopi tiyacuspa phutiywan wakashaycu. Mana cuerpoypu khechuska cananta munaspachu, manachayrí chay wiñay

causaj cuerpowan p'achalliskas cayta munashaycu. Ajinapi wiñay causayka cay pachapi wañoj causayta okoyconka.<sup>5</sup> Chaypajmin Dios ruwawarkanchej. Santo Espiritutataj señatajina kowarkanchej mosoj causapaj. Chay mosoj causayka jamoj wiñay causayninchejmanta sumaj niskan cashan.

<sup>6</sup> Chayraycu sonkochaska caspa Diospi confiacuycupuni. Caytataj yachaycu: Cay cuerpopi causashaspaka manaraj Señorwan cuscachu tiyacushaycu. <sup>7</sup> Diospi jap'icuspamin purishaycu mana payta ricuspalla. <sup>8</sup> Ajinata paypi confiacuspa munaycuman llojsipuya cay cuerpomanta Señorwan cusca tiyacunaycupaj. Chaytamin astawan munaycu. <sup>9</sup> Chayraycu cay cuerpopi caspapis chayrí payman cusca caspapis payta cusichiyllata munaycu. <sup>10</sup> Yachanchejjina tucuy nokanchej Cristo jñaupakenman presentacunanchej tiyan. Chaypi sapa ujininchejman cay pachapi ruwaskanchejmanjina pay kowasun. Allin ruwaskanchejmanjina chayrí mana allin ruwaskanchejmanjinas jap'isunchej.

### *Cristo j munacuynin purichiwaycu*

<sup>11</sup> Señorta manchachicunata yachaspa runasman mayta willarashaycu Diospi jap'icunancupaj. Tucuy imapi imaynachus caskaycuta Dios yachanña. Sonko-yuyayniyquichejpipis imaynachus caskaycuta kancunapis yachaskayquichejtaña confiani. <sup>12</sup> Mana ujtawanchu kancunaman mentacushaycu. Manachayrí nokaycumanta mentacuyta atinayquichejta munayman. Ajinamanta puraj uya cajcunata ch'inyachiyya atinayquichej. Paycunaka jawallamanta jatunchacuncu manataj cheka sonkowanchu. <sup>13</sup> Sichus mana yuyayniyoj carkaycu chayka, Diospaj carka. Sitajchus sumaj yuyayniyoj caycu chaypis kancunapajmin. <sup>14</sup> Ajinaka Cristo j munacuynillan kancunapaj purichiwaycu may atiayniyoj munacuy caskanraycu. Yuyaskaycoka caymin: Ujlla tucuypaj wañuskanraycu tucuy wañuskapaj khawaskas cancu. <sup>15</sup> Tucuypaj Jesucristo wañorka causarimorkataj. Chayraycu causashajcunaka manaña paycunapajchu causanancu. Manachayrí Cristopaj causanancu tiyan Cristo paycunapaj wañuspa causarimuskanraycu.

### *Allinyachicuymanta sumaj niskanmanjina cachaskas*

<sup>16</sup> Cunari nokaycoka manaña runasta cay pacha yuyaymanjinachu khawaycu. Sichus chaymanjina Cristota rejserkaycu chaypis, manaña cay pacha yuyaymanjinachu payta rejsiyucu. <sup>17</sup> Pillapis Cristowan ujchaska cajka Diospa mosoj ruwaskanmin. Paypaj tucuy jñaupa cajka chincapunña. ¡Khaway, mosojyachiska chay runaka!

<sup>18</sup> Tucuy chayta Dios ruwan Cristonejta pay quiquinman allinyachicuwaskaycuwan. Cachamuwarkaycutaj runasta yanapanaycupaj payman allinyaskas canancupaj. <sup>19</sup> Chay sumaj willanataj ajinata nin: Dios Cristopi ruwarka cay pacha runas pay quiquinman allinyachicu-nanpaj juchasnincuta khechuspa. Chaywanpis nokaycuman chay sumaj willanata jaywawarkaycu. <sup>20</sup> Chay willanamanjina Cristo j cachasnin canaycupaj churawarkaycu. Ajinapimin nokaycunejta Dios munacuyn-inwan wajyashasunquichej. Cristo j sutinpi mañayquichej: Diosman allinyacapuychej. <sup>21</sup> Cristoka mana juchayojchu carka. Nokanchejray-cutaj Dios payta juchasapapaj khawarka. Paymantaj k'epiricherka tucuy juchanchejta khechupunawanchejpaj. Juchanchejta khechuspa

chechan runasta khawawanchej. Cristowan nokanchejta ujchaspataj Dios chekan cayninta kowarkanchej.

## 6

<sup>1</sup> Dioswan cusca llanc'ajcuna caspataj encargayquichej: C'acha yana-payninta ama yankhapaj jap'iyochejchu. <sup>2</sup> Diospa palabranpipis nin: Sumaj tiempopi uyarerkayqui; Cacharina p'unchaypipis yanaparkayqui. ¡Khaway! Cunanmin sumaj tiempoka, cunan p'unchaymin juchamanta cacharina p'unchayka.

### *Diospa cachasninmanjina causaymanta*

<sup>3</sup> Allinta khawacuycu ama pitapis misc'achinaycupaj llanc'ayniycuta runas ama khawaranancupaj. <sup>4</sup> Manachayka tucuy imaspi Diospa cachasninpaj rejsichicuspapuni causayta munaycu. Diospi confiacuycupuni llaquicunapi, muchuycunapi, ñiac'ariycunapipis, <sup>5</sup> sek'oskas, carcelpi wisk'askas, ashqha phiñacojcunaj chaupincupipis, sayc'uchej llanc'anapi, yarkhaycunapi, tutas mana puñuskapipis. <sup>6</sup> Causashaycu llimphu sonkowan, sumaj yachaywan, unayta runasta muchucuspa, c'acha imasta paycunapaj ruwaspataj. Santo Espirituwan pusaskas sumaj sonkowan munacuspa <sup>7</sup> cheka niskanta willaraycu. Tucuy chaypaj Dios atiyninwan\* callpachawaycu. <sup>8</sup> Sumajpaj khawaskas chayrí chejniskas, ch'ataskas chayrí mentaskas cajtiycupis payka chekan yanapanasta kowaycu. Runas nincu, pantachispa purejcuna chayrí cheka yachachejcunapis caskaycuta. <sup>9</sup> Nincu mana rejsiskas chayrí sumajta rejsiskaspis caskaycuta. Nincu wañuskas caskaycutapis. ¡Khaway causacushaycutaj! Nincu muchuchiskas manataj wañuchiskaschu, <sup>10</sup> phutiskas, chaywanpis cusiskaspunipis caskaycuta. Wajcha runas caspapis ashqhasta khapajyachispa, mana imayoj caspapis tucuy ima capuyniyoj Cristowan ujhaska caycu.

<sup>11</sup> Corintopi caj hermanosníy, tucuy chay imasmanta kancunaman munacuywan tucuy sonkowanpis sut'ita parlayquichej. <sup>12</sup> Ichapis sonkojquichejpi munacuyniyquichejta nokaycuman mich'acushanquichej. Nokaycurí mana mich'acuycuchu munacuyniy-cutaka. <sup>13</sup> Wawasniytajina nishayquichej quiquillantataj nokaycuta munacunawaycuta.

### *Diospa yupaychana-wasin canchej*

<sup>14</sup> Diospi mana jap'icojcunawan ama cuscachacuychejchu uj manacaj yuntajinaka. Yachanquichej: Chekanta ruwaj mana chekanta ruwajwan mana atinchu ujhaska cayta, nillataj c'anchaypis lakhawanka. <sup>15</sup> Cristoka mana atinchu supay Satanaswan uj yuyayniyojlla cayta, ni Diospi jap'icojpis Diosta khesachajwanka. <sup>16</sup> Diospa yupaychana-wasinpeka ruwaska dioscuna ni jayc'aj canmanchu. Causaj Diospa yupaychana-wasinmin canchej. Chaytataj Diospa palabranpi nin: Paycuna chaupipi causasaj purisajpis;

Diosnincu casaj, paycunataj runasniy cankancu.

<sup>17</sup> Chayraycu nin: Llojsiychej, t'akacuychej tucuy sajra cajmanta, nispa nin Señor.

Ch'ichi cajta amaña jap'iyochejchu.

\* **6:7** Literal: paña maquipi llok'epipis.

Chaymanta noka cusiywan jap'icapuskayquichej.

<sup>18</sup> Kancunapaj Tatayquichej casaj.

Kancunapis wawasniy canquichej, nispa nin tucuya camachej atiyniyoj Señor.

## 7

<sup>1</sup> Munaska hermanosný, chay sumaj niskasninta jap'iskanchejraycu cuerponchejta sonkonchejtapis tucuy ch'ichichaj imasmanta llimpuchanachej. Ajinamanta Diosta manchachicuspa payman t'akaskas llimphu causayta masc'anachej sumaj wiñaskas cananchejcama.

### *Pablowan ujchaskas*

<sup>2</sup> Sonkoyquichejpi munacuywan jap'iwaycu. Ni piman mana chekan cajtaka ruwarkaycuchu; ni pita nanacherkaycuchu, nitaj allinnillaycupoj pimantapis ni imata jap'erkaycuchu. <sup>3</sup> Chaytaka mana kancunata khawaranapajchu nishayquichej. Nerkayquichejña sonkoycupipuni caskayquichejta. Wañuypi causaypipis ujchaskas canchej. <sup>4</sup> Mana manchachicuspa sut'ita tucuy sonkoywan parlarkayquichej. Kancunarycu may cusiska cashani. Mayta sonkochawarkanquichej. Tucuy llaquiniycopipis cusiywan sumajta junt'achiwarkanquichej.

### *Pablo sonkochacun Tito cutimojtin*

<sup>5</sup> Macedonia jallp'amán chayamusapis mana samaricorkaycuchu. Astawanka ashqha llaquiycura chaupipi carkaycu —tucuynejpi churanacuycuna, sonkoycupipis manchachicuycuna. <sup>6</sup> Llamp'u sonkocunata sonkochaj Dioska Titoj chayamuskanwan sonkochawarkaycu.

<sup>7</sup> Mana chayamuskallanwanchu astawanpis willanasninwan sonkochawarkaycu, payta sonkochaskayquichejta willawaskaycucraycu. Kancunamanta willawarkaycu ricuwayta munaskayquichejta, chay llaquiy imasmanta mayta phuticuskayquichejtapis. Nokawan uj yuyayniyojlla cayta munaskayquichejtapis willawarkaycu. Chayraycu astawan cusicushani.

### *Juchamanta Diosman cutiricojtincu Pablo cusicun*

<sup>8</sup> Willawarkaycutaj chay kelkaskay phutichisuskayquichejta. Cunanka caymantapis manaña phuticunichu. Arí, ñaupajta phutiska casharkani kancunata mana phutichiyta munaspa ni uj ratullapajpis. <sup>9</sup> Cunari cusicuni. Mana kancunata phutichiskayracycchu cusiska cani. Manachayka munayninmanjina Diosman cutirinayquichejpaj phutichiskas carkanquichej. Chaymanta cusiska cani. Ajinaka ni ima mana allintapis ruwarkayquichejchu. <sup>10</sup> Astawanpis Diospa ñaupakenpi phuticuyka payman cutirichiwanchej juchamanta cachariskas cananchejpaj. Chaymantataj mana phuticuy canchu. Astawanri cay pacha phuticuymanta wiñay wañuy jamun.

<sup>11</sup> ¡Khaway! Diospa ñaupakenpi phuticuskayquichej imaynatataj sonkoyquichejpi ruwarkaña. Chaymanjina sumaj yuyayniyoj tucorkanquichej runasman sumajta cutichinayquichejpajpis. Sajra imasmanta mayta phiñacorkanquichej. Nokaycuta mana cusichiyka manchachisorkachej. Ricuwayta mayta munaspa nokawan uj yuyayniyojlla caytataj munaskayquichejta ricucherkanquichej. Chaywanpis chay juchallicojman chekanta ruwarkanquichej. Chaypitaj chekanta ruwaskayquichejta sumajta ricucherkanquichejña. <sup>12</sup> Chayraycu mana juchata ruwajllapajchu nitaj muchojllapajchu

kelkamorkayquichej. Manachayrí Diospa ñaupakenpi nokaycupaj may c'acha yuyayniyoj caskayquichejta ricunayquichejpaj kelkamorkayquichej.<sup>13</sup> Chaywanri sonkochaskasña cashaycu.

Kancunanejta sonkochaskas caspapis may astawanraj cusicushaycu Titoj cusiyinraycu. Payka tucuy kancunanejta sonkonpi samarichiska caspa mayta cusicushan.<sup>14</sup> Ajinamanta Titoman imatapis kancunamanta niskayka mana khasillachu carka. Astawanka kancunaman niskaycoka chekapuni cashan. Quiquillantaj Titoman kancunata mentaskaycoka cheka caskan ricuchiska carka.<sup>15</sup> Titoka tucuy kancunaj casucuskayquichejta yuyaricuspa astawan munacusunquichej, llamp'u sonkowan manchachicuywantaj payta jap'iskayquichejraycu.<sup>16</sup> Tucuy imapipis kancunapi confiayta atiskayraycu cusiska cani.

## 8

### *Macedonia hermanos yanapajcuna cancu*

<sup>1</sup> Cunanka, hermanosníy, Diospa c'acha yanapaynin Macedonia jallp'api caj hermanosman koska caskanmanta willayquichej.

<sup>2</sup> Ajinamanta sinch'i llaquiyuncunapi caspapis ancha pisi capuyniyoj caskancupipis mayta cusicorkancu. Astawanpis may jatun cusiywan waj hermanosman ashqhata korkancu.<sup>3</sup> Paycunamanta willayquichej: Tucuy atiskancumanjina korkancu. Chaywanpis astawanraj korkancu munaynincuraycu.<sup>4</sup> Qhuyacuynincuwan waj llajtaspi caj hermanosta yanapayta munarkancu. Cayta ruwanancupaj mayta mañawarkaycu. Ajinaka Macedonia hermanos munancu Jerusalén llajtapi caj hermanospa pisichicuynincipi cus cachacuyta.<sup>5</sup> Chaywanpis mana kolkellatachu korkancu yuyaskaycumanjina. Astawanraj Diospa munaynинnejta payman ñaupajta paycuna quiquincura kocorkancu, nokaycumanpis.<sup>6</sup> Chayta reparaspa Titota nisharkaycu kancunaman ujtawan rinanta. Kancuna chaupipi kolketa tantayta pay kallarerka Jerusalenpi hermanospaj. Cunan Diospa c'acha yanapaynin Macedonia hermanospijina sonkoyquichejpipis ruwananta munashaycu.<sup>7</sup> Ajinaka Diospi jap'icuywan, cheka yachachinawan, yachaywan, sumaj ruwaywan, nokaycupaj munacuyniyquichejwanpis junt'askas canquichej. Tucuy chaymanjina khapajyachiskas caspa, cunanka c'acha qhuyacuwan junt'askas caychej hermanosta yanapanayquichejpaj.

<sup>8</sup> Manataj camachiskatajinachu nishayquichej. Manachayrí Macedonia hermanospa sumaj munaynincumanta willarkayquichej munacuyniyquichej cheka caskanta yachanapaj.<sup>9</sup> Chaytataj niyquichej Señorninchej Jesucristojo c'acha yanapayninta rejsiskayquichejraycu. Payka janaj pachapi khapaj cashaspapis kancunapaj wajcha runaman tucorka. Wajchayacorka chay wajcha caynинnejta kancuna c'acha yanapayninan khapajyachiskas canayquichejpaj.

<sup>10</sup> Ñaupajta mana ruwaskallawanchu, manachayrí munayniyquichejwanpis pasaj watamantaña chay yanapa kolketa tantayta kallarerkanquichej. Chayraycu allinniyquichejpaj yuyaychayquichej.<sup>11</sup> Cunanka chayta ruwayta tucuychej. Ajinamanta sumaj munaskayquichejmanjina ruwanayquichejka tucuska canka.<sup>12</sup> Atiskayquichejmanjinataj koychej. Uj runa sumaj munayninan koytin, Dioska cusiywan jap'in capuskanmanjina koskata. Mana imayojmantataj mana mañanchu.

<sup>13</sup> Mana munaycuchu ujcuna yanapaskas canancuta kancunataj llaquiskas cashanayquichejta. <sup>14</sup> Manachayka tucuypaj quiquin cananta munaycu. Cunari sumaj capuyniyquichej paycunaj pisichicuynincuta yanapashan. Chaymantataj sumaj capuynincu kancunaj pisichicuyniyquichejta yanapanka tucuypaj quiquin cananpaj. <sup>15</sup> Quiquillantataj Dios palabranpi nin: "Ashqhata pallajpatapis mana puchorkachu; pisita pallajpatapis mana piserkachu".

*Titoj kolke tantaynimanta*

<sup>16</sup> Cunanka graciasta Diosman koni, quiquin nokaj yuyayniytajina allinniyquichejpaj Titoj sonkonman churaskanraycu. <sup>17</sup> Niskaymanjina ruwananpaj waquichiska carka. Astawanpis sumaj yuyayniyoj caspa quiquin munaynimanta kancunaman jamushan.

<sup>18</sup> Titowan cusca kancunaman cachamuycu uj hermanotawan. Payka tucuynepi Diospa runasnimanta sumajpaj khawaska cashan willaraskanraycu. <sup>19</sup> Chaywanpis paycunaka payta ajllarkancu kolke tantaj yanapajniycu cananpaj. Ajinamanta chay qhuyacuywan koska kolketa tantaskaycupi paypis nokaycuwan purishan. Tucuynepi Diospa c'acha yanapaynnejta iglesiaspi koskancuta tantashaycu. Chayta ruwaycu payta jatunchanaycupaj munacuyniycuta ricuchinaycupajpis. <sup>20</sup> Ajllaska runaswan purishaycu chay koskata tantaspa ama ni pi khawaranawaycupaj. <sup>21</sup> Chaywanpis mana Señorpa ñaupakellanpichu, manachayka runaspa ñaupakencupipis munaycu tucuy imas chekan cananta.

<sup>22</sup> Paycunawan cusca uj caj hermanoycuta cachamuyquichej. Payka ashqha imaymanapi ashqha cutitapis c'uchi caskanta ricuchiwarkaycuña. Cunanka kancuna sumajta ruwaskayquichejta yachaspa tucuy sonkowan kancunaman jamushan. <sup>23</sup> Titoka willaraj-masiymin kancunapajpis llanc'aj-masiytaj. Chay hermanosniycutaj tucuynepi iglesiaspas cachaskasnincu. Causaynincutaj Cristota jatunchan. <sup>24</sup> Chayraycu cay hermanosniycuman munacuyniyquichejta ricuchiychej. Kancunarycu cusiyniyu cheka caskantataj ricuchiychej. Ajinamanta tucuynepi tantacoj iglesiaspi causayniyquichejmanta yachankancu.

**9**

*Jerusalén hermanosta yanapanapaj kolketa tantancu*

<sup>1</sup> Jerusalenpi hermanosninchejpaj chay yanapanana konanchejmanta yachanquichejña. Chayraycu chay imasmanta manaña kelkamusunayquichejchu tiyan <sup>2</sup> munayniyquichejta yachaspaka. Kancunamantataj Macedonia hermanosman cusiywan willashani: Acayapi cajcuna kayna watamantaña cay koskata tantayta kallarinancupaj waquichiskas carkancu, nispa. Kancunamanta uyarispataj ashqhas sonkochaskas cashancu konancupaj. <sup>3</sup> Chaywanpis hermanosniycuta cachamuyquichej waquichiskas caskayquichejmanta chay willanay ama khasilla cananpaj. <sup>4</sup> Ajinaka Macedonia ajllaskacuna nokawan jamuspa waquichiskasta taripasonkachej. Sichus mana waquichiskaschhu cawajchej chayka, kancunapi confiacuskaycumanta p'enkaypi riqhuriycuman. Kancunapajpis p'enkay canman.

<sup>5</sup> Chayraycu manaraj jamushaspa chay llanc'aj-masisniycuta cachamuya yuyarkani. Ajinamanta chay koska tantaskaña canka niskayquichejmanta. C'acha munayniyquichejmanta cananta

munani, manataj allinniyquichejlapaj nitaj mich'acuy yuyaywan koskachu canantapis.

<sup>6</sup> Caytapis niyquichej: Pisita tarpojka pisillata okharin; ashqhata tarpojrí ashqhallatataj okharin. Hermanosta yanapananpaj kojtiyquichej quiquillantaj cashan. <sup>7</sup> Sapa uj ñaupajta sonkonpi yuyanan tiyan. Chaymanjinataj tucuy sonkowan kochun, ama llaquicuspa nitaj camachiskajinaka, Dioska cusiywan kojta munacuskanraycu. <sup>8</sup> Tucuy imapi may c'achata yanapasunayquichejpaj Dioska atiyniyojmin. Ajinamanta tucuy imapi, tucuy imaymanapi, tucuy c'acha ruwanapaj sumaj callpachaskaspuni canquichej. <sup>9</sup> Ajinallatataj sumaj runamanta Dios palabranpi nin:

Pisichicojman mana mich'acuspa tucuynejpi kon.

Chekan ruwaskasnin wiñaypaj canka.

### *Paycunamanta Diosman graciasta konkancu*

<sup>10</sup> Diosmin tarpojpaj mujuta waquichin, t'antatapis miqhunapaj. Ajinallatataj payka kancunapaj sumaj ruwanasta waquichin. Astawan astawanraj yapaspa chekan ruwaskasniyquichejta pay wiñachenka. <sup>11-12</sup> Ajinaka Diospa c'acha yanapaynинwan khapajyachiskas, uj yuyayllamunacuywan astawan konquichej. Cay sumaj ruwanaka pisichicoj hermanosta llaquiynincipi yanapan. Astawanpis mana chayllachu. May astawanraj ashqhas graciasta Diosman konkancu. Chayraycutaj nokaycunejta Diosman gracias koska canka. <sup>13</sup> Chaywanpis tucuypa ñiaupakencipi Cristopi jap'icuskayquichejta sumaj willanas-ninta casuskayquichejtapis willarkanquichejña. Munacuywan yana-payniyquichejka ricuchin chay willaskayquichej cheka caskanta. Chaytaj ricuchin munacuypi uj yuyaylla caskayquichejta Jerusalén hermanoswan tucuy hermanoswanpis. Tucuy chay imasmanta paycunaka Diosta jatunchankancu. <sup>14</sup> Dios c'acha yanapayninta mana mich'acuspa kosuskayquichejmanta yachaspa, munacuywan kancunapaj Diosmanta mañaconcancupuni. <sup>15</sup> ¡Diosman graciasta kona mana yuyay atina koskan-manta!

## 10

### *Pabloman Señor atiyta korka*

<sup>1</sup> Cunanka Cristoj c'acha yuyaynинjejta qhuyacuyninnejtapis noka, Pablo, uyarinawayquichejta nishayquichej: "Nokamanta waquin nishasunquichej: Kancunawan caspalla may llamp'u sonko payka. Carupi caspataj mana manchachicuynijoj", nispa. <sup>2</sup> Waquintaj nokaycumanta nincu: "Cay pacha runasjinalla causashancu", nispa. Noka jamuspa chekatapuni mana manchachicuspa paycunata c'amisaj. Chayjina sinch'i parlaywan kancunata niytaka mana munanichu. Chayraycu tucuy sonkowan kancunamanta mañacuyquichej: Ama paycunajinaka yuyaychejchu. Ajinamanta mana kancunaman sinch'ita parlanaychu canka. <sup>3</sup> Arí, runas caspa cay pachapi causashaycu. Astawanrí mana cay pacha runasjinachu makanacushaycu. Manachayrí sajra imasta atipanaycupaj makanacuycu. <sup>4</sup> Makanacuna imasniycupis mana cay pachamantachu. Manachayrí Diosnejtamín atiyniyoj, callpayo jarc'aj imasta tucuchinanpaj, niskasninpá contranpi cajtapis tucuchinanpaj. <sup>5</sup> Pantachej yuyaskasta tucuchiaycu. Diospa yuyayninpá contranpi tucuy okhariska yuyayta urmachiycupuni. Tucuy yuyaytapis atipaycu runas

Cristota casunancupaj. <sup>6</sup> Kancuna tucuy imapi casuojña cajtiyquichej tucuy mana casucojcunata chekanchanaycupaj waquichiskasña caycu.

<sup>7</sup> Ñaupakeyquichejpi sut'i imasta sumajta reparaychej. Sichus maykenpis Cristoja caskanta yuyan chayka, ujtawan yuyachun cay imasmanta. Reparachuntaj nokaycupis Cristoja caskaycuta. <sup>8</sup> Sitajchus atiyniycumantapis mentacuni chayka, mana p'enkacunichu Señorninchej kowaskaycuraycu. Chay atiyta kowarkaycu mosoj causaypi wiñachisunaycupaj, manataj kancunata urmachinaycupajchu. <sup>9</sup> Chayta nishani mana kelkaskaynejjlata manchachejjina rijch'acunaypajchu. <sup>10</sup> Yachani waquin nishancu: "Pabloj kelkaskasnenka sinch'itaj atiyniyojtaj. Čaypi cashasparí pisi callpa runaman rijch'acun, niskasninpis ni imapaj cancu", nispa. <sup>11</sup> Chayjina parlaj runaka yachachun: Imaynachus carumanta kelkaskapi cashaycu quiquillantaj kancunawan cashaspapis ruwanaspi casajcu.

### *Pablo Corintoman cachaska willarananpaj*

<sup>12</sup> Cayta yachaychej: Mana atiycuchu chay jatunchacojcunajina churacuytaka ni paycunawan quiquinchacuytapis. Paycuna quiquinca manta tupunata ruwacuncu. Chaywan paycunapura tupunacuncu quiquinchanacuncutaj. Ajinata ruwaspaka mana yuyayniyoj cancu. <sup>13</sup> Nokaycurí manamin chay mana tupuy atina imaswanchu mentacuycu. Astawanka Dios llanc'anaycuta ricuchiwarkaycu. Chaymanjina llajtamanta llajtaman Cristojo sumaj willanasninwan purispa kancunacama chayamorkaycu. <sup>14</sup> Diosmanta koska llanc'anaycu jallp'ajina caskayquichejraycu ñaupaj willarajcuna kancunapaj carkaycu. Chaywanpis chay llanc'anaycu jawaman mana llojserkaycuchu. <sup>15</sup> Llanc'anaycu jawapi wajcunaj llanc'anasnincumantaka mana mentacuycuchu. Manachayrí munaycu Diospi jap'icuyniyquichejpi astawan wiñaskas caspa, aswan jatuchej llanc'anaspaj callpachanawaycuta. <sup>16</sup> Ajinapi llanc'anaycumanjina kancunamanta aswan caru jallp'asman puriya atisajcu Cristomanta willaraspa. Manataj mentacuya munanichu wajcunaj waquichiskancupi kallariskaymanta. <sup>17</sup> Mentacuya munajka Señormanta mentacuchun. <sup>18</sup> Runasman pay quiquillan rejsichicuya munajka mana chayraycuchu allinpaj khawaska canka. Manachayrí Señor payta rejsichejtinmin allinpaj khawaska.

## 11

### *Pablo jatun munacuywan Corinto hermanosta khawan*

<sup>1</sup> Munayman mana yuyayniyojjina pisita parlajta saken-awayquichejta. ¡Arí, muchuwanquichej! <sup>2</sup> Chayta munani munacuywan mayta khawaskayquichejraycu, Diospa jatun munacuyninwanpis, kancunaj allinniyquichejpaj yuyaspa. Ajinamanta kancunata uj kosallawan parlaska mosoj sipastajina Cristojo ñaupakenman pusasunayquichejta yuyarkani. <sup>3</sup> Astawanrí kancuna urmanayquichejmanta manchachicushani. Yachanquichejña pantachej yuyaywan chay catari Satanás Evata engañaskanta. Ajinallatataj pantachiskas caspa Cristowan uj sonkolla llimphu yuyayniyquichejpis carunchaska cananmanta manchachicushani. <sup>4</sup> Uj pantachej yachachejta muchullanquichej, chayraycu manchachicushani. Paycunaka jamuspa

waj Jesusmanta willarancuman, manataj willaraskaymanjinachu. Paycunamanta waj espiritura jap'iwajchej, mana ñaupajpi Santo Espirituta jap'iskayquichejtajinachu. Jap'icuskayquichejmantaña wajjina sumaj willanaswan jamuncuman. Chay jamoj runasta aswan sumaj cachastajina cusikas muchunquichej. Chayraycu nokatapis muchuwaychej.<sup>5</sup> Yuyani mana ni imapi paycunamanta aswan pisichu caskayta.<sup>6</sup> Chay aswan sumaj cachas niskaka nincuman parlayniyi mana sumaj yachachiska caskayta. Astawanpis yachaypi sumaj yachachiska cani. Chaytataj tucuy imaymanapi tucuypa ñaupakencipi kancunaman ricucherayquichejña.

<sup>7</sup> Diospa sumaj willanasnинејта kancunata jatunchanapaj llamp'u sonkowan maquisniywan llanc'arkani. Chayraycu kancunaman willaraskaymanta kolketa causanapaj mana konawayquichejchu tiyan. Ajinapi kancuna jatunchaskas canayquichejpaj llamp'uchacorkani. Chaymanta ¿juchayojchu cayman?<sup>8</sup> Kancunata yanapaspapis waj llajtapi caj hermanosmanta causanapaj kowaskancuta jap'erkan. <sup>9</sup> Kancunawan cashasparí waquin cutis pisichicorkani. Chaywanpis ni pita miqhunapaj muchucherkanichu llasachispa. Astawanrí Macedonia jallp'amanta chayamoj hermanos pisichicuyniypi yanapawarkancu. Ajinamanta mana imapipis kancunata llasacherayquichejchu nipuni llasachiskayquichejpischu.<sup>10</sup> Cristoj cheka niskan nokapaj cashan. Chaymanjina mana kolketa jap'ispa willarayka cusiyniymin. Caymantataj ni pi Acaya jallp'api jarc'awankachu. <sup>11</sup> Chayta niskayraycu ¿kancunata mana munacuskaytachu yuyanquichej? Tucuy sonkowan mayta munacuyquichej. Chayta Dios yachan.

*Pablo yuyaychan mana cheka yachachejcunamanta*

<sup>12</sup> Astawanpis ruwaskaytaka ruwallasajpuni atipawayta munajcuna mana atipanawancupaj. Jatunchacunancupaj munancu paycunamanta runas yuyanancuta nokaycujina caskallancutataj. <sup>13</sup> Pantachinasta ruwajcuna cancu. Llulla cachas caspataj wajjinaman tucuncu Cristoj cahanman rijch'acunancupaj. <sup>14</sup> Chay imasmanta ama t'ucuychejchu quiquin supay Satanaspis lliphipej angeljinaman tucuskanraycu. <sup>15</sup> Chayraycu mana imapischu sichus paypa yanapajcunan riqhurimuncu chekan cajta yanapajcunajina chayka. Ruwaskasnincumanjinataj tucucuynincu canka.

<sup>16</sup> Ujtawan nishayquichej: Ama pipis mana yuyayniyojpaj khawawachunchu. Sitajchus ajinapaj khawanaman chayka, mana yuyayniyojtajina muchuwachun nokapis mentaricunaypaj.

<sup>17</sup> Mana manchachicuywan mentacuspa parlaskayka manamin Señorninchejmanjina parlaychu. Manachayrí mana yuyayniyojmanjina parlaymin. <sup>18</sup> Ashqhas runamanjina mentacojcuna cajtincoka nokapis mentaricusaj.

<sup>19</sup> Arí, kancunapis yuyayniyoj caspa mana yuyayniyojcunata cusiywan muchullanquichej. <sup>20</sup> Pipis camachisunquichej, pipis tucuy imata khehusunquichej, pipis paypa allinninpaj jap'icapusunquichej, pipis kancunamanta jatunchacun, pillapis uyayquichejpi sajmasunquichej chayka, cusiywan payta muchullanquichej. <sup>21</sup> P'enkasupa niyquichej, chaymanjina ruwanapajka nokaycu mana callpayoj runaschu caskaycuta.

*Pabloj muchuynin*

Astawanrí imatapis mayken mana manchachicuspa mentacunman chayka, nokapis, mana yuyayniyojllata parlaspa, mana manchachicuspa mentacuyta atini. <sup>22</sup> ¿Paycuna hebreoschu cancu? Nokapis. ¿Israaelcunachu? Nokapis. ¿Abrahampa mirayninchu? Nokapis ajinallataj. <sup>23</sup> ¿Cristoj cachasninchu sutichacuncu? Mana yuyayniyojjina parlani: Nokaka may astawanraj cachan cani. ¡Mayta llanc'ani! ¡May ashqha cutita wisk'aycuwarkancu! ¡May ashqha cutita jasut'iska! ¡May ashqha cutita wañuchinapaj khawaska cani! <sup>24</sup> Phishka cutita israelcuna quinsa chunca isk'onnijojta jasut'iwarkancu. <sup>25</sup> Quinsa cutita runas c'aspiwan wajtawarkancu. Uj cutita ch'ankawarkancu. Jatun kochapi barcowan purispa quinsa cutita wayrawan yacuman chincaycorkani. Uj tuta uj p'unchaytawan jatun kocha yacupi carkani. <sup>26</sup> Tucuynejman purispa may chhica peligropi taricuni. Mayu peligropi, wañuchej suwasmantapis, quiquin aylluymanta waj llajtayojcunamanta peligropipis cani. Llajtapi, ch'innejpi, jatun kocha peligropipis cani. Llulla hermanosmanta peligropipis cani. <sup>27</sup> Mayta sayc'unaycama llanc'aspas ashqha cutita puñuya mana atinichu. Yarkhachicuni, ch'aquichicunipis. Ashqha cutita mana miqhuspa, chirichicuspa, mana p'achayoj taricuni.

<sup>28</sup> Tucuy chay llaquiyuncunamantapis, sapa p'unchay llaquicushani tucuy iglesiasmanta mayta yuyaspas. <sup>29</sup> Maykenpis pisi callpayojo taricojinri, nokapis paywan pisi callpayojojllataj taricuni. Maykenpis juchaj trampaman urmajtin, nokapis paywan llaquiska ninapijina muchushani. <sup>30</sup> Mentacunay cajtenka, mentacusaj pisi callpayojo caskayta ricuchej imasmanta. <sup>31</sup> Señorninchej Jesuspa Diosnin Tatantaj yupaychaska cachun wiñaypa wiñayninpaj. Pay yachan mana llullacuskayta. <sup>32</sup> Uj cuti Damasco llajtapi carkani. Chay llajtaka perkawan muyucuska. Chaypi cashajtiy camachej Aretaspata uj autoridad runan carka. Payri chay llajtaj tucuy puncusnippi wakaychajcunata churarka jap'inawancupaj. <sup>33</sup> Astawanrí juch'uy punquitunejtataj alto perkamanta uj canastapi hermanos uraycuchiwarkancu pampaman. Ajinapi maquisninemanta aykecorkani.

## 12

*Pablo ricun Señormanta imasta*

<sup>1</sup> Mentacunay tiyan. Chayta kancunata mana yanapananpajjina cajtinpis, parlasaj Señorninchejpa kowaskasninmanta. Chaycuna espirituypি ricunas pacaska imaspis payneja ricuchiskas cancu. Chaycunata willaskayquichej. <sup>2</sup> Uj runata rejsini Cristowan ujchaskata. Chunca tawayoj watajinaña payka ujllata okhariska carka janaj pachacama.\* Imaynachus okhariska carka mana yachanichu, cuerponwanchus chayrí mana cuerponwanchus. Dioslla yachan. <sup>3</sup> Cay runata rejsini. Cuerponwanchus canman chayrí mana cuerpollanwanchus, chayta mana yachanichu. Dioslla yachan. <sup>4</sup> Caytarí yachani, cay runa janaj pachaman okhariska caskanta Dios tiyacun,† chayman pusaska carka. Mana parlay atina niskasta uyarerktataj. Chay niskasta runaka mana parlananchu. <sup>5</sup> Chayjinallamanta mentacusaj. Nokamantari

\* **12:2** Literal: quinsa caj janaj pachacama. † **12:4** Literal: paraíso.

mana mentacusajchu astawanka pisi callpayoj caskallaymanta mentacusaj.<sup>6</sup> Sichus mentacuya munayman chayka, yuyayniyoj casaj, niskasniy cheka caskanraycu. Cunari mana mentacuya munanichu. Ajinapi ruwaskasniyta ricojcuna niskasniyta uyarejcunapis chay imasllamanta khawawankancu manataj astawanka.

<sup>7</sup> Chay ricuchiwaskasnин may aswan jatun carka. Chayraycu Señorniy cuerpoypi uj qhishcatajina churarka llamp'u sonkoyojpuni canaypaj. Chay nanay Satanaspа cachanjinamin makaspa llaquichinawanpaj mana anchata jatunchacapunapaj. <sup>8</sup> Quinsa cutitataj Señormanta mañacorkani chayta khechupunawanpaj. <sup>9</sup> Payrі cutichiwarka: "C'acha yanapayniy basta kanpaj, pisi callpayoj cashajtiyqui atiyniywan aswan sumajta ruwanqui", nispa. Chayraycu astawanraj may cusiywan mentacusaj pisi callpayoj caskaymanta Cristoј atiynin nokapi tiyacunananpaj. <sup>10</sup> Ajinapi pisi callpayoj caskaymanta cusicuni. P'enkachiska, muchuchiska, ñac'arichiska Cristoraycu, chay imaspi cusicuni. Mayc'ajchus pisi callpayoj cani, chaypacha Cristonejta callpayoj cani.

### *Pabloka Cristoј cheka cachanmin*

<sup>11</sup> Mentacuspa mana yuyayniyoj tucuni. Kancunaraycu mentacunay tiyan. Chekatapuni kancuna mentanawayquichej carka. Mana imapipis aswan pisichu cani chay aswan sumaj cachasman rijch'acojmanta niskaka. Manapis imachu cani. <sup>12</sup> Arí, kancunawan cashajtiyjis Cristoј cheka cachan caskayta ricorkanquichej. Chayka ricuchijska carka llanc'aypi mana sayc'uspa Diosllapi confiaskaynejta jatun ruwanas-nejtataj. Chay ruwanasmanta runas t'ucuncu Diospa atiyninta ricuspa. <sup>13</sup> Waj llajtaspi iglesiasmanta ¿imaynata yuyawajchej kancunawan mana quiquinta ruwaskaytarí? Cáypichá canman: Mana llasacherkayquichejchu causayniypaj ni imata kancunamanta mañaspа. ¡Chay mana allinmanta perdonawaychej!

<sup>14</sup> Quinsa caj cutita kancunata watucunapaj waquichiskaña cashani. Manataj llasachiskayquichejchu. Sonkoyquichejtamin munani manataj kolkeyquichejtachu. Tata mama wawasnincupaj kolketa jallch'ancu, manataj wawasnincuchu tata mamapajka. <sup>15</sup> Kancunata yanapanay-paj may cusiywan konapaj cani tucuy capuyniyoj noka quiuiytapis. Sitajchus mayta munacuyquichej chayka ¿munacuwaskayquichej astawan pisichu canman?

<sup>16</sup> Mana llasachisuskayquichejta sumajta yachanquichejña. Waquinri nincu pantachej caskayraycu llullaswan jap'isuskayquichejta. <sup>17</sup> Sumajta caytapis yachanquichej: Nokaj cachamususkasniyka ni jayc'aj capuyniyojquichejta nokapaj jap'erkancuchu. <sup>18</sup> Titota camacherkani paywantaj hermanoycuta cachamorkani. Kancunawan caspa mana ni imata munapayarkachu. Yachanquichejtaj tucuyniycu quiquin yuyayniyojlla puriskaycutapis.

### *Juchata sakenancu tiyan*

<sup>19</sup> Cunanka ichapis yuyashanquichejraj ñaupakellayquichejpi cutichicuskaycuta. Astawanri Diospa ñaupakenpi Cristowan ujchaskataj parlashaycu. Chaywanpis, munacuskasniy, tucuy chay imasta kancunata wiñachinapaj ruwashaycu. <sup>20</sup> Manchachicushanitaj kancunaman chayamuspa tincojtinchej mana munaskaymanjina

canayquichejmanta, nokapis mana munaskayquichejmanjina canaymanta. Ichapis canman kancuna uqhupi phiñanacuy, churanacuy, c'ajaj phiñacuycuna, t'akarachej yuyaycuna, ch'ataycuna, cuento apaycuna, jatunchacuycuna, ch'ajwacunapis. <sup>21</sup> Chayamojtiy Diosniy ñaupakeyquichejpi p'enkachinawanmanta manchachicuni. May phutiska cayman juchallicushajcunamanta. Millay ruwaynincu khenchachacuynincu, sajra puriynincupis canman. Chayjina causayta mana phutiywan sakencumanchu Diosman cutircunancupaj chayka, llaquiska wakasaj.

## 13

*Pablo munacuywan allinnincipaj Diosmanta mañacun*

<sup>1</sup> Cunanka quinsa caj cutita jamushayquichej. Chayamuspataj kancuna uqhupi ruwaskasniyquichejta khawasaj. Dios palabranpi nin: "Iscay chayrí quinsa willajtincu imapis chekapaj khawaska canka", nispa. <sup>2</sup> Chay imasmanta nerkyquichejña iscay caj cutipi kancunawan cashaspa. Cunanpis manaraj chayamushaspa juchallicojcunaman tucuy wajcunamanpis niyquichej: Cutimuspa mana jarc'acuspa atiywan ruwasaj. <sup>3</sup> Sichus yachayta munanquichej Cristo chekata nokanejta parlaskanta chayka, kancunaman ricuchinapaj canka. Cristoka mana pisi callpayojchu kancunapaj cashan. Astawanpis sumaj atiyninwan kancuna uqhupi ruwashan. <sup>4</sup> Arí, Cristo runa caspa pisi callpayojjina cruzpi wañuchiska carka. Chaymantarí Dios jatun atiyninnejta payta causarichimorka wiñaypaj causacunapaj. Nokaycupis paywan cusca causacushaycu Diospa jatun atiyninnejta callpachaskas.

<sup>5</sup> Khawacuychej yachanayquichejpaj sichus kancuna cheka ñanpi purishanquichej. Chayrí ¿manachu yachanquichej Cristowan ujchaska caskayquichejta? <sup>6</sup> Munanitaj nokaycumantapis yachanayquichejta Cristowan ujchaska caspa mana khesachaskas caskaycuta. <sup>7</sup> Kancunapaj Diosmanta mañapuycu sajra cajtaka ama ruwanayquichejpaj. Ajinamanta atiyniyuta mana ricuchinaycuchu tiyan. Mana chayllatachu munaycu. Astawanka c'acha imastapuni ruwanayquichejta munaycu. Chaytachus ruwanquichej chayka, mana imachu runas nokaycuta khesachaskancoka. <sup>8</sup> Cheka cajpa contranpeka ni imatapis ruwayta atiycuchu. Manachayka cheka cajllapaj ruwanaycu tiyan. <sup>9</sup> Cusicuycutaj pisi callpayoj runas caspa, kancuna callpachaskas cajtiyquichej. Diosmanta mañacuycu sumaj wiñaskas canayquichejpaj. <sup>10</sup> Chayraycu manaraj chayamushaspa cayta kelkamuyquichej: Chayamuspa mana munanichu kancuna chaupipi sinch'i atiywan ruwayta. Chay atiyyta Señorninchej kowarka runasninta wiñachinapaj manataj paycunata urmachinaypajchu.

*Khepa caj yuyaychay napaycucunawan*

<sup>11</sup> Khepanpi, hermanosný, cusicuychej. Causayniyquichejta allinchaychej. Yuyaychaskaycuta uyariychej. Uj yuyayniyojlla caychej, allinpitaj causacuychej. Chaymanta munacoj allinyachej Dios kancunawan canka. <sup>12</sup> Kancunapura napaycunacuychej c'acha munacuywan Señorpi. Tucuy Diosman t'akaska runasnint napaycamusunquichej.

13-14 Señorninchej Jesucristoj c'acha yanapaynin, Diospa munacuynin, Santo Espíritoj ujchacuyninpis tucuy kancunawan cachun. Ajina cachun.

## LA CARTA DEL APOSTOL SAN PABLO A LOS GÁLATAS

1-2 Noka, Pablo, napaycamuyquichej. Nokawan caj Cristopi tucuy hermanospis napaycamusunquichej, kancuna Galacia jallp'api tanta-coj hermanosta.\* Diospa cachan cani. Señorninchej Jesucristo Dios Tatanchejwan ajllawarkancu churawarkancutaj, mana runaschu. Dios causarichimorka Jesucristota wañuskacuna chaupimanta. <sup>3</sup> Mañacushani Tatanchej Diospa, Cacharichiwajinchej Jesucristoj c'acha yanapaynin kancunawan cananta allillanta causanayquichejpaj. <sup>4</sup> Tata Dios-ninchejpa munayninmanjinataj Jesús causayninta jaywarka. Payka wañorka juchasninchejmanta cacharichinawanchejpaj, cunan p'unchay juchaj atiyninmantawan. <sup>5</sup> ¡Dios wiñaypa wiñaynintinpaj yupaychaska cachun! Ajina cachun.

<sup>6</sup> Cristo qhuyacuyninpi yanapaspa wajyasorkachej wawasnin canayquichejpaj. T'ucuni kancuna manaraj imapi Diosta sakepuskayquichejmanta waj willanasman ancha uskhayta chimpaspa. <sup>7</sup> Manapuni canchu waj sumaj willanas. Manachayka waquin runas umasniyquichejta t'ojpincu Cristomanta sumaj willanasta k'ewiyyta munaspa. <sup>8</sup> Astawanrí nokaycupis chayrí janaj pachamanta uj willajpis<sup>†</sup> willaskaycumanta waj willanasta willaranman chayka, paypa patanpeka Diospa c'ajaj phiñacuynin cachun. <sup>9</sup> Kancunaman nerkyaycuña; ujtawan niyquichej: willaraskaycuta jap'iskayquichejmantaña picchari waj willanasta willarasunquichej chayka, paypa patanpeka Diospa c'ajaj phiñacuynin cachun.

<sup>10</sup> Cayta nispaka tapucuni: ¿Maykenta cusichiytataj munaskayta yuyan-quichejrí—runastachu chayrí Diostachu? Mana runasta cusichiytachu munashani. Sichus runasta cusichiyta munaymanraj chayka, manapuni Cristoj camachinchu cayman.

*Jesucristo sut'incharka sumaj willanasta Pabloman*

<sup>11</sup> Cristopi caj hermanosní, Diospa ñaupakenpi yuyarichiyquichej sumaj willanasta willaraskayka mana runaj yuyayninmantachu. <sup>12</sup> Imaraycuchus chayta mana runasmantachu jap'erkani nitaj runaspa yachachiwaskancumantachu. Manachayrí chay sumaj willanasta Jesucristo sut'incharka riqhurimuwarka.

<sup>13</sup> Uyarerkanquichejña imaynata ñaupajpi israelcunajta yachachiskancumanjinapuni causaskayta sinch'ita ñac'arichispá Diospi jap'icoj tan-tacojcunata. Tucuy atiskaywantaj llanc'arkani paycunata tucuchinay-paj. <sup>14</sup> Nokaka israel runaspa yachachinasnincuta astawan sumajta casuspa causarkani wiñay-masisniymanta niskaka. Imaraycuchus jatun munayniywan tucuy sonkowantaj ñaupaj tataspa yachachinasnillancuta ruwaj cani. <sup>15</sup> Astawanka manaraj naceska cashajtiy Dios mayta yanapaspa ajllawarka cachan canaypaj. <sup>16</sup> Cusiywan yuyarka Wawan Jesusta rejsichiwayta waj llajtayojcunaman willaranaypaj Jesuska Wawan-min caskanta. Rejsichiwaytincama chaypacha mana pitapis tapuri-corkanichu. <sup>17</sup> Manataj rerkanichu Jerusalén llajtaman nokamanta

\* **1:1-2** Literal: iglesia. † **1:8** Literal: angel.

aswan ñaupajtaña Diospa cachasnin cajcuna yachachinawancupaj. Manachayrí Arabia jallp'aman unaypaj riporkani. Chaymantataj cutimorkani Damasco llajtaman.

<sup>18</sup> Chanta quinsa watamantaña Jerusalenman rerkani Pedrota rejsej. Paywantaj tiyarirocanki chunca phishkayojo p'unchayta. <sup>19</sup> Jesucristojo tucuy cachasninmanta ricorkani Pedrota, Señor Jesuspa wauken, Jacobollatawan. <sup>20</sup> Dios yachan cay kelkashaskayka chekapunimin caskanta.

<sup>21</sup> Jerusalenmanta llojsiytawanri rerkani Siria jallp'anejman Cilicia jallp'anejmanpis. <sup>22</sup> Judea jallp'api Cristopi jap'icoj hermanos nokata manaraj rejsiwarkancuchu. <sup>23</sup> Paycunaka uyarillarkancu niskancuta: “Ñaupajta nokaycu Diospa runasnin cajcunata ñac'arichiwajniyu, cu-nanka Cristopi jap'icunanta willarashan. Ñaupajta tucuy atiskanta ruwarka chay sumaj willanaspi jap'icuya tucuchinanpaj”, niskata. <sup>24</sup> Diosta mayta yupaycharkancutaj noka Jesuspi jap'icuskayraycu.

## 2

### *Pablotra rejiscing willaraj-masincupaj*

<sup>1</sup> Chunca tawayoj watasmanta ujtawan rerkani Jerusalenman Bernabewan. Pusarkanitaj Titota. <sup>2</sup> Rerkani Diospa sut'inchawaskanta casuspa. Chaypitaj hermanosman ricucherkaní sumaj willanasniya willarashaskayta waj llajtayojcunaman. Manchachicorkani ruwaskay khasilla cashaskanta yuyanancumanta. Chayraycu rejsiska curajcunata sapallancuta tapuricorkani. Imaraycuchus mana munarkanichu ninancuta khasilla cashaskanta tucuy callpaywan ruwaskayta ruwashaskaytapis. <sup>3</sup> Astawanpis waj llajtayojo Titopis nokawan cashaspa israelcunaj ruwanancumanjina cuerponpi señalacunanta\* mana camachiskachu carka. <sup>4</sup> Arí waquin mana cheka creejcuna tantacuyniycuman pacayllamanta yaycumorkancu Tito señalacunanta munaspa. Nokaycoka Jesucristoman ujchaskas caspa, chay camachiskamanta cavariskas caycu. Paycunari watekajcunajina yaycumuspa munarkancu watejmanta casunaycuta camachisjina. <sup>5</sup> Paycunataka ni uj ratupajpis casorkaycuchu. Imaraycuchus munarkaycu Cacharichiwajninchejmanta cheka sumaj willanasta mana k'ewichiskata wakaychayta kancunapaj.

<sup>6</sup> Ñaupajpi curajpaj khawaskasrí ni uj mosoj yachachinata yapawarkancuchu jap'inaypaj. Caskancoka ni imapischu nokapajka. Imaraycuchus Dios mana runaj rijch'acuynillantachu khawan, manachayrí sonkonta. <sup>7</sup> Astawanpis curajcuna repararkancu Dios nokata churawaskanta waj llajtayojcunaman sumaj willanasta willaranapaj; Pedrotapis Dios churaskanta israelcunaman sumaj willanasta willarananpaj. <sup>8</sup> Imaraycuchus quiquin Dios yanaparka Pedrota israelcunaman sumajta willarananpaj. Nokatapis yanapawarka waj llajtayojcunaman sumajta willaranapaj.

<sup>9</sup> Jesuspi jap'icoj hermanos Jacobotawan Pedrotawan Juantawan curajnincupaj rejserkancu. Paycunataj rejsispa Dios qhuyacuyninpi chay atiyta kowaskanta nokata Bernabetawan jap'iwarkaycu sumaj willanasta willaraj-masistajina. Jayyawarkaycutaj paña maquincuta ricuchinancupaj rejisksas caskaycuta rinaycupaj waj llajtayojcunaman,

\* 2:3 Literal: circuncidacunancuta.

paycunataj rinancupaj israelcunaman. <sup>10</sup> Chaywanpis munarkancu yanapanaycutapuni wajcha runasta. Chaytaka maytapunitaj ruwayta munani.

*Pablo Pedrota c'amerka*

<sup>11</sup> Pedro Antioquía llajtaman jamojtinrí payta uyanpi c'amerkani pantashaskanraycu. <sup>12</sup> Jacobojo sutinpi jamojcuna manaraj chayamushajtincu payka waj llajtayohermanoswan miqhoj. Chayamojtincurí allilamanta waj llajtayohermanosmanta t'akacapojo, israel parteruwajcunata manchachicuskanraycu. <sup>13</sup> Ajinata chaypi caj waj israel hermanospis Pedrowan cusca puraj uyaman tucorkancu. Bernabetawanpis puraj uya caynincuman pantacherkancu. <sup>14</sup> Sumaj willanasmanjina mana chekantachu ruwaskanta ricuspa tucuypa ñaupakencupi Pedrota c'amerkani: "Kanpis, israel runa caspa, waj llajtayojjina causashanqui manataj israel runajinachu. Chanta ¿imaraycutaj camachinqui waj llajtayojcunata israelcunaj yachachinasnincumanjina ruwanancutarí?"

*Tucuy chekanpaj khawaskas cancu Jesucristopi jap'icuskancunejjlata*

<sup>15</sup> Nokanchejka israelcunapuni nacecorkanchej, manataj waj llajtayo juchasapaschu canchej. <sup>16</sup> Chaywanpis yachanchejña Dios uj runataka chekan runapaj khawaskanta Jesucristopi jap'icuskannejjlata, manataj camachiskanta ruwaskannejtachu. Ajinata nokanchejpis Jesucristopi jap'icorkanchej Paynejjlata chekan runaspaj Dioska khawanawanchejpaj, manataj camachiskata ruwaskanchejnejtachu. Chekamanta Dioska ni pitapis camachiskata ruwaskannejta chekan runapaj khawanchu.

<sup>17</sup> Cristopi jap'icuynejllata chekanchaskas cayta tucuy sonkowan munanchej. Chaywanka reparacunchej ñaupajpeka nokanchejpis waj llajtayo runasjina juchasapas caskanchejta. Astawanpis ni pi ni imaynamanta atinmanchu niyta Cristo juchata ruwachej caskantaka.

<sup>18</sup> Yachanchej camachiskasta ruwaspaka mana chekan ruwajpaj khawaskachu caskanchejta. [Ajinapi camachiskata ruwaynejtachus watejmanta munashayman chekanchaska cayta chayka,]† mana casoj caskayta ricuchini. <sup>19</sup> Camachiskasta ruwayta mana atiskayraycu, camachiskasnejta wañuskajina carkani. Ajinapi camachiskamanta t'akaska carkani Diosllapaj causanaypaj. <sup>20</sup> Cristopi jap'icuspaka paywan cusca chacataskajina carkani. Chayraycu cunanka manaña nokaj atiyniywanñachu causashani. Manachayrí Cristo atiyninwan nokapi causashan. Nokari cunan cay pachapi causashaspa Diospa Wawanpi jap'icuynejta causashani. Payka munacuwarka, nokaraycutaj pay quiquin wañorka. <sup>21</sup> Diospa c'acha yanapaynintaka atiyniyoja khawani. Camachiskasta ruwaynejtachus Dios runata chekanpaj khawanman chayka, Cristoka khasillatamin wañorka.

### 3

*¿Camachiskasnejta chayrí Cristopi jap'icuynejtachu?*

<sup>1</sup> ¡Ay, mana reparayta atej Galacia jallp'api hermanos! Nokaycu kancuna chaupipi sut'ita willararkaycu Jesucristo chacataska caskanta. Chanta ¿pitaj musphachispa pantachisorkachej cheka caja mana casunayquichepjaj? <sup>2</sup> Cayllata willarinawayquichejta munani. Dios

† 2:18 Ninayan.

sonkoyquichejman Santo Espirituta cachamusorkachej. ¿Chayka camachiskasta ruwaskayquichejraycchu? chayrí ¿sumaj willanasta uyarispa Jesucristopí jap'icusayquichejraycchu? <sup>3</sup> ¿Mana reparayta atejcunapunichu cawajchej? Santo Espiritunejta mosoj causayta kallarerkanquichej. Chanta ¿yuyanquichejchu chay mosoj causayniyquichejta atiynillayquichejwan junt'ayta? <sup>4</sup> ¿Causayniyquichejpi Diospa may jatun ruwaskasnintapis khasillachu jap'erkanquichej? Noka Diosmanta mañacuni ama khasilla cananpaj. <sup>5</sup> Dios sonkoyquichejman Santo Espirituta cachamorka. T'ucuna ruwanastataj kancuna chaupipi ruwan. Caytaka ruwan sumaj willanasta uyarispa Diospi jap'icusayquichejnejta manamin camachiskasta ruwaskayquichejnejtachu.

<sup>6</sup> Quiquillantataj Abrahampis Diospi jap'icorka. Jap'icuskanraycutaj chekan runapaj Dios payta khawarka. <sup>7</sup> Chayraycu Diospi jap'icojcunaka Abrahamjina Diospa niskanta jap'incu. <sup>8</sup> Dios ñaupajmanta Abrahamman sumaj willanasta palabranpi nin: "Nokapi jap'icuwaskayquinejta tucuy jallp'amanta runasta sumajta yanapasaj", nispa. <sup>9</sup> Dios Abrahamta chekan runapaj khawarka. Ajinaka Jesucristopí jap'icojcunatapis sumajta yanapaspa quiquillantataj chekan runaspaj khawan.

<sup>10</sup> Camachiskasta ruwaskancunejta chekanchaska cayta yuyajcunatarí tucuynincuta sinch'ita phiñacuspa Dios juchachan manapuni junt'ayta atiskancuraycu. Palabranpi ninmin: "Tucuy camachiskasninta tucuyninta mana junt'ajka juchachaskamin". <sup>11</sup> Chekatapuni Diospa ñaupakenpi ni pipis atinmanchu chekanchaska cayta camachiskanta ruwaskannejtaka. Palabranpi Dios nin: "Chekan runapaj khawaska cajka nokapi jap'icusannejtamín causanka". <sup>12</sup> Camachiskasninta ruwayka manamin Diospi jap'icuymantachu. Palabranpiri nin: "Camachiskasta junt'ajka ruwaskannejta causanka". Camachiskasta mana ruwaskanchejraycurí juchachaskas canchej.

<sup>13</sup> Camachiskasninta mana casojcunaka wiñaypaj wañuncu. Astawanrí chay camachiskaspa juchachayninemanta Cristo wañuyninnejta cacharichiwakanchej. Payka juchanchejraycu juchachaska carka Diospa c'ajaj phiñacuyninpi. Palabranpipis nin: "Juchachaskamin cashan c'aspipi warqhuska cajka". <sup>14</sup> Chayraycu Jesucristo juchachaska carka Dios waj llajtayojcunatapis sumajta yanapananpaj. Paycunatapis Dios chekanchan Abrahamtajina. Chayraycutaj Dios sumaj niskanmanjina Santo Espirituta sonkonchejman cachamuwanchej paypi jap'icuyniejta.

¿Camachiskasnинejtachu chayrí Diospa sumaj niskannejta?

<sup>15</sup> Hermanosní, runas uqhupi caj imasmanta uj ricuchinata niskayquichej. Iscay runas uj imamanta sumajta parlaycuspa munaskancuta kelkaycuncu sutisnincuwan. Chaymanta ni pi chay kelkaskancuta atinmanchu yankhayachiyta nitaj yapaycuytapis. <sup>16</sup> Dioska Abrahamman khepa wawanmanwan sumajta parlarka. Mana nerkaчу "wawacunaman" ashqhasmanpis parlanmanjinaka. Manachayrí ujllamanta parlarka "wawanman" nispa. Chay wawanka Jesucristomin. <sup>17</sup> Ajina cajtenka niyta munani: Dios Abrahamman ñaupajtaña tratonta ruwarka. Chaymanta tawa pachaj quinsa chuncayoj watasmantaña Moisespa camachiskasnín churaska carka. Chay camachiskaska mana atinchu yankhayachipuya Diospa sumaj niskanta. <sup>18</sup> Moisespa camachiskasninta ruwaskanraycuchus runa

wiñay causayman yaycunman chayka, manapuni Diospa sumaj niskanraycuchu yaycunman. Astawanrí Dios Abrahamta qhuyacuspa palabrannejta wiñay causayta korka.

*¿Imapajtaj Moisespa camachiskasnirí?*

<sup>19</sup> Chanta ¿imapajtaj Moisespa camachiskasnirí? Yapaska carka ricuchinawanchejpaj juchayoj caskanchejta mana casuskanchejraycu. Camachiskaka churaska carka Abrahampa ayllunmanta jamoj Jesucristo jamunancamalla. Cristomanmin Dioska sumajta nerka. Camachiskarí angelespa ñaupakenpi Moisesman koska carka. Chaymanta Moisés jaywarka Diospa camachiskasninta runasman. <sup>20</sup> Diosrí paypa palabranwan Abrahamman nerka. Ujlla Dios cajtenka mana pipis paypa sutinpi parlananchu carka.

<sup>21</sup> Chanta ¿Moisespa camachiskasnenka Diospa sumaj niskanpa contrapichu? ¡Manapuni! Canman carka uj wiñay causayta koj camachiska chayka, Dios chay camachiskanejta runasta chekanpaj khawanman carka. <sup>22</sup> Wajjinamantari Diospa palabranka tucuy runasta juchaj camachisnin caskancuta sut'incharka. Ajinapi Jesucristopí jap'icuspá runas juchamanta cachariskas cayta atincu Diospa sumaj niskanmanjina.

<sup>23</sup> Astawanpis Jesucristomanta sumaj willanas manaraj chayamushajtin nokanchej juchachaskas casharkanchej Moisespa camachiskasniran. Camachisjina jap'iskas carkanchej chay sumaj willanas riqhurimunancucama. <sup>24</sup> Ajinapi Moisespa camachiskasnenka pusaycachawajninchijinamin carka Jesucristoman pusanawanchejpaj. Paypi jap'icuskanchejnejta nokanchejtapis chekan runaspaj Dios khawanawanchejpaj carka. <sup>25</sup> Cristopí jap'icojinchejñaka manaña ni pi pusanawanchejta munanchejchu.

<sup>26</sup> Jesucristopí jap'icuskayquichejwanmin tucuyniyquichej Diospa wawasnín canquichej. <sup>27</sup> Yacupi bautizacuspá ricucherkanquichej Cristowan ujhacuskayquichejta. Paymanjinañataj causashanquichej. <sup>28</sup> Diospajka tucuy runas uj rejlla cancu. Israelpunapis, waj llajtayojcunapis, camachispis, mana camachispis, kharispis, warmispis cachuncu. Chayraycu tucuy kancuna ujlla canquichej Jesucristowan ujhaska. <sup>29</sup> Cristoja canquichej chayka, Abrahamjina chekan runaspaj khawaskas canquichej. Diospa sumaj niskannejtataj kancunapis Abrahamjina paymanta wiñay causayta jap'inquichej.

## 4

<sup>1</sup> Astawan sut'inchariyta munani. Chayake jap'ej wawaka manaraj runayashaspaka uj camachijinallarajmin cashan. Tucuy chayake paypata cashajtinpis suyanan tiyan jap'inanpaj. <sup>2</sup> Wawallaraj cashajtenka tatan churapun uywajcunata khawajcunatawan tatanpa ajllaskan p'unchay chayamunancama. Chaypachalla jap'enka chayakentaka. <sup>3</sup> Nokanchejwanpis quiquillantaj carka. Manaraj Cristo jamushajtin Diomanta pisillata yacharkanchej. Chayraycu cay pacha runaj yachaynin camachiwarkanchej. <sup>4</sup> Diosrí ajllaskan p'unchaypi Wawan Jesucristota cachamorka. Wawanka warmimanta nacecorka. Payka israel ayllupi nacecuspa camachiskasnincuta casorkapuni. <sup>5</sup> Ñaupajpi chay camachiskasman wataskas carkanchej. Chayraycu Dios Wawanta cachamorka chay camachiskaspa

juchachayninmanta cacharichinawanchejpaj paypa wawasninpaj jap'icapunawanchejpajtaj.

<sup>6</sup> Wawasniñ caskayquichejta ricuchinanpaj, Dios sonkoyquichejman Santo Espirituta cachamorka tiyacunapaj. Wawan Jesús mañacuskanmanjina chay Espíritoj atiyinirwan cusiskas Diosta khaparinchej: “¡Munaska Tatáy!” nispa. <sup>7</sup> Chayraycu Diospa wawan canqui manaña camachichu. Wawan caskayquiraycutaj wiñay causayta Dios kosonka Cristonejeta.

### *Pablo yuyan allinnincupaj*

<sup>8</sup> Ñaupajpirí Diosta mana rejsiskayquichejraycu ruwaska dioscunaj camachisnin carkanquichej. Chekamanta chaycunaka mana dioscunachu cancu. <sup>9</sup> Cunanrí Diosta rejsinquichejña. Astawanka Dios kancunata rejsisunquichej. Chanta ¿imaraycutaj ujtawan cay pacha yachaycunata camachisjina casuya munanquichejri? <sup>10</sup> Chekanpaj khawaskas cayta munaspa wakaychashanquichej ajllaska p'unchaycunata mosoj quillasta, t'akaska tiemposta, watastawanpis. <sup>11</sup> Llaquichiwanquichej. Mayta manchachicuni kancuna uqhupi sinch'ita llanc'askayka yankhapaç cananmanta.

<sup>12</sup> Jesucristopi hermanosníy, mayta niyquichej: Noka Cristopijap'icuni, kancunapis ajinatapuni paypi jap'icuychej. Amataj israel-cunaj ruwanasnincuman camachis caychejchu. Imaynatachus ñaupajta carkanquichej Cristopijap'icuspa, nokapis ajinallataj carkani. Kancuna ni imapi mana allin cajtaka ruwawarkanquichejchu. <sup>13</sup> Yachanquichej onkoska caskayraycu kancunaman Cristomanta willararkayquichej ñaupajpi. <sup>14</sup> Onkoyniy llaquichiwarka. Chaywanpis mana pisipichu khawawarkanquichej nitaj khesachawarkanquichejchu. Astawanrí jap'iwarkanquichej Diospa uj angelninpis chayrí Jesucristopis caymanjinata. <sup>15</sup> Cunan ¿imaraycutaj manaña cusicunquichejchu yachachinasniywanrí? Noka kancunata mentaspa chekata nini, aticunmanchus carka chayka, ñawisniyquichejtapis orkhucuspa kowanquichejman carka. <sup>16</sup> ¿Cheka cajta kancunaman niskayraycuchu chejnisojiyquichejtajina khawanquichej?

<sup>17</sup> Llulla yachachejcuna mayta munancu suwayta sonkosniyquichejta. Munaynincurí mana allinniyquichejpajchu. Imaraycuchus paycunaka munancu t'akasuya sumaj willanaspi allinniyquichejmanta. Chayjinapitaj munancu paycunaman c'ascacunayquichejta. <sup>18</sup> Allin yuyaywan munacususkayquichejka allinpuni canman. Astawanrí munacusunallayquichejpuni mana noka kancunawan cashajtillaychu. <sup>19</sup> May munaska wawasníy, onkocushaj warmijina ujtawan kancunapaj ñiac'arishani Cristojina canayquichejcama. <sup>20</sup> Cunanpacha munayman kancunawan uyapura parlayta manataj kelkakkallaywanchu. Cristopicausayniyquichejmanta mana yachanichu imatachus yuyanayta.

### *Uj ricuchina Agarmanta Saramantawan*

<sup>21</sup> Kancuna, camachiskas ruwaynejta chekanchaskas cayta munajcuna, niwaychej: ¿Manachu Diospa palabranta uyarerkanquichej?

<sup>22</sup> Imaraycuchus chay kelkaskanpi nin Abrahamka iscay khari wawasnijoj caskanta. Uj carka camachin Agarmanta, ujnintaj warmin Saramanta. <sup>23</sup> Chay camachinmanta cajka nacecorka Abrahampa munayninmanjina. Paypa warminmanta cajtaj nacecorka Diospa

sumaj niskanmanjina. <sup>24</sup> Chaycunaka uj ricuchina caspa yuyachiwanchej Diospa iscay tratosninmanta. Ujnín Jesucristopi jap'icuymín cashan, ujnintaj Moisespá camachiskasnín. Chayta Sinaí orkomanta Dios korka. Chay tratonmanjina nacecojcunataj camachi warmi Agarpa wawasnínman ríjch'acuncu camachiskaspa camachisnintaj cancu. <sup>25</sup> Imaraycuchus Agar suteka yuyachillawanchej Sinaí orkomanta Arabia jallp'api. Chaymin yuyachiwanchej cunan p'unchay Jerusalén llajtayojcunamanta. Paycunaka camachiskaspa camachisnín cancu. <sup>26</sup> Janaj pacha Jerusalén llajtayojcunari camachiskas-manta cachariskas cancu. Astawanka tucuy nokanchej Jesucristopi jap'icuspa janaj pacha llajtayojcuna canchej mosoj Jerusalén llajtamanta. <sup>27</sup> Ajinatamin Diospa palabranpi nin:

Cusicuy, mana wawallicoj nitaj wachayta atej warmi.

Khapariytaj cusiywan onkocuy nanayta mana rejsej warmi.

Chekamanta sapan khesachaska warmi mana wawasniyoj cajpis khepata Diospa sumaj niskannejta aswan ashqha wawasniyoj canka kosayojmanta niskaka.

[Chay wawastaj janaj pacha llajtayojcuna cancu Jesucristopi jap'icuskancunejta.]\*

<sup>28</sup> Hermanosníy, Diospa sumaj niskannejta Abrahampa wawan Isaac nacecorka. Ajinallataj nokanchejpis Isaacjina Diospa wawasnín canchej paypa sumaj niskanmanjina. <sup>29</sup> Astawanrí cunapís ñaupajpíjinallataj cashan. Abrahampa munayninmanta nacecojka llaquichisharka Diospa sumaj niskannejta nacecojta. Ajinata cunapís camachiskasta ruwaskanejta chekanchaska cayta munajcuna llaquichishancu Diospa runasninta. Chay runasnintaj Santo Espíritoj munayninmanjina naceskas cancu. <sup>30</sup> Chaywanpis Dios palabranpi nin: "Kharkoy camachi warmita wawantinta. Imaraycuchus camachi warmej wawanka chayaketa mana jap'enkachu quiquin warminpa wawanwan cuscaka", nispa. <sup>31</sup> Ajinaka, hermanosníy, nokanchej Diospi jap'icojcunaka manamin camachi warmej wawasnínjinachu canchej. Manachayrí Diospa wawasnín canchej, janaj pacha llajtayojcuna.

## 5

*Sinch'itapuni sayaychej Cristo cucharisuskayquichejraycu*

<sup>1</sup> Chekatapuni Cristo cucharichiwarkanchej payllapaj causananchejpaj. Chay cuchariska causayniyuquichejpi sinch'ita sayaychej. Amañataj watejmanta camachiskata ruwayman yuntajina wataycucuychejchu.

<sup>2</sup> Noka, Diospa cachan, nishayquichej: Chekanchaskas canayquichejpaj kharišpi señalta ruwachicojcunata,\* chekatapuni kancunapaj Cristoka ni imaynamanta allinniyquichejpajchu canka. <sup>3</sup> Ujtawan sut'ita nishayquichej: Pillapis chekan runapaj khawaska cananpaj chayta ruwanman chayka, Moisespá camachiskasninta tucuyninta ruwanan tiyan. <sup>4</sup> Kancuna, camachiska ruwaskannejta chekan runapaj khawaska cayta munajcunaka k'alata Cristomanta t'akacaporkanquichej. Diospa c'acha yanapaynintataj sakeporkanquichej. <sup>5</sup> Nokanchejrí Diospi jap'icuspa cusiywan suyashanchej wiñaypaj chekanchaskas cayta Espiritunejta. <sup>6</sup> Jesucristowan ujchaska causaypeka kharej cuerponpi

\* 4:27 Ninayan. \* 5:2 Literal: circuncidachicojcuna.

señalta ruwaypis mana ruwaypis niña imananchu. Astawanka Diospi jap'icuylla allin cashan munacuynelruwaspa.<sup>7</sup> Cristowan causayniyquichejpi sumajta risharkanquichej. Chanta ɿpitaj pantachisorkachej cheka cajta mana casunayquichejpajrí.<sup>8</sup> Chay pantaska yachachejcuna manamin wajyasojniyquichej Diosmantachu cancu.<sup>9</sup> Yachanchej pisi t'anta pokochinalla tucuy masantinta pokochiskanta.<sup>10</sup> Cristopi ujchacuyninchejraycu kancunamanta mana iscayrayanichu. Yachani yachachinasniymanta wajtaka mana jap'inayquichejta. Chay pantachej runatarí Dios ñac'arichenka ruwaskanmanjina, may curajpaj khawaska cashajtispis.<sup>11</sup> Hermanosný, noka willarashaymanraj chekanchaska canapaj israelcunaj ruwanancuta chayka, paycuna manaña llaquichiwancumanchu. Ajina cajtenka Cristojo wañuyninta willaraskayka mana runasta phiñachinmanñachu.<sup>12</sup> Munayman chay pantachisojcunayquichejka paycunapura tucuchicunancuta. Ajinapitaj Cristopi hermanosmantapis t'akaskas cancumán.

<sup>13</sup> Imaraycuchus hermanosný, ñaupa ruwanasmanta cachariskas canayquichejpaj Dios wajyasorkachej. Chay cachariska causayrí ama sajrata ruwanapajka cachunchu. Manachayrí munacuywan yanapanacuychej allinniyquichejpaj.<sup>14</sup> Ajinata Dios palabranpi nin: "Runa-masiyquita munacuy kan quiuiyquitajina", nispa. Chekatapuni chayllata ruwaspa Diospa tucuy camachiskasninta junt'anchej.<sup>15</sup> Wajjinamantarí q'ita animalcunajina qhaninacuwajchej miqhunacuwajchej chayka, pajtataj tucuchinacuwajchej Cristowan ujchaska causayniyquichejta.

### *Runaj sajra munayninmanjina ruwaycuna*

<sup>16</sup> Chayraycu mayta niyquichej Santo Espíritoj munayninmanjinapuni causacunayquichejta. Ajinapi runaj sajra munaynintaka mana casunayquichejchu.<sup>17</sup> Imaraycuchus runaj sajra munaynenka churanacunpuni Santo Espíritoj munayninwanka. Espíritoj munaynintaj churanacunpuni runaj sajra munayninwan. Chay iscay munaycuna churanacuncu ama ruwanayquichejpaj munayniyquichejta.<sup>18</sup> Santo Espíritu pusasunayquichej chayrí Moisespa camachiskasnínman manaña camachischu canquichej.

<sup>19</sup> Chaywanpis sajra munayninmanjina causan, chay runaj ruwaskasnenka sut'i rejiskskamin. Caycuna cancu: Khenchachacuycuna, millay ruwaycuna, sajra puriycuna,<sup>20</sup> waj dioscunata yupaychaycuna, laykanacuycuna, chejnacuycuna, phiñacuycuna, tumpanacuspa chhokonacuycuna, c'ajaj phiñacuywan contrallicuycuna, paycunallapaj ruwaycuna, churanacuy, t'akanacuycuna,<sup>21</sup> wajpa imanta munaycuna, runa wañuchiycuna, machaycuna, machaywan mana sajsacuycuna, chayjina juchacunawan. Cayta nerkyayquichejña quiquillantataj mayta nishayquichej: Chayjina ruwajcunaka manapuni wiñay causayta jap'enkancuchu Dios camachin, chaypi.

### *Espíritoj munayninmanjina ruwaycuna*

<sup>22</sup> Espiritunejta Dios wajjina pokoya pokochin runasnipi: Munacuy, cusicuy, allinta tiyacuy, mana cutichispa muchuy, qhuyacuynijo cay, c'acha cay, niskanta junt'aj cay,<sup>23</sup> llamp'u sonkoyoj cay, munayninta camachicoj cay. Chayjinata [causacuspaka tucuy camachiskastapis

junt'anchej.]<sup>†</sup> <sup>24</sup> Jesucristo jta cajcunaka tucuy sajra munaycunata wañucherkancuña, chaycunata sakepuspa. <sup>25</sup> Santo Espíritoj atiyninmin causachiwanchej. Chayraycu munayninmanjina causacunanchej tiyan.

<sup>26</sup> Amapuni khasimanta jatunchacunachu ni phiñachinacunachu nitaj envidiawan churanacunachu.

## 6

### *Yanapanacushaychejpuni*

<sup>1</sup> Hermanosníy, Cristopi uj hermano mana yuyayllamanta juchallicunman chayka, Santo Espíritoj munayninmanjina causacojcuna yanapaska payta cheka cajman cutichiychej. Chaytarí ruwanayquichej qhuyacoj, llamp'u sonkowan. Kan quiuiyquitataj khawacuy pajtataj kanpis juchallicushallawajtaj. <sup>2</sup> Purajmanta yanapanacuychejpuni llaquiy pantay imaspi juchata atipanayquichejpaj. Ajinamanta Cristoj camachiskanta munanacunancheja junt'anquichej. <sup>3</sup> Pichari mana cashaspalla jatunpaj khawacunman chayka, chay runa pantacun. <sup>4</sup> Sapa ujniyquichejrí ruwaskanta khawacuychej. Ruwaskan allinpuni chayka, quiuin ruwaskallanmanta cusiconka, manañataj wajpa khawaraskanmantaka. <sup>5</sup> Imaraycuchus sapa ujpa ruwanasninta ruwanan tiyan.

<sup>6</sup> Sumaj willanaspi yachachiska cajka tucuy allin capuynin cajmanta yachachejninan munacuywan kochun.

<sup>7</sup> Ama pantaychejchu. Dioswanka ni pipis pujillacunchu. Imatachá runa tarpun chayllatataj ruthonka. <sup>8</sup> Quiquillantaj cashan causayninchepipis. Runaka sajra munayninmanjina manacajta ruwan. Chanta chay sajra munayninta ruwaskanmanta wañonka. Santo Espíritoj munayninmanjina causacojrí sumajta ruwan. Chanta chay Espiritumantataj uj pokoytajina jap'enka wiñay causayta. <sup>9</sup> Ajinaka ama sakepunachu allin cajta ruwaytaka. Chekatapuni mana llauchhuyacapusun chayka, ajllaska p'unchaypi sumaj cajta\* jap'isunchej uj pokoytajina. <sup>10</sup> Chayraycu atishaspaka tucuy runaman allin cajtapuni ruwanachej astawanka Cristopi jap'icoj hermanosnincheman.

### *Pabloj jatun cusiyenka Jesucristomin*

<sup>11</sup> Khawaychej quiquin maquiywan may jatun letraswan kelkamushayquichej. <sup>12</sup> Runacunaj ñaupakencupi allinpi riqhuriya munajcuna tucuynincu tankashasunquichej kharispi señalta ruwacunayquichejpaj. Cristoj wañuyninmanta willanasraycu mana ñac'arinancupaj chayta ruwashancu. <sup>13</sup> Paycuna quiquinco cuerponcupi señalaska caspapis Moisespa tucuy camachiskasninta mana casuncuchu. Astawanpis kancunapi chay señalesta ruwachisunayquichejta munasunquichej jatunchacunallancupaj. <sup>14</sup> Nokaj cusiyiniyrí Señorninchej Jesucristo nokanchejpaj chacataska caskallanmin cachun. Paypa wañuskannejta cay pacha sajra munaycunaka nokapaj wañuchiskasña cancu. Nokapis chacataskajina cani t'akaskañataj sajra munaycunamantaka. <sup>15</sup> Chekamanta kharispi señal ruwaypis mana ruwaypis ni imapischu. Manachayrí Jesucristowan ujchaska mosojyaska causananchejmin sumajka. <sup>16</sup> Tucuy chaymanjina causacojcuna Diospa cheka runasnín cancu. Paycuna Dioswan allinyacuskas causa konkancu. Paycunataj Dios qhuyaconka.

<sup>†</sup> 5:23 Ninayan. \* 6:9 Ninayan.

<sup>17</sup> Cunamantaka amaña pipis nokata llaquichiwachunchu. Chekamanta Señorninchej Jesuspaj ñiac'ariskaymanta nokaj cuerpoypi t'irisniymin ricuchincu paypa camachin caskaytaka.

<sup>18</sup> Hermanosný, Señorninchej Jesucristo sonkosniyquichejpi tiyacuspa c'achata yanapasuchun. Ajina cachun.

## LA CARTA DEL APOSTOL SAN PABLO A LOS EFESIOS

<sup>1</sup> Noka, Pablo, Cristo Jesuspa cachan cani Diospa munayninnejta. Efeso llajtapi Diospa runasninman kelkamushayquichej, Cristo Jesuswan ujchaska casojcunaman. <sup>2</sup> Dios Tatanchejpa Señorninchej Jesucristoj c'acha yanapaynin kancunawan cachun allillanpi causacunayquichejpaj.

*Dios Tatanchej unaymantapacha nokanchejpaj yuyarka*

<sup>3</sup> Señorninchej Jesucristoj Tatan Diosnintaj yupaychaska cachun. Pay qhuyacuyninpi mosoj causayninchejpaj c'achatapuni yanapawanchej. Chay causayka janaj pacha causaymin Cristowan ujchaska caskanchejraycu. <sup>4</sup> Yuyayninmanjina manaraj cay pachata ruwash spa Dioska ajllacuwarkanchej, Cristonejta allinyachinawanchejpaj. Munarka payman t'akaskas mana juchayoj munacuypi paypa ñaupakenpi cananchejta. <sup>5</sup> Cacha munayninmanjinataj unayña sumajta yuyarka nokanchejta wawasninpaj rejiscapunawanchejta Jesucristonejta. <sup>6</sup> Dioska jatun qhuyacuyninwan wajyawarkanchej munaska Wawanwan ujchaska cananchejpaj. Chayraycu payta yupaychanchej jatun c'acha yanapayninraycu sumaj atiyninraycupis.

*Diospa yuyaskanta Cristo junt'arka*

<sup>7</sup> Cristowan ujchacuspa juchasninchejmanta cacharichiskas canchej. Cacharichinawanchejpaj payka yawarninta jich'aspwa wañorka. Ajinapi Dioska khapaj c'acha yanapayninmanjina juchasninchejta khechorka. <sup>8</sup> C'acha yanapayninpi mana mich'acuspa kowarkanchej tucuy yachayta yuyaytapis. <sup>9</sup> Ajinapi sut'inchawarkanchej paypa pacaska munayninta. Chay sumaj munayninmanjina yuyaskanta Cristopi junt'arka. <sup>10</sup> Chaymanjinataj yuyarka pay quiquinman tucuy imata ujchayta Cristo uma cananpaj. Ajllaskan tiempo junt'acojtin janaj pachapi cajcunata cay pachapi cajcunatapis Cristonejta ujchayta munarka.

*Santo Espíritu señajina sonkonchejpi*

<sup>11</sup> Dioska atiyninwan tucuy imata munayninmanjina ruwajmin. Pay unayña nokaycupaj yuyaspa ajllacuwarkaycu Cristowan ujchaska runasrin canaycupaj. <sup>12</sup> Nokaycu Cristopi ñaupajta confiacojcunapaj ajinata ruwarka atiyninta jatunchanaycupaj. <sup>13</sup> Kancunapis uyarerkanquichej cheka niskanta imaynachus juchamanta cachariskas canayquichejta. Chay sumaj willanasta uyarispataj Cristopi jap'icorkanquichej. Ajinata jap'icojtiyquichejtaj Diospa sumaj niskanmanjina Santo Espíritu sonkoyquichejta sellarka. Chayka Diospa runasrin caskayquichejta ricuchinanpajmin. <sup>14</sup> Santo Espíritu sonkonchejpi señajina capuwanchej wiñaypaj cachariskas cananchejcama. Chaywan Dioska ricuchiwanchej tucuy niskanta junt'ananta. Nokanchej wañunanchejmanta Jesucristo wañuspa, wiñaypaj Diospata ruwawarkanchej. Ajinapi wiñaypaj atiyninraycu yupaychasunchej.

*Graciasta kospa Pablo Diosmanta mañapun*

<sup>15</sup> Nokaka uyarerkani imaynatachus kancuna Señorninchej Jesuspi jap'icusquichejta, tucuy Diospa runasninta munacuskayquichejtapis. <sup>16</sup> Chayraycu kancunamanta graciasta koshanipuni kancunapaj Diosmanta mañacuspa. <sup>17</sup> Dioska Señorninchej Jesucristoj Diosnin atiyniyoj Tatanmin. Mañapuyquichej Espiritunnejta yachayninta kosunayquichejta pacaska cajta sut'inchasunayquichejtapis. Ajinapi payta sumajta rejsinquichej. <sup>18</sup> Ajinapitaj sonkoyquichejpi reparaspa yachanquichej may sumaj may khapaj causaypaj Dios wajyasuskayquichejta. Chay janaj pachapi causayta suyasunchej Diospa t'akaska runasnинwan cusca, niskanmanjina. <sup>19</sup> Mañacunitaj rejsinayquichejta may jatun, mana tucucoj atiyniyoj caskanta paypi jap'icojcunata yanapanawanchejpaj. <sup>20</sup> Chay mana tucucoj callpanmanjina pay ruwarka wañuymanta Cristota causarichimuspa. Chanta tiyaycucherka paywan cusca janaj pachapi camachinanpaj. <sup>21</sup> Payta tiyaycucherka aswan curaj Camachej cananpaj. Tucuy camachejmanta, curajmanta, atiyniyojmanta, señormantapis aswan atiyniyoj cananpaj Cristota churarka. Tucuy rejsiska sutimantapis aswan curaj sutiyoj cananpaj payta tiyaycucherka. Tucuy chayka canka cay tiempopipis jamoj tiempopipis. <sup>22</sup> Tucuy imatataj Cristoj atiyninman Dios churarka. Cristotataj churapuwarkanchej tucuy imapi iglesia runasninpaj umajina cananpaj. <sup>23</sup> Nokanchej iglesianka Cristoj cuerponjina canchej. Paywan ujchaska caspa cuerpowan umawan ujllaman tucunchej. Cristoka tucuya tucuynepi junt'an.

## 2

### *Diospa c'acha yanapaynинnejta wañuymanta cachariskas*

<sup>1</sup> Dios mosoj causayta kosorkachej kancuna unay wañuskajina cashatiyquichej sajra ruwaskasniyquichejraycu juchasniyquichejraycu.

<sup>2</sup> Unayka chayjina ruwajcuna carkanquichej cay pacha runasjina. Wayrapi atiyniyoj mana ricuna sajra camachejtataj casuspa causarkanquichej. Cunanpis chay quiquin yuyay mana Diosta casucojcunata apaycachashan. <sup>3</sup> Unayka tucuy nokanchejpis ajinata causarkanquichej cay pacha munayninchemanjina. Chay sajra munayninchey yuyayninchepis atipawaskanchejmanjina ruwarkanchej. Ajinamanta Diospa c'ajaj phiñacuyninta jap'inanchejpajjina carkanchej tucuy mana payta casucojcunajina.

<sup>4</sup> Diosrí qhuyacuynipi ancha khapaj caspa maytapuni munacuwarkanchej. <sup>5</sup> Juchanejta wañuskajina cashajtinchejpis Cristowan cuscata Dioska causarichiwarkanchej. Yuyaricuychej: Diospa c'acha yanapaynинnejta juchamanta cachariskas carkanquichej.

<sup>6</sup> Cristo Jesuswan ujchaskata Dioska causarichimuwarkanchej janaj pachapipis paywan cusca tiyaycuchinawanchejpaj. <sup>7</sup> Ajinata ruwarka jakay jamoj tiempospi c'acha yanapayn may khapaj caskanta ricuchinanpaj. Dioska qhuyacuspa c'achata yanapawanchej Cristo Jesusnejta. <sup>8</sup> Chay c'acha yanapaynинnejtamin wañuymanta cacharichiskas carkanquichej Diospi jap'icuspa. Cayrí mana kancunamantachu carka. Diosmin mosoj causaytaka kosorkachej.

<sup>9</sup> Manataj ruwaskasmantachu carka ama ni pi jatunchacunananpaj.

<sup>10</sup> Paypa ruwaskanmin canchej. Cristo Jesusnejta ruwawarkanchej sumaj cajta ruwaspa causacunanchejpaj. Dioska unayña yuyarka ajinata causacunanchejpaj.

### *Jesucristopijap'icuspa ujchaska*

11 Yuyaricuychej kancunaka mana israelcunamantachu nacecorkan-quichej. Israelcunapaj kancunaka mana circuncidaskacuna sutichaska canquichej. Paycunaka circuncidaskacuna sutichacuncu. Chay señalta cuerpopi ruwancu camachiskasincumanjina Diospa runasnin caskan-cuta ricuchinancupaj. 12 Waj llajtayojcuna caspa ñaupajpi Cristomanta carupi carkanquichej. Israelcunapajpis mana llajta-masispajchu khawaskas carkanquichej. Diospa sumaj niskasnin mana kancunapaj carkachu. Nitaj chay niskasninpi suyayta aterkanquichejchu. Cay pachapitaj mana Diosniyoj causarkanquichej. 13 Cunanrí kancuna ñaupajpi carupi cajcunata Dioska kayllachicusorkachej Cristo Jesuswan ujchaspa wañuyninnejta. 14 Cristomin allinyachejnincheka. Paymin israelcunatawan waj llajtayojcunatawan ujllaman ruwarka tucuyn-incu Diospa runasnin canancupaj. T'akachej chejninanacuytapis pay chincacherka. 15 Pay quiquinpi paycunata allinyacherka t'akaj camachiskasta yankhaman tucuchispa. Ajinata Cristo ruwarka cuerponpi uj mosoj Runallaman ruwananpaj. 16 Chaywanpis wañuyninnejta iscaynin llajtacunata Diosman allinyacherka uj cuerpollapi. Chacatanapi wañuyninnejta chejninanacuya chincacherka. 17 Allinyachej willanaswantaj jamorka kancuna carupi cajcunamanpis nokaycu kayllapi cajcunamanpis. 18 Cristonejtamin kancunawan nokaycuwanka uj Santo Espiritunejlata Tata Diosman kayllaycucuya atinchej. 19 Cunanri manaña waj llajtayojcunachu nitaj carumantachu canquichej, manachayrí llajta-masis Diospa runasninwan. Paypa wasinpi cajcunaman-tataj canquichej. 20 Cachacunarpa willajcunarpa cimientoncu patapi wasichaskasjina canchej. Cristo Jesús quiquintaj aswan sumaj wasichana rumijina. 21 Paywan ujchaska tucuynin waseka cusca wiñan payman t'akaska yupaychana-wasi canancama. 22 Kancunapis nokaycuwan cusca wasichaskas canquichej Diospa wasin cananchejpaj. Wasichaskas canchej Espiritunnejta Dioska nokanchejpi tiyacunananpaj.

## 3

### *Pabloka waj llajtayojcunaman willarananpaj ajllaska*

1 Ajinapimin noka, Pabloka, Cristo Jesusraycu wisk'aska cashani.\* Kancuna waj llajtayojcunaman willaranapajmin paypa cachamuskan caskayraycu carcelpi taricuni. 2-3 Uyarerkanquichejñachá c'acha Dios pacaska yuyayninta sut'inchawaskanta. Qhuyacuyninpaitaj confiawaspa kancunaman cachamuwarka. Chay jawa uj pisita ñaupajpi kelkarimorkayquichejña. 4 Chay kelkamuskayta leespa reparayta atinquichej Cristomanta Diospa yuyaynippi allin yachachiska caskayta. 5 Unay tiempospi chay pacaska yuyaynenka mana pimanpis sut'inchaskachu carka. Cunanrí payman t'akaska cachasninman willajcunamanpis Dioska Santo Espiritunejta yuyayninta sut'inchan. 6 Caymin pacaska yuyaynenka: Waj llajtayojcuna israelcunawan cusca wiñay causayta jap'ej-masis cancu; Cristojo cuerponmanta cancu; sumaj niskasmantapis jap'ej-masis cancu. Tucuy chayta Cristo Jesuswan ujchaska caspa sumaj willanasnejta jap'incu. 7 Chayta willaranapajmin camachin cani Dios qhuyacuynippi confiawaskanmanjina. Chaypajtaj

\* 3:1 Literal: Cristo Jesuspa preson.

atiyninmanjina callpachawan. <sup>8</sup> Diospa tucuy runasnimanta sullc'amantapis aswan sullc'ajina cani. Payrí c'acha yanapayninwan nokaman confiawarka waj llajtayojcunaman khapaj willanasninta willaranayta. Chay khapaj willanasnenka Cristoj mana tucucoj munacuyninmin. <sup>9</sup> Cachamuwarkataj tucuyman sut'inchanaypaj imaynatachus Dios pacaska yuyayninmanjina cunan ruwashaskanta. Tucuy imata ruwaj Dioska chayta yuyaynillanpi pacarka wiñay wiñaymantapacha. <sup>10</sup> Cunanrí Dioska ashqha imaymana yuyayninta ricuchiyta munan. Chayta ricuchishan iglesia runasnинnejta janaj pachapi caj camachejcunaman atiyniyojcunamanpis. <sup>11</sup> Chayka wiñay wiñaymantapacha yuyaskanmanjinamin. Chayta pay yuyarka Señorninchej Cristo Jesusnejta junt'ayta. <sup>12</sup> Ajinapi Jesuspi jap'icupsa mana manchachicuspa ima Diosman kayllaycuya atinchej. <sup>13</sup> Chayraycu nericuyquichej ama llauchhuyacuychejchu kancunaman willaraskayraycu llaquichiska caskaymanta. Manachayrí sonkochacuychej, ñac'ariskaynejta jatunchaskas caskayquichejraycu.

### *Pablo Diosmanta mañapun*

<sup>14</sup> Tucuy chay yuyaycunaraycu Dios Tataman konkoricuni. <sup>15</sup> Paymantamin sapa uj ayloka sutinta jap'in janaj pachapi cay pachapipis. <sup>16</sup> Paymanta mañacushani callpachasunayquichejta Santo Espiritunnejta. Ajinapi may khapaj atiyninmanjina sonkoyquichej uqhpupi callpachasonkachej, <sup>17</sup> Cristo sonkoyquichejpi tiyacunananpaj paypi jap'icuskayquichejnejta. Ajinapitaj munacuypi sumaj sayaskas wiñaskas canquichej. <sup>18</sup> Chayta mañacuni callpachaskas sumajta reparanayquichejpaj imaynatachus munacuywan causacunata. Reparanquichej tucuy Diospa runasnинwan cusca Cristoj munacuynenka may jatun caskanta. ¡Mayjina ancho, caru, pata, uqhutajmin! <sup>19</sup> Cristoj munacuynenka tucuy yachaymanta aswan jatunmin. Chaywanpis mañacuni chay munacuyninta sumajta rejsinayquichejpaj. Ajinapi causayniyquichejka Diospa cayninan junta canka.

<sup>20</sup> Payka may astawanraj mañacuskanchejmanta yuyaskanchejmantapis ruwayta atin. Chay atiyninmanjinataj cunanpis nokanchejpi ruwashan. <sup>21</sup> Paytaj yupaychaskapuni cachun runasnинnejta Cristo Jesusnejtapis wiñaypa wiñaynintinpaj. Ajina cachun.

## 4

### *Santo Espiritunejta ujchaska*

<sup>1</sup> Ajinaka, noka, Señorninchejraycu wisk'aska, tucuy sonkowan mañacuyquichej Diospa wajyacuskasnijnina causanayquichejta. <sup>2</sup> Chaymanjina causaychej llamp'u sonkowanpuni, c'acha yuyaywantaj. Runastapis muchuychejpuni. Munacuywan purajmanta yanapanacojcunapunitaj caychej. <sup>3</sup> Allinyanaska caspa tucuy atiskayquichejta wakaychacuychej Santo Espirituwan ujchaska causacunayquichejpaj. <sup>4</sup> Uj cuerpolla, uj Espiritullamin. Chaymanjinataj tucuy kancunata Dios wajyasorkachej paywan cusca causacuyta suyanayquichejpaj. <sup>5</sup> Uj Señor, uj cheka ñan, uj bautismo, <sup>6</sup> uj Diosllataj, tucuyta Tatancu. Pay tucuyta camachin, tucuy runasnинnejta ruwan, tucuy runasninpitaj tiyacun.

*Cristoj cuerponpi sapa uj ruwanayoj canchej*

<sup>7</sup> Astawanpis sapa uj nokanchejman imachus ruwanapaj atiyta kowarkanchej Cristoj koskanmanjina. <sup>8</sup> Chayraycu Dios palabranpipis nin:

Janaj pachaman wicherispa atipaskacunata presota pusarka.

Atiyunata runasman korkataj.

<sup>9</sup> Chay wicheriskanka niyta munan ñaupajta cay pachamanta uracama uraycamuskanta. <sup>10</sup> Uraycamojka quiquin wichejjllatajmin. Wichererka tucuy janaj pachacunamanta aswan patacama. Ajinamanta Cristoka tucuynejpi caspa tucuy imata junt'an. <sup>11</sup> Cristoj cuerpon iglesia runasninan cay atiyunata kon: Cachasnin, sut'inchajcuna, willarajcuna, pastorcuna,\* yachachejcuna canancupaj. <sup>12</sup> Chay atiyunata korka tucuy Diospa runasninta yanapanacuypi waquichiskas canancupaj. Chayka Cristoj cuerponta wiñachinapajmin. <sup>13</sup> Chay atiyunawan tucuy runasnin Diospi jap'icuypí ujchaska canka. Wawan Cristota rejsispataj mosoj causaypi wiñaskas casunchej. Payka munan tucuy runasnin ujchaska wiñananchepta sumaj Runa cananchej-cama. Munantaj uj cuerpolla Cristowan paymanjina tucuy imapi wiñaskas cananchepta. <sup>14</sup> Ajinapi Cristopi wiñaskas caspaka manaña wawajina muyuchiskaschu casun ima yachachinallawanpis. Runacuna sajra yachaynincipi pantachinasta waquichincu. Cristopi wiñaskacunari chay yachachinaswanpis manaña engañaskaschu casun. <sup>15</sup> Astawanri cheka cajta munacuywan parlaspa tucuy imapi Cristowan ujchaska wiñasunchej. Paymin umanchejka. <sup>16</sup> Umanchej Cristoman allin c'ascaskataj sumaj casachiskataj cuerponka wiñan ujcuna ujcunane-jta. Umaj callpachaskanmanjina waquichiska sapa uj ruwan maychus ruwananta tucuy cuerpon munacuypi wiñacunanpaj.

*Cristowan mosoj causaymanta*

<sup>17</sup> Cayta Señorpa sutinpi encargaspa niyquichej: Amaña Diosta mana rejsejuncuinaka causaychejchu. Paycunaka yankha yuyaynincuman-jina causashancu. <sup>18</sup> Yuyaynincoka lakhayaskamin. Diospa causayn-inmanta carunchaskas cancu mana reparaskancuraycu rumi sonkos caskancuraycupis. <sup>19</sup> Paycuna cheka cajta manaña rejsincuchu nitaj munancuchu. Tucuy munaynincuwan jaywacorkancutaj sajra causayman millay ruwanasta ruwanancupaj. <sup>20</sup> Kancunari mana chayjinatachu Cristomanta yachacorkanquichej. <sup>21</sup> Yachanimin paypa yachachiskanta uyarispa jap'iskayquichejta cheka caj Jesupi ricuchiska caskanman-jina. <sup>22</sup> Chayraycu imaynachus causarkanquichej, chay mauc'a causayta wijch'upuychej. Mauc'a causayka millay llulla munaycunawan is-mushan. <sup>23</sup> Mosojyaychej wajjina mosoj yuyaywan causacunayquichej. <sup>24</sup> Diosmanjina mosoj causaywantaj p'achallicuychej. Chay mosoj causayta pay ruwarka chekanta, c'acha ima causacunayquichejpaj cheka cajmanjina.

*Cheka cajmanjina causaymanta*

<sup>25</sup> Uj cuerpopi ujchaska canquichej. Chayraycu llullacuya wi-ch'uspa sapa uj cheka cajta parlanacuychej runa-masiyquichejwan.

---

\* **4:11** Chayrí ancianos.

<sup>26</sup> Phiñacunquichejchus chayka, ni jayc'aj juchallicuychejchu inti yayuc-nancama phiñaskaraj caspa. <sup>27</sup> Nitaj supay Satanasman lugarta koy-chejchu.

<sup>28</sup> Suwajka amaña suwacuchunñachu. Manachayrí sumaj imasta ruwaspa quiquin maquisninwan llanc'achun. Ajinamanta caponka pisichicojman konanpaj. <sup>29</sup> Ama ima millay parlaypis simiyquichejmanta llojsichunchu. Manachayrí allin cajta parlaychej hermanosta wiñachinapaj. Ajinamanta uyarejcunata c'achata yanapanquichej. <sup>30</sup> Amataj Diospa Santo Espiritunta llaquichiychejchu. Espiritunnejtamin sellaskas carkanquichej jakay jamoj p'unchaypi wiñay causaypaj cachariskas canayquichejpaj. <sup>31</sup> Wijch'uychej tucuy jaya yuyayta, rabiacuyta, phiñacuya, khaparkachayta, sajra parlaytapis, tucuy imaymana sajra caytawan. <sup>32</sup> Astawanpis ujcuna ujcunapaj c'acha caychej, qhuyanacuychej. Imaynatachus Dios perdonasorkachej Cristopi, quiquillantataj kancunapis perdonanacuychej.

## 5

<sup>1</sup> Ajinaka Diospa munaska wawasnin caspa payjina ruwajcuna caychej. <sup>2</sup> Imaynatachus Cristopis munacuwarkanchej ajinallatataj munacuywan causacuychej. Payka nokanchejraycu causayninta jaywacorka. Diosman causayninta jaywanatajina kospa Diosta cusicherka. <sup>3</sup> Astawanpis khenchachacuya, millay cajta, tucuy munapayay cajtapis sakeychej. Kancuna chaupipeka chaycunamanta ni parlaskallapis cachunchu Diospa runasnin caskayquichejraycu. <sup>4</sup> Amataj cachunchu kancuna chaupipi millay parlay, ni mana yuyayniyoj parlay, nitaj yachayniyojina manacaj parlay. Chayjina parlaycunaka manamin allinchu. Manachayrí Diosman graciasta koymín allenka. <sup>5</sup> Janaj pachapi Cristoka Dioswan camachin. Sumajta yachanquichejtaj: Manamin khencha, ni millay caj, nitaj munapayajpis janaj pachapi wiñay causayta jap'enkachu. Chay munapayayka ruwaska diosta yupaychaywan quiquinmin.

### *C'anchayniyoj runasjina causacuychej*

<sup>6</sup> Ama pipis kancunata engañasuchunchu yankha parlaycunawan. Chay parlaycunaraycu Diospa c'ajaj phiñacuynin jamun mana casuco-jcunaman. <sup>7</sup> Ama paycunaj ruwaj-masisnin caychejchu. <sup>8</sup> Ñaupajpeka lakhapi causarkanquichej juchasapas caskayquichejraycu. Cunanrí Señorwan ujhaska caspa c'anchay canquichej. Chayraycu c'anchayniyoj runasjina causacuychej. <sup>9</sup> C'anchaymanta jamun, pokoyjina, tucuy c'acha caj, chekan ruway caj, cheka cajpis. <sup>10</sup> Chay pokoy causayniyquichejpi cajtin Señorta imaynapichus cusichiyyta reparan-quichej. <sup>11</sup> Amataj ruwaysicojcuna caychejchu lakhamanta mana pokoyniyoj ruwanaswanka. Astawanpis chay ruwanas sajra caskanta reparachiychej. <sup>12</sup> Yachanquichej chay lakhamanta cajcunaj pacaypi ruwaskasnincoka p'enkaymin cashan parlanallapajpis. <sup>13</sup> Tucuy chay imas c'anchaypi reparaskaka, sajra riqhurin. C'anchaypi sajra caskanta ricuspa chay ruwanasta sakenchej. <sup>14</sup> Chayraycu nin: Puñoj, rijch'ariy; jataricuy wañuskacunamanta, Cristotaj kanman c'anchaycusionka.

*Santo Espirituwan junt'apuni*

<sup>15</sup> Ajinaka khawacuychej imaynatachus chekanta purinayquichejita. Ama mana yuyayniyojcunajinaka, manachayrí yuyayniyojcunajina puriychej. <sup>16</sup> Sajra p'unchaycunapi tiyacushanchej. Chayraycu sapa p'unchay sumaj ruwaskasniyquichejwan junt'aychej. <sup>17</sup> Ajinaka ama caychejchu mana yuyayniyojcunaka. Manachayrí entiendeychej imachus Señorpa munaynin caskanta. <sup>18</sup> Amataj ujyanaswan machaychejchu. Chayka causayta tucuchin. Manachayrí Santo Espirituwan junt'aycuchicuychej. <sup>19</sup> Purajmantataj parlanacuychej yupaychana taquinaswan, himnoswan, Santo Espíritoj yuyaychaskan taquinaswanpis. Tucuy sonkowan taquispa yupaychaychej Señorta. <sup>20</sup> Graciasta koychejpuni tucuy imasmanta Señorninchej Jesucristojo sutinpi Dios Tataman. <sup>21</sup> Purajmanta casunacuychej Cristota manchachicuspa.

### *Khari warmipaj yuyaychanas*

<sup>22</sup> Warmis, kosayquichejta casuychej Señorninchejpi jap'icojcunajina. <sup>23</sup> Kosaka warmej umanjinamin. Ajinallataj Cristopis iglesia runasnimpumancujinamin. Pay quiqintaj iglesianpa Cacharichejninpis cashan. <sup>24</sup> Astawanpis imaynatachus iglesia runasnín Cristota casuncu, ajinallatataj warmis kosancuta tucuy imapi casunancu. <sup>25</sup> Kosas, warmiyquichejta munacuychej. Imaynatachus Cristopis iglesia runasninta munacorka, ajinata kosas warmincuta munacunancu. Cristoka runasninta munacuspa paycunaraycu causayninta jaywacorka. <sup>26</sup> Jaywacorka payman runasninta t'akananpaj yacu mayllaywan llimphuchaspa niskannejta. <sup>27</sup> Chayta Cristo ruwarka iglesia runasninta uj cuerpollapi paypa ñaupakenman pusanapaj. Mana pantayniyojta, ni ch'ichiyojta, nitaj chayjina rijch'acuyniyojtapis munan. Manachayrí c'acha mana juchachana cananchejta munan. Ajinata runasninta ñaupakenman pusanapaj sonkopi c'achachan. <sup>28</sup> Cristoj munacuskajinallataj kosas warmincuta munacunancu quiquin cuerponcutajina. Warminta munacojka pay quiqinta munacun. <sup>29</sup> Manamin pipis ni jayc'aj quiquin cuerponta chejnicorkachu. Manachayrí munacuywan uywan cuidantaj. Quiquillantataj Cristopis runasninta munacuywan uywan cuidantaj <sup>30</sup> cuerponmanta caskanchejraycu. <sup>31</sup> Chayraycu khareka sakenan tiyan tatanta mamantapis warminwan ujchaska cananpaj. Iscaynincutaj ujchaska cankancu. Ajinaka manaña iscaychu cancu, manachayrí ujllaña. <sup>32</sup> Chay parlariskayka uj sumaj pacaska yuyaymin. Nokarí Cristomanta iglesia runasninemantawan parlashani. <sup>33</sup> Astawanpis sapa uj warminta munacuchun pay quiqintajina. Warmitaj kosanta sumajpaj khawachun.

## 6

### *Wawaspaj tataspaj yuyaychanas*

<sup>1</sup> Wawas, Señorninchejpi jap'icojcunajina tatayquichejta mamayquichejta casuychej. Chaymin chekanka. <sup>2-3</sup> Camachiskapis nin: "Tatayquita mamayquita casuy, unayta cay pachapi sumajta causanayquipaj. Ajinata sumaj niskanwan Dioska chay camachiskata yaparka allin cajninta ricuchinanpaj. <sup>4</sup> Tatas mamas, ama

wawasniyquichejta phiñachiychejchu. Manachayrí casuchicuspa uywaychej Señorpa yachachinanpi yuyaychayninpipis.

*Camachispaj patroncunapajwan yuyaychanas*

<sup>5</sup> Camachis, cay pacha patroncunayquichejta sumajpaj khawaspa casuychej. Manchachicuywan tucuy sonkowanpis Cristotajina casuychej. <sup>6</sup> Amataj runa ricunanpajjinallaka ruwaychejchu. Manachayrí Cristoj camachisnijina Diospa munayninta c'acha yuyaywan ruwaychej. <sup>7</sup> Sumaj munaywan serviychej Señortajina amataj runatajina naka. <sup>8</sup> Yachanquichejjina sapa uj allin ruwaskanmanjina Señormanta jap'inanta, camachipis chayrí mana camachipis. <sup>9</sup> Patroncuna, quiqlantataj kancunapis camachisniyquichejwan ruwaychej. Amaña paycunaman manchachinaswan niychejchu. Yachanquichej paycunapis kancunapis janaj pachapi Señornijo caskayquichejta. Payka uj runata waj runamanta manamin astawanpajchu khawan.

*Diospa soldadosnijina p'achalliyucuychej*

<sup>10</sup> Chaywanpis Señorwan ujchaska callpachacuychej paypa jatun atiyninwan. <sup>11</sup> Imaynachus soldadoka makanacuna p'achaswan p'achalliyucun atipanapaj, ajinallataj kancunapis Diospa tucuy makanacuna p'achasniwan p'achalliyucuychej. Ajinapi supay Satanaspa urmachej sajra yuyaskasnipa contranpi sinch'ita sayayta atinquichej. <sup>12</sup> Nokanchejka mana runaswanchu\* makanacunchej, manachayrí mana ricunaswan: Camachejcunawan, atiyniyojcunawan, cay lakha pacha sajra atiyniyojcunawan. Mana ricuna wayrapi atiyniyoj sajracunawan makanacunchej. <sup>13</sup> Chayraycu Diospa koskan tucuy makanacuna p'achaswan p'achalliyucuychej sajra p'unchaypaj. Ajinapitaj sinch'ita sayaspa tucuya atipaskayquichejmantaña sinch'ita sayanquichej. <sup>14</sup> Ajinaka sinch'ita sayaychej cheka cajwan chumpiskas. Pechopajtaj chekan ruwanasta pecherotajina churaycucuychej. <sup>15</sup> Chaquiyquichejmantaj allinyachej sumaj willanaswan waquichiskas canayquichejpaj ojot'aycucuychej. <sup>16</sup> Chay tucuymanta astawanka Diospipuni jap'icuychej† wakaychaska canayquichejpaj. Chaywan enemigoj laurashaj tucuy pantachiycunanta‡ thasnuchiyya atinquichej. <sup>17</sup> Diospa sumaj niskanta jap'iycucuychej umayquichejpaj uj sombrerotajina. Chaymin wiñaypaj cachariska canayquichejka. Santo Espíritoj koskan t'ujsina espadatapis jap'iychej. Chayka Diospa palabranmin. <sup>18</sup> Chaywanpis Santo Espíritoj yuyaychaskanmanjina tucuy sonkowan mañacuspapuni caychej. Rijch'ariskapuni cashaychej Diospa tucuy runasninpaj mañapuspa. <sup>19</sup> Nokapajpis mañapuwaychej runasman parlashajtiy Dios yuyaychanawanpaj. Ajinapi sumaj willanaspa pacaska cajninta mana manchachicuspa sut'inchasaj. <sup>20</sup> Chaypajmin cachan churaska cani. Chayta willaraskayraycutaj preso cashani. Diosmanta mañapuwaychej mana manchachicuspa ninaymanjina willaranaypaj.

*Napaycucuna*

<sup>21</sup> Munaska hermano Tiquicoka cheka camachi Señorpi. Pay nokamanta ruwashaskymanta ima tucuya willasonkachej.

\* **6:12** Literal: yawarwan aychawanpis. † **6:16** Literal: chay escudowan. ‡ **6:16** Literal: flechacunata.

22 Chaypajpumun payta cachamuyquichej nokaycumanta yachanayquichejpaj sonkochasunayquichejpaj ima.

23 Hermanosný, allillanpi tiyacunayquichejpaj munacuy paypi jap'icuytaj cachun. Chaycunata Tata Dios Señorninchej Jesucristopis kowasun. 24 Señorninchej Jesucristota tucuy munacojcunapaj mana tucucoj c'acha yanapaynin cachun. Ajina cachun.

## LA CARTA DEL APOSTOL SAN PABLO A LOS FILIPENSES

<sup>1</sup> Noka, Pablo, Timoteowan Cristo Jesuspa camachisnin caycu. Filipos llajtapi tucuy Diospa runasninman, pastorcunancuman, yanapajcunancumanpis kelkamushayquichej. Kancuna Cristo Jesuswan ujchaska caspa Diospa runasnin canquichej. <sup>2</sup> Dios Tatanchejpa Señorninchej Jesucristojtapis c'acha yanapaynin kancunawan cachun allillanpi causenayquichejpaj.

### *Graciasta kon paycunarycu*

<sup>3</sup> Kancunamanta yuyaricuspaka Diosniyman graciasta konipuni. <sup>4</sup> Sapa cuti Diosmanta mañacuspaka cusiywan tucuy kancunapaj mañapuyquichej. <sup>5</sup> Ajinata graciasta koni uyariskayquichejmantapacha cunancama nokawan yanapacuwaskayquichejmanta. <sup>6</sup> Yachanitaj sonkoyquichejpi c'acha causayta Dios kallariskanta wiñachinanta Cristo Jesuspa cutimunan p'unchaycama. <sup>7</sup> Chaytari chekanta yuyani tucuy kancunamanta anchata sonkoywan munacususkayquichejraycu. Wisk'aska caskaypipis muchojmasisniy canquichej. Chaywanpis sumaj willanas cheka caskanta ricuchishajtiy willashajtiy whole nokawan ujchacunquichej. Chayraycu tucuy kancuna causacoj-masisniy canquichej Dios c'achata yanapawaskanchejraycu. <sup>8</sup> Diosmin yachan imaynatachus munacuyninwan tucuy kancunata mayta munacuskayquichejta.

### *Diosmanta mañapun paycunapaj*

<sup>9</sup> Cayjinatataj Diosmanta mañacushani: Munacuyniyquichej astawan astawanraj Diospa munaynini yachaywan tucuy yuyaywanpis wiñananta. <sup>10</sup> Ajinata mosoj causayniyquichejpi ajllanquichej aswan allin cajtapuni. Cristoj cutimunan p'unchaypajtaj llimphu sonkoyojo mana juchayojojis canquichej. <sup>11</sup> Chaywanpis Jesucristonejta c'acha causayniyojpuni\* canquichej Dios jatunchaska yupaychaskataj cananpaj. Chayta mañapuyquichej.

### *Sumaj willanaska mana jarc'askachu cashan*

<sup>12</sup> Hermanosníy, yachanayquichejta munani cay muchuskayraycu sumaj willanaska mana jarc'askachu cashan. Manachayrí aswan willaraska cashan. <sup>13</sup> Ajinapi Roma camachejpa wasinpi guardia-cuna tucuy wajcunapis sut'ita yachancu Cristoraycu carcelpi wisk'aska cashaskayta. <sup>14</sup> Wisk'aska caskaywantaj ashqha hermanosinchej Señorpi callpachacuncu. Chayraycu astawan astawan Diospa niskanta willashancu mana manchachicuspa. <sup>15</sup> Chekamanta waquenka envidiawan churanacuywantaj willarashancu. Waquinrí c'acha munaynincuwan Cristomanta willarashancu. <sup>16</sup> Paycuna munacuywan willarashancu yachaspa sumaj willanas cheka caskanta ricuchinapaj churaska caskayta. <sup>17</sup> Chay ujcunarí t'akarachinapaj willarashancu puraj uya caywan, [munaspa runas paycunallata khatinancuta.]† Wisk'aska caskaypi chaywan llaquiyyta yapawayta yuyancu. <sup>18</sup> {Imanantaj

\* **1:11** Literal: pokoyniyoj. † **1:17** Ninayan.

chayrí? I maymanallapipis Cristomanta willarashaskancuraycu cusi-cuni. Canman puraj uymantapis chayrí cheka sonkomantapis.

*Nokapaj causayka Cristomin*

Astawanpis willaraskancuraycoka cusicusaj. <sup>19</sup> Imaraycuchus tucuy chayka allinniyapaj yanapawanka. Ajina canka Diosmanta mañapuwaskayquichejnejta Jesucristoj Espíritun yanapawaskannejtapis. <sup>20</sup> Mayta munani confiacunitaj ama ni imapi p'enkachiska canaypaj. Astawanpis imaynatachus cay p'unchaycama Señorniy yanapawarka, ajinallatapuni yanapawanka. Cunanpis Cristollata mana manchachicuspa nokapi jatunchayta munani causayniywanpis chayrí wañuyniywanpis. <sup>21</sup> Nokapaj causayka Cristomin, wañuytaj aswan sumaj, Cristowan cusca canaypaj. <sup>22</sup> Sitajchus cay pachapi causayman chayka, Señorta jatunchanaypaj llanc'asaj. Manataj yachanichu causaytachus wañuytachus ajllanayta. <sup>23</sup> Cay iscay imaswan ñit'iskajina cashani, cay pachamanta llojsipuyta munaspa Cristowan cacunaypaj. Chayka aswan allinpuni cashan. <sup>24</sup> Cay pachapi<sup>‡</sup> causanaytarí ajllayman kancunata yanapanaypaj. <sup>25</sup> Chaytaka chekatapunitajmin yachani tucuy kancunawan canaypaj cay pachapi khepacunaytaka. Ajinapitaj yanapaskayquichej mosoj causayniyquichejpi wiñanayquichejpaj Diospi jap'icuspa cusicunayquichejpaj. <sup>26</sup> Ujtawantaj kancunawan caskayraycu astawan astawan Cristo Jesuswan ujchaska cusicunquichej.

*Sumaj willanasmanjina causacuychej*

<sup>27</sup> Cayta niyquichej: Imaynatachus Cristoj sumaj willanasnini causa-cunanchej, ajinallatapuni puriychej. Sinch'itataj sayaychej uj yuyayllawan uj sonkollawan cusca llanc'aspa. Ajinapi runas sumaj willanasta uyarispa Diospi jap'iconkancu. Chaywanka kancunata ricoj jamuspapis sumaj causayniyquichejmanta yachasaj. Chayrí mana chaypi caspapis llanc'ashaskayquichejmanta uyarisaj. <sup>28</sup> Amataj imapipis enemigocunamanta manchachicuychejchu. Mana manchachicuspa sayaskayquichejka sut'ita ricuchin Dios chaycunata tucuchinanta. Ricuchintaj Dios kancunata libraspa wiñay causayman putasunayquichejta. <sup>29</sup> Yachanquichejtaj Dios c'achata yanapasorkachej Cristopi jap'icuya. Mana chayllatachu, astawanrí payraycu muchuya atinayquichejtawan yanapasunquichej. <sup>30</sup> Causayniypi chay quiquinta muchuskayta ricorkanquichejña, cunanpis uyarishallanquichejtaj. Ajinallatatajmin kancunapis nokawan cusca muchushanquichej.

## 2

*Llamp'u sonko caychej uj yuyayniyojllataj*

<sup>1</sup> Cristomin callpachashasunquichej munacuyninwan ima sonkochashasunquichej. Santo Espiritunejta ujchaska, sonko qhuyacuywanpis munanacunayquichej. <sup>2</sup> Ajinapi cusiywan junt'achiwaychej. Chaypajka uj yuyayniyojlla uj sonkoyojlla causacuychej. Cuscata munanacuspataj yuaskayquichejpi ujlla caychej. <sup>3</sup> Ama ni imatapis churanacuspa nitaj jatunchacuspaka ruwaychejchu. Manachayrí llamp'u sonkowan sapa uj ujcunata

<sup>‡</sup> **1:24** Literal: aychapi.

aswan curajpaj khawayachej kancuna quiuiyquichejmantaka.<sup>4</sup> Ama pipis yuyachunchu paypa allinnillantaka. Manachayrí ujcunaj allinnincutapis yuyaychej.

*Cristoj llamp'uchacuyninmanta*

<sup>5</sup> Imayna yuyawanchus Cristo Jesús causaj, quiquinta kancunapis causaychej. <sup>6</sup> Cristoka Diospa quiquin cayninpipunimin. Dios caspapis atiyninwan mana jatunchacuytachu yuyarka. <sup>7</sup> Astawanrí tucuy atiyninta k'alata sakerka camachi rijch'ay cayta ajllaspa. Runacuna quiquinmantaj tucorka. <sup>8</sup> Runa cuerpowan nacecuspa llamp'uchacorka, Diostataj casorka wañuycama. Chay wañuyka sajra runaj wañuyninjina carka, chacatanapi.

*Dios Cristota jatunchaskanmanta*

<sup>9</sup> Chayraycu Diospis payta may sumajta jatuncharka. Tucuy su timanta aswan curaj sutitataj korka. <sup>10</sup> Ajinamanta tucuy Jesusman konkorenkancu tucuy atiynijoj caskanta ricuchispas. Janaj pachapi, cay pachapi, cay pacha urapipis, tucuy payman konkorenkancu. <sup>11</sup> Ajinapitaj tucuy willankancu Jesucristoka atiynijoj Camachej caskanta Dios Tata jatunchaska cananpaj.

*Cay pachapi c'anchay canquichej*

<sup>12</sup> Munaska hermanosníy, casuwarkanquichejpuni mana kancunawan cajtillaychu. Cunanpis quiuillantataj mana chaypi cashajtiypis astawanraj casucuychej. Ancha manchachicuywanpunitaj mosoj causayniyquichejpa allinninpaj\* callpachacuychej. <sup>13</sup> Yachanquichej Diosmin kancunapi ruwajka. Pay callpachashasunquichej c'acha yuyaskanmanjina ruwayta munanayquichejpaj atinayquichejpajpis. <sup>14</sup> Tucuy imata ruwaychej mana thutuspa nitaj churanacuspa. <sup>15</sup> Ajinapi mana juchachana nitaj pantayniyoj, Diospa wawasnin canquichej. Ajinapitaj mana ch'atanajina causanquichej cay pacha runas chaupipi. Paycunaka k'ewiska yuyayniyoj sajrastaj cancu. Kancunarí paycuna chaupipi Diospa c'anchayniranwan c'anchashanquichej cay pachapi. <sup>16</sup> Wiñay causay willanastapis willashanquichej. Ajinapi Cristojo cutimuynin p'unchaypi cusicusaj mana yankha causaskaymanta nitaj yankha llanc'askaymanta. <sup>17</sup> [Kancunaraycu Diosman causayniyta jaywacorkani paypi jap'icunayquichejpaj. Cunan, sichus chay jaywacuskaypi wañuyman chaypis, cusicuni. Astawanka tucuy kancuna Diospi jap'icuspa cusiyniyoj caskayquichejmanta cusicuni.]†<sup>18</sup> Ajinallatataj kancunapis nokawan cusca cusicuychej.

*Khepata cachamusquichej Timoteota*

<sup>19</sup> Señor Jesús munajtenka uskhayta Timoteota cachamuya yuyani. Ajinapi nokapis kancunamanta yachaspa sonkochacusaj. <sup>20</sup> Pay sapal lanmin noka quiquin sonkoyojka, chekata allinniyquichejpajpuni yuya jtajka. <sup>21</sup> Tucuy wajcunaka paycunaj allinnincuta masc'ancu manataj Jesucristoj imasnintachu. <sup>22</sup> Yachanquichejjina pay c'acha caskanka ricuchiskaña. Wawa tatanwanjinamin nokawan sumaj willanaspi serverka. <sup>23</sup> Chayraycu payta cachamuya yuyani imaynachus preso caskaymanta rinawanta yachaytawancama. <sup>24</sup> Chaywanpis Señorpi confiacuspa yuyani nokapis uskhayta kancunata watucuya.

\* **2:12** Literal: salvacionniyquichej. † **2:17** Ninayan.

*Cunanrí Epafroditota cachamuyquichej*

<sup>25</sup> Cunanpaj hermano Epafroditota kancunaman cachamusunay aticuskantapuni yuyani. Payka Señorpaj llanc'aj-masiy soldado-masiytaj. Chaywanpis kancunaj cachayquichej nokata sutiyquichejpi yanapanawanpaj. <sup>26</sup> Payka tucuy kancunata maytapuni ricuya munashasorkachej. Anchataj phuticusharka onkoska caskanta uyariskayquichejraycu. <sup>27</sup> Arí, chekata onkoskapunitaj carka, wañunanpajjinaña. Diosrí paymanta qhuyacorka, nokamantawanpis, ama llaquiymanta aswan llaquiypi canaypaj. <sup>28</sup> Chayraycu aswan uskhayllata payta cachamushayquichej ujtawan payta ricuspa cusicunayquichejpaj. Nokapis pisillataña phuticusaj. <sup>29</sup> Ajinaka Señorpa munacuyninwan payta jap'iychej tucuy cusiywan. Cayjina cajcunataka sumajpaj khawaychej. <sup>30</sup> Cristoj ruwanasninraycu payka yakha wañorka. Mana manchachicuspa causaynintapis peligroman churarka nokata yanapanawanpaj. Kancuna caypi casparí chayta nokapaj ruwawajchej carka.

### 3

*Pablo yachacorka imaynachus chekan cayta*

<sup>1</sup> Cunanka, hermanosníy, Señorwan ujchaska cusicuychej. Chay quiquillantataj ujtawan kancunaman kelkamunayka mana sayc'uchiwanchu. Chayka kancunaj allinniyquichejpajmin.

<sup>2</sup> Khawacuychej chay alkojina sajra ruwajcunamanta. Paycunaka cuerposnincuta qhuchucuskancuwan munancu ricuchiyya Diospa runasniñ caskancuta. <sup>3</sup> Nokanchejrí chekatapuni Diospa runasniñ canchej, sonkonchejpi juchamanta t'akaskas.\* Diospa Espiritunnejta yupaychanchej. Cusicunchejtaj Cristo Jesuspí. Chekan cayta tarinanchejpajtaj mana runaj yuyaskanpichu† confiacunchej. <sup>4</sup> Nokapis chayjina imaspi confiacuya atiymanraj. Sichus maykenpis runaj yuyaskanpi confiacunman chayka, nokaka astawanraj confiacuymán.

<sup>5</sup> Pusaj p'unchayniyoj cashaspa cuerpoypi señalpaj circuncidaska carkani, israelcunamanta naceska, Benjamín ayllumanta. [Hebreo caspa Diospa ajllaska runasninmanjina costumbreycuta khatej cani.]‡ Fariseo caspa Moisespa camachiskasninta junt'anipuni. <sup>6</sup> Chay camachiskasta tucuy sonkoywan casuya munaskayraycu Cristopi hermanosta ñiac'arichej cani. Chay camachiskasmanjinataj runaspa ricuynincipi chekan cayta junt'ajpuni cani.

*Diosmin chekan caytaka kon*

<sup>7</sup> Astawanrí causayniypi chay sumajpaj khawaskayta Cristoraycu manacajpaj khawarkani. <sup>8</sup> Chekatapunitaj tucuy imata manacajpaj khawani Señorniy Cristo Jesusta rejsinaypaj. Payta rejsiyka may sumajpuni cashan. Payraycu tucuy sumajpaj khawaskayta chincacherkani. Millay cajpajtaj khawani Cristota taripanaypaj <sup>9</sup> paywan ujchaska canaypaj. Manataj Moisespa camachiskasninnejta chekanpaj khawaska caytachu munani. Manachayrí Cristopi jap'icuynejllata chekanpaj khawaska cayta munani. Diosmin chekan caytaka paypi jap'icojman

---

\* 3:3 Literal: circuncidaska. † 3:3 Literal: aychapichu. ‡ 3:5 Literal: hebreosmanta hebreomin.

kon.<sup>10</sup> Paypa ñaupakenpi chekan cayta munani Cristota sumajta rejsinaypaj causarichej atiynintawan. Muchuyninpi paywan cuscachacuya munani tucuy imapi wañuyminwan ujchacuspa.<sup>11</sup> Chayta munani imay-nallamantapis wañuymanta causarimunaypaj.

*Sinch'ita masc'an wiñay tucuska cayta*

<sup>12</sup> Chaymanjinaka manaraj tucuy imapi Cristota sumajta rejsinirajchu; nitaj tucuypi Diospa yuyaskanmanjina junt'askarajchu cani. Manachayrí sinch'ita rishallanipuni imaynachus Cristoka canayta munan, chayta taripanaycama. Chaypajmin Cristopis taripawarka.<sup>13</sup> Hermanosníy, mana chayta taripaskaytañachu yuyani. Astawanpis cayllata ruwashani: Imacunachus causayniypi carka chayta konkapuni. Tucuy atiskaywantaj ñaupajman callpacushani Cristowan ujchaska causayniypi.<sup>14</sup> Tucuy atiskaywan rishallanipuni Diospa sumaj konawanta taripanaypaj. Chaypaj Dioska janaj pachaman wajyawanchej Cristo Jesusnepta.<sup>15</sup> Ajinaka Cristopi wiñaskasña cajcunaka chayjinata yuyanachej. Maykenpis uj imapi waj yuyayniyoj canman chayka, chaytapis Dios kancunaman ricuchisonkachej.<sup>16</sup> Astawanka maycamañachus chayarkanchej chaymanjinallapuni causacunachej.

*Janaj pacha llajtayojcuna canchej*

<sup>17</sup> Hermanosníy, nokamanta yachacuychej, noka causani ajinata causacunayquichejpaj. Khawaychejtaj nokaycujina causajcunata.<sup>18</sup> Chayta niyquichej ashqha runas mana chayjinata causaskancuraycu. Ashqha cutisña paycunamanta willarkayquichej. Cunanka wakaywan willashayquichej: Paycunaka Cristoj wañuyninwan<sup>§</sup> ruwaskanta chejnicuspa causancu.<sup>19</sup> Chayraycu paycunaka wiñay wañuymen chayancu. Paycunaj diosnincutaj wijsancumin. P'enkaynincumanta jatunchacuncu. Cay pacha imasllamanta yuyancu.<sup>20</sup> Nokanchejrí janaj pacha llajtayojcuna canchej. Janaj pachamanta cutimunantataj suyashanchej Cacharichej Señorninchej Jesucristota.<sup>21</sup> Pay chayamuspa cay llamp'u wajcha cuerposinchejta wajjinaman cutichenka. Atiyniyoj causarimoj cuerponman rijch'acojta cutichiwasun. Chayta ruwanka jatun atiyninmanjina. Chay callpayoj atiyninwanmin tucuy imawan casuchicun.

## 4

<sup>1</sup> Ajinaka, munaska hermanosníy, anchata ricuya munayquichej. Cusiyny canquichej llanc'askaymanta pokoyjinataj.\* Munacuskasný, ajina Señorwan ujchaskallapuni sayaychej.

*Uj yuyaylla cusicuychej*

<sup>2</sup> Hermana Evodiata rogani, ajinallatataj hermana Sintiquitapis, Señorwan ujchaska uj yuyayllapi allinyanacapunancuta.<sup>3</sup> Kantapis, cheka llanc'aj-masi, niricuyqui chay warmista yanaparinayquita. Paycuna nokawan cusca sumaj willanaspi llanc'arkancu. Clementewan cusca llanc'arkancu, tucuy llanc'aj-masisniywanspi. Paycunaj sutsisnincoka Diospa libronipi kelkaskamin tucuy wiñay causayniyojcunawan.

§ 3:18 Literal: cruzninwan. \* 4:1 Literal: pilluy.

<sup>4</sup> Cusicuychejpuni Señorwan ujchaska. Ujtawan niyquichej: ¡Cu-sicuyche! <sup>5</sup> Tucuy runaspa ñaupakencupi c'acha runas caychej ama jap'inacojcunaka. ¡Señor cutimushanña!

<sup>6</sup> Ama imamantapis chhicata llaquicuychejchu. Manachayrí tucuy sonkowan Diosmanta mañacuychej tucuy imapi. Mañacuuniyquichejpeka tucuy imatapis payman willaychej graciasta kospa. <sup>7</sup> Chanta Dioska tucuy sonkoyquichejta yuyayniyquichejtapis allin cayninwan wakaychanka Cristo Jesusnejta. Allinyachej Dios sonkonchejpi caspa samacuyninta kowanchej. Chay samacuynenka tucuy yuyaymantapis aswan jatunmin.

### *Sumaj imaspipuni yuyaychej*

<sup>8</sup> Ajinaka, hermanosní, sumaj imaspipuni yuyaychej. Tucuy cheka cajpi, tucuy c'acha cajpi, tucuy allin cajpi, tucuy llimphu cajpi, tucuy sumaj cajpi, tucuy allin niska cajpiwan yuyaychej. Chay sumaj mentaska imaspipuni yuyaychej chaycunata ruwanayquichejpaj. <sup>9</sup> Nokamanta yachacuskayquichejta, jap'iskayquichejta, uyariskayquichejta, ricuskayquichejtawanka ruwaychejpuni. Ajinapi allinyachej Dios kancunawan caonka.

### *Pablo cusicun koskasnincumanta*

<sup>10</sup> Anchatapuni cusicuni Señorpi watejmanta qhuyacuuniyquichejta nokapaj ricuchiskayquichejraycu. Yachanitaj nokamanta yuyashaskayquichejtapuni, astawanri mana imaynamantapis yanapawayta atisharkanquichejchu. <sup>11</sup> Chaytaka mana pisiwaskan-mantachu parlashani. Manachayrí yachaska caniña imayna caskaypipis cusiska causacuya. <sup>12</sup> Yachani causayta mana capuwajtin; yachallanitaj causayta ashqha capuwajtinpis. Sajsaska caytapis chayrí yarkhaska caytapis, mana pisichicuypipis chayrí pisichicuypipis yachaska cani. <sup>13</sup> Callpachawajniy Cristowan ujchaska tucuy imapaj callpayoj cani. <sup>14</sup> Astawanpis c'achata ruwarkanquichej llaquiyniyipi cuscachacuwaspa.

<sup>15</sup> Filiposmanta hermanos, yachanquichejjina sumaj willanaspi llanc'askaymanta yanapataka kancunallamin kowarkanquichej. Sumaj willanas kallaricushajtin Macedonia manta llojsejtiy Diospa ajllacuskasnimantaka kancunalla yanapawan cuscachacuwardan-quichej. <sup>16</sup> Tesalónica llajtapi cashajtiypis mana uj cutillatachu pisiwaskanpi yanapata apachimuwarkanquichej. <sup>17</sup> Chaytaka mana konawayquichejta masc'aspachu nini. Manachayrí masc'ashani aswan ashqha cosechajina Diospa ñaupakenpi kancunapaj cananta. <sup>18</sup> May ashqhatapuniñamin kowarkanquichej. Tucuy ima pisiwaskanpi junt'askaña cashani, apachimuwaskayquichejta Epafritudomanta jap'ispa. Chaytari mana nokallamanchu kowarkanquichej. Manachayrí sumaj k'apayniyoj jaywanajina Diosman koska cashan paytataj cusichin. <sup>19</sup> Diosniyka khapaj atiyninmanjina tucuy pisisuskayquichejta junt'achisonkachej Cristo Jesuswan ujchaska caskayquichejraycu. <sup>20</sup> Dios Tatanchejka wiñaypa wiñayninpaj yupaychaska cachun. Ajina cachun.

### *Napaycucuna*

<sup>21</sup> Napaycuychej Cristo Jesuswan tucuy ujchaska Diospa runasninta. Napaycamusunquichej nokawan caj hermanos.

22 Napaycamusunquichej tucuy Diospa runasnin astawanka jatun camachejpa wasinmanta cajcuna.

23 Señorninchej Jesucristoj c'acha yanapaynin tucuy kancunawan cachun. Ajina cachun.

## LA CARTA DEL APOSTOL SAN PABLO A LOS COLOSENSES

<sup>1</sup> Noka, Pablo, Cristo Jesuspa cachan cani Diospa munaynинејта. Hermanonchej Timoteopis nokawan cashan. <sup>2</sup> Colosas llajtapi Diospa runasninman kelkamuyquichej. Cristowan ujchaska Diospi jap'icoj hermanos canquichej. Dios Tatanchejpa c'acha yanapaynin kancunawan cachun allillanpi causanayquichejpaj.

### *Graciasta kon paycunamanta*

<sup>3</sup> Señorninchej Jesucristoj Tatan Diosmanta kancunapaj mañacuspa graciasta koshaycupuni. <sup>4</sup> Cusiywan uyariyku Cristo Jesuspi jap'icuskayquichejta, Diospa tucuy runasnintapis munacuskayquichejta. <sup>5</sup> Ajinata causacushanquichej janaj pachapi kancunapaj waquichiska cajta suyaskayquichejraycu. Chay janaj pachapi causaymantapis uyarerkanquichejña sumaj willanaspa cheka niskan kancunaman willaracojtin. <sup>6</sup> Imaynatachus chay sumaj willanas tucuy mundontinman chayashan\* wiñashantaj, ajinallataj kancunawan cashan. Diospa c'acha yanapayninmanta uyarispas cheka caskanta repararkanquichej. Chay p'unchaymantapachataj wiñashanquichej Cristopi jap'icuspa. <sup>7</sup> Munaska hermanonchej Epafras yachachisuskayquichejmanjina causashanquichej. Payka camachimasiyu, Cristoj camachin, sutiycupi chekanta yachachisorkachej. <sup>8</sup> Paytaj cutimuspa willawarkaycu Santo Espirituwan ujchaska munacuuiyquichejmanta.

### *Diosmanta mañapun paycunapaj*

<sup>9</sup> Chayraycu nokaycoka chayta uyariskaycumantapacha Diosmanta kancunapaj mañiacullaycupuni. Mañacuyku mosoj causayniyquichejpa Espíritoj koskan yuyayta yachaytapis jap'inayquichejta. Ajinapi Diospa munayninta tucuy imapi allinta rejsinquichej. <sup>10</sup> Ajinamanta Diospata cajcunajina causanquichej tucuy imapi payta cusichispataj. Diosmanta mañacuyku tucuy c'acha ruwanaspi wiñanayquichejta,† astawan astawan Diosta rejsispas. <sup>11</sup> Dios may sumaj atiyninmanjina tucuy imapi callpachasunayquichejpaj mañacuyku. Ajinapi tucuy llaquicunata Diospi confiacuspa cusiywan muchunquichej. <sup>12</sup> Ajina callpachaskas caspamin Dios Tatanchejman graciasta konquichej wiñay causayta jap'ejcunata ruwasuskayquichejraycu. Chay wiñay causayta jap'inquichej c'anchayninpí caj payman t'akaska runasninwan. <sup>13</sup> Dioska juchaj lakha atiyninmanta librawarkanchej. Munaska Wawanpa camachiskanta casunanchejpaj churawarkanchej paywan ujchaska causacunanchejpaj. <sup>14</sup> Wawan Cristomin wañuyninnejta cacharichiwarkanchej juchasnincheta k'alata khechuspa.

### *Cristoka tucuy cajmanta ñaupaj caj*

<sup>15</sup> Cristopi ricunchej mana ricuna Diosta. Manaraj Dios ni imata ruwashajtin Cristoka carkapuni Diospa tucuy ruwaskasnimanta aswan curajtaj. <sup>16</sup> Paynejta Dioska ruwarka tucuy imata: janaj pachapipis, cay pachapipis, ricucojcunatapis, mana ricucojcunatapis.

\* **1:6** Literal: pokoshan. † **1:10** Literal: pokonayquichejta.

Chay mana ricuy aticojcunaka cancuman camachejcuna, capuyniyojcuna, curajcuna, atiyniyojcunapis. Tucuy imata Dios ruwarka Cristonejta, Cristopajtaj. <sup>17</sup> Cristotaj tucuy imamanta ñaupaj cajka. Atiyninwantaj tucuy ruwaska imaspis purishancu. <sup>18</sup> Paytajmin Diospa ajllacuskasninpaj uman. [Ajllacuskasnintaj ujchaska paypa cuerpon cancu. Cuerponpa causaynenka uman Cristomanta jamun.]<sup>‡</sup> Paymin wañuymanta ñaupaj causarimojka wiñaypaj causacunapaj tucuy imapi curaj cananpajtaj. <sup>19</sup> Chayta Diospa sumaj yuyaskanmanjina munarka Cristopi tucuy Dios caynin tiyacuskanraycu. <sup>20</sup> Munarkataj Cristonejta tucuy imata pay quiquinman allinyachicuya, cay pachapi cajcunatapis, janaj pachapi cajcunatapis. Dioska tucuya allinyachicorka Cristoj chacatanapi wañuyninnejta.<sup>§</sup>

### *Cristo allinyachisorkachej*

<sup>21</sup> Ñaupajpi kancunaka Diosmanta carunchaskas carkanquichej. Sajra yuyayniyquichejraycu ruwaskasniyquichejraycupis paypa enemigosnin carkanquichej. <sup>22</sup> Cunari Cristo j runa cuerponpi wañuyninnejta allinyachiskas canquichej. Cristoka c'acha causayniyoja, mana juchayoja, nitaj juchachanata ruwasorkachej Diospa naupakenman pusasunayquichejpaj. <sup>23</sup> Astawanri Diospi jap'icuspa mana cuyojo sinch'ita sayacunayquichej tiyan. Sumaj willanaspi confiacuspapunitaj mana cuyucunayquichejchu tiyan. Chay uyariskayquichej sumaj willanasmin tucuy cay pachantinpi willaraska cashan. Chayta willaranapajtaj Dioska noka Pablota camachinpaj churawarka.

### *Diospa pacaska yuyayninan*

<sup>24</sup> Cunanka kancuna Diospa ajllacuskasninanman willaraskayraycu muchuspa cusicuni. Cristoka sinch'i llaquiycunata muchorka ajllacuskasninpaj, cayka cuerponmin. Nokapis chayjina llaquiycunataraj quiquin cuerpoypi cusiywan junt'ashani. <sup>25</sup> Chay ajllacuskasninta yanapanapaj Dios nokata churawarka yuyaskanmanjina. Cachamuwarkataj kancunaman niskasninta tucuya willaranapaj. <sup>26</sup> Diospa yuyaynenka unaymantapacha tucuymanta pacaska carka. Cunari sut'i ricuchiska cashan paypa runasninman. <sup>27</sup> Diospa cay pacaska yuyaynenka may jatun may khapajtajmin. Chaytataj runasninman sut'inchayta munarka, tucuy waj llajtayojcunamanpis. Cay yuyayninanmanjina Cristo kancunapi tiyacushan. Chaymanjinataj suyacunquichej paywan cusca wiñaypaj causayta.\* <sup>28</sup> Chay Cristomantatajmin nokaycu willaraycu. Tucuy yuyaywan willaraspa tucuy runata yuyachaycu tucuy runatataj yachachiycu. Ajinata willaraycu sapa uj runa Cristowan ujchaska causayninpisumaj wiñaska cananpaj. <sup>29</sup> Chaypajtajmin llanc'ashani tucuy atiskaywan ruwaspa, Dios atiyninwan callpachawaskanmanjina.

## 2

### *Cristomin Diospa pacaska yuyaynenka*

<sup>1</sup> Tucuy atiskayman llanc'ashaskayta yachanayquichejta munani, kancunapaj Laodicea llajtayojcunapajpis. Mañacushanitaj tucuy nokata

<sup>‡</sup> 1:18 Ninayan. <sup>§</sup> 1:20 Literal: yawarninnejta. \* 1:27 Literal: gloriata.

mana rejsiwajcunapajpis. <sup>2</sup> Mayta munani sonkoyquichejta call-pachayta, munacuypi ujchaska caskayquichejwan, tucuy cheka yuyaypi seguro canayquichejpaj. Ajinapi Diospa pacaska yuyayninta sut'ita rejsinquichej. Chayka Cristota rejsiymin. <sup>3</sup> Cristopi tucuy khapaj yuyayninta yachaynintapis Dioska jallch'apuwaskanchej. <sup>4</sup> Chayta nini ama ni pi sumajman rijch'acoj palabraswan pantachisunayquichejpaj. <sup>5</sup> Kancunamanta carupi cashaspapis sonkoywanka kancunawanpuni cashani. Allinta causashaskayquichejta, Cristopi jap'icuspá sumajta sayashaskayquichejtapis ricuspa cusicuni.

### *Cristowan ujchaska causacuychej*

<sup>6</sup> Chayraycu imaynatachus Señorninchej Cristo Jesusta jap'icorkanquichej chaymanjinallapuni paywan ujchaska causacuychej. <sup>7</sup> Sinch'i saphichaska sach'ajina Cristowan ujchaska saphichacuychej sumaj wiñachiskas canayquichejpaj. Imaynatush yachachiska caskayquichejmanjina Diospi jap'icuskayquichejpi sinch'ita sayacuychej. Tucuy sonkowantaj Diosman graciasta koychejpuni. <sup>8</sup> Khawacuychej yankha pantachej yachaywan ama ni pi jap'iycusunayquichejta. Chay yachayka runaj yachachinamanjina cay pachapi mana ricuna atiyniyojcunamantamin, manataj Cristomanjinachu. <sup>9</sup> Tucuy Diospa caynin Jesucristopi tiyacun. <sup>10</sup> Kancunataj Cristowan ujchacuspa causay junt'a canquichej, mosoj causayniyquichejpaj ni imamanta pisispá. Payka curajmin cashan tucuy mana ricuna camachejcunamanta atiyniyojcunamantapis. <sup>11</sup> Paywan ujchaska canayquichejpajtajmin mauc'a jucha causayniyquichejmanta t'akaskas\* carkanquichej. Chay t'akacuy mana runaj ruwaskanchu carka. Manachayrí Cristo, atiyninnejta, t'akasorkachej chay mauc'a jucha causayniyquichejmanta. <sup>12</sup> Cristowan cuscataj bautismopi p'ampaskas carkanquichej. Cristota wañuymanta causarichimoj Diosmin kancunatapis Cristotawan cuscataj mosoj causayman causarichimusorkachej atiyninpi creejtiyquichej. Chay atiyan Dioska Cristota causarichimorka. <sup>13</sup> Ñaupajpiri wañuskajina carkanquichej juchapi sajra munayniyquichejmanjina ima causaspa. Diosrí tucuy juchasniyquichejta perdonaspa mosoj causayta Cristowan kosorkachej. <sup>14</sup> Ñaupajpi camachiskasninta mana casuskanchejraycu Diosman manu carkanchej. Juchasniyquichejraycu paypa ñaupakenpi ajina riqhurerkanchej. Diosrí Cristoj chacatanapi wañuyinnejta chay manu caskanchejmanta kelkaskata chincachispa perdonawarkanchej. <sup>15</sup> Payka mana ricuna camachejcunamanta atiyniyojcunamantawan tucuy atiynincuta khechorka. Cristotaj wañuyinnejta chay camachejcunata chay atiyniyojcunatawan atipaska caskancuta ricucherka tucuypa ñaupakencupi.

### *Mosoj camachiskas mosoj causaypaj*

<sup>16</sup> Chayraycu ni pi kancunata miqhuna ujyana costumbresmanta khawarachunchu. Nitaj jatun p'unchaycuna ni mosoj quilla wakay-chaycuna ni samacuna p'unchaycuna costumbresmantapis kancunata khawarachunchu. <sup>17</sup> Chay imaska llanthupijina camachiskas carka runas Diosmanta yachanancupaj. Cunani Cristo jamuskanraycu mosoj

\* **2:11** Literal: circuncidaskas.

causaypaj aswan sut'i yachachinayojoj canchej.<sup>18</sup> Ni pi kancunata pantachichunchu mayta munaspa llamp'u sonkoyojjina angelesta yupaychanayquichejta. Chayjinata munaspa runaka mentacun musphaycunamanta. Cay pacha yuyawantaj yankha jatunchacun.<sup>19</sup> Chayjina runaka umanchej Cristomantapis manaña jap'icunchu. Umanchej Cristoka tucuy cuerponta uywan ujchantaj sumajta wiñananpaj Diospa munayninmanjina.

<sup>20</sup> Cristowan cusca wañuspaka cay pacha mana ricuna atiyniyoj-cunamanta libraskas carkanquichej. Chanta ñimaraycutaj cay pacha runasjinalla causashanquichej runacunaj camachiskasnincuta casus-paka?<sup>21</sup> Chay camachiskasnincu nin: Ama chayta jap'iychu; ama cayta malliychu; ama jakaya llanqhaychu, nispa.<sup>22</sup> Tucuy chay camachiskaska usacuskapi tucucoj imasllamanta cancu. Chaycunaka runacunaj camachiskancumanjinalla yachachiskancumanjinallataj cancu.<sup>23</sup> Chayjina yachachiskacuna yupaychancu llamp'u sonko-jinalla cuerpota llaquichicuspataj. Yachachinancoka sumaj yuyaylamantaj rijch'acun. Astawanpis munaynincumanjina ajllancu imallatapis yupaychanata. Chaywanpis yachachinancoka ni imapi yanapanchu cay pacha sajra munayta atipanapaj.

### 3

#### *Cristowan ujchacuspa mosoj causayniyoj canchej*

<sup>1</sup> Sichus Cristowan cusca mosoj causayman causarimorkanquichejña chayka, munaychejpuni janaj pacha imasta. Chaypi Cristopis Dioswan cusca camachishan.<sup>2</sup> Janaj pacha imaspipuni yuyaychej, amataj cay pacha imaspeka.<sup>3</sup> Yuyaricuychej Cristowan wañuskayquichejtaña. Causayniyquichejka Cristowan pacaskamin Diospi.<sup>4</sup> Cristomin causayninchejka. Pay riqhurimojtin kancunapis paywan cusca riqhurillanquichejtaj sumaj c'anchayninpi.

#### *Wijch'upuychej mauc'a causaypi ruwanasta*

<sup>5</sup> Chayraycu wañuchiychej kancunapi cay pacha munaycunata: Khenchachacuya, millay ruwayta, munaywan atipachicuya, sajra munayta, munapayayta ima. Munapayayka quiquin cashan ruwaska dioscunata yupaychaywan.<sup>6</sup> Chay ruwaskasraycu Diospa c'ajaj phiñacuynenka mana casucojcunaman jamun.<sup>7</sup> Ñaupajpi kancunapis paycunawan causacojcuna cashaspaka ajinata ruwarkanquichej.<sup>8</sup> Cunanií sakepuycuej tucuy chayjina ruwanasta. Wijch'upuychej phiñacuya, c'ajaj phiñayta, sajra ruwayta, sajra parlayta, millay parlayta.<sup>9</sup> Takacorkanquichejña mauc'a causaymanta sajra ruwanasninmantawan. Chayraycu ama llullanacuychejchu.<sup>10</sup> Astawanrií p'achallicuychej mosoj causayniyquichejwan astawan astawan mosojyachiskas caspa Diosta rejsinayquichejpaj. Chay mosoj causayta Santo Espíritu mosojyachishan ruwapusojniyquichej Diosman rijch'acojcuna canayquichejama.<sup>11</sup> Mosoj causaypi manaña canchu israelpis nitaj waj llajtayojojis. Nitaj cayjina costumbreyojoj nitaj wajjina costumbreyojoj,\* nitaj forasteropis nitaj caru runapis canchu. Manañataj camachipis nitaj libraska runapis canchu, manachayrí Cristollaña. Tucuy nokanchejpi payllaña tiyacushan.

\* 3:11 Literal: circuncidaska nitaj mana circuncidaska.

*Munacuywan causacuychej*

<sup>12</sup> Diospa ajllacuskasnin, payman t'akaskasnin, munacuskasnimpis canquichej. Chayraycu p'achallicuychej sonkomanta qhuyacuywan, c'acha caywan, llamp'u sonko caywan, c'acha yuyaywan, pacienciawan. <sup>13</sup> Chay pacienciawan kancuna purajmanta pantaskasniyquichejta muchunacuychej. Sichus imamantapis phiñanacuwajchej chayka, perdonanacuychej. Imaynatachus Señorninchej kancunata perdonasorkachej, ajinallatataj kancunapis perdonanayquichej. <sup>14</sup> Chay tucuymanta astawanka munacuywan p'achallicuychej. Munacuywanka tucuyniyquichej uj sonkolla mosoj causaypi wiñanquichej. <sup>15</sup> Allillanpi tiyacuya Cristo kosuskayquichejmanjina causacuychej. Ajinapi Cristo sonkoyquichejta allin yuyaypi pusanka. Allillanpi ujchaska canayquichejpajmin Dioska wajyasorkachej. Agradececojcunapunitaj caychej. <sup>16</sup> Cristoj niskan kancunapi cacuchun khapajyachisunayquichejpaj tucuy cheka yachaypi. Chay niskanwan yachachinacuychej yuyaychanacuychejtaj. Diosta yupaychaychej yupaychana taquinaswan, himnoswan, Santo Espíritojo yuyaychaskan taquinaswanpis. C'acha yanapayninwan tucuy sonkowan taquiychej. <sup>17</sup> Tucuy imapi, niskayquichejpipis tucuy ruwaskayquichejpipis, Señorninchej Jesuswan ujchaska tucuy imatapis ruwaychej. Paynejllata Dios Tataman graciasta koychej.

*Hermanos chaupipi causanamanta*

<sup>18</sup> Warmis, kosayquichejta casuychej, Señorpi jap'icojcunajina. <sup>19</sup> Kosas, warmiyquichejta munacuychej, amataj phiñacuspa paycunata llaquichiychejchu. <sup>20</sup> Wawas, tatayquichejta mamayquichejta tucuy imapi casuychej. Ajinamin Señortaka cusichin. <sup>21</sup> Tatas mamas, ama wawasniyquichejta phiñachiychejchu ama pisi sonko canancupaj. <sup>22</sup> Camachis, casuychej tucuy imapi cay pachapi patroncunayquichejta. Amataj runaj khawaskallan ruwaychejchu paycunata cusichinapajjinallaka. Manachayrí cheka sonkowan ruwaychej Señorta manchachicuspa. <sup>23</sup> Imallatapis ruwaspaka tucuy sonkowan ruwaychej Señorta cusichinapaj, amataj runallata cusichinapajchu. <sup>24</sup> Yachanquichejmin ruwapuskayquichejmanta Señor kosunayquichejta. Señorninchej Cristotamin servishanquichej. Paytaj wiñay causayta kosonkachej. <sup>25</sup> Sajra ruwajcunari sajra ruwaskancumanjina jap'enkancu.

## 4

<sup>1</sup> Patroncuna, chekan cajta cabal cajtataj camachiyquichejpaj ruwaychej. Yachanquichej kancunapis janaj pachapi Señorniyoj caskayquichejta.

*Diosmanta mañacuychejpuni*

<sup>2</sup> Diosmanta mañacullaychejpuni rijch'ariskastaj caychej graciasta kospa. <sup>3</sup> Nokaycupajpis Diosmanta mañapullawaycutaj pay yanapanawaycupaj\* Cristomanta willaraskaycuta runas allinta jap'inancupaj. Dios yuyarka Cristonejta tucuy runas wiñay causayniyoj cananta. Chayta willaraskayraycutaj presopis cashani. <sup>4</sup> Diosmanta mañapuwaychej chay yuyayninta sut'inchaspa maychus parlanayta.

\* 4:3 Literal: quichariska puncu.

<sup>5</sup> Diospi mana jap'icojcunaj ñaupakencupi sumaj yuyaywan causacuychej. Tucuy atiskayquichejta ruwaychej paycunata yanapanayquichejpaj. <sup>6</sup> Tucuy parlacuyniyquichej c'acha munacuywan cachun, sumaj yuyaywantaj. Ajinapi yachanquichej imaynachus sapa uj runaman cutichinayquichej caskanta.

### *Pablomanta willajcuna*

<sup>7</sup> Tucuy imata nokamanta Tíquico willasonkachej. Payka munaska hermano, cheka yanapajmin, nokajina Cristoj camachillantaj. <sup>8</sup> Payta cachamuyquichej imayna caskaycuta willasunayquichejpaj kancunata sonkochasunayquichejpajpis. <sup>9</sup> Paywan cachamuyquichej Onesimota. Payka Cristota khatejpuni munaska hermanonchejtaj kancunajtapis llajta-masiyquichejtaj. Paycuna willasonkachej caynejmanta tucuya.

### *Napaycucuna*

<sup>10</sup> Napaycamusunquichej wisk'aska-masiy Aristarco Bernabej primon Marcospis. Marcosmantamin camacherkayquichejñña: Sichus kancunaman chayamunman chayka, payta allinta jap'iychej.

<sup>11</sup> Napaycamusunquichej Justo sutichaska Josuepis. Israelcunamantaka cay quinsalla Diospaj llanc'askaypi† llanc'ajmasisniy cancu, ashqhatataj sonkochawancu. <sup>12</sup> Napaycamusunquichej Cristoj camachin llajta-masiyquichej Epafraspis. Payka Diosmanta maytapuni mañapusunquichej wiñaskas sumaj sayaskastaj Diospa tucuy munayninpipis seguros canayquichejpaj. <sup>13</sup> Paymanta ricuskayta willayquichej: Maytapuni mañapushasunquichej kancunapaj, Laodicea llajtapi caj hermanospaj, Hierapolis llajtapi caj hermanospajpis.

<sup>14</sup> Napaycamusunquichej munaska médico Lucas, Demaspis.

<sup>15</sup> Napaycapuwacyu Laodicea llajtapi caj hermanosta. Ajinallatataj napaycapuwacyu Ninfasta, wasinpi tantacoj hermanostapis.‡

<sup>16</sup> Cay kelkaskayta kancuna uqhupi leeskayquichejmanta khepata, leechiychejtaj Laodicea llajtapi caj hermanostapis. Kancunapis leellaychejtaj paycunaman kelkaskayta. <sup>17</sup> Niychej Arquipoman: Señor churasorka paywan cusca runasninta yanapanayquipaj. Chay ruwanayquita junt'ayta yuyapuni, nispa.

<sup>18</sup> Noka, Pablo, quiquin maquiywan kelkamuspa napaycamuyquichej. Yuyaricuychej wisk'aska cashaskayta. Diospa c'acha yanapaynin kancunawan cachun. Ajina cachun.

† 4:11 Literal: Diospa reinonpaj. ‡ 4:15 Literal: iglesia.

## PRIMERA CARTA DEL APOSTOL SAN PABLO A LOS TESALONICENSES

<sup>1</sup> Noka, Pablo, Silvanowan Timeowan napaycamuycu kancuna Tesalónica llajtapi Diospa sutinpi tantacojcunata.\* Kancuna ujchaskas canquichej Dios Tatawan Señor Jesucristowan. Dios Tatanchejpa Señorninchej Jesucristoj c'acha yanapaynin kancunawan cachun allillanpi causacunayquichejpaj.

*Diosman gracias paypijap'icuskancuraycu*

<sup>2</sup> Diosmanta mañacuspa payman graciasta koycupuni tucuy kancunaraycu. <sup>3</sup> Dios Tatanchejpa ñaupakenpi yuyaricuskaycupuni imaynata kancuna causacushaskayquichejta. Paypi jap'icuskayquichejraycu llanc'ashanquichej sinch'ita. Diosta munacuskayquichejraycutaj hermanosta yanapashanquichej. Astawanpis Señorninchej Jesucristo cutimumanta suyashanquichej. Chayraycu paypi jap'icuspaa sinch'itaraj sayashanquichej. <sup>4</sup> Chaywanpis, hermanosní, graciasta koycu Dios munacususkayquichejraycu. Yachaycutaj pay ajllacususkayquichejta. <sup>5</sup> Imaraycuchus sumaj willanasta Jesucristomanta kancunaman willarkaycu Santo Espíritoj atiyninwan. Ajinata willarkaycu allinta yachaspa chekapuni caskanta. Yachanquichejjina willaskaycoka mana khasi parlayllachu caskanta. Manachayrí cheka caskanta ricucherkyaycu kancunata yanapaspa allinta causacunayquichejpaj.

<sup>6</sup> Kancunataj ruwarkanquichej quiquinta ruwaskaycumanjina Señor Jesucristomanjinataj. Willanasninta cusiywan jap'icorkanquichej llaquichiskas cashaspapis. Chay cusiyta Santo Espiritumanta jap'erkanquichej. <sup>7</sup> Ajinapi c'acha runasta ruwasorkachej uj ricuchinapaj. Chayraycu tucuy hermanos Macedonia jallp'api Acaya jallp'apiwan kancunata khawaspa yachacuncu quiquinta ruwayta. <sup>8</sup> Ajinamanta Señor Diospa palabranta uyaricherkanquichej mana Macedoniallapichu nitaj Acayallapichu. Manachayrí paypi jap'icuskayquichejka tucuynejman yachacorka. Uyariskaña caskanraycutaj manaña astawan parlanaycuñachu. <sup>9</sup> Paycunallataj watucuskaycumanta may cusiskas caskayquichejta parlancu. Ruwaska dioscunamanta cheka causaj Diosman cutiriskayquichejtapis willarkancu. Paypa palabranta munacuywan casuskayquichejta nillarkancutaj. <sup>10</sup> Ajinamantataj suyashanquichej paypa Wawan Jesusta janaj pachamanta cutimumanta. Payta Dios causarichimorka wañuskacunamanta. Chay Jesusmin cacharichiwarkanchej Diospa jamoj c'ajaj phiñacuyninmanta.

## 2

*Willararka Diosllata cusichinanpaj*

<sup>1</sup> Hermanosní, kancuna quiuiyquichej yachashanquichej watuskaycoka mana khasichu caskanta. <sup>2</sup> Manachayrí Diospa willanasninta kancunaman willarkaycupuni mana manchachicuspa. Ñaupajpi Filipos llajtapi tiyacojcuna manchayta ñac'arichiwarkaycu,

\* **1:1** Literal: iglesia.

ancha sajratataj parlawarkaycutaj. Chayjinata ruwawashajtiycupis Dios callpachawarkaycu mana manchachicuspa parlanaycupaj Tesalonicapipis sinch'i churanacu chaupipi.<sup>3</sup> Imaraycuchus nokaycoka willararkaycu allinniyquichejpaj. Manapuni pantaymantachu ni munapayaymantachu nitaj pantachinaycupajchu carka.<sup>4</sup> Diosrí ajllawarkaycu churawarkaycutaj willanasninta willaranaycupaj. Chayraycu parlarkaycu Diosllata cusichinaycupaj manataj runasta cusichinaycupajchu. Dios sonkosniycuta sumajta khawaspa yachan tucuy yuyaskaycuta munaskaycutawanpis.

<sup>5</sup> Yachanquichejtaj ni jayc'aj wayllucuspajina parlaskaycuta kancunata pantachinaycupaj. Dios yachan niskaycoka cheka caskanta. Manataj ni kolketa ni imatapis qhurcucorkaycuchu munapayaspas nokaycu quiuiycupaj.<sup>6</sup> Nitaj masc'arkaycuchu jatunpaj khawaskas cayta ni kancunamanta nitaj waj runasmantapis. Cristoj cachasnenka munacuywan jatunpaj khawaskaspuni cancu.<sup>7</sup> Astawanpis nokaycoka c'acha, llamp'u sonkoyoj carkaycu kancunawan cashaspa. Mamajina wawasnincuta mayta munacuspa sonkochaspataj uywancu.<sup>8</sup> Ajinallatataj nokaycupis munarkaycu jaywayta Diospa willanasninta kancunaman. Mana chayllatachu. Nokaycu quiuiycutawanpis churacorkaycu kancunata yanapanapaj. Ajinata ruwarkaycu kancunata mayta munacuskaycuraycu.<sup>9</sup> Hermanosníy, yuyaricunquichej imaynata llanc'askaycuta mayta sayc'uskaycutapis. Tuta p'unchay llanc'arkaycu miqhunaycupaj p'achaycupajpis. Imaraycuchus kancunamanta mana munarkaycuchu jap'iyta ni imatapis Diospa willanasninta willarashaspa.

<sup>10</sup> Yachanquichejtaj kancuna Cristopi jap'icojcunawan cashaspa may llimphu, chekan sonkowan causacuskaycuta. Ajina carkaycu mana ni imamanta juchachananpajjinachu canaycupaj kancunaj ricuyniyquichejpi Diospa ricuyninpipis.

<sup>11-12</sup> Yachanquichej imaynata tatacuna wawasnincuta yachachincu casunanca. Ajinata nokaycupis sapa ujniyquichejta sonkochaspas yachacherkaycu. Camacherkaycutaj munacuywan kancunata Diospa munayninmanjina causacunayquichejta. Imaraycuchus Dios wajyasorkachej pay camachin, chayman yaycunayquichejpaj paypa atiyniyoj yanapayninpí jap'inayquichejpaj.

### *Jesucristoraycu muchuncu*

<sup>13</sup> Nokaycu Diospa palabranta kancunaman willarkaycu. Kancunataj uyarispa cusiywan jap'icorkanquichej Diospa palabranta caskanmanjina, manataj runaj niskantajinallachu. Chayraycu Diosman graciasta koshaycupuni. Paypa palabrantaj atiwan llanc'ashan kancuna Cristopi jap'icushajcunaj sonkosniyquichejpi.<sup>14</sup> Imaraycuchus kancuna, hermanosníy, muchorkanquichej Judea jallp'api hermanos qui Quinta. Paycunata llajta-masisnincu ñac'aricherkanca. Chayjinallatataj llajta-masisniyquichej kancunatapis ñac'arichisorkachej.<sup>15</sup> Llajta-masisnillantaj Señor Jesustapis wañucherkanca unay willajcunatapis. Nokaycutapis ñac'arichiwarkaycu. Paycuna Diosta mana cusichincuchu. Tucuy runaswanpis churanacullancutaj.<sup>16</sup> Chaywanpis waj llajtayojcuna cachariskas canancupaj parlashajtiycu jarc'awarkaycu. Ajinamantataj paycunaj juchasnincu yapacun junt'acunancama. Chayraycu cunanka Dios phiñacun juchancumanjina paycunaman cutichinanpaj.

*Watuycuya munan hermanosta*

17 Nokaycurí, hermanosní sakeska wajcha wawasjina carkaycu cuerposniycupi kancunamanta t'akaskas pisi p'unchaycupaj. Kancunamantarí yuyarishaycupuni. Mayta munaspa kancunata ricuya tucuy imata ruwarkaycu uyapura ricuya atinaycupaj. 18 Chayraycu yuyarkaycu kancunata watuya. Noka, Pablollapis, ashqha cutis jamuya munasharkani. Supay Satanasrí mana sakewarkaycchu jamoja. 19 Chay tucuywanpis kancunaka nokaycu khapajchacuyniycupaj\* canquichej. Suyashaycutaj kancunaraycu mayta cusicuya Señorninchej Jesucristo cutimojtín. 20 Imaraycuchus kancunaka cusiyeniycu, c'achacuyniycutaj canquichej.

### 3

*Timoteo watucorka paycunata*

1 Manaña astawan phutiya sonkosniycupi muchuyta atispa yuyarkaycu sapallaycupis caskaycuta Atenas llajtapi. 2 Chayraycu cachamorkaycu Diospa camachin, hermanonchej Timoteota. Payka Cristo sumaj willanasninmanta willaraj-masiyu cashan. Payta kancunaman cachamorkaycu sinch'ita sayachisunayquichejpaj, callpachasunayquichejpaj Diospi jap'icusquayquichejpi. 3 Llaquiyuncunapi cashaspa ama ni pi pantachiska cananpaj payta cachamorkaycu. Yachanquichejtaj Dios munan llaquiyuncunata muchojtinchej sinch'ita sayananchejta. 4 Kancunawanraj cashaspapis nerkyaycu nokanchej Diospi jap'icojcuna llaquiyuncunata muchunanchejpnui caskanta. Yachanquichejtaj ajinata muchuskanchejta. 5 Mana astawan sonkoypi muchuyta atiskayraycu cachamorkani Timoteota kancunaman. Diospi jap'icusquayquichej imayna caskanta yachanaypaj payta cachamorkani. Manchachicorkanitaj chay juchallichej supay Satanás tucuy imata ruwaspa, kancunata juchaman urmachisunayquichejmanta. Sichus urmawajchej chayka, kancunaraycu tucuy llanc'askaycu khasilla cananmanta manchachicorkaycu.

6 Cunanrí Timoteo kancunajmanta nokaycuman cutimuwaycuña. Willawarkaycu cosa willanasta Diospi sumajta jap'icusquayquichejmanta, munacuyniyyquichejmantawan. Niwarkaycutaj mayta ricuya munaspa kancuna munacuywanpuni nokaycuta suyashawaskaycuta. Nokaycupis kancunata ricuya munaycu ajinata.

7 Chayraycu, hermanosní, kancunaj Diospi jap'icusquayquichej nokaycuta sumajta sonkochawarkaycu callpachawarkaycutaj. Nokaycoca ancha llasaj pisichicunapi ima casharkaycu, may sinch'ita ñac'richiskas. 8 Cunanrí mayta cusicupsa causaycu yachaspa kancuna sinch'ita jap'icusquayquichejta Señor Jesucristo. 9 Diosmantaj mayta agradeceyku kancunamanta, nokaycuta cusichiwaskaycumanta Diosninchejpa ñaupakenpi. 10 Tuta p'unchay tucuy sonkowan Diosmanta mañacuycu. Munaycutaj kancunawan uyapura ricunaycuta Diospi jap'icuyniyyquichejman imallapis pisejta junt'achinaycupaj.

*Diosmanta mañacun paycunapaj*

11 Quiquin Dios Tatanchejmanta Señorninchej Jesucristomantawan mañacuycu yanapanawaycuta kancunata watucamuya atinaycupaj.

\* 2:19 Literal: pillu.

<sup>12</sup> Señorninchej Jesustaj astawan astawanraj wiñachichun kancunapura munanacuya tucuy waj runastapis. Imaynata nokaycupis kancunata munacushaycu ajinata munacuychej. <sup>13</sup> Chayjinamanta Señorninchej Jesucristo callpachanka tucuy sonkosniyquichejta cutimunancama. Mañacuycutaj callpachaska canayquichejta, llimphu sonkoyoj mana juchayoj canayquichejpaj Tata Diosninchejpa ñaupakenpi, Jesucristo cutimojtin. Pay jamonka payman tucuy t'akaska cajcunawan.

## 4

<sup>1</sup> Chaywanpis hermanosníy, imaynatachus Diosta cusichispa causanayquichejta ñapis nokaycu mayta yachacherkaycuña. Ajinañatatajmin causashanquichej. Cunanrí Señor Jesuspa sutinpi camachiyyquichej Diosta astawan astawan cusichispapuni causanayquichejta.

<sup>2</sup> Imaraycuchus yachanquichejña imatachus Señorninchej Jesuspa sutinpi camachiskaycuta. <sup>3</sup> Chekatapuni Dios munan llimphu causayniyoj payllaman t'akaskas canayquichejta manataj ni jayc'ajpis khenchachacunayquichejta. <sup>4</sup> Sapa ujniyquichej quiquin cuerponta camachicuya tachanan tiyan Diosllapaj causaspa llimphu causaywan. <sup>5</sup> Amataj khenchachacuywan atipachicuychejchu, Diosta mana rejsej runasjinaka. <sup>6</sup> Ama pipis hermanonpa warminwan khenchachacuchunchu, hermanonpa contranpi juchallicuspaka. Ñapis kancunaman mayta nerkyacuña Señorninchej Dios tucuy khenchachacojcunamanka ruwaskancumanjina ñac'arichinantaka. <sup>7</sup> Dioska mana khenchachacuypi causananchejpajchu wajyawarkanchej. Manachayrí payman t'akaskas llimphuta causananchejpaj wajyawarkanchej. <sup>8</sup> Chayraycu cay camachiskanta khesachajka mana runastachu khesachan. Manachayrí Diosta khesachan. Paymin Santo Espiritu sonkosninchejman cachamorka tiyacunanjpa.

### *Munanacuychej*

<sup>9</sup> Diosmin kancuna quiuiyquichejta yachachisorkachej hermanospura munanacuya. Chayraycu chay munanacuy jawa mana kelkamunaycuchu tiyan. <sup>10</sup> Ajinatapunitaj tucuy Macedoniapi tiyacoj hermanoswan munanacushanquichej. Chaywanpis nokaycu munacuywan mayta niycu kancunata astawanraj munanacunayquichejta. <sup>11</sup> Tucuy atiyniyquichejwantaj allinta causacuychej, ruwanasniyquichejta ruwaychejtaj. Quiquin maquisniyquichejwantaj llanc'aychej kancunata camachiskaycumanjina. <sup>12</sup> Ajinata causacuychej Cristopí mana jap'icojcunapis kancunata c'acha runaspaj khawasunayquichejpaj, amataj imatapis pisichicunayquichejpaj.

### *Jesucristo cutimuyninmanta*

<sup>13</sup> Chaywanpis hermanosníy, Jesucristopí jap'icuspaña wañupojcunamanta chekata yachanayquichejta munaycu. Diospi mana jap'icojcunaka wiñaypaj causayta mana suyaspa phuticuncu. Mana munaycuchu paycunajina phuticushanayquichejtaka. <sup>14</sup> Chekatapuni yachanchej Jesús wañupuskanta, wañuskamanta Dios payta causarichimuskantapis. Ajinallatatajmin Jesuspi jap'icuspa wañupojcunatapis Dios causarichimuspa Jesuswan cusca pusamonka.

<sup>15</sup> Señor Jesuspa sut'inchawaskaycumanta niycu: Nokanchej, causaj hermanoska, Señor Jesús cutimojtin mana janaj pachaman

ñauparisunchechu wañupojcunamantaka. <sup>16</sup> Imaraycuchus quiquin Señor Jesucristo janaj pachamanta uraycamonka camachej khapariywan. Chaypacha curaj angel wajyanka, Diospa pututuntaj\* phucuska cankataj. Cristopi jap'icuspaña wañupojcunataj ñaupajta causarimonkancu. <sup>17</sup> Chaymantaña nokanchej cay pachapiraj causashajcuna ujllata phuyuspi okhariskas casunchej paycunawan cusca. Ajinapi Jesuswan tincumusunchej jallp'amanta aswan patapi wiñaypaj Señor Jesuswan causananchejpaj. <sup>18</sup> Chayraycu cay yachachinaswan sonkochanacuspá callpachanacuychejpuni.

## 5

### *Jesucristota suyaychej waquichiskas*

<sup>1-2</sup> Hermanosní, kancuna munashanquichej yachayta: Unaytachus suyananchepta Señor Jesucristoj cutimunanta. ¿Imaspivantaj cankancu? Kancunarií sumajta yachanquichejña pay mana yuyaymanta cutimunanta. Uj suwa tutapi ujllata jamun, ajinata jamonka. Chayraycu mana chay jawa kelkamunaycuchu tiyan. <sup>3</sup> Maypachachus runas nishankancu: "Allinta tiyacushanchej, manataj imamanta manchachicunapajjinachu", nispa. Chaypacha ujllapi tucuchiskas cankancu. Wijsalliska warmeka onkocunanpuni tiyanjinallatataj canka. Nitaj pipis Diospa phiñacuyninmanta aykecuya atenkachu. <sup>4</sup> Kancunarií hermanosní, mana lakhayaj juchapichu causashanquichej. Chayraycu Señor Jesús cutimojtín manamin mancharicunquichejchu, runasta suwa mancharichin ajinataka. <sup>5</sup> Imaraycuchus p'unchay c'anchaypiginamintucuy kancuna causashanquichej Diospa palabrantá casuspaka. Manataj juchapichu tutapijina purishanquichej nitaj lakhayajpiginachu. <sup>6</sup> Chayraycu ama puñunachu, Diospa palabranmanta mana yuyaricuspa chay wajcunajina. Manachayrí rijch'ariskas wakaychacuspa yuyayninchepi suyananchej tiyan. <sup>7</sup> Arí, tutapi runaska puñuncu. Tutapitaj machancu. <sup>8</sup> Nokanchejrí p'unchaypi causashaskanchejraycu mana puñuspa waquichiskas cananchej tiyan. Wakaychacuna sonkosninchepta Diospi jap'icuspa munanacuspataj. Chaywanpis wakaychacuna yuyayninchepi suyaspa Jesucristo jamunanta. <sup>9</sup> Dios ajllawarkanchej mana phiñacuyninta nac'arinanchejpajchu. Manachayrí ajllawarkanchej Señorninchej Jesucristo juchasninchejmanta cacharichinawanchejpaj. <sup>10</sup> Jesucristo nokanchejraycu wañorka paywan wiñaypaj causananchejpaj, causashajcunapajpis, Cristopi jap'icuspa wañuporkancu chaycunapajpis. <sup>11</sup> Chayraycu cunan ruwashanquichej ajinallatapuni purajmanta callpachanacushaychej sonkoyquichejpi wiñachinacushaychejtaj.

### *Camachiskas mosoj causaypaj*

<sup>12</sup> Hermanosní, mayta niycu may allinpaj khawanayquichejta Señor Jesuspi curaj yuyaychajcunayquichejta. Paycuna sinch'ita llanc'ancu allinniyquichejpaj kancunata yuyaychaspá. <sup>13</sup> Chayraycu munacuspa paycunataka llanc'askancuraycu may curajpaj khawaychej. Kancunapura allillanpi causacuychejtaj.

<sup>14</sup> Mayta niycutaj, hermanosní, yuyaychanayquichejta khellacunata Diosta casuspa llanc'anancuta. Callpachaychejtaj pisi sonko cajcunata.

\* **4:16** Waquin nincu: corneta.

Yanapaychejtaj sonkosnincupi pisi callpayojcunata. Qhuyaspataj, tucuy runaswan c'achaspuni caychej. <sup>15</sup> Ama pipis sajramanta sajrallatataj cutichichunchu. Wajjinamantaka tucuy atiskayquichejwan purajmanta c'achata causacuychej tucuy runaswanpis.

<sup>16</sup> Cusicuychejpuni. <sup>17</sup> Dioswan parlaspa payta uyariychejpuni. <sup>18</sup> Imapis cachun tucuy causayniyquichejpi Diosman graciasta kol-laychejpuni. Arí, Dios munan ajinata causanancheja Jesucristowan ujchaskas.

<sup>19</sup> Santo Espíritoj munayninta amapuni thasnurpaychejchu uj ninata-jinaka. <sup>20</sup> Paypa atiyninwan runas willarajtincu chay sut'inchanasta ama manacajtajina khesachaychejchu. <sup>21</sup> Manachayrí sumajta khaway-chej tucuy imata yachanayquichejpaj cheka Diosmantachus caskanta manachus. Diosmanta cajtin chay allin cajta jap'ispa wakaychaychej. <sup>22</sup> Mana Diosmanta cajtenka tucuy chay sajra cajmanta t'akacuychej.

*Dioska palabranta junt'anpuni*

<sup>23</sup> Diosllamin sonko tiyaskaswan allillanpi causachiwanchej. Mañacuni pay quiquin kancunata k'alata payman t'akananta mana juchayoj canayquichejpaj. Wakaychachun sonkoyquichejta, tucuy cayniyquichejtapis cuerpoquichejtapis —Señor Jesús cutimojtín mana juchayoj canayquichejpaj. <sup>24</sup> Wajyasojniyquichejka palabranta junt'anpuni, niskanmanjinataj ruwanka.

*Napaycuychej*

<sup>25</sup> Hermanosníy Diosmanta mañapuwacycupuni.

<sup>26</sup> Cristopi tucuy hermanosta napaycuychej cheka munacuywan. <sup>27</sup> Señor Jesuspa atiyninpítaj camachiyquichej sut'ita leenayquichejta cay cartayta tucuy hermanosman.

<sup>28</sup> Señorninchej Jesucristoj c'acha yanapaynin kancunawan cachun. Ajina cachun.

## SEGUNDA CARTA DEL APOSTOL SAN PABLO A LOS TESALONICENSES

<sup>1</sup> Noka, Pablo, Silvanowan Timoteowan napaycamuycu kancuna Tesalónica llajtapi tantacoj hermanosta\* Cristopi. Kancuna ujchaska canquichej Dios Tatanchejwan Señor Jesucristowan. <sup>2</sup> Dios Tatanchejpa Señorninchej Jesucristoj c'acha yanapaynin kancunawan cachun allil-lanpi causacunayquichejpaj.

### *Diosta agradeceycu kancunaraycu*

<sup>3</sup> Hermanosníy, Diosta agradeceycupuni kancunaraycu. Munaycupuni graciasta koyta, ari, astawan astawan Diospi jap'icusquichejmanta. Chaywanpis sapa ujniyquichej astawan astawan munanacuskayquichejmantapis graciasta koycu. <sup>4</sup> Chayraycu tantaska hermanos chaupipi nokaycu quiuiyku may cusiywan parlaycu kancunamanta. Tucuy ñac'ariyniyquichejpi llaquiyniyquichejpipis sinch'ita Jesucristopi sayashanquichej, Diospi jap'icushanquichejtaj. <sup>5</sup> Paypi jap'icuspa ñac'ariskayquichejwan Dios ricuchin chekanta khawaspa tucuyman ruwaskancumanjina cutichinanta. Pay munarka khepa p'unchaypeka pay camachenka, chayman yacuncayquichejpajjina khawaskas canayquichejta. Chayraycutaj kancuna ñac'arishanquichej.

### *Chekan ruwaj Dios*

<sup>6</sup> Dios chekan ruwaj caspa ruwaskancumanjina runasman cutichenka. Kancunata ñac'arichejcunatataj pay ñac'arichenka. <sup>7</sup> Kancuna llaquichiskacunatataj nokaycuwan cusca Señorninchej Jesucristo samarichiwasun, atiyniyoj angelesninwan janaj pachamanta uraycamojtin. Laurashaj ninawantaj riqhurimonka. <sup>8</sup> Señorninchej Jesuska juchasnincuraycu ñac'arichenka sumaj willanasninta mana casojcunata, Diosta mana resejcunatawan. <sup>9</sup> Chaycuna wiñaypaj ñac'arichiskas cankancu Señorpa ñauakenmanta t'akaskas paypa lliphipej atiyninmantawan. <sup>10</sup> Chay p'unchay Señor Jesús cutimonka yupaychaska cananpaj payman t'akaska runasninnejta. Paypi tucuy jap'icojcunataj payta jatunpaj khawankancu. Kancunapis willaskaycuta jap'icusquichejraycu paywan cusca canquichej.

<sup>11</sup> Chayraycu nokaycupis Diosninchekmanta mañacushaycupuni kancunapaj. Mañacushaycu Diospa wajyaskasnin causanancu ajinata causanyquichejpaj. Chaywanpis tucuy sunaj munayta, paypi jap'icuspa tucuy ruwanasniyquichejtapis Dios atiyninwan junt'achun. <sup>12</sup> Ajinata causaspaka Señorninchej Jesucristota jatunchanquichej paytaj kancunata jatunchan. Tucuy cayka Diosninchek Señor Jesucristowan c'achata yanapawaskanchejmanjinamin.

## 2

### *Sajrawan junt'aska runaj riqhurimuyin*

<sup>1</sup> Hermanosníy, Señorninchej Jesucristoj cutimunanmanta, payman tantanawanchejmantawan kancunata mayta niyu: <sup>2</sup> Amapuni iscayrayaychejchu Señor Jesuspi yachachiskas caskayquichejmanta.

\* **1:1** Literal: iglesia.

Señorninchejpa cutimunan p'unchay chayamushaskantaña waquin llullacuspa nincu. Cachun llulla willajcuna moskoypijina ricuskancuta nejcunapis nokaycoj cartaycu caskanta llullacuspa nejcunapis.<sup>3</sup> Ni imaynamanta ni ima runawanpis pantachicuychejchu. Señorninchej Jesuspa cutimunan ñaupajtaka runas sinch'ita jatarenkancu Diospa contranpi. Chaypachataj Diosta mana casucoj, chay c'ullu, sajrawan junt'aska runa riqhurimonka. Payka wiñaypaj uqhu pacha laurayman rinanpajmin cashan.<sup>4</sup> Paymin churanacusa jatunchacun dios niskacuna contranpi, tucuy yupaychaska cajcunaj contrancupipis. Chaycunaj curajnincu canmanjinapis Diospa yupaychana-wasinpipis tiyaycuspa pay diosjina yupaychachicuya munan.

<sup>5</sup> Yuyaricushanquichejrachá caytaka kancunawan cashaspa nerkyquichejña. <sup>6</sup> Nisuskayquichejmanjina yachanquichej sajra cajta uj atiyniyoj jarc'aj caskanta. Paytaj chay sajrata jarc'ashan riqhurimunan p'unchayllapi riqhurimunanpaj. <sup>7</sup> Cunan p'unchaycuna sajra caj pacaypi llanc'ashanña. Chay jarc'aj caypi canancama chay c'ullu runa jarc'aska canka. <sup>8</sup> Chanta chay c'ullu, sajrawan junt'aska caj sut'ita riqhurimonka. Paytaka tucuy atiyniyoj Señorninchej Jesús palabranwan wañuchenka. Lliphipej atiyninwan jamuspa payta k'alata atipanka. <sup>9</sup> Chay sajrawan junt'aska cajtaj supay Satanaspera atiyninwan jamonka ashqasta pantachinanpaj. Ruwankataj jatuchej ricuchinasta, t'ucunapaj ruwanastawan. Caycunari llullaspuni cankancu. <sup>10</sup> Chay llullaswantaj uqhu pacha laurayman rishajcunata astawan pantachenka. Imaraycuchus Diosmanta cheka cajta khesachaspa mana jap'icorkancuchu juchamanta cachariskas canancupaj. <sup>11</sup> Chayraycu Dios paycunaman apachin sinch'i pantachej yuyayta chay llulla cajta jap'icunancupaj. <sup>12</sup> Ajinamanta cheka cajta tucuy mana jap'icojcuna juchachaskas cankancu. Diospa cheka palabrantataj manapuni jap'icorkancuchu. Astawanpis paycunaka sajrata ruwaspapis cusicorkancu.

### *Kancunata Dios ajllacusorkachej*

<sup>13</sup> Nokaycurí kancunarataycu Diosman graciasta konallaycupuni tyan. Hermanosníy, Señorninchejpa munacuskasnin canquichej. Pay ñaupajmantapacha ajllacusorkachej juchamanta cachariskas canayquichejpaj Santo Espiritunejta. Payka kancunata t'akasorkachej Cristoman. Cheka caj palabranta jap'icuñiyquichejnejtataj cachariskas canayquichejpaj ajllasorkachej. <sup>14</sup> Chaypajmin pay yanapawarkaycu sumaj willanasta willasuyta kancunaman. Ajinamanta wajyasorkachej Señorninchej Jesucristowan janaj pachapi\* canayquichejpaj.

<sup>15</sup> Hermanosníy, kancunata yachacherkaycu Jesucristojo yachachiskasninmanjina causanayquichejta. Chayllatataj kelkamorkaycupis. Chayraycu sumajta jap'icuñiyquichej yachachiskaycuta. Sinch'itataj sayaychej Diospi jap'icuspa.<sup>16-17</sup> Quiquin Señorninchej Jesucristo Dios Tatanchejwan mayta munacuwarkanchej. C'achas caskanraycu callpachaska sonkowan causachiwarkanchej nokanchejta cusichicupsa. Astawanpis mayta suyachiwarkanchej khepa p'unchaycunapi wiñaypaj paywan causacunanchejpaj. Ajinamanta yanapasonkachej kancunata allin cajtapuni ruwanayquichejpaj c'achata parlanayquichejpajpis.

\* 2:14 Literal: gloria.

**3***Diosmanta mañapuwaycu*

<sup>1</sup> Cunanka hermanosníy, Diosmanta mañapuwaycu. Mañacuychej Jesucristoj niskan may callpawan tucuynejpi uyariska casuskataj cananpaj. Kancuna Diospa palabranta sumajpaj khawaspa jap'erkanquichej. Ajinallatataj tucuynejpi jap'iska cananta mañacuychej. <sup>2</sup> Chaywanpis mañapuwaycu chay mana cheka yuyayniyoj, sajra ruwaj runas ama jarc'anawaycuta. Imaraycuchus mana tucuy runaschu Diospi jap'icuncu. <sup>3</sup> Señor Jesucristorí niskanta junt'anpuni. Paytaj callpachasonkachej wakaychasonkachejtaj sajra cajmanta. <sup>4</sup> Señorpi jap'icuspataj chekata yuyaycu kancunamanta. Camachiskaycutaka casushanquichej, casunquichejpunitaj. <sup>5</sup> Mañacunitaj Señor Jesús munacususkanta sonkosniyquichejpi reparachisunayquichejta. Ñac'arichiskas cashaspapis payllapipuni jap'icunallayquichejtataj mañacuni.

*Allin yuyaywan llanc'acushaychej*

<sup>6</sup> Hermanosníy, kancunata camachiycu tucuy atiyniyoj Señor Jesucristoj sutinpi: Sichus mayken hermano khella, mana ima ruwanayojjina causacunman, yachachiskaycuta manataj casunmanchu chayka, paymanta carunchacuychej. <sup>7</sup> Kancuna quiuiyquichejka yachanquichejña nokaycujina ruwanayquichejta. Nokaycu kancunawan cashaspaka manapuni khellaschu carkaycu. <sup>8</sup> Ni pejpa miqhunanta miqhorkaycudu khasillamanta. Manachayrí cusiywan llanc'arkaycu mayta sayc'orkaycupis. Causanayniycupajka tuta p'unchay llanc'arkaycu mana maykenniyquichejmanpis llaquchinaycupaj. <sup>9</sup> Atiycuman carka kancunamanta imatapis mañacuya causayniycupaj, manataj munarkaycudu. Astawanrí munarkaycu uj yachacunapajjina cayta, kancuna quiuillantataj ruwanayquichejpaj. <sup>10</sup> Kancunawanraj cashaspa kancunaman camacherkaycupuni mana llanc'ay munaj runaka ama miqhuchunchu. <sup>11</sup> Imaraycuchus uyarishaycu kancunamanta waquin mana llanc'aspa p'unchaycunata usuchishaskayquichejta, wajcunaj ruwanasnincumanri chajrucuskayquichejtawan. <sup>12</sup> Chayjina runastaka camachiycu, tucuy atiyniyoj Señorninchej Jesucristoj sutinpi niycutaj: Cay pachapi causayniyquichejpaj allin yuyaywan llanc'acuychej.

<sup>13</sup> Tucuy kancunari, hermanosníy, sumaj cajta ruwayta amapuni sak-eychejchu. <sup>14</sup> Sichus mayken cay cartapi niskaycuta mana casunmanchu chayka, reparaychej payta. Amataj paywanka chajrucuychejchu, aji-namanta p'enkaunapaj. <sup>15</sup> Amataj chejnisojtajinaka khawaychejchu. Manachayrí munacuywan payta c'amiychej waukeyquichejtajina.

*Napaycucuna*

<sup>16</sup> Allinyanachej Señor Dios tuta p'unchay tucuy imapi allillanpipuni kancunata causachisuchun. Señorninchej tucuy kancunawan cachun.

<sup>17</sup> Noka, Pablo, cay napaycuta quiuin maquiywan kelkani yachanayquichejpaj nokajta caskanta. Ajinatapuni tucuy cartasniypi kelkani. <sup>18</sup> Señorninchej Jesucristoj c'acha yanapaynin kancunawan cachun. Ajina cachun.

## PRIMERA CARTA DEL APOSTOL SAN PABLO A TIMOTEO

<sup>1</sup> Noka, Pablo, Cristo Jesuspa cachan cani Diospa churawaskanmanjina. Dioska cachariwarkanchej juchasninchejmanta Cristo Jesusnejta; chayraycu suyashanchejpuni wiñaypaj paywan causacuyta. <sup>2</sup> Kelkamushayqui kanman, Timoteo wawáy. [Nokanejta Diospi jap'icorkanqui; chayraycu wawayjina canqui.]<sup>\*</sup> Dios Tataj, Cristo Jesús Señorninchejpatis c'acha yanapaynin, qhuyacuyninpis kanwan cachun allillanpi causacunayquipaj.

### *Timoteo Efeso llajtapi*

<sup>3</sup> Macedoniaman rishaspa camacherkayqui Efeso llajtapi caricunayquita. Chaypi caricuy waquin runasta camachishanayquipaj llulla yachachinasta ama yachachinancuta. <sup>4</sup> Chaywan niya munani ama atipachicuchuncchu llulla cuentoswan nitaj aylluncoj ashqha sutisnincuwan. Chaycuna mana tucucuya atinchu. Chay pantaska yachachinaska hermanosta Diospi jap'icuskancuta mana wiñachinchu. Manachayrí chaycunamantaka c'aminacuy tapunaslla jamun. <sup>5</sup> Cristorí camachiwanchej munacuypi causananchejta. Cay munacuyka llimphu sonkomanta, c'acha sonko-yuyamanta, Diospi cheka jap'icuymantawan. <sup>6</sup> Chay llulla yachachejcuna cay camachiskanmanta pantaycuspa waj yachachinaspi purishancu. Chayraycu paycunaj yachachinasnincu yankha thautiyllaman tucun. <sup>7</sup> Diospa camachiskasninmanta munancu mentaska yachachejcuna cayta. Chaywanpis mana entiendencuchu imatachus nishaskancuta. Sinch'ita yachachispapis mana reparancuchu imatachus niya munaskanta.

### *Diospa camachiskasnenka sumajmin*

<sup>8</sup> Yachanchej Diospa camachiskasnin sumaj caskanta Diospa yuyaskanmanjina jap'icojcunapaj. <sup>9</sup> Manataj chekan ruwajcunapajchu koska, manachayrí sajra ruwajcunapaj. Caycunapaj: Camachiskasta mana jap'ejcunapaj mana casucojcunapajwan, Diospa contranpi cajcunapaj juchasapaspajwan, sajra runaspaj c'acha imaspa contranpi cajcunapajwan, tatancuta wañuchejcunapaj mamancuta wañuchejcunapajwan, runata wañuchejcunapaj, <sup>10</sup> khenchacunapaj, kharipura cuerposwan juchallicojcunapaj, runa suwajcunapaj, llullacojcunapaj, llullacuspa jurajcunapaj. Chaycunapaj Dios camachiskasninta churarka pillapis waj imata sumaj yachachinaj contranpi ruwajpajpis. <sup>11</sup> Chay yachachinaka sumaj willanasmanjinamin. Dios c'achapuni caspa sumaj willanasninta jatun atiyninmanta runasman willarka. Chaytapis nokaman confiawaspa jaywawarka.

### *Cristoka Pablota churarka yanapajnin cananpaj*

<sup>12</sup> Graciasta koni Cristo Jesús Señorninchejman willaranaypaj callpachawaskanmanta. Cheka ruwajninpaj khawawaspa paypa yanapajnin canaypaj churawarka. <sup>13</sup> Ñaupajpi paymanta sajrata parlarkani, paypa runasninta sinch'ita muchucherkani.

\* 1:2 Ninayan.

Jatunchacuspataj paycunata mayta insultasharkani. Astawanpis mana yachaspa manaraj paypi jap'icuspataj ajinata ruwasharkani. Chayraycu Señorninchejka qhuyawarka.<sup>14</sup> Tucuy juchasniymana paypa c'acha yanapaynin may aswan jatun carka. C'achata yanapawaskanraycu paypi jap'icuni paytataj munacushani.<sup>15</sup> Cay niskaka chekapunimin tucuy jap'icunancupaj: Cristo Jesús jamorka cay pachaman juchasapasta cacharichinanpaj. Paycunamanta noka curaj juchayoj cani.<sup>16</sup> Astawanpis Dios qhuyacuwarka ñaupaj ricuchinajina canaypaj. Ajinapi nokamanta khepata may ashqha runas wiñay causaypaj paypi jap'icushancu. Tucuy paycunamanpis Dios may jatun munacuywan suyawaskanta ricuchiyyta munarka.<sup>17</sup> Chayraycu yupaychana Camachejinchejta, wiñaypaj camachin, ni jayc'aj wañoj, mana ricuy atina, yachayniyoj c'ata Dios. Jatunchana, atiyniyojpaj khawana wiñaypa wiñayninpaj. Ajina cachun.

### *Timoteoka Diospa sumaj soldadonmin*

<sup>18</sup> Unayña hermanos willarkancu Diospa sut'inchaskasninta kamanta. Chaymanjina, Timoteo wawáy, cay camachiskata jaywashayqui: Chay sut'inchaskasmanjina sumaj soldadojina makanacuy sajra cajta atipanayquipaj.<sup>19</sup> Chayta ruwaypuni Diospi jap'icuspa, llimphu sonko-yuyayniyquian. Waquin runas sonko-yuyaynincuta khesachaspa mana casuncuchu. Chayraycu paycuna Diospi jap'icuynincumanta chincaporkancu.<sup>20</sup> Paycunamanta cancu Himeneowan Alejandrowan. Paycunata supay Satanasman jaywarkani sek'oskas canancupaj. Chaywan yachancuman Diosmanta parlaspa ama llullata yachachinancupaj.

## 2

### *Diosmanta mañacunayquichej tucuypaj*

<sup>1</sup> Ñaupajta cayjinata tantaska hermanos chaupipi camachini: Graciasta kospa Diosmanta mañacuychej tucuypaj.<sup>2</sup> Diosmanta mañacuychej camachejcunapaj tucuy autoridadcunapajpis. Ajinapi allillanta chekanta causacusunchej Diospa runasnijina paypa ñaupakenpi, tucuy runaspa ñaupakencupipis.<sup>3</sup> Chayjinata Diosmanta mañacuyka sumajmin, Cacharichiwayjinchej Diostapis cusichin.<sup>4</sup> Pay munanpuni tucuy runas juchasnincumanta cachariskas canancuta rejsinancutataj cay cheka cajta:<sup>5</sup> Dioska uj sapan. Uj sapallantaj cashan Diosta runastawan allinyanachejpis. Chay allinyanachej Runaka Cristo Jesusmin.<sup>6</sup> Diosman allinyachinawanchejpajtaj pay quiquinta jaywacorka, nokanchej wañunanchejmanta wañuspa wiñaypaj Diospata cananchejpaj. Cristoka ajllaska horapi causayninta jaywacorka Diospa munacuyninta ricuchinawanchejpaj.<sup>7</sup> Paytaj nokata churawarka willarajta cachantataj. Churawarka waj llajtayoj runasman yachachejta paycuna Diospi jap'icunancupaj paymanjina causaytataj rejsinancupaj. Chekata nini, mana llullacunichu.<sup>8</sup> Chayraycu munashani tucuy tantaska hermanos chaupipi kharis Diosmanta mañacunancuta, llimphu sonkoyoj\* Diosman t'akaskas. Runaswan mana phiñacuspa nitaj c'aminacuspa mañacuchuncu.

### *Warmis Diospa wasinpi*

\* 2:8 Literal: maquis.

<sup>9</sup> Munashani warmispis ajinallatataj ruwanancuta, p'achallicunancutataj Diospa runasninjina, cacha yuyayniyoj, llamp'u sonkoyoj. Amaña c'achachacuchuncuchu c'uyuska chujchawan, ni koriwan, ni perlaswan, nitaj ancha sumaj p'achaswan. <sup>10</sup> Manachayrí c'achachaskas cachuncu sumaj ruwaskasnincupi. Chayjina sumaj cashan Cristota khatej warmispaj. <sup>11</sup> Tantaska hermanosta yachachejtincu warmeka ch'inllamanta yachacuchun, casucuspa tucuy imapi. <sup>12</sup> Warmita mana sakenichu yachachej cananta nitaj kharita camachinanta. Manachayrí ch'inlla cacuchun tantaska hermanos chaupipi. <sup>13</sup> Imaraycuchus Dios ñaupajta ruwarka Adanta chaymantaña Evata. <sup>14</sup> Adantaj mana engañowan pantachiskachu carka. Warmirí engañachicuspa juchayojman tucorka. <sup>15</sup> Chaywanpis Dios warmita churarka wawasta uywananpaj. Cacharichiskastaj cankancu chayta ruwaspa, Diospi jap'icuywan, munacuywan, payman t'akaskas, c'acha yuyaywantaj causacuspa.

### 3

#### *Pastorcunamanta\**

<sup>1</sup> Cheka cay niskaka: Hermanos uqhupi maykenpis pastorpaj churaska cayta munajka uj sumaj ruwanata masc'an. <sup>2</sup> Chayraycu pastorka causacunan tiyan mana ni pi juchachananpajjina, uj warmiyojlla. Yachanan tiyan pay quiquinpa causayninta apaycachayta, munayninwan mana atipachicuspa. Sumaj yuyayniyoj canan tiyan, ruwanasninta allinta junt'aspas. Pastorka watucojcunata forasterocunatapis wasinman wajyan. Pay yachan munantaj yachachiyya runasta. <sup>3</sup> Manataj machaskajinaka phiñacunchu nitaj runaswan makanacunchu. Manachayrí c'acha runa canan tiyan, mana kolketa munapayaj. <sup>4</sup> Pastorka quiquin wasinpi sumajta camachinan tiyan. Sumaj yuyaywan munacuywantaj wawasninta casucojcunata uywanan tiyan. <sup>5</sup> Pillapis quiquin wasinpi mana sumajta camachiyya yachajka ¿imaynatataj runasnin uqhupi Diospa wasinpi khawapunman? <sup>6</sup> Pastorka ama cachunchu mosoj creejka, ama jatunchacuspa urmananpaj. Chayjinapi supay Satanás jatunchacuspa juchachaska carka. <sup>7</sup> Cristopi mana jap'icoj runaspa ñaupakencupi pastorka c'achapaj khawaska canan. Manachayka p'enkayman urmaspa khasi tumpaynejta Satanaspera trampanpi jap'iska canman.

#### *Yanapajcunamanta*

<sup>8</sup> Ajinallataj yanapaj kharispis hermanos chaupipi c'acha yuyayniyoj canancu tiyan. Ama iscay iscay parlajka nitaj machaj nitaj kolketa munapayajka cachunchu. <sup>9</sup> Yanapajka llimphu sonko-yuyayninwan jap'inan tiyan chay pacaska cheka cajta Dios sut'inchawaskanchejta. <sup>10</sup> Manaraj churashaspa sumajta khawaychej paycunaj causaynincuta. Runaspa ñaupakencupi mana juchachana cajtincu churachuncu yanapajcunapaj hermanos chaupipi. <sup>11</sup> Ajinallataj yanapaj warmispis c'acha yuyayniyoj canancu tiyan. Mana canancuchu khasimanta ch'atajcura. Manachayrí yachanancu quiquin causaynincuta apaycachayta. Tucuy imapitaj chekanta ruwajcuna canancu. <sup>12</sup> Yanapaj kharis uj sapan warmiyoj canancu. Sumajta camachinancu wawasnincuta wasincupi

\* **3:** Chayrí ancianocunamanta.

cajcunatawan. <sup>13</sup> Chay kharis allinta yanapaspa sumajpaj khawaskas cankancu. Chaywanpis Cristo Jesuspi jap'icuspa sumajta paymanta willarankancu runaspa ñaupakencipi.

*Cristopi hermanos causaj Diospa wasin cancu*

<sup>14</sup> Cay camachiskasniya kelkamushani uskhayta kanman jamuya munaspa. <sup>15</sup> Sichus kheparicuyman chaypis, cay camachiskasmanta yachanqui Diospa wasinpi imaynatachus causacunayquita. Cristopi hermanoska† causaj Diospa wasin cancu. Mana cuyurej rumijina cancu cheka niskanta sumajta sayachinapaj. <sup>16</sup> Chekapuni may jatun cay cheka niskanta sumaj willanasninpi sut'inchawaskanchejka: Cristopi, Dios jamorka cuerpoyoj runaman tucuspa. Santo Espíritu ricucherka pay cheka caskanta. Angeles payta khawarkancu. Cachasnin waj llajtayojcunaman paymanta willararkancu. Cay pachapi runas Cristopi jap'icorkancu. Janaj pachaman ujtawan Dios payta pusarka.

## 4

*Llulla yachachejcunamanta*

<sup>1</sup> Chaywanpis Santo Espíritu sut'ita parlan cay khepa p'unchaycunamanta. Nin: Waquin runas cheka ñanmanta carunchacuspa uyarenkancu supaycunanejta pusaska pantachej runasta. Paycunataj supaycunamanta caj yachachiskasta jap'iconkancu, <sup>2</sup> puraj uyawan llullata parlaspa. Chay runas sonko-yuyaynincuta mana casuskancuraycutaj paycunaj sonko-yuyaynincupis wañuskamanjinaña tucun.\* <sup>3</sup> Paycunataj camachincu runasta: "Ama casaracuychejchu", nispa. Waquin miqhunasmanta nincutaj: "Ama chayta miqhuychejchu", nispa. Astawanpis chayta Dios waquicherka graciasta kospa runas miqhunancupaj. Paypi jap'icojcuna, cheka cajta rejsejcuna, Diospa kowaskanchej miqhunata miqhuyta atinchej. <sup>4</sup> Diospa tucuy ruwaskanka sumajmin. Graciasta kospa jap'iskanchejtaka ni imata k'ellicunanchejchu tiyan. <sup>5</sup> Llimphuchaskamin Diospa niskannejta payman graciasta kojinchej.

*Cristomanjina causaymanta*

<sup>6</sup> Chay imasta hermanosman yachachispa Cristo Jesuspa sumaj yanapaj camachin canqui. Paypa cheka niskasnинwan miqhunawanjina uywaskapuni canqui. Khaticushanquitaj sumaj yachachiskasninmanjina. <sup>7</sup> Astawanri khesachay chay mana Diosmanta manacaj cuentosta. Yuyayniyquiwan sinch'ita ruway yachacunayquipaj Cristomanjina causayta. <sup>8</sup> Cuerpota callpachayka pisillata runata yanapan. Cristomanjina causayri tucuy imapaj runata yanapan. Payta yanapankapuni cay pachapi jamoj pachapipis. <sup>9</sup> Chay niskaka chekapunimin tucuy runas jap'icunancupaj. <sup>10</sup> Ajinaka wiñaypaj cajta masc'askanchejraycu llanc'ashanchej. Maytapunitaj masc'ashanchej Cristomanjina causacuyta Diospi confiaskanchejraycu. Paymin juchamanta Cacharichej tucuy runaspaj, astawanka tucuy paypi jap'icojcunapaj.

† 3:15 Literal: iglesia. \* 4:2 Literal: k'oñi fierrowan.

### *Ricuchinajina cay*

<sup>11</sup> Cay imasta camachiy yachachiyta. <sup>12</sup> Ama pipis kanta pisipaj khawasuchunchu sull'atajinaka. Astawanrí mosoj causayniyojcunapaj, niskasniyquipi causayniyquipis uj ricuchinajina cay. Ajinapi paycunaman ricuchinqui imaynata cacunancuta munanacuspá, Diospi jap'icuspa, c'achata causacuspapis. <sup>13</sup> Cutimunaycama sumaj yuyaywan causacuy Diospa palabranta runasman leespá, paycunata sonkochaspa, yachachispata. <sup>14</sup> Unayña hermanocunamanta curajcuna maquisnincuta churasuspa Diosmanta mañacorkancu kanpaj. Sut'incharkancu Diospa runasnínwan llanc'anayquipaj pay ajllasuskanta. Chaypajtaj Santo Espíritu atiyta kosorka. Chay atiywan llanc'aypuni. <sup>15</sup> Chayraycu cay imaspi yuyaspapuni causacuy. Chayjinapi tucuy ricusonkancu imaynata Señorpi wiñaskayquita. <sup>16</sup> Khawacuy causayniyquita yachachiskayquitawan. Cay camachiskasniyta casuypuni. Ajinapi tucuy sajra cajmanta cacharichicunqui, uyarisojcunatapis.

## 5

<sup>1</sup> Uj curaj runataka ama c'amiychu. Manachayrí payta parlapayay tatayquitajina, waynacunatapis waukesniyquitajina. <sup>2</sup> Curaj warmista parlapayay mamayquitajina, sipascunatapis panasniyquitajina tucuy llimphu yuyaywan.

### *Wajcha viudasmana*

<sup>3</sup> Sumajpaj khawaspa yanapay wajcha mana piniyoj viudasta. <sup>4</sup> Sitajchus uj viuda wawasniyoj chayrí allchhisniyoj chayka, paycuna payta yanapachuncu Diospa runasnínpa ruwanancumanjina. Ajinata ñaupajta yachacuchuncu qhuyacuya allinta cutichipuya quiquin paycuna uqhupi tatasnincuman. Chayka sumajmin Diosta cusichintaj. <sup>5</sup> Uj wajcha viudari Diospipuni confiacun. Tuta p'unchaytaj Diosmanta mañacuspá causacun. <sup>6</sup> Astawanri chay yankha cusiypi tucuy munayninman causaj viudaka causashanpis wañuskajina. <sup>7</sup> Ajinallatataj runasta camachiy mana khawaraskas canancupaj. <sup>8</sup> Sapa uj quiquin ayllusninpaj, astawanka wasinpi cajcunapaj, waquichipunan tiyan. Manachus chayta ruwan chayka, cheka ñanta khesachan. Chay runaka Diospi mana jap'icoj runamanta aswan manacajmin. <sup>9</sup> Kancuna uqhupi caj wajcha viudasmana uj listata ruwaychej sutisnincutataj kelkaychej, sojta chunca watasniyomanta wichayllaman. Chaywanpis canan uj sapan kharej warmin. <sup>10</sup> Runaspa ricuyninpi c'acha imasta ruwaj warmitaj canan. Paycunamanta tapuychej: ¿Wawasta sumajtachu uywarka, mana wasiyojcunata wasinman wajyarkachu, llamp'u sonkowan pisi imaspi Diospa runasninta yanaparkachu,\* llaquiskacunata yanaparkachu, tucuy c'acha ruwanaman churacorkachu?

### *Sipas viudasmana*

---

\* **5:10** Literal: ¿santospa chaquisninta mayllarkachu?

<sup>11</sup> Sipas viudasta ama listaman churaychu. Paycunaka sinch'i munaynincuraycu Cristomanta carunchacuspa ujtawan casaracuyta munancu. <sup>12</sup> Chanta runas paycunata juchachankancu ñaupaj niskasnicuta mana junt'askancuraycu. <sup>13</sup> Yachacuncu khella cayman. Wasmanta wasi muyuncu. Ni imata ruwaspa llulla cuentoswan wajcunaj ruwanasnincuman sat'icuncu. Parlancutaj mana parlanancuta. <sup>14</sup> Chayraycu munani sipas viudas casaracunancuta, wawasta uywananacuta, wasincipi camachinancutataj. Ajinata ruwachuncu churancojcunaka ama khawaranancupaj. <sup>15</sup> Waquin viudaska pantaycuspa, supay Satanaspera ñanninpiña purishancu. <sup>16</sup> Diospi jap'icoj runaj familianpi viudas cajtin, chay runa paycunata yanapachun. Ajinapi gastoswan mana llasachiskaschu cankancu iglesia hermanos. Chaywan tantaska hermanos yanapayta atenkancu mana piniyoj viudasta.

*Hermanos chaupipi pastorcunata sumajpaj khawaychej*

<sup>17</sup> Tantaska hermanos chaupipi pastorcunaka sumajta khawapuskan-cumanta aswan curajta jap'inancu, sumajpaj khawaskastaj canancu. Chayka aswan cachun Diospa niskanta willarajcunapaj yachachejcunapajwan. <sup>18</sup> Dios palabranpeka nin: "Ama jarc'aychu uywaj siminta trillashajtin". Nintaj: "Llanc'ajpis jap'inanpuni tiyan llanc'askanmanta". <sup>19</sup> Uj curajtachus ch'atancuman chayka, niskancuta uyarispa ama jap'iychu. Manachayka iscay chayrí quinsa willasojtillancu uyariy. <sup>20</sup> Juchallishajcunaman juchasnincuta tucuypa ñaupakenipi reparachiy, wajcunapis Diospa ñaupakenipi manchachicunancupaj.

*Timoteoman camachiskas*

<sup>21</sup> Cay camachiskasnipta wakaychay. Sinch'ita camachiyqui Diospa, Cristo Jesuspa ñaupakenpi paypa ajllaska angelesninpá ñaupakencupipis: Cayta ruway tucuy runasta quiquin khawaspá. <sup>22</sup> Hermanos chaupipi Diospa llanc'ajnin cananpaj uj runamanka maquisniyquita ama uskhayta churaychu. Chayta ruwaspaka waj runaj juchanman cuscachaska cawaj. Tucuy juchamanta kan quiuiyquita wakaychacuy. <sup>23</sup> Amaña yacullata ujyaychu. Manachayrí uj pisi vinota ujjay wijsayquiraycu ashqha cutis onkoska caskayquiraycutaj.

<sup>24</sup> Waquin runaspa juchasnincu cunan sut'ita riqhurin juchachana-paj. Waquinpatari Diospa ñaupakellanpi khepata ricuchiska canka. <sup>25</sup> Quiquillantaj cashan sumaj ruwaskasnincuwán. Waquin sut'ita riqhurin cunan. Chaywanpis sumaj ruwaskasnincu mana atinchu pacaska cacuyta.

## 6

*Camachismanta*

<sup>1</sup> Tucuy camachis patroncunancuta sumajpaj khawachuncu. Ajinata ruwachuncu Diospa sutiñmanta yachachiynmantapis runas ama sajrata parlanancupaj. <sup>2</sup> Waquin camachis Diospi jap'icoj patroncunayojoj cancu. Cay camachis patroncunancuta ama pisipi khawachuncu Cristopi hermanosnincu caskancuraycu. Manachayrí astawanpis paycunapaj allinta ruwachuncu Diospi jap'icojcuna munaskapis caskancuraycu. Patronpis camachipis Diospa c'acha koskasninta qui Quinta jap'icuncu.

*Capuwaskallanchejwan cacuna*

Cay imasta yachachiy camachiyta. <sup>3</sup> Waquenka waj imasta yachachis-hancu. Paycunaka mana cacuncuchu Señorninchej Jesucristo niskas-ninpi, nitaj Diosmanjina yachachinasipis. <sup>4</sup> Jatunchacuspa mana yuyayniyoj cancu. Ni imata yachancuchu. Onkoskajina yuyaynincu masc'an phiñacuy tapunasta makanacu palabrástapis. Chaymanta ja-mun envidia chhokonacuy, t'akanacuy, sajra parlay, sajra yuyaypis. <sup>5</sup> Cheka ñanmanta carunchacuspa paycunaka, sajra runaspura, makana-cuncupuni. Cheka yuyayta chincachiporkancu manañataj atincuchu cheka cajta rejsiyta. Diosmanjina puriyta munancu kolkechacun-an-curaycula. Chayta yuyaspaka pantancu. <sup>6</sup> Chekatapuni Diosmanjina purispa uj runa cheka khapaj capuyniyoj canka sichus capuskallan-wan cacunman chayka. <sup>7</sup> Chekatapuni ni imata apamorkanchejchu cay pachaman yaycumuspaka. Nitaj imata apacuya atinchejchu. <sup>8</sup> Chayraycu miqhunapis p'achapis capuwajtinchejka, chaywan cusiska cacuna. <sup>9</sup> Khapajyacuylata munaj runasri urmaycuncu supay Sa-tanaspa trampaman. Chay trampanejta Satanás munan paycunata juchallichiya. Chaywanpis sonkoncuman yaycumun ashqha mana yuyayniyoj sajra munaycuna. Cay munaycuna runasta p'ampaycun. Caywantaj chincachiska tucuchiskastaj cankancu. <sup>10</sup> Kolketa mu-nacuyka tucuy sajra cajcunamanta saphijinamin cashan. Waquin kha-pajyacuya anchata masc'aspas cheka ñanmanta t'akacuspa pantarkancu. T'uisichicorkancutaj muyuynintimanta ashqha llaquiycunawan.

*Masc'ay Cristomanjina causayta*

<sup>11</sup> Kanrí, Diospa runanka, chay sajra munaycunamanta aykecuy. Sumajta masc'ay chekan cayta, Cristomanjina causacuya, Diospi jap'icuya, munacuya, mana sayc'uspa tucuy imata muchuya, llamp'u sonko caytawan. <sup>12</sup> Mosoj causaypi sinch'ita makanacuypuni tucuy juchallichej cajta atipanayquipaj, Diospi sumajta jap'icuspa. Wiñay causayta sinch'ita jap'iy. Chaypaj Dios wajyasorka. Ashqha runaspa ñaupakencipitaj willarkanqui chay wiñay causayta ajllaskayquita. <sup>13</sup> Yachanquichej Cristo Jesús wiñay causaymanta Poncio Pilatoj ñaupakenpi chekata willaskanta. Chayraycu tucuyman causayta koj Diospa naupakenpi Cristo Jesuspa ñaupakenpi camachiyqui: <sup>14</sup> Wakaychay cay camachiskata. Mana pantayniyoj manataj juchachanapajjina causacuy. Ajinata causacuy Señorninchej Jesucristo ricuchiska canancama. <sup>15</sup> Yupaychaska Dios ajllaskan p'unchaypi Cristota ricuchenka. Dios sapan atiyniyoj, camachejcunaj Camachejnincu, señorcunaj Señornincu. <sup>16</sup> Payllamantamin wiñay causay jamun. Payka c'anchaypi tiyacun. Chay c'anchayman ni pi kayllaycuya atinchu. Ni jayc'aj pipis payta ricorkachu nitaj ricuya atinchu. Payman cachun yupaychay atiypis wiñaypaj. Ajina cachun.

*Cay pacha khapajcunapaj yachachinas*

<sup>17</sup> Cay pacha imaspi khapaj runasta camachiy ama jatunchacunancuta. Paycunata camachiy ama confiacunancuta khapaj capuynincipi uskhayta tucuojlla caskanraycu. Astawanrí Diospi confiacuchuncu. Pay nokanchejman tucuy imata ni jayc'aj mich'acuspa kowanchej cu-sichinawanchejpa. <sup>18</sup> Camachillaytaj c'acha imastapuni ruwanancuta. Ajinapi khapaj cankancu c'acha ruwanaspi. Mana mich'acuywan wa-jcha runasman llaquiynincipi kospa cuscachacuncu. <sup>19</sup> Ajinapi cay

pacha khabaj capuynincuwan mana tucuoj cajta jallch'ankancu jamoj pacha causaypaj. Chayka cheka jallch'askamin. Chay jamoj pacha causaytaj cheka causaymin.

*Khepa caj camachiska*

<sup>20</sup> Timoteóy, Diospa khabaj yachachinasninta jaywarkayqui, chayta wakaychay. Khesachay mana Diosmanta yankha thautiycunata, Diospa contranpi yachaytapis. Chayta waquin, pantaspa, yachaypaj jap'incu.

<sup>21</sup> Paycuna chayta jap'ispa cheka ñanmanta pantarkancu.

Diospa c'acha yanapaynin kancunawan cachun. Ajina cachun.

## SEGUNDA CARTA DEL APOSTOL SAN PABLO A TIMÓTEO

<sup>1</sup> Noka, Pablo, Cristo Jesuspa cachan cani Diospa munayninnejta. Dioska nerka Cristowan ujchaskata wiñay causaya runasman konawanchejta. Chay sumaj niskanmanjina cachanpaj churawarka. <sup>2</sup> Kelkamushayqui munaska Timoteo, wawáy. Tatanchej Diospa, Señorninchej Cristo Jesuspatajis c'acha yanapaynin qhuyacuyninpis kanwan cachun allillanta causacunayquipaj.

<sup>3-4</sup> Tatasniymantapacha llimphu sonko-yuyayniwan yupaychaskay Diosman graciasta koni. Paymanta mañacuspa kamanta yuyaricullayquipuni. T'akacushajtinchej wakaskayquita yuyaricuspa tuta p'unchay ricusuya munani, anchata cusicunaypaj. <sup>5</sup> Tucuy sonkowan chekata Diospijap'icuskayquita yuyaricuni. Jatun mamayqui Loida, mamayqui Eunicepis sonkoncuwan Diospi jap'icorkancu ñaupajta. Seguro cani kanpis quiquillantataj Diospi jap'icuskayquita.

*Timoteoman Dios korka atiya ruwapunanpaj*

<sup>6</sup> Chayraycu yuyarichiyqui maquisniyta churasojtiy Dios kanman atiycunata kosuskanta. Chaycunata mayta callpachaspa jap'iy Diospaj astawan llanc'aspas. <sup>7</sup> Dioska manamin manchachicoj yuyaytachu kowarkanchej. Astawanpis atiynijoj cayta, munacuynijoj cayta, cheka yuyaynijoj caytapis kowarkanchej. <sup>8</sup> Chayraycu ama p'enkacuychu Señorninchejmanta willayta. Nitaj p'enkacuychu noka payraycu carcelpi wisk'askamantapis. Manachayrí sumaj willanasraycu chay llaquiyuncunapi muchoj-masiy cay, Dios callpachasuskanmanjina. <sup>9</sup> Pay cacharichiwarkanchej wajyawarkanchejtaj llimphu causaypaj. Chayta ruwarka mana ruwaskasinchajraycuchu, manachayrí c'acha qhuyacuyninpi yuyaskanraycu. Ajinata yuyarka Cristo Jesuswan ujchaska cananchejta unay unaymantapacha. <sup>10</sup> Cunanka c'acha yanapayninta ricuchiwanchej Cacharichejninchéj Cristo Jesús riqhurimuyrinwan. Wiñay wañuymanta cacharichiwarkanchej. Sumaj willanasninpí ricuchiwarkanchej imaynapichus ni jayc'aj tucucoj wiñay causaynijoj cananchejta. <sup>11</sup> Chay sumaj willanasta willaranaypaj yachachinaypajtaj cachanpaj nokata churawarka. <sup>12</sup> Cachan caskayraycu llaquiyuncunata muchushani. Astawanrí Diospi jap'icunipuni, paytataj rejini. Chayraycu mana p'enkacunichu. Segurotaj cani jaywacuskaytaka jakay jamoj p'unchaycama wakaychananpaj atiynijoj caskanta. <sup>13</sup> Nokamanta cheka yachachinapaj uyariskayquita sinch'ita jap'iy. Ajinallapi Diospi jap'icuspa munacuywan Cristo Jesuswan ujchaska causacunqui. <sup>14</sup> Jaywasuskay c'acha yachachinata wakaychay nokanchejpi tiyacoj Santo Espiritunejta.

<sup>15</sup> Yachanquijina Asia jallp'amanta cajcuna tucuy sakerpawarkancu. Paycunamanta cashancu Figelowan Hermogeneswan. <sup>16</sup> Astawanpis Señor qhuyachun Onesiforocunaman ashqha cutista sonkochawaskanraycu nitaj carcelpi wisk'aska caskaymanta p'enkacusanraycu. <sup>17</sup> Arí, Roma llajtaman chayamuspa sinch'ita masc'awarka tincunawancama. <sup>18</sup> Señormanta mañacuni Onesiforota qhuyapayananta jakay jamoj

p'unchaypi. Sumajta yachanquiña payka may ashqha cutista yanapawarkanchej Efeso llajtapi.

## 2

### *Cristo Jesuspa sumaj soldadonjina junt'aj caymanta*

<sup>1</sup> Kantaj, wawáy, Cristo Jesuswan ujchaska c'acha yanapayninwan callpachacuy. <sup>2</sup> Tucuypa ñaupakencipi yachachisuskaytapis, chayta c'acha causayniyoj runasman yachachiy. Ajinamanta waquichiskas cankancu wajcunaman yachachinancupajpis. <sup>3</sup> Llaquiyuncunapipis muchoj-masiyu cay, Cristo Jesuspa sumaj soldadonjina. <sup>4</sup> Ni mayken soldadopis cay pacha imaswan ch'ampaycucunchu comandantenta cusichinanpaj. Cristoka soldadonpaj wajyasorka. <sup>5</sup> Yachanquijina tincupi manachus camachiskasmanjina atipancuchu chayka, mana premiota jap'incuchu. <sup>6</sup> Ajinallataj sinch'ita chajranpi llanc'ajpis, payllamin ñaupajta pokoynintaka jap'inan tiyan. <sup>7</sup> Tanteyacuy niskasniymana. Señortaj tucuy cay imaspi yuyayta kosonka.

### *Yuyaricuy causarimuska Jesucristota*

<sup>8</sup> Yuyaricuy Jesucristota. Payka wañuymanta causarimorka, Davidpa mirayninpis carka. Chay sumaj willanas nokaman jaywaskata willarani, <sup>9</sup> chayraycutaj sajra runajina watachicunaycama muchushani. Diospa niskanrí mana wataskachu nitaj jarc'askachu cashan. <sup>10</sup> Chayraycu tucuy imasta muchushani Diospa ajllacuskasninraycu paycunapis juchamanta cachariskas canancupaj. Munanimin Cristo Jesuswan ujchacuspa wiñay causayta\* tarinancuta.

<sup>11</sup> Cay niskalka chekamin: Sichus paywan cusca wañunchej chayka, paywan cuscamin causasunchej.

<sup>12</sup> Diospi confiacuspa muchunchej chayka, paywan cuscamin camachisunchej. Astawanpis sichus nisunman payta mana rejiskanchejta chayka, paypis mana rejisiwaskanchejta nillankataj.

<sup>13</sup> Paypi mana jap'icusunman chaypis, payka niskanta junt'anpuni. Payka manamin llulla cayta atinchu.

<sup>14</sup> Diospa ñaupakenpi chay c'acha causayniyoj runasta camachiy ama palabras jawa makanacunacuta. Chay makanacus ni pita yanapanchu. Astawanpis uyarejcunata tucuchin. <sup>15</sup> Tucuy atiskayquita ruway Diospa ñaupakenpi allinpaj khawaska canayquipaj mana p'enkacuyniyoj llanc'ajjina. Diospa cheka niskantapis cabalta willaraj cay. <sup>16</sup> Carunchacuypuni chay yankha thautiycunamanta. Chaycunaka astawan astawanmin runata pantayman pusanka.

<sup>17</sup> Pantachejcunaj yachachiynincutaj gangrena onkoyjina tucuya miqhuyconka. Paycunamanta cancu Himeneowan Filetowan.

<sup>18</sup> Paycunaka cheka yachachiy manta pantaporkancu, wañuymanta causarimuya chayamuskaña, nispa. Chay niskantuwan waquinta Diospi jap'icuynincumanta urmacherkancu. <sup>19</sup> Astawanpis Diospa churaskan cimientoka sinch'i sayaskamin. Chay rumipi sellaskataj cayta nin: Señorninchej rejsin paypa runasnin cajcunata. Nillantaj: Sapa uj, "Diospa runan cani" nejka, sajra ruwanasmanta carunchacuchun.

\* **2:10** Literal: gloriata.

*Diospa sirvejenkena llimphu causayniyoj canan tiyan*

<sup>20</sup> Uj jatun wasipeka mana kori, kolke chuwasllachu tiyan. Manachayrí c'ullu, t'uru chuwaspis tiyallantaj. Waquenka sumajpaj khawaska cancu. Waquintaj mana sumajpaj khawaskachu cancu. <sup>21</sup> Chayraycu uj runa chay sajra ruwaycunamantachus llimphuchacun chayka, sumajpaj khawaska chuwa jina canka. Señorpa ruwananpaj takaska canka, waquichiskataj tucuy sumaj ruwaypaj.

<sup>22</sup> Aykecuy waynajina yankha munaycunamanta. Astawanpis tucuy sonkowan munay chekan causayta, Diospi jap'icuya, munacuya, allillanpi tiyacuytapis. Ajinata khatiy llimphu sonko Diosmanta mañacojcunawan cusca. <sup>23</sup> Mana yuyayniyoj mana yachayniyoj tapunacuycunatataj khesachay. Yachanquijina chaycunamantaka jamun sinch'i churanacuycuna. <sup>24</sup> Señorpa camachenka mana phiñanacojchu canan. Manachayrí tucuypaj c'acha, sumaj yachachej canan. Runas payman mana allinta ruwajtincupis mana phiñacuspa muchucunan. <sup>25</sup> Llamp'u sonkowan churanacojcunata yachachinan, suyaspa Dios paycunata yanapananta. Ajinapi ichapis sajra ñanta sakespa cheka ñanta sumajta rejsenkancu. <sup>26</sup> Ichapis cutirenkancu cheka yuyayman supay Satanaspas trampamanta aykecuspas. Paycunaka Satanaspas jap'iskan carkancu paypa munayninta ruwanancupaj.

### 3

*Phutiy p'unchaycuna jamonka*

<sup>1</sup> Cayta reparay: Khepa tiempospi manchay phutiy sajra p'unchaycuna jamonka. <sup>2</sup> Cankancu runas pay quiquillanca munacojcuna, kolke munacojcuna, mentacojcuna, jatunchacojcuna, sajra parlajcuna, tatasnincuta mana casojcuna, mana graciasta kocojcuna, Diosta mana manchachicojcuna. <sup>3</sup> Cankancu animaljina mana munacuyniyojcuna, mana allinyanacojcuna, ch'ataycojcuna, millay munaynincuta sajsachejcuna, phiña alkojina mana qhuyaspa makajcuna, allin cajta chejnejcuna. <sup>4</sup> Callankancutaj amigosnincuta jaywaycojcuna, mana yuyaywan sinch'ichacojcuna, machu machucuna. Yankha cusiyya astawan munankancu Diospa munacuyninmantaka. <sup>5</sup> Rijch'aconkancu Diosta yupaychajcunallaman. Causaynincupirí Diospa atiyninta khesachankancu. Chayjina runasmantaka carunchacuy. <sup>6</sup> Chaycunamanta cancu yachachichicuylatapuni munancu, manataj ni jayc'ajpis cheka cajta rejsincuchu. <sup>8</sup> Imaynachus unay Janeswan Jambreswan Moisespa contranpi churacorkancu, ajinallatataj chay llulla yachachejcunapis cheka cajpa contranpi churacuncu. Paycunaka millay yuyayniyojcuna cancu. Cheka ñanmantapis pantaskas khesachaskas ima cancu. <sup>9</sup> Astawanrí mana ñaupajman renkancuchu. Paycunaj mana yuyayniyoj caynincutaka tucuymín sut'ita yachankancu. Ajinallataj carka chay unay churanacojcunawanpis.

*Imaynachus Pabloj causaynin caskan*

<sup>10</sup> Kanrí causayniya sumajta khawaspa yachachiskaya khaticojo canqui. Tucuy imapi ujchacuwarkanqui, puriyiniypi, imachus yuyaskaypi, Diospi jap'icuyniypi, sajra imasta unayta muchuyniypi, munacuyniypi, llaquicunata Diospi confiacuyniypi.<sup>11</sup> Quiquillantataj ujchacuwarkanqui Cristoraycu khatiycachachicusaypi, ñac'ariyniycunapipis. Ajinamin carka jakay Antioquia, Iconio, Listra llajtaspi. <sup>12</sup> Chekatapuni Cristo Jesuswan ujchaska paymanjina causayta munajcunaka tucuynincu ñac'ariyta muchonkancu. <sup>13</sup> Astawanpis sajra runacunaka pantachejcunapis sajramanta astawan sajraman chayankancu, pantachispa pantachichicuspa.

#### *Diospa niskasnin callpachasonka*

<sup>14</sup> Kanrí yachacuskayquipi sumajta jap'icuskayquipipis sayay pimanta yachacuskayquita yachaspa. <sup>15</sup> Wawamantapachataj yacharkanqui Diospa palabranta. Chayka atiyniyojmin yachachisunapaj wiñay causayniyoj canayquipaj Cristo Jesuspi jap'icuyniyyunejta. <sup>16</sup> Diospa palabranpi tucuy kelkaskaska paymantamin. Chayraycu allinta sirven runata yachachinapaj, juchanta reparachinapaj, cheka cajman cutirchinapaj chekan causaypi wiñachinapajpis. <sup>17</sup> Chayka cashan Diospa runan sumaj waquichiska cananpaj tucuy c'acha ruwanaspaj.

## 4

<sup>1</sup> Cristo Jesús jamoj juicio p'unchaypi causashajcunatapis wañuskacunatapis juzganka ruwaskasnincumanjina cutichispa. Payka ricuchiconkamin atiyniyoj camachinanpaj. Chayraycu Diospa, Cristo Jesuspa ñaupakenpi encargayqui: <sup>2</sup> Paypa niskanta willaray. Cuchi, waquichiskapuni cay willaranayquipaj, tiemponpipis mana tiemponpipis. Runasman juchasnincuta reparachi, c'amiy, yuyaychaytaj, mana tucuoj qhuyacuywan yachachispa. <sup>3</sup> Yuyariy cayta: Jamoj p'unchaycunapi cheka yachachinasta uyariyta ni imaynamanta munankancchu. Manachayka munaynincumanjinalla ashqha yachachejcunanca mirachenkancu. Mosojcunallata uyariyta munankancu ningrincipaj allin canallanpaj. <sup>4</sup> Cheka cajmanta carunchaconkancu llulla cuentosta uyarej cutirinancupaj. <sup>5</sup> Kanrí tucuy imapi sumaj yuyayniyoj sayacuy llaquicunata muchuspa. Sumaj willanasta willaray. Diospa encargasuskan llanc'anayquita allinta junt'ay.

#### *Pablo ruwanasninta tucunña*

<sup>6</sup> Nokari uj jaywaskajinañamin cashani. Manaña unaytañachu cay pachapi causasaj. Diospanan ripunay tiempo chayamunña. <sup>7</sup> Sumaj makanacupi tincorkaniña sajra cajta atipanaypaj. Ruwanasninta tucuniña. Diospa sumaj willanasninta encargawaskantapis junt'arkani. <sup>8</sup> Cunanka chekan causayniymanta uj premio\* waquichiska capuwashan. Chayta Señorniy, chekan juez, kowanka jakay p'unchaypi. Manataj nokallamanchu, manachayrí tucuy runasnimman konka. Paycunaka munacuywan riqhurimuyninta suyajcuna cancu.

#### *Pablo Timoteota wajyan*

<sup>9</sup> Tucuy atiskayquita ruway uskhayllata jamunawayquipaj. <sup>10</sup> Imaraycuchus Demas cay pacha causayllata munacuspa

\* **4:8** Literal: pillu.

sakerpawarka. Tesalónica llajtamantaj riporka. Crescentetaj Galacia jallp'aman, Titotaj Dalmacia jallp'aman rerka. <sup>11</sup> Lucaslla nokawanka cashan. Marcoswan tincuspa, payta kanwan pusamuy ruwanasniypi yanapanawanpaj allin caskanraycu. <sup>12</sup> Tiquicota cachamuyqui Efeso llajtaman. <sup>13</sup> Troas llajtapi Carpoj wasinpi sakeskay ponchoyta jamuspa apampuway. Libronsniyta apampullawaytaj, astawanka papelesniyta. <sup>14</sup> Herrero Alejandro imaymana sajrata ruwawarka. Ruwaskasninanmanjina Señor koponka. <sup>15</sup> Kanpis paymanta cuidacuy, niskasniycoj contranpi sinch'ita churacuskanraycu.

*Señor callpachawarka*

<sup>16</sup> Ñaupaj cuti camachejpa ñaupakenpi parlaricushajtiy ni pi say-acuwarkachu. Astawanpis tucuy sakerpawarkancu. Paycunata ama Dios juchachachunchu. <sup>17</sup> Astawanka Señorniy sayacuwarka. Call-pachawarkataj willanasmanda tucuyta willaranaypaj, tucuy waj llajtay-ojcunapis uyarinancupaj. Ajinata librawarka leonpa siminmantapis. <sup>18</sup> Ima sajra ruwaymantapis Señor librawarka wakaychawankataj janaj pachapi casunaypaj.† Payka wiñayapa wiñayninpaj jatunchaskamin. Ajina cachun.

*Napaycucuna*

<sup>19</sup> Napaycapuway hermana Priscata kosan Aquilatawan, Onesiforocunatawan. <sup>20</sup> Erastoka Corinto llajtapi khepacun. Trofimotarí onkoskata Mileto llajtapi sakerkani. <sup>21</sup> Tucuy atiskayquita ruway manaraj chiri p'unchaycunata chayamunawayquipaj. Napaycamusuncu Eubulo, Pudente, Lino, Claudia, tucuy hermanospis.

<sup>22</sup> Señor kanwan cuscapuni cachun. Paypa c'acha yanapaynin kancunawan cachun. Ajina cachun.

---

† 4:18 Literal: Diospa reinon.

## LA CARTA DEL APOSTOL SAN PABLO A TITO

<sup>1</sup> Noka, Pablo, Diospa camachin cani, Jesucristoj cachan. Cachan cani Diospa ajllacuskasnin paypi jap'icunancupaj, chekan cajta Cristomanjina causaymanta rejsinancupajpis. <sup>2</sup> Ajinapi paycuna wiñay causayta suyankancu. Chayta ni jayc'aj llullacoj Dioska konanta nerka, cay pachata manaraj ruwashaspa. <sup>3</sup> Cunanrí ajllaskan p'unchaypi ricuchiwarkanchej wiñay causaymanta willanasta paypa niskanpi. Chay sumaj willanasta Cacharichejninchaj Dioska nokaman confiawarka camachiwaskanmanjina. <sup>4</sup> Kelkamushayqui, Tito, Diospi jap'icuyninchajmanjina wawáy. Tatanchej Diospa, Cacharichejninchaj Cristo Jesuspatapis c'acha yanapaynin kanwan cachun allillanta causanayquipaj.

### *Titoj ruwanasnin Creta jallp'api*

<sup>5</sup> Cretamanta ripushaspa puchoj ruwanasninchejta tucunayquipaj, sapa llajtapi iglesiapaj pastorcunata\* churanayquipajwan sakerkayqui. Nokaj nisuskaymanjina paycunata churay. <sup>6</sup> Pastorpajka churay mana juchachana cajllata, uj warmiyojlla cajta, Diospi jap'icoj wawasniyoj cajllata. Astawanpis wawasnenka ama runata rimachejka cachuncuchu, ni manacaj puriy manta nitaj mana casucoj caymantapis. <sup>7</sup> Pastorka mana juchachanamin canan tiyan Diospa runasninta khawapunapaj churaska caskanraycu. Canan tiyan llamp'u sonkoyoj, mana phiñacoj, manataj machaskajinaka phiñacoj, nitaj runaswan makanacoj, nitaj kolketa munapayajpis. <sup>8</sup> Astawanrí canan watucojcunata forasterocunatapis wasinman wajyaj, allin cajta munacoj. C'acha yuyayniyoj, chekan cajta ruwaj, llimphu sonkoyoj, munaynintapis allinta camachej canan tiyan. <sup>9</sup> Cheka willanasta sinch'ita jap'icoj canan tiyan. Ajinapi yachachiska caskanmanta allin yachachinaswan hermanosta callpachayta atenka. Churanacojcunamanpis pantaskancuta reparachiya atenka.

### *Lullayachachejcuna Cretapi*

<sup>10</sup> Chayta niyquichej ashqha mana casucojcuna, engañacojcunapis caskancuraycu. Israelcunamanta ajina runaska astawan tiyan. <sup>11</sup> Paycunaka ch'inyachiska canancu tiyan. Wasisnintintaña cheka ñanmanta pantachishancu. Mana yachachinancuta yachachishancu kolketa munapayayrayculla. <sup>12</sup> Uj llajta-masincu sut'inchajnincupaj khawaska carka. Payka nerka: "Creta runaska llullaspuni, phiña alkojina, khella wijsasapaspuni cancu", nispa. <sup>13</sup> Chekatapuni ajina cancu. Chayraycu paycunaman juchasnincuta sinch'ita reparachiya cheka willanasta allinta jap'icunancupaj. <sup>14</sup> Ajinata ruway israelcunaj llulla cuentosnincuta runacunaj camachiskasnincutapis khesachanancupaj. Chayjina yachachejcunaka cheka cajta khesachajcuna cancu. <sup>15</sup> Llimphu sonkoyoj runaspajka tucuy ima llimphullatajmin. Millay sonkoyojpaj mana Diospi jap'icojpajka ni ima llimphu canchu. Astawanrí paycunaj yuyaskancupis sonkoyuyaynincupis millaymin. <sup>16</sup> Diosta rejsiskancuta nincu.

\* **1:5** Chayrí ancianocunata.

Ruwaskasnincutaj ricuchin mana ajina caskanta. Millay, mana casucojcuna cancu. Ima sumaj ruwanapajpis manacaj cancu.

## 2

### *Cheka willanasmanjina parlay*

<sup>1</sup> Kanrí cheka willanasmanjina parlay. <sup>2</sup> Curaj runaska munaynincuta allinta camachejcuna, respetachicojcuna, c'acha yuyayniyojcuna cachuncu. Cheka willanasta allinta jap'icojcuna, munacuypí sayajcuna, muchuypipis Diospi confiacojcuna cachuncu. <sup>3</sup> Quiquillantataj curaj warmispis Diospa runasnijinalla purichuncu. Ama cachuncu ch'atajcura nitaj machayman koskapis. Manachayrí c'acha imasta yachachejcuna cachuncu. <sup>4</sup> Ajinamanta sipas warmista yuyaychankancu kosancuta munacoj cayta, wawasnincuta munacoj caytapis. <sup>5</sup> Yuyaychankancutaj c'acha yuyayniyoj cayta, llimphu sonkoyoj cayta, wasipi cajcunapaj ruwanasnincuta junt'aj cayta, c'acha ruwayniyoj cayta, kosancuta casoj caytapis. Ajinata causachuncu Diospa niskanmanta runas ama sajrata parlanancupaj.

<sup>6</sup> Waynacunatapis quiquillantataj yuyaychay c'acha yuyayniyoj canancuta. <sup>7</sup> Astawanka tucuypaj ricuchinajina cay Cristomanjina causayniyquipi. Ajinallataj yachachiskayquipipis llimphu sonkoyoj, respetachicoj ima cay. <sup>8</sup> Parlaskayqui sano mana juchachana cachun. Ajinapi pillapis contrallicojka p'enkaonka nitaj nokanchejmanta ni ima manacajtapis niyta atenkachu. <sup>9</sup> Ajinallataj camachispis patronnincuta tucuy imapi casuchuncu. Cusichichuncu amataj jap'inacojcunaka cachuncuchu. <sup>10</sup> Ama imatapis patronnincumanta suwachuncu. Manachayrí tucuy imata junt'aspá c'acha causayniyoj cachuncu. Ajinapi tucuy imapi Cacharichejinchej Diospa yachachinan c'achapaj sumajpajtaj khawaska canka.

### *Cusiywan suyashanachej Jesucristo jutun cutimunanta*

<sup>11</sup> Diospa c'acha yanapaynenka ricuchiskañamin. Chaymin imaymana runata juchamanta cacharichin. <sup>12</sup> Chay c'acha yanapaynin yachachiwanchej khesachanancheja sajra yuyayta, cay pacha yankha munaycunamanjina causayta ima. Ajinapimin chayta khesachaspa cunan cay pachapi causanchej, c'acha yuyayniyoj, chekanta ruwaspa, Diosta cusichispataj. <sup>13</sup> Cusiywan suyashananchejpuni Jesucristo jatun atiyninwan cutimunanta. Payka jatun Diosninchej Cacharichejinchej. <sup>14</sup> Payka pay quiquinta nokanchejraycu jaywaycucorka tucuy juchasnichejmanta cacharichinawanchejpaj. Ajinapi llimphuchawarkanchej paypa ajllacuskasnin cananchejpaj tucuy sonkowan c'acha cajta ruwananchejpaj. <sup>15</sup> Tucuy sumaj atiywan chay imasta yachachiy, yuyaychaytaj, juchasnincutapis reparachiy. Parlaskayquita ni pi pisipaj khawachunchu.

## 3

### *Mosoj causay c'acha yanapaynинејта*

<sup>1</sup> Paycunata yuyarichiy autoridadcunata atiyniyojcunatapis casunanca, tucuy sumaj cajta ruwanapajpis waquichiskas canancuta. <sup>2</sup> Ama ni pimanta sajrata parlachuncuchu nitaj makanacuchuncuchu. Manachayrí c'acha cachuncu, tucuy runaspaj qhuyacuya

ricuchispapuni. <sup>3</sup> Nokanchejpis ñaupajpeka mana yuyayniyoj, mana casucoj pantachiskas imamin carkanchej. Tucuy munayninchejman tucuy yankha cusiymanpis wataskas carkanchej. Causarkanchej sajra yuyaypi, envidiacuspa, chejniska, nokanchejpurapis chejninacuspa ima. <sup>4</sup> Astawanrí Cacharichejinchej Dios c'acha qhuyacuyninta munacuynintapis ricuchispa cacharichiwarkanchej. <sup>5</sup> Mana ima chekan ruwaskanchejraycchu carka. Manachayrí paypa qhuyacuyninraycu cacharichiwarkanchej mosoj causaypaj juchamanta llimphuchaynejta. Ajinapi Santo Espiritunejta mosojyachiwarkanchej. <sup>6</sup> Dioska Santo Espirituta mana mich'acuspa kowanchej Cacharichejinchej Jesucristonejta. <sup>7</sup> Ajinamanta Dioska c'acha yanapaynинејта chekanpaj khawawanchej. Chekanpaj khawaskas caspataj wiñay causayta jap'inanchejta suyashanchej.

*Sinch'ita yachachiy cheka niskata*

<sup>8</sup> Chay niskaka chekamin. Tucuy chayta sinch'ita yachachinayquita munani. Ajinapi Diospi jap'icojcuna sumaj ruwanaspi allin yuyawan churaconkancu. Chay ruwayka c'acha, yanapantaj runata. <sup>9</sup> Mana yuyayniyoj tapunacuycunamantari, ayllu suti jawa churanacuymanta, Moisespa camachiskasnin jawa makanacuymantapis carunchacuy. Chaycunaka khasi manataj yanapanchu. <sup>10</sup> Hermanosta t'akanachejtaka uj cutita, iscay cutitapis pantaskanta reparachiy. Chaymantaka sakepuy. <sup>11</sup> Yachanqui chayjina runaka sajra yuyayniyoj juchayojtajmin. Chay ruwaskasninwan payka juchachacun.

*Pablo Titota wajyan*

<sup>12</sup> Hermano Artemasta chayrí hermano Tiquicota kanman cachamuskayqui. Chayamusojtintaj tucuy atiskayquita ruway Nicópolis llajtaman jamunawayquipaj. Imaraycuchus chiri p'unchaycunapaj chaypi khepacuya yuyani. <sup>13</sup> Abogado Zenasta Apolostawan tucuy atiskayquita yanapay rinallancupajpuni mana ni ima paycunata pisinanpaj. <sup>14</sup> Hermanosninchekja sumaj ruwanasman churacuya yachacuchuncu ni imapi pisichicunancupaj. Chaywan mana khasi causajcuna caspaka wajcunatapis yanapayta atenkancu.

*Napaycucuna*

<sup>15</sup> Napaycamusuncu tucuy nokawan cajcuna. Diospi jap'icoj amigosta napaycapuway Diospa c'acha yanapaynín tucuy kancunawan cachun. Ajina cachun.

## LA CARTA DEL APOSTOL SAN PABLO A FILEMÓN

<sup>1</sup> Noka, Pablo, carcelpi wisk'aska cani Jesucristomanta willaraskayraycu. Hermanonchej Timoteo nokawan cashan. Nokaycu cusca napaycamushaycu kanta, munaska hermano llanc'aj-masiycupis. <sup>2</sup> Hermananchej Apiata, Cristopi soldado-masiycu Arquipota, wasiyquipi tantacoj hermanosninchetapis\* napaycamushaycu. <sup>3</sup> Dios Tatanchejpa, Señorninchej Jesucristoj c'acha yanapaynin kancunawan cachun. Paytaj qhuyacuyninpi kancunawan cacuchun.

*Pablo graciasta kon*

<sup>4</sup> Diosmanta mañacuspa payman graciasta konipuni kanmanta, <sup>5</sup> imaraycuchus uyarini Señor Jesuspi japi'icusquimanta tucuy runasninta munacuskayquimantawan. <sup>6</sup> Mañacushanitaj Cristowan ujchaska caspa jap'inayquita sumaj cajta paypi wiñanayquipaj. Yachanquitaj Jesucristo tucuy sumaj cajta paypi japi'icojcunaman kon. <sup>7</sup> Hermano, Diosman t'akaska cajcunata sonkoncupi sonkochaskayquita samachiskayquitawan uyererkani. Chayraycu nokapis munacuyniyyquimanta mayta cusicorkani sonkochacorkanitaj.

*Camachin Onesimopaj mañapun qhuyacuynijoj cananta*

<sup>8</sup> Cristoj cachan caskayraycu atiyman mana manchachicuspa camachisuya chekanta ruwanayquita. <sup>9</sup> Munacususkayraycurí ajllani mayta niricussuya. Noka, Pablo, ashqha watasniyoiña cani. Cunantaj Jesucristomanta willaraskayraycu carcelpi wisk'aska, <sup>10</sup> mayta nishayqui waway Onesimoraycu. Caypi wisk'aska cashaspa payta pusamorkani Cristoman. Paypitaj japi'icorka. Ajinamanta Onesimopajka tatanjina cani.

<sup>11</sup> Ñaupajpi mana allintachu llanc'arka. Cunanrí kanpajpis nokapajpis allinpuni cashan. <sup>12</sup> Payta kanman cachampushayqui. May munacuywan payta japi'icapuy nokatajina. <sup>13</sup> Willaraskayraycu wisk'aska caspa munasharkani payka nokawan cacunanta sutiyquipi yanapanawanapaj. <sup>14</sup> Manataj munarkanichu ni imata ruwayta manaraj yachaspa yuyaskayquimanta. Manachayrí allin cajta ruwanayquita munani kanpa munayniyyquimanjina amataj camachiskayraycullaka. <sup>15</sup> Ichapis Onesimoka kanmanta pisi p'unchaycunata t'akaska carka wiñaypaj kanpata cananpaj. <sup>16</sup> Manañataj camachillachu canka, manachayrí camachimanta aswanmin, uj munaska hermano. Payka nokapaj munaska hermano cashan. Kanpajtaj astawanraj cashan, camachiyqui caskan-raycu Jesucristopi hermanoyquitaj.

<sup>17</sup> Chayraycu sichus yuyanqui nokawan kanwan ujlla caskanchejta chayka, japi'icapuy payta nokapis canmanjinata. <sup>18</sup> Sichus imapi pis contrayquita ruwarka chayrí sichus imamantapis manu cashasunqui chayka, chayta churay noka manuyqui caskaytajina. <sup>19</sup> Cayta kelkamushayqui quiquin maquiywan. Chekatapuni cutichipuskayqui. Atiymanpis yuyarichisuya kan nokaman manu caskayquita Cristopi nokanejta japi'icusquiraycu. <sup>20</sup> Cunan, hermano, Onesimota

\* **1:2** Literal: iglesia.

jap'icapuspa allinta ruwapuway Señorninchejraycu. Sonkoytataj cusiywan samachipuway Cristopi nokawan ujchaska caspa.

<sup>21</sup>Casojpuni caskayquiraycu cayta kelkamuyqui. Yachanitaj nisuskaymanta astawanraj ruwanayquitapuni chay jawapis. <sup>22</sup>Chay tucuywampis waquchipuway uj wasita chayacunaypaj. Suyani kancunata watucuya Diosmanta mañacuspa yanapawaskayquiraycu.

*Napaycucuna*

<sup>23</sup> Jesucristoraycu wisk'aska-masiy, hermano Epafras, napaycamusunquichej. <sup>24</sup>Llanc'aj-masisniy Marcos, Aristarco, Demas, Lucaswan napaycamullasunquichejtaj.

<sup>25</sup> Señorninchej Jesucristoj c'acha yanapaynin kancunawan cachun. Ajina cachun.

## LA CARTA A LOS HEBREOS

*Dios niskanta willawanchej Cristonejta*

<sup>1</sup> Naupa tiempospi Dios niskanta unay tatasninchejman willarka. Ashqha cutista imaymanaspitaj niskanta unay willajcunannejta parlarka. <sup>2</sup> Cunan cay khepa p'unchaycunapirí Dios nokanchejman niskanta willawarkanchej Wawan Cristonejta. Paytataj wiñaypaj churarka tucuy ima paypata cananpaj. Yuyaskanmanjinataj Dioska Paynejta tucuy pachacuna cajta ruwarka. <sup>3</sup> Chay tucuy atiyniyoj Diosmanta mana khawarinapajjina c'anchay llojsimun. Wawanka chaywan c'anchan cheka Diospa cayninta ricuchispa, payka Diosllataj caskanraycu. Chaywanpis Wawanka atiyniyoj niskanwan tucuy ruwaskan cajta purichin. Paytaj wañorka juchasninchejta khechunawanchejpaj. Chayta ruwaspañataj Dioswan cusca camachinanpaj janaj pachapi tiyaycucorka wiñay jatunchaska cananpaj.

*Cristoka may aswan sumajmin ruwaskanpi atiyninpipis*

<sup>4</sup> Cristoka may aswan sumajmin tucuy imapi. Chaymanjinataj paytaka aswan sumaj sutiwan Dios jatuncharka angelesmanta niskaka. Chayraycu payka angelesmanta astawan curajpaj khawaskamin.

<sup>5</sup> Yachanchej: Ni jayc'aj mayken angelmanpis Dios nerka:

Waway canqui.

Cunan p'unchay kanta noka jatunchayqui, \* nispaka.

Chaytaka Wawan Jesusllaman nerka. Astawanpis Dios cay pachaman payta cachamushaspa nerka:

Noka Tatayqui casaj.

Kantaj Waway canqui, nispa.

<sup>6</sup> Ujtawan cay pachaman c'ata Wawanta cachamuspataj nenka:

Diospa tucuy angelesnin Cristota yupaychachuncu, nispa.

[Chaywan ricuchenka curaj caskanta.]† <sup>7</sup> Palabranpi ricuchin angeleska janaj pachapi Diospa camachisnin caskancuta:

Angelesninri wayrajina uskhayta rincu.

Camachisnintaj ninajina callpawan munayninta ruwancu, nispa.

<sup>8</sup> Wawanmanrí cayta Dios nin:

Kanka Dios canqui.

Wiñaypa wiñayninpaj tucuya camachinqui.

Tucuy camachiskayqueka chekanpuni.

<sup>9</sup> Cay pachaman jamuspa chekan caj ruwaskasta munacoj canqui.

Sajra caj ruwaskastataj chejnicoj canqui.

Chayraycu noka, Diosniyqueka, may sumaj cusiywan Camachej canayquipaj churarkayqui.

Causaj-masisniyquimanta astawan curajpaj churarkayqui, nispa.

<sup>10</sup> Wawanman nillantaj:

Kanka Señor canqui. Manaraj ni ima cashajtin kallariypi cay pachata sayacherkanqui.

Janaj pachapis kanpa ruwaskayqui.

\* 1:5 Literal: yumarkayqui. † 1:6 Ninayan.

<sup>11</sup> Cay pachapis janaj pachapis tucuconcancu. Kanrí wiñaypaj canqui. Tucuy chay ruwaskaka p'achajinalla mauc'acaponka.

<sup>12</sup> P'achatajinataj mauc'acapojoenka wajwan cambianqui. Kanrí wiñaypaj quiquillanpuni canqui.

Causayniyquitaj ni jayc'aj tucuconcachu.

<sup>13</sup> Ni jayc'aj mayken angelmanpis Dioska nerkachu: Nokawan cusca tiyacycuy camachinayquipaj, nispaka.

Manachayrí Wawan Cristollaman nerka:

Nokawan cusca tiyacycuy camachinayquipaj enemigosniyquita k'alata atipanaycama,<sup>‡</sup> nispaka.

<sup>14</sup> Angeleska tucuynincu espirituslla cancu, Diospa camachisnillan. Paycunaka wiñay causayta jap'ejcunata yanapanancupaj cachamuskas cancu.

## 2

### *Diospa niskanta casuychej*

<sup>1</sup> [Cunan p'unchaycunaka Wawan Cristonejta Dios niskanta willawanchej.]<sup>\*</sup> Chayraycu tucuy sonkowan casunanchej tiyan. Pajtataj chincapushasunman. <sup>2</sup> Ñaupa tiempospi, angelesnejta willaska caspapis, Diospa niskanka atiyniyojpuni carka. Tucuy mana casojcunapis mana uyariyta munajcunapis pantaskancumanjina muchuchiskas carkancu.

<sup>3</sup> Cunanrí nokanchejman Señorninchej Jesusnejta willawanchej. ¡Chay chhica sumaj niskanka wiñay causaymantamin! Chayraycu mana uyarisunman chayka, aswan sinch'i muchuyraj nokanchejpaj canka. Chay niskanta ñaupajtaka Señorninchej yachacojcunaman willarka. Payta uyarispa yachacojcunaman khepata nokanchejman quiquinta willawarkanchej. <sup>4</sup> Diospis sut'ita ricucherka niskan cheka caskanta jatun ricuchinaswan t'ucunapajjina ruwanaswanpis. Santo Espiritutaj atiycunata korka. Chay atiycunata sapa ujman kon munayninmanjina.

### *Cruzpi wañuskanraycu Jesús jatunchaska*

<sup>5</sup> Diospa cheka niskanmanjina mosoj pachata suyanchej. Chaypeka mana angelestachu runasninta camachinancupaj Dios churanka.

<sup>6</sup> Manachayrí runamanta parlaspaka nin:

Diosníy ¿imataj runaka payta yanapanayquipajrí?

<sup>7</sup> Payta angelesmanta uj chhica pisillata churarkanqui.

Atiytataj payman korkanqui, sumajpaj khawaspataj payta jatuncharkanqui.

Cay pacha ruwaskasniyquita camachinanpajtaj paytaka churarkanqui.

<sup>8</sup> Tucuy enemigonta paypaj atiparkanqui,<sup>†</sup> tucuy ima paypa atiyninman churaska cananpaj, nispaka.

Chayta nispaka sut'ita ricuchin: Mana canchu ni ima runaj atiyninman mana churaskaka. Cunanrí manaraj ricushanchejchu tucuy imapis chaymanjina churaska caskantaka. <sup>9</sup> Astawanpis cunanka chay kelkaskamanjina Jesusta ricushanchej cayjinata: Payka angelesmanta uj chhica pisilla churaska carka cay pachaman jamuspa. Cruzpi wañuytataj muchorka. Diospa c'acha yanapayninmanjinataj tucuy

---

<sup>‡</sup> **1:13** Literal: chaquisniyqui urapi churanaycama. \* **2:1** Imaynata nin cap. 1:2. † **2:8** Literal: chaquisnin urapi.

runaspaj wañorka. Chayraycu Dios tucuy atiyta payman korka sumajpaj khawaspataj payta jatuncharka.

*Jesús hermanosninpaj rejsicuwanchej*

<sup>10</sup> Dioska munarka ashqha runas wawasnin canancuta paywan cusiskas wiñaypaj causanancutataj. Payka tucuy atiyniyoj caspa munayninta yuyaskanmanjina ruwan. Chayraycu chay ashqha runas wawasnin canancupaj sumaj yuyaywan ruwarka. Chaymanjinataj Dioska ñac'ariynejta Jesusta atiyniyoj Cacharichejnincu cananpaj ruwarka. Juchamanta cacharichinanpaj atiyniyoj caskanraycu cachariskacuna paywan wiñaypaj causaonkancu. <sup>11</sup> Cacharichiwajinchejkra runa nacecuspa wañuyninnejta juchamanta lliphuchawarkanchej. Lliphuchajwan lliphuchaskaswan uj Tatayoj canchej. Chayraycu Cristoka mana p'enkasupa hermanosninpaj rejsicuwanchej. <sup>12</sup> Cayta nin: Diosníy, c'acha cayniyquita hermanosniyman ricuchisaj. Paycunaj tantacuynincupipis taquispa kanta yupaychaskayqui, nispa.

<sup>13</sup> Ujtawan nin:

Kanpipuni confiacuni, nispa.

Nillantaj:

Munaska wawasniyquita kowarkanqui. Nokari paycunawan ñaupakeyquipi cashani, nispa.

*Jesús wañuymanta cacharichiwanchej*

<sup>14</sup> Chay wawasnenka cay pacha<sup>†</sup> runas cancu. Chayraycu Jesuspis paycunawan ujchacunapaj runa nacecorka. Wañuyninnejtataj supay Satanasta k'alata atiparka. Chayraycu Satanaska manaña wañuchiyyta atinchu. <sup>15</sup> Runaska tucuy causaynincipi juchallicuskancuraycu manchachicuywan Satanaspera camachisnin carkancu. Jesusrí juchancupaj wañuspa Satanaspera atiyninmanta runasta cacharicherka. <sup>16</sup> Ajinaka Abrahampa ayllunmanta cajcunata yanapananpaj cay pachaman jamorka. Manataj angelestaya napananpajchu jamorka. <sup>17</sup> Yanapajnincu cananpaj hermanosniman quiquinchacunan carka Diosman atiyniyoj Kayllaycuchej cananpaj. Ajinapi juchanchejta khechunawanchejpaj wañorka. Cunanka Diospa ñaupakenpitaj mañapushawanchejpuni qhuyacuyninwan. <sup>18</sup> Jesuska cay pacha causayninpí juchaman urmachejcunata ñac'arerka, chaytataj atiparka. Chayraycu juchaman urmachejcunata ñac'arej runasta yanapananpaj atiyniyojmin.

### 3

*Jesuska Moisesmanta aswan curajpaj churaska*

<sup>1</sup> Diosman t'akaska hermanosníy, janaj pachapaj wajyaska-masicunay canquichej. Chayraycu niyquichej: Wajyaskas caskayquichej-manjina sumaj yuyaywan Jesusta reparaychej paypi jap'icusayquichejta willacuspa. Payka Diospa cachamuskan kayllaycuchinawanchejpaj.

<sup>2</sup> Ajinapi Diospa churaskan caspa Jesuska ruwanasninta junt'arkapuni. Ajinallatataj Moisespis churaska caskanmanjina Diospa wasinpi tucuy ruwanasninta junt'arka. [Israelcunaka uj familiajina caspa Diospa wasin cancu.]\* <sup>3</sup> Wasichaj runaka aswan sumajpaj khawaskamin

\* 2:14 Literal: yawarniyoj aychayojpis. \* 3:2 Ninayan.

wasimanta niskaka. Ajinallatataj Jesustapis aswan curajpj Dios jatuncharka Moisesmanta niskaka.<sup>4</sup> Tucuy waseka wasichajniyojmin. Diosri tucuy imata yuyayninwan ruwarka.<sup>5</sup> Moiseska Diospa wasinpi khawapojnijnina carka. Tucuy camachiskantataj junt'arka. Ajinapi Dios khepa tiempopi sut'inchanan carka, chay imasmanta ñaupajpi willarka.<sup>6</sup> Cunanka quiquin Wawan Cristota wasinpi Dios churan. Wawanri munayninta junt'anpuni. Ajinapi Wawanka wasinpi runasninta munacuywan camachiwanchej. Nokanchejtaj Diospi jap'icuskanchejraycu paypa sumaj niskanpi confiacuskanchejta sut'ita willacunanchej tiyan. Ajinata causacuspalla Diospa wasin canchej.

### *Dios wajyan samaciyninman*

<sup>7</sup> Chayraycu Santo Espiritoka Diospa palabranpi niwanchej: Cunan sonkoyquichejpi Dios wajyashasunquichej. Wajyaskanta uyarinquichej chayka,<sup>8</sup> ama sonkoyquichejta rumiyachiychejchu ñaupa tatasniyquichejjinaka. Paycunaka Moiseswan ch'in pampapi purishaspa jaya sonkowan Diosmanta nerkantru:  
“Yachasunchej Dios atiyniyojchus caskanta”, nispa.  
<sup>9</sup> Paycunaka tawa chunca watasta Diospa ruwaskasninta ricorkancu. Tucucuyama qhuyacuyninta sayc'uchispapis manapuni paypi jap'icuspa casorkancuchu.  
<sup>10</sup> Chayraycu Dioska sinch'ita phiñacorka chay p'unchay runacunapaj. Nerkataj: “Pantaj sonkollapuni cancu, manataj munayniymanjina causayta yachancuchu”, nispa.  
<sup>11</sup> Ajinapi Dioska chekan phiñacuyninpi juraspa nerka: “Nokawan cusca samacunancupaj Canaán jallp'aman waquichiporkani, chaymanka ni jayc'aj yayconkancuchu”, nispa.

### *Yuyaychanacuychej*

<sup>12</sup> Hermanosníy, khawacuychej pajtataj maykenpis kancunamanta sajra sonkoyoj canman. Ajinamanta, wiñay causaj Diospi mana jap'icuskanraycu paymanta carunchacushanman.<sup>13</sup> Chayraycu tiempo canancamaka sapa p'unchay yuyaychanacuychej pajtataj maykenpis kancunamanta juchawan pantachiska caspa rumi sonkoyojman tucuman. <sup>14</sup> Imaynatachus ñaupajpi Cristollapi confiacorkanchej causaj-masisnin cananchejpaj, quiquillantapuni confiacuychej.

<sup>15</sup> Diospa palabranpipis nin:  
Sichus cunan sonkoyquichejta Dios wajyaskanta uyarinquichej chayka, ama sonkoyquichejta rumiyachiychejchu, ñaupa tatasniyquichej ch'in pampapi ruwarkancujinaka, nispa.  
<sup>16</sup> ¿Picunataj chay mana casucoj rumi sonkoyojcunari? Egiptomanta Moiseswan pusaska tucuy llojsejcuna carkancu.<sup>17</sup> Tawa chunca watasta chay juchasapa runaspaj Dios sinch'ita phiñacorka. Ajinamanta paycuna wañurarkancu, tullusnincupis ch'in pampapi khepacorka.<sup>18</sup> Chay mana casucojcunapaj Dioska jurarka waquichiskan lugarmana yaycunancuta.<sup>19</sup> Ajinamanta cayta reparanchej: Paycunaka mana paypi jap'icuskancuraycu paypa samacuynin jallp'aman mana yaycuya aterkancuchu.

**4***Nokanchejpajpis cashanraj Diospa samacuyinin*

<sup>1</sup> Chayraycu manchachicunanchej tiyan. Pajtataj kancunamanta mayken mana yaycunanpajjina jap'iska canman Diospi jap'icuynin pisicusanraycu. <sup>2</sup> Imaynatachus ñaupa tatasninchej Diospa sumaj willanas-ninta uyarerkancu, ajinallatataj nokanchejpis uyarishanchej. Astawanpis paycunaka sumaj niskanta uyarispa Diospi mana jap'icorkancuchu. Chayraycu paycunapaj ni ima allintapis ruwarkachu. <sup>3</sup> Nokanchejtari paypi jap'icuskanchejraycu Dios samachiwanchej. Astawanpis paycuna mana jap'icuskancuraycu Dioska cayta nerka:

Phiñacuspa jurarkani, samacuyniyan ni jayc'aj yaycunancuta.

Chaywanpis chayta nerka cay pacha ruwaskasnin kallariymantapacha tucuskaña caskanraycu. <sup>4</sup> Chay samacuyninmanta parlaspa nin: "Kanchis caj p'unchay tucuy ruwaskasninta tucuspa Dios samacorka".

<sup>5</sup> Nerkaniña: Diospi mana jap'icoj ñaupa tatasninchej samacuyninman mana yaycuya aterkancuchu. <sup>6</sup> Chay ñaupajta Diospa sumaj wajyaskaka mana casuskancuraycu mana yaycorkancuchu. Astawanka runaspaj chay sonko samacuynenka waquichiskaraj cashan. <sup>7</sup> Chayraycu astawan khepata Davidpa kelkaskanpi ujtawan Dios churarka runaspaj uj p'unchayta. Imaynatachus ñaupajpipis nerka: "Cunan sonkoyquichejta Dios wajyaskanta uyarinquichej chayka, ama sonkoyquichejta rumiyachiychejchu"; quiquillantataj cunanpis ujtawan runasta wajyashan. <sup>8</sup> Unayña chay israel aylluta Josueka paypa p'unchaycunanpi Canaán jallp'aman pusarkaña. Khepantarí ujtawan wajjina samacuymen Dios wajyashallantaj Davidpa kelkaskanpi. <sup>9</sup> Chayraycu payman t'akaska runasnipaj samacuy cashanraj. <sup>10</sup> Chay samacuyla Dioswan cusca wiñay samacuymen. Imaynachus Dioska ruwaskasninta tucuspa samacorka, ajinallataj samacuyninman yaycojka ruwaskasninta tucuspa samacun.

*Diospa niskanta uyarinanchej tiyan*

<sup>11</sup> Chayraycu wiñay sonko samacuyninman yaycunanchejpaj tucuy atiskanchejta ruwanachej. Pajtataj mayken Diospa niskanta mana jap'icuspa juchaman urmashanman ñaupa tatasninchejjina. <sup>12</sup> Chekatapuni Diospa niskanka causayniyojmin pay causayniyoj caskanraycu. Atiynyoytaj cashan, puraj filoyo espadamanta aswan filotaj. Chay niskanka espadajina t'ujsiycun sapa uj runaj uqhu yuyayninman munayninmanpis, yachananpj Diosmantachus chayrí cay pachamantachus caskanta. Reparachintaj sonkoj tucuy unanchayninta munaynintapis. <sup>13</sup> Diospa khawayninmantaka ni imapis pacaskachu. Astawanpis tucuy yuyayka sut'i, k'ala, quchariskajinatajmin paypa khawayninpajka. Nokanchejpis paypa ñaupakenpi cuentata konanchej tiyan.

*Jesús Diosman Kayllaycuchejninchey*

<sup>14</sup> Diospa Wawan Jesuska payman Kayllaycuchejnincheymin. Payka janaj pachanejta Diospa ñaupakenman yaycorka. Chayraycu paypi sumajta jap'icuskanchejta sut'ita runasman willacunanchej tiyan. <sup>15</sup> Cristoka entiendenmin juchaman urmachejcunapi pisi callpayo caskanchejta. Payka nokanchejjinallataj tucuy urmachej muchuspapis mana juchallicorkachu. Muchuskanraycu atin

causayninchejpi nokanchejwan cuscachacuya. <sup>16</sup> Ajinamanta mana manchachicuspalla Diospa ñiaupakenman kayllaycunachej c'acha yanapayninta jap'icunanchejpaj. Payka qhuyacuyninwan perdonawasunchej pisichicuskanchejinataj yanapawasunchej.

## 5

### *Diospa niskanta uyarinanchej tiyan*

<sup>1</sup> Runasmanta tucuy ajllaska caj yupaychana-wasimanta curajcunaka runaj sutinpi Diosman kayllaycuncu. Juchata pichanancupaj koskatapis uywastapis Diosman jaywanancupaj churaska carkancu. <sup>2</sup> Chay runamanta ajllaska yupaychana-wasimanta curajka runalla. Chayraycu runacunaj pantaynincipi urmaynincipis paycunawan cuscachacun. <sup>3</sup> Chaywanpis imaynatachus runaspa juchasnincumanta uywata jaywanan tiyan, quiquillantataj paypa juchasninemtapis jaywanan tiyan.

<sup>4</sup> Ni pipis payllaka yupaychana-wasimanta curaj cananpaj churacunchu. Manachayrí Dios chaypaj payta wajyan chaylla. Aaronpis ajina wajyaska carka. <sup>5</sup> Ajinallataj Cristopis mana pay quiquillanchu jatunchacorka Curaj yupaychana-wasimanta cananpajka. Manachayrí Dios payman nerka:

Waway canqui.

Cunan p'unchay kanta noka jatunchayqui.\*

<sup>6</sup> Wajnejpi palabranpi nillantaj:

Wiñaypaj runasta Kayllachimuwj kan canqui.

Melquisedecjina churaskataj canqui.

<sup>7</sup> Cristoka cay pachapi causashaspa sinch'ita Diosmanta mañacorka. Wañuymanta payta cacharichiya atinanta yachaspa Diosman khasparerka may phutiywan wakaywanpis. Tatanka munaynintapis payka casorkapuni yupaycharkataj. Chayraycu Tatanka Cristo jaywacuskanta cusiywan jap'erka, payta uyarispa yanaparkataj. <sup>8</sup> Payka Diospa Wawan cashaspapis muchuskannejta Tatanka munayninta casuya yachacorka. <sup>9</sup> Payka tucuy imapi casucoj cayta yachacuskanraycu tucuy payta casojcunapajka juchamanta wiñaypaj atiyniyoj Cacharichejnincumin. <sup>10</sup> Diostaj payta churarka payman Kayllaycuchej cananpaj Melquisedec-tajina.

### *Mosoj causaypi amaña wawasjinaka caychejchu*

<sup>11</sup> Chay imasmanta ashqhataraj kancunaman parlanaycu tiyan. Cunanrí mana sumajta sut'inchayta atiycuchu ñac'ayta entiendej jok'arajina caskayquichejraycu. <sup>12</sup> Unayña kancunaka Diospi jap'icorkanquichej. Cunancamaka may yachachejña canayquichej carka. Astawanpis Diospa niskasninmanta kallaricuyta kancunaman ujtawan yachachinaraj tiyan. Imaynachus wawitaspis lechellawanraj causancu manataj miqhunawanchu, ajinallataj kancunawanpis. <sup>13</sup> Yachanquichejjina Diospa niskasninmanta kallaricuyllata uyarejka pisitaraj entiendeskanta chay chekan yachachinasmana. Chayraycu wawitajinallaraj mosoj causaypi cashan. <sup>14</sup> Astawanpis mosoj causaypi wiñaska cajrí atin uyariyta jap'iytapis aswan jatuchej yachachinasta. Chay niskasnipi runayaska caspaka atin casuya. Atillanña reparaya mosoj causaypaj allin cajta chayrí mana allin cajtapis.

\* 5:5 Literal: yumarkayqui.

## 6

*Mosoj causaypi wiñaychej*

<sup>1</sup> Chayraycu atiskanchejmanjina ñaupajman rinachej sumaj wiñaskas cananchejcama. Ñaupaj caj yachachinastaka amaña ujtawan ujtawanpis kallarisunchu. Chay kallarinapaj yachachinaska caycuna cancu: Manacaj ruwaskasta sakespa Diosman cutiricuymanta, paypi jap'icuymantawan; <sup>2</sup> bautismomanta, Diosmanta mañacuspa maquista churanamanta; wañuskacuna causarimunancumanta, wiñaypaj juicio p'unchaymantawan. <sup>3</sup> Diospa yanapayninwanka ñaupajman rispa jatun yachachinaspi wiñaskaspuni casunchej.

<sup>4</sup> Chaywanpis Diosta rejsinancupaj uj cutita cheka c'anchayta jap'ejcunaña cancuman. Diospa sumaj kosksninta jap'ejcunaña, Santo Espirituwanpis cus cachaskaña cancuman. <sup>5</sup> Diospa niskanta c'acha caskanta wiñay causayman wajyaskantapis yachancumanña. <sup>6</sup> Ajinata yachaskancumantaña sichus Diosmanta t'akacuspa payta khesachancuman chayka, ujtawan Diosman paycunata cutirichiyka manaña aticunchu. Sichus ajinata ruwancuman chayka, paycunaka ujtawan Diospa Wawanta chacatachispajinancu. Payta runaspa ñaupakencipi manchayta p'enkachispajinancu. <sup>7</sup> Imaynachus uj chajraka parallapipuni caspa sumajta pokon llanc'ajpajka, ajinallataj Diospi jap'icojka sumaj wiflaska runa canka. Chay chajraka Diosta cusichispa pokoyniyojpunitaj. <sup>8</sup> Astawanpis sichus uj chajra qhishcasllata pokon chayka, manacaj cashan. Khesachanapajjinaña cashan, ruphachiskataj canka. [Ajinallataj Diospa c'ajaj phiñacuynin canka payta khesachajcunapajka.]\*

*Sonkochanas*

<sup>9</sup> Munacuskasný, ajinatapis yuyaychanaswan parlayquichej, chekata yachaycu kancunaka mosoj causay ruwanaspi junt'anayquichejta. <sup>10</sup> Yachaycutaj Diosman t'akaska runasninman munacuyniyquichejta ricuchiskayquichejta Diospa sutinpi paycunata yanapaspa. Cunanpis paycunata yanapashanquichej. Ajinapi Diosta munacuskayquichejta ricuchishanquichej. Chayta ruwashaskayquichejtari Dios chekan caspa mana konkapunchu. <sup>11</sup> Chaywanpis munaycu sapa ujniyquichej Diospi suyananta sumaj c'uchi ruwaywantaj tucucuycama ñaupajman rinanta. <sup>12</sup> Mosoj causay imaspi ama khellaman tucupuychejchu. Manachayrí imaynatachus ñaupajpi Diospi jap'icojcuna ruwarkancu, ajinallatataj kancunapis ruwaychej. Paycunaka unayta suyarkancu Dios sumaj niskanta junt'anancama. Cunanri paycunaka chay suyaskancuta ri-cushancuña.

<sup>13</sup> Cayta yuyaricuychej Abrahammanta: Dioska sumaj niskanta payman nispa, jurarka chay niskan cheka caskanta. Diospa sutinmanta aswan curaj mana caskanraycutaj, sutinpi jurarka. <sup>14</sup> Nerkataj: "Chekatapuni yanapaskayqui cusiywan causacunayquipaj. Ashqha wawasniyoj canayquipaj miraytataj koskayqui", nispa. <sup>15</sup> Ajinataj Abrahamka Diospi jap'icuspa unayta suyacorka. Khepatataj chay suyaskanta ricorka. <sup>16</sup> Juranasmanta parlaspa yachanchej, runaska jurancu aswan curajpaj khawaskaj sutinpi. Chayta ruwancu chay juraska cheka sayachiska cananpaj. Ajinapi chay juraska jawa manaña canñachu ni ima parlay.

\* **6:8** Ninayan.

<sup>17</sup> Diospis sumaj niskanta jap'ejcunaman chekapuni caskanta astawan ricuchiyta munarka. Chayraycu jurarka chay sumaj niskan wiñaypaj sayachiska caskanta ricuchinanpaj.<sup>18</sup> Dios ni jayc'aj llullacuyta atinchu. Chayraycu sumaj niskanwan cheka juraskanwanpis churarka chay iscaynin wiñaypaj quiquillanpuni canancupaj. Ajinapitaj paypi suyas-papuni sumaj sonkochaskas canchej; imaraycuchus wañuymanta Diosman aykecorkanchejña wiñay causayta jap'icunanchejpaj.<sup>19</sup> Ajinapi Diospa cheka sumaj niskanpi suyaspa wiñay causayniyoj caskanchejta yachanchej. Chay niskanka mana cuyurej rumijinamin nokanchejpaj. Sumaj niskan junt'acoja manaraj ricushanchejchu. Chaywanpis yachanchej chay niskanka paypa ñaupakenpi sumaj sayachiska caskanta.<sup>20</sup> Astawanpis Diospa quiquin ñaupakenman Jesuska nokanchejpaj yay-corkaña. Melquisedecjina Diosman Kayllaycuchej cananpaj payka wiñaypaj churaskamin.

## 7

### *Diosman kayllaycuchej Melquisedecmanta*

<sup>1</sup> Chay Melquisedec Salem llajtata camachej carka. C'ata jatun Diosman kayllaycuchejta carka. Ñaupa tiempopi Abrahamka jatun makanacupi churanacoj camachejcunata atipaspa wañucherka. Atipaskanmanta cutimushajtintaj Melquisedecka paywan tincorka. Diospa sutinpitaj allinninpaj parlaspa Abrahamta bendercerka.<sup>2</sup> Abrahamka makanacupi tucuy jap'iskanmanta chuncaman parterka. Chay parteskanmanta ujtataj korka Melquisedecman Diosman kayllaycuchej caskanraycu. Chay Melquisedecka ñaupajta chekan cajta camachej sutichaska carka. Payka Salem llajtatapis camachej carka. Salemri niyta munan, allinyacuy. <sup>3</sup> Paypa tatanmanta, mamanmanta ñaupa tatasninemtapis ni ima yachacunchu. Nacecuynimanta wañuyninemtapis nillataj yachacunchu. Manachayrí Diospa palabranpeka cayllata nin, mana tucucu niyoj kayllaycuchej caskanta. Ajinaka Diospa Wawan Cristojina carka.

### *Melquisedecka Abrahammanta aswan curajpaj khawaska*

<sup>4</sup> Reparaychej imayna jatunpaj khawaskataj Melquisedec carka. Ñaupa tatanchej Abrahampis jap'iskanmanta aswan sumaj cajmanta chunca caj parteta payman korka. <sup>5</sup> Aswan khepatataj israelcunata Moisés camacherka Diospaj konancuta capuskancumanta pacha-jmanta chuncata. Chay chunca cajta konancu carka Levíj miraynin cajcunaman. Paycuna carkancu yupaychana-wasipi ruwanayojcuna. Jap'ejcunaka kojcunajta waukesnincupis carkancu quiquin Abrahampa miraynimanta caspa. <sup>6</sup> Melquisedecrí mana chay ayllumanta cashaspapis Diospaj koskasta Abrahammanta jap'erka Diospa sutinpitaj bendercerka. Chaywanpis Dioska sumaj niskanta kospa Abrahama jatun-charka. <sup>7</sup> Sumajta yachanchej bendecej runaka bendeciska runamanta astawan curajpaj khawaska caskanta. Ajinapi reparanchej Melquisedec astawan curajpaj khawaska caskanta Abrahammanta niskaka.

<sup>8</sup> Moisespa camachiskanmanjina chay Diospaj koskasta jap'ejcunaka wañoj runaslla carkancu. Paycunaka Levíj miraynimanta carkancu. Melquisedecrí uj ricuchina carka wiñay causaj Cristomanta. <sup>9</sup> Nisunman

chay koskata jap'ej Levika kospajinarkaña jatun tatan Abraham koskanwanka. <sup>10</sup> Melquisedec Abrahamwan tincushajtin Levika manaraj naceskarajchu carka.

*Ñaupa camachiska manaña atiyniyojchu*

<sup>11</sup> Israelcunata Dios camacherka Levimanta miraylla yupaychana-wasipi ruwanayojcuna canancuta. Chaymanjina Aaronpis ñaupaj curajnincu carka. Diospa sumaj yuyaskanta runasman junt'anancupaj churaskas carkancu. Astawanrí paycunaka mana aterkancuchu tucuya junt'ayta. Chayraycu Diosman kayllaycuchej waj laya Melquisedecjina churaska canan carka. Payka Cristomin. <sup>12</sup> Sichus waj laya Diosman kayllaycuchej canman chayka, waj camachiskapis canallantaj tiyan. <sup>13</sup> Moisespa camachiskanmanjina yupaychana-wasipi tucuy ruwanayojcuna Levíj ayllunmanta canancu carka. Jesusrí waj ayllumanta carka. <sup>14</sup> Astawanpis tucuy yachanchej, Señorninchejka Judá ayllumanta caskanta. Moiseska chay ruwanayojcunamanta parlaspa ni imata nerka chay ayllumanta. <sup>15</sup> Cunani Diospa yuyaskanka aswan sut'i cashan Cristo Melquisedecjina riqhurimuskanraycu. <sup>16</sup> Payka mana ñaupa camachiskamanjina Levi ayllumantachu Diosman kayllaycuchej carka. Manachayrí ni jayc'aj tucucoj causayniyoj caskanraycu atiyniyojpunimin. <sup>17</sup> Chayraycu Diospis ajinata willan:

Wiñaypaj runasta Kayllachimuaj kan canqui.

Melquisedecjina churaskataj canqui, nispa.

<sup>18</sup> Chay niskanwanka ñaupa camachiskata Dios chincachiporka manaña atiyniyoj caskanraycu, nitaj yuyaskanta junt'askanraycupis. <sup>19</sup> Chay ñaupa camachiskaska mana aterkachu Diospa yuyaskanta tucuy imapi junt'ayta. Manachayka runasta waquichinallanpaj churaska carka Cristoj jamuskancama. Cunanka chaymanta astawan sumaj niskanjejtä Diosman kayllaycuncuhej yuyaskanmanjina.

*Diospa mosoj traton wiñay atiyniyoj*

<sup>20</sup> Chaywanpis astawan sumaj mosoj Kayllaycuchejta churaspa Dios jurarka. Ñaupa camachiskanejta Aaronjina payman kayllaycuchejcuna churaska canancupajrí mana jurarkachu. <sup>21</sup> Cristota churaspari Dios jurarka. Señortaj nerka:

Jurarkani, ajinapunitaj canka:

Wiñaypaj runasta Kayllachimuaj kan canqui.

<sup>22</sup> Cacharichiwajinchej Jesuska Dioswan cuscapuni caspa, chay aswan sumaj traton cheka caskanta wiñaypaj rejsichiwanchej.

<sup>23</sup> Aaronjina Diosman kayllaycuchejcuna pisi tiempollapaj ruwarkancu, wañoj runalla caskancuraycu. Ajinapitaj ashqhas carkancu.

<sup>24</sup> Cristorí wiñaypaj causaj caskanraycu mana tucucuñiyoj Diosman Kayllaycuchej canka. <sup>25</sup> Paynejta Diosman kayllaycucocunapaj janaj pachapi Diosmanta mañapuspa wiñaypaj causan. Chayraycu tucuy atiyniyoj cashan paycunata juchamanta cacharichinanpaj wiñaypaj mosoj causayniyoj canancupa).

*Jesucristoka c'acha causayniyoj*

<sup>26</sup> Jesusri cay pachapi tiyacushaspaka c'acha causayniyoj mana juchayoj, mana pantayniyoj carka. Juchasapasmanta payta Dios

t'akarka aswan pata janaj pachapi jatunchaspa. Chayjina Diosman Kayllaycuchejka nokanchejman sayacunandapaj sumajpunimin. <sup>27</sup> Astawanpis Aaronjina yupaychana-wasimanta curajka sapa p'unchay uywasta jaywanan carka. Ñaupajta paypa juchasninemanta jaywanan carka, chaymantataj Diospa runasninpaj juchasnincumanta. Jesusrí uj cutillata wiñaypaj pay quiquinta jaywacorka. Chayraycu mana sapa p'unchaychu jaywanan tiyan. <sup>28</sup> Chaywanpis ñaupa camachiskamanjina churaska curajcunaka juchaman urmaj runaslla carkancu. Khepatari juraska niskanmanjina Curajpaj Dios Wawan Cristota churarka. Payka mana juchayo sut'i ricuchiska carka. Wiñaypajtaj ajina canka.

## 8

### *Janaj pachapi yupaychana-wasimanta Curajpa ruwanasninemanta*

<sup>1</sup> Cunanka chay parlaskanchejmanta aswan curajka caymin: Chayjina Diosman Kayllaycuchej capuwanchej. Paytaj tucuy atiyniyoj Dioswan cusca janaj pachapi tiyaycucorka. <sup>2</sup> Payka cheka caj janaj pacha yupaychana-wasipi Diospa ñaupakenpi kayllaycuchejpa ruwanasninta ruwashan. Chay cheka caj yupaychana-waseka Señorpa ruwaskan manataj runaj ruwaskanchu. <sup>3</sup> Cay pacha yupaychana-wasipi tucuy ruwanayoja koskastapis uywastapis jaywananpaj churaskamin. Chayraycu Cristopis jaywanata jaywanallantaj carka. <sup>4</sup> Chaywanpis sichus cunan Cristo cay pachapi cashanman chaypis, mana yupaychana-wasipi ruwanayojochu canman, waj ruwanayojcuna caskancuraycu. Chaycunaka Moisés camachiskasninmanjina jaywanancupaj churaskas carkancu. <sup>5</sup> Paycunaka ruwarkancu cay pacha yupaychana-wasillapi. Chay yupaychana-waseka janaj pachapi cajpa rijch'acuynillanmin. Chayraycu Moisés orkopi cashajtin payta Dios camacherka cay pachapi yupaychana-wasita wasichananpaj. Nerkataj: "Khaway, orkopi ricucherkyqui chaymanjina ruway tucuy imata", nispa. <sup>6</sup> Cunanní janaj pachapi Cristoka aswan sumaj ruwanasnijoymen, mosoj traton atiyniyoj caskanta ricuchispá. Dioska chay mosoj tratonta aswan sumaj niskasniwan kowanchej. Chaymanjinataj Cristo ruwanasnenka aswan sumajmin.

### *Diospa mosoj tratonmanta*

<sup>7</sup> Sichus ñaupa camachiskasnin Diospa munayninta tucuya juntañanman carka chayka, mana ujtawan waj traton cananta munanmanchu carka. <sup>8</sup> [Chay ñaupa runas mana niskanta juntañanmanchu carka ricuchinapaj]\* Señor Dioska palabranpi nin: Sumaj p'unchaycuna jamonka.

Chay p'unchaycunapi mosoj tratoya churasaj Israel ayllupaj Judá ayllupajpis.

<sup>9</sup> Cay mosoj tratoytaka mana ñaupa tatasnincupaj churaska quiquin-tachu churasaj.

Chaypachaka paycunata qhuyacuspa Egipto jallp'amanta pusamorkani yanapayniyan atiyniyanpis.

Astawanpis paycunaka mana munarkancuchu casuyta.

Chayraycu nokaka sajra munaynincuman paycunata sakeporkani.

<sup>10</sup> Chay jamoj p'unchaycunapi Israel ayllupaj mosoj tratoya caymin:

\* **8:8** Ninayan.

Yuyaynincipi camachiskasniyta churasaj entiendenancupaj.

Sonkoncupitaj camachiskasniyta kelkasaj casuya munanancupaj.

Diosnincutaj casaj, paycunari runasniy cankancu.

<sup>11</sup> Ajinaka sapa uj llajta-masinta chayrí sapa uj waukentapis, manaña yachachenkachu, "Señorta rejsiy", nispaka.

Astawanpis tucuy rejsiwankancu juch'uy cajmanta aswan jatun caj-cama.

<sup>12</sup> Qhuyacuyniyan juchasnincuta khehusaj,

ni jayc'aj yuyaricunaypaj, nin Señor Dioska.

<sup>13</sup> Mosoj tratonmanta parlaspaka ñaupa cajtaka mauc'aña caskanta ricuchin. Chay mauc'ataj chincapunayashanña.

## 9

### *Cay pachapi cay yupaychana-wasimanta*

<sup>1</sup> Israelcuna cay pachapi Diosta yupaychanancupaj ñaupa camachiskasninta jap'erkancu. Yupaychana-wasita wasichanancupajpis yachachiskas carkancu. <sup>2</sup> [Yupaychana-waseka iscayman t'akaska carka. Ñaupakenpi uj jatun awaska khatanayoj carka.]<sup>\*</sup> Chay uqhu ñaupaj partenka Diospaj T'akaska† carka. Chaypi churaska carka chay kori c'anchana, chay kori mesapiwan Diosman jaywaska t'antata churanapaj. <sup>3</sup> Iscay caj jatun awaska khatana callarkataj. Chay khatanaj wasanpi Diosllapaj T'akaskapuni‡ sutichaska lugar carka. <sup>4</sup> Tiyarkataj korimanta incienso k'oшñichinapis, Diospa camachiskasninta churanapaj cajón, arca sutichaska. Chay arcaka tucuy uqhuntin jawantin koriwan khataska carka. Chay arca uqhupitaj churaskas carkancu maná, niska, churananpaj kori p'uñuwan. Carkataj Aaronpa k'omeryamoj c'aspiwan p'alta rumipi kelkaska camachiskasiwan. <sup>5</sup> Chay arcaj patanpitaj carkancu korimanta ruwaskas iscay angeles§ lijran okhariskas llanthuycuspa. Khatanata khawarkancutaj. Chay khatanapitaj sapa wata yawarta ch'ajchuycoj cancu. Sapa uj chay imasmantari cunan mana astawan parlasunchu.

<sup>6</sup> Chayjina ruwaska wasi carka Diosta yupaychanancupaj. Chay wasej ñaupaj partenman sapa p'unchay yaycoj cancu ruwanayojcunaka ruwanasnincuta junt'anancupaj. <sup>7</sup> Chay warqhuska khatanaj wasan iscay caj partenmanrí curajlla yaycoj watapi ujllatataj. Nitaj yaycuya aterkachu mana uywa yawarta apaspaka. Manaraj yaycushaspa pay quiquinpa juchasninemanta uywata jaywanan caj. Chaymantataj runaspa juchasnincumanta jaywanan caj. <sup>8</sup> Chay imasnejta Santo Espíritu yachachiwanchej janaj pachapi caj Diosllapaj T'akaskapuni\* lugarmanta. Yachachiwanchej, chay ñaupa yupaychana-wasi cananca-maka Diospa ñaupakenman runas yaycunancupaj manaraj quichaskachu caskanta. <sup>9</sup> Chay yupaychana-waseka uj ricuchinalla cashan cu-nan p'unchay mosoj yupaychanamanta reparachinawanchejpaj. Chay ñaupa tiempospeka koskastapis uywastapis jaywaj cancu. Astawanpis chay jaywanaska yupaychajcunaj sonko-yuyaynincuta ni jayc'aj

\* 9:2 Ninayan. † 9:2 Literal: Santuario. ‡ 9:3 Literal: Santísimo. § 9:5 Literal: gloriamanta querubines. \* 9:8 Literal: Santísimo.

juchamanta llimphuchayta aterkachu. <sup>10</sup> Ñaupa tratonmanjinaka camachiskas carkancu miqhunamanta, ujyanamanta, imaymana maylacuyuncunamantawan. Chay aswan sumaj p'unchaycuna jamunanca malla churaska carka chay jawa imasllata ruwacuyka.

*Janaj pacha yupaychana-wasiman Cristo yaycorka*

<sup>11</sup> Cunanrí aswan sumaj p'unchaycunapiña canchej. Diosman Kayllaycuchiwajninchéj Cristoka yacycunña chay aswan sumaj caj cheka caj yupaychana-wasimanka. Chayri mana runaspa ruwaskanjinallachu nitaj cay ruwaska pachamantachu cashan. <sup>12</sup> Chaywanpis payka Diospa ñaupakenman yaycorka mana uywa yawarwanchu. Manachayrí paypa quiquin yawarninta jich'arka. Uj cutillatataj yaycorka juchamanta wiñaypaj cacharichinawanchejpaj. <sup>13</sup> Ñaupa tiempospi juchancumanta jaywanancu caj chivosmanta torosmantapis yawarta. Malta china wacata ruphachispa ushphanta ch'ichichaska runaman ch'ajchuycoj cancu. Ajinata jawallanta llimphuchaj cancu. <sup>14</sup> Cunanrí may astawanraj Cristoka paypa yawarninta Diosman jaywaspa sonko-yuyayninchéjta llimphuchan. Paypa quiquin munayninmantataj jaywacorka. Chaywanpis tucuy imapi santo, wiñaypaj Diospa Wawan caspa, cheka yuyay Espiritunejta jaywacorka. Chayraycu manacaj ruwaskasmanta sonko-yuyayninchéjta sumajta llimphuchawanchej wiñay causaj Diosta yupaychananchejpaj.

*Cristoj wañuyninnejta Diospa mosoj tratonka atiyniyoj*

<sup>15</sup> Cristoka may sumaj jaywananwan Diospa mosoj tratonta atiyniyojta nokanchejpaj ruwarka. Dios niskanta mana junt'ayta aterkachu ñaupa tratonpi runaska juchallicuskancuraycu. Cristorí wañorka runasta tucuy juchamanta cacharichinapaj. Cunanka Cristoj wañuyninraycu tucuy wajyaskacunaman Dios sumaj niskanta junt'an wiñay causayniyoj canancupaj. <sup>16</sup> Yachanchejjina testamentopi kelkaska herencia koska cananpaj yachacunanjay tiyan testamentota ruwaj runa wañuska caskan. <sup>17</sup> Ajinallataj Cristoka wañorka Diospa tucuy yuyaskan mosoj tratonpi junt'acunapaj. <sup>18</sup> Ñaupa tratonpis junt'acunapajka uywa yawar jaywaska canan carka. Chaypajtaj uywata wañuchinancu caj. [Chay imaska Jesuspa wañuyninmanta reparananchejpaj carka.]† <sup>19</sup> Moisepis tucuy israelcunata tantachimuspa tucuy Diospa kelkaska camachiskasninta paycunaman leespa willarka. Chaymantataj uywacunaj yawarnincutawan yacutawan chajrorka. Hisopo c'aspipi puca millmawan kelkaskamanpis tucuy runasmanpis ch'ajchuycorka. <sup>20</sup> Ajinata ruwaytawantaj nerka: "Cay yawarka jich'aska, Diosman jaywaskataj. Chayraycu kancunaman ch'ajchuykusaka ricuchin Dios tratonta junt'askanta, churaskanmanjina", nispa. <sup>21</sup> Chaywanpis Moiseska yawarwan ch'ajchuycorka yupaychana-wasita, chaypi ruwanayojcuna imaswanchá ruwanancu caj, tucuy chay imastawan. <sup>22</sup> Niyman, tucuy imata Diospa khawaskanpi allin cananpaj yawarwan llimphucharkancu. Chaywanpis jaywana yawar jich'acojtillan juchaka khechuska.

*Jaywakannejta Cristoka juchata wiñaypaj khechun*

<sup>23</sup> Cay pacha yupaychana-waseka chay ruwanaswan llimphu khawaska canan carka runas Diosta yupaychanancupaj. Chayri

† 9:18 Ninayan.

janaj pachapi cajman rijch'acojlla carka. Quiquin janaj pacha yupaychana-wasipajrí may astawan sumaj jaywana canan carka. <sup>24</sup> Chayraycu Cristoka mana chay rijch'acoj ruwaska cajllamanchu yaycorka. Manachayrí quiquin janaj pachaman yaycorka. Cunantaj Diospa ñaupakenpi nokanchej jawa sayacushawanchej. <sup>25</sup> Chaywanpis payka mana ashqha cutitachu yaycorka yupaychana-wasimanta curajcunajinaka. Paycunaka sapa wata uywa yawarwan yaycoj cancu chay Diosllapaj T'akaskapuni<sup>‡</sup> lugarman. <sup>26</sup> Sichus Cristoka paycunajina jaywanan canman carka chayka, may ashqha cutita muchunan wañunapis canman carka cay pacha kallariymantapachaka. Cunanrí uj cutillata runa riqhurimorka chay ñaupa tiempospa junt'acuyninpi. Pay quiquinpa jaywacuyninnejtataj juchata wiñaypaj k'alata atiparka. <sup>27</sup> Runaka uj cutillata wañun. Chaymantataj ruwaskasninemanta Diospa ñaupakenpi cutichinan tiyan. <sup>28</sup> Ajinallatataj Cristoka uj cutillata jaywacorka tucuy runaspa juchasnincuta khechunanpaj. Jucharí tucuchiskaña cajtenka manaña ujtawan juchawan ruwajchu riqhurimonka. Manachayrí payta cusiywan suyajcunata wiñay causayman pusananpaj riqhurimonka.

## 10

### *Ñaupa jaywanas juchataka manapuni khechorkachu*

<sup>1</sup> Chay camachiskaska sumaj jamoj imaspa rijch'acuynillan carka. Manataj cheka janaj pacha imaswanka quiquinchu carka. Rijch'acuynillan caskanraycu mana aterkachu tucuya llimphuchayta. Nitaj Diosman kayllaycuya munajcunata tucuy sonkowan payta yupaychanancupaj yanapayta aterkachu. Sapa wata quiquin jaywanata jaywashajtincupis juchancutaka mana khechorkapunichu. Manataj chay jaywajcunaj sonko-yuyaynincoka llimphuchaskachu carka. <sup>2</sup> Llimphuchaskachus canman carka chayka, manaña juchachanmanchu carka. Niñataj juchancumanta jaywancumanchu carka. <sup>3-4</sup> Jaywanapaj wañuchiska torosmanta chivosmantapis yawarnincoka manapuni aterkachu juchasta khechuytaka. Astawanpis ajina jaywaskancoka sapa wata juchancumanta yuyaricherka.

### *Jesús cay pachaman jamorka Diospa munayninta ruwananpaj*

<sup>5</sup> Chayraycu Cristoka cay pachaman jamuspa nin:  
Diosníy, mana munanquichu uywa jaywanasllataka.  
Manachayrí runa cuerpotra waquichipuwarkanqui.  
<sup>6</sup> Canman uywa wañuchispa ruphachiska jaywanas chayrí juchapaj jaywanas.  
Chay imaslalaka mana cusichisunquichu.

<sup>7</sup> Chayraycu nerkaní: “Cay pachapi cashani, Diosníy, tucuy munayniyquita ruwanappaj.  
Nokamanta palabrayquipipis ajina kelkaska cashan”, nispa.  
<sup>8</sup> Ñaupajpi Cristo ricucherka Dios mana munaskanta ni uywa jaywanasta ni ruphachiskasta nitaj juchapaj jaywanastapis. Chaycuna ñaupa camachiskasninemanta jaywaskas carkancu. <sup>9</sup> Khepanpitaj Cristo nerka:

<sup>‡</sup> 9:25 Literal: Santísimo.

“Cay pachapi cashani tucuy munayniyquita ruwanaypaj”. Ajinata nis-paka ñaupaj caj uywa jaywanataka tucuchin mosoj jaywanata churanan-paj. Cay mosoj jaywanaka Diospa tucuy munayninta ruwaymin.<sup>10</sup> Chay munayninmanjinaka Cristo uj cutillata jaywacorka juchanchejmanta llimphuchanawanchejpaj. [Ajinapi Diosman nokanchejta t'akaspa paypa ñaupakenman yacuncanchejpajjina ruwawarkanchej.]\*

*Cristoka uj jaywanallawan k'alata juchata khechorka*

11 Tucuy yupaychana-wasipi ruwanayojcunaka sapa p'unchay ruwanasnincuwan junt'arkancu. Chay quiquin koskasllatapunitaj jaywarkancu. Chaycunaka ni jayc'aj k'alata juchata khechuya aterkachu. 12 Cristorí tucuy juchata khechunanpaj uj cutillata jaywananta korka. Chaymantataj manaña juchapaj jaywanata apamonkachu. Astawanrí wiñaypaj tiyaycucorka Dioswan cusca camachinanpaj. 13 Suyashantaj tucuy enemigosnin k'ala atipaskast canancucama. 14 Ajinaka uj jaywanallawan Cristoka wiñaypaj Diospa tucuy yuyaskanta runasninman junt'arka. Paycunaj causaynincutataj llimphuchashan paywan ujchaska canancupaj. 15 Cristomanta chay willanas cheka caskanta Espíritu sut'inchawanchej. Ñaupjtataj nin:

16 Khepa p'unchaycunapi paycunapaj mosoj tratoy caymin:  
Sonkoncuman camachiskasniyta churasaj casuya munanancupaj,  
yuyaynincupitaj kelkasaj entiendenancupaj, nerka Señor Dioska.

17 Ujtawantaj nin:

Juchasnincumantapis mana casuwaskancumantapis manaña ni jayc'aj  
yuyaricusajchu, nispa.

18 Ajina perdón cajtenka manaña juchamanta jaywanaka cananchu.

*Diospa ñaupakenman kayllaycunachejpuni*

19 Cunanka, hermanosní, Jesuspa wañuyninnejta mana manchachicupsa yaycunchej Diospa ñaupakenman payta yupaychananchejpaj.

20 Cristoka wañuspa uj mosoj ñantajina quicharipuwarkanchej Diosisman yaycunanchejpaj. Cristonejllatataj Diosman kayllaycucunchej. Chayraycu payka causaj ñanjina cashan. [Yachanchejjina cay pacha yupaychana-wasipi uj jatun warqhuska khatana caskanta Diospa ñaupakenman runas mana yaycunancupaj.]‡ Chay khatanaka Cristo wañojtin lliq'icorka. Chaytaj uj ricuchina carka Jesuspa cuerponmanta.

21 Chaywanpis Diosman Kayllaycuchiwajinchej Cristoka tucuy Diospa wasinta khawananpaj churaska cashan. Runasnenka Diospa wasinmin. 22 Chayraycu Diosmanka kayllaycunachejpuni. Nokanchejka cheka sonkowan tucuy imapi paypi sumajta jap'icunchej. Sonko-yuyayninchepi sajra juchamanta Cristojo yawarninnejta llimphuchaskaña canchej. Cuerponchejpis ch'uya yacuwan mayllaskas.

Ajinallapi Diosman kayllaycunachejpajjina ruwaskas canchej. 23 Paypi confiacuskanchejta willacorkanchej, chaymanjinapunitaj cacunachej, payka sumaj niskanta junt'ananta yachaskanchejraycu.

24 Nokanchejpura allinninchejpaj khawanacunachej, sonkochanacupsa munacuywan causananchejpaj c'acha imasta ruwananchejpajpis.

25 Señorpa sutinpi tantacuya ama sakeychejchu. Waquinrí tantacuya sakeyman yachacushancu. Kancunari astawanraj tantacuspa

\* **10:10** Ninayan. † **10:13** Literal: chaquisnin urapi churaskas. ‡ **10:20** Ninayan.

sonkochanacuychej Cristoj cutimunan p'unchay kayllapiña caskanta yachaspa.

*Diospa juchachaynenka manchaymin*

<sup>26</sup> Sichus cheka cajta yachaspaña juchalliytapuni ajllasunman chayka, manaña ni ima jaywanapis canchu juchanchejta khechunampajka. <sup>27</sup> Manachayrí juchallicojka juchachayta manchachicuywan causanka, yachaspa Dios c'ajaj phiñacuyninpi churanacojcuncanta tucuchinanta. <sup>28</sup> Yachanchej Moisespa camachiskasninta manacajpjaj khawajka mana qhuyacuywan wañuchiska canan carka. Sichus iscay chayrí quinsa runas mana casuskanta willancuman chayka, wañuchiska canan carka. <sup>29</sup> Ajina cajtenka Cristota khesachaj runaka ¿imayna astawan juchachanapajjinataj cankarí? Chay runaka Diospa Wawanta manacajpjaj khawaspa khesachan. Paypa mosoj tratontaka Cristo j yawarniñ junt'arka chay runata llimpuchananpaj. Chaytapis manacajpjaj khawan. C'achata yanapaj Santo Espiritutapis khasimanta ñac'arichispa khesachan. <sup>30</sup> Rejsinchej cayta nej Diostaka: “Sajrata ruwajman ruwaskasninmanjina koyka nokamantamin”. Nillantaj: “Señor Dios runasninta chekachus manachus caskancuta nenka”. <sup>31</sup> Dioska causaj Diosmin. Chayraycu manchaymin paywan juchachaska cayka.

*Diospi confiacuspa sumajta sayaychej*

<sup>32</sup> Astawanpis ñaupaj p'unchaycunamanta yuyaricuychej. Chay p'unchaycunaka Diospi jap'icuspa c'anchayninta jap'iyta kallarerkanquichej. Chaypitaj mayta muchuywan paypi confiacuspapuni sumajta sayarkanquichej. <sup>33</sup> Waquin cutipi kancunaka runaspa ñaupakencipi p'enkachiškas ñac'arichiskaspis carkanquichej. Chaycunapitaj waquin cutipi ñac'arejcunawan cuscachacorkanquichej. <sup>34</sup> Sumaj willanas-raycu wisk'aska hermanoswanpis cuscachacorkanquichej. Ajinapitaj capuyniyquichejta runas khehusojoquichej cusicorkanquichej. Wiñaypaj aswan sumaj capuynijoq caskayquichejta yachaspa cusiskas cacorkanquichej. <sup>35</sup> Chayraycu tucuy sonkowanpuni Diospi confiacyeje. Yachanquichejtaj confiacuskayquichejmanta payka c'acha yanapayninmanjina kosunayquichejta. <sup>36</sup> Diospa munayninta ruwaychejpuni paypi jap'icuspa. Ajinata suyaskayquichejmanta khepapi ricunquichej Dios sumaj niskanta junt'askanta. <sup>37</sup> Diospa palabranpipis nin:

Uskhay uskhayllatamin jamunan cajka caypi canka manataj khepacunkachu.

<sup>38</sup> Nintaj:

Chekan runaka Diospi jap'icuskannejta causanka, nispa.

Nillantaj:

Nokapi jap'icuwashaspa khepaman cutiricapojojri ni imaynapi nokata cusichiwanchu.

<sup>39</sup> Khepaman cutiricapuskancuwanka wiñaypaj tucuchiska canancupaj rishancu. Nokanchejri mana chaycunamantachu canchej. Manachayrí paypi jap'icuskanchejwanka wiñaypaj cacharichiska cananchejpaj rishanchej.

<sup>1</sup> Diospi jap'icuspaka ricuchinchej niskasninta chekata junt'ananta suyaskanchejta. Diospi jap'icuskanchejka manaraj ricuskanchejcunatapis caskanta ricuchin. <sup>2</sup> Dioska willawanchej palabranpi, ñaupa runaspis paypi jap'icuskancuwan payta cusichiskancuta.

<sup>3</sup> Paypi jap'icuspa yachanchej niskanta parlaskallanwan tucuy pachacunata ruwaskanta. Manaraj ima cashajtinpis niskallanwan riqhurichiskantapis yachanchej.

*Abel, Enoc, Noemantawan*

<sup>4</sup> Diospi jap'icuskankraycu Abelka aswan sumaj jaywanata Diosman korka Cainmanta niskaka. Ajinapi chay jaywaskanwan Diosta cusicherka. Chayraycu Dioska palabranpi willarka payta chekan runapaj khawaskanta. Chaymanjinataj Abelka wañupuspañapis yanapanawanchejpaj parlashanraj.

<sup>5</sup> Diospi jap'icuskankraycu Enocka mana wañupuspa janaj pachaman okhariska carka. Runastaj payta masc'aspia mana tarerkancuchu Dios payta pusacapuskanraycu. Diostaj willawanchej cay pacha causashaspa Enoc payta cusichiskanta. <sup>6</sup> Ajinaka uj runa mana Diospi jap'icuspaka ni jayc'aj atinchu Diosta cusichiyyta. Payman jamojka creenan tiyan Dioska chekapuni cashaskanta. Payta rejsiyta munajcunaka Dios yanapananatapis tucuy sonkowan creenan tiyan.

<sup>7</sup> Diospi jap'icuskankraycu Noeka Diospa sut'inchaskanta creerka. Manaraj ricuska imasmanta sut'inchaskanmanjinataj barco arcata waquicherka ayllunpaj. Chay arcaman yaycuspa Noella ayllunwan yacupi wañuymanta libraska carka. Ajinapi Noeka ricucherka cay pacha runas juchachaska caskancuta. Paytataj Dioska chekanpaj khawarka paypi jap'icuskankraycu.

*Abrahammanta*

<sup>8</sup> Diospi jap'icuskankraycu Abrahamka Diospa wajyaskanta casorka. Payka llajtanmanta llojserka mana rejsiska jallp'aman. Sumaj niskawan Dios payta nerka: "Cay jallp'ata koskayqui", nispa. Abrahamri Diospa wajyaskanta casorka maymanchus rishaskanta mana yachaspapis. <sup>9</sup> Diospi jap'icuskankraycu Abrahamka Diospa sumaj niskanmanjina koska jallp'api mana llajtayojjina toldospit tiyacorka. Paywan cuscataj Isaacpis Jacobpis ajinata tiyacorkancu. Paycunamanpis chay jallp'aka koska caskanta, Dios nerka. <sup>10</sup> Ajinata tiyacuspares Abrahamka ricucherka wiñaypaj ruwaska llajtata suyashaskanta. Chay llajtatataj Dios ruwarka yuyaskanmanjinina.

<sup>11</sup> Diospi jap'icuskankraycutaj warmin Sarawan wawayoj canancupajjina Dios payta ruwarka. Payka ashqha watasniyojña cashaspapis creerka Dios sumaj niskanta junt'ananta. Chayraycu wawata rejserka.

<sup>12</sup> Ajinaka Abrahamllamanta ashqha miraynenka jamorka, payka wañuskajinaña casharkapis. Cunantaj paypa miraynenka mana yupay atina cancu, janaj pachapi ch'ascacunajina kocha cantopi t'iuyujinapis.

<sup>13</sup> Diospi jap'icuspataj tucuy chay runaska causarkancu. Paycunaka manaraj Dios sumaj niskanta junt'ashajtin wañuporkancu. Astawanpis manaraj ricushaspa creerkancu, chay sumaj niskanraycutaj cuscorkancu. Ajinapi paycunaka cay pachapi mana llajtayojjis puricoj-cunallapis caskancuta willacorkancu. <sup>14</sup> Chayta willacojcunaka ricuchincu uj llajtallancuta masc'aspia rishaskancuta. <sup>15</sup> Chekapuni sichus llosimuskancu llajtamanta yuyaricushancuman carka chayka, cutipuya

atincuman carka. <sup>16</sup> Astawanpis tucuy sonkowan munasharkancu astawan sumaj llajtata. Chay llajtari janaj pacha llajtamin. Ajinamanta Dioska mana p'enkacunchu Diosnincu, niska cayta, llajtata paycunapaj waquichipuskanraycu.

<sup>17</sup> Abrahampa wawan Isaacka Diospa sumaj niskanmanjina nacecorka. Chay c'ata wawan jatitunña cashajtintaj uj jaywanatajina konanta Dios mañarka. Ajinatataj mañarka Abrahampa jap'icuynin chekachus cashaskanta yachananpaj. <sup>18</sup> Isaacnejta mirayniyoj cananta yachashaspapis Abrahamka Diospi jap'icuspa casorka. C'ata wawan Isaactataj uj jaywanatajina wañuchinayasharka. <sup>19</sup> Abrahamrí yuyarka Dios atiyniyoj caskanta wawanta wañuymantapis causarichimunapaj. Ajinaka atinchej niya Abrahamka wañuskamanta Isaacta ujtawan causashajta jap'icapuskanta.

### *Isaac, Jacob, Josemantawan*

<sup>20</sup> Diospi jap'icuskanraycu Isaacka jamoj imasmanta sut'incharka Jacobman Esaumanwan. Paycunaman Dios sumaj niskasninta junt'ananta willarka. <sup>21</sup> Diospi jap'icuskanraycu Jacobka wañuy patapiña cashaspa, jamoj imasmanta Josej iscay wawasninman sut'incharka. Dios sumaj niskanta paycunaman junt'ananta willarka. Chaymantataj bastonnnipi c'umuycucuspa Diosta yupaycharka. <sup>22</sup> Diospi jap'icuskanraycu Joseka wañupushaspa sut'incharka israelcuna Egípto jallp'amanta llojsipunanca. Nerkataj tullusninta Canaán jallp'aman apanancauta.

### *Moisesmanta*

<sup>23</sup> Diospi jap'icuskancuraycu Moisespa tatanwan mamanwanka nacecojtincama payta pacarkancu quinsa quillata. Ajinata ruwarkancu ancha c'acha wawita caskanta ricuskancuraycu, manataj manchachicorkancuchu camachej Faraonpa camachiskanta. <sup>24</sup> Diospi jap'icuskanraycu Moiseska runaña caspa, khesacharka Faraonpa ususinpa wawan sutichaska cananta. <sup>25</sup> Astawanpis payka Diospa runasninwan cusca muchuyta ajllarka. Manataj munarkachu juchaj yankha cusiyninpi pisi ratupaj causaytaka. <sup>26</sup> Imaynatachus Cristota runas p'enkaypaj khawancu, ajinallataj khawaska cayka aswan khapaj caskanta yuyarka. Yuyarka aswan khapaj caskanta Egíptopi khapaj imasmanta niskaka. Payka tucuy sonkowanpunitaj creerka Dioska sumaj niskanta payman junt'anantapuni. <sup>27</sup> Diospi jap'icuskanraycu Egíptota sakerka camachejpa phiñacuyninta mana manchachicuspa. Yuyaskanmanjinapunitaj purerka, mana ricuy atina Diosta ricushanmanpisjina.

<sup>28</sup> Diospi jap'icuskanraycu pascua corderota wañucherka. Chay jaywana uywaj yawarninwanpis israelcunaj wasi puncusnincuman ch'ajchucherka, curaj wawancuta wañuchej angel ama wañuchinapaj. <sup>29</sup> Diospi jap'icuskancuraycu israelcunaka puca kocha chaupita chim-parkancu ch'aqui pampatajina. Egípto runasrí quiquillantataj chim-payta munaspa yacuwan chincachiskas carkancu.

### *Diospi jap'icoj unay ashqha atipajcuna*

<sup>30</sup> Diospi jap'icuskancuraycu israelcunaka Jericó llajtaj perkasninta urmacherkancu, kanchis p'unchayta llajtata muyuspa. <sup>31</sup> Diospi

jap'icuskanraycu Rahab, khencha warmipis, israelcunamanta watekajcunata allillanta wasinman wajyarka. Ajinapi mana wañuchiskachu carka mana casucojcunawan cusca.

<sup>32</sup> ¿Imatataj astawan niyman? Nichá tucuya atiymanchu willaspa Gedeonmanta, Baracmanta, Sansomanta, Jeftemanta, Davidmanta, Samuelmanta, Diospa unay willajcunanmantawanpis. <sup>33</sup> Diospi jap'icuskancuraycu paycunaka llajtacunata atiparkancu. Chekan cajta runaspaj ruwarkancu. Diospa sumaj niskanta junt'askata causaynincipi ricorkancu. Leoncunaj simincumanta cacharichiskas carkancu. <sup>34</sup> Paycunaka manchay laurashaj ninasta wañucherkerkancu. Espadawan wañuna peligromanta aykecorkancu. Pisi callpayo cashaspapis, Diospi jap'icuskancuneja callpachaskas carkancu. Guerrapi makanacushaspa callpachaskas carkancu. Contrancipi waj llajtasmanta soldado tropas jamojtincu aykecherkerkancu. <sup>35</sup> Warmiska wañuskasnincuta causarimuskata ricucaporkancu.

Waquinrí sinch'i ñac'arichiskas carkancu. Cacharichiska caytaka mana munarkancuchu, aswan sumaj wiñay causarimuy caskanraycu. <sup>36</sup> Wajcunataj sinch'ita asipayaskas sek'oskastaj carkancu Diospi jap'icuskancuraycu. Chaywanpis wataskas carcelpi wisk'askas carkancu. <sup>37</sup> Rumiswan ch'ankaskas, serruchuwan iscayman qhuchuspa wañuchiskas, ñac'arichiskas, espadawan wañuchiskapis carkancu. Wajchajina oveja karawan cabra karawanpis p'achalliska caynejta jakaynejta puricusharkancu. Pisichicuypi carkancu. Llaquichiskas ñac'arichiskastaj carkancu. <sup>38</sup> Paycuna may c'acha runas caskancuraycu cay pacha runaska mana paycunapajjinachu carkancu. Ch'in pampaspi, orkospo caynejta jakaynejta puricusharkancu. Orko jusc'uspi, pampa jusc'uspipis aykecuspa tiyacorkancu. <sup>39</sup> Diospi jap'icuskancuraycu tucuy paycunaj Diosta cusichiskancu willacun. Chaywanpis paycunaka Dios sumaj niskanta junt'askanta manaraj ricorkancurajchu. <sup>40</sup> Nokanchejpajka aswan sumaj cajtamin waquichipuwarkanchej. Yuyaskanmanjinataj tucuy sumaj niskasninta nokanchejmanwan cuscalla paycunamanpis Dioska junt'anka.

## 12

### *Jesusta reparaychej sonkochaskas canayquichejpaj*

<sup>1</sup> Tucuy chay may ashqha runas Diospi jap'icuspa paypa c'acha yanapayninmanta willacorkancu. Palabranpitaj Dioska paycunaj causaynincumanta willan nokanchejta sonkochanawanchejpaj. Chayraycu atipaskancumanta yuyaricuspa nokanchejpis tucuy sonkowan Diospi jap'icuspapuni causanachej. Tucuy jarc'aj imastapis astawanraj muyuyninchejpi jap'icoj juchata wijch'upunachej Diospi suyaspapunitaj muchunachej. <sup>2</sup> Jesustataj sumajta khawanachejpuni yuyayninchejwan. Payka mosoj causay kallariypi Diospi jap'icuya yachachiwarkanchej. Chaywanpis sumaj wiñaskas cananchejcamá sonkonchejpi yanapawasunchej. Payka yacharka sumaj cusiywan Dios payta jatunchananta. Chayraycu paypi confiacuspa cruzpi muchorka; p'enkay wañuytataj manapis canmanjinata khawarka. Cunanka Dioswan cusca camachinanpaj janaj pachapi jatunchaskamin.

<sup>3</sup> Payta reparaychej. Yuyaricuychejtaj imaynatachus juchasapas paypa contranpi may sinch'ita churacuskancuta. Payri tucuy cay imasta

muchuspa Diospi confiacorka. Chayraycu payta sumajta reparaychej Diospi jap'icuypis ama sayc'unayquichejpaj nitaj llauchhuyanayquichejpaj.<sup>4</sup> Kancunaka juchata atipanapaj makanacuspas manaraj muchorkanquichejchu wañuyacamaka.<sup>5</sup> Cunanri ichapis kancunaka konkapushanquichej Diospa sonkochaj niskanmanta. Payka wawasninmanjina palabranpi parlapayasorskachej:

Wawáy, chekanta purinapaj Señorpa yuyaychaskanta ama pisipaj khawaychu.

Juchamanta c'amisojtinpis ama llauchhuyaychu.

<sup>6</sup> Señorka munacuskanta chekanta purinapaj wanachinmin.

Sapa uj runata wawanpaj jap'iskantapis muchuchin.

### *Muchuynejta wiñaychej*

<sup>7</sup> Mosoj causaypi sumaj wiñaskas canayquichejpaj Dioska wawasninwanjina kancunawan ruwan. Tataka wawanta yachachinanpaj wanachinpuni.<sup>8</sup> Diospa wawasnin cajcunaka wanachiskaspuni cancu. Sichus kancuna mana wanachiskaschu cawajchej chayka, wajcha wawaslla canquichej manataj paypa wawasninchu.<sup>9</sup> Nokanchejka cay pacha pantaypi wanachinawanchejpaj tatasniyoj carkanchej. Paycunatataj sumajpaj khawaj canchej. ¿Manachu may astawanraj janaj pachapi caj Tatanchejtaka casusun paywan causananchejpaj?<sup>10</sup> Cay pachapi tatasninchekja pisi p'unchaycunallata yuyaynincumanjina pantajtinchej wanachiwarkanchej. Janaj pachapi caj Tatanchejrí allinninchejpajpuni wanachiwanchej cheka caynippi paywan ujchaskas cananchejpaj.<sup>11</sup> Wanachishawajtinchejka manamin cusiyka canchu, manachayrí phutiylla. Khepatari wanachiyta muchojcunaka Diosman allinyachiskas cancu causaynincipi chekan ruwajcuna canancupaj.

<sup>12</sup> Chayraycu Señorpa sumaj ruwanasnipi callpachanacuychej c'uchi canayquichejpaj. Sichus llauchhuyapunquichej chayka, sonkochanacuychej.<sup>13</sup> Chekan ñiantapunitaj puriychej. Ajinapi kancunawan purejcnaka pisi callpayojo cashajcunapis mana urmankancuchu. Astawanri callpachaskas cachuncu.

### *Diospa c'acha yanapaynimanta ama pisichicuychejchu*

<sup>14</sup> Tucuy hermanoswan allinpi causacuya masc'aychej. Diosman t'akaska llimphu causayniyoj cayta tucuy sonkowan munaychej. Llimphu causayniyoj runalla Diostaka riconka.<sup>15</sup> Sumajta khawacuychej pajtataj kancunamanta maykenpis Diospa c'acha yanapaynimanta pisichicushanman. Chaymantataj millay jaya yuyayniyojman tucuman. Pajtataj chay millay jaya yuyayka saphijina paypa sonkomanta llojsimunman. Ajinapi waj ashqha runasman chimpaspataj yuyaynincuta chincachinman.<sup>16</sup> Pajtataj kancunamanta mayken canman khenchachacoj chayrí Diosmanta cajta manacajpaj khawaj. Esaupis ajina carka. Payka uj miqhunallawan trocaporka chayakenta. Curaj wawa caspa chayta jap'inan carka.<sup>17</sup> Yachanquichejjina khepata payka Diospa sumaj niskanmanjina chay chayake jap'inanta wakaywan mayta masc'asharka. Diosrí payta khesachaspa yuyaskanmanjinapuni ruwarka.

### *Diosman kayllaycucunquichej*

18 Ñaupa tiempopi Sinaí orkoman unay tatasninchejka kayllaycorkancu. Chay orkoka ricucojlla. Cunari kancunaka mana chaymanchu kayllaycunquichej. [Chay ch'in orkopi Dios riqhurerka paycunaman parlananpaj.]<sup>\*</sup> Paypa atiyninmanta orkopi sinch'i nina laurasharka, k'oshñiwantaj lakhayaycusharka, loco wayrawantaj carka. 19 Cornetajinataj uyarerkancu. Diostaj paycunaman sinch'ita parlamorka. Uyarejcunari manchachicuskancuraycu mañacorkancu paycunaman amaña astawan parlananta. 20 Mana muchuya aterkancuchu cay sinch'i camachiskanta. Chay nin: "Sichus q'ita animal cajllapis orkota tuparinman chayka, rumiwan ch'ankaspa wañuchiska canan tiyan", nispa. 21 Chay manchay imasta ricuspa quiquin Moisespis nerka: "Mayta manchachicuspa qharcatitishani", nispa.

22 Astawanri kancunaka Sion orkoman kayllaycunquichej. Cayka causaj Diospa llajtanmin, janaj pacha Jerusalén. Chaypi waranka waranka angeles Diosta yupaychanancupaj tantaska cancu. 23 Chaypitaj sutisniyquichej kelkaskas cancu Diospa wawasnin caskayquichejraycu. Chay janaj pachamantaj tantacunayquichejpaj<sup>†</sup> rishanquichej. Tucuya chekanchaj Diosman kayllaycucunquichej. Janaj pachapi caj Sionman yaycuspañaka chekan runaspa espiritusnincu Dioswan cuscaña cashancu. 24 Mosoj tratonmanjina allinyanachej Jesusman kayllaycunquichej. Paypa yawarnenka sonkosniyquichejta llimphuchasunquichej. Aswan sumaj cashan Abelpa yawarninmanta niskaka. [Abelpa yawarnenka Cainta juchacharka. Jesuspatarí c'acha yanapayninnejta perdonasunquichej.]<sup>‡</sup>

### *Diosta uyariychej*

25 Khawaychej Dios parlashajtaka ama khesachaychejchu. Unay ch'in pampapi cajcunaka Dios cay pachapi parlamuskanta mana uyariyta munarkancuchu. Nitaj c'ajaj phiñacuyninmanta aykecuya aterkancuchu. Cunanka janaj pachamanta Dioska parlamushawanchej. Sichus paymanta khepaman cutispa carunchacusunchej chayka, may astawanraj juchachaskas casunman. 26 Jakay p'unchaypi Diospa parlaynenka cay pachata cuyucherka. Cunani willawanchej: "Uj cutitawanraj cuyuchisaj mana cay pachallatachu astawanpis janaj pachatawan cuyuchisaj", nispa. 27 "Uj cutitawanraj", nispaka ricuchin cuyuska cajka, ruwaskalla caspa, khehuska cananta. Ajinapi chay mana cuyurej cajka wiñaypaj canka. 28 Chayraycu nokanchejka chay mana cuyurej pachapi camachinanchejpaj Dios atiyta kowaskanchejmanta graciasta konachej. Chaymanjinataj payta yupaychaspa cusichinachej manchachicuywan. 29 Yachanchej Diosninchejka laurashaj tucuchej ninajina caskanta.

## 13

### *Diosta cusichinapajjina causacuymanta*

1 Cristowan ujchaska hermanosjina imaynatachus munacuywan causashanquichej ajinallatapuni munanacuychej. 2 Watucojcunata forasterocunatapis wasiyquichejman wajyayta ama konkapuychejchu. Ñaupa runasmanta waquenka ajinata ruwaspa angeesta wajyarkancu mana angeles caskancuta yachashaspapis.

\* 12:18 Ninayan. † 12:23 Literal: iglesia. ‡ 12:24 Ninayan.

<sup>3</sup> Diospijap'icuskancuraycu wisk'aska hermanosmanta yuyaricuychej paycunawanpis wisk'aska cashawajchejjina. Ñac'arichiska hermanosmantapis yuyaricuychej. Kancunapaj cay pachapi causashaskayquichejraycu quiquin muchuylatajpis canman.

<sup>4</sup> Sumajpajpuni khawaychej casaraska causayta. Casaraska cajcunaka tucuy imapi purajmanta cheka munanacuywan tiyacuchuncu. Yachanchej millay causaypi purejcunata khenchacunatawan Diosmin juchachanka.

<sup>5</sup> Causayniyquichejpi ama cachunchu kolketa munapayayka, manachayrí capususkallayquichejwan cacuychej. Chekatapuni quiquin Dios niwarkanchej: "Ni jayc'aj sakeskayquichu, kanwanpunitaj casaj", nispa. <sup>6</sup> Chayraycu mana manchachicuspa niyta atinchej: Diosmin yanapawajniyka.

Manataj manchachicusajchu runa imatapis ruwanawanmantaka.

<sup>7</sup> Hermanos uqhupi ñaupaj khawapojcunayquichejmanta yuyaricuychej. Paycunaka Diospa niskanta kancunaman willasorkachej. Yuyaricuychej imayna cusiywan causaynincuta tucuskancuta. Paycunajinataj Diospi jap'icuychej. <sup>8</sup> Jesucristoka quiquillanpuni cashan kayna, cunan, wiñaypajpis. <sup>9</sup> Tucuy imaymana waj yachachinaswanka ama pantachiskas caychejchu. Cancuman ñaupa camachiskasmanjina. Chayta khatejcunaka miqhunasnincunejta sonkoncupi callpachaskas cayta yankha masc'ancu. Miqhunaka mana sonkota callpachanchu. Astawanpis Diospa c'acha yanapayninwan sonkonchejta callpachaymin sumajka. <sup>10</sup> Sonkonchejpi callpachaskas cananchejpajri uj jaywana altarninchej capuwanchej. Cay pachapi caj yupaychana-wasipi ñaupa jaywajcunaka chay altarman mana jamunancuchu tiyan, mana chaypajjinachu caskancuraycu. <sup>11</sup> Cay pachapi yupaychana-wasimanta curajka Diosllapaj T'akaskapuni\* lugarman juchamanta uywa yawarta apanan carka. Chay uywa aychatataj llajta jawapi ruphachinancu carka. <sup>12</sup> Ajinallatataj Jesuska quiquin yawarninnejta runasninta llimphuchananpaj llajta jawapi ñac'arerka p'enkachiskapis carka. <sup>13</sup> Chayraycu payman kayllaycunanchejpaj p'enkayninta muchunachej. Ñaupa causayninchetataj sakenachej. <sup>14</sup> Chekapuni cay pachapeka mana wiñay llajtayojchu canchej. Manachayrí janaj pachapi caj jamoj llajtanchejta tucuy sonkowan munaspa suyashanchej. <sup>15</sup> Chayraycu Jesucristonejta Diosta yupaychanachejpuni. Chayka uj jaywanajinamin. Ajinata yupaychaspa c'acha cayninta siminchejwan willacunchej. <sup>16</sup> C'acha ruwanasta ruwayta, hermanoswan yanapanacuypi ujchacuytapis ama konkapuychejchu. Chayjina causayka Diospaj uj sumaj jaywanajinamin, paytataj cusichin.

<sup>17</sup> Hermanos chaupipi khawapojcunayquichejta casuychej, sumajpajtaj khawaychej. Paycunaka mosoj causayniyquichejpi wiñanayquichejpaj wakaychashallasunquichejpuni. Diospa ñaupakenpi causayniyquichejmanta cuentata konancupajjina wakaychasunquichej. Paycunata uyariychej, ajinapi cusiywan kancunamanta willankancu manataj phutiywanchu. Chayka kancunaj allinniyquichejpajmin.

### Tucucuy imasmanta

\* **13:11** Literal: Santísimo.

<sup>18</sup> Diosmanta mañapuwaycu nokaycupaj. Chay tucuya kelkamuspa yachaycu llimphu sonko-yuyayniyoj caskaycuta. Tucuy imapitaj c'achata causacuya munaycu. <sup>19</sup> Astawanka Diosmanta mañapuwaycu kancunaman uskhayta cutimunaypaj.

<sup>20</sup> Allinyachej Dioska Señorninchej Jesucristota wañuymanta causarichimorka. Yawarninnejtataj mosoj tratonmanjina jatun Michejta churarka. Chayraycu Jesuska ovejasninta khawanawanchejpaj jatun Michejinchejmin. <sup>21</sup> Diosmantataj mañacushani mosoj causayniyquichejpi sumajta waquichisunayquichejta tucuy paypa munayninta ruwanayquichejpaj. Paytaj nokanchejta yanapawa sunchej cusichej cajta causayninchejpi ruwananchejpaj Jesucristonejta. Wiñaypaj jatunchaska cachun payka. Ajina cachun.

<sup>22</sup> Hermanosníy, cay sonkochaj yuyaychanasta sumajta jap'icuychej. Pisisapis kelkarimorkayquichej. <sup>23</sup> Willayquichej hermanonchej Timoteoka libraskaña cashan. Sichus uskhayta chayamunman chayka, paywan cusca ricuskayquichej.

<sup>24</sup> Tucuy khawapojcunayquichejta napaycuychej. Diosman t'akaska runasnintapis tucuynincuta napaycuychej. Italiamanta cajcuna kancunata napaycamusunquichej.

<sup>25</sup> Diospa c'acha yanapaynin tucuy kancunawan cachun. Ajina cachun.

## LA CARTA DE SANTIAGO

<sup>1</sup> Noka, Santiago,\* Diospa camachin cani Señorninchej Jesucristo-jtapis. Napaycamuyquichej kancuna, chunca iscayniyoj ayllusta, jallp'ayquichejmanta t'akaraskasta.

### *Diospijap'icuynejta sumaj yachay*

<sup>2</sup> Hermanosníy, mayta cusicunayquichej tucuy imaymana juchaman urmachej cajcuna jamusojtiyquichejka. <sup>3</sup> Yachanquichejjinaña chay llaquiyunata muchuspa Diospi chekamanta jap'icusquayquichejta ricuchinquej. Llaquiyunata atipaskayquichejnejta callpachaskas canquichej aswan sinch'ita sayanayquichejpaj. <sup>4</sup> Llaquiyunata muchuychej sumajta wiñanayquichejpaj sonkoyquichejpi. Ajinamanta tucuy imapi cheka ruwajcunapuni cawajchej Diospa ñaupakenpi, tucuy imapaj sumajta waquichiskas.

<sup>5</sup> Maykenniyquichejpis yachaypi pisinman chayka, Diosmanta mañacuchun. Diostaj payman mana mich'acuspa konka. Imaraycuchus tucuy paymanta mañacojcumamanka ashqhata konpuni. Manataj paycunata c'aminchu mañacojtingoka. <sup>6</sup> Mañacojrí tucuy sonkowan Diospi jap'icuspa mañacunan tiyan suyaspa jap'inanta. Amataj iscayrayachunchu. Imaraycuchus iscayrayajka jatun kocha yacuman ríjch'acun, ujnejmanta wajnejman wayrawan apaycachaska. <sup>7</sup> Chayjina runaka amaña yuyachunchu imatapis jap'inanta tucuy attiynijoj Señormanta. <sup>8</sup> Chay iscay iscayta yuyaj runa iscayrayashanpuni tucuy ruwanasnini, manataj ujllatachu yuyan.

### *Khapajcunamantawan mana capuyniyojcunamantawan*

<sup>9</sup> Cay pachapi pisi capuyniyoj caj hermanoka cusicunam Dios wawan-paj rejsicapuskamanta. <sup>10</sup> Cay pachapi khapaj hermanori cusicunam Dioska sonkonta llamp'uchaskanmanta. Imaraycuchus cay pachapi ca-jka uj khora t'icajinalla wañuspa chincaponka. <sup>11</sup> Inti llojsimuspa wayra sinch'ita ruphamojtin khora ch'aquipun t'icantaj urmapun. C'achitu caynintaj wiñaypaj chincaponka. Ajinallatataj cay pachapi khapaj runapis ruwanasninta ruwashaskanpi wañuponka capuynintaj chincaponka.

### *Llaquiyunata muchuspa atipaj runa*

<sup>12</sup> May cusiska chay runa Jesuspi chekata jap'icuskanraycu, llaquiyunapi cashaspa atipajka. Atipaskanmanta khepanta Dios payman wiñay causayta konka uj pillutajina. Chay wiñay causayta Dios nerka konanta payta munacojcumaman. <sup>13</sup> Pantachiy llaquiyuna chaupipi cashaspa ni pi nichunchu: "Dios cayman churawan juchaman urmanaypaj". Imaraycuchus ni ima atinchu Diosta juchallitchitaka. Nitaj Dios pitapis llaquiyunaman churanchu juchaman urmachinapajka. <sup>14</sup> Juchaman urmachej cajcunaka runaj sonkonta aysaspa sajra munayninjejta juchaman apaycachancu. <sup>15</sup> Ajinata runa sajra munayninta casuspa juchallicun. Junt'acojtintaj pay wiñaypaj wañunan tiyan.

<sup>16</sup> Munaska hermanosníy, ama pantacuychejchu [yuyaspa juchaman urmachej cajcuna Diosmanta caskantaka.]† <sup>17</sup> Tucuy c'acha cajka,

\* **1:1** Literal: Jacobo. † **1:16** Ninayan.

sumaj cajpis allinninchejpaj cashan, janaj pacha Diosmanta koska. Paytaj janaj pachapi c'anchaycunata ruwarka. [Chaycuna ujjinayaspa llanthuncutapis ujjinayachincu.]<sup>‡</sup> Diosrí may sumajmin, quiquilpanpuni wiñaypaj. Ni jayc'aj ujjinayanchu.<sup>18</sup> Yuyaskanmanjinataj causayta kowarkanchej wawasnin cananchejpaj cheka palabranta willarachiskannejta. Wawasninta ruwawarkanchej khepanta ashqha runaspis paypi jap'icunancupaj.

*Diospa palabranta uyarispas ruwaychej*

<sup>19</sup> Chayraycu, munaska hermanosníy, sapa uj runa Diospa palabranta sumajta uyarichun, allimanta parlacuchun. Amataj uskhayta phiñacuchunchu. <sup>20</sup> Imaraycuchus phiñacojka mana chekan cajtachu ruwan Diospa ñaupakenpeka. <sup>21</sup> Chayraycu tucuy millay ruwanasta, tucuy imaymana juchatataj sakepuychej. Chekatapuni Dios palabranta sonkoyquichejman churarka. Chayta llamp'u sonkowan casuychejpuni. Ajinata chay palabranka atiyniyojmin tucuy kancunata juchamanta wiñaypaj cacharichisunayquichejpaj.

<sup>22</sup> Kancunarií Diospa palabranta casojcunapuni canayquichej tiyan manataj uyarejcunallachu. Ama pantacuychejchu yuyaspa Diospa munayninta ruwaskayquichejta uyarispallaka. <sup>23</sup> Imaraycuchus uj runa Diospa palabranta uyarillan manataj casunchu chayka, uj espejopi uyanta khawacoj runajinalla cashan. <sup>24</sup> Chay runaka uyanta khawarparicuytawan ripun konkarparipuntaj imaynachus rijch'acuskanta. <sup>25</sup> Cristoj sumaj camachiskanta allinta khawajrí casucuspa chekamanta cusicuyniyojmin. Chay camachiskannejtataj runa juchamanta cachariska cashan Diospa munayninmanjina causananpaj. Diospa palabranta casojka mana konkapunchu uyariskanta manachayrí sumaj yuyaywan casunpuni.

*Diosta cheka yupaychaj runa*

<sup>26</sup> Sichus uj runa yuyan Diosta chekanta yupaychaskanta, simintataj mana yachachinchu allin cajllata parlayta chayka, pay quiquin pantacun. Diosta manapuni cusichinchu. <sup>27</sup> Tatanchej Diospa ñaupakenpi cheka, mana juchayojoj yupaychajka wajcha wawasta llaquicuynijoj vidastawan yanapan. Sonkontataj juchamanta llimphuta wakaychacun.

## 2

*Diospa palabranta sumaj yuyaywan casuychej*

<sup>1</sup> Hermanosníy, tucuyniyquichej Señorninchej Jesucristopí jap'icunquichej. Payka may sumaj, tucuy atiyniyoj Señormin. Chayraycu amapuni ujcunallata curajpaj khawaychejchu wajcunamantaka. <sup>2</sup> Uj ricuchinapaj nisunman iscay runas caskancuta. Uj sumaj pachalliska, kori anillosniyoj carka. Ujtaj pisi capuyniyoj, thanta p'achalliska carka. Chay iscay runas yaycumuncuman tantacuyniyquichejman. <sup>3</sup> Kancuna sumajpaj khawaspa chay sumaj p'achalliskata niwajchej: "Cay sumaj tiyanapi tiyaycucuy", nispa. Chay wajchatataj niwajchej: "Jakayllapi sayaricuy chayrí pampallapi tiyacuy", nispa. <sup>4</sup> Ajinata khawaspa runamasiniyquichejta ¿manachu curaj runastajina churacushanquichej? Ajinapi runasjina khawanquichej sajra yuyaskayquichejmanjina manataj caskanmanjinachu.

<sup>‡</sup> 1:17 Ninayan.

<sup>5</sup> Uyariwaychej, munaska hermanosní: ¿Manachu Dios ajllarka cay pachapi pisi capuyniyoj runasta sonkoncupi khapaj canancupaj paypi jap'icuspa? ¿Manachu paycunata ajllarka causanancupaj pay camachin, chaypi? Chay causayta sumajta nerka konanta tucuy payta munacojcu-naman. <sup>6</sup> Kancunari pisipaj khawanquichej mana capuyniyoj runasta. Diospi mana jap'icoj chay khapaj runas ¿manachu llaquichisunquichej? ¿Manachu aysasunquichejtaj curajcunaman juchachaskas canayquichej-paj? <sup>7</sup> ¿Manachu paycuna Jesucristo sumaj sutinmanta uj manacajtajina rimancu? ¡Cristo sutenka kancuna paypi jap'icojcunaman churaska carka paypata caskayquichejraycu!

<sup>8</sup> Diospa palabran sumajta camachiwanchej: “Runa-masiyquita munacuy kan quiuiyquitajina”. Sichus kancuna chekatapuni chayta casunquichej chayka, walejta ruwanquichej. <sup>9</sup> Astawanrí sichus khapaj runata sumajpaj khawawajchej khapaj caskanrayculla chayka, juchallicunquichej. Munanacuy camachiskataj juchachasunquichej mana casuskayquichejraycu. <sup>10</sup> Imaraycuchus pichari tucuy camachiskasmanta ujnillantapis mana casojka tucuynimanta juchayojojin. <sup>11</sup> Chaywanpis quiquin Diostaj nerka: “Ama khenchachacuychu”, nispa, nillarkataj: “Ama runasta wañuchiychu”, nispa. Sichus mana khenchachacunquichu, runastari wañuchinquitaj chayka, mana tucuy camachiskasnintachu casunqui. <sup>12</sup> Cristo camachiwarkanchej munanacunanchejta. Cacharichiwarkanchejtaj paypa munayninta ruwananchejpaj. Chay camachiskamanjinataj Dios niwasun juchayojojchus manachus caskanchejta. Chayraycu munacuywan parlana ruwanapis. <sup>13</sup> Imaraycuchus mana qhuyacuyniyoj runasta Dios mana qhuyaspallataj juchachanka juchancuraycu. Qhuyacojtarí qhuyanka.\*

#### *Cristopi jap'icuskanchejraycu allin cajta ruwana*

<sup>14</sup> Hermanosní: ¿ima allinpajtaj canman sichus uj runa nin Diospi jap'icuskanta chayka, manataj Diospa munayninta ruwanchu? Chayjina-nata Diospi jap'icojka manapuni juchamanta cachariskachu. <sup>15</sup> Caypipis uj ricuchina. Cristopi uj hermano thanta p'achayoj canman nitaj chay p'unchaypaj miqhunan canmanchu. <sup>16</sup> Ujniyquichejtaj payta ninman: “Allin risuchun. K'oñicunqui miq hunawan sajsacunquitaj”, nispa. Sichus pisichicuskanta mana konman chayka, ¿ima allinpaj canmanrí? <sup>17</sup> Uj runaka Diospi jap'icuskanta nin manataj paypa munayninta ruwanchu chayka, jap'icusanka mana chekachu.

<sup>18</sup> Ichapis uj runa niwanman: “Kan Diospi jap'icunqui. Nokaj-tataj sumaj ruwaskasniy tiyan”, nispa. Cutichiymán: “Mana ricuchi-wayta atiwa{j}chu Diospi jap'icuskanchejraycu sichus paypa munayninta mana ruwanquichu chayka. Noka ricuchiskayqui Diospi jap'icuskayta paypa munayninta ruwaskasniywan”, nispa. <sup>19</sup> Diospi jap'icuspa ninqui chekatapuni uj sapan Dios caskanta. Allintataj ninqui. Supaycunapis uj sapan Dios caskanta creencu. Manchachicuywantaj qharcatit-incu. <sup>20</sup> ¡Yankha yuyayniyoj runa! Ricuchiskayqui “Diospi jap'icuni” niskayqueka khasilla caskanta mana paypa munayninta ruwajtiyqui. <sup>21</sup> ¿Manachu unay tatanchej Abrahamta ruwaskanraycu Dios chekan runapaj khawarka? Arí, Abrahamka wawan Isaacta jaywarka Diosta

\* **2:13** Literal: qhuyacuy atipan juchachayta.

yupaychananpaj. <sup>22</sup> Cunan reparanquichá Abraham ruwaskasninwan ricucherka Diospi jap'icuskantaka. Ruwaspalla Abrahamka Diospi jap'icuskantaka chekata junt'arka. <sup>23</sup> Ajinallataj Diospa palabran junt'acun. Nintaj: "Abraham Diospi jap'icorka. Jap'icuyninraycutaj Dios payta khawarka chekan runapaj", nispa. Khepatari runas Abrahamta suticharkancu: Dioswan causacoj.

<sup>24</sup> Ajinaka reparacunquichejchá ruwaskanraycu runataka Dios chekanpaj khawaskanta manataj "paypi jap'icuni" niskanraycullachu. <sup>25</sup> Quiquillantaj carka Rahab, chay sajra purej warmipaj. ¿Manachu Dios chekan warmipaj khawarka ruwaskanraycu? Pay willajcunata wasinman wajyaricuspa yanaparka paycunata wajnejta llojsinancuta. <sup>26</sup> Mana samayniyoj cuerpoka wañuskamin. Ajinallataj cashan uj runa nejtin Diospi jap'icuskanta manataj allin ruwaskaswan ricuchinchu jap'icuskan cheka caskantaka. Diospi chayjina jap'icuskanka khasillamin.

### 3

#### *Kallunchejmanta*

<sup>1</sup> Hermanosníy, pisilla kancunamanta yachachejcuna canayquichej. Imaraycuchus yachanquichej sichus nokaycu yachachejcuna pantaycuman chayka, wajcunamanta aswan sinch'i juchachaskas casajcu.

<sup>2</sup> Tucuy nokanchej anchata pantanchej. Parlaskanpi mana pantaj runaka Cristopi allin wiñaskamin. Pay atin tucuy causayninta camachiyta. <sup>3</sup> Caballospa simincuman churanchej juch'uy frenota casunawanchejpaj. Ajinapi atinchej cutirichiya caballota. <sup>4</sup> Reparaychej barcosmantapis. Ancha jatun cashaspapis sinch'i wayrawan apaycachaskas cancu. Uj camachejri munayninmanjina chay barconta chekanta purichin uj juch'uy casp'illawan. <sup>5</sup> Quiquillantaj cashan kallunchejwanpis. Kallu ancha juch'uy citu caspapis jatun atiynyijojmin. May jatun imastataj manacajta jatunchacun. ¡Reparaychej may juch'uy ninaka atin ruphayta jatun sach'arara monteta! <sup>6</sup> Kalloj sajra parlaynin uj ninajinamin. Tucuy cuerponchejmantarí kallu aswan sajra cashan. Chaytaj runaj tucuy causaynintinta juch'uy manta wañunancama sonkonta ch'ichichan. Uqhu pacha supaymantataj cashan.

<sup>7</sup> Chaywanpis tucuy imaymana q'ita qhurusta, catarisjina khatatacojcunata, kochapi cajcunatapis runas yachancu atipayta. Atiparkan-cutaj paycunata. <sup>8</sup> Kalluntarí ni mayken runa atinchu camachiyta llamp'uchaspa. Kalloka uj sajra cajmin phiña catarijina wañuchinawan junt'aska. <sup>9</sup> Quiquin kalluwan yupaychanchej Señor Dios Tatanchejta chayllawantaj ancha sajrata rimanchej runasta. ¡Runasri Diospa ríjch'ayninpí ruwaskas cancu! <sup>10</sup> Uj sapan simiwan Diosta yupaychanchej chayllawantaj sajrata parlanchej. Hermanosníy, manapuni chayjinaka cananchu. <sup>11</sup> ¿Uj pujyullamtachu misq'i yacuwan c'arcu yacuwan phullchimun? <sup>12</sup> Hermanosníy ¿higo sach'aka pokonmanchu duraznosta? chayrí ¿uva sach'a pokonmanchu higosta? Manallataj uj pujyumanta c'arcu yacuman misq'i yacuwan phullchimuya atinchu.

#### *Cheka yachayka Diosmantamin*

<sup>13</sup> Khawacuychej: ¿canchu uj yuyaysapa yachayniyoj runa kancuna uqhupi? Chay allin yuyaysapa runa llamp'u sonkowan ricuchichun

yachayninta. Sumaj ruwanastapuni ruwaspataj causacuchun. Imaraycuchus llamp'u sonko cayka cheka yachaymanta jamun. <sup>14</sup> Sitajchus sonkoyquichejpi may jaya rimaycuna canman, sapa ujniyquichejtaj kancunaj allinniyquichejllata khawaspa ruwanquichej chayka, ama jatunchacuychejchu. Nitaj llullacuychejchu cheka cajpa contranpi churacusa. <sup>15</sup> Chayjina yachayka manapuni janaj pacha Diosmantachu. Manachayrí cay pachamanita, runaj sajra yuyaynillanmanta, supaymantawan. <sup>16</sup> Jaya rimaycuna cajtin sapa uj runa paypa allinnillanpaj khawajtintaj ch'ajwa cashan hermanos uqhupi. Chaywanpis tucuy mana allin cajpis cashallantaj. <sup>17</sup> Diosmanta yachayniyojrí ñaupajta llimphu sonkoyoj canan tiyan. Llanc'ashantaj runas allillanpi tiyacu-nancupaj. Chaywanpis c'acha runa caspa curajcunata casun. Qhuy-acuynijoj caspa tucuypa allinnincupaj llanc'an. Mana iscayrayaspataj tucuy sonkowan ruwan, ni puraj uyachu. <sup>18</sup> Sumaj mujuta t'akajcunaka sumaj pokoya okharincu. Chayjinallataj allinyachejcunapis tucuypa allinnincupaj ruwaspa allillantapuni tiyacuncu.

## 4

### *Amaña munacuychejchu cay pachapi caj imasta*

<sup>1</sup> ¿Imaraycutaj churanacushanquichej phiñacushanquichejtaj kancunapura? ¿Manachu chay churanacus cashancu sajra munayniyquichej sonkoyquichejpi makanacushaskancumanta? <sup>2</sup> Ancha sajra munayniyoj caspa mana sajsacuya atinquichejchu. Chayraycu runata munanquichej wañuchiya. Wajcunajta munapayaskayquichejta mana tariyta atiskayquichejraycu phiñacuspa churanacushanquichej. Munashaskayquichejtaj mana capusunquichejchu Diosmanta mana mañacuskayquichejraycu. <sup>3</sup> Mañacuspapis mana jap'inquichejchu munayniyquichejta sajsachinayquichejpaj sajra munaywan mañacuskayquichejraycu. <sup>4</sup> ¡Khenchachacojcunajina cashanquichej Diosta tucuy sonkowan mana munacuskayquichejraycu! ¿Manachu yachanquichej cay pacha sajra cajta munacuskayquichejka ricuchin Dioswan churanacojcuna caskayquichejta? Pichá ajllanman cay pachapi sajra cajta munacuya chayka, Diospa enemigon churacun. <sup>5</sup> Wajjinamantari Dios Tatanchej palabranpi nin Espiritunta sonkonchejman jatun munacuywan churaskanta. Chay Espirituntaj nokanchejpi tiyacushan. Pay sapallanmin munan may jatun munacuywan tucuy sonkonchejta jap'iyyta. Chanta ¿kancuna yuyanquichejchu Diospa niskanka khasilla caskanta? ¡Manapuni! <sup>6</sup> Disorsí llamp'u sonkoyojta aswan sumajta yanapan. Ajinallatataj palabranpi nin: "Dios jatunchacopja contranpi churacun. Llamp'u sonkoyojtarí sumajta yanapan", nispa. <sup>7</sup> Chayraycu llamp'u sonkowan Diostaka casuychejpuni. Supay Satanaspera contranpitaj sinch'ita sayacuychej. Paytaj kancunamanta aykeconka. <sup>8</sup> Tucuy sonkowan kayllaycuychej Diosninchejman paytaj kancunaman kayllaycusonkachej. Kancuna, juchallicojcunari sajra cajtaka amaña ruwaychejchu. Diostawan cay pachapi cajtawan munacuya yuyajcuna, sonkoyquichejta llimphuchacuychej Diosman kayllaycunayquichejpaj. <sup>9</sup> Juchallicuskayquichejmanta phuticuychej wakaychejtaj. Yankha cusiymanta sinch'ita asicushajcunaka, asicuyniyquichej wakayman tucuchun. Cusiyniyquichejtaj llaquiyman tucuchun [juchamanta

t'akacuskayquichejta ricuchinayquichejpaj.]<sup>\*</sup> <sup>10</sup> Llamp'uchacuychej, ari, sonkosniyquichejpi Señor Diospa ñaupakenpi. Chanta pay curajpaj churasonkachej.

### *Ama juchachaychu hermanoyquita*

<sup>11</sup> Cristopi hermanosníy, kancunaka amaña purajmanta rimapayanacuychejchu. Rimapayaspas hermanonta juchachajka Cristo camachiskanta khesachan. Uj juchachajjinataj camachiskaj contranpi churacushan. <sup>12</sup> Dios sapallanmin camachiskasninta churarka. Payllataj runaj ruwaskanmanjina nin allin caskanta chayrí mana allin caskantapis. Atiyniyojtaj cashan runasta juchamanta cacharichinanpaj chayrí wiñay wañuymanpis wijch'uchinanpaj. Kanrí ¿pitaj canqui runamasiyquita juchachanayquipaj?

### *Yuyaychanas ruwanasniyquichejmanta*

<sup>13</sup> Uyariwaychej, cayjinata nejcuna: “Cunan p'unchay chayrí k'aya risunchej chay llajtaman. Chaypitaj cacusunchej uj watata. Rantisunchej vendesunchejpis ashqha kolketa jap'isunchejtaj”, nispa. <sup>14</sup> Kancunari mana yachanquichejchu imachus k'aya cananta nitaj mashqha p'unchaycunatawanchus causanayquichejtapis. Causayniyquichejka uj phuyujinallamin. Ascamallapaj cay pachaman riqhurimun, chantaka chincaripun. <sup>15</sup> Kancunari cayjinata ninayquichej: “Señor Dios munajtenka causasunchej. Caytapis jakaytapis ruwasunchej”, nispa. <sup>16</sup> Caskanmanjinari kancunaka jatunchacuspa may caskayquichejta yuyanquichej. Tucuy chay imaymana jatunchacuya manapuni allinchu. <sup>17</sup> Chayraycu allin cajta ruwayta yachajka yachaskanta mana ruwaspa, juchallicun.

## 5

### *Yuyaychanas khapaj runaspaj*

<sup>1</sup> ¡Uyariychej, khapajcuna! Khaparispa sonko nanayta wakaychej. Imaraycuchus llaquiycura juchachaska cajcunapaj patayquichejpiña cashan. <sup>2</sup> Khapaj capuyniyquichejka ismuskasña wijch'unapajjina cancu. Sumaj p'achasniyquichejtaj thutaska p'achasjinaña cancu.

<sup>3</sup> Koriyquichejpis kolkeyquichejpis carcumiskasña cashancu. Chay capuyniyquichejwan mana allinta ruwaskayquichejraycu contrayquichejta uyanchasonkachej. Imaynatachus carcumí tucuchin kolketa ajinallatataj munapayaskayquichej ninajina aycha cuerpo quichejta tucuchenka. Mana allintachu khapaj capuyniyquichejta jallch'arkanquichej cunay juchachana p'unchaypaj.

<sup>4</sup> ¡Khawaychej! Jallp'asniyquichejta runas llanc'askancumanta paycunaman mana koporkanquichejchu maychus cajta. Chayraycu paycuna jap'inancu carka, chay kolke contrayquichejpi wajyacushan. Llanc'ajcunaj wakaskancutataj tucuy atiyniyoj Señor uyarin. Paymin camachin tucuynejpi may chhica cajcunatapis. <sup>5</sup> Kancunari cay pachapi khapaj imaswan causarkanquichej yankhata cusicuspa. Imaynatachá wascas mana yachacuncuchu wañuchinapaj wirayachiskas caskancuta, ajinata kancunapis wirayacushanquichej sonkosniyquichejpi yankha cusiywantaj sajsacushanquichej. Diospa jatun phiñacuynin p'unchay

\* **4:9** Ninayan.

kayllapiña cashan. <sup>6</sup> Chekan ruwaj runasta juchachanquichej wañuchiniquichejtaj. Paycunari ch'inlla cacuspa muchuncu.

*Llaquiycunata muchuychej callpachaska sonkowan*

<sup>7</sup> Chayraycu hermanosníy, tucuy atiyniyoj Señor Jesucristo cutimunancama llamp'u sonkowan llaquiycunata muchullaychej. Reparaychejtaj jallp'ata llanc'ajka tarpunampaj pacientiawan suyanan tiyan ñaupaj paratapis khepa paratapis. Chanta suyallantaj sumaj pokoya jallp'amanta okharinanpaj. <sup>8</sup> Ajinata kancunapis cusiywan suyaychejpuni. Sonkosniyquichejta astawanraj callpachacuychej imaraycuchus Señorninchéj cutimuspa kayllamushanña. <sup>9</sup> Hermanosníy, ama rimapayaychejchu ama juchachaskas canayquichejpaj. Khawaychej, chekanta khawaj Dioska cutimushanña. Paytaj nenka runas juchayojchus manachus caskancuta. <sup>10</sup> Hermanosníy, reparaychej imaynata Diospa unay willajcunan mana llauchhuyaspa muchorkancu. Paycunaka llaquichiskas caspapis tucuy atiyniyoj Diospa sutinpi willarkancu. Chayka uj ricuchinajina yachanayquichejpaj imaynatachus muchunayquichejta. <sup>11</sup> Nokanchejka yuyanchej llaquiycunata muchojcunaka may cusiskas caskancuta. Imaraycuchus Diospi jap'icuspa callpachaska sonkowan atiparkancu. Yachanquichejña imaynatachus Job llaquiycunata muchuskanta. Pay cusiywan callpachaska sonkowantaj tucuy atiyniyoj Diospi jap'icorka. Reparanquichejchá Señor payta sakellarka llaquichiska cananta allinninpaj. Imaraycuchus Dios may qhuyacuyniyoj may jatun munacuyniyojtaj cashan.

*Cheka cajtapuni parlaychej*

<sup>12</sup> Hermanosníy, kancunapajka caymin curaj cashan. Ama ni jayc'aj ju-raychejchu okharispa janaj pachaj sutinta ni cay pachaj sutinta nitaj waj imaj sutintapis. Manachayrí cheka cajtapuni parlaychej. Ajinapi "ari" niskayquichejta, junt'aychejpuni. "Mana" niskayquichejtaj, manapuni cachun. Chayjinata ruwaychej Dios kancunata ama juchachananpaj.

*Yuyaychanas Diosmanta mañacojcunapaj*

<sup>13</sup> Kancunamanta maykenmanpis ima jatun llaquiypis jamuso-jtiyquichej Diosmanta mañacuchun. Kancunamanta maykenpis cusiska caspaka taquichun Diosta yupaychaspas. <sup>14</sup> Kancunamanta maykenpis onkoska caspaka tantaska hermanosmanta ancianosta wajyachicuchun. Cayta ruwachun Diosmanta mañapunancupaj payta jampiwan jawinancupaj yachaspa Jesucristo tucuy atiyniyoj caskanta. <sup>15</sup> Diospi tucuy sonkowan jap'icuspa mañacojtincu onkoskaka onkoyninmanta cazariska canka. Tucuy atiyniyoj Señor payta thañichenka. Sichus onkoynin juchalliskanmanta canman chayka, juchasnín llimphuchaskas cankancu. <sup>16</sup> Chayraycu purajmanta juchasniyquichejta willanacuychej. Diosmantataj mañacuychej cuerposniyquichejpi sonkosniyquichejpipis thañichiskas canayquichejpaj. Chekan runaj tucuy sonkowan Diosmanta mañacuynenka may atiyniyojmin. <sup>17</sup> Diospa unay willajnin Eliaspir nokanchejjina runalla carka. Pay mana parananta Diosmanta tucuy sonkowan mañacojtin cay pachaman mana paramorkachu quinsa wata sojta quillaryoja. <sup>18</sup> Chaymanta ujtawan mañacojtintaj Dios parachimorka. Jallp'ari ujtawan miqhunata pokorka.

*Cutirichimuychej carunchacoja Diosman*

<sup>19</sup> Cristopi hermanosníy, ujniyquichej cheka willanasmanta pantaspa carunchacojtin, uj hermanontaj Diosman cutirichin chayka, sumajpunimin cashan. <sup>20</sup> Chay cutirichimojka yachachun carunchacoja Dios wañuymanta cacharichinanta ashqha juchasnintapis llimphucha-punanta.

## PRIMERA CARTA DEL APOSTOL SAN PEDRO

<sup>1</sup> Noka, Pedro, Jesucristoj cachan cani. Kelkamushayquichej kancuna Diospa ajllacuskacunaman. Ch'ekeraskas mana llajtayojjina tiyari cushionquichej Pontopi, Galaciapi, Capadociapi, Asiapi, Bitiniapipis. <sup>2</sup> Manaraj cay pachata ruwashasca Dios Tataka kancunata ajllacuya yuyarka. Paytaj munarka Santo Espiritunejta payman t'akaskas llimphu causayniyoj canayquichejta. Ajinata ajllacusorkachej Jesucristota casunayquichejpaj, wañuyninnejtapis paywan ujchaska causacunayquichejpaj. Munani Diospa c'acha yanapaynin astawan astawan kancunawan cananta, tucuy imapi allinta causacunayquichejpaj.

<sup>3</sup> Señorninchej Jesucristoj Diosnir Tatanka may jatunchaska cachun. Dioska may jatun qhuyacuyninwan mosoj causayta kowarkanchej. Wiñay causayniyoj cananchejpajtaj Jesucristota wañuymanta causarichimorka. Chayraycu Diospipuni confiacunchej. <sup>4</sup> Payka janaj pachapi paywan cusca causanayquichejpaj waquichispa suyashasunquichej. Chay causayka wiñaypaj, c'acha, mana tucucuyniyojmin. <sup>5</sup> Kancunaka Diospi jap'icushanquichej. Chaymanjina Dioska atiyninwan wakaychasonkachej khepa p'unchaycama. Jakay p'unchaypi Jesucristo cutimojtin paywan causanquichej wiñaypaj.

<sup>6</sup> Ajinapi Diospi suyaskayquichejraycu mayta cusicunquichej. Cunanri Diospa munayninmanjina pisi llaquichiskaspis cashanquichej tucuy imaymana phutiywan. Chaywanpis mayta cusicushanquichej. <sup>7</sup> Yachanquichejjina imaynatachus koritaka ninapi unuyachincu puru cananpaj, ajinallatataj Diospis phutiyniyquichejwan kancunapi ruwan. Chaytari payka ruwan paypi sumajta jap'icusquichej yachacunapaj. Koreka puru caspapis tucucuyniyojmin. Diospi jap'icuyniyquichejrí mana tucucuyniyoj. Chaywanpis korimanta niskaka aswan sumajmin. Ajinapi Jesucristo cutimojtin sichus Diospi jap'icuspapuni causashanquichej chayka, Dios jatunchasonkachej. Munacuywantaj sumajpaj khawasonkachej.

<sup>8</sup> Jesucristota mana ricorkanquichejchu. Astawanpis paytaka munacushanquichej. Nitaj cunanpis payta ricushanquichejchu. Astawanpis paypi jap'icuspa maytapuni cusicushanquichej. Chay cusiyya mana willay atinamin, janaj pacha cusiy caskanraycu. <sup>9</sup> Janaj pachapi wiñay causayta Dios kosonkachej paypi jap'icusquichejraycu. Chayta cheka caskanta yachaspataj mayta cusicushanquichej.

<sup>10</sup> Diospa unay willajcunan paypa c'acha yanapaynimanta sut'incharkancu. Imaynata chaywan juchayquichejmanta cachariskas canayquichejta mayta entiendeyta munaspa yachanancupajpuni churacorkancu. <sup>11</sup> Cristoj Espíritun paycunapi tiyacuspaj sut'inchasharka Cristoj ñac'ariynimanta, chay khepata atiywan jatunchaska cananmantawan. Chay sut'inchaskas ima tiempopichus imaynatajchus cananta paycunaka mayta yachanancupajpuni churacorkancu kelkaskasnincuta sumajta khawaricuspa. <sup>12</sup> Disorí paycunaman reparacherka kancunata yanapanancupaj sut'inchaskancuta. Manataj paycunapajchu carka. Astawanpis cay tiempopi sumaj willanasta uyarerkanquichej. Diosmanta cachamuskan Santo Espíritoj atiyninwan

willajcunaka kancunaman chayta willasorkachej. Angelespis chay sumaj willanasta mayta entiendeyta munancu.

*Diosman t'akaska llimphu causanamanta*

<sup>13</sup> Yachanquichej Cristo cutimojenka kancunapaj tucuy c'acha yanapaynin junt'acunanta. Chayraycu chay p'unchaycama Diospipuni confiacuychej. Imaynatachus uj runa allinta chumpiycucun llanc'anapaj, ajinallatataj c'acha causapaj sumaj yuyaywan waquichicuychej. <sup>14</sup> Diospa wawasnin caspaka tucuy sonkowan payta casuychej. Manaraj Cristopi jap'icushaspaka mana yuyayniyoj munayniyquichejmanjinina causarkanquichej. Chay ñaupa causayniyquichejmanjinaka amaña causaychejchu. <sup>15</sup> Manachayrí Diosman t'akaska chekanta causacuychej Dios wajyasuskayquichejmanjinina. Payka tucuy cayninpí santomin. Ajinallataj kancunapis tucuy causayniyquichejpi santo caychej. <sup>16</sup> Palabranpipis nin: "Noka santo caskayraycu kancunapis santo caychej".

<sup>17</sup> Kancunaka Diosmanta mañacuspa Tatayquichej caskanta ninquichej. Payka sapa uj runata ruwaskanmanjinina chekanta nin juchayojochus manachus, ni piman sayacuspa. Chayraycu payta Diostajina khawayachej. Munacuywantaj payta casuychej cay pachapi purishaspa mana llajtayoj cashaskayquichejraycu. <sup>18</sup> Kancunaka unay tatasniyquichejmantapacha manacaj causayta jap'erkanquichej. Yachanquichejtaj chay yankha causaymanta cachariskas canayquichejpaj Dios ranticapususkayquichejta. Kolkepis koripis tucucoilamin cancu. Chayraycu mana chaycunawanchu Dioska ranticapusorkachej, <sup>19</sup> manachayrí Cristojo wañuinwan. Cristoka mana juchayoj chekanta causarka. Jaywana corderojinataj cruzpi wañuspa yawarninta jich'arka. Ajinapi nokanchejraycu may sumaj precioyoj causayninta korka. <sup>20</sup> Dioska manaraj cay pachata ruwashaspa payta ajllarkaña. Chay khepatataj cay pachaman payta cachamorka juchayquichejraycu wañunapaj. <sup>21</sup> Kancunapaj wañorka Paynejtataj Diospi jap'icunquichej. Dioska wañiuymanta Cristota causarichimorka atiyninwantaj jatuncharka. Chayraycu Diospi jap'icorkanquichej paypitaj confiacushanquichej.

*Munacuywan causaychej*

<sup>22</sup> Diospa cheka niskanta casuskayquichejraycu juchamanta llimphuchaskasña canquichej. Cristopi hermanosta tucuy sonkowan munacunayquichejpajmin llimphuchasorkachej. Chayraycu cunanka kancunapura munanacunayquichejpuni tiyan tucuy sonkoyquichejwan. <sup>23</sup> Wiñay causaj Diospa niskannejta watejmanta nacecorkanquichej. Chay nacecuyri mana cay pacha runaj nacecuyñinjinachu. Manachayrí wiñay causaypaj nacecuymin. <sup>24</sup> Palabranpipis nin:

Tucuy runaj causaynenka khorajinallamin.

Tucuy c'achitu caynintaj khora t'icajinalla.

Khoraka ch'aquipun; t'icantaj urmacapun.

<sup>25</sup> Señor Diospa niskanrí wiñaypaj callankapuni, nispa.

Chay niskanka sumaj willanasmin. Kancunamantaj willaraska carka.

**2***Diospa niskanwan causaychej*

<sup>1</sup> Chayraycu sakeychej tucuy llullacuyta, puraj uya cayta, envidiacyuta, runaj contranpi tucuy parlaytawan. Tucuy chay manacajcunata ni ujtawan khawarinayquichejpaj sakepuychej. <sup>2</sup> Imaynatachus recién naceska wawitas lecheta maytapuni munancu, ajinallatataj kancunapis Diospa c'acha niskanta maytapuni munaychej. Ajinapi mosoj causayniyquichejpeka wiñanquichej. <sup>3</sup> Rejserkanquichejña Señorninchéj c'acha caskantaka. Chayraycu niskanta astawan munaychej.

*Causashaj rumimanta*

<sup>4-5</sup> Runaska yupaychana-wasita ruwanancupaj rumista allinta khawaspa ajllancu. Diospis yupaychana-wasita ruwashan. Cay wasi cimientopaj causayta koj Cristota churarka, sumaj caj rumitajina. Runaska payta khesacharkancu. Diospajrí payka may sumajpaj khawaskan ajllacuskantajmin. Chayraycu Cristoman kayllaycuychej paywan ujchaska Diospa yupaychana-wasinpaj rumisjina canayquichejpaj. Chaywanpis yupaychana-wasenka Diosman santo kayllaycuchejcunapajmin. Kancunaka chay kayllaycuchejcuna canquichej tucuy sonkowan Diosman jaywacunayquichejpaj. Chay cheka jaywacuskayquichejka Jesucristonejta Diosta cusichin.

<sup>6</sup> Palabranpi Dioska nin:

Sion llajtaypi wasichana rumitajina [Cristota]\* churani.

Payka wasi cimientopaj ajllaskay may sumajpaj khawaskaymin.

Tucuy paypi jap'icojcuna yachankancu niskasniyta junt'anaytapuni, nispa.

<sup>7</sup> Kancuna paypi jap'icojcunapajka Cristoka may sumajpaj khawaskamin. Mana jap'icojcunapajtaj palabranpi nin: "Wasichajcuna rumita khawaspa khesacharkancu. Wasita sayachinapajrí chay khesachaska rumeka aswan sumajmin. <sup>8</sup> Chay rumeka misc'ana, urmachej rumi cashan. Ajinallataj Cristoka Diospa niskanta mana casucojcunapaj urmachej rumijinamin, mana payta casuskancuraycu.

*Diospa ajllacuskasninmanta*

<sup>9</sup> Kancunarí Diospa ajllacuskasnin canquichej. Camachejininchéj Diosman kayllaycuchejcuna, payman t'akaska ayllun canquichej. Yuyaskanmanjina paypa runasnín canayquichejpaj wajyasorkachej lakha juchamanta paypa sumaj c'anchayninpí causanayquichejpaj. Wajyasorkachejtaj paypa c'acha ruwaskasninta tucuy runasman willaranayquichejpaj. <sup>10</sup> Ñaupajpi mana paypa runasnínchu carkanquichej. Cunanrí Dios ajllacusorkachej runasnín canayquichejpaj. Ñaupajpi mana qhuyacuskasnínchu carkanquichej. Cunanrí Diospa qhuyacuskasnín canquichej.

*Diospa runasnínjina causaychej*

<sup>11</sup> Munacuskasníy, yuyaricuychej cay pachapeka forastero causajcunalla canquichej. Janaj pacha llajtayoj caskayquichejraycu nishayquichej, cay pacha munaycunamanta carunchacunayquichejta. Chay manacaj munaycunaka mosoj causayniyquichejpi kancunawan makanacushancupuni. <sup>12</sup> Cay pacha runas chaupipi causashaspa

\* 2:6 Ninayan.

c'achata causaychej. Kancunaj contrayquichejtapis parlancuman manacaj ruwajcunapis cawajchejjina. Chaywanpis c'acha ruwaskasniyquichejta khawaspa jakay p'unchaypi Diosta jatunchankancu.

<sup>13</sup> Señorninchejraycu runacunaj churaskan tucuy autoridadta casuychej. Curaj camachejtaka curajtajina casuychej. <sup>14</sup> Paypa cachamuska-cunantapis casuychej. Chay cachamuskasnin cancu mana allin cajta ruwajcunata muchuchinancupaj. Allin cajta ruwajcunatataj mentanancupaj cancu. <sup>15</sup> Dioska ajinata casucunayquichejta munan. Chaymanjinataj c'acha ruwanaswan mana yuyayniyoj ch'atajcunata ch'in'yachiyye.

<sup>16</sup> Diosllapaj causanayquichejpaj juchamanta cuchariskas carkan-quichej. Amataj chay cucharicuya sajra munayta ruwanayquichejpa-jchu cachun. Astawanpis cuchariskas caspaka Diosta casuspalla causaychej. <sup>17</sup> Tucuy runasta sumajpaj khawaychej. Cristopi hermanosta munacuychej. Diostaka manchachicuywan sumajpaj khawaychej. Curaj camachejta sumajpaj khawaychej.

*Patroncunamanta camachiskacunamantawan*

<sup>18</sup> Wasipi yanapaj camachicunaka, patronniyquichejta casuychej. Qhuyacuyniyoj c'acha cajcunatapis, mana reparayniyoj sajra cajcunatapis, tucuy patroncunata casuychej. <sup>19</sup> Uj runa Diospa ñaupakenpi causashaskanta yachaspa, muchunman. Mana allin cajta payman runas ruwajtincu ch'inlla muchunman. Sichus ajinata muchun-man chayka, Diosta cusichin. <sup>20</sup> Juchallicuskayquichejraycuchus ñac'arinquichej chayka, mana mentaskachu canquichej. Astawanrí sichus c'acha imasta ruwanquichej ch'illataj muchunquichej chayka, Diosta cusichinquichej. <sup>21</sup> Dioska ajinata causanayquichejpaj wajyasorkachej. Yachanquichej Cristopis kancunapaj muchorka payjina ruwajcuna canayquichejpaj. <sup>22</sup> Payka mana juchallicorkachu nitaj jayc'ajpis llullacorkachu. <sup>23</sup> 3.6 Runas payman sajrata parlashajt-incupis payka mana sajrallatatajchu cutichicorka. Ñac'arishaspapis mana manchachinanpaj parlarkachu. Astawanrí Diosman sakerka chekanta ruwaj† caskanta yachaspa. <sup>24</sup> Pay quiquin chacatanapi wañorka juchasrinchejta khechunawanchejpaj. Payka wañorka juchas-ninchejmanta cuchariskas chekanta ruwaspa causananchejpaj. Paypa ñac'ariyninwantaj thañichiskas canquichej. <sup>25</sup> Ch'ekeraska ovejasjina Diosmanta carunchacorkankanquichej. Cunanrí Cristomanína cutirerkan-quichej. Payka michisojniyquichej khawasojniyquichejtaj.

### 3

*Casaraskacunamanta*

<sup>1</sup> Ajinallatataj kancuna warmis, kosayquichejta casuychej. Chayta ruwaychej Diospa niskanta mana casuyta munaj kosayquichejpis payman pusaskas canancupaj. Ajinapi mana niskasllawan warmincoj causayninta ricuspa ichapis Diosman cutirenkancu.

<sup>2</sup> Ajinapitaj manchachicuywan Diosta yupaychaskayquichejta c'achata causaskayquichejawan khawaspa Diospi japi'cuncuman.

<sup>3</sup> Ama yuyaychejchu jawa ricucojllata c'achachacuytaka. C'achachacuyniyquichejka ama cachunchu ni chujcha c'uyuska ni korowan nitaj sumaj p'achaswanpis. <sup>4</sup> Manachayrí sonkoyquichejta

† 2:23 Literal: juzgaj.

c'achachacuychej. Llamp'u sonkoyoj c'acha warmistaj caychej. Chay mana tucuoj c'achachacuylla Diostaka mayta cusichin.<sup>5</sup> Unay warmispis ajinata c'acha causaywan c'achachacorkancu. Paycunaka Diosman t'akaskas causaywan payllapi confiacorkancu. Kosancutapis casoj cancu.<sup>6</sup> Ajinallatataj Sarapis kosan Abrahamta casorka. Paytaka, tatáy,\* nej. Kancunapis ni imata manchachicuspa c'acha cajtapuni ruwaychej. Ajinata ruwaspaka Saraj wawasnинjina canquichej.

<sup>7</sup> Ajinallatataj kancuna kosas, Diospa yuyayninmanjina warmiyquichejwan causacuychej. Ajinapi Diosmanta mañacuypis mana jarc'askaschu canquichej. Kancuna paycunamanta aswan callpayo caspapis sumajpaj paycunata khawaychej. Paycunapis kancunajinallataj Diospa c'acha yanapaynинnejta wiñay causayman yaycojcuna cancu.

### *Mosoj causaypi yuyaychanas*

<sup>8</sup> Cunanka, tucuy kancuna uj yuyayniyojlla caychej. Llaquiyipi cusiypipis cuscachacuychej. Hermanosjina munanacuychej. Callpachanacuychej. Llamp'u sonkoyojtaj caychej. <sup>9</sup> Ama sajramanta sajrallatatajka ruwaychejchu. Nitaj sajra parlaymanta sajrallatatajka cutichiychejchu. Manachayrí sajrata ruwasojojtyquichej paycunapaj sumaj cajta Diosmanta mañapuychej. Dioska wajyasorkachej ajinata ruwanayquichejpaj. Ajinallatataj payka sumaj cajta kancunaman kosonkachej.<sup>10</sup> Palabranpi nin:

Sumaj causayta munajka allin p'unchaycunata ricuytapis, ama sajra cajta parlachunchu.

Amataj llulla cajtapis parlachunchu.

<sup>11</sup> Sajra cajmanta carunchacuchun, sumaj cajtataj ruwachun.

Runaswan allinpi causayta masc'achun.

Runasta allinyachispapunitaj causacuchun.

<sup>12</sup> Señor Dioska chekan ruwaj runata khawan yanapananpaj.

Chekan ruwajpa mañacuskantapis uyarinpuni.

Astawanri sajra cajta ruwajcunaj contrancupi Dioska churacun.

<sup>13</sup> Ajinata c'acha cajta ruwajtiyquichejka ¿pitaj imanasonkachej?

<sup>14</sup> Astawanpis cheka cajta ruwaskayquichejraycu muchuwajchej chaypis, cusiskas canquichej. Manchachinaswan parlasojojtyquichej ama manchachicuychejchu nitaj llaquicuychejchu.<sup>15</sup> Astawanpis sonkoyquichejpi cheka Señorninchejtajina Cristota yupaychaychej. Kancunaka yachanquichej Dios niskanta junt'ananta. Chayraycu tapusojcunaman willanayquichejpaj waquichiskaspuni caychej. Cutichiskayquichejri misq'i palabraswan llamp'u sonkowan Diosta manchachicuywantaj cachun.<sup>16</sup> Llimphu sonko-yuyawantaj causacuychej. Ajinapi Cristowan ujchaska c'acha causayniyquichejmanta sajrata parlajcunaka p'enkaconcancu chay parlaskancumanta.

<sup>17</sup> Llaquicuncunas kancunapaj canman Diospa munayninmanjina chayka, cusiywan muchuychej. C'acha ruwaskaraycu muchuyka aswan allinpuni sajra ruwaskaraycu muchuymanta niskaka.

### *Cristoj ñac'ariyninmanta*

<sup>18</sup> Cristopis uj cutita juchanchejraycu muchorka. Payka chekan cashaspapis wañorka mana chekan cajcuna ama wañunancupaj. Diosman

\* **3:6** Literal: señorníy.

pusanawanchejpajtaj wañorka. Payka runa cuerponpi wañuchiska carka, espiritunpitaj causarichiska carka.<sup>19</sup> Espiritunpipis wisk'aska espiritusman willaramorka.<sup>20</sup> Unay tiempopi paycunaka Diosta casuya mana munaskancuchu. Diosrí payman cutiricunancuta suyallarka Noé barcojina arcata waquichishanancama. Chay arcamanrí pisi runaslla yaycorkancu. Yacunejtataj chay pusaj runaska Diospa c'ajaj phiñacuyninmanta cuchariskas carkancu.<sup>21</sup> Chay yacoka bautismoyquichejman rijch'acun. Cunanri Jesucristo causarimuyninnejta bautismopi juchamanta cucharichisunquichej. Bautismoka mana jawa ch'ichillatachu pichan. Manachayrí chaynejtá Diospi jap'icuskata llimphu sonko-yuyayniyuquichejta ricuchin.

<sup>22</sup> Jesucristoka angelesta, camachejcunata, atiyniyojcunatapis atiparka. Chaymanta causarimuspa janaj pachaman yaycorka Dioswan cusca camachinanpaj.

## 4

### *Cristojina muchojcuna caychej*

<sup>1</sup> Cristoka cay pacha causaynинpi muchorka. Kancunapis quiquin yuyayllawantaj waquichicuychej. Paywan muchuyninpi ujchacorkanquichej bautismopi. Chaymanjinataj juchata sakeporkanquichejña.<sup>2</sup> Chayraycu cay pachapi causanayquichejcamaka Diospa munayn-inmanjina ruwanayquichej tiyan. Amañataj sajra munaymanjinaka causaychejchu.<sup>3</sup> Ashqha tiempotaña Diosta mana rejsejcunaj munaynincumanjina causarkanquichej. Paycunawan sajra puriycunapi, sajra munaycunapi, machaycunapi, millay fiestacunapi, machanapaj tantacuycunapi carkanquichej. Waj dioscunata millay yupay-chaycunapis causarkanquichej.<sup>4</sup> Cunanri manaña manacaj sajra causaypichu purinquichej mana frenoyoj caballojinaka. Chayraycu paycunaka ni imata kancunamanta yuyayta atispa, sajrata parlancu.<sup>5</sup> Paycunaka ruwaskasnincumanta Diospa ñaupakenpi cuentata konancu tiyan. Dioska juicio p'unchaypaj waquichiskañamin. Chaypachataj causashajcunatapis wañuskacunatapis juchayojochus manachus nenka.<sup>6</sup> Chayraycu wañuskacunaman Dios sumaj willanasta willacherka wiñay causayniyoj canancupaj. Astawanpis chay uyarejcunata cay pacha runas wañunancupajinapis khawarkancu.

### *Kancunapura munanacuychej*

<sup>7</sup> Cunanka tucuy imaj tucucuynin kayllapiña cashan. Chayraycu sumaj yuyawayan tucuy sonkowantaj causacuychej Diosmanta mañacunayquichejpaj.<sup>8</sup> Tucuy imamanta astawanka kancunapura munanacuychej. Munacojka runa-masinpa ashqha pantaskantapis konkapun. Chayraycu tucuy sonkowanpuni munanacuychej.<sup>9</sup> Forastero hermanosta wasiyquichejman wajyaychej ama thutuspalla, manachayrí cusiywan.<sup>10</sup> Dioska c'acha yanapayninmanjina imaymana atiycunata kosorkachej ruwanayquichejpaj. Chaymanjina sapa ujniyquichej yanapanacuychej. Diospa c'acha yanapayninmanta sumaj khawapojcuna canayquichejpaj.<sup>11</sup> Diospa runasnin chaupipi parlajka Diospa niskasninta parlachun. Hermanosta yanapajka Dios callpachaskanmanjina yanapachun. Ajinapi Dioska jatunchaska canka

Jesucristonejta. Paypatamin jatun cayka atiypis wiñaypa wiñayninpaj. Ajina cachun.

### *Cristowan muchuymanta*

<sup>12</sup> Munacuskasníy, llaquiycunanejta Dios ricuchenka paypi jap'icusquichej chekachus manachus caskanta. Chayraycu nina c'ajayjina llaquiycuna riqhurejtenka ama yuyaychejchu manchay t'ucuna caskanta. <sup>13</sup> Astawanpis cusiyucuhej. Chay pisi llaquiyniyquichejwan Cristoj ñac'ariyninpi ujchaskas canquichej. Chaymanjinataj pay atiyninpi cutimojtin mayta cusicunquichej. <sup>14</sup> Cristoja caskayquichejraycu chejnicuspa c'amisojtiyquichejka cusiskas canquichej Diospa Espíritun atiyninwan kancunapi tiyacuskankraycu. <sup>15</sup> Astawanpis sumaj yuyaywan causacuychej. Ajinapeka kancunamanta ni pi muchonkachu runa wañuchijina ni suwajina ni mana allin cajta ruwajjina nitaj runasta ch'ajwachejjinapis. <sup>16</sup> Astawanrí cristiano caskanmanta muchunman chayka, ama p'enkacuchunchu. Manachayrí Cristoja caskanraycu paypa sutinpi Diosta jatunchachun.

<sup>17</sup> Diospa runasninpaj juicio p'unchayka chayamunña. Sichus nokanchejta ñaupajta juzgawasunchej chayka, payta khesachajcunapaj ¿imaynataj cankarí? Paycunaka paypa sumaj willanasninta mana munancuchu jap'icuya. <sup>18</sup> Palabranpipis nin: "Uj chekan ruwajka ñac'ayta juchachaymanta cacharichicushan. Diosta mana casojcuna juchasapas ima may astawan ñac'arichiskas cankancu". <sup>19</sup> Cunanka, kancuna Diospa munayninmanjina muchojcunaka payman jaywacuychej wakaychasunayquichejpaj. Mosoj causayniyquichejta koj Dioska niskanta junt'anpuni. Chayraycu paypi confiacuspa sumaj cajtapuni ruwaychej.

## 5

### *Pastorcunapaj\* yuyaychanas*

<sup>1</sup> Diospa runasnín chaupipi caj pastorcunaman yuyaychayquichej. Nokapis kancunajina pastorrllataj cani. Cristo ñac'ariskanta ñawisniywan ricorkani. Pay atiyninwan uskhayta cutimunanta kancunajinallataj suyashani. <sup>2</sup> Dioska kancunaman atinicuspa runasninta kosorkachej paycunata khawapunayquichejpaj. Runasnenka paypa ovejasnín cancu. Chaymanjina paycunata michiychej, amataj camachiskajinaka manachayrí tucuy sonkowan. Nitaj kolkeraycullaka, manachayrí paycunata michiychej Diosta cusichinayquichejpaj. <sup>3</sup> Dios atinicuspa kosuskan ovejasninta amataj sinch'ita camachiychejchu. Astawanpis c'acha causayniyquichejta paycunaman ricuchiychej. Ajinapi paycunaka c'achata causaonkancu. <sup>4</sup> Cristomin Curaj Michejinchejka. Cutimuspataj sumajta michiskayquichejraycu wiñaypaj jatun-chasonkachej.

### *Tucuy Diospa ajllacuskasninpaj yuyaychanas*

<sup>5</sup> Ajinallatataj kancuna jóvenes, curaj hermanosta casuychej. Tucuñiyquichej llamp'u sonkowan yanapanacuychej. Yachanquichej

---

\* 5: Chayrí ancianocunapaj.

Dioska jatunchacojcunaj contranpi churacun. Llamp'u sonkoyojojcunataj qhuyacuyninwan yanapan. <sup>6</sup> Chayraycu Diospa jatun atiyn-inpi caskayquichejraycu paypa ñaupakenpi llamp'uchacuychej. Ajinapi tiemponepi jatunchasonkachej. <sup>7</sup> Causayniyquichejpeka imasmanta ama chhicata yuyaspa llaquicuychejchu. Astawanpis tucuy imata Diosllaman sakeychej. Chekatapuni payka qhuyacuyninwan kancunamanta mayta yuyashan.

<sup>8</sup> Sumaj yuyaywan causacuychej. Wakaychacuychejtaj contrayquichejpi sayaj supay Satanasmanta. Yarkhaska leonka miqhun nanopaj khaparispa purin. Ajinallatataj Satanaspis kancunata wiñaypaj wañuchinapaj masc'ashasunquichej. <sup>9</sup> Paypa contranpi sinch'ita sayaycucuychej Diospi confiacuspa. Yachanquichej Cristoraycu quiquin ñac'ariycunallapitaj taricuncu tucuynejpi caj hermanosniyquichejpis. <sup>10</sup> Kancunapis pisi tiempopaj ñac'arinayquichej tiyan. Chanta tucuy c'acha yanapayta koj Dios chaymanjinataj waquichisonkachej, sumajta sayachisonkachej, callpachasonkachejtaj. Payka janaj pachanman wajyasorkachej Cristowan ujchaska wiñaypaj causacunayquichejpaj. <sup>11</sup> Payka wiñaypaj tucuy atiyniyojmin. Ajina cachun.

### *Napaycucuna*

<sup>12</sup> Silvanowan pisita kelkachimushayquichej. Payta sumaj hermanopaj khawani. Kelkamushayquichej kancunata callpachanaypaj. Willayquichej cay kelkaskayka Diospa c'acha yanapayninpuni caskanta. Chayraycu chaypi sinch'ita sayaychej.

<sup>13</sup> Babiloniapi caj hermanos kancunata napaycamusunquichej. Paycunapis kancunajina wajyaskacunallataj cancu. Marcoska wawayjinamin; paypis napaycamullasunquichejtaj. <sup>14</sup> Purajmanta c'acha munacuywan napaycunacuychej.

Kancuna tucuy Cristowan ujchaskacunapaj allin causay cachun. Ajina cachun.

## SEGUNDA CARTA DEL APOSTOL SAN PEDRO

<sup>1</sup> Noka, Simón Pedro, Jesucristo camachintaj cachantaj paypi jap'icojcunaman kelkamushayquichej. Kancunapis nokaycu quiquillantataj Diospi jap'icuspa causacunquichej. Diosninchejpis Cacharichejinchej Jesucristopis chekan caspa chay quiquin c'acha causayllatatajmin kowarkanchej. <sup>2</sup> Munani Diospa c'acha yanapaynin tucuy causayniyquichejpi cananta. Ajinapi Diostapis Señorninchej Jesustapis astawan astawan sumajta rejsispa allinta causacunquichej.

*Mosoj causaypi astawan astawan wiñaychej*

<sup>3</sup> Tucuy atiyniyoj Dios tucuyninchejta wajyawarkanchej paywan cusca causacunanchejpaj. Chay sumaj mosoj causaypi payta allinta rejsispa yupaychashanchej. Ajinata causacunanchejpaj qhuyacuyninpi pay atiyta kowarkanchej. <sup>4</sup> May jatun sumaj niskasnintataj junt'awanchej paypa c'acha cayninwan ujchaska cananchejpaj. Chaymanjinataj cay pacha millay tucuchej causaymanta aykechiwarkanchejña. <sup>5</sup> Chayraycu c'uchi caywan tucuy atiskayquichejta Diospi jap'icuspa c'acha caychej. C'acha caspataj Diospa munayniypi yachayniyoj caychej. <sup>6</sup> Yachayniyoj caspataj munayniyquichejta sumajta apaycachaychej. Ajinata apaycachacuspataj llaquiycuna cajtin Diospipuni confiacuychej. Diospi confiacuspataj payta yupaychaspa causacuychej. <sup>7</sup> Ajinata causacuspataj c'acha qhuyacuya hermanosman ricuchiychej. Qhuyacuya ricuchispataj tucuy sonkowan Cristojina munacuychej.

<sup>8</sup> Chayjina causayniyoj caspataj wiñallaychejpuni. Ajinamanta astawan astawan Señorninchej Jesucristota rejsispa Diosta sumajta cusichin-quichej. <sup>9</sup> Mana chayjina causayniyoj runarí ciegojinamin pisillata riconjinataj. Chayrunaka millay juchasnín manta llimphuchaskaña caskanta konkacapun. <sup>10</sup> Chayraycu, hermanosní, tucuy atiskayquichejta Cristomanjina causacuychej. Ajinapi Dios wajyasuskayquichejta ajlla-suskayquichejtapis chekata yachanquichej. Nitaj jayc'ajpis paymanta carunchacunquichejchu. <sup>11</sup> Astawanpis cusiywan yaycunquichej janaj pachaman Cacharichejinchej Señor Jesucristowan. Paytaj jakaypi wiñaypaj camachin.

<sup>12</sup> Chayraycu chay c'acha causaymanta yuyarichiyquichej. Yachani chay causayka cheka caskanta yachaskayquichejta chaypipis sumaj sayaskasña caskayquichejta. Chaywanpis yuyarichishayquichejpuni. <sup>13</sup> Cay pachapi causashanaycamaka yuyayniyquichejta rijch'arichinay tiyan. <sup>14</sup> Nokaka yachani pisimantawan cay pacha causayniya sakepunayta Señorninchej Jesucristo sut'inchawaskanmanjina. <sup>15</sup> Tucuy atiskaytataj ruwasaj wañupojtiy chay c'acha causaymanta ima cajtinpis yuyaricunayquichejpaj.

*Diospa sut'inchaskanta paycunaman willarka*

<sup>16</sup> Señorninchej Jesucristo atiyninmanta cutimuyninmantapis parlaspa mana yachaysapa llulla cuentoswanchu willarkayquichej. Manachayrí payta atiyninpi lliphipishajta ñawisniykuwan ricuskaycuta willarkayquichej. <sup>17</sup> Jatun atiyninwan janaj pachamanta Dios nimorka:

“Caymin c'ata munaska Wawayka. Paywan mayta cusicuni”, nispa. Chaypacha Tatan Dioska Jesusta mayta jatuncharka atiyninwantaj lliphipishajta ruwarka.<sup>18</sup> Janaj pachamanta nimushajtaka nokaycu uyarerkaycu orkopi Jesuswan cashaspa. Chaypi nokaycoka Diospa ñaupakenpi casharkaycu.

<sup>19</sup> Chay ricuskaycuwanka astawan sinch'ita jap'icuyu Diospa unay willajcunanpa willaskancuta. Kancunapis allinta ruwanquichej chay sut'inchaskasnincuta sumajta jap'icuspa, lakhayaypi c'anchayjina caskanraycu. Imaynachus pisimanta pisimanta sut'iyamun, ajinata kancunapis astawan astawan sut'ita sonkoyquichejpi Cristomanta reparanquichej.<sup>20</sup> Cayta ñaupajta yachaychej: Diospa palabrantaka ni pipis yuyayninmanjinallaka sut'inchanchu.<sup>21</sup> Dioska ni mayken palabrallantapis runaj munayninmanjinaka sut'inchawarkanchejchu. Manachayrí runaska Santo Espirituwan junt'a caspalla Diospa yuyayninta parlarkancu.

## 2

### *Llulla yachachejcuna jamonkancu*

<sup>1</sup> Diospa runasnin uqhupi unaypis llulla willajcuna riqhurerkancu. Ajinallataj kancuna uqhupipis llulla yachachejcuna riqhurenkancu. Paycunaka urmachej yachachinasta pacayllamanta apaycamonkancu. Chay yachachinawan khesachankancu juchancuraycu wañoj Señortapis. Chaywantaj paycuna quiyuincu uskhayta wiñay wañuyman pusanaconkancu.<sup>2</sup> Kancunamanta ashqhas paycunaj millay causaynincuta khatenkancu. Millay causaynincuraycutaj cheka willanaspajpis runas sajrata rimankancu.<sup>3</sup> Chay pantachejcunaka allinnincuta masc'aspalla llulla parlaynincuwan kolkeyquichejta orkhosonkachej. Paycunaj juchachaynincoka unaymantapacha waquichiskañamin. Wiñay wañuymanpis renkancupuni.

### *Dioska mana casojcunata juchachan*

<sup>4</sup> Yachanchej Dioska angeesta juchallicuskancuta mana perdonarkachu. Manachayrí manchay yana lakha ughu pachaman paycunata wijch'orka juicio p'unchaycama wisk'aska canancupaj.<sup>5</sup> Nillataj perdonarkachu unay runastapis. Chaypacha cay pachapi caj sajra runasta yacu parawan tucucherka. Chekan causaymanta willaraj Noella kanchis runaswan yacupi mana wañorkancuchu.<sup>6</sup> Khepatataj Sodoma Gomorra llajtaspi tiyacoj runasta ninawan ushphayachispas Dios juchacharka. Chaytaka tucuy jamoj mana casucojcunapaj uj ricuchinatajina ruwarka.<sup>7-8</sup> Chay llajtaspi tiyacojcunaka millay causayllapipuni carkancu mana frenoyojina. Ajinata causaspa chekanta causaj Lot sutichaskata sinch'ita llaquicherkerkancu. Payka paycuna uqhupi tiyacupsa sapa p'unchay chay sajra ruwaskasnincuta ricorka. Ricupsa uyarispaka chekan sonkonpi mayta ñiac'arerka. Diosrí Lotman aykecunanta nerka manaraj chay runas ushphayashajtincu.<sup>9</sup> Señorninchejka yachan payta yupaychaspasca causajcunata llaquiyimanta orkhoyta. Yachantaj sajra ruwajcunata ñiac'arichiyya juicio p'unchaypaj.<sup>10</sup> Astawanka juchachanka millay munaymanjina causajcunata. Chay pantachejcuna tucuy autoridadtapis manacajpaj khawancu.

### *Llulla yachachejcunaj sajra ruwaynincumanta*

Mana manchachicuynijoj nitaj p'enkayniyoj, munaynillancuta ruwajcuna cancu. Janaj pachapi atiyniyojcunapajpis mana manchachicuspa sajrata parlancu.<sup>11</sup> Ni angelespis Diospa ñaupakenpi chay atiyniyojcunaj contranpi ch'ataspa sajrataka parlancuchu. Angeleska astawan callpayoj atiyniyoj cancupis chay llulla yachachejcunamanta niskaka.<sup>12</sup> Imaynachus mana yuyayniyoj animaleska aychallapaj wañuchinapajtaj cancu, ajinallataj chay llulla yachachejcunapis cancu. Paycunaka mana yachaskancu imasmanta sajrallata parlancu. Chayraycu animalesjina tucuchiskas cankancu.<sup>13</sup> Paycunaka sajrata ruwaskancumanjina sajra cajta jap'enkancu. P'unchaynintin millay ruwaycunallawan cusicuncu. Kancuna uqhupeka sarna onkoymen rijch'acuncu. Tantacuyniyquichejpi miqhushaspa llut'asuskayquichejmanta mayta cusicuncu.<sup>14</sup> Ñawisnincuwan warmista khenchachacunallapajpuni khawancu. Nitaj juchallicuywan sajsayta atincuchu. Pisi yachachiska cajcunata juchaman urmachincu. Sonkoncupi khenchachacuya munayman yachaska cancu. Diospa khesachaskasnin cancu.<sup>15</sup> Diospa cheka ñanninta sakepuspa pantarkancu. Imaynachus Beorpa wawan Balaam juchallicorka, ajinallatataj paycunapis juchallicorkancu. Balaamka mana chekan ruwaskallanmanta kolketa lluq'ichicuya anchata munarka.<sup>16</sup> Paypa juchanmanta reparachinanpaj Dios mana parlaj burrotapis runa parlaypi parlaricherka. Ajinapi chay sut'inchaj Balaamtaka mana yuyayniyoj ruwayninta jarc'arka.

<sup>17</sup> Chay llulla yachachejcunamanta ni ima allin jamunchu ch'aqui pujuysjina caskancuraycu. Muyoj wayrawan apaycachaska phuyusjinataj cancu. Paycunapaj manchay yana lakha uqhu pacha waquichiskaña cashan.<sup>18</sup> Jatushej yankha parlaycunawan cunallanraj Diospi jap'icojcunata engañaspa millay causayman apancu. Chay mosoj jap'icojcunaka cay pacha pantaypi causaymanta cunallanraj aykecushancu.<sup>19</sup> Llulla yachachejcunaka paycunata nincu: "Munayniyquichejmanjina causanayquichejpaj libres canquichej", nispa. Paycuna quiquirincu wataskajina millay munaynincuta casuncu. Imaraycuchus atipachicoj runaka atipajninta casunpuni.<sup>20</sup> Chay mosoj jap'icojcunaka Señorninchej Cacharichejninchey Jesucristota rejserkancu. Ajinapi cay pacha millay causaymanta aykecorkancu. Sichus ujtawan chay quiquin millay causaywan ch'ampaycucuncu chayka, atipachicuncu. Ajinata atipachicuspaka astawan sajraman tucuncu ñaupaj caskanmanta niskaka.<sup>21</sup> Aswan allin canman ni jayc'aj chekan ñanta rejsiy, chayta rejsispaña sakepuymanta niskaka. Paycunaka Diosmanta santa camachiskata jap'ispaña sakeporkancu.<sup>22</sup> Cay rejsiska cheka parlayka paycunapi junt'acun: "Alkoka lanzaskanta cuticun; mayllaska qhucheka t'urupi sunt'iskanman cutiycun.

### 3

#### *Señorninchejpa cutimuyninmanta*

<sup>1</sup> Munaska hermanosní, caywan iscay caj cutitaña kelkamuyquichej. Cay kelkaskaswan llimphu yuyayniyquichejta rijch'arichiyya munani caycunata yuyaricunayquichejpaj.<sup>2</sup> Sumajta yuyaricuychej Diospa unay willajcunanpa niskasnincuta, ajinallataj Señorninchej

Cacharichejinchejpa niskantapis. Niskantaka paypa cachasnin kancunaman willasorkachej.

<sup>3</sup> Cayta ñaupajta yachanayquichej tiyan: Khepa p'unchaycunapeka asipayajcuna riqhurimonkancu. Paycunaka sajra munaynincumanjina causajcuna cancu. <sup>4</sup> Asipayaspataj taponkancu: "Jesucristo niskanmanjina cutimuskan ¿maytajrí? Tatasninchepis wañupuncuña. Chaywanpis imaynachus cay pacha ruwacusanmantapacha carka, quiquillan tucuy imaspis cacushan", nispa. <sup>5</sup> Caytarí konkapuya munancu: Unayña cielota Dioska niskallanwan ruwarka. Cay pachatapis yacumanta yacoj chaupintataj niskallanwan riqhuricherka. <sup>6</sup> Chay yacuwantaj uj tiempo caj pachata tucucherka. <sup>7</sup> Cunan tiempo cielowan cay pachawanpis quiquin niskallanwantaj ninapi tucuchiska canka. Juicio p'unchaypaj jallch'aska cashan. Chay p'unchaypitaj Dioska mana casoj runastaka wiñaypaj wañurachenka.

<sup>8</sup> Munaska hermanosníy, cayta ama konkapuychejchu: Señorninchejpaj uj p'unchayka waranka watawan ninacun, waranka watataj uj p'unchaywan ninacun. <sup>9</sup> Waquenka Señorninchej khepacuskanta yuyancu. Astawanrí Señorninchejka niskasninta junt'aypi ni jayc'aj khepacunchu. Manachayrí Dios qhuyacuyninwan kancunata suyashasunquichej. Nitaj munanchu ni pi chincapunanta. Astawanpis tucuy runas juchasnincuta sakespa payman cutiricapananca munan.

<sup>10</sup> Imaynatachá suwaka mana yuyaska horapi jamun, ajinallatataj Señorninchejpis jamonka. Chay p'unchaypi cielopis manchayta t'oijy spa chincaponka. Cielopi caj imaspis ninawan tucuconcancu. Cay pachapis chaypi ruwaska cajcunapis k'alata tucuconcancu.

<sup>11</sup> Tucuy chay imas ajinata tucuchiskas canancuta yachaspaka ¿imayna runastaj canayquichej tiyanrí? Diosman t'akaskas causacunayquichej tiyan payta yupaychaspataj. <sup>12</sup> Chaywanpis Diospa p'unchaynin chaya-munanta mayta suyaspas mayta munaspataj causacunayquichej tiyan. Chay p'unchaypi cieloka ninawan tucuchiska canka. Chaypi caj imaspis ruphaycuspa unuyaponkancu. <sup>13</sup> Astawanpis nokanchej mosoj cielota mosoj jallp'atawan suyashanchej. Chaytaka Diospa niskanmanjina cusiywan suyashanchej. Chay mosoj cajpeka Diospa munayninanjinajina chekanta causacunallaña canka.

### *C'acha causaywan suyashaychej*

<sup>14</sup> Munaska hermanosníy, chay sumaj imasta suyashanquichej. Chayraycu tucuy atiskayquichejta ruwaychej Diospa ñaupakenpi munayninanjinajina allillanta causacunayquichejtaka. Mana pantayniyoj nitaj imapi juchachanapaj caychej. <sup>15</sup> Señorninchej qhuyacuyninwan suyasuskayquichejmanta cusicuychej. Payka chaymanjina wiñaypaj cacharichishasunquichej. Munaska hermanonchej, Pablopis, chaytamin kelkamusorkachej payman sumaj yachay koska caskanmanjina. <sup>16</sup> Ajinallatataj tucuynin kelkaskasninpipis cay yachachinasmana parlan. Waquin kelkaskasnintaj ñiac'ayta entiendecun. Chaycunata pisi yachachiskacuna manaraj Diospi allinta jap'icojcunawan wajjinaman k'ewincu. Ajinallatataj paycunaka tucuynin Diospa palabrantapis wajjinaman k'ewincu. Chaymanjinari wiñay wañuy paycunapaj canka.

### *Khepa caj yuyaychanas*

<sup>17</sup> Chayraycu munaska hermanosníy, ñaupajtaña yachaspaka sumajta khawacuychej. Pajtataj Diosta mana casojcunaj llulla yachachinasnincuwan pantachiskas cawajchej. Pajtataj sinch'i sayacuyniyquichejmanta urmashawajchej. <sup>18</sup> Astawanpis Señorninchej Cacharichejninchej Jesucristoka c'acha causayta kosorkachej. Chay causayniyquichejpi sumajta wiñaychej astawan astawan payta rejsispa munayninta ruwanayquichejpaj. Payka cunanpis wiñaypajpis jatunchaska cachun. Ajina cachun.

## PRIMERA CARTA DEL APOSTOL SAN JUAN

### *Jesucristomin Causayka*

<sup>1</sup> Kelkamushayquichej Diospa Niskan sutichaskamanta. Dios nerka payta cachamunanta wiñay causay koja. Niskantaj causashajpuni manaraj ni ima cashajtinpis. Nokaycu paypa cachasintaj payta uyarerkaycu. Ñawisniyucuwantaj payta khawaspa sumajta ricorkaycu. Cuerpontapis maquisniyucawan llanqharerkaycu. <sup>2</sup> Jesucristomin Causayka. Paynejta wiñay causayka ricuchicorka cay pachapi. Paytataj ricorkaycu. Paymanta parlaspa kancunaman willaycu chay wiñay causaymanta. Pay Dios Tatanchejwanpuni wiñaypaj tiyacun. Nokaycumampis payka ricuchicuwarkaycu. <sup>3</sup> Ricuskaycuta uyariskaycutawan kancunaman willashaycu nokaycuwan ujchaska uj yuyaylla causacunayquichejpaj. Chekamanta tucuy nokanchej uj yuyaylla canchej Dioswan paypa Wawan Jesucristowan. <sup>4</sup> Ajinaka cayta kelkamushayquichej tucuy sonko cusiskas canayquichejpaj.

### *Dioswan uj yuyaylla causacunchej*

<sup>5</sup> Cay sumaj willanasta Jesucristo willawarkaycu. Paymanta uyariskaycutataj kancunaman willashaycu. Dioska may c'achapuni may llimphutaj.\* Paypiri mana jucha† canchu. <sup>6</sup> Nokanchej Dioswan uj yuyaylla cashaskanchepta ninchej. Manataj cheka cajtachu ruwashanchej chayka, llullacunchej lakhayajpijina purispa. <sup>7</sup> Cristori Diospa palabranta casushanpuni. Nokanchej Cristojina ruwasunman chayka, tucuy nokanchej paypi ujchaska uj yuyaylla causacunchej. Chaywanpis Diospa Wawan, Jesucristo nokanchejraycu wañorka. Chay wañupuwaskanchejraycullataj llimphuchaskas cashanchej tucuy imaymana juchamanta.

### *Dios juchasninchemanta llimphuchawasunchej*

<sup>8</sup> Mana juchallicuskanchepta nisunman chayka, pantacunchej. Nitaj Diospa cheka niskan sonkonchejpi tiyacunchu. <sup>9</sup> Juchasninchemanta Diosman sut'ita willacusunman chayrí, juchasninchemanta khechuspa konkapun payman allinyaskas cananchejpaj. Imaraycuchus payka chekan, niskantataj junt'ajpunimin. Tucuy sajra cayninchemanta mana allin ruwaskasninchemantapis llimphuchawashanchej. <sup>10</sup> Mana juchallicuskanchepta nisunman chayka, uj llullatajina Diosta khawanchej. Ajinata nispaka paypa niskanta mana chekamantachu sonkonchejpi jap'inchej.

## 2

### *Jesucristoka nokanchejman sayacuwajninchej*

<sup>1</sup> Cristopi munaska wawasný, caycunata kelkamushayquichej ama ni imapi juchallicunayquichejpaj. Wajjinamantarí pipis juchallicumán chayka, Yuyaychawajninchej Jesucristo tiyan Dios Tatanchejwan cusca. Payllamin cheka cajka, nokanchejman sayacuwajninchej.

\* 1:5    † 1:5 lakha.

<sup>2</sup> Juchasninchejraycu wañunanchejtataj Jesús wañupu warkanchejña. Manataj juchasnillanchejpajchu carka, manachayrí tucuy runaspa juchasnincupajpis.

<sup>3</sup> Camachiskasninta casunchej chayka, paywan ujchaska caskanchejta yachanchej. <sup>4</sup> "Paywan ujchaska cani", nej, manataj paypa niskanmanjina causanpunichu chayka, chay runaka uj llulla runa. Diospa cheka niskantari mana jap'inchu. <sup>5</sup> Niskanta casojrí chekata pundi Diostaka astawan astawan raj sumajta munacun. Ajinapi atinchej yachayta Jesucristowan ujchaska caskancheja. <sup>6</sup> Picharí paywan ujchaska cashaskanta nin chayka, imaynata pay causarka cay pachapi, ajinal-lata taj causanan tiyan.

### *Mosoj camachiska*

<sup>7</sup> Munacuskasníy, cay purajmanta munanacunanchejta kelka-mushaskayka mana mosojchu. Manachayrí ñaupajmantapacha Jesucristo cay camachiskataka churarkaña. Cay palabratari jap'erkanquichejtaj ñaupajmantapacha uyarispa. <sup>8</sup> Wajjinamantarí camachiskaka mosoj cashan mosoj causayta causashaskayquichejraycu. Cristoka chay munacuya camachiskamanjina causan. Kancunapis ajinallatataj causanquichej. Arí, cayka yachacun Dioswan churanacoj cajcunaka chincapushaskancuraycu. Imaynatachá c'anchay lakhayajta chincarichin ajinata. Cristoj cheka palabrantaj willaraska caspa uj c'anchayjina c'anchaycun runaj sonkonman. <sup>9</sup> "Noka c'anchaypi causashani Diospa palabrantia casuspa", nej, Cristopi hermanonta chejnintaj chayka, cunancama juchallicushan. Lakhayajllapiraj causashan. <sup>10</sup> Hermanonta munacojrí Cristoj camachiskanta casunpuni. Sumaj sonkowan causantaj ni pita juchaman urmachinanpaj. <sup>11</sup> Hermanonta chejnicorí lakhayajpajina causaspa juchallicushanraj. Cristoj niskantaj sonkonman mana c'anchaycunrajchu. Pay mana reparanchu maymanchus rishaskanta. Uj ciego runajinataj mana atinchu reparayta lakhayajllapiraj causashaskanraycu.

<sup>12</sup> Jesucristopi munaska wawasníy, pay juchasniyquichejmanta llim-phuchasuskayquichejraycu kelkamushayquichej. <sup>13</sup> Tatacuna, kelka-mushayquichej Jesucristota rejsiskayquichejraycu. Payka wiñaypaj cau-sanpuni manaraj ni ima cashajtinpis. Jóvenes, kelkamushayquichej sajra cajta atipaskayquichejraycu.

Wawacuna, kelkamushayquichej Tata Diosninchejta rejsiskayquichejraycu. <sup>14</sup> Tatacuna, kelkamushayquichej Jesucristota rejsiskayquichejraycu. Payka causanpuni manaraj ni ima cashajtinpis. Waynacuna, kelkamushayquichej Cristopi callpayo caskayquichejraycu. Diospa niskantaj sonkosniyquichejpi atiywan ruwanpuni. Sajra cajtapis atiparkanquichej.

<sup>15</sup> Cay pachapi sajra cajcunata ama munacuychejchu nitaj sajra ruway munaycunatapis. Cay pachapi sajra cajcunata munacojka Dios Tata mana munacunchu. <sup>16</sup> Cay pachapi tucuy sajra cajta munayka sajra cajta ruwaywanka manapuni Tata Diosninchejmantachu. Manachayrí supay Satanasmantamin. Chaycunataj cancu: runaj sajra munaynín, sajra cajta ricuspá munapayay, capuyniyoj caskanmanta manacajta jatunchacuypis. <sup>17</sup> Cay pachapitaj Diospa contranpi cajwan sajra munaynincuwan chincapushancuña. Diospa munayninta ruwajrí wiñaypaj causan.

*Cristoj contranpi churacoj*

<sup>18</sup> Munaska wawasný, cay p'unchaycunaka Jesucristo cutimunanpaj khepa caj p'unchaycunamin cashancu. Paypa contranpi churanacojin jamushaskanta uyarerkanquichejña. Arí, cunan Cristoj contranpi churanacojcuna ashqhas riqhurimuncuña. Ajinapi yachanchej cay p'unchaycunaka khepa caj p'unchaycunaña caskancuta. <sup>19</sup> Chay churanacojcuna Cristopi jap'icojcuna chaupinchejmanta llojserkancu paypi mana chekata jap'icuskancuraycu. Cristopi chekatapuni jap'icuncuman carka chayka, nokanchejwan cusca cacuncuman carka. Astawanrí llojsiskancu sut'ita ricuchin tantacuyninchejpi mana tucuychu Cristopi chekata jap'icuskancuta.

<sup>20</sup> Astawanpis, Dioska sonkosniyquichejman Espiritunta churasorkachej. Tucuy kancunataj yachanquichej Diospa cheka palabranta. <sup>21</sup> Kelkamuyquichej kancunaman cheka cajta yachaskayquichejraycu manataj cheka cajmanta kancunaman willanaypajchu. Yachanquichejtaj llullaka manapuni cheka cajmantachu caskanta.

<sup>22</sup> Chanta ɔpitaj curaj llullacojka? Pichá nin Jesuska mana Diospa Wawan nitaj paypa ajllaskanchu caskanta. Chay llullacojka Cristo contranpi churanacojin. Pay khesachan Dios Tatata Wawan Jesucristotawan. <sup>23</sup> Pichari nin Jesuska mana Diospa ajllaskanchu caskanta chayka, manapuni Dios Tatawan ujchaskachu cashan. Pitajchus sut'ita willan Jesucristo Diospa Wawan caskanta chayka, Dios Tatawan ujchaska cashan.

*Cristowan ujchaska causacuychej*

<sup>24</sup> Chayraycu kancuna, Diospa palabranta ñaupajmantapacha uyariskayquichejta sonkojquichejpi wakaychaychej. Ajina cajtenka kancuna Diospa Wawanwan Dios Tatawan ujchaska uj sonkolla causacunquichej. <sup>25</sup> Caytataj Jesucristo palabranpi sumajta niwarkanchej: "Wiñay causayta koskayquichej".

<sup>26</sup> Chayta kelkamuyquichej reparanayquichejpaj kancunata pantachiyya munajcunamanta.

<sup>27</sup> Dios churarka Santo Espirituta kancunaj sonkosniyquichejman kancunapi tiyacunanpaj. Ajinapitaj yachachejka mana pisisunquichejchu, imaraycuchus Espiritulla kancunaman yachachin tucuy imamanta. Espíritoj yachachiskanka chekapunimin manataj llullachu. Yachachiskas caskayquichejmanjinataj Jesucristowan ujchaska causacuychej.

*Diospa cheka wawasni*

<sup>28</sup> Caskanmanjina, Cristopi munaska wawasný, paywan ujchaskapuni causacuychej. Ajinapitaj cutimojtin mana manchachicusunchejchu nitaj p'enkacusunchejchu. <sup>29</sup> Jesucristo chekan caskanta yachanquichejña. Yachallanquichejtaj pichá chekantapuni ruwajka Diospa cheka wawan caskanta.

**3**

<sup>1</sup> Reparaychej may t'ucuna munacuywan Tatanchej Dios munacuwaskanchejta. Ajinapi paypa wawasnín sutichaskas canchej. Chekatapunitaj paypa wawasnín canchej. Jesucristopi mana jap'icojcunari nokanchejta mana Diospa wawasninpajchu

rejsiwanchej, Cristota mana rejsiskancuraycu. <sup>2</sup> Munacuskasníy, cunanka Diospa wawasnin canchej. Manataj yachanchejrajchu imaynachus khepata casunchej tucuy chaytaka. Astawanpis Jesucristo riqhurimojtinrí payjina cananchejta yachanchej. Imaraycuchus pay quiquinta ricusunchej payjinallataj casunchej. <sup>3</sup> Jesucristopí tucuy jap'icojcunaka Diospaj llimphuchacushancu Jesusjina cayta suyaspa. Juchamanta t'akacushancutaj tucuy sonkowan Jesucristojina may llimphu causayniyoj cayta munaspa.

<sup>4</sup> Juchallicushanpuni, chay runarí Diospa camachiskanta mana casunchu. Imaraycuchus Diospa camachiskanta mana casuyka juchamin. <sup>5</sup> Yachanquichejtaj Jesucristo janaj pachamanta jamuskanta juchasnincheta llimphuchananpaj. Paytaj ni jayc'aj juchallicorkachu. <sup>6</sup> Paywan ujchaska causacojka manaña juchapajchu causan. Juchallishanpuni, chay runarí sonkonpi Jesucristota mana jap'inchu. Nitaj payta rejsinchu. <sup>7</sup> Munaska wawasníy, ama sakeychejchu ni pipis pantachisunayquichejta. Chekanta ruwajka chekan runamin, Cristo chekan caskanjina. <sup>8</sup> Juchallishanpuni, chay runarí supay Satanasmantamin. Chay supayka kallariymantapacha juchallillanpuni. Diospa Wawan Cristorí jamorka chay supaypa ruwaskanta t'unaraspa tucuchinanpaj.

<sup>9</sup> Mosoj causayman yaycuspa Diospa cheka wawanka manaña juchapajchu causan. Imaraycuchus paypa palabran sonkonpi cashan. Ajinaka mana juchallicunchu, Dios paypa sonkonpi tiyacuskanraycu. <sup>10</sup> Atinchej sut'ita rejsiyta Diospata cajcunata supay Satanaspata cajcunatapis. Yachanchej chekan cajta mana ruwajka mana Diospatachu caskanta. Cristopí hermanonta mana munacojpis nillataj Diospatachu cashan.

### *Purajmanta munanacunanchej*

<sup>11</sup> Chekatapuni purajmanta munanacunanchej, cay willanataka ñaupajmantapacha uyarerkanquichejña. <sup>12</sup> Carka uj runa, Caín sutiyoy. Supay Satanasmanta caspa hermanonta sinch'i phiñacuywan wañucherka. ¿Imaraycutaj hermanonta wañucherkarí? Sajrata ruwaskanraycu, hermanontaj chekanta ruwaskanraycu payta wañucherka. Manapuni payjinaka cananchejchu.

<sup>13</sup> Hermanosníy, ama t'ucuychejchu cay pacha runas chejnisojtiyquichejka. <sup>14</sup> Cristopí hermanosta munacuskanchejraycu nokanchejka yachanchej mosoj causayman yaycuskanchejta. Ñaupajpi wañuskajina causarkanchej. Imaraycuchus Diospajka hermanonta mana munacojka uj wañuskajina causan. <sup>15</sup> Hermanonta chejnicojka runa wañuchimin. Yachanquichejtaj runa wañuchejka manapuni wiñay causayniyojchu caskanta. <sup>16</sup> Cristo nokanchejraycu wañuskannejta rejsinchej cheka munacuytaka. Ajinata nokanchejpis hermanosninchejraycu wañunanchejpaj waquichiskas cananchej tiyan. <sup>17</sup> Cay pachapi causanampaj capuyniyojrí hermanonpa pisichuskanta ricuspa mana qhuyacunmanchu chayka, Diosta manapuni chekata munacunchu. <sup>18</sup> Munaska wawasníy, chekata munacunanchej allin cajta ruwaspa. Manataj simillawanchu ninanchej munacuskanchejtaka.

### *Tucuy sonkowan Diospajap'icunanchej*

19 Ajinata munacuskanchejraycutaj yachanchej Diospa cheka wawasnin caskanchepta. Diosmanta mañacuspataj tucuy sonkonchejwan paypi jap'icunchej. 20 Sonkonchejpi yuyayninchej nokanchepta juchachacojtinpis reparana Dios aswan curaj caskanta yuyayninchejmantaka. Tucuy imatataj yachan. 21 Munacuskasný, sonkonchej mana juchachawanchejchu chayka, atinchej tucuy sonkowan mana manchachicuspa Dioswan parlacuya. 22 Paymantataj tucuy mañacuskanchepta jap'inchej camachiwaskanchepta casuskanchejraycu payta cusichinanchejpaj ruwaspa. 23 Dioska camachiwanchej sumajta jap'icunanchepta Jesucristo paypa ajllaska Wawan caskanta. Nokanchejpurataj munanacunanchej tiyan camachiwaskanchejmajina. 24 Diospa camachiwaskanchepta casuspataj paypi causacunchej, paytaj nokanchejpi. Santo Espiritunta sonkonchejman churaskannepta yachanchej pay nokanchejpi tiyacuskanta.

## 4

*¿Cay willanaska cheka Diosmantachu chayrí llulla willajcunaman-tachu?*

<sup>1</sup> Munacuskasný, amaña mayken willajcunapipis jap'icushaychejchu. Manachayrí paycunata sumajtaraj tapuspa sut'inchachicuychej yachanayquichejpaj cheka Diosmantachus manachus caskancuta. Arí, ashqha llulla willajcuna runasman cachamuscas llojsimorkancu.

<sup>2</sup> Kancunari cayjinamanta atinquichej rejsiyta Santo Espirituwan ujchaska cajcunata. Pichari Jesucristo runaman tucuskanta sut'ita willajka Dios Espirituwan ujchaskamin. <sup>3</sup> Jesucristo runaman tucuskanta khesachajka manamin Diosmantachu. Manachayrí Cristoj contranpi churanacoj cashan. Uyarerkanquichej churanacojka jamushaskanta, cunantaj cay pachapiña cashan.

<sup>4</sup> Wawitasný, kancunaka Diospa cheka wawasnin canquichej. Llulla willajcunataj atiparkanquichej Santo Espíritu sonkosniyquichejpi tiyacuskancutaj. Kancunapi tiyacoj Dios aswan atiyniyojmin cay pachapi cajmantaka. <sup>5</sup> Chay llulla willajcunaka Jesucristota khesachancu paypi mana jap'icuskancutaj. Parlaskancutaj mana Diosmantachu. Chayraycu Cristopi mana jap'icojcuna paycunata munancu uyariyta. <sup>6</sup> Nokaycu Jesucristoj cachasninrí Diosmantapuni caycu. Diosta rejsejtaj nokaycuta uyarispas casuwayaycu. Diosta mana rejsejri mana casuwaycuchu. Chayjinapi atinchej rejsiyta Santo Espíritoj cheka cajnincunata pantachej supayniyojcunatapis.

*Dios munacuy caskanraycu purajmanta munanacunanchej*

<sup>7</sup> Munacuskasný, cheka munacuyka Diosllamantamin cashan. Chayraycu nokanchejka purajmanta munanacunanchejpuni Diospa munacuyninwan. Cheka munacuynijoj cajka Diospa cheka wawan cashan, paytataj rejsin. <sup>8</sup> Mana munacojrí Diosta mana rejsinchu imaraycuchus cheka munacuyka Diosllamantamin. <sup>9</sup> Dios c'ata Wawanta cay pachaman cachamorka Paynejta wiñay causayniyoj cananchejpaj. Ajinapi yachanchej pay munacuwaskanchejta. <sup>10</sup> Cheka munacuyka Dios ñiaupajta munacuwaskanchejmin. Manataj nokanchej Diosta munacunchejjinallachu cashan. Wawan Jesucristota cachamorka nokanchej juchasapasraycu ñac'arispa wañunapaj.

Jesucristo wañunanchejta wañupuwaskanchejraycu Dios nokanchejwan manaña phiñaskachu. Ajinapi payman allinyachiskasña canchej.

<sup>11</sup> Munacuskasníy, Dios maytapuni munacuwaskanchejraycu nokanchejpis munanacunallanchejta tiyan. <sup>12</sup> Ni pipis ni jayc'aj Diosta ricorkachu. Purajmanta munanacojinchejrí quiquin Dios sonkosninchejpi tiyacun. Pay yanapawanchej astawan astawanraj munanacunanchejta cheka munacuyninwan junt'askas cananchejcama. <sup>13</sup> Dios sonkonchejman Santo Espirituta cachamorka tiyacunapaj. Chaynejta yachanchej nokanchej paywan ujchaska caskanchejta, paytaj nokanchejwan. <sup>14</sup> Chaywanpis nokaycu Cristo cachasnín payta ricorkaycu. Willaycutaj Dios Tataka paypa Wawanta cachamuskanta tucuy runaspaj juchamanta Cacharichej cananpaj. <sup>15</sup> Jesús Diospa Wawan caskanta sut'ita willaj, chay runapeka Dios tiyacushan. Paytaj Dioswan ujchaska cashan.

<sup>16</sup> Diosta rejsiskanchejraycu chekamanta yachanchej Dios munacuwashaskanchejta. Dioska munacuymín. Chekata munacojka Dioswan ujchaska cashan. Diostaj chay runaj sonkonpi tiyacun. <sup>17</sup> Dioswan ujchaska caskanchejraycu astawan astawanraj chekata munacunchej. Ajinaka mana manchachicusunchejchu Cristo jamojtin tucuyman juchasnincumanjina cutichej, chay p'unchaypipis. Imaraycuchus imaynachus Cristoka cay pachapi Diospa munaska Wawanmin, ajinallataj nokanchejpis cay pachapi Diospa munaska wawasnín canchej. Chayraycu mana manchachicunchejchu. <sup>18</sup> Sonkonchej Diospa munacuyninwan junt'a cajtenka manaña manchachicunchejchu. Diospa cheka munacuyninwan junt'aska cajka manchachicuya atipan. Runa juchalliskanraycu manchachicun ñac'arinanta. Manchachicojpa sonkonka Diospa munacuyninwan manaraj junt'askachu.

<sup>19</sup> Dios ñaupajta munacuwaskanchejraycu nokanchejka munacunchej. <sup>20</sup> "Diosta munacuni", nejka hermanontataj chejnín chayka, llullamin. Hermanonta mana munacojka manapuni atinchu Diosta munacuya. Imaraycuchus hermanonta ricunpuni. Diostarí mana ñawiswan ricuy atinchu. <sup>21</sup> Cristori camachiwarkanchej Diosta munacojka hermanon-tapis munacunanta.

## 5

### *Cristopi jap'icojka sajra cajta atipan*

<sup>1</sup> Dios ajllarka Jesusta camachinanpaj. Chayta tucuy jap'icojcunaka Diospa cheka wawasnínmin. Dios Tatata tucuy munacojcunaka Diospa wawasnintapis munacun. <sup>2</sup> Diosta munacuspa camachiwaskanchejtataj casuspa yachanchej paypa wawasninta munacuskanchejta. <sup>3</sup> Paypa camachiskanta ruwaskanchejwan Diosta munacuskanchejta atinchej ricuchiyyta. Camachiskasnintaj mana ancha sinch'ichu cancu ruwananchejpaj. <sup>4</sup> Imaraycuchus Diospa cheka wawasnenka cay pachaj sajra cajninta atipancu. Jesucristo Diospa Wawan caskanta jap'icuspá juchata atipanchej. <sup>5</sup> Arí, Jesús Diospa Wawan caskanta jap'icojlla sajra cajta atipan.

### *Diospa Wawanmanta willajcuna*

<sup>6</sup> Jesucristoka jamorka Diosmanta munayninta ruwananpaj yacunejta yawarnejtawan. Santo Espiritutaj chay imasmanta sut'ita willan cheka caj caskanraycu. <sup>7</sup> Imaraycuchus janaj pachapi quinsa willancu: Tatawan, Niskanwan, Santo Espirituwan. Chay quinsantincoka ujllamin. <sup>8</sup> Cay pachapi quinsa willajcuna callancutaj: Santo Espírituwan, yacuwan, yawarwan. Quinsantincutaj uj quiquillanta willancu. <sup>9</sup> Runaspa willaskancuta uyarispa jap'inchej. Diospa willaskanrí aswan curajmin cashan pay quiquin willaskanraycu. Paytaj sut'ita willan Jesucristo Wawan caskanta. <sup>10</sup> Jesucristopi jap'icojka yachan sonkonpi pay Diospa Wawan caskanta. Imaraycuchus jap'icojpa sonkonpi Dios chayta reparachin. Diospi mana jap'icojrí payta llullatajina khawan Wawan Jesucristomanta Diospa willaskanta mana jap'icusanraycu. <sup>11</sup> Dios willan wiñay causayta kowaskanchejta paypi jap'icojcunaman. Cay causaytaj Wawan Jesucristomanta jamun. <sup>12</sup> Diospa Wawanwan ujchaska cajka wiñay causayniyojmin. Diospa Wawanwan mana ujchaska cajrí manallataj wiñay causayniyojchu.

*Yachanayquichej wiñay causayniyoj caskayquichejta*

<sup>13</sup> Kancuna, Diospa Wawan Cristopi jap'icojcunaman cayta kelkamuyquichej. Munani chekatapuni yachanayquichejta cunan wiñay causayniyojña caskayquichejta.

*Yuyaychanas*

<sup>14</sup> Arí, mana manchachicuspa Diosman atinchej kayllaycuya. Imallatapis munayninmanjina mañacojtinchay pay munacuywan uyariwanchej. <sup>15</sup> Yachanchej mañacuskanchejta Dios uyariwaskanchejta. Ajinapi yachalanchejtaj paymanta mañacuskanchejta jap'iskanchejtapis.

<sup>16</sup> Uj hermanota juchallishajta ricuwajchej chayka, Diosmanta mañapuychej. Diosta mana casuspa paypuni juchallejka wañuyman wijch'uska canka. Noka mana niyquichejchu chay juchallejpajka mañapanayquichejta. Mana paypuni juchallejrí Diosmanta mañapuskayquichejraycu causayta atin jap'iyta. <sup>17</sup> Diospa cheka wawasnin mana allin cajta ruwaspa juchallicuncu. Juchanta sakespa Diospi jap'icojka mana wañuyman wijch'uskachu canka.

<sup>18</sup> Yachanchej Diospa wawasnenka manaña juchapajchu causashaskancuta. Diospa Wawan, Cristorí payta wakaychan. Ajinapi supay Satanaska mana imananchu Diospa wawanta.

<sup>19</sup> Yachanchej Jesucristopi tucuy jap'icojcuna Diospa cheka wawasnin caskanchejta. Cay pachapi tucuy waj runasrí chay supaypa camachisnin cancu.

<sup>20</sup> Yachanchejtaj Jesucristo, Diospa Wawanka, Tatana munayninta ruwananpaj cay pachaman jamuskanta. Chaywanpis kowarkanchej yuyayta astawan astawanraj rejsinanchejpaj cheka cajta. Nokanchejka uj sonkolla causacunchej chay cheka caj Dioswan, Wawan Jesucristonejta. Payka cheka Diospunimin. Paynejtataj wiñay causayniyoj canchej.

<sup>21</sup> Munaska wawasný, tucuy sonkowan Diosta munacuychej. Waj dioscunata manapuni yupaychaychejchu [nitaj chaycunapi yuyallaychejpischu].\* Ajina cachun.

---

\* 5:21 Ninayan.

## SEGUNDA CARTA DEL APOSTOL SAN JUAN

<sup>1</sup> Kelkamuyquichej kancuna Cristopi ajllaska tantacojcunaman. Nokataj sapa ujniyquichejta Cristopi chekata munacuyquichej. Manataj nokallachu manachayrí cheka caj Jesucristota tucuy rejsejcunapis munacusunquichej. <sup>2</sup> Chay cheka caj Jesucristoraycutaj munacuyquichej. Payka sonkosminchejpi tiyacun. Wiñaypajtaj nokanchejwan ujchaska canka. <sup>3</sup> Ajinata causananchej tiyan munacuywan, Diospa cheka niskanta casuspa. Chaynejtataj Dios Tatanchejka Wawan Jesucristowan may sumajta yanapawanchej, quhuyawanchej, tucuy runaswantaj allillanta causachiwanchej.

<sup>4</sup> Mayta cusicuni waquin kancunamanta Tatanchej Diospa cheka camachiskanmanjina causacushaskayquichejta yachaspa. <sup>5</sup> Cunanka, hermanosníy, mayta nishayquichej munanacunanchejta purajmanta yanapanacuspa. Cay camachiskaka mana mosojchu. Nokanchej ñaupajtaña jap'erkanchej Jesuspi jap'icuspa chaymantaka kelkamuyquichej yuyarichisunallaypaj. <sup>6</sup> Diospa camachiskanta casunchej chayka, chekata munanacunchej. Chay camachiskaka purajmanta munanacunanchejta ñaupajpi uyariskayquiquichejmanjina cashan.

### *Pantachejcunamanta*

<sup>7</sup> Chayta nini ashqha pantachejcuna cay pachaman riqhurimuskan-curaycu. Chay pantachejcunaka khesachancu Jesucristo cay pachaman jamuskanta. Chay pantachejka Jesucristoj contranpi churanacojnintaj. <sup>8</sup> Khawacuychej sumaj willanaspi kancunawan ruwaskaycuta ama chincachinayquichejpaj. Astawanpis wakaychacuychej tucuy allin ruwaskasniyquichejmanjina jap'inayquichejpaj.

<sup>9</sup> Waquin runaska mana yachachincchu Cristoj yachachiyinta, llulacuspataj chayman yapancuraj. Paycunapeka Dios mana tiyacunchu. Cristoj yachachiskanta casojpirí Dios Tata tiyacun, Wawan Jesucristopis. <sup>10</sup> Uj yachachej kancunaman jamojtin Cristomanta mana chekatachu yachachin chayka, ama wajyacuychejchu wasisniyquichejman. Nitaj "walejta jamunqui" niychejchu. <sup>11</sup> Imaraycuchus napaycojka chay pantachej runaj yanapajnín canman "walejta jamunqui" niskanraycu.

<sup>12</sup> Ashqha imasraj kancunaman ninay cashan. Cunan mana munanichu astawan kelkamuya. Imaraycuchus suyani kancunata watucuya uyapura parlananchejpaj sonkonchejtaj cusiy junt'aska cananpaj.

<sup>13</sup> Dios ajllarka Cristopi tucuy jap'icojcunata. Paycunamanta caypi tiyacojcuna kancunaman napaycamusunquichej. Ajina cachun.

## TERCERA CARTA DEL APOSTOL SAN JUAN

<sup>1</sup> Munaska hermano Gayo, chekatapuni munacuspa kelkamuyqui, amigoyqui, Cristoj cachan.

<sup>2</sup> Munaska hermanóy, Diosmanta mañacuni kanta allilan risunanpaj tucuy imapi allillanpis caricushanayquipaj. Yachani causayniyqui Cristowan allin caskanta. <sup>3</sup> Mayta cusicorkanitaj Cristopi jap'icojcuna chayamojtincu. Willawarkancu Diospa cheka niskasninta ca-sushaskayquita camachiwaskanchejmanjina causashaskayquitawan.

<sup>4</sup> Tucuy imamanta astawanka cusicuni uyarispa Cristopi wawasniy cheka niskanmanjinapuni causashaskancuta.

<sup>5</sup> Munaska hermanóy, allinta ruwanqui forastero hermanostapis yanapaspa. <sup>6</sup> Tantaska hermanosman\* willarkancu munacuywan paycunata yanapaskayquimanta. Diospaj llanc'ajcuna caskancuraycu yanapariy ruwanayquimanjina, paycunata allin rinanpaj. <sup>7</sup> Jesucristomanta willaranancupaj llojserkancu. Chaywanpis waj llajtayojcunamantaka manapuni imatapis causanancupaj jap'ejchu cancu. <sup>8</sup> Chayraycu chayjina runastaka yanaparinanchej paycunawan cusca Diospa cheka niskanpi llanc'aj-masis cananchejpaj.

<sup>9</sup> Cristopi caj tantaska hermanosman cay imasmanta kelkarkani. Diotrefesrí paycuna uqhupi curaj cayta maytapuni munan. Nokay-coj niskaycutataj mana casunchu. <sup>10</sup> Chayraycu jamuspa tantaska hermanosman sut'inchasaj paypa ruwashaskanmanta. Payka sajra imastapuni nokaycumanta parlashan contraycupi llullacuspá. Ni chayllachu. Wasinman mana wajyarkachu watucoj hermanosta. Chaywanpis wajyacuya munaj hermanosta jarc'ashan ama wajyanancupaj. Tantacuynincumantataj watucoj hermanosta kharkon.

<sup>11</sup> Munaska hermanóy, sajrata ruwajcunajinaka ama ruwaychu. Manachayrí chekan ruwajcunajinapuni ruway. Chekan cajta ruwajka Diospa cheka wawanmin. Sajra cajta ruwajrí ni imatapis yachanchu Diosmanta.

<sup>12</sup> Tucuy runas Demetriomanta sumajta parlancu chekan cajta ruwashakanraycu. Chekatapuni ajinata ruwashan. Nokaycupis paymanta sumajta parlaycu ajinata chekanta ruwashaskanraycu. Yachanquitaj willaskaycoka chekapuni caskanta.

<sup>13</sup> Ashqha imasraj cashan kanman nisunay. Mana munanichu chayta kelkamusuya, <sup>14</sup> pisi p'unchaymanta uyapura parlanancheja suyashaskayraycu.

<sup>15</sup> Allillanpi cacuy Dioswan runaswanpis. Caypi tiyacoj hermanos napaycamusuncu. Kanri jakaypi caj munaska hermanosnинchejta sapa ujta napaycapuway.

---

\* **1:6** Literal: iglesia.

## LA CARTA DEL APOSTOL SAN JUDAS

<sup>1</sup> Noka, Jacoboj wauken Judas, tucuy sonkoywan Jesucristoj camachin cani. Kelkamushayquichej Dios Tataj wajyaska runasninan. Payka munacuyninpi wajyasorkachej paywan ujchaska causacunayquichejpaj. Chaymanjinataj Jesucristoka kancunata wiñaypaj wakaychacusunquichej. <sup>2</sup> Diospa qhuyacuynin, munacuyninpis astawan astawan kancunawan cachun allillanpi causacunayquichejpaj.

### *Llulla yachachejcunamanta*

<sup>3</sup> Munaska hermanosný, wiñay causaypaj Diospi jap'icoj-masisniy canquichej. Chay wiñay causay yachachinasmanta mayta kancunaman kelkamuyta munasharkani. Astawanrí uj imamanta kancunata yuyaychanay aticun. Chekatapuni Cristowan ujchaska runasninan wiñay causaypaj yachachinasta uj cutillata Dios kowarkanchej. Chayraycu kelkamushayquichej chay yachachinasta sinch'ita wakaychanayquichejta. <sup>4</sup> Yachani waquin runaska pacayllamanta kancuna uqhuman yaycumuskancuta. Paycuna juchachaska canancutari unaymantapachaña Dioska sut'incharka, sajra runas caskancuraycu. Diosninchejka c'acha causayta kowarkanchej. Chaytapis paycunaka millay causayman tucuchincu, atiyniyoj Señorninchej Jesucristotapis khe sachancu. Chayraycu kancunata yuyaychanayka aticunpuni.

### *Dios unay mana casojcunata juchachaskanmanta*

<sup>5</sup> Tucuy cayta yacharkanquichejña. Chayraycu kancunata yuyarichiyya munani. Señorninchejka tucuy israel runasninta Egipto jallp'amanta cacharichimorka. Paypi mana jap'icoj runasnintataj khepata wañuracherka. <sup>6</sup> Angelcunatapis Dios juchacharka. Paycunaka atiyniyoj churaska caspa waquenka Diosta mana casuspa chay atiyya mana wakaycharkancchu. Janaj pachapi tiyacunancutapis sakeporkancu. Diostaj paycunataka wataskata manchay yana lakha uqhu pachaman wisk'aycorka jatun juicio p'unchaycama. <sup>7</sup> Chaywanpis yuyarichiyya quichej Sodomamanta, Gomorramanta, muyuyninpi llajtasmanta ima. Chay llajtaspi tiyacojcunaka khenchachacuspa millayta causaspapis tiyacorkancu. Paycunari ni jayc'aj wañoj ninapi ñac'arishancu. Chayka ricuchiwanchej mana casojcunata Dios juchachananta.

### *Llulla yachachejcuna sajrata parlajcuna cancu*

<sup>8</sup> Dios juchasapasta tucuchinanta yachashaspapis chay llulla yachachejcunaka juchallicushancupuni. Paycunaka musphaynincopj pusaskan millayta causancu. Tucuy autoridad cajtapis khesachancu. Janaj pachapi atiyniyojcunapajpis sajrata parlancu. <sup>9</sup> Ni arcangel Miguelpis supay Satanaspas contranpi sajrata parlajka churacorkachu. Manachayrí Moisespa cuerponmanta Satanawan churanacushaspaka, "Dios c'amisuchun", nillarka. <sup>10</sup> Chay llulla yachachejcunaka tucuy mana yachaskancumantapis sajrallata parlancu. Astawanpis mana yuyayniyoj animalesjina aychancoj rejsiskallanta reparancu. Chayjina yuyaytaj wiñay wañuyman paycunata pusashan.

<sup>11</sup> ¡Phutiy, ari, paycunapajka! Cainjina envidiawan chejnicojcunaman tucuporkancu. Balaamjinataj kolke munayllawan pantachicorkancu. Unay runa Corejinapis Diospa contranpi jataricuspa juchachaskas cancu. <sup>12</sup> Munacuywan miqhunayquichejpaj tantacojtiyquichej chay llulla yachachejcunaka kancunawan cuscachacuncu. Kancuna uqhupi miqhushaspataj sarna onkoymen rijch'acuncu. Diospa runasninta michejcunapaj khawaska cayta munancu. Mana manchachicuyniyoj paycuna quiquillancutataj michicuncu. Paycunaka cancu wayraj apaycachaskan mana yacuyojo phuyusjina. Pokoy tiempopí mana pokoyniyoj sach'ajjina, iscay cutis wañuska, saphisnintin t'iraskajinataj. <sup>13</sup> Ni ima camachiskaman sujetacojcuna cancu. Mana p'enkyawan jatunchacuncu, simincu phosoko canancama parlaspa.\* Llulla yachachinancuwan runa pusajcuna cayta munancu. Ajinapi c'anchayjina khawachicuya munancu. Astawanrí manchay yana lakha uqhu pacha waquichiskaña cashan paycuna chaypi wiñaypaj canancupaj.

<sup>14</sup> Chaywanpis Adammanta kanchis caj runa Enoc sut'incharka: "Señorninchejka waranka waranka santo cajcunanwan cutimonka. <sup>15</sup> Cutimuspa tucuy sajra runasta juchachanka. Paycunaka sajra caynincipi juchallicorkancu. Chay juchasapa sajra runaska millay cajta Señorpa contranpi rimarkancu. Tucuy chay imasmanta paycunata Señorninchejka juchachanka", nispa. <sup>16</sup> Paycunaka thuthojcuna, ni imawan contentacojcuna cancu. Sajra munaynincumanjina causajcuna cancu. Jatunchacucunata parlancu. Allinnillancupaj runasta llunc'upayancu.

### *Hermanosta yuyaychan*

<sup>17</sup> Munaska hermanosníy, kancunari Señorninchej Jesucristo ñaupajpi niskanta sumajta yuyaricuychej. Chay niskantaka paypa cachasni sut'inchasorkachej. <sup>18</sup> Sut'inchaspa nisorkachej: "Khepa p'unchaycunapeka Diosmanta cajta manacajpaj khawaspa asipayajcuna riqhurimonkancu. Paycunaka sajra munaynincumanjina causankancu". <sup>19</sup> Chay pantachejcunaka hermanosta t'akajcuna cancu. Aychallancumanta reparancu. Manataj Santo Espíritojo pusaskanchu cancu.

<sup>20</sup> Kancunari, munaska hermanosníy, wiñay causaypaj c'acha yachachinaswan sumajta wiñaychej. Santo Espirituwan pusaskapuni Diosmanta mañiacuychej. <sup>21</sup> Diospa munacuyninwanpunitaj wakaychacuychej. Señorninchej Jesucristo cutimojtín wiñaypaj paywan cusca causacunquichej qhuyacuyninraycu. Chayta cusiywan suyaychej.

<sup>22</sup> Llulla yachachejcunamanta iscayrayashajcunata sumajta reparachiyychej. <sup>23</sup> Waquintaka wiñay wañuyman pusaj pantaymanta orkhoychej. Waquinri llulla yachachinaswan pantachiskasña cancu. Paycunatataj qhuyacuychej manchachicuspapuni. Pajtataj chay millay causaywan chimpachicushawajchej. Tucuynin millay causaynincuta chejniskayquichejta paycunaman ricuchiyychej.

### *Judas Diosta yupaychan*

<sup>24</sup> Diosmin atiyniyojka juchamanta kancunata wakaychananpajka. May cusiywantaj paypa lliphipej ñaupakenman ni imamanta c'aminata

---

\* <sup>1:13</sup> Literal: ashqha yacu locoyaspa pullchimun.

pusasonkachej. 25 Cacharichiwajnjchej c'ata Dioska Señorninchej Je-sucristonejta yupaychaska, jatunchaska cachun. Atiywantaj tucuya camachichun wiñaypaj. Kallariypi carka, ajinallataj cunanpis tucuy wiñaynintinpajpis. Ajina cachun.

## APOCALIPSIS O REVELACION A SAN JUAN

### *Dios pacaska cajta Juanman ricuchin*

<sup>1</sup> Dioska yuyaskan Jesucristopi junt'acuskanta ricuchiyyta munarka. Chay yuyaskantaj uskhayta junt'acunan tiyan. Ajinapi Jesucristota nerka, camachisninman sut'inchacunanta. Chayraycu Jesucristoka angelninta cachamorka camachin Juanman Diospa niskanta sut'inchananpaj. <sup>2</sup> Ajinapi Juanka Diospa niskan sut'inchacuskanta ricuspa chekanta kelkarka. Jesucristopis chay niskan cheka caskanta willallarkataj.

<sup>3</sup> Yuyaskanpa junt'acunan tiempoka ñapis chayamonkaña. Chayraycu cay sut'inchaska kelkaskata leejcuna, cayta uyarispataj casojcunapis may cusiskas cankancu.

### *Juan kelkan Diospa ajllacuskasninman*

<sup>4</sup> Juanka Asia jallp'api caj Diospa ajllacuskasnin kanchis iglesiasman kelkan. Dios Tatamanta, Santo Espiritumanta, Jesucristomanta c'acha yanapaynin kancunawan cachun allillanpi causacunayquichejpaj. Dios Tataka cashanpuni, carkapuni, wiñaypajpunitaj canka. Santo Espiritoka Diospa ñupakenmanta\* tucuy niskasninta junt'anpunimin.

<sup>5</sup> Jesucristopis cheka willajmin. Payka wañuymanta ñupajta causarimojmin, cay pacha tucuy camachejcunaj Camachejnincutaj. Payka nokanchejta munacuwanchejpuni. Yawarninta jich'aspataj wañuyninwan juchasninchejmanta llimphuchawarkanchej. <sup>6</sup> Ajinapi Jesucristoka nokanchejta uj llajtata† ruwawarkanchej Dios Tatanman kayllaycuchejcuna cananchejpaj. Payka jatunchaska cachun. Wiñaypa wiñayninpajtaj atiywan ruwachun. Ajina cachun.

<sup>7</sup> Payka phuyus chaupipi jamushan. Tucuy runacunataj payta ri-conkancu, payta ñac'arichejcunapis. Tucuy cay pachapi ayllucunaka payta ricuspa phutiyywan wakankancu. Ajinata nerka, ajinataj cachun.

<sup>8</sup> Tucuy atiyniyoj Señor Dioska nin: "Noka cani kallarejka, nokataj tucuchaj cani,"‡ nispa. Payka cashanpuni, carkapuni, wiñaypajpunitaj canka.

### *Juan Jesucristota ricun*

<sup>9</sup> Noka, Juan, hermanoyquichej cani. Kancunawan ujchaska llaquicunata muchuni. Jesucristo tucuya camachinancama paypi jap'icoj-masiyquichejpis cani. Diospa niskanta Jesucristomanta willaraskayraycu Patmos niska jallp'api casharkani. [Chay jallp'aka yacuwan muyuyuskamin.]§ <sup>10</sup> Domingo p'unchaypi Santo Espiritoka atiyninman churawarka jamoj imasta sut'inchawanapaj. Ajinapi uj cornetaj wakaynintajina uj khaparejta wasaypi uyarerkani. <sup>11</sup> Niwarka:

—Uj libropi kelkay imatachá ricunqui, chayta. Chaytataj Asia jallp'api caj Diospa ajllacuskasnin kanchis iglesiasman apachiy. Paycunaka kanchis llajtaspi: Efeso, Esmirna, Pérgamo, Tiatira, Sardis, Filadelfia, Laodicea llajtaspi cancu, —nispa.

\* **1:4** Literal: kanchis Espiritusmanta. † **1:6** Literal: reino. ‡ **1:8** Literal: alfa omegawan.

§ **1:9** Ninayan.

<sup>12</sup>Uyarispa cutirerkani parlawajta ricunaypaj. Cutirispataj korimanta kanchis c'anchanasta ricorkani. <sup>13</sup>Chay c'anchanas chaupipitaj runaman rijch'acoja ricorkani. Payka khoysu p'achawan p'achalliska carka. Sonkon chekanpitaj kori chumpiwan chumpiska carka. <sup>14</sup>Umantaj yuraj rit'i millmajina carka. Ñawisnintaj ninajina laurashaj carka. <sup>15</sup>Chaquisnintaj bronzejina ninapi ruphashajman rijch'acorka. Parlaskantataj jatun phajchajina sinch'ita uyarerkan. <sup>16</sup>Payka paña maquinpi kanchis ch'ascasta jap'isharka. Siminmantataj t'ujsina espada llojsimusharka. Puraj filoyoj afilaska carka. Uyantaj c'anchasharka, sinch'ita c'anchaj intijina.

<sup>17</sup>Payta ricuspataj chaquisninman wañuskajina urmarkani. Payrí paña maquinta nokaman churaycuwaspa niwarka:

—Amaña manchachicuychu. Nokamin ñaupaj caj cani, nokataj khepa caj cani. <sup>18</sup>Causaj caj cani. Wañuska carkani, cunantaj wiñaypa wiñayniinpaj causaj cani. Wañuyniywan juchata khechuskayraycu nokalla wañuytawan infiernotawan atiparkani.\* [Atipaskayraycutaj wiñay causayta konaypaj atiyniyoj cani.]† <sup>19</sup>Chayraycu ricuskayquita kelkay, cunan cajcunatapis, khepanta jamushancuña, chaycunatapis. <sup>20</sup>Kanchis ch'ascasta paña maquiypi ricorkanqui. Kanchis kori c'anchanastapis ricorkanqui. Chay kanchis ch'ascaska chay kanchis iglesiaspa willajcunancu cancu. Chay korimanta kanchis c'anchanastaj Diospa ajllacuskasnin cancu, chay kanchis iglesias, —nerka chay parlamuajka.

## 2

### *Efesopi cajcunaman Cristojo willaynin*

<sup>1</sup>Parlawajtaj nillawarka:

—Efesopi iglesia tantacojcunaj willajnincuman kelkay: Noka chay kanchis ch'ascasta paña maquiipi jap'ini, willajcunay caskancuraycu. Noka chay korimanta kanchis c'anchanas chaupipi purejka nishayqui: <sup>2</sup>Yachani causayniyquita, llanc'ayniyquitapis, Diospi jap'icuspa muchuuniyquitawanpis. Yachanitaj sajra runasmantapis carunchacoj caskayquita. Waquenka Cristojo cachasnin sutichacuncu mana caspalla. Chaycunatapis chekachus manachus caskancuta repararkanquipuni. Ajinapi paycuna llulla caskancutapis tariparkanqui. <sup>3</sup>Llaquichiska caspa Diossipuni confiacunqui. Nokajta caskayquiraycu muchorkanqui manataj sayc'ucorkanquichu. Chay tucuya kanmanta yachani.

<sup>4</sup>Astawanri caymanta contrayquipi cashani: Ñaupajpi imaynachus munacoj caskayquita sakeporkanqui. <sup>5</sup>Chayraycu yuyaricuy chay munacuyta sakepuspa juchaman urmaskayquita. Imaynachus ñaupajpi munacuywan causacoj canqui, ajinatapuni causacuy. Manachayka kanman jamuspa c'anchanayquita churananmanta orkhosaj. Sichus mana cutirinqui ñaupaj munacuuniyquiman chayka, khesachaskayqui.

<sup>6</sup>Astawanpis Nicolaitacunaj ruwaskasnincuta chejnispaka sumajta ruwashanqui. Nokapis chay llulla yachachejcunaj ruwaskasnincutaka chejnillanitaj. <sup>7</sup>Diospa ajllacuskasninman Santo Espíritu nishaskanta ningriyoj cajka sumajta uyarichun. Juchata atipajmanka causayta koj

\* **1:18** Literal: Wañuypa, uqhu pacha llavesninta jap'ini. † **1:18** Ninayan.

sach'amanta miqhuchisaj. Chay sach'aka janaj pachapi Diospa c'acha huertanpi\* cashan.

*Esmirnapi cajcunaman Cristoј willaynin*

<sup>8</sup> 'Esmirnapi iglesia tantacojcunaj willajnincuman kelkay: Noka ñaupaj caj khepa cajtaj, wañuskamanta causarimoj cajtaj nishayqui: <sup>9</sup> Yachani kanmanta llaquiyniyquitapis pisichicuyniquitapis. Astawanpis wiñay capuyniyoj canqui. Yachanitaj waquin israelcunaj sajrata parlaskancuta. Paycunaka, "Israeltuna caycu", nicuncu. Manataj cheka israelcunachu cancu. Manachayrí supay Satanaspá tantacuna-wasinmanta cancu. <sup>10</sup> Pisimantawan muchunayqui tiyan. Caymanta ama manchachicuychu. Kancunamanta waquinta Satanaska carcelman wisk'asonkachej. Chaywan Dioska paypi sumajta jap'icusayquichejta yachanka. Chunca p'unchaycunata llaquiyuncunata muchunquichej. Wañunayquicama Diospi jap'icuy. Chaymanjinataj jatunchaskayqui nokawan cusca cusiywan causacunayquipaj. <sup>11</sup> Diospa ajllacuskasninman Santo Espíritu nishaskanta ningriyoj cajka sumajta uyarichun. Causayninpi juchata atipajtaka iscay caj wañuy mana imanankachu.

*Pergamopi cajcunaman Cristoј willaynin*

<sup>12</sup> 'Pergamopi iglesia tantacojcunaj willajnincuman kelkay: Noka puraj filoyoj t'ujsina espadayoјka nishayqui: <sup>13</sup> Yachani sajra runas chaupipi tiyacushaskayquita supay Satanás camachishan, chaypi. Chaywanpis nokapi jap'icusallapuni causashanqui. Antipas causasharka, chay p'unchaycunapipis nokaj willanasniyta runaspa ñaupakencupi mana khesacharkanquichu. Antipaska wañuynincama nokamanta willacorka. Paytaka kancuna chaupipi wañucherkan, Satanás tiyacushan, chaypi. <sup>14</sup> Astawanrí cay imasmanta contrayquipi cashani: Kancuna uqhipi waquinta Balaampa sajra yachachiyninta khatejta sakeshanqui. Balaamka yachacherka camachej Balacta israelcunata juchaman urmachiyta. Ajinapi israelcunaka ruwaska dioscunaman jaywaskata miqhorkancu khenchachacorkancupis. <sup>15</sup> Ajinallataj waquinta Nicolaitacunaj sajra yachachiynincta khatejta sakeshanqui. <sup>16</sup> Chayraycu chay juchasta sakespa nokaman cutirimuy. Mana nokaman cutirimuwaj chayka, uskhayta kanman jamusaj. Sajra yachachiyyta khatejcnawantaj makanacusaj simiymantia llojsimoj t'ujsina espadaywan. <sup>17</sup> Diospa ajllacuskasninman Santo Espíritu nishaskanta ningriyoj cajka sumajta uyarichun. Causayninpi juchata atipajmanka pacaska janaj pacha t'antata kosaj. Payman kollasajtaj uj yuraj rumicituta. Chay rumicitupitaj mosoj suti kelkaska canka. Chay sutitaka ni pi yachanchu, manachayrí chay jap'ejlla yachan.

*Tiatirapi cajcunaman Cristoј willaynin*

<sup>18</sup> 'Tiatirapi iglesia tantacojcunaj willajnincuman kelkay: Noka Diospa Wawan caj, ninajina laurashaj ñawisniyoj caj, ruphashaj broncejina chaquisniyoj cajtaj nishayqui: <sup>19</sup> Yachani imaynatachus causacushaskayquita. Munacuywan, Diospi jap'icuywan, runa yanapaywan, llaquiyuncunata muchuywan causacushanqui. Yachanitaj ñaupajmanta niskaka cunan astawan sumajtaraj ruwashaskayquita. <sup>20</sup> Astawanrí caymanta contrayquipi

\* 2:7 Literal: paraíso.

cashani: Chay Jezabel warmita mana jarc'aspas kancuna uqhuman yaycumunanta sakeshallanqui. Chay warmeka, "Diospa willajnin cani", nispa, pantaskata yachachishan. Nokaj ajllacuskasniytataj pusashan khenchachacuymán, ruwaska dioscunaman jaywaskata miqhuymawan.<sup>21</sup> Nokarí unayta suyarkani chay warmi juchasninta sakespa nokaman cutiricamunanta. Payrí khenchachacuyninta mana sakeyta munanchu.<sup>22</sup> Chayraycu payta onkoywan llaquichisaj. Khenchachacojmasinntapis quiquillantataj sinch'ita ñac'arichisaj, sichus sajra ruwaskasnincuta mana sakencumanchu chayka.<sup>23</sup> Chay warmej yachachiyninta casojcunata wañuywan tucuchisaj. Ajinapi tucuy ajllacuskasniyka yachankancu, runaj pacaska yuyayninta sonkontapis sut'ita noka khawaj caskayta. Yachankancutaj sapa ujniyquichejman ruwaskayquichejmanjina kosunayquichejeta.<sup>24</sup> Tiatira hermanos uqhupi kancunamanta waquinrí chay sajra yachachiyninta mana jap'ishanquichejchu. Supay Satanaspa pacaska imasnintapis mana yacharkanquichejchu. Kancunamantaj mana waj ruwanaswan llasachiskayquichejchu.<sup>25</sup> Astawanrí nerkyayquichej chayllata sumajta jap'icuychej jamunaycama.<sup>26</sup> Chayraycu juchata atipaychej nokatataj casuwaychejpuni. Tucucuycama ajinata causajmanka llajtasta camachinanpaj atiyta kosaj.<sup>27</sup> 3.7 Paytaj sinch'i atiywan<sup>†</sup> Diosta mana casoj llajtasta camachenka. T'uru mancajinataj t'unaskas cankancu.<sup>28</sup> Nokamanpis Tatay atiyta kowarka ajinata camachinapaj. Atipajmantaj c'acha c'anchayniyta kosaj sut'iyay ch'ascatajina.<sup>29</sup> Diospa ajllacuskasninman Santo Espíritu nishaskanta ningriyoj cajka uyarihun,—nerka chay parlamuwajka.

### 3

#### *Sardispi cajcunaman Cristojo willaynin*

<sup>1</sup> Nillawarkataj:

—Sardispi iglesia tantacojcunaj willajnincuman kelkay: Noka tucuya junt'aj Santo Espirituyoj\* caj, kanchis ch'ascasta jap'ejtaj nishayqui: Ruwaskasniyquita sumajta yachani. Runaslla causashaskayquita nincu, astawanpis wañuska cashanqui.<sup>2</sup> ¡Ríjch'aricuy! Waquin ruwaskasniyqui chincanayashan, chayta callpachay. Ruwaskasniyquitaka Diospa ñaupakenpi manamin ruwanayquimanjina ruwaskatachu khawani.<sup>3</sup> Chayraycu yuyaricuy imaynatachus cheka yachachinasta uyarispa jap'icuskayquita, chaymanjinataj causacuy. Nokamantaj cutirimuy. Manachus rijch'arinqui chayka, mana yuyaskayqui ratupi suwajina jamusaj juchachasunapaj.<sup>4</sup> Chaywanpis Sardis hermanos uqhupeka ch'ichichaj juchawan mana ch'ichichacojcuna cashancuraj. Paycunaka llimphuchaskas nokawan cusca causankancu chaypajjina caskancuraycu.<sup>5</sup> Juchata atipajka llimphu causaywan p'achalliconka p'achawanjina. Wiñay causayniyojcunaj sutisnincu kelkana libromantapis paypa sutintaka ni jayc'aj pichasajchu. Astawanpis Tatay Diospa ñaupakenpi angelesninpa ñaupakencupipis cheka runapaj paytaka rejscusaj.<sup>6</sup> Diospa ajllacuskasninman Santo Espíritu nishaskanta ningriyoj cajka sumajta uyarihun.

#### *Filadelfiapi cajcunaman Cristojo willaynin*

† 2:27 Literal: fierro varawan. \* 3:1 Literal: kanchis Espíritus.

<sup>7</sup> 'Filadelfiapi iglesia tantacojcunaj willajnincuman kelkay: Noka cani cheka caj, Diospa ajllaskan caj.<sup>†</sup> [Imaynatachus Davidka llajtanpa llaventa jap'erka, ajinallatataj nokapis Diospa mosoj llajtanpa]<sup>‡</sup> llaventa jap'iniña. Quichariskayman yaycojtaka ni pi jarc'ayta atinchu. Wisk'askaymantaj ni pi yaycuya atinchu. Nishayquitaj:  
<sup>8</sup> Yachani causayniyquita. Chayraycu Diosman kayllaycunayquipaj uj puncutajina quichariporkayqui. Chaytaka ni pi wisk'ayta atinchu. Yachanitaj pisi callpayoj caskayquiwanpis niskayta casuskayquita. Nokajta caskayquitapis willacorkanquipuni ni jayc'aj mananchacuspa.  
<sup>9</sup> Yachani supay Satanaspa tantacuna-wasinmanta cajcunamantaka. Paycunaka, "Israelecuna caycu", nicuncu. Manataj cheka israelcunachu cancu. Manachayrí llullas cancu. Chayraycu noka paycunata jamuchisaj ñaupakeyquipi konkoricunancupaj. Chaywan paycunata reparachisaj noka kanta munacususkayta. <sup>10</sup> Niskaymanjina Diospi jap'icuspa muchorkanqui. Chayraycu nokapis manchay ñac'ariy p'unchaycunamanta jarc'askayqui. Chay ñac'ariy p'unchaycunaka tucuy cay pachapi canka. Chaywantaj tucuy cay pachapi caj runaspa sonkcuta yachasaj. <sup>11</sup> Uskhayta jamusaj. Chayraycu nisuskayta casullaypuni atipaskayquimanta jap'inayquita<sup>§</sup> ama chincachinayquipaj. <sup>12</sup> Juchata atipajtaka Tatay Diospa yupaychanawasinpí mana cuyoj cacunanpaj churasaj. Paytaj ni jayc'aj llojsenkachu. Tatay Diospa sutintataj paypi kelkasaj. Mosoj Jerusalén llajtayoj caskantapis kelkasaj. Chay janaj pachamanta uraycamoj Jerusalenka Tatay Diospa llajtanmin. Nokajta caskanta ricuchinaypaj mosoj sutiyta atipajpi kelkasaj. <sup>13</sup> Diospa ajllacuskasninman Santo Espíritu nishaskanta ningriyoj cajka sumajta uyarichun.

### *Laodiceapi cajcunaman Cristojo willaynín*

<sup>14</sup> 'Laodiceapi iglesia tantacojcunaj willajnincuman kelkay: Noka Diospa niskanta junt'aj caj, cheka caj chekata willaj. Diospa ruwaskasnínpa kallaricuynin cajpis nishayqui: <sup>15</sup> Yachani causayniyquita. Nitaj chiri nitaj k'oñi canqui. ¡Chirillapis chayrí k'oñillapis cawa!

<sup>16</sup> [K'oñi cayka Diospi sumajta jap'icuymín. Chiri caytaj manaraj paypi jap'icuy.]<sup>\*</sup> Kanka nitaj chiri nitaj k'oñi canqui. Chayraycu khesachanayashayquiña.  
<sup>17</sup> Kanka nishanqui: "Khapaj cani. [Diospa Espiritunwanpis]<sup>†</sup> khapayachiska cani. Chayraycu mosoj causaypi ni imapi pisichicunichu", nispa. Manataj reparacunquichu mosoj causaypi wajcha, qhuyay, mana imayojoj, ciego, Diospa ñaupakenpi k'alalla caskayquita. <sup>18</sup> Sumajta yuyaychayqui: Diospi jap'icunayquipaj nokamanta mañacuway. Paypi jap'icuyka sumaj puru korijinám. Chaywan cierto khapaj canqui. Diospa ñaupakenpi ama k'alalla p'enkay riqhurinayquipaj chekan ruwaywan p'achallicuy. Diospa niskanta reparanayquipajpis nokamanta mañacuway.<sup>‡</sup> Ajinapi manaña ciegochu canqui. <sup>19</sup> Nokaka munacuskasniyta juchancumanta reparachini wanachinitaj. Chayraycu tucuy sonkowan casuway. Juchayquita sakespataj nokaman cutiricuway  
<sup>20</sup> ¡Reparay! Noka runata wajyashani. Sapa uj wajyaskayta uyarispa

<sup>†</sup> 3:7 Literal: santo caj, cheka caj. <sup>‡</sup> 3:7 Ninayan. <sup>§</sup> 3:11 Literal: pilluyquita. \* 3:16 Ninayan. <sup>†</sup> 3:17 Ninayan. <sup>‡</sup> 3:18 Literal: jawiniy.

sonkonta § quichariwajmanka yaycumusaj. Paywantaj ujchacusaj. Paytaj nokawan ujchaconka. <sup>21</sup> Nokaka tucuya atipaskaymanta Dios Tataywan cusca camachinapaj tiyaycuska cani. Ajinallatataj juchata atipajtaka nokawan cusca camachinanpaj tiyaycuchisaj. <sup>22</sup> Diospa ajllacuskasninman Santo Espíritu nishaskanta ningriyoj cajka sumajta uyarichun. Chay parlawajka chayta niwarka.

## 4

### *Dios tiyaycun janaj pachapi camachinanpaj*

<sup>1</sup> Chay imasmanta khepatarí janaj pachata quichaskata ricorkani. Cornetaj wakaynijina ñaupajpi parlamuwjata ujtawan uyarillarkanitaj. Nokaman parlaspataj niwarka:

—Wicharimuy cayman. Cay ricuskasniyquej khepanta jamojcunata ricuchiskayqui, —nispa.

<sup>2</sup> Chay quiquinpachataj Santo Espíritu atiyninman churawarka jamoj imasta sut'inchanawanpaj. Uj sumaj tiyanatataj janaj pachapi ricorkani, chay jatun tiyanapi ujtaj tiyaskata. <sup>3</sup> Chay tiyacojka may c'achitu lliphipishajjina carka. Chay sumaj tiyanataj c'uychiwan muyuriska carka. C'achitu lliphipej k'omer rumijinataj c'anhasharka. <sup>4</sup> Chay jatun tiyanari iscay chunca tawayojoj tiyanaswan muyuriska carka. Chay tiyanaspitaj iscay chunca tawayojoj curajcuna tiyaskas carkancu. Yuraj p'achawan p'achalliskas, atipaskancumanta umancupitaj kori pilluwan churaskas carkancu. <sup>5</sup> Jatun tiyanamantataj relampagocuna sonaycuna truenocunawan llojserka. Kanchis nina c'anchanastaj chay jatun tiyanaj ñaupakenpi laurasharka. Chayka tucuy imata ruwaj Diospa Espiritunmin.\* <sup>6</sup> Jatun tiyanaj ñaupakenpitaj ch'uya vidrioman rijch'acoj kochajina carka.

### *Janaj pachapi Diosta yupaychancu*

Jatun tiyana urapi muyuyninpiwan tawa causajcuna carkancu. Chay causajcunaka ñawipuru carkancu, ñaupakencupis wasancupis. <sup>7</sup> Ñaupaj caj causajka leonman rijch'acoj carka. Iscay caj causajka toroman rijch'acoj carka. Quinsa caj causajri runa uyayojoj carka. Tawa caj causajtaj phawashaj ancamañ rijch'acoj carka. <sup>8</sup> Chay tawa causajcuna sapa ujnincu sojta lijrasniyoj carkancu. Ñawipurutaj carkancu muyuynincupis uqhuncupipis. Tuta p'unchay mana samaricuspa yupaychashal-lancupunitaj:

—¡Santo, santo, santo, tucuy atiyniyoj Señor Dios! Payka carkapuni, cashanpuni, wiñaypajpunitaj canka, —nispa.

<sup>9</sup> Ajinata chay causajcunaka tiyanapi tiyaska Diosta jatunchancu, may sumajpaj khawancu, yupaychancutaj. Payka wiñaypa wiñayninpaj causayniyojmin. <sup>10</sup> Sapa cuti ajinata yupaychajtinctutaj chay iscay chunca tawayojoj curajcunaka tiyaska Diospa ñaupakenman konkoricuncu. Payka wiñaypa wiñayninpaj causayniyoj. Chay curajcunataj kori pillus-ninctuta tiyanaj ñaupakenman churaspa yupaychancu:

<sup>11</sup> —Señorniyu, Diosniyu, kanllamin jatunchanapajjina, may sumaj khawanapajjina, tucuy atiyniyoj canqui.

Imaraycuchus kanmin tucuy ima cajta ruwarkanqui.

Munayniyquirayculla ruwaskas cancu, cashancupis, —nispa.

**5***Sellaska kelka c'uyumanta*

<sup>1</sup> Ricorkanitaj tiyanapi tiyacojpa paña maquinpi uj kelka c'uyuta. Chay kelka c'uyoj uq hunpi jawanpiwan kelkaska carka. Kanchis selloswan sumaj wisk'askataj carka. <sup>2</sup> Ricullarkanitaj uj callpasapa angelta jatunmanta willarashajta. Nerkataj:

—¿Pitaj cay kelka c'uyuta quicharinanpajjinari? ¿Pitaj sellosnintapis p'aquinanpajjinari?

<sup>3</sup> Ni pi chay kelka c'uyuta quicharinanpaj atiyniyojchu carka nitaj leenanpajpis. Ni janaj pachapi, ni cay pachapi, ni cay pachaj uranpipis atiyniyoj carkachu. <sup>4</sup> Nokataj anchata wakasharkani ni pi kelka c'uyuta quicharinanpajjina ni leenanpajjinapis taricuskanraycu. <sup>5</sup> Chay curajcunamanta ujninrí niwarka:

—Ama wakaychu. ¡Khaway! Judá ayolloj atiyniyojnin Leon sutichaska caj, Davidpa Saphin caj atiparka. Chayraycu paylla atin chay kelka c'uyuta kanchis sellosnintapis quichariyta, —nispa.

*Atipaj Cordero Cristota yupaychancu*

<sup>6</sup> Ricorkanitaj uj Corderota jatun tiyana chaypi, chay tawa causajcuna chaupipi chay curajcuna chaupipiwan. Chay Corderoka sayasharka wañuchiskapis canmanjina. Atiyniyoj caskanraycu kanchis wajrasniyoj kanchis ñawisniyojtaj carka. Ñawiska c'acha yanapayninta junt'aj Diospa Espiritunmin, tucuy cay pachaman cachamuskamin. <sup>7</sup> Corderotaj jamuspa tiyanapi tiyacojpa paña maquinmanta kelka c'uyuta jap'erka. <sup>8</sup> Kelka c'uyuta jap'ejtingama chay tawa causajcuna, chay iscay chunca tawayoj curajcunawan ima, Corderoman pampacama c'umuycorkancu yupaychanancupaj. Chay curajcunataj sapa ujnjincu arpasniyoj carkancu, incienso junt'a kori vasosniyoj ima. Inciensori runasnimpia Diosmanta mañacuynincumin. <sup>9</sup> Uj mosoj taquiyta taquerkancu:

—Kanlla chay kelka c'uyuta jap'inayquipajjinaka sellosnintapis quichanayquipajjinaka canqui.

Kanka wañuchiska carkanqui. Ajinapi yawarniyquiwan runaspa juchas-nincuta wiñaypaj llimphucharkanqui Diospata canancupaj.\*

Tucuy ayllumanta, tucuy laya parlayniyojcunamanta, tucuy llajtasmanta, tucuy jallp'amanta Diospata canancupaj ruwarkanqui.

<sup>10</sup> Paycunataj Diosniycupaj camachejcunata payman kayllaycuchejcunata churarkanqui.

Paycunataj cay pachapi camachenkancu.

<sup>11</sup> Ricorkani uyarerkanitaj may ashqha angeesta, jatun tiyanaj, chay causajcunaj, chay curajcunaj muyuyninpi. Paycunataj chunca waranka cutis chunca warankas, waranka cutis warankastaj carkancu.

<sup>12</sup> Jatunmanta taquispataj yupaycharkancu:

—Wañuchiska carka, chay Corderolla yupaychanapajjinaka.

Payllaman cachun tucuy atiy, khapaj cay, yachay, callpa, may sumajpaj may jatunpaj khawaska cay, yupaychaypis, —nispa.

<sup>13</sup> Tucuy causashajcuna, janaj pachapi caj, cay pachapi caj, cay pachaj uranpi caj, kochaspi caj, tucuy chaycunapi cajcunatapis yupaychajta uyarerkan:

\* 5:9 Literal: ranterkanqui.

—Atiyninwan camachinanpaj tiyananpi tiyaska cajman, Corderomanpis yupaychana cachun.

May sumajpaj may jatunpaj khawaska, atiyniyopjis cachun, wiñaypa wiñayninpaj, —nispa.

<sup>14</sup> Chay tawa causajcunapis nerkanca:

—Ajina cachun, —nispa.

Chay curajcunapis wiñaypa wiñayninpaj causayniyoj Diosta pam-pacama c'umuycuspa yupaycharkancu.

## 6

### *Ñaupaj caj sellota Diospa Corderon Cristo quichan*

<sup>1</sup> Ricorkanitaj Corderota ñaupaj caj sellota quicharejta. Uyarerkanitaj chay tawa causajcunamanta ujninta truenojina parlarejta:

—Jamuy, —nispa.

<sup>2</sup> Ricorkanitaj uj yuraj caballota. Chay caballopí llok'aska cajtaj maquinpi uj flehana arcoyoj carka. Atipaskanmanta uj pillu umanpaj payman koska carka. Atipaspataj llojserka astawan atipananpaj.

### *Diospa Corderon iscay caj sellota quichan*

<sup>3</sup> Chay iscay caj sellota quicharejtin uyarerkani chay iscay caj causajta nejta:

—Jamuy, —nispa.

<sup>4</sup> Uj puca caballotaj llojsimorka. Chay caballopí llok'aska cajmantaj atiy koska carka. Chay atiywan cay pacha runas manaña allinpi cau-sanancupaj llojsimun. Chayraycu runaspura wañuchinaconkancu. Chay-wanpis caballopí cajmanka jatun t'ujsina espada koska carka makana-cunapaj.

### *Quinsa caj sellota Cordero quichan*

<sup>5</sup> Chay quinsa caj sellota quicharejtin uyarerkani chay quinsa caj causajta nejta:

—Jamuy, —nispa.

Ricorkanitaj uj yana caballota. Chay caballopí llok'aska cajtaj maquinpi pesanayoj carka. <sup>6</sup> Uyarerkanitaj chay tawa causajcuna chaupipi nejta:

—Uj kilo trigota rantinapaj uj p'unchay llanc'ana canka. Quinsa kilo cebadata rantinapaj uj p'unchay llanc'ana canka. Aceiteta vinotataj ama imananquichu, —nispa.

### *Tawa caj sellota Cordero quichan*

<sup>7</sup> Chay tawa caj sellota quicharejtin uyarerkani chay tawa caj causajta nejta:

—Jamuy, —nispa.

<sup>8</sup> Ricorkanitaj uj k'ellu caballota. Chay caballopí llok'aska cajtaj Wañuy sutiyoj carka. Infierro sutichaska cajtaj paypa khepanta jamorka. Paycunaman atiy koska carka cay pacha runasmanta tawa caj parteta wañurachinancupaj. Guerraswan, yarkhaywan, onkoywan, cay pacha fiero animaleswanpis wañurachenkancu.

### *Phishka caj sellota Cordero quichan*

<sup>9</sup> Chay phishka caj sellota quicharejtintaj Diospa runasninpa almas-nincuta ricorkani. Paycunaka jaywana altar urapi casharkancu. Runas

paycunata wañuchiskancu Diospa niskanta willaraskancuraycu paypi  
jap'icuskancuta willacuskancuraycupis.<sup>10</sup> Paycunataj sinch'iwan kha-  
parerkancu:

—Tucuya camachej santo cheka Diosniycu ¿mayc'ajcamataj  
suyanquirí? ¿Mayc'ajtaj nokaycuta wañuchej cay pacha sajra runasta  
juchachanquirí?

<sup>11</sup> Paycunaman yuraj khoysu p'achas koska carka sapa ujman. Nil-  
larkataj:

—Pisi tiempotawan samarinallayquichej tiyan. Diosta casoj-  
masisniyquichej hermanosniyquichejpis kancunajina wañuchiskasllataj  
cankancu. May chhicachá canayquichej tiyan, chayman  
junt'acunancama suyaychej,—nispa.

*Sojta caj sellota Cordero quichan*

<sup>12</sup> Ricorkanitaj chay sojta caj sellota quicharishajta. Cay pachataj  
sinch'ita qharcatiterka, intipis yanayaycorka mana c'anchananpaj, quil-  
lapis tucuynin yawarjina tucuporka. <sup>13</sup> Patamanta ch'ascacunapis  
jallp'aman urmaramorkancu. Sinch'i wayrawan cuyuchiska higueraj  
pokoyninjina urmaramorkancu. <sup>14</sup> Cielo lliq'iska chincachiskataj, uj  
kelka c'uyujina c'uyuycuska carka. Tucuy orkos tucuy yacuwan muyuy-  
cuska jallp'aspis lugarnincumanta cuyuchiskas carkancu. <sup>15</sup> Cay pacha  
camachejcunaka, curajcunapis, capitancunapis, khapajcunapis, call-  
payojcunapis, tucuy runacunaka, camachispis, mana camachispis man-  
charicuywan pacacamorkancu. Paycunaka orko jusc'usman, kakasman  
pacacamorkancu. <sup>16</sup> Orkosta kakasta nerkanicutaj:

—¡P'ampaycuwaycu! ¡Pacaycuwaycu tucuya Camachej tiyanapi tiya-  
cojmanta Corderoj phiñacuyninmantawan! <sup>17</sup> Diospa c'ajaj phiñacuynin  
p'unchay chayamunña. ¡Manaña pipis causayta atinmanchu! —nispa.

## 7

*Israel ayllusmanta sellaska cajcuna*

<sup>1</sup> Chaymantataj tawa angeesta ricorkani. Paycunaka cay pachaj  
tawantin tucucuynipi sayasharkancu. Cay pachaj tawantin  
wayrasnintataj jarc'anancu carka. Ni jallp'api, ni kochaspi, ni ima  
sach'asmanpis wayramunanpaj jarc'anancu carka. <sup>2</sup> Waj angeltataj  
inti llojsimuy ladomanta wicherimushajta ricorkani. Payka causaj  
Diospa sellonta apamusharka. Jallp'ata kochata ñac'arichej, chay tawa  
angelesmantaj sinch'ita khaparerka:

<sup>3</sup>—Jallp'ata, kochasta, sach'astapis amaraj ñac'arichiycherajchu. Dios-  
ninchejpa camachisninta frentesnincupi sellonwan marcanaycu tiyan  
paypata caskancuta ricuchinapaj. Tucuynincuta sellanaycucama su-  
yariychej,—nispa.

<sup>4</sup> Sellaskacuna mayc'achus caskancuta uyarerkan. Tucuy Israelpa  
chunca iscayniyoj ayllusninthanta sellaskas carkancu pachaj tawa  
chunca tawayoj waranka. Caycuna cancu:

<sup>5</sup> Judá ayllumanta, chunca iscayniyoj waranka sellaskas;

Rubén ayllumanta, chunca iscayniyoj waranka;

Gad ayllumanta, chunca iscayniyoj waranka;

<sup>6</sup> Aser ayllumanta, chunca iscayniyoj waranka;

Neftalí ayllumanta, chunca iscayniyoj waranka;

Manasés ayllumanta, chunca iscayniyoj waranka;

<sup>7</sup> Simeón ayllumanta, chunca iscayniyoj waranka;  
 Leví ayllumanta, chunca iscayniyoj waranka;  
 Isacar ayllumanta, chunca iscayniyoj waranka;  
<sup>8</sup> Zabulón ayllumanta, chunca iscayniyoj waranka;  
 José ayllumanta, chunca iscayniyoj waranka;  
 Benjamín ayllumanta chunca iscayniyoj waranka sellaskas carkancu.

*Janaj pachapi ashqha atipajcuna*

<sup>9</sup> Chay imasmantataj may ashqha runasta ricorkani. Paycuna ancha ashqhas cancu mana yupay atina. Tucuy jallp'amanta, ayllusmanta, llajtasmanta, tucuy laya parlaycunamanta cancu. Atipajcuna caskancuraycu yuraj khoysu p'achawan p'achalliskas, maquisnincupitaj palmas okhariskas cashancu. Jatun tiyanaj ñaupakenpi Corderoj ñaupakenpiwan sayaskas cashancu. <sup>10</sup> Sinch'itataj khaparincu:

—Atiyninwan camachinanpaj tiyananpi tiyacoj Diosninchej Corderopiwan tucuy enemigosninta atiparka,—nispa.

<sup>11</sup> Tucuy angeleska chay tiyanaj muuyuinpi sayasharkancu. Chaylapitaj carkancu curajcunapis, chay tawa causajcunapis. Tucuynicutaj tiyanaj ñaupakenpi pampacama c'umuycorkancu Diosta yupaycharkancu, <sup>12</sup> nispa:

—¡Ajina cachun! ¡Yupaychay, jatunpaj khawaska cay, yachay, agradece-  
 cuy, may sumajpaj khawaska cay, tucuy atiy, callpapis  
 Diosninchejman cachun wiñaypa wiñayninpaj! ¡Ajina cachun!

<sup>13</sup> Chay curajcunamanta ujnin caj tapuwarka:

—Cay yuraj khoysu p'achawan p'achalliskas ¿picunataj cancu? ¿May-  
 mantataj jamuncu?

<sup>14</sup> Nokataj cuticherkan:

—Señorníy, kan yachanqui,—nispa.

Paytaj niwarka:

—Paycunaka chay jatun llaquicunata muchojcuna cancu. Corderoj wañuyninneja juchasnincumanta llimphuchaskas cancu. Chayraycu yuraj khoysu p'achawan p'achalliskas cancu. <sup>15</sup> Chayraycutaj Diospa tiyananpa ñaupakenpi cashancu. Tuta p'unchay yupaychana-wasinpi payta yupaychashancu. Chay jatun tiyanapi tiyaska cajri munacuywan paycunata wakaychanka. <sup>16</sup> Nitaj jayc'ajpis yarkhachiconkancuchu niñataj ch'aquichiconkancuchu. Niñataj intipis nitaj ima k'oñipis sinch'ita paycunata ruphankachu. <sup>17</sup> Tiyana chaupipi caj Cordero paycunata munacuywan michenka. Maypichá causayta koj yacus phullch'imushancu, chayman paycunata pusanka. Diostaj ñawisnincumanta tucuy wakaynincuta pichanka,—nispa.

## 8

*Kanchis caj sellota Cordero quichan*

<sup>1</sup> Chay kanchis caj sellota quicharejtin janaj pachapi ch'inay carka uj media horatajina. <sup>2</sup> Chanta Diospa ñaupakenpi chay sayashaj kanchis angeesta ricorkani. Paycunamantaj kanchis cornetas koska

carka. <sup>3</sup> Chaymanta waj angel inciensota k'oshñichinanpaj kori incensarioyoj sayaycucorka altarpa ñaupakenpi. Ashqha incienso payman koska carka tucuy runasninpa Diosmanta mañacuynincuwan cus-cata jaywananpaj. Jatun tiyanaj ñaupaken kori altarpi chay incien-sotawan mañacuynincutawan jaywarka. <sup>4</sup> Angelpa maquinmanta incienso k'oshñiwan runasninpa mañacuynincuwan Diospa ñaupakenman wichererka. <sup>5</sup> Chay incensariota jap'ispa angelka altarmanta ninawan junt'acherka. Ninatataj cay pachaman jich'aycamorka. Chaymanta truenocuna, sonaycuna, relampagocunawan carka. Jallp'apis sinch'ita qharcatiterka.

*Tawa cornetasmanta*

<sup>6</sup> Chay cornetasniyoj kanchis angeleska tocanancupaj waquichicorkancu. <sup>7</sup> Ñaupaj caj angel tocarka. Chanta granizowan ninawan yawarwan chajruska cay pachaman jich'aycamorka. Cay pachaj quinsa caj partentaj ruphaycorka. Sach'asmanta quinsa caj partetaj ruphaycorka. Tucuy k'omer pastospis ruphaycorkancu.

<sup>8</sup> Isbay caj angel tocarka. Tocajtintaj ninaka uj jatun laurashaj orko-jina jatun kochaman wijch'uycuska carka. Chanta kochaj quinsa caj partentaj yawarman tucuporka. <sup>9</sup> Kochapi caushajcunamantataj quinsa caj parte wañurarkancu. Barcosmantapis quinsa caj parte chincarichiska carka.

<sup>10</sup> Quinsa caj angel tocajtintaj janaj pachamanta uj jatun ch'asca urmaycamorka. Jatun ninajina laurashaj carka. Mayusmanta quinsa caj parteman, yacu pujuysmanwan urmaycamorka. <sup>11</sup> Chay ch'asca c'arcu jaya Ajenjo sutiyoj carka. Yacusmanta quinsa caj partetaj c'arcu jayaman tucuporka. Chay yacus c'arcu jayaman tucuskancuraycutaj ashqha runas wañurarkancu.

<sup>12</sup> Tawa caj angel tocarka. Chanta intej quinsa caj parten, quillaj quinsa caj parten, ch'ascacunaj quinsa caj partenpis onkoskajina mana allinman tucuporka. Chaycunaj quinsa partencoka lakhayaycaporka. Ajinapi p'unchaypa quinsa caj partenta inteka mana c'ancharakachu. Nillataj tutaj quinsa caj partetapis ni quilla ni ch'ascas c'ancharakachu.

<sup>13</sup> Chanta ricorkani uyarerkanitaj chaupi cielopi uj phawashaj ancata. Sinch'itataj khaparerka:

—¡Phutiy ari, cay pachapi tiyacojcunapajka! Quinsa angeles manaraj tocashancrajchu. Paycuna tocajtincu jatun phutiy canka. Ñapis to-canayashancuña,—nispa.

## 9

*Phishka caj angel cornetanta tocan*

<sup>1</sup> Phishka caj angel tocarka. Chanta ricorkani ujta ch'ascajina urmamojta janaj pachamanta cay pachaman. Paymantaj uqhu pachaj puncunpa llaven koska carka. <sup>2</sup> Uqhu pacha nina kochataka quicharerkataj. Puncunmantataj k'oshñi wicherimorka uj jatun hornoj k'oshñiskanjina. Llojsimoj k'oshñeka intitawan wayratawan lakhayaycucherka. <sup>3</sup> Chay k'oshñimantataj langostas cay pachaman llojsiramorkancu. Cay pacha alacrancunaj atiynincujina atiy langostasman koska carka. <sup>4</sup> Paycunamantaj nerka, ama imananancuta ni pastosta ni ima k'omerta nitaj ima sach'atapis. Manachayrí Diospa sellonwan frentesnincipi mana marcaska caj runasllata

ñac'arichinancuta, nerka. <sup>5</sup> Paycunaman nillarkataj, ama runasta wañurachinancuta, manachayrí phishka quillata ñac'arichinancuta. Nanaynincutaj imaynachus runata wach'ispa alacranpa wach'iskanjina sinch'i canka. <sup>6</sup> Chay p'unchaycunapi runaska manaña causayta munankancchu. Astawanpis mayta wañupuya munankancu, nitaj wañuyta atenkancchu.

*Langos taspa rijch'acuynin*

<sup>7</sup> Langostaska makanacupaj waquichiska caballosman rijch'acorkancu. Umancupitaj kori piluman rijch'acoj carka. Uyancutaj runa uyaman rijch'acoj. <sup>8</sup> Chujchasnincutaj mana simp'aska warmej chujchanjina, quirusnincupis leonpa quirusnijnina carka. <sup>9</sup> Pecherosnincutaj fierro pecherojina carka. Lijrasnincor sonaskantaj ashqha caballospa carretaswan guerraman correskancoj sonaskanjina. <sup>10</sup> Chupancutaj alacranpatajina carka, wach'inayo. Chupancuwan wach'ispa runasta phishka quillata ñac'arichinancu carka. <sup>11</sup> Paycunaj camachejnincutaj chay nina kochamanta sajra angelmin. Hebreo parlaypi sutenka Abadón, griego parlaypitaj Apolión. Chayri niyta munan k'alata tucuchej.

<sup>12</sup> Uj jatun phutiy canña. Iscay jatuchej phutiycuna canraj.

*Sojta caj angel cornetanta tocan*

<sup>13</sup> Sojta caj angel tocarka. Diospa ñaupakenpi kori altar esquinasmanta parlamojtataj uyarerkaní. <sup>14</sup> Cornetayo sojta caj angelmantaj nerka:

—Jatun mayu Eufratespi cashancu, chay tawa jarc'aska angelesca cachariy,—nispa.

<sup>15</sup> Chanta chay tawa waquichiska angeleska cachariskas llojsimorkancu runasmanta quinsa caj parteta wañurachinancupaj. Chay horapaj, chay p'unchaypaj, chay quillapaj, chay watapaj waquichiskas carkancu. <sup>16</sup> Caballospi wañurachej soldadostaj iscay chunca waranka tropas caskancuta uyarerkaní. Sapa tropataj chunca waranka soldadosniyoj.

<sup>17</sup> Ajinatamin chay caballosta sut'inchacuypi ricorkani. Chay caballospi lllok'aska cajcunaj fierro pecheroncutaj puca, azul, k'ellupiwan carka. Caballospa umancutaj leoncunaj umancujina. Simincumantataj ninawan k'oшñiwan azufrewan llojsimusharka. <sup>18</sup> Chay quinsa manchay llaquiycunawan runasmanta quinsa caj parte wañurachiskas carkancu. Paycuna wañorkancu caballospa simincumanta chay llojsimoj ninawan k'oшñiwan azufrewanpis. <sup>19</sup> Caballospa atiynenka simincupi chupancupiwan carka. Chupancoka catariman rijch'acoj, umayojtaj. Chaycunawantaj runasta ñac'arichincu.

<sup>20</sup> Chay manchay llaquiycunawan mana wañuchiska caj runasrí manapuni Diosman cutirerkancchu. Nitaj sajra ruwaynincuta sakerkancchu. Yupaychashallarkancupuni supaycunata, ruwaska dioscunatawan. Chay ruwaskaska korimanta, kolkemanta, broncemanta, rumimanta, c'aspimanta cancu. Chaycunari nitaj ricuncuchu nitaj uyarinccchu nitaj purincupischu. <sup>21</sup> Chaywanpis chay runaska mana sakerkancchu runa wañuchiyya, ni laykayta, ni khenchachacuyta, ni suwacuyta. Ajinallatapuni causasharkancu.

**10***Libritoyoj angelmanta*

<sup>1</sup> Ricorkanitaj waj jatun callpasapa angelta janaj pachamanta uraycamushajta. Phuyuswan khataycuska, umanpitaj c'uychiyoj, uyantaj intijina c'anchayniyoj, chaquisnintaj ninajina laurashaj carka. <sup>2</sup> Chay angelka maquinpi uj libritota quichariskata jap'isharka. Paña chaquinta jatun kochaman saruycorka, llok'e chaquintataj jallp'aman saruycorka. <sup>3</sup> Jatunta khaparerka uj sinch'i kaparej leonjina. Khaparejtintaj chay kanchis sonaj truenocunapis parlallarkancutaj. <sup>4</sup> Chay kanchis truenocuna parlamojtincutaj kelkanayasharkani. Astawanrí janaj pachamanta nimuwarka:

—Chay kanchis truenocunaj parlaskancuta ama kelkaychu. Manachayrí sonkollayquipi jap'iy,—nispa.

<sup>5</sup> Kochapi jallp'api sayashaj ricuskay, chay angel paña maquinta janaj pachaman okharerka Diospa sutinpi juranapaj. <sup>6</sup> Dioska wiñaypa wiñayninpaj causayniyoj caj, tucuya ruwaj. Pay janaj pachata chaypi cajcunatapis, cay pachata chaypi cajcunatapis, jatun kochasta chaypi cajcunatapis ruwarka. Chay Diospa sutinpi angelka jurarka:

—Suyanapaj tiempoka manaña canchu. <sup>7</sup> Astawanpis kanchis angel cornetanta tocajtinmin chay p'unchay Diospa pacaska yuyaynin junt'aconka. Chay sumaj yuyayninta sut'inchaj camachisninman willarka,—nispa.

*Juan chay libritota miqhun*

<sup>8</sup> Ujtawan chay janaj pachamanta parlamojka niwarka:

—Riy. Kochapi jallp'api sayashaj angelmanta quichariska libritota jap'imuy,—nispa.

<sup>9</sup> Nokari chay angelman rispa libritota mañarkani. Paytaj niwarka:

—Jap'iy, miqhucapuy. Wijsayquipi jayasonka. Simiyquipirí lachiwana misq'ijina misq'isonka,—nispa.

<sup>10</sup> Nokataj angelpa maquinmanta libritota jap'ispa miqhuyccorkani. Simiypeka lachiwana misq'ijina misq'iwarka. Miqhuycojtiytaj wijsaypi jayawarka. <sup>11</sup> Chanta niwaska carka:

—Ujtawan sut'inchanayqui tiyan ashqha llajtasmanta, ashqha nacionesmanta, tucuy laya parlayniyojcunamanta, ashqha camachejcunamantapis,—nispa.

**11***Yupaychana-wasita medinamanta*

<sup>1</sup> Uj sokos kowaska carka varaman rijch'acoj. Niwarkataj:

—Jataricuy. Medimuy Diospa yupaychanawasinta altartawan. Chaypi yupaychashajcunatapis yupamuy. <sup>2</sup> Yupaychana-wasej jawa patientari ama mediychu waj llajtayojcunaman koska caskanraycu. Paycunaka Diosman t'akaska llajtata atipaspa tawa chunca iscayniyoj quillata saronkancu. <sup>3</sup> Nokataj iscay willajcunayta luto p'achawan p'achalliskata cachamusaj. [Runaspa juchancumanta phuticuskancuraycu ajina p'achalliskas cancu.]<sup>\*</sup> Waranka iscay pachaj sojta chuncayoj p'unchaycunata niskasniyta willarankancu,—nispa.

*Iscay willajcunamanta*

\* 11:3 Ninayan.

<sup>4</sup> Chay iscay olivo sach'as chay iscay c'anchanaspiwan Señornincheja ñaupakenpi cashancu. Chaycunajina chay iscay willajcunapis cancu. <sup>5</sup> Sichus mayken paycunata ñac'arichiya munanman chayka, nina simincumanta llojsimonka enemigosnincuta ruphaycunapaj. Paycunata ñac'arichiya munajka ajina wañuchiska canan tiyan. <sup>6</sup> Paycunaka atiyniyoj cancu willaranancu p'unchaycunapi paratapis jarc'anancupaj. Atiyniyoj cancu yacusta yawarman cutichinancupaj. Atiyniyojtaj cancu munaskancumanjina tucuy laya manchay llaquycunawan cay pachata ñac'archinancupajpis. <sup>7</sup> Dios paycunata cachamonka niskanta willaranancupaj. Chayta tucuskancutawantaj uqhu pachamanta wicherimoj millay animalka paycunawan makanaconka. Paycunata atipankataj wañurachenkataj. <sup>8</sup> Ayastaj jatun llajtaj callesnippi wijch'uconkancu. Chay jatun llajtaka Sodomawan Egiptowan ninacun. Chay llajtallapitaj Señornincoka chacataska carka. <sup>9</sup> Chay ayastataj quinsa p'unchay cuscanniyoja khawankancu tucuy llajtasmanta cajcuna, ayllusmanta, tucuy laya parlayniyojcuna, tucuy nacionesmanta cajcunapis. Paycuna ayasta mana p'ampacoja sakenkancuchu. <sup>10</sup> Ajinata khawaspa cay pachapi tiyacoj runaska paycunaj wañuskancumanta cusiskas cankancu. Cusiracuspataj regalosta apachinaonkancu. Chay iscay willajcunaka cay pacha runasta ñaupajpi ñac'aricherkancu. Chayraycu wañuskancumanta runaska cusiconkancu.

*Chay iscay willajcuna causarichiskas cancu*

<sup>11</sup> Chay quinsa p'unchay cuscanniyojmantataj Dios paycunata causarichimorka. Causarimuspataj sayaricaporkancu. Chayta khawajcunataj sinch'ita manchachicorkancu. <sup>12</sup> Willajcunataj uyarerkancu janaj pachamanta sinch'iwan wajyamojta:

—Cayman wicherimuychej, —nispa.

Paycunataj janaj pachaman Diospa phuyunpi wichererkancu. Ene-migosnincutaj paycunata wicherishajta khawarkancu. <sup>13</sup> Chay quiquin-pachataj cay pachaka sinch'ita qharcatiterka. Chay qharcatitiyllapitaj kanchis waranka runaspis wañurarkancu. Mana wañuska carkancu, chay runastaj mayta manchachicorkancu, janaj pachapi caj Diosta jatun-charkancutaj.

<sup>14</sup> Chay iscay caj jatun phutiyy canña. Quinsa caj jatun phutiyytaj ñapis chayamushanña.

*Kanchis caj angel cornetanta tocan*

<sup>15</sup> Kanchis caj angel tocarka. Janaj pachapitaj sinch'ita khaparerkancu:

—Señorninchejpatawan Cristonpatawanña tucuy cay pachata camachiyka.

Wiñaypa wiñayninpajtaj camachenka, —nispa.

<sup>16</sup> Diospa ñaupakenpi tiyanasnincupi tiyaska iscay chunca tawayo curajcuna pampacama c'umuycuspa Diosta yupaycharkancu:

<sup>17</sup>—Tucuy atiyniyoj Señor Diosniyu, kan canquipuni carkanquipunitaj. Jatun atiyniyquiwanña cunan camachishaskayquiraycu kanta agrade-cecuyú.

<sup>18</sup> Cay pacha llajtacuna kanpaj phiñacorkancu.

Cunanrí kanpa phiñacunayqui tiempo chayamunña.

Juiciopi wañuskacunata juzganayqui tiempopis chayamunña.

Cunantaj ruwaskancumanjina cutichipunqui willajcunayquiman, kaman t'akaska runasniyquiman, kanta yupaychajcunamanpis, pisipaj khawaskacunamanpis, jatunpaj khawaskacunamanpis. Cunantajmin cay pachata tucuchejcunata tucuchinayquipaj tiempoka chayamunña,—nispa.

<sup>19</sup> Janaj pachapi Diospa yupaychana-wasintaj quicharicorka. Diospa camachiskasninta churana arcapis yupaychana-wasinpi ricucorka. Chaywanpis carka relampagocuna, sonaycuna, truenocuna ima. Jallp'apis sinch'ita qharcatiterka, manchay granizotaj carka.

## 12

### *Chay warmimanta chay dragonmantawan*

<sup>1</sup> Janaj pachapi uj jatun ricuchina ricucorka jamoj imasmanta reparachinapaj. Ricucorka uj warmi intiwan c'achachaska, quilla pat-apitaj sayashaj. Chunca iscayniyoj ch'ascasmanta pilluwantaj umanpi churaska carka. <sup>2</sup> Chay warmeka wijsalliska carka. Onkocunayashaspataj nanaywan khaparicorka. <sup>3</sup> Chanta janaj pachapi waj jatun ricuchina ricucorka jamoj imasmanta reparachinapaj. Uj jatun puca animal catarijina dragón ricucorka. Kanchis umayojo, chunca wajrasniyoj carka. Umasninpitaj kanchis camachina pillusniyoj carka. <sup>4</sup> Chupantaj janaj pacha ch'ascasmanta quinsa caj parteta pichaycorka. Cay pachamantaj chokaramorka. Dragonka onkocunayashaj warmej ñaupakenpi sayaycucorka. Warmej wawanta nacecojtincama miqhuyuncunapaj suyasharka. <sup>5</sup> Warmeka uj khari wawata onkocorka. Chay wawaka tucuy llajtasta sinch'i atiywan\* ñapis camachenkaña. Chay wawari Diospaman tiyananmantaj okhariska carka. <sup>6</sup> Warmitaj ch'innejman Diospa waquichipuskan lugarman aykecorka. Chaypi waranka iscay pachaj sojta chuncayojoj p'unchaycunata miqhuchiska, wakaychaskataj carka.

### *Janaj pachapi guerra*

<sup>7</sup> Janaj pachapi guerra carka. Angel Miguelka angelesninwan dragonpa contranpi makanacorka. Dragonpis sajra angelesninwan Miguelpa contranpi makanacullarkataj. <sup>8</sup> Atipachicuspataj, paycunapaj janaj pachapi manaña lugar carkachu. <sup>9</sup> Ajinapi chay jatun dragonka wijch'umuska carka. Payka chay juchallichej ñaupa catari, diablo, Satanás sutiyoj. Paypis tucuy cay pacha runasta pantachejka cay pachaman wijch'uycamuska carka. Paywan cusca sajra angelesninpis wijch'umuskasllataj carkancu, millay supaycuna caskancuraycu.

<sup>10</sup> Chanta janaj pachapi uyarerkaní khaparejta:

—Cunan Dirosinchej jatun callpawan atipanña tucuya camachinanpaj. Cunantaj Cristonpa atiynintapis ricuchinña hermanosinchejta ch'ataj caj wijch'umuskaña caskanraycu.

Chay ch'atajka Dirosinchejpa ñaupakenpi paycunata tuta p'unchay ch'ataj.

<sup>11</sup> Hermanosinchejka chay ch'atajta atiparkancu Corderojo wañuyninneja,† paypi jap'icuskancuta willacuskancunejtapis.

Paycunaka mana causaynillancutachu wakaychacorkancu.

\* **12:5** Literal: fierro varawan. † **12:11** Literal: yawarninneja.

Manachayrí waquichiskas carkancu Jesucristoraycu wañuchiskas canan-cupajpis.

<sup>12</sup> Chayraycu janaj pachapi cajcuna jmayta cusicuychej!

jPhutiy, ari, cay pachapi cajcunapajka, kochaspi cajcunapajpis Satanás kancunaman uraycamuskanraycu!

Pisi tiempollaña paypaj caskanta yachaskanraycu manchay rabiaska cashan.

<sup>13</sup> Chay dragonka cay pachaman wijch'uycamuska ricucuytawan khari wawa onkocoj warmita khatiy cacharka. <sup>14</sup> Chay warmimaní ancaj iscay jatuchej lijrashin koska carka aykecunapaj. Paypaj waquichiska carka, chay ch'in pampaman phawarka dragonmanta pacaska cananpaj. Quinsa wata cuscanniyojta chaypi miqhuchiska, wakaychaska canan carka. <sup>15</sup> Dragontaj warmej khepanta uj mayutajina yacuta ajtumorka payta apachinanpaj. <sup>16</sup> Jallp'arí warmita yanapananpaj siminta quicharerka dragonpa ajtumuskan mayutataj okoycorka. <sup>17-18</sup> Chayraycu dragonka warmipaj mayta phiñacorka. Chanta warmej waj wawasniwan makanacoj rerka. Diospa camachiskasninta casojcu-nawan, Jesuspi jap'icojcunawan makanacoj rerka. Paycunaka warmej waquin wawasniñ cancu.

## 13

### *Ñaupaj caj millay animalmanta*

<sup>1</sup> Dragontaj kocha canto t'iypu sayasharka. Ricorkanitaj uj millay animalta kochamanta llojsimushajta. Chunca wajrayoj, kanchis umayoj carka. Wajrasnin patapitaj camachina pillusniyoj carka. Umasninpitaj Diosta phiñachej suti carka. <sup>2</sup> Chay ricus kay millay animalka leonjina carka. Chaquisnintaj osojtajina, simintaj leonpa siminjina carka. Dragontaj chay millay animalman jatun atiyninta korka camachinanpaj. <sup>3</sup> Ujin umanka wañuchiskaman rijch'acorka. Wañuy nanaynimanta thañiska carka. Chayraycutaj tucuy cay pacha runas t'ucorkancu chay millay animaltataj casorkancu. <sup>4</sup> Millay animalman atiyninta koskan-raycu cay pacha runas dragonta yupaycharkancu. Chay millay animal-tapis yupaychallarkancutaj. Nerkancu:

—jNi pi millay animalwan ninacunchu! jNi pi payta makanacuspa atipanmanchu! —nispa.

<sup>5</sup> Millay animalmanri atiy koska carka jatunchacuspa parlashananpaj sajrata parlananpajpis. Ajinata ruwanan carka tawa chunca iscayniyoj quillata. <sup>6</sup> Diospa contranpitaj sajrata parlarka. Diospa sutinpa, paypa yupaychana-wasinpa, paywan cusca janaj pachapi cajcunaj contrancutawan sajrata parlarka. <sup>7</sup> Diosman t'akaska runaswan makanacunapaj paycunata atipanapajpis millay animalman atiy koska carka. Tucuy ayllusta, llajtasta, tucuy laya parlajcunata, nacioncunatapis camachinanpaj atiy koska carka. <sup>8</sup> Cay pachapi tiyacojcunamanta wiñay causay libropi mana apuntaska cajcuna, millay animalta yupay-charkancu. Cay pacha ruwacuskamantapacha wañuchiska Corderoj libronpi apuntaska cajcunarí mana yupaycharkancu.

<sup>9</sup> Ningriyoj cajka cayta sumajta uyarichun. <sup>10</sup> Diospa yuyaskanman-jina pichá presochaska canan cajtenka, presochaska canka. Espadawan wañuchejrí espadallawantaj wañuchiska canka. Diosman t'akaska runasnenka llaquiypi muchuspa paypi jap'icuskancuta ricuchincu.

*Iscay caj millay animalmanta*

<sup>11</sup> Ricullarkanitaj waj millay animalta jallp'amanta wicharimushajta. Corderoj wajranjina iscay wajrayojtaj carka. Dragonjinataj parlarka. <sup>12</sup> Ñaupaj caj millay animalpa atiyninwan tucuy imata ruwarka, paypa willajnijina. Tucuy cay pachantinta camacherkataj chay ñaupaj caj millay animalta yupaychanancuta. Chay yupaychaskaka wañuy nanaymanta thañiska, chay carka. <sup>13</sup> Iscay caj millay animalka runaspa ñaupakencipi jatuchej ricuchinasta ruwarka. Ninatawanpis janaj pachamanta cay pachaman uraycuchimorka. <sup>14</sup> Willajnijina ñaupaj caj millay animalpa ñaupakenpi atiyninwan cay pacha runasta pantaracherka ricuchinasninwan. Paycunaman nerka, espadawan wajtaska carka causarimorkataj, chay animalpa rijch'acuyninta ruwanancuta. <sup>15</sup> Payman atiy koska carka millay animalpa rijch'acuyninman causayta konanpaj parlarichinanpajwanpis. Chay atiywantaj animalpa rijch'acuyninta tucuy mana yupaychajcunatapis wañurachinancuta camacherka. <sup>16</sup> Tucuya, pisipaj khawaskacunata, jatunpaj khawaska-cunatapis, khapajcunata, wajchacunatapis, mana camachicunata, camachicunatapis, rejiskas canancupaj marcaracherka. Paña maquin-cipi chayrí frentencipi marcaska canancuta camacherka. <sup>17</sup> Ajinapi mana marcayoj cajka mana rantiyta nitaj vendeyta aterkachu. Chay marcaka millay animalpa sutinmin chayrí sutinpa numeron. <sup>18</sup> Cayka sumaj yachay cashan. Yuyayniyoj cajka millay animalpa numeronta yupachun. Animalpa numeronka cay pacha runaj numeronmin, sojta pachaj sojta chunca sojtayo. [Chay numeroka Diospa contran numeromin.]\*

**14***Cordero Cristo runasninwan*

<sup>1</sup> Cunanka sumaj cajta ricorkani, Sion orkopi Corderota sayashajta. Paywantaj pachaj tawa chunca tawayoj waranka casharkancu. Chay niyta munan tucuy paypa marcaska runasnin. Paycunaka Corderoj sutinwan Tatarpa sutinwanpis frentencipi marcaskas cancu. <sup>2</sup> Ashqha yacus phajchajjinata, jatun truenocunajinata janaj pachamanta taquimojta uyarerkan. Chay taquimuytaka arpaspa tocaynintajina uyarerkan. <sup>3</sup> Uj mosoj taquinatataj taquisharkancu jatun tiyanaj ñaupakenpi, chay tawa causajcunaj ñaupakencipi, chay curajcunaj ñaupakencupipis. Chay pachaj tawa chunca tawayoj warankaka cay pachamanta Corderoj wañuyminwan rantiska cancu. Paycunalla chay mosoj taquinataka yachancu. <sup>4</sup> Paycunaka Diosman t'akaska cancu. Corderoj tucuy yachachiyninta casojcuna cancu. Cay pacha runas uqhumanta libraskas\* cancu Diospata Corderopatapis ñaupaj ajllacuskasnin canancupaj. <sup>5</sup> Paycunaka mana llullacuspa cheka cajta parlajcuna cancu, mana juchayo.

*Quinsa angeles willancu*

<sup>6</sup> Ricorkanitaj uj angelta patapi phawashajta. Wiñay wiñaypaj sumaj willanasta willamoj phawasharka cay pachapi tiyacojcunaman, tucuy jallp'asman, tucuy ayllusman, tucuy laya parlayniyojcunaman, tucuy llajtasmanpis. <sup>7</sup> Sinch'iwan parlaspataj nerka:

\* 13:18 Ninayan. \* 14:4 Literal: rantiskas.

—Diosta manchachicuychej, payta jatunchaychej, juicio p'unchaynin chayamuskanraycu. Janaj pachata, cay pachata, kochasta, phullchej yacustapis ruwaj Diosta yupaychaychej, —nispa.

<sup>8</sup> Chanta iscay caj angel khepanta jamorka. Nerkataj:

—¡Urmanña, urmanña chay jatun llajta Babiloniaka! Chay llajtaka mana frenoyojjina millay sajra causayninwan tucuy llajtasta ujyaycucherka juchallicherkataj, —nispa.

<sup>9</sup> Chanta quinsa caj angel khepanta jamullarkataj. Sinch'ita kha-parispa nerka:

—Millay animalta rijch'acuynintapis yupaychajka, frentenpi chayrí maquinpi marcachicojka sinch'i ñac'arichiska canka. <sup>10</sup> Paytaka Dios c'ajaj phiñacuyninwan sinch'ita ñac'arichenka. Santo angelesninpá ñaupakencupi Cordero j ñaupakenpiwan azufrewan laurashaj ninapi ñac'arichenka. <sup>11</sup> Ñac'ariyincumanta k'oшñitaj wicherimun wiñaypa wiñayninpaj. Millay animalta rijch'acuynintapis yupaychajcunaka sutinwan marcachicojcunaka mana samarispa tuta p'unchay ñac'arenkancu, —nispa.

<sup>12</sup> Chayraycu Diosman t'akaska runasnenka muchuynincipi paypipuni jap'icunancu tiyan. Paycunaka Diospa niskanta Jesuspa yachachiskantapis casojcuna cancu.

<sup>13</sup> Janaj pachamanta parlamuwajta uyarerkaní:

—Kelkay: May cusiskas cancu Señorpi jap'icuspa wañojcunaka cuman-mantapacha. Santo Espiritupis nin: Arí, sayc'uchej llanc'anancumanta samacuchuncu. Sumaj ruwaskasnincuri wiñaypaj Diosta jatunchanapaj canka, —nispa.

### *Juiciopi runasta cosechatajina cosechan*

<sup>14</sup> Ricorkanitaj uj yuraj phuyuta. Chay phuyu patapitaj runaman rijch'acoj tiyaska carka. Umanpitaj atipaskanmanta kori pilluwan churaska, maquinpitaj filo jusiyoj carka. <sup>15</sup> Uj angel janaj pacha yupaychana-wasimanta llojsimorka. Chay phuyu patapi tiyaska cajmantaj sinch'ita khaparerka:

—Jusiyquiwan ruthullayña cosecha hora chayamuskanraycu. Cay pacha cosechaka pokoskañamin, —nispa.

<sup>16</sup> Chay phuyu patapi tiyaska caj jusinta cay pachaman churaycamorka. Cay pachataj cosechaska carka.

<sup>17</sup> Ajinallataj waj angel janaj pacha yupaychana-wasimanta llojsimorka, paypis filo jusiyoj. <sup>18</sup> Chanta waj angelpis juicio ninamanta atiyniyoj caj, altarmanta llojsimuspa sinch'ita khaparerka. Filo jusiyoj angelman nerka:

—Filo jusiyquita churaycamuspa cay pacha uva huertamanta uvasta pallay chayaskasña caskanraycu, —nispa.

<sup>19</sup> Chay angelka cay pachaman jusinta jaywaycamorka. Cay pachamanta uj uva huertamantajina sajra runasta pallaycorka. Diospa c'ajaj phiñacuyninmanta caj jatun sarunamantaj paycunata wijch'uycorka. <sup>20</sup> Paycunataj llajtamanta jawapi sinch'i saruskas carkancu. Yawarnincutaj sarunamanta llojsimorka caballospa frenoncuman taripanancama sojta chunca leguatajina kochachacuspa.

**15***Kanchis angelesmanta*

<sup>1</sup> Ricullarkanitaj waj jatun t'ucunapaj ricuchinata janaj pachapi. Kanchis angelestaj khepa caj kanchis manchay llaquiyuncunata jap'ejcuna carkancu. Chay manchay llaquiyuncunawanmin Diospa c'ajaj phiñacuynenka junt'acun.

*Moisespa Corderojtapis taquiyintta taquincu*

<sup>2</sup> Ricorkanitaj kochaman rijch'acojta, ch'uya vidrio ninawan chajruskatajina. Atipajcunataj chay vidriojina kochapi sayasharkancu, Diospa koskan arpaswan. Paycunaka millay animalta rijch'acuynintapis atiparkancu nitaj sutinwanpis marcachicorkancuchu.

<sup>3</sup> Diospa camachin Moisespa Corderojtapis taquiyintta Diosman taquerkancu:

—¡Tucuy atiynijoj Señor Dios, ancha jatuntaj t'ucunapajtaj ruwaskas- niyqueka!

¡Tucuy llajtasta Camachej, yuyayniyqueka chekan mana pantayniyoj!

<sup>4</sup> Señor, tucuy manchachicuywan kanta yupaychasonkancu tucuytaj sutiyquita jatunchankancu.

Kan sapallayqui santo canqui.

Chayraycu tucuy llajtas kanman jamonkancu.

Chekanta juchachaskayqui ricuchiskañamin.

Chayraycu tucuy ñaupakeyquipi konkoricuspa yupaychasonkancu.

*Juiciomanta kanchis angeles*

<sup>5</sup> Chaymantataj janaj pachapi ricorkani Diospa camachiskasninta churana, chay yupaychana-wasita quichaskata. <sup>6</sup> Llojsimorkancutaj chay kanchis angeles. Paycunaka khepa caj kanchis manchay llaquiyuncunata jap'ejcuna cancu. Llimphu c'ancharishaj p'achawan p'achalliskas carkancu. Diosman kayllaycuchejpatajina kori chumpiwan sonkoncu chekanpi chumpiskas carkancu. <sup>7</sup> Chay tawa causajcunamanta ujnin chay kanchis angelesman sapa ujman kori vasota korka. Chay kanchis vasoska wiñaypa wiñayninpaj causaj Diospa c'ajaj phiñacuyninwan junt'a carkancu. <sup>8</sup> Yupaychana-wasimantaj k'oшñi junt'aycorka. K'oшñeka carka Dios jatun atiyninwan juiciota ruwananpaj chaypi cashaskan- mantamin. Yupaychana-wasimanka ni pi yaycuya aterkachu, chay kanchis angeles chay kanchis manchay llaquiyuncunata tucunancucama.

**16**

<sup>1</sup> Uyarerkanitaj yupaychana-wasimanta sinch'iwan parlashajta chay kanchis angelesman:

—Riychej, Diospa c'ajaj phiñacuyninwan junt'a caj kanchis vasosta cay pachaman jich'aycamuychej, —nispa.

*Kanchis angeles jich'aycuncu*

<sup>2</sup> Ñaupaj caj angel rispa cay pachaman vasonmanta jich'aycorka. Chanta millay ch'upu onkoy runaspi riqhurirarka. Ñac'aricherkataj chay millay animalpa marcanwan marcachicojcunata rijch'acuyninta yupaychajcunatapis.

<sup>3</sup> Iscay caj angelpis kochaman vasonmanta jich'aycorka. Chanta kochaska aya yawarmanjina cutiporkancu. Kochaspi tucuy causashaj cajtaj wañurarkancu.

<sup>4</sup> Quinsa caj angelpis mayusman yacu pujuysmanwan vasonmanta jich'aycorka. Chay yacustaj yawarman cutiporkancu. <sup>5</sup> Yacusmanta atiyniyoj angelta uyarkerkani nejta:

—Kanlla chekanka canqui, canquipuni, carkanquipunitaj. C'ata santo caj Dios, kanlla chekanka canqui, canquipuni, carkanquipunitaj. Ajinata juchachaskayquiwan chekan ricuchicunqui. <sup>6</sup> Chay juchachaska-cunaka willajcunayquita wañurachispas yawarnincuta jich'acherkancu. Chayraycu kampis paycunata yawarta ujyacherkanqui. Chaypajjina-punimin cancu, —nispa.

<sup>7</sup> Uyarkerkanitaj altarmanta nimojta:

—Ari, tucuy atiyniyoj Señor Dios, juiciopi juchachaskayqueka chekan-punimin, —nispa.

<sup>8</sup> Tawa caj angelpis intiman vasonmanta jich'aycorka. Chanta intiman atiy koska carka runasta ninawan ruphananpaj. <sup>9</sup> Runastataj ninaj sinch'i ruphayninwan ruphaycorkancu. Dioska chay manchay llaquiy-cunawan ruwananpaj atiyniyoj caskanraycu, runaska paypa contranpi sajrata parlarkancu. Sajra ruwaskasnincutapis mana sakerkancuchu Diosta jatunchanancupaj.

<sup>10</sup> Phishka caj angelpis millay animalpa camachina tiyananman vasonmanta jich'aycorka. Chanta tucuy camachiynin lakhayaycorka. Runastaj ñac'ariynincuwana kalluncuta qhanicorkancu. <sup>11</sup> Janaj pachapi caj Diospaj sajrata parlarkancu manchay ñac'ariynincuraycu ch'upusn incuraycupiwan. Sajra ruwaskasnincumantapis mana phuticorkancuchu, nitaj chay ruwaynincuta sakerkancuchu.

<sup>12</sup> Sojta caj angelpis jatun mayu Eufratesman vasonmanta jich'aycorka. Mayoj yacusintaj ch'aquichiska carka. Ajinapi inti llojsimuy ladomanta camachejcuna jamunancupaj ñan waquichiska carka. <sup>13</sup> Ricorkanitaj dragonta, millay animalta, paypa llulla willajnintawan. Simincumataj quinsa millay espíritus jamp'atusman rijch'acoj llojsimorkancu. <sup>14</sup> Chay millay espiritustaj ricuchinasta ruwaj supaycuna carkancu. Paycunaka tucuy cay pacha camachejcunaman rerkancu. Tucuy atiyniyoj Diospa jatun guerra p'unchayninpaj chay camachejcunata tantamorkancu.

<sup>15</sup> ¡Uyariyche! Mana yuyashajtiyqui chayamusaj. Nokawan ujchaskallapuni causacuy ama p'enkay juchapi jap'iska canayquipaj. Ajinallatapuni causacojka may cusiska canka.

<sup>16</sup> Chay supaycunataj camachejcunata tantamorkancu uj lugarman. Chay lugarka hebreo parlaypi Armagedón niska.

<sup>17</sup> Kanchis caj angelpis wayraman\* vasonmanta jich'aycorka. Chanta yupaychana-wasimanta jatun tiyanamanta sinch'iwan nimorka:

—¡Ruwaskaña! —nispa.

<sup>18</sup> Chanta carka relampagocuna, sonaycuna, truenocuna ima. Jallp'apis manchayta qharcatiterka. Runa cay pachapi caskanmantapacha ni jayc'aj ajina sinch'itaka jallp'a qharcatiterkachu.

<sup>19</sup> Chaywan jatun llajta Babiloniaka quinsaman partiska carka. Nacioncunaj llajtasincupis urmararkancu. Ajinapi Dioska jatun llajta Babiloniaj juchasninemanta yuyaricuspa manchay c'ajaj phiñacuyninwan juchacharka. <sup>20</sup> Tucuy yacuwan muyuriska jallp'aspis chincaporkancu. Orkospis chincaporkancu. <sup>21</sup> Runasmantaj janaj pachamanta

\* **16:17** Literal: aireman.

quintalniyoyjina granizamorka. Chay granizo ñac'ariyka ancha fiero caskanraycu runas Diospaj sajrata parlarkancu.

## 17

### *Juchasapa Babilonia llajta*

<sup>1</sup> Chay kanchis vasosniyoj angelesmanta ujnin jamuspa parlay-cuwarka:

—Jamuy, Babilonia llajtaj contranpi juiciota ricuchiskayqui. Kochacuna patapi tiyashaj khenchachacoj llajtata Dios juchachashan.

<sup>2</sup> Cay pacha runaspa camachejcunancu cay llajtawan khenchachacorkancu. Paypa khenchachacuyninwantaj cay pachapi tiyacojcunaka machachiskas carkancu, —nispa. [Diosta mana casuy juchaka millay khenchachacujinamin.]\*

<sup>3</sup> Santo Espiritoka atiyninman churawarka jamoj imasta sut'inchanawanpaj. Angeltaj ch'in pampaman pusawarka. Ajinapi ricorkani uj warmita millay puca animalpi llok'askata. Chay millay animalka Diosta phiñachej sutiswan junt'a carka. Kanchis umayoj chunca wajrayojtaj carka. <sup>4</sup> Chay warmitaj morado p'achawan p'achalliska carka. Koriwan, may valorniyoj rumicituswan, perlaswan, may sumaj c'achachaska carka. Maquinpitaj uj kori vasoyoj carka. Chay vasoka Diospa millachicuskanwan chay warmej millay khenchachacuyninwan junt'a carka. <sup>5</sup> Frentenpi uj suti kelkaska carka, “Jatun Babilonia”. Sut'inchaskaka niyta munan: Cay llajtamanta jamun tucuy cay pacha khenchachacuycuna† millachiyuncunapiwan.

<sup>6</sup> Chay warmitaj Diospa runasninpa yawarnincuwan, Jesusmanta willaskancuraycu wañuchiskacunaj yawarnincuwanpis machaska carka. Nokataj chay warmita ricuspa mayta t'ucorkani. <sup>7</sup> Angeltaj niwarka:

—¿Imaraycutaj t'ucushanqui? Chay warmimanta payta apaj animalmantapis noka sut'inchaskayqui, —nispa.

### *Angel sut'inchan millay animalmanta*

#### *Niwerkataj:*

—Ajinapi yachanqui chay kanchis umayoj chunca wajrayoj millay animalmanta. <sup>8</sup> Ricorkanqui, chay millay animalka causarka, chanta, wañuska carka. Nina kochamanta wicharimushanña, wiñay wañuyman rishaspa. Cay pachapi tiyacojcuna millay animalta ricuspa t'uconkancu. Chay t'ucojcunaka mana listaska cajcuna cancu, cay pacha kallaricuymantapacha, wiñay causay libropi. Paycuna riconkancu millay animalta, chay causaskanta, wañuskanta, ujtawantaj riqhurimuskanta. Chayraycu mayta t'uconkancu.

<sup>9</sup> Yachayniyoj runaka caypi yuyachun. Chay kanchis umaska kanchis orkos cancu. Chaypi chay warmeka tiyaycuska cashan camachinanpaj. Chaywanpis chay umaska kanchis camachejcuna cancu.

<sup>10</sup> Paycunamanta phishka urmarkancuña. Cunantaj sojta caj camachishan. Kanchis cajtaj jamuspaka mana unaytachu camachinan tiyan.

<sup>11</sup> Payka chay causarka wañuskataj carka, chay millay animalmin pusaj caj camachejka. Chay kanchis camachejcunamanta ujnincumin payka. Wiñay wañuymantaj rishan. <sup>12</sup> Ricorkanqui, chay chunca wajraska, chunca camachejcuna cancu. Paycunaka manaraj

\* 17:2 Ninayan. † 17:5 Literal: tucuy khencha warmispa maman.

camachishancurajchu. Astawanrí atiyta jap'enkancu millay animalwan cusca uj ratullata camachinancupaj.<sup>13</sup> Paycuna uj yuyaylla cankancu. Chaymanjina camachina atiynincuta millay animalman konkancu.<sup>14</sup> Paycunaka Cordero Cristowan makanaconkancu. Corderotaj paycunata atipanka tucuy señorcunaj Señornincu, tucuy camachejcunaj Camachejnincu caskanraycu. Corderowan cusca makanacojcuna paypa wajyaskacunan, ajllaskacunan, casojcunan cancu. Paycunaka paywan cusca atipankancu,—nispa.

*Angel sut'inchan chay warmimanta*

<sup>15</sup> Nillawarkataj:

—Uj khencha warmita tiyaycuska kochacunapi ricorkanqui. Chay kochacunaka cancu llajtas, ashqha runas, tucuy jallp'asmanta, tucuy parlayniyojcunamantapis.<sup>16</sup> Chay chunca camachejcunata ricuskayqui, millay animalpiwanka khencha warmita chejni-caponkancu. Sapallanta k'allatataj sakerpaponkancu. Aychantapis miqhuyconkancu. Ajinaspataj ninawan ruphaycuchenkancu ushphayanancama.<sup>17</sup> Ajinata ruwanancutaka Diosmin yuyaycharka. Chayraycu paycunaka uj yuyaylla camachina atiynincuta millay animalman konkancu. Chaytataj ruwankancu Diospa niskasnin juntaunancama.<sup>18</sup> Chay ricuskayqui warmeka jatun llajta Babiloniamin. Chay llajtaka cay pacha camachejcunata camachin,—nerka angelka.

## 18

*Babiloniaj urmaynininmanta*

<sup>1</sup> Chaymanta khepata ricorkani waj angelta janaj pachamanta urayca-mushajta. Jatun atiynijoj caskanraycutaj cay pachata c'ancharicherka.

<sup>2</sup> Sinch'iwantaj khaparerka:

—¡Urmanña, urmanña, chay jatun Babiloniaka!

Supaycunaj tiyacunancu wasiman, tucuy millay supaycunaj cuartelnin-cuman tucuporka.

Tucuy millay p'iskospa jusc'uncuman, chejniska p'iskospa jusc'uncumantaj tucuporka.

<sup>3</sup> Chay llajtaj millay sajra causayninwan tucuy llajtas machaycuspajuchallicorkancu.

Cay pacha camachejcunaka llajtaj millay causayninwan juchallicorkancu.

Cay pacha comerciantespis cay llajtaj millay cusiyinwan khapaj-yarkancu,—nispa.

<sup>4</sup> Uyarerkanitaj janaj pachamanta waj parlamojta:

—Runasniy cajcuna, chay llajtamanta llojsimpuychej ama juchallej-masisnin canayquichejpaj.

Ajinapi chay llajtaj manchay llaquiyuncunanta mana ñac'arinquichejchu.

<sup>5</sup> Juchasnenka taukaycucuspa janaj pachacama chayarka.

Diostaj chay sajra ruwaskasninmanta yuyaricorka.

<sup>6</sup> Chayraycu juchallicuskanmanjina cutichiska cachun.

Sajra ruwaskanmanjina iscay cuti cutichiska cachun.

Millaycunata waquichispa uyyachiskanmanjina iscay cuti cutichiska cachun.

<sup>7</sup> Jatunchacuskanmanjina, mana frenoyoj munayninta sajsachiskanmanjinapis payka ñac'arichiska phutichiskataj cachun.

Payka sonkonpi nicun: "Camachinaypaj tiyaska cashani.

Mana viudachu cani, nitaj jayc'ajpis phuticusajchu", nispa.

<sup>8</sup> Chayraycu uj p'unchayllapi manchay llaquicuna payman jamonka, onkoy, phutiy, yarkhaypis.

Ushphayanancama ninawan ruphacyuskataj canka.

Payta juchachaj Señor Dioska callpayojmin, —nispa.

*Cay pacha runas Babiloniamanta llaquicuncu*

<sup>9</sup> Cay pacha camachejcuna Babiloniaj ruphaskanmanta k'oshñita ricuspa llaquiywan wakankancu. Paycunaka paywan cusca juchallicorkancu paywan cuscataj mana frenoyoj munaynincuta sajsacherkancu. <sup>10</sup> Llajtaj ñac'ariyninta manchachicuspataj carullamanta khawaspa nenkancu:

—¡Phutiy, ari, kanpaj jatun Babilonia, callpasapa llajta!

Uj horallapi juicio kanpaj chayamun, —nispa.

<sup>11</sup> Cay pacha comerciantespis paymanta phutiywan wakashancu car-gasnincuta niña ni pi rantiskanraycu. <sup>12</sup> Khatu cargancoka carka kori, kolke, may valorniyoj rumicitus, perlas. Carka imperialjina sumaj valorniyoj linowan sedawan, moradoman pucaman tiñiskas; tucuy k'apaj c'aspi; marfilmanta tucuy ruwaskas, tucuy laya valorniyoj c'aspimanta, broncemanta, fierromanta, marmolmanta ruwaskas. <sup>13</sup> Callarkataj canela, tucuy c'acha k'apayniyojcuna, incienso, mirra, vino, aceite, ñut'u jac'u, trigo; uywas, ovejas, caballos, carretones, runaspis. [Koleraycutaj runacunaj causaynincutapis manacajman tucucherkancu].\*

<sup>14</sup> Urmaska llajtatataj nenkancu:

—¡Sonkoquej tucuy munaskan imaska chincapunña!

¡Tucuy sumaj miqhunayqui, tucuy fino p'achayquipis tucucapunña!

Niñataj ni jayc'ajpis tariconkachu, —nispa.

<sup>15</sup> Chay llajtamanta khapajyaj comercianteska ñac'ariyninta manchachicupsa carullamanta khawankancu. Phutiywantaj wakankancu.

<sup>16</sup> Nenkancutaj:

—¡Phutiy, ari, cay jatun llajtapajka!

Fino morado p'achawan, fino puca p'achawan p'achalliska carka.

Koriwan, may valorniyoj c'anchaj rumicituswan, perlaswan c'achachaska carka.

<sup>17</sup> Uj horallapi chhica khapaj capuynenka chincapun! —nispa.

Tucuy barco apaycachajcuna, barcopi tucuy rejcura, chaypi yana-pajcuna, tucuy kochapi llanc'ajcunapis carullamanta khawasharkancu.

<sup>18</sup> Ruphacyuskamanta k'oshñita ricuspataj khaparicorkancu:

—¡Cay jatun llajtajinaka mana carkachu wajka! —nispa.

<sup>19</sup> Sinch'i phutiywan wakaspa khaparererkancu. Sinch'i phutiynincuta ricuchinancupajtaj umancuman jallp'awan jich'acorkancu. Nerkancutaj:

—¡Phutiy, ari, cay jatun llajtapajka!

Cay llajtaj khapaj capuyninwan tucuy kochapi barcosniyojcunaka kha-pajyarkancu.

Uj horallapi chincapunankáy! —nispa.

\* **18:13** Ninayan.

<sup>20</sup> Chayraycu janaj pachapi cajcuna, cay llajtaj tucucuskanmanta cusicuychej.

Diospa runasninpis cachasninpis willajcunanspis, cusicuychej.

Cay llajta kancunaman sajrata ruwaskanmanta Dios juchachaskan-raycu cusicuychej.

<sup>21</sup> Uj callpasapa angel jatun rumita, molino rumitajina okharispa kochaman wijch'uyorka. Nerkataj:

—Jatun Babiloniaka cayjina sinch'iwan wijch'uska canka. Manaña ni jayc'ajpis cankachu.

<sup>22</sup> Manaña ni jayc'aj kanmanta uyaricamonkachu ni arpa, ni wayñu, ni kena, ni corneta.

Manaña ni jayc'aj kanpa chaypi ni ima ruwajcuna cankachu.

Manaña ni jayc'aj kanmanta uyaricamonkachu molinoj cutaskanka.

<sup>23</sup> Manaña ni jayc'aj kanpa chaypi lamparaka c'anchankachu.

Manaña ni jayc'aj kanmanta uyaricamonkachu ni novio ni novia.

Comerciantesniyqueka cay pachapi jatunpaj khawaskas carkancu.

Laykayniyquiwan tucuy llajtasta pantacherkanqui.

<sup>24</sup> Cay llajtapi Diospa willajcunanspis payman t'akaska runasninpis wañuchiskas carkancu.

Cay pachapi ashqha runas Diospi jap'icuskancuraycu wañuchiskas carkancu.

Chay tucuymanta cay llajta juchachaska cashan,—nispa.

## 19

### *Janaj pachapi yupaychaymanta*

<sup>1</sup> Chaymanta khepata ancha ashqhas taquejtajina janaj pachapi Diosta yupaychajta uyarerkan. Nerkancutaj:

—¡Aleluya! ¡Diosninchejmin tucuya atipajka,\* jatunchaska cajpis, tucuy atiyniyoj cajpis!

<sup>2</sup> Chekantapuni juzgaskanta ricucherka khencha warmita juchachaspa.

Chay khencha warmeka cay pacha runasta juchanwan juchallicherka.

Diospa camachisnintapis wañuracherka.

Chayraycu Dioska payta juchacharka.

<sup>3</sup> Ujtawan nillarkancutaj:

—¡Aleluya!

Khencha warmej ruphashaskanmanta k'oshñeka wiñaypa wiñayninpaj wicherimushan,—nispa.

<sup>4</sup> Chay iscay chunca tawayoj curajcunawan chay tawa causajcunawan jatun tiyanapi tiyaska Diosta yupaycharkancu. Nerkancutaj:

—¡Ajina cachun! ¡Aleluya! —nispa.

### *Diospa Corderon Cristo j casamiento manta*

<sup>5</sup> Chay jatun tiyanamanta nimorka:

—Diosninchejta yupaychaychej, tucuy camachisnin cajcuna payta casojcuna, pisipaj khawaskacunapis jatunpaj khawaskacunapis,—nispa.

<sup>6</sup> Uyarerkanitaj ancha ashqha taquejtajina phajchaj sonaynintajina sinch'i truenocunatajinapis. Nerkancutaj:

—¡Aleluya!

Tucuy atiyniyoj Señor Diosninchej camachinña.

\* **19:1** Literal: salvación.

<sup>7</sup> Mayta cusicunachej, payta jatunchanachej,  
Corderoj casaracuynin chayamuskanraycu.  
Warminpis waquichicunña casaracun nanopaj.

<sup>8</sup> Llimphu lliphipej imperialjina fino linota p'achallicun nanopaj koska  
carka,—nispa.

Chay p'achaka Diospa runasninka chekan causaynincumin.

<sup>9</sup> Chanta niwarka:  
—Kelkay: May cusikas cancu Corderoj casamiento miqhuyninta  
miqhunancupaj wajyaska cajcunaka,—nispa.

Nillawarkataj:  
—Tucuy kelkaskayqueka Diospa cheka niskasninmin,—nispa.

<sup>10</sup> Chay niwajpa ñaupakenmantaj pampacama c'umuycorkani yupay-  
chanapaj. Payrí niwarka:

—¡Amapuni yupaychawaychu! Camachimasillayqui cani. Jesusmanta  
willaj hermanosniyquimanta cani. ¡Diosllata yupaychay! Chekat-  
apuni tucuy nokanchej Jesusmanta willaspa paypa Espiritunnejta  
sut'inchanchej,—nispa.

### *Yuraj caballopi llok'aska cajmanta*

<sup>11</sup> Ricorkanitaj janaj pachata quichaskata. Uj yuraj caballotaj riqhurimorka. Chay caballopi llok'aska cajka niskanta junt'aj caj, cheka cajtaj. Payka chekanta juzgan, sajra cajpa contranpitaj makanacun.

<sup>12</sup> Paypa ñawisnenka ninajina laurashan, umanpitaj ashqha camachina pillusniyoj. Sutin paypi kelkaska cashan, chaytaka paylla yachan.

<sup>13</sup> K'ala yawarchaska p'achawan p'achalliska. Diospa Niskan sutiyoj.

<sup>14</sup> Janaj pachamanta soldado tropastaj yuraj caballospi payta khatimushancu. Yuraj imperialjina llimphu p'achawan p'achalliskastaj cancu.

<sup>15</sup> Diospa Niskan sutiyojpa siminmanta filo t'ujsina espada llojsimushan, chaywan llajtasta wajtan nanopaj. Tucuy llajtasta sinch'i atiywan† camachenka. Tucuy atiynijoj Diospa c'ajaj phiñacuyninwan sajra runasta paylla juchachanka.† <sup>16</sup> P'achanpipis raqhu piernanpipis uj suti kelkaska cashan: CAMACHEJCUNAJ CAMACHEJNINCU; SEÑORCUNAJ SEÑORNINCU:

<sup>17</sup> Ricorkanitaj uj angelta intipi sayashajta. Patata tucuy phawai p'iskosmantaj sinch'ita khaparerka:

—Jamuychej, Diospa jatun miqhuyninta miqhoj tantacamuychej.

<sup>18</sup> Camachejcunaj aychancuta miqhuychej. Capitancunaj aychancuta, callpasapacunaj aychancuta, caballo aychasta, llok'a jcunaj aychancuta, tucuy camachicunata, tucuy mana camachicunata, pisipaj khawaskasta, jatun nanopaj khawaskastapis miqhuychej,—nispa.

<sup>19</sup> Ricorkanitaj chay millay animalta, cay pacha camachejcunata, soldado tropasnincutapis. Paycunaka tantaycucorkancu chay yuraj caballopi llok'aska cajwan paypa soldado tropasnинwanpis makana-

cunancupaj. <sup>20</sup> Millay animalka llulla willajniwan presochaskas carkancu. Willajnenka paypa ñaupakenpi chay marcachicojcunata pantachinan nanopaj ricuchinasta ruwaj carka. Pantachiska runastaj millay animalpa sutinwan marcachicorkancu paypa rijch'acuynintapis yupaycharkancu. Chay millay animalka willajniwan iscaynincu causashaj wijch'uycuskas carkancu azufrewan laurashaj, chay nina

† **19:15** Literal: fierro varawan. † **19:15** Literal: vinopaj sarunapi.

kochaman.<sup>21</sup> Tucuy waj churanacojcunataj wañurachiskas carkancu caballopi llok'aska cajpa siminmanta llojsimoj espadanwan. Tucuy chay p'iskostaj wañuskacunaj aychancuwan sajsacorkancu.

## 20

### *Chay waranka watamanta*

<sup>1</sup> Ricorkanitaj janaj pachamanta uraycamushajta uj angelta. Maquinpi nina kochaj llaventa jatun cadenatawan jap'isharka. <sup>2</sup> Dragontataj jap'iycorka. Dragonka chay ñaupa catari, diablo, Satanás sutiyoj. Paytataj angelka cadenawan wataycorka waranka watapaj. <sup>3</sup> Ajinaspataj nina kochaman wijch'uycorka. Chaypa puncuntataj sumajta wisk'aycorka. Ajinapi Satanaska llajtasta manaña pantachenkachu waranka wata junt'acunancama. Chaymanta khepata pisi tiempollapaj cachariska canan tiyan.

<sup>4</sup> Ricorkani camachina tiyanasta. Tiyanaspi tiyaska cajcunamantaj camachinancupaj\* atiy koska carka. Ricorkani atipajcunaj almasnincuta. Paycunaka millay animalta ni rijch'acuynintapis yupaycharkancuchu. Nitaj frentencupi chayrí maquincupi millay animalpa sutiwan marcachicorkancuchu. Waquenka Jesuspí jap'icuskancumanta willaskancuraycu Diospa niskanraycupis wañuchiskas carkancu. Paycunataj causarimuspa Cristowan cusca waranka watata camacherkancu. <sup>5</sup> Caymin ñaupaj causarimuyka. Chay waj wañuskacunaka mana causarimorkancuchu chay waranka wata junt'acunancama. <sup>6</sup> May cusiska Diosman t'akaska runasnín ñaupaj caj causarimuypi causarimojka. Paycunata iscay caj wañuyka mana imanankachu. Astawanpis Diosman Cristomantaj kayllaycuchejcuna cankancu. Cristowan cuscataj waranka watata camachenkancu.

### *Supay Satanás wiñaypaj atipachicun*

<sup>7</sup> Chay waranka wata tucucojtin supay Satanaska cachariska canka. <sup>8</sup> Tucuy cay pachapi caj llajtasta pantachinanpaj llojsimonka. Chay llajtaska Gog Magogwan cancu. Paycunata tantayconka Diospa contrapi makanacunandanpaj. Paycunaka kocha cantopi t'iujina ashqha mana yupay atina cankancu. <sup>9</sup> Tucuy jallp'a patata junt'amonkancu. Muyuyconkancutaj Diospa runasnínpa cuartelnincuta, chay munaska llajtanta. Muyuycojcunata janaj pachamanta uraycamoj nina ruphaspa wañurachenka. <sup>10</sup> Paycunata pantachej diablotaj azufrewan laurashaj nina kochaman wijch'uycuska canka. Chay nina kochallamantaj millay animalka llulla willajninwan wijch'uycuskasña carkancu. Chaypi paycuna tuta p'unchay wiñaypa wiñayninpaj ñac'arichiskas cankancu.

### *Juchasapacunata Dios juchachan*

<sup>11</sup> Ricorkanitaj uj jatun yuraj tiyanata chaypi tiyaska cajtawan. Paypa ñaupakenmantaka jallp'apis cielopis aykecorkancu chincaporkancutaj. <sup>12</sup> Ricorkanitaj tucuy wañuskacunata, jatunpaj khawaskacunatapis pisipaj khawaskacunatapis, tiyanaj ñaupakenpi sayashajta. Wiñay causayniyojcunaj sutisnincu kelkana libro quichariska carka. Waj librospis quichariskasllataj carkancu. Chay librospis runaspa ruwaskasnincu kelkaskas cancu. Ruwaskasnincu kelkaska caskanmanjina wañuskacunaka juzgaskas carkancu. <sup>13</sup> Wañuskaska tucuy ladosmanta

\* **20:4** Literal: juzganancupaj.

llojsiramorkancu, kochasmanta, uqhu pachamantapis. Sapa ujnjincu ruwaskasnincumanjina juzgaskas carkancu.<sup>14</sup> Wañuypis uqhu pachapis nina kochaman wijch'uycuskas carkancu. Chay nina kochaka iscay caj wañuyñamin.<sup>15</sup> Chay juchachaskacuna tucuynincu nina kochaman wijch'uycuskas carkancu. Paycunaj sutsinincu mana kelkaskachu carkancu wiñay causayniyojcunawan. [Ajinapi Diosmanta wiñaypaj t'akaskas cancu.]†

## 21

### *Mosoj cielomanta mosoj jallp'amantawan*

<sup>1</sup> Ricorkanitaj mosoj cielotawan mosoj jallp'atawan. Ñaupaj caj cielo ñaupaj caj jallp'awanka manaña carkañachu. Kochapis manaña carkañachu. <sup>2</sup> Ricorkanitaj Diospa mosoj santa llajtan Jerusalenta janaj pachamanta uraycamushajta. Novionpaj c'achachaska noviajina waquichiska carka. <sup>3</sup> Uyarerkanitaj jatun tiyanamanta sinch'iwan nimota:

—¡Khawaychej! ¡Diospa tiyacunanka runas chaupipiña! Dioska tucuy atiyninwan paycunawan cusca tiyacaponka. Paycunataj paypa runas-nin cankancu. Dios qui quintaj paycunawan cusca tiyacuspá Diosnincu canka. <sup>4</sup> Ñawisnincumanta tucuy wakaynincuta Dios pichanka. Runasninpajka wañuypis manaña cankachu. Niñataj ni phutiy ni wakay ni ñac'ariy cankachu. Cunanka manaña ñaupaj caj imas canñachu,—nispa.

<sup>5</sup> Jatun tiyanapi tiyaska caj Dios nerka:

—¡Khaway! ¡Tucuy imata mosoja ruwaní! —nispa.

Niwerkataj:

—Kelkay: Cay cheka niskasniytaka junt'anipunimin, —nispa.

<sup>6</sup> Nillawarkataj:

—Ruwsakaña. Noka cani kallarejka, nokataj tucuchaj cani.\* Ch'aquichicojmanka wiñay causayta koj phullchimoj yacuta mana mich'acuspa kollasaj ujyananpaj. <sup>7</sup> Atipajka tucuy chay imasta jap'enka. Paypajtaj Diosnin casaj, paytaj waway canka. <sup>8</sup> Astawanrí manchachicojcunalla, nokapi jap'icuya mana munajcuna, millay causajcuna, runata wañuchejuna, khenchachacojcuna, laykacuna, ruwaska dioscunata yupaychajcuna, tucuy llullacojcunapis —tucuy paycunaka azufrewan laurashaj nina kochaman renkancu. Chayka iscay caj wañuyñamin,—nispa.

### *Mosoj Jerusalén*

<sup>9</sup> Chanta chay kanchis angelesmanta ujnjincu jamuwarka. Paycunaka khepa caj kanchis manchay llaquiycunawan junt'a vasosniyoj kanchis angeles cancu. Parlaycuwarkataj:

—Jamuy, Corderoj warmin noviata ricuchiskayqui, —nispa.

<sup>10</sup> Jatun alto orkoman pusawarka. Santo Espiritutaj atiyninman churawarka jamoj imasta sut'inchanawanpaj. Angelaj Diospa santa llajtan Jerusalenta janaj pachamanta uraycamushajta ricuchiwarka.

<sup>11</sup> Llajtataj Diospa c'acha caynинwan c'anchasharka. Lliphipiynenka mayvalorniyoj rumicitujina, diamantejina, cristaljinataj lliphipisharka.

<sup>12</sup> Jatun alto perkayoj chunca iscayniyoj puncusniyoj carka. Sapa uj

† 20:15 Ninayan. \* 21:6 Literal: alfa omegawan.

puncupitaj uj angel carka. Puncus patapitaj chunca iscayniyoj aylluspa sutsinincu kelkaska carka. Chay aylluska Israelpa wawasniencoja cancu.<sup>13</sup> Inti llojsimuy ladopi quinsa puncusniyoj carka. Wichay ladopi quinsa puncusniyoj, uray ladopi quinsa puncusniyoj, inti yaycuy ladopitaj quinsa puncusniyoj carka.<sup>14</sup> Llajta perkataj chunca iscayniyoj cimientosniyoj carka. Cimientosninpitaj Corderoj chunca iscayniyoj cachasninta sutsinincu kelkaska carka.

<sup>15</sup> Parlawaj angelka uj kori metrojoj carka, llajtata, llajtaj puncusninta, perkantapis medinanpaj. <sup>16</sup> Chay llajtataj cuadrado carka, largonwan anchonwan quiquin carka. Angeltaj metrowan chay llajtata mederka chunca iscayniyoj waranka estadiosta. Chayka phishka pachaj leguasman ninacun. Largonwan anchonwan altonwan quiquin carka.<sup>17</sup> Perkatapis mederka pachaj tawa chunca tawayojoj codosta. Runaj medidanmanjina angelka mederka. Chayka kanchis chunca iscayniyoj metrosman ninacun.

<sup>18</sup> Chay llajtaka kori purumanta ch'uya vidrioman rijch'acoj. Perkasnintaj c'ascachiska diamanteswan c'ancharka. <sup>19</sup> Llajta perkaj cimientosnintaj may valorniyoj rumicituswan c'achachaska carka. Tucuy laya coloresa c'anchaj cimientos carka. Ñaupaj caj cimentoka diamante carka. Iscay caj zafiro; quinsa caj ágata; tawa caj esmeralda;<sup>20</sup> phishka caj ónica; sojta caj cornalina; kanchis caj crisólito; pusaj caj berilo; isk'on caj topacio; chunca caj crisoprasta; chunca ujnyioj caj jacinto; chunca iscayniyoj caj amatista carka.<sup>21</sup> Chunca iscayniyoj puncustaj chunca iscayniyoj perlas carkancu. Sapa uj puncu uj perlamanta carka. Chay llajtaj callesnintaj kori purumanta carka c'anchaj vidriojina ricucoj.

<sup>22</sup> Chay llajtapeka ni ima yupaychana-wasitapis ricorkanichu. Tucuy atiyniyoj Señor Diosmin Corderowan chaypi tiyacun yupaychaska cananpaj. <sup>23</sup> Diospa cheka caynenka llajtata c'ancharka, Corderopis c'anchaynin carka. Chayraycu manaña tiyarkachu ni inti nitaj quilla.<sup>24</sup> Nacioncunataj llajtaj c'anchayninwan purenkancu. Cay pacha camachejcunapis khapaj caynincuta apamonkancu chay llajtaman Diosta jatunchanancupaj. <sup>25</sup> Puncusnintaj ni jayc'aj wisk'acunchu. Tucuy p'unchay quichallaskapuni manamin tutaka chaypi canchu.<sup>26</sup> Chaymantaj apamonkancu nacioncunaj khapaj caynincutawan khapaj capuynincutawan.<sup>27</sup> Chaymanka ni jayc'aj yayconkachu ni ch'ichichaska cajpis ni millay ruwajpis, nitaj llulla cajpis. Manachayrí wiñay causayta koj Corderoj libronpi kelkaska cajcunalla chayman yayconkancu.

## 22

<sup>1</sup> Ricuchillawarkataj vidriojina c'ancharej causayta koj yacuyojo mayuta. Chay mayoka Diospata Corderojtapis tiyananmanta llojsimun.<sup>2</sup> Llajtaj callen chaupitataj rin. Mayojo puraj ladonpi causayta koj sach'a wiñan. Chunca iscayniyoj laya pokoycunata pokon. Sapa quillataj pokoyninta pokon. Sach'a japhisnenka runasta thañichinapajmin.<sup>3</sup> Manaña ni ima cankachu Dios phiñacunanpajjinaka. Chaypitaj Diospata Corderojtapis camachina tiyanan canka. Camachisnin payta yupaychankancu.<sup>4</sup> Paycunataj uyanta riconkancu. Sutintaj frentencupi kelkaska canka.<sup>5</sup> Manaña tutapis cankañachu. Señor Dios runasninta c'anchamonka. Chayraycu lámpara c'anchaytapis inti

c'anchaypis manaña tiyankancchu. Paycunataj wiñaypa wiñayninpaj camachenkancu.

*Cay kelkaskas uskhayta junt'acunanmanta*

<sup>6</sup> Angelka niwarkataj:

—Cay kelkaskaska chekapunimin. Willajcunanman parlaj Señor Dioska angelninta camachisninman cachamorka yuyaskanta paycunaman ricuchinanpaj. Chay yuyaskan uskhayta junt'acunan tiyan.

<sup>7</sup> Jesuska nin: “¡Uskhayta cutimushani!” nispa.

¡May cusiskamin cay libropi sut'inchananpaj kelkaska niskasninta casojka!

<sup>8</sup> Noka, Juan, chay imasta uyarerkani ricorkanitaj. Uyarispas ricuspataj chay imasta ricuchiwaj angelpa ñaupakenpi pampacama c'umuycorkani payta yupaychanapaj. <sup>9</sup> Payrí niwarka:

—¡Amapuni yupaychawaychu! Camachimasillayqui cani. Willaj hermanosniyquimanta, cay libropi kelkaskasta casojcunamanta cani. ¡Diosllata yupaychay! —nispa.

<sup>10</sup> Nillawarkataj:

—Cay libropi sut'inchaska kelkaskata ama wisk'aychu junt'acunan tiempo chayamushaskanraycu. <sup>11</sup> Sajrapi causajka sajrallapipuni causachun; millay cajka millayllapuni cachun; chekan cajta ruwajka chekan cajllatapuni ruwachun; Diosman t'akaska cajpis payman t'akaskallapuni cachun, —nispa.

<sup>12</sup> Jesús nin:

—¡Uskhayta cutimushani! Cutimuspataj ruwaskanmanjina sapa ujman jap'inan cajta kosaj. <sup>13</sup> Noka ñaupaj caj cani, nokataj khepa caj cani.\* Noka cani kallarejka, nokataj tucuchaj cani.

<sup>14</sup> May cusiskas cancu juchasnincumanta† llimphuchaska cajcunaka. Ajinapi wiñay causayta koj sach'amanta miqhuyna atenkancu. Chay llajtaj puncusintapis yaycuya atenkancu. <sup>15</sup> Astawanrí alkojina cajcunaka, laykacuna, khenchacuna, runata wañuchejcuna, ruwaska dioscunata yupaychajcuna, tucuy llulla cajta munacoj ruwajtaj, llajta jawapi cankancu, —nispa.

*Khepa caj niskan*

<sup>16</sup> —Noka, Jesús, angelniyta cachamorkani chay imasta iglesiasman sut'inchananpaj. Noka cani Davidpa Saphin, Davidpa aylluntaj, sut'iyay c'anchaj ch'asca. <sup>17</sup> Santo Espirituwan noviawan nincu:

—Jamuy.

Uyarejka nichun:

—Jamuy.

Ch'aquichicojka jamuchun. Pillapis munajka wiñay causayta koj yacuta ujyachun khasillamanta.

<sup>18</sup> Cay libropi kelkaska sut'inchaskasta tucuy uyarejman noka yuyaychani: Pillapis chay sut'inchaskasman yapaycunman chayka, Dios payman yapaycullankataj cay libropi kelkaska caj manchay llaquiyuncunata.

<sup>19</sup> Pillapis cay libropi caj sut'inchaskasmanta khechunman chayka, Dios paymanta khechullankataj cay libropi kelkaska caj cusicuyuncunata. Ajinapi chay runaka mana miqhonkachu wiñay causayta koj sach'amanta nitaj Diospa‡ llajtanmanpis yayconkachu.

\* <sup>22:13</sup> Literal: alfa omegawan. † <sup>22:14</sup> Literal: p'achasnincu. ‡ <sup>22:19</sup> Literal: santa.

<sup>20</sup> Chay imasta yuyaychajka nillarkataj:  
—¡Arí, uskhayta cutimushani! —nispa.

¡Ajina cachun, cutimuy, Señor Jesús!

<sup>21</sup> Señorninchej Jesuspa c'acha yanapaynin tucuy kancunawan cachun.  
Ajina cachun.